



Xtidxcoob Dios ni biädnä
dad Jesucrist

Mitla Zapotec New Testament

Contents

San Mateo	1
San Marcos	40
San Lucas	64
San Juan	106
Hechos	135
Romanos	176
1 Corintios	192
2 Corintios	208
Gálatas	218
Efesios	224
Filipenses	229
Colosenses	233
1 Tesalonicenses	237
2 Tesalonicenses	240
1 Timoteo	242
2 Timoteo	246
Tito	249
Filemón	251
Hebreos	252
Santiago	264
1 Pedro	268
2 Pedro	273
1 Juan	276
2 Juan	281
3 Juan	282
Judas	283
Apocalipsis	285

Xtidxcoob Dios ni biädnä dad Jesucrist

New Testament in Zapotec, Mitla (MX:zaw:Zapotec, Mitla)

copyright © 2006 Wycliffe Bible Translators, Inc.

© 2006, Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright information.

You do not sell this work for a profit.

You do not change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

ISBN 978-1-5313-0748-6

PDF generated on 21 Sep 2016 from source files dated 21 Sep 2016

5cff1274-8dc3-5398-a94d-f6033bb363c9

This print-on-demand edition of Scripture is designed, produced, and provided at cost by the Digital Bible Society. This is made possible through partnerships with the Bible League of Canada, Open Doors International and other missions and translation agencies. We are deeply grateful for the sacrifices made in translating this edition of Scripture and the generosity of others in making this Bible available to you.

To order additional copies of this Bible or hundreds of translations like it or to learn more about our ministries and the mission of Scripture distribution in every language, we invite you to visit www.DBS.org (USA), www.BibleLeague.ca (Canada), and www.OpenDoors.org (Europe). May God bless your work in sharing and teaching these Scriptures, until, as it is written, the earth is “*filled with the knowledge of the glory of the LORD, as the waters cover the sea.*” (Habakkuk 2:14)

Guijtz Ni Bacuaa Mateo

*Retoxpengoldoo Jesucrist
(Lc. 3:23-38)*

¹Guijtz ni rusule' laj retoxpengoldoo xten Jesucrist xi'n toDavid, xi'n toAbraham.

²Abraham gujc xtag Isaac, Isaac gujc xtag Jacob, Jacob gujc xtag Judá con rebejtni.

³Judá con Tamar gujc xcuzajn Fares con Zara. Fares gujc xtag Esrom, Esrom gujc

xtad Aram. ⁴Aram gujc xtag Aminadab. Aminadab gujc xtag Naasón. Naasón gujc

xtad Salmón. ⁵Salmón con Rahab gujc xcuzajn Booz. Booz con Rut gujc xcuzajn

Obed. Obed gujc xtag Isaí. ⁶Isaí gujc xtag reii David. David con nani gujc chää'l Urías

gujc xcuzajn Salomón.

⁷Salomón gujc xtag Roboam. Roboam gujc xtag Abías. Abías gujc xtag Asa. ⁸Asa gujc xtag Josafat. Josafat gujc xtag Joram.

Joram gujc xtag Uzías. ⁹Uzías gujc xtag Jotam. Jotam gujc xtag Acaz. Acaz gujc

xtad Ezequías. ¹⁰Ezequías gujc xtag Man-

asés. Manasés gujc xtag Amón. Amón gujc xtag Josías. ¹¹Josías gujc xtag Jeconías con rebetni cheni huij reben Israel pres lo guded Babilonia.

¹²Che gudejd huij rebejngä pres Babilo-

nia, dxejc guyu' xi'n Jeconías, Salatiel. Salatiel gujc xtag Zorobabel. ¹³Zorobabel

gujc xtag Abiud. Abiud gujc xtag Eliaquim. Eliaquim gujc xtag Azor. ¹⁴Azor gujc xtag Sadoc. Sadoc gujc xtag Aquim. Aquim gujc xtag Eliud. ¹⁵Eliud gujc xtag Eleazar.

Eleazar gujc xtag Matán. Matán gujc xtag Jacob. ¹⁶Jacob gujc xtag José chää'l Marii

nani gujc xnan Jesús ni birlaj Crist.

¹⁷Ni'cni gujc tzudaj xfamil reni agudejd gubi'reni lo guedxliujre che gubajnl toAbram cheni gubajnliza torei David.

Tzudajza rexagdoo najc reni gudejd cheni gubajnl toDavid cheni huijli reben Israel pres Babilonia. Stzudaj rexagdoo najc reni gudejd cheni birlilireni pres Babilonia che gojlli Crist.

*Cheni gojl Jesucrist
(Lc. 2:1-7)*

¹⁸Scree gujc cheni gojl Jesucrist. Abia'n xnanni, Marii, diidx guchnaani José ni gac chää'l. Per ansde xca' sa'reni, Marii agac

nuxi'nni sa'csi biääd Sprit Dyan xten Dios lojni. ¹⁹José com najcni te bensa'c, di rlajzni nuço'nni Marii nez loj rebejn te niacbeereni, ni'c bejnni xhigab Guronxhiga'tzni Marii. ²⁰Xhigabga cayujnni cheni baluiloj te xangl Dios lojni, lo bacal räjpn lojni:

—José xajg toDavid, na'c guidxejblu xca'l Marii gacni chäällu sa'csi xi'nni nani chu najc xten Sprit Dyan xten Dios.

²¹Che gaal xi'nni cuälajluni Jesús sa'csi laani guslaani rexpejnni lo rextojlreni.

²²Guiraa redee gujc si'c te guzojb diidx ni gunii tej ni bacuaa xtidx Dios. Räjpn:

²³Suu te dxapxteeb báz, sajl te xingaanni nani gurilaji: Emanuel, (lajni sälöj Dios nabajn con nuure).

²⁴Che gubajn José lo bacal, bejnni si'cni räjp xangl Dad lojni. Cua'ni Marii gujc chää'l. ²⁵Luxh dini niembeeni si'c chää'l dxejli cheni gudejd gojl xingangalojni ni gulälajni Jesús.

2

Che biädhuii reben nanduxh ni laa remagos lojni

¹Cheni gojl Jesús nen guedx Belén xten guedx Judea, najc Herodes reii xten guedx Judea. Dxejc bidzujn rebejnajn ni najc remagos, siäädreni nejz cadre rliejin gubijdx, bidzujnreni guedx Jerusalén. ²Rniabdiidxreni:

—¿Con reii xten reben Israel nani golgaj, ä? Nurnu abihuüinu xpajlni laadxlinu, ni'cni siopdonnuni.

³Che biejn diajg reii Herodes diidxga, guyuduxhni yärsia' näjza guiraa reben Jerusalén. ⁴Dxejcti batie'ni guiraa rebixhojro ni rnibee loj rebixhojz, näjza guiraa renani ruluii xleii Moisés lo rebejn te gunabdiidxni lojreni:

—Caro gaal Crist?

⁵Laareni räjpn:

—Nen guedx Belén xten guedx Judea sa'csi si'c gunii niguii ni bacuaa xtidx Dios che räjpn:

⁶Luj guedx Belén xten guedx Judea, dilu gajc maazru huin loj reguedxro xten guedx Judea sa'csi nen guedxre guirii tej nani guinibee, te ni ga'p rexpenä Israel.

⁷ Dxejcti guredx-xhiga'tz Herodes remagos te gunabdiidxni gucti biricaj bajl nani bahuiireni. ⁸ Dxejcti baxhalnirení guedx Belén, räjpní lojrení:

—Colcháj ro'c, colnabdiidxsa'c xcuent biuuxga te che abidxáltuni jiändniitu loä te näjza narä chaganäni.

⁹ Che biejn diajgreni xtidx reii, sä'tireni. Bajl nani bahuiireni lagajc lajdxreni lajts nijdni lojreni. Che bidzujnlirení cadro yu' bázga, dxejcrú guzobdxí bajlga. ¹⁰ Che bahui remagos loj bajlga, rbalazduxhreni.

¹¹ Si'c bidzujnreni. Che biu'reni neñ yu', bahuiireni lo bázga con xnanní Marii. Dx-ejcti bazuxhijbreni, gojñreni bázga, bax-halreni rexçálnasa'reni basazaljzreni oor, näjza yaal näjza yalnejxh. ¹² Che agoj guibi'reni, gunixçálreni, räjpní Dios lojreni:

—Na'c guibi'tu nez loj Herodes.

Dxejcti gunaaazreni garencá nez yuj, guibi'reni lajdxreni.

Che siini Egipto

¹³ Che sii remagos lajdxreni, biääd te xangl Dios baluilojní lo José lo bacal, räjpní:

—Huistie, cua' biuxe're näjza xnanni, huinäreni Egipto. Ro'c gulájz che guiniäli lojlu. Siguil Herodes biuxe're sa'csi rlajzni ju'tnini.

¹⁴ Dxejc huistiegajc José, cua'ni biuxe're näjza xnanni, lagajc yäälga biriireni, siireni nez Egipto. ¹⁵ Ro'c guyu'reni cheni gujtli Herodes. Guiraa dee guzajc te guzojb diidx ni bacuaa niguii ni gunii xtidx Dios che räjpní: "Egiptoli guredxä xi'nä."

Che guinibee Herodes gujt rebiuxbáz

¹⁶ Che gucbee Herodes abasguee remagosni, bidxechduxhni. Gunibeeni guet guiraa rebiuxnigui ni yu' tio'p ijz näjza rebiixe' ni yu' guxiiru dxej, guideb neñ guedx Belén näjza reguejdx ni re' gabiga, si'cti redxej ni räjpní remagos lojni. ¹⁷ Dxejc guzojb diidx ni bacuaa Jeremías ni gunii xtidx Dios che räjpní:

¹⁸ Biejn xse' bejñ neñ guedx Ramá, te yälhuinduxh, te yälrbedxdij, yälrbedxnen:

laa Raquel ni roon yejc rexínni.

Naaddini jiäjl lajzni sa'csi agujt rexínni.

¹⁹ Cheni gujt Herodes, dxejc lo te bacal huiluiloj xangl Dios loj José neñ Egipto.

²⁰ Räjpní:

—Huistie, cua' biuxe're näjza xnanni, gubisac nez Israel sa'csi agujt renani rlajz ju't biuxe're.

²¹ Dxejcti huistie José, cua'ni biuxe' näjza xnanni. Gubi'reni Israel. ²² Luxh che biejn diajgni rnibee Arquelao guejdx Judea lacuua Herodes, xtadni, bidxejbní nuiini ro'c. Dxejc gunisac Dios lojni loj te bacal, ni'c huijni lo reguejdx xten Galilee. ²³ Dxejc biädläjzni neñ guejdx ni laa Nazare'te si'c guzojb diidx ni bacuaa niguii ni gunii xtidx Dios cheni räjpní: "Sírilajni nazaren."

3

*Juan Bautist basule' xtidx Dios loj rebejn
(Mr. 1:1-8; Lc. 3:1-9, 15-17; Jn. 1:19-28)*

¹Nen redxejga biääd Juan Bautist lo reyubijdz xten guedx Judea, ro'c cagulijdxni, ²cayäjpní:

—Colgusiechljaztu rextojltu sa'csi xcälrnibee Dios abidzungajxhni.

³Juan najc nani basä't Isaías, te niguii ni gunii xtidx Dios, cheni bacuaani:
Riejn xse' te ni rbedxa' nez lo reyubijdz:
"Colguslii xnezyuj Dad, colguslii xnezyula-jzni."

⁴Najcw Juan xquichlajd cameii. Naliib te duguijd xque'ni. Rajwni guxha't näjza dzujn xten baseerguijxh. ⁵Riääd reben guedx Jerusalén näj guiraa reben Judea näjza rebejn ni tre' gajxh nez ro' gueu Jordán, riädcuadijagreni xtiidxni. ⁶Che ruxhobdojleni xtojleni, rutiobnis Juan-reni ro' gueu Jordán.

⁷Che bahuiini siääd xhidajl reben guidoo ni najc refarisee näjza ni najc resaducee, rlajzreni gutiobnisnirení, räjpní lojreni:

—La'tu benguidxdugh, najctu si'c bäl. ¿Chu balijdxtu guxuntu loj xcälrwdx'ch Dios ni siääd? ⁸Colguibansa'c si'cni nungäjil te fiipac rebejn gulipac abasiechljaztu. ⁹Na'c litis guntu xhigab naatu: "¡Ni nurnu najcnu rexagdoo to Abram!" Rniliä lojtu, sajc xca' Dios reguijre gunni gacreni rexí'n to Abram. ¹⁰Asojb guibyajg lo xlobaa reyajg, luxh guiraa reyajg nani di ninexhsa'c xcaj lojni, sidinni te checni. ¹¹Narä guli-caní rustiobnisá con nis si'c te seen cheni abasiechljaztu, abaxhobdojltu. Niluxh nani siääd detzä sutiobnisni la'tu con Sprit Dxan xten Dios näjza con guiboo. Rnibeeruni

loä. Bensacduxhni. Nicla xcura'chni di-gacdi chanää.¹² Aca'ni xhi cojn gusiani triuu xtensi te chuchee triuuga nen ngodx xtensi. Dxejcti guixtriuuga, suze'cni guijxhga lo guiboo ni rejç par tejpas.

*Che gurobnis Jesús
(Mr. 1:9-11; Lc. 3:21-22)*

¹³ Dxejcti birii Jesús nez Galilee, bidzujnni ro' gueu Jordán cadro yu' Juan te gutiobnis Juanni.¹⁴ Niluxh naaddi Juan gutiobnis Jesús. Räjp Juan lojni:

—Luj nanab gutiobnislu narä, niluxh naj alga luj siäddlu loä te gutiobnisalu.

¹⁵ Dxejcti räjp Jesús lojni:

—Basaan gacni si'c naj, sa'csi nanab gusoobnu guiraa ni rlajz Dios gac.

Dxejctiru batiobnis Juan Jesús.

¹⁶ Cheni gulujx gurobnis Jesús, birigajcni lo nis. Dxejcti bixal xhaguiba, bahuiini siädyäjt Sprit Dxan xten Dios si'c te palom, biäjtni lojni.¹⁷ Dxejcti xhaguibaali biejn diaj-greni te xse' ni räjp:

—Dee najc xi'nä ni sanälazä. Laani rbanälazä.

4

*Che huij Jesús lo reyubijdz
(Mr. 1:12-13; Lc. 4:1-13)*

¹ Dxejcti bejn Sprit Dxan xten Dios huij Jesús nez lo reyubijdz te nejzga nuhuual bendxbab Jesús.

² Che gulujx bacua'n Jesús tiuu gubijdx, tiuu guxhijn, gulaanni.³ Sas biääd bendxbab lojni, räjpni:

—Palga guliuli Xi'n Dioslu, gunibee gac reguigure yätxtil.

⁴ Badzu' Jesús diidxre lojni, räjpni:

—Loj reguigure xten Dios caj scree: "Xhet ganaxdi yälxtil guibajñ rebejñ; sibajñzani con guiraa diidx nami rnii Dios."

⁵ Dxejcti huinä bendxbab Jesús guedx Jerusalén. Gulä'pnini jiaa yejc xques guidoro. Dxejcti räjp bendxbab lojni:

⁶ —Palga Xi'n Dios luj, bitiäjs lo yujli, sa'csi scree caj loj rexquijtz Dios:

Sinibee Dios rexanglni ga'preni luj; siliäsreni luj con naareni didi gacnaj ni'l lu reguigja.

⁷ Badzu' Jesús diidxre lojni, räjpni:

—Caj loj rexquijtz Dios: "Na'c fallu Dad ni najc Xtioslu."

⁸ Stee huält huinä bendxbab Jesús yejc te danro. Dxejcti baluiini lojni guiraa reguejdx, reguedxro ni tre' lo guedxliuj naj guiraa xcälnasa'creni.⁹ Dxejcti räjpni loj Jesús:

—Guiraa redee sunidxä lojlu palga guzuxhijblu nez loä te ganlu narä.

¹⁰ Dxejcti räjp Jesús lojni:

—¡Huij nez rec bendxbab! Scree caj loj rexquijtz Dios: "Dad Xtiostislu garlu; lojtisni chulu."

¹¹ Dxejcti gubicaj bendxbab loj Jesús. Dxejcti biääd rexangl Dios biädhuiireni Jesús.

Gusloj Jesús cayijn xtzunni

(Mr. 1:14-15; Lc. 4:14-15)

¹² Che biejn diajg Jesús yu' Juan nen ladzguib, huijni nez Galilee.¹³ Dxejcti gudejdni guedx Nasare't, huiläjzni guedx Capernaum ni tre' gajxh nez ro' nis, nez reguejdx Zabulón con Neftalí.¹⁴ Si'c gujc te guzojb diidx ni bacuaa Isaías ni gunii xtidx Dios:

¹⁵ Lajdx Zabulón, lajdx Neftalí, nezyuj ni rij nez ro' nisdoo, stelaad gueu Jordán, Galilee cadro rbäjz rebejñ nani di gac rex-pen Israel.

¹⁶ Rebejñ nani rbäjz neñ te yälçäjy abahui-ireni te bajlga, luxh bajlga basanij xcäriejn renani nabajn lo xcälr dxejbl, lo xpalaal yälgujt.

¹⁷ Dxejcti gusloj cagulijdx Jesús, räjpni:

—Colgusiechlažtu, colguxhobdojl te guibansa'ctu sa'csi abidzungajxh xcälrnibee Dios.

Che gurejdx Jesús tajp xpejnni

(Mr. 1:16-20; Lc. 5:1-11)

¹⁸ Sasaj Jesús nez ro' nisdoo xten Galilee che bahuiini lo tio'p niguui. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bälj, ni'c cacuareni guijxh lo nisdoo.¹⁹ Dxejcti räjp Jesús lojreni:

—Cołtanajl narä. Naj riniaaztu bälj, niluxh narä gunä cueedxtu rebejñ.

²⁰ Lagajc dxejcti gusloj cagulijdx Jesús nez sanajlreni laani.

²¹ Che gudejdreni ro'c, bahuiini loj stio'p niguui, Jacoob con bejtzni Juan. Yu'reni neñ te barcw con xtadreni, ni laa Zebedeo cayunsa'creni guijxh. Dxejcti gurejdx Jesús-reni.

²² Lagajc dxejcti gusloj cagulijdx Jesús nez sanajlreni laani.

Caguluii Jesús xhidajl bejn

(Lc. 6:17-19)

²³ Sasajti Jesús guideb nez región xten Galilee, caguluiini neñ tejga rexquidooreni. Cagusule'ni redidxcoob xten xcälrnibee Dios. Cagusiajczani guiraa yälracxhuu ni rajc rebejn guejdxga, guiraa yälgujidx. ²⁴ Bejin diajg reben Siria diidx xcient ni cayujn Jesús. Sas biädnäreni guiraa rebenoracxhuu ni cayajc guiraloj yälgujidx, yälñayan; guiraa reni rajc yejcreni, guiraa reni rajc malyälgujidx, reni rajc yälguidxbej, guiraareni abixu'n tiejxhreni. Dxejcti basiajç Jesús rebejngá.

²⁵ Xhidalduxh ben Galilee huinajlni, náj reben reguedx Decápolis, nájza reben guedx Jerusalén, nájza reben Judea nájza rebejn ni tre' stelaad gueu Jordán.

5

Yejc te dajn balijdx Jesucrist rebejn

¹ Che bahuui Jesús loj reben xhidajl, huä'pni yejc te dajn. Dxejcti gubig rexpejnni ni gurejdxni lojni. ² Dxejc gusloj caguluii Jesús reni'c, scree räjpní:

Rebejn ni sibaalajz
(Lc. 6:20-23)

³ —Sibaalajz rebejn nani nanchisee rquinduxhreni xcälracnáj Dios, sa'csi laareni nungäjreni xcälrnibee Dios.

⁴ —Sibaalajz rebejn nani rac-huin lajzreni xcient rextojreni, sa'csi sudzucaj Dios xtoljreni, susiäjlni lajzreni.

⁵ —Sibaalajz rebejn nani nadolajz nani rlajz guntis si'cni rnibee Dios, sa'csi sacnäj Dios-reni lo xcälnabajnreni lo guedxliujre.

⁶ —Sibaalajz rebejn ni nastoochan rliaanreni, riojleni, sa'csi rlajzreni guibañsa'ctisreni nez loj Dios, sa'csi sudeed Dios lojreni guiraa ni rniabreni.

⁷ —Sibaalajz rebejn nani rulaslajz sa'reni, sa'csi sulaslajzza Diosreni.

⁸ —Sibaalajz rebejn nani najc nayatis lastooreni rujnreni rexhigabsa'c xten Dios sa'csi suhuiireni lo Dios.

⁹ —Sibaalajz rebejn nani ruscuecdilajz sabejnreni, sa'csi laareni sirilajreni rex'i'n Dios.

¹⁰ —Sibaalajz rebejn nani rusutipj lajzreni che rusacsí bejnreni sa'csi nabansa'creni nez loj Dios, sa'csi xtenreni najc xcälrnibee Dios xhaguibaa.

¹¹ 'Colspaalajztu che gusacsí bejntu tilnäjreni la'tu, guiniireni guiraloj didx-xhii xcient xtidxä. ¹² Colguibaalajz, colbalajz sa'csi xhaguibaali sunidxdugh Dios xcient xtzuuntu. Sigajcza basacsíreni reniguui ni gubajn galoo ni gunii xtidx Dios.

*La'tu najctu si'c sejd lo guedxliujre
(Mr. 9:50; Lc. 14:34-35)*

¹³ Räjzpani:

—La'tu najctu si'c sejd lo guedxliujre. Palga di sejd gac nadzujuj, ¿xho gacsacni nadzujuj? ¿Xhi gun bejnni dxejc? Susälreni sejdga detz yu', suläj bejn yejcni.

¹⁴ La'tu najctu si'c te bianij lo guedxliujre. Te guejdx nani tre'jiaa yejc te dajn, digacdi guiga'tzni. ¹⁵ Digacdi xcaguij te bajl dxejcti jiäuuni neñ te caj. Maazru huen soobni jiaa neñ te gandilieer te gusänijni loj guiraa rebejn ni tre' neñ yu'. ¹⁶ Xcälnabansa'ctu najc si'c te bajl loj reben guedxliuj. Suhuiireni xtzunsa'ctu dxejc siliä'preni xpala'n xtradtu ni yu' xhaguibaa.

Ruluii Jesús xcient leii

¹⁷ Räjzpani:

—Na'c guntu xhigab siägduzuá leii xten toMoisés, niclaza rediidx ni baluui redad ni gunii xtidx Dios. Xhet siäddzucaá-dini, narä siälä te guluiäpacni si'cni najcni.

¹⁸ Rniliápac, dxejli che ni nitloj guibaa nájza guedxliuj, nicla tej letre ni caj loj leii di nit. Sajcpac guiralií ni caj lo reguítzga.

¹⁹ Ni'cni chutis ni rlajz gusaan te diidx nani caj loj leii, mase te didxbázni, luxh ruluiini gun bejn si'c, laani guxiduxh sajcní lajdx Dios guibaa. Niluxh renani rucuadajg xtidx leii, luxh rujnpacreni si'cni caj lo leii, ruluiizani leii, bensacduxh gacni lajdx Dios guibaa. ²⁰ Ni'cni rniä lojtu, palga ditu guns'a'cru xtzun Dios, ditu guibañsa'cru loj reni najn xcient xleii toMoisés, nájza loj reben guidoo ni laa farisee, dipactu jiu' lajdx Dios xhaguibaa.

*Ruluii Jesús xcient yälrdxe'ch
(Lc. 12:57-59)*

²¹ Räjzpani:

—Abiejenza diajgtu nani gunii reben-goldoo: "Na'c ju'tlu. Chutis te nani ju't sa'ni, sinärenini lo guxhtis te jiäuuni neñ latzguuib." ²² Niluxh narä rniä chutis nani guidxechduxh lo sa'ni sijni lo guxhtis. Chutis ni guinii didxnaj lo sa'ni, sijni lo

juezj. Chutis ni gäb lo sa'ni: "bennayällajz" sidejdni loj yälguxhtis xten Dios, sijni gabijl cadro cayejc guiboduxh.

²³ 'Che sanälu gojn guidoo te gusa'nlu ni lo bacuug, palga guinaj lajzlu yu' chu lo cadxe'chlu, ²⁴ basansijc gojn xtenlu lagajc ro'c, huisiälxgaa diidx con sa'l, dxejcti guibi'lu te gac gusa'nlu gojn xtenlu.

²⁵ 'Palga yu' chu rdxe'ch lojlu, basquejn basiäjl diidx con laani lagajc cheni sasanäjluni lonezyuj te di guteedni luj lo juejz. Luxh juejz suteedni luj loj reguixhajg te gusäureni luj neñ latzguiib. ²⁶ Rniliápac lojlu: "Dilu guirii ro'c palga dilu cue'c guirallii meel nani guiniabni lojlu."

Ruluii Jesús xcuent yälrusguee sa'ni

²⁷ Räjzpani:

—Abiejn diajgtu guniireni galoo: "Na'c guesnäjtü gunaa nani di gac chäältü."

²⁸ Narä rniä, chutis te nani fii loj te gunaa dxejcti guisia' lajzni gunaaga, abejnni dojl neñ lastooni. ²⁹ Palga balojlu ladbee rujn rujnlu dojl, guläani basälni te laad sa'csi hueenru gunijthu te balojlu quela chää guideb tiejxhlu gabijl. ³⁰ Palga naalu ladbee rujn rujnlu dojl, batiu'ni sa'csi hueenru gunijthu te naalu quela chää guideb tiejxhlu gabijl.

*Ruluii Jesús xcuent yälru'o'n chääl bejn
(Mt. 19:9; Mr. 10:11-12; Lc. 16:18)*

³¹ Räjzpani:

—Abiejn diajgtu guniireni galoo: "Chutis niguui ni rlajz guro'n chäälni, nanabtis gudeedni te gijitz nani rnií abaro'nni chäälni." ³² Narä rniä, niguui nani guro'n chäälni niluxh xhet dojldi bejn chäälni, niguiga sujn gun chäälni yälgubejxh, niluxh chutis ni guchnaa gunaaga sujnzanii yälgubejxh.

Ruluii Jesús xcuent che ria'n diidx

³³ Räjzpani:

—Abiejnza diajgtu gunii rebengool: "Che ria'nlu diidx lo Dios gunlu xhi gunlu, na'c jial lajzlu; basa'pac xtiidxtu lo Dios."

³⁴ Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios, ³⁵ nicla por loj quedxliuj sa'csi ro'c rsiuj ni'ni; nicla por quedx Jerusalén sa'csi ro'c najc quedxlajdx reiiro, ³⁶ niclaza por lagajc bitiuyejclu, sa'csi digacdi guncheelu te guichyas niclaza

te guichnol, nicla tej guijch. ³⁷ Nanab guiniitishu: "Mbj" o "Ajndi". Palga yu' xhiru rniilu, bëndxbajc najc ni rujn rniiluni.

*Chanälajzni rebejn ni rdxe'ch lojni
(Lc. 6:29-30)*

³⁸ Räjzpani:

—Abiejn diajgtu gunii rebengool galoo: "Te baloj por ste baloj, te läjy por ste läjy, nalajznu bejn lo sa'l si'ctis ni rujnni lojlu."

³⁹ Narä rniä, na'c tilnäjlu te bejn ni bejn te cos guijdx lojlu. Palga chääzni ladbee lojlu badeed stelaad lojlu chääzni. ⁴⁰ Palga yu' chu rlajz tilnäjlu te xca'ni xcamangwlu, badeedza näj xsa'cwlü lojni. ⁴¹ Palga yu' chu guinibee guulu xcargwni te kilómetro, huinäni tio'p kilómetro. ⁴² Nani guiniab xhi guiniabxlia'ni lojlu, badeedni. Nani guiniablaa xhi guinablaani lojlu na'c gudx-ojnluni lojni, na'c gäblu: "Xhetini."

⁴³ 'Abiejn diajgtu gunii rebengool: "Colchanälajz sa'tu. Colguidxe'ch lojrenani rdxe'ch lojtu." ⁴⁴ Narä rniä lojtu, colchanälajz rebejn ni rdxe'ch lojtu. Benle' yejc reni rgue lojlu. Colyejn dxunsa'c lojrenani rdxe'ch lojtu. Colcuejdx, colnab loj Dios xcuent rebejn nani rdxagdijltu, rusacsíreni la'tu, ⁴⁵ te si'c gactu xi'n xtadtu ni yu' xhaguibaa nani rujn rii xcubijdxni lo rebensa'c sigajcza lo reben guijdx. Rujnzani riajb nisguj lo rebensa'c sigajcza lo rebenguidx. ⁴⁶ Palga la'tu chanälajztu lagajctis rebejn nani rinälajz la'tu, *¿xhi gaan guntu dxejc?* Najctu lagajc si'c najc rebejn ni rutie' meel ni rajx lo gubier.

⁴⁷ Palga guiniitu: "Xchan", lagajctis lojresa'tu, *¿xhini'c rujntu ni najc hueenru lo chutis bejn?* *¿La et sigajcdiza rujn rebejn nani di gumbee Dios?* ⁴⁸ Colyejc bënsa'c si'c ni najc xtadtu ni yu' xhaguibaa.

6

Ruluii Jesús xho gudeedni gojn

¹ Räjzpani:

—Na'c gusäbdiidx guntu dzunsa'c nez loj rebejn te fiitisreni xhi rujntu. Palga gusäbdiidxtu de xtadtu ni yu' xhaguibaa guniidx xhi xca'tu. ² Che gudeedlu gojn, na'c güilu diidx xhi badeedlu. Na'c gunlu si'c rujn rebejn nani rusguee neñ reguidoo, näjza lad nezyuj. Rujnsireni si'c te ruhuij rebejn xhi rujnreni te rliä'p rebejn xpala'nreni. Narä rniä acua'reni gaan xtenreni. ³ Luj

che gudeedlu gojn xtenlu, na'c gacbee nicla tej xamiiglu xhi badeedlu, ⁴ te gac gojn xtenlu xhiga'tz. Dxejcti xtradlu ni cahuii nani bejnlu xhiga'tz, sacnäjni luj nez loj rebejn.

Ruluii Jesucrist xho cueedx, guiniabni lo Dios

(Lc. 11:2-4)

⁵Räjzpani:

—Cheni rbejdx, rniabtu lo Dios, na'c guntu si'c rujn rebenguidoo ni rusguee. Rchaglajzreni rniabreni lo Dios rsiulilireni ⁶nen reyu' cadro riel xtidx Dios, näjza guiraa resquiin, näjza nez ronejz te ruhuii rebejn xho rujnreni. Rniliápac, acua'reni gaan xtenreni. ⁶Naj luj cheni cueedx, guiniablu lo Dios, biu' ⁷nen xyu'u. Basäuu ro' yu'ga, dxejcti xhiga'tz gunii loj xtradlu ni yu' xhaguibaa. Dxejcti xtradlu ni cahuii xhi rujnlu xhiga'tz, sacnäjni luj nez loj rebejn.

⁷Cheni caniit u lo Dios, na'c guiniasactu balti huált rediidix nani aguniit. Si'c rujn rebejn nani di gumbee Dios. Naareni sa'csi sanuutis rniireni xhidajl diidx balti huált, siejn diajg Dios. ⁸Na'c guntu sigajc ni rujnreni, sa'csi anajn xtradlu xhini'c rqui-intu che guiniabtuni lojni. ⁹Ni'cni scree colguinii lo Dios:

Xtradnu ni yu' xhaguibaa dxan najc lajlu.

¹⁰Sujiääd xcälrnibeelu;

bejn si'cni rlajzlu lo guedxliuijre sigajc ru-jnlu xhaguibaa.

¹¹Nadxej baniidx xcu'nnu sa' ni rdaunu guira dxej.

¹²Basiäjl lajzlu redojl xtenu si'c riäjl la-jznu redojl xten rebejn ni rujn dojl loonu.

¹³Na'c gusaanlu jiaabnu xhigabguijdx, baslaa nuure lo dojl, sa'csi xten guejblu najc yälrnibee, yälnadip näjza yälrdimbicha' par tejpas.

Sugacni si'c.

¹⁴Palga la'tu gusiäjl lajzlu redojl ni rujn rebejn lojtu, xtradlu ni yu' xhaguibaa susiäjlza lajznii rextojltu. ¹⁵Palga ditu gusiäjl lajzlu redojl ni rujn rebejn lojtu, sigajcza xtradnu ni yu' xhaguibaa di lajznii jiäjlza rextojltu.

Ruluii Jesús xho gucua'n bejn

¹⁶Räjzpani:

—Che rucua'ntu na'c guntu si'c rujn rebejn nani rusguee; rumbaa lojreni te fii

rebejn cagucua'nreni. Rniliä acua'reni rex-gaanreni. ¹⁷Niluxh la'tu, che rucua'ntu, colcun yejctu, colquib lojtu ¹⁸te na'c gacbee rebejn cagucua'ntu, xtradistu suhuii cagu-cuanxhiga'tztu. Xtradtu ni cahuii xhi cayunxhiga'tztu suniidxni xhi xca'tu nez loj rebejn.

Yälñasa'c ni yu' xhaguibaa

(Lc. 12:33-34)

¹⁹Räjzpani:

—Na'c gapdajtu yälñasa'c lo guedxli-ujre cadro rajw reman o rbibtiejn xhix-tentu, niluxh richu' gubaan rolizj bejn te rrbajnreni. ²⁰Hueenru ga'ptu xcälñasa'ctu xhaguibaa cadro di reman gauu, diza rex-hixtentu cuibtiejn, diza regubaan jiu' te cuanreni. ²¹Sa'csi cadro yu' xcälñasa'ctu, ro'cza naga' lastootu.

Bianij xten tiejxhtu

(Lc. 11:34-36)

²²Räjzpani:

—Bianij xten tiejxhni najc balojni, ni'cni palga rhuisa'c baloju, guideb tiejxhtu yu' lo bianij. ²³Niluxh palga rebalotu di fis'a'c, guideb tiejxhtu yu' lo naçäjy, ni'cni palga bajl nani yu' tiejxhtu dini gusanij, jlinacäi-boo najc guidebtu!

²⁴*Ni'cni rniä lojtu, na'c chutu yärsia' por xcälnabajntu, xhicha gautu, xhicha yätu, niclaza naatu xhicha lajd gajcwatu. Yälñabajn sajcru lo yälrajw, luxh sajcru tiejxhtu lo xhajbtu. ²⁵Colhuii remane' ni rtajt xhaguibaa. Direní cue'c binij, dizareni guilia'gäjl, dizareni cuchee xhi gaurenii nen yu', luxh xtradlu ni yu' xhaguibaa rudeedni xhi rajwreni. ²⁶Laa xhet sajcdirutu loj remane'ga, ä? ²⁷Chu tej la'tu sa'csi ru'tu yärsia' sajc tiobruthu ste bo'c jiaaru?

²⁸*Xhicuent runduxhtu xhigab xcient xhajbtu? Colhuii reguii ni tre' nesiä! ²⁹Xho roobreni? ³⁰Xho rialreni? Direní gun dzuuun, dizareni guzaa xhajbreni. ³¹Narä rniä lojtu, nicla reii Salomón guideb najcwni rex-habsa'c xtenni di nisiuchee si'c rsiuchee tej reguiiga. ³²Palga Dios rujn rajc recuaan ni

yu' nesiät ni rial nadxej luxh guixee ahue-jcreni, *ꝑ*xhixh dini gunduxhru par la'tu, bejn nani guxii rililajz? ³¹ Ni'cni na'c chutu yärsia' guntu xhigab: “ꝑXhicha guidaunu, xhicha guiduñnu, xhicha gacwnu?” ³² Sa'csi rebejn nani di gumbee Dios xhigabtisga rujnreni, caguilreni guiraa recosga. Niluxh xtadtu ni yu' xhaguibaa anajnni xhini'c rquiintu. ³³ Colquixgaa yälrnibee xten Dios näjza yälñabansa'c si'cni rlajz Dios dxejc sica'tu guiraa ni rquiintu. ³⁴ Ni'cni na'c gunduxhtu xhigab xho teditu dxej guixee. Combast teditu trabajw nani riääd dxej con dxej.

7

*Na'c cubeetu sa'tu
(Lc. 6:37-38, 41-42)*

¹Räjpzani:

—Na'c cubeetu sa'tu te na'cza cubee Dios la'tu. ² Sa'csi sigacni rgubeetu sa'tu, sigajcza sigubee Dios xhi rujntu; niluxh lagajc si'cni rutiechtu lo bejn, si'cza sutiech Dios lojtu. ³ ꝑXhicient ruhuiilu loj guijxh ni yu' baloj sa'l, luxh dilu fii yagro nani yu' lagajc balojlu? ⁴ ꝑXhicient gäblu lo sa'l, nädonñnu cuää guijxh ni yu' neñ balojlu, luxh dilu fii loj yagro ni yu' neñ balojlu? ⁵ Bengujidx ni rusguee, guläxgaa yagro ni yu' balojlu te gac fisaclu te cuäälu guijxh nani yu' baloj sa'l.

⁶ Na'c guluiitu guiraa rextidx Dios loj chutis bejn sa'csi yu'reni najc si'c bä'cw, xlia'si rca'renini; sibi'reni, sauya'reni lui. Sigajcza recos sa'cru, na'c gudeedtuni loj chutis bejn, sa'csi yu'reni najc si'c cuch rbälaazreni cossa'c najcreni si'c cuch ni ruläj yejc xhitis xhi cos.

*Colnab, colquii, colgusejz rolä'
(Lc. 11:9-13; 6:31)*

⁷Räjpzani:

—Colnab lo Dios te guniidxní nani rni-abtu. Colquilni te guidxäjtuni. Colnii rolä', te guixalni jiu'tu. ⁸ Chutis ni rniab lo Dios sica'ni nani rniabni, nani rguilni xhi cos nez loj Dios rdxälzani nani rguilni; nani rusejz rolä', suxhalzareni lojni.

⁹ ꝑLa yu' chu tejtu che guiniab xi'nni te yätxtiil, alga gudeedni te guij, ä? ¹⁰ O palga guiniabni te la' bälj, ꝑla sudeedni te bäl? ¹¹ Palga la'tu ni najc ben guijdx rajc rudeedtu cossa'c loj xi'ntu, aticaxh xtadtu

ni yu' xhaguibaa. Laani suniidxní cossa'c loj renani guiniabni lojni.

¹² Ni'cni guira'ti cos ni rlajztu gunnäj bejn la'tu, sigajcza colyennäjreni, sa'csi si'c caj lo leii xten toMoisés, näjza lo diidx ni bacuua redad ni gunii xtidx Dios.

*Rolä' xten yälñabajn najc dää
(Lc. 13:24)*

¹³ Coljui' nez rolä' nani najc dää, sa'csi gulajg najc rolä', gulajg najcza nezyuj nani rinä bejn lo yälrnijit, luxh xhidajlreni riu' nejzga. ¹⁴ Sa'csi dää najc rolä', dääza najc nezyuj nani rinä bejn nez loj yälñabajn, niluxh guxii najc renani rdxäl nezyujga.

*Ninexhsa'c ni rcaj loj te yajg rujn gumbeeni yajgga
(Lc. 6:43-44)*

¹⁵Räjpzani:

—Colhatiro rebejn nani rlajz gusguee la'tu. Rniisireni rusule'reni xtidx Dios. Rliuisi nadolajzreni si'c te xiil, niluxh direni gac. Alga si'c loob najcreni, rutie'chreni bejn si'c re'ch xiil che riädchu' loob lojreni. ¹⁶ Dzuun nani rujnreni sujn gumbeetureni. Anajntu di uub xcaj lo reyaguejch, diza iigw xcaj lo guechbiojb. ¹⁷ Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'cdi, ganax ninejxh ni di ganaxsa'c rcaj lojni. ¹⁸ Digacdi xcaj ninexhduudx loj te yajg ninexhsa'c. Di gacdzia xcaj te ninexhsa'c loj te yajg ni di gac yagsa'c. ¹⁹ Guiraa reyajg nani di ninexhsa'c xcaj lojni, nanab guidinni te checni. ²⁰ Sigajcza sajc gumbeetu bënsa'c sa'csi rujnreni dzunsa'c.

*Xhet guiraadi bejn jiu' lo xcälrnibee Dios
(Lc. 13:25-27)*

²¹Räjpzani:

—Xhet guiraadi renani rnii, “Dad, Dad”, jiu' lo xcälrnibee Dios xhaguibaa. Ganaxtis renani rujn si'cni rlajz Xtdä ni yu' xhaguibaa. ²² Sidzujn dxej sinii xhidajl bejn loä: “Dad, Dad, con lajlu basule'nu xtiidxlu, con lajzalu biläänu rebendxbab, con lajzalu biennu remilagwr.” ²³ Dxejc sápä lojreni: “Dina gumbeä la'tu. Colbicaj loä beñlat-siaj.”

*Tio'p cimient
(Lc. 6:47-49; Mr. 1:22)*

²⁴Räjpzani:

—Chutis nani rucuadiajg diidx nani caniä, luxh ruzoob xtidxä, laani najc si'c te bensin nani basoob roliznji yejc te guilaj. ²⁵ Che biajb nisgуй, biäjt nis gueuu, gubi' bej, bidinreni yejc yu'ga sas di yu'ga niajb sa'csi sojbnii yejc guilajga. ²⁶ Nani riejn diajgni xtidxä, luxh dini guzoob xtidxä naij si'c te ben guyalajz nani basoob roliznji lo yujxh. ²⁷ Che biajb nisgуй, biäjt nis gueuu, gubi' beduxh bidinreni yec yu'ga. Dxejc ligurebä'n yu'ga. Lacti xhiroob banijt bejngä.

²⁸ Che gulujx gunii Jesús redidixga, lacti bidxeloj rebejn rediidx ni baluiini, ²⁹ sa'csi baluiini rebejn si'cpac te nani rnibee, xhet si'c ruluidi rebejn ni nahn leii.

8

*Rusiadjc Jesús te bejn ni ral tiejxhni
(Mr. 1:40-45; Lc. 5:12-16)*

¹ Che biäjt Jesús yec dajn, xhidajl bejn huinajlni. ² Dxejcti biääd te benracxhuu ni ral tiejxhni nez loj Jesús. Bazuxhjbbi, räjpnii:

—Dad, palga rlajzlu, sajc gusiajclu narä.

³ Dxejcti basgaa Jesús naani, gudajnni dade'ga con naani, räjpnii:

—Rlazä jiajclu. Siajc tiejxhlu.

Lagajc dxejc gubicaj guejdx ni ral tiejxhni. ⁴ Dxejcti räjp Jesús lojni:

—Arniä, rut lojdi gäblu xhi guzajclu. Huijits lo rebixhojz te badeed gojn ni gunii toMoiséis gudeed bejn ni riajc, te fii rebixhojzga abiajclu.

*Rusiadjc Jesús te xmos capitán roman
(Lc. 7:1-10)*

⁵ Che biu' Jesús guedx Capernaum, bidzujn te capitán roman nani rnibee te gayuu soldaad. Gunabduxhni lo Jesús, räjpnii:

—Dad, xmosä naga' rolizä. Di gacdi guiniibni luxh cayanduxhni.

—Räjp Jesús:

—Do'o te gusiacáni.

⁶ Dxejcti räjp capitán lojni:

—Dad, xhet sacädi; di nungäjl jiu' guejblu rolizä. Guiniitis te diidx, siacgajc xmosä. ⁷ Narä nacäza xmos rebejn ni rnibee, niluxh rnibeäza te gayuu soldaad.

Che rnäiä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn dee”, rungajcnini.

¹⁰ Che biejn diajg Jesús si'c, bidxeloduxhni, räjpnii loj renani siädnajlni:

—Rniliäpac lojtu, nicla nen guideb reguedx Israel dina nidxälä te bejn ni rililajz si'c rililajz dade're. ¹¹ Niluxh rniä, sirii xhidajl benzijt nez ladjiaa, nez ladjiät, te jiädcuenäjreni Abram, Isaac, Jacoob lajdx Dios xhaguiba. ¹² Luxh reben Israel nani niajc xi'n Dios sijreni te laad lo yälçäjy cadro soonreni, sauja'reni läjyreni, sidejdtisreni trabajw par tejpas.

¹³ Dxejcti räjp Jesús loj capitán:

—Gubi' rolijzlu. Sigajcni huililajzlu, sigajcza gacni.

Dxejc lagajc orga biajc xmosni.

*Rusiadjc Jesús xnansueegr Pedr
(Mr. 1:29-31; Lc. 4:38-39)*

¹⁴ Che bidzujn Jesús rolijz Pedr, bahuiini naga' xnansueegr Pedr, cayacxhuuni, yu'ni xliaa. ¹⁵ Dxejc gudajntis Jesús naani, birigajcni xliaaga. Dxejcti huistie nane'ga, gusloj cagudeedri xhi gau Jesús.

*Rusiadjc Jesús xhidajl bej racxhuu
(Mr. 1:32-34; Lc. 4:40-41)*

¹⁶ Che biu' guxhijñ, biädnäreni loj Jesús xhidajl bejn ni yu' rebendxbab lostooreni; con xtiidxni gunibeeni birii guiraa rebendxbaba. Basajczani guiraa reben racxhuu. ¹⁷ Si'c bejnni te guzojb diidx ni bacuua todad Isaäas, ni gunii xtidx Dios, che räjpnii: Lagajc laani cu'a'ni rexcälracxhuunu, sanäzani rexcälrayannu.

*Reni rlajz ninajl Jesús
(Lc. 9:57-62)*

¹⁸ Che bahuii Jesús tre' xhidaldukh rebejn guideb gabi cadro suga'ni, gunibeeni tedänjní rexejnpacni stelaad ro' nis. ¹⁹ Dxejcti biääd te bennajn loj Jesús, räjpnii:

—Mastr, sisiaäza cadrotis chääu.

²⁰ Räjp Jesús lojni:

—Rebäjz rajpreni xpiliääreni, remane' ni rutajt xhaguiba rajpreni xpitiääzreni, niluxh narä Xi'n Dios ni gujc Niguii dina gapä cadro gaa yecä.

²¹ Stee rexejnpacni räjp lojni:

—Dad, basaan chaxgäa ladxä te chacuatza xtadä.

²² Räjp Jesús lojni:

—Gudanajl narä. Basaan sugucua'tz resabengutreni rebejn nani najc si'c bengut sa'csi najcreni bendojl.

*Basiacdxi Jesús te beduxh
(Mr. 4:35-41; Lc. 8:22-25)*

²³ Che biu' Jesús neñ barcw, biu'za rexpejnpacni lagajc nenga. ²⁴ Dxejc huäjs te bedondukh lo nisdoo. Lirusiääzni barcw neñ nisdoo. Luxh Jesús nagayejsni. ²⁵ Dxejcti huij rexpejnpacni huicuäänni, räjpreni:

—Dad, gucnäj nuure te di guetnu.

²⁶ Dxejc räjp Jesús:

—¿Xhicuent rdxejbtu, bejn ni guxii rililajz?

Dxejcti huistieni, gudidxa'ni lo bej näjza lo nisdoo, te biacdixireni. ²⁷ Dxejc bidxeloduxh rexpejnpacni, räjpreni:

—¿Chuni'c najc niguiire? ¡Ahuilaah xho rucuadiajg bej näjza nisdoo xtiidxn!

*Rebendxbab ni yu' lajdx regadarenos
(Mr. 5:1-20; Lc. 8:26-39)*

²⁸ Che bidzujn Jesús stelaad nisdoo cadro najc lajdx regadarenos, tio'p bejn ni yu' beñdxbab lastooreni bijädcaglojreni Jesús. Rebejnga riireni neñ rebaa, nialazduxhreni, ni'cni rut rajcdi rdej nezyuuga. ²⁹ Guredxa'reni räjpreni:

—¿Xhicuent siädchu'l loonu luj ni najc Jesús Xi'n Dios? ¿La siäädlu ree te gusacsílu nuure luxh gad galdi xornu, ä?

³⁰ Nez te laad, zijke' cadro suga'reni, cayajp bejn xhidalro cuch. ³¹ Dxejcti gunab rebendxbabga loj Jesús, räjpreni:

—Palga cuääu nuure, basaan jiu'nunen recuchre.

³² Dxejcti räjp Jesús:

—Colchäj.

Dxejcti biriireni neñ lastoo redade'ga, huichu'reni neñ recuchga. Dxejcti guiragajc recuchga caguxunreni, huitejbreni ro' te gulaj, biääzreni neñ nisdoo, gujtireni neñ nis.

³³ Rebejnj ni cayajp recuchga, baxunreni, huijreni lajdxreni, huiyeireni diidx guiraa ni guzajcreni näjza ni guzajc redade' ni guyu' rebendxbab lastooreni. ³⁴ Dxejcti guiraa rebenguejdxga huichaglojreni Jesús. Che bahuiireni lojni, gunabduxhreni lojni, jiunejzni lajdxreni.

Basiajc Jesús te bejn nani abixu'n tiejxhni

(Mr. 2:1-12; Lc. 5:17-26)

¹ Dxejcti biu' Jesús neñ barcw. Gudejdni stelaad ro'nis te bidzujnni lajdxni. ² Ro'c biädnäreni lojni te bejn nani abixu'n naani, ni'ni. Naga'nlo te da'. Che bahuii Jesús lacti rililajzreni, räjpni loj beñracxhuuga:

—¡Baspaa lajzlu xi'nä! Agubicaj rextojllu.

³ Dxejcti gaii beñnajni rului xleii Moisés cayujnreni xhigab ensilaereni, caniyaj dee Dios con rextiidxni. ⁴ Dxejc gucbegajc Jesús xhi xhigab cayujnreni, dxejc räjpni lojreni:

—¿Xhicuent cayujntu xhigabgujjdx neñ lastootu? ⁵ ¿Con ni najc guyasiru? Guiniä lo te bejn: “Agubicaj rextojllu”, o guiniä lo te bejn: “Huistie, guzaj.” ⁶ Dec gunä te gacbeeti Xi'n Dios ni gujc Niguii räjp yälrnibee lo quedxliijre te gudzucajni dojl.

Dxejcti räjpni loj beñracxhuuga:

—Huistie, cua' xta'l'u, huij rolijzlu.

⁷ Dxejcti huistie beñracxhuuga, siini rolijzni. ⁸ Che bahuii rebejnj lojni, bidxeloduxhreni, gulä'preni xpala'n Dios, ni badeed yälrnibeega loj rebejn.

Che gurejdx Jesús Mateo

(Mr. 2:13-17; Lc. 5:27-32)

⁹ Dxejcti birii Jesús cadro basiajcn beñracxhuu, sä'tini. Dxejc bahuiini loj te dade' ni laa Mateo. Sobga'ni loj te yagxhiil cadro rbej reni ruquijx xcuent guiraloj. Dxejc räjp Jesús lojni:

—Gudanajl narä.

Dxejcti huisuni, sanajlni Jesús.

¹⁰ Cheni sobga' Jesús lo mex cayajwreni rolijz Mateo, biäädza xhidajl rebejnj nani ruquijx xcuent guiraloj, ni najc rebejnj ni di gac xpen Israel, gurejzareni lo mex näj Jesús näjza reni najc rexpejnpacni. ¹¹ Che bahuii reben guidoo, ni laa refarisee, xhi cayujn Jesús, räjpreni loj rexpejnpac Jesús:

—¿Xhicuent raunäj xmastrtu rebejnj nani ruquijx xcuent reyuj näjza rebejnj ni di gac xpen Israel?

¹² Che biejn diajg Jesús xhi guniireni, räjpnlojreni:

—Rebejnj nani nadaan dini guiquiin chu gusiajcn, niluxh rebejnj racxhuu ni'c rquuireni chu gusiajcreni. ¹³ Colchäj te colchaseed xhi säloj diidxre ni caj loj reguujtz: “Yälrlulaslajz rlazä, dina rlazä guniidxtu guidxaa loä.” Sa'csi narä

dina niädtedxä rebensa'c, narä siädtedxä rebendojl te gusiechlaizreni.

*Gunabdiidxreni xcuent yälrucua'n
(Mr. 2:18-22; Lc. 5:33-39)*

¹⁴ Dxejcti biääd rexpejnpac Juan loj Jesús räjpreni:

—Nuure con refarisee rcua'nnu xhidal huält, *żxhicuent di rexpejnpaclu gucua'n*, ä?

¹⁵ Räjp Jesús lojreni:

—Che ruchñaa te bi'n, *żxhixh rac-huin lajz regolnejdx laga suga' bi'n* con laareni? Palga yu' xhi sac bi'nга, dxejc sii soonreni, suucu'nreni.

¹⁶ 'Rut gundi remiend te ladbiejw con te la' ladcoob sa'csi sixu'n ladcoobga, su-täjsruni ladbiejwgħa, sajc xhiroobru cadro biräjsga. ¹⁷ Niclaza gac guida' bincoob neñ reguidbiejw, sa'csi reguidbiejw siräjsni dxejc sixe' bin, sinijtza reguijgħda. Ni'cni nanab guida' bincoob neñ reguidcoobza, te si'c nicla tejreni di nit.

Xindxa'p Jairo näjza gunaa nani gudajn xħajb Jesús

(Mr. 5:21-43; Lc. 8:40-56)

¹⁸ Lal ni caniini rediidxga, biääd te dade' ni rnibee neñ guidoo xten rexpejñ Israel. Bazuxhijbni nez loj Jesús räjpni:

—Entis gujt xindxa'pā. Gudaa, badzuub naalu yejnici te guibansacni.

¹⁹ Dxejcti huisu Jesús, sanäni Jairo. Näm rexpejnpacni sanajlrenini. ²⁰ Luxh guyu' te gunaracxhūu nani agujc tzubitio'p iż-żejjix cayajci yälguidxbäi. Bidzujnni nez dejtx Jesús, gudajnni ro' xħajbni, ²¹ sa'csi bejnni xħigab neñ lastooni: "Palga sajc canätiis ro' xħajbni, siacä." ²² Dxejc għibiré Jesús bahuiini loj gunaaga, dxejc räjpni:

—Gulecdixlajzlu xindxa'pā. Yälrlilajz xtenlu abasiajclu.

Luxh lagajc dxejc bijaġġ gunaaga.

²³ Cheni biu' Jesús rolijz dade' nani rnibee neñ xquidoo rexpen Israel, bahuiini rebejn ni roł bizej näjza xħidajl rebejn ni cabedxa' cayoon, li te bieyj cayajc, dxejc ²⁴ räjpni loj rebejinga:

—Colguibicaj. Nagayejstis dxa'pga, gajdni guet.

Dxejc rebejinga alga ruxhiznäjreni Jesús.

²⁵ Cheni abirri rebejn neñ yu', biu' Jesús, gu-naazni ɻaa dxape', dxejc huistie dxape'ga.

²⁶ Dxejcti bire'ch diidxga guiraa neñ reguejdx ni tre' nejzga.

Basiajc Jesús tio'p lotiä'p

²⁷ Che birii Jesús ro'c, huinajl tio'p bejnni nani di fii. Rbedxa'reni roonreni räjpreni:

—Balaslajz nuure, Xi'n toDavid.

²⁸ Che bidzujñ Jesús cadro caya'nni, gubigreni lojni. Dxejcti gunabdiidx Jesús lojreni, räjpni:

—*żLa rililajztu sajc gunä ni rnibatbu?*

Redade'ga basejc diidx, räjpreni:

—Sajc gunluni, Dad.

²⁹ Dxejcti għadjan ni balojreni, räjpni:

—Sugaci si'cpacni rililajztu.

³⁰ Lagajc dxejc bixal balojreni. Sas räjppac Jesús lojreni:

—Arniä, na'c chayequ diidxre, te rut gacbeedi xhi guzajctu.

³¹ Cuantsi biriireni ro'c għuslojreni cagħutie'chreni diidx xcuent Jesús guideb gabi neñ reguejdxga.

Basnii Jesús te gop

³² Che biriireni cadro biajc baloj rebejngħa, biääd sgħaj bejn biädnareni te gop loj Jesús. Yu' xprit bendxbab neñ lastoo bejngħa. ³³ Che barilaaggw Jesús xprit bendxbab neñ lastoo bengopga, għuslogajcni caniini. Rdxeloduxx rebejn räjpreni:

—Għajdpacu guħiħi sa' redzuunre lajdx rexpejñ Israel.

³⁴ Dxejc reben guidoo ni najc refarisee, räjpreni:

—Rbäani rexprit bendxbab con yälṛnibee xten bendxbab.

Rulaslajz Jesús rebejn

³⁵ Gudejd Jesús guiraa reguedxro näjza reguedxbaż, basule'ni xtidx Dios neñ reguidoo xten rexpejñ Israel. Basäabni diidx xten xcälrnibee Dios. Basiajczani guiraloj yälracxhūu, guiraloj yälgujidx ni rajc bejn neñ reguejdxga. ³⁶ Che bahuiini loj reben xħidajl biaduxħni rebejn sa'csi rdebyha' lajzreni, rac-huin lajzreni, najcreni si'c na jecxi rexil nani di ga'p baxtoor.

³⁷ Dxejcti räjpni loj rexpejipacni:

—Għaliex xħidalduxx ben guedxluij di gan xtidx, luxh guxii najc reni guluiġġi;

najcni si'c għajji ni agoj ġuilia', niluxx ruti mos ni guilia'ni. ³⁸ Colnab lo Dad nani najc xtenni guedxluijre te guxha lni rebejn ni

sajc gului reben guedxliujre, gacreni si'c mos ni rlia' gäjl.

10

*Gule Jesús guitzubitio'p rexpejnpacni
(Mr. 3:13-19; Lc. 6:12-16)*

¹Dxejcti gurejdxni guitzubitio'p rexpejnpacni, badeedni yälrnibee lojreni te guri-laagwreni rexprit bëndxbab lastoo bejn näjza te gusiajcreni guiraloj yälguijdx näjza yälracxhuu.

² Laj reguitzubitio'p rexpejnni ni guleni najc: Simón, ni laaza Pedr; Andrés bejtza Simón; Jacoob xi'n Zebedeo; Juan bejtza Jacoob; ³Felipe; Bartolomé; Tomás; Mateo, ni najc colectoor; Jacoob, xi'n Alfeo; Lebeo ni rniireni Tadeo; ⁴Simón, te bejn ni yu' loj recananita; Judas Iscariote, nani bateed Jesúus ladznaa rebejn nani rdxe'ch lojni.

Baxhal Jesús rexpejnpacni gutie'chreni diidx

(Mr. 6:7-13; Lc. 9:1-6)

⁵ Guitzubitio'p rebejnre baxhal Jesúus. Balijdxnirenai räjpni:

—Na'c chäätu nez cad yu' rebejn ni di gumbee Dios. Na'c jiu'tu lajdx reben samaritan. ⁶Colchäxgaa lo rexpejñ Israel nani agunijt neñ dojl. ⁷ Colchäj, colzäb-diidx lo rebejn, colye'tz lojreni xcälrnibee Dios abidzungajxh. ⁸Colgusiajc beñ racx-huu, colgusiajc tiejxh rebejn ni ral guejch tiejxhreni, colguspajñ bengut. Colguri-laagw xprit bëndxbab lastoo rebejn. Ligaj cu'a tu yälrnibee, ligajza colyejn dzuun.

⁹Räjpzani:

—Na'c chanätu oor, niclaza pla't, niclaza coobr neñ xdobädjiltu, ¹⁰niclaza guijxh na'c chanätu lo nejz. Na'cza chanätu tio'p xha-jbtu, nicla gura'ch, nicla baston sa'csi bejn ni rujin dzuun nungäjl xca'ni xhi gauni.

¹¹Räjpzani:

—Che guidzujntu xhitis te guedxro, xhitis te guedxbáz, colquil te bënsa'c. Rolij-ztisni coljia'n dxejli ni jiunejztu guejdxga.

¹²Cheni jiu'tu neñ yu', colnii xtidx Dios lo rebejngä. ¹³Palga najcreni bejn ni num-bee Dios, sujia'n yälrbedxilajz loj rebejngä.

Niluxh palga direni gac bensa'c, naaddi-reni xca'reni xtidx Dios, suguib'i yälrbedxilajzga lojtu, coljiunejz ro'c. ¹⁴Palga di-reni gusaan jiu'tu rolizreni, palga di rla-jzreni gcuadajgreni xtiidxtu, dxejc colji-unejz rolizj bejnga, o coljiunejz guejdxga, dxejc colcuijb guxhuj ni'tu si'c te seen gulälazreni xtidx Dios. ¹⁵Rniliápac lojtu, dxej ni gun Dios xcälguxhtisni, te yälguxhtisoru gun Dios rebejngä, quela yälguxhtis ni gujc reben guedx Sodoma näj Go-morra.

Yälrusacsí ni siääd

¹⁶Räjpzani:

—Colhuiire! Narä suxhalä la'tu si'c xile' nez loj reloob, ni'cni colgacnasinduxh si'c najc te bäl, colyajcza nadolajz si'c te palom.

¹⁷Colnatiro rebejn sa'csi suteedreni la'tu ladznaa rexcuxhtisreni, siguijnareni la'tu nen xquidooreni. ¹⁸Sinäzareni la'tu nez loj regubier, nez loj rerejj xcuent rextidxä, te gusule'tu xtidxä nez lojreni näjza nez loj rebejn nani di gumbee Dios. ¹⁹Cheni chanäreni la'tu nez loj reguxhtis, na'c guntu xhigab xho guiniitu, niclaza guntu xhigab xhicha ni'c guiniitu, sa'csi lagajc Dios suniidx diidx guiniitu orga. ²⁰Sa'csi et la'ditu ni guinii dxejc, Sprit xten Xtadtu Dios ni yu' neñ lastootu, laani guinii nen lastootu.

²¹Luxh rebejn suteedreni lagajc bejtreni ladznaa reni ju'treni. Redad suteedreni lagajc xi'nreni, rex'i'n bejn sidxe'chzareni lo xczajnreni te ju't bejn xczajnreni.

²²Guiraa rebejn guedxliuj sidxe'chreni lojtu xcuent xtidxä. Nani chanuu lo xtidxä dxej lultli, ni'c sujn gaan yälnabajn par tejjpas.

²³Che quirinajlreni la'tu te gusacsíreni la'tu nen te guejdx, colguxuj ro'c, colchäj stee guejdx. Rniliä lojtu, ditu gun gaan tedtu quiraa reguejdx xten rexpejñ Israel ansde jiääd Xi'n Dios ni gujc Niguii.

²⁴'Di te bejn ni casieedgaj beñroru lo xmastrni, diza te mos gac beñroru lo xlamni. ²⁵Te bejn ni casieed, rsieedruni te gacni si'c najc xmastrni, sigajcza rujn mos, riuni xtidx xlamni te gacni si'c najc xlamni. Palga rbälajreni Beelzebú nani rniibee bëndxbab, ¿xho direni cuälajza Beelzebú rex'i'nni, ä?

Chuni'c nanab guidxejbni

(Lc. 12:2-9)

²⁶Räjpzani:

—Ni'cni na'c guidxejbnu rebejn, sa'csi anajntu xheti te cos ni niäuu lojni ni di guidzujn dxej guixal lojni, te fii chutis bejn lojni. Xhetiza te cos xhiga'tzdi ni di guidzujn dxej siejn diajg bejn xcuentni.
²⁷Diidx nani rniä lojtu guxhijn, colguini-ini che nianij lo guedxliuj. Rediidx nani rniä chigaj rodiajgtu, colguiniimi dip, jiaali colzuj, guredxa' te jiejjni. ²⁸Na'c guidxejbnu renani rugu't bejn, sa'csi direni gun gaan ju'treni xaim bejn. Colguidxejbnu nani rugu't tiehx bejn näjza xaim bejn nen gabijl.

²⁹,³⁰La di bejn guto' tio'p manbäz ni rutajt por te centaab, ä? Luxh racbee Xtadnu niyu' xhaguibaa che riäb tejni lo yuj. ³⁰Näjza rexquidxejclu nagab tebgajreni. ³¹Ni'cni rniä na'c guidxejbnu; sajcrutu lo te chinnaa manbäz ni rutajt.

*Renani rusule' xtidx Jesucrist nez loj rebejn
(Lc. 12:8-9)*

³²Räjpzani:

—Chutis renani rusule' xtidxä nez loj rebejn, narä siniäza xcuentni nez loj xtadä niyu' xhaguibaa. ³³Guiraa renani di gusule' xtidxä nez loj rebejn, sigajcza narä dina guiniä xcuentni nez loj xtadä niyu' xhaguibaa.

*Rlia' Jesús sa' bejn
(Lc. 12:51-53; 14:26-27)*

³⁴Räjpzani:

—Na'c guntu xhigab siädnää yälrbexdi-lajz lo reben guedxliujre, xhet yälrcuedxidi ni siädnää, yälrdxagdijl siädnää. ³⁵Narä siädnää yälrdxagdijl te bi'n con xtadni; te dxa'p con xnanni; te gulizjni con xnansueegrni. ³⁶Ni'cni lagajc resa'tu niyu' rolijztu sidxe'chreni lojtu.

³⁷,³⁸Nani sanälajzru xtadni, xnanni, luxh narä dini chanälajz, digacdi gacni xpenä; nani sanälajzru xingaanni o xindxa'pni, di gadziza gacni xpenä. ³⁸Nani di guu xcrujzni, nalajznu tedni trabajw, jiädnajlni narä, di gadci gacni xpenä. ³⁹Nani guidxäl xcäln-abajnni lo guedxliujre, sunitni yälnabajnni xhaguibaa. Luxh nani gunijt xcälnabajnni lo guedxliujre xcuent rextidxä, sidxälni yälnabansa'c xhaguibaa.

*Gaan nani xca'ni
(Mr. 9:41)*

⁴⁰Räjpzani:

—Nani guniidx rolijzni jia'ntu, runiidxzani rolizjni jia'nä; luxh nani ruscuäät narä rolizjni, rolizjni ruscuäazzani Gueb Dios nani baxhal narä. ⁴¹Nani guscuäät te nigui ni rnii xtidx Dios rolizjni sa'csi baxhal Dios niguiiga, sica'za bejngä lagajc gaan ni xca' nigui ni rnii xtidx Dios. Nani guscuäät te bensa'c rolizjni sa'csi bensa'cni, sica'zani lagajc gaan ni xca' bensa'cga. ⁴²Chutis nani gudeed mase te xhijgtis nis niäliuj xcuentä lo rebiixe're, rniliäpac lojtu, direni gunijt, sica'pacreni nani nungäjl xca'reni.

11

Renani baxhal Juan Bautist loj Jesús

(Lc. 7:18-35)

¹Che gulujx baluui Jesús rexpejnpacni xho gunreni dzuun, dxejcti biriini ro'c te saluiini, chasule'ni diidx lajdx rexpejnpacni.

²Juan yu' neq latzguuib. Che biejn diajgni xhi cayujn Jesús, baxhalni tio'p xpejnpacni ³te huinabdiidxreni:

—¿La luj ni najc Crist ni jiääd, ä?, o ¿la siläazun chu stee bejn?

⁴Dxejcti badzu' Jesús diidxre räjpnii:

—Colchäj, colye'tz loj Juan recos nani riejn diajgtu, näjza recos nani ruhuiitu.

⁵Reni di fii, ruhuiireni; reni di sa, arsi-ajreni, reni ral tiejhni, abiajc tiejhreni; reni di jien diajg, ariejn diajgreni; rebengut, ahuäjzreni, gubansa'reni. Dxejcti loj rebejn proob nani cabäjz xcälracnäj Dios ca-gusule'reni xtidx Dios ni ruslaa bejn nen dojl. ⁶Chicbaa renani di jieed narä.

⁷Cheni sii rebejngä gusloj Jesús canii loj rebejn xcuent Juan:

—¿Chuni'c huihuiitu nez loj reyubijdz? ⁸La te biquii ni rusniib bej, ä? ⁸¿Xhini'c huihuiitu? ⁹Te bejn ni sucheduxh rbäjzreni rolizj refeii. ⁹La'tu xhiciuent huijtu ro'c? ¹⁰Te fiitu te nigui ni rnii xtidx Dios, ä? O'n. Rniliä lojtu, luxh dini gac bejntis ni rnii xtidx Dios; benroruni. ¹⁰Laa Juan nani rusä't ni bacuua lo reguijtz cadre caj scree: Narä suxhalä te nigui nani guinii xtidxä nez lojlu;

laani susucheeni nezyuj nezlojlu.

¹¹ Guliipac rniä, loj guiraa rexingaan xten gunaa, nicla tejni gajd guiricaj ni najc te bensacduxh loj Dios si'c ni najc Juan Bautist. Niluxh bejñ nani najc beñ huinru lo xcälrnibee Dios xhaguibaa, bejngä maazru sajcni loj Juan.

¹² Cheni gucli dxej ni gusloj rusule' Juan Bautist diidx najli, yu'duxh reni rlajzpac jiu'reni lo xcälrnibee Dios ni yu' xhaguibaa con yälrdxe'ch, sas reni nadxech'a' rlajzreni cuäxuuni xcälrnibee Dios. ¹³ Guiraa reniguii ni gunni xtidx Dios näjza xleii Moisés, gunicixaareni recos ni churu gac, galooli hasta che biäddli Juan Bautist. ¹⁴ Palga rlajztu chalilajzta, lagajc Juan najc Elías, niguui xten Dios nani bia'n diidx jiääd. ¹⁵ Nani sobdaijg diidx, gucuadiagjni.

¹⁶ 'Xhicojn guntebloä rebejñ nani tre' naj, ä? Najcreni si'c najc rebiuux nani rguijt nez lo güüi cadro rdo', rbejdxreni lo sa'reni, ¹⁷ rniireni: "Bieñlu bizej te guya'tu luxh ditu nuya'. Dxejcti bieñlu redij ni nabaduxh luxh dizatu nioon." ¹⁸ Sa'csi che biääd Juan dini niajw dizani näi', luxh räjp rebejñ na-jcni te xpejñ beñdxab. ¹⁹ Dxejcti biälä narä, Xi'n Dios ni gujc Niguii, rauä, rä'ä dxejcti räjp rebejñ: "Niguiire rauxha't, rätejzani bin, najcni xamigw rebendoj näjza reniguii ni ruquijx xcient reyuj ni rajx lo gubier." Luxh loj rebejñ ni najc xpejñ Dios yuduxh xcälrnajn Dios, ni'cni baxhalni guiro'p rebe-jnre.

Reguejdx guyalajz (Lc. 10:13-15)

²⁰ Dxejcti gusloj Jesúus gudilnäjni rebenguejdx cadro benduxhni remilaagwr, sa'csi naaddirni gusiechlajzreni xtojlreni, sanuutis nabajñreni nen dojl. Dxejcti räjpni:

²¹ —¡Gunatiru guedx Corazíñ! ¡Gunatiro guedx Betsaida! Paru nen guedx Tiro näjza guedx Sidón niajc remilaagwr nani gujc guedx lajdxtu, cadxejli nusiechj lajzreni xtojlreni, cadxejli niajcwreni nen godx, nidääb cobdäj yejcreni. ²² Luxh rniä lojtu: che guidzuñ dxej ni gun Dios xcälguxhtisni, sidejdrutu castiigw loj rebejñ ni guläjz guedx Tiro näjza guedx Sidón. ²³ Luj guedx Capernaum di gunlu xhigab chäslu xhaguibaa; jiäjt nen baa jiajbla, sa'csi paru nen guedx Sodoma niajc sa' remilaagwr nani gujc guedxlajdalu, pet najli tresijc

guejdxga. ²⁴ Luxh rniä lojtu, dxej ni gun Dios xcälguxhtisni, trabajwdxhru teditu loj rebejñ Sodoma.

Coltaa loä, te gusilajztu
(Lc. 10:21-22)

²⁵ Laa dxejcni räjp Jesúus:

—Rliä'pá xpala'nlu Xtadä, Dad xten xhaguibaa näjza guedxliuj, sa'csi bacua'tzlu recosre lo rebennajn, lo rebejñ ni racbee, te baluiiluni loj rebennadolajz ni najc si'c biuxbäz. ²⁶ O'n. Guliini, Xtadä, sa'csi rujnlu xhigab si'c najc hueen gacni.

²⁷ Guiraa recosre abaniidx Xtadä loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, näjza loj renani gudeed xingaanni gumbee xtadni. ²⁸ Coltaa loä guirauu nani abadxajg, nani rsina', narä sunidxä yälrusilajz lojtu. ²⁹ Colguisieed guntu dzuuñ si'cni ruluiätu. Colhuii xho runä, xho nacä nadolajz, dizana gacä benneyedlxajz nen lastoä, ni'cni sidxäl xaimtu yälrusilajz. ³⁰ Sa'csi guyasi najc xtzunä ni ruluiätu, dizani gac naganduxh.

12

Rutie' rexpejñ Jesúus triuu dxej ni rusa-lajzreni

(Mr. 2:23-28; Lc. 6:1-5)

¹ Che sasaj Jesúus nez loj reyuj cadro naga' triuu, luxh dxejga najc dxej ni ruislajz rex-pejñ Israel, calaan rexpejñpacni, guslojreni calädxareni doj lo triuu te cayajwrenini.

² Che bahuii rebejñ guidoo ni laa farisee, räjpreni loj Jesúus:

—Ahuii xho rujn rexpejñpaclu dzuuñ nani di nungäjł gunreni dxej nani ruislajz bejñ.

³ Luxh laani räjpni lojreni:

—¡La gajdtu gol xhi caj loj reguijtz xcient ni bejñ toDavid che gulannäjni rex-pejñni, ä? ⁴ Biu'reni xquidoo Dios, guda-jwreni yätxtili nani di nungäjł gauni, nicla laani, niclaza rebejñ nani sanäni, sa'csi yätxtilga rebixhojzts rajwni. ⁵ O ¡la gajdtu gol lo reguijtz xten leii cadro caj xcient rebixhojz, ä? Laarení riu'reni nen reguidoo dxej ni ruislajz bejñ, rujnreni xtzunreni niluxh xhet dojldi rujnreni. ⁶ Narä rniä lojtu, ree suga' tej nani sajcru loj guidooga. ⁷ Paru niacbeetu xhi sáloj dee: "Yälru-slajz rlazä, xhet yälrejtdi guidxaa", ditu

nucuaquij redee ni xhet bejndi. ⁸ Sa'csi narä Xi'n Dios ni gujc Niguii rnibeaä dxej ni rusilajz rebejn.

*Niguii ni rxu'n naani
(Mr. 3:1-6; Lc. 6:6-11)*

⁹ Che birii Jesús ro'c, biu'ni te xquidobázreni. ¹⁰ Ro'c suga' te bejn ni gubijdz te naani. Luxh sa'csi caguuilreni xho gucuaquijreni Jesús, gusloj canabdiidxreni lojni, räjpreni:

—¿La rusaan leii gusiajcni beñracxhuu dxej ni rusilajz bejn, ä?

¹¹ Badzu' Jesús diidxre lojreni, räjpnii:

—Chutejtu ni rajp te xiił niluxh palga guitejbni neq bisie che gal dxej ni rusilajz bejn, ¿xhixh dini cuää xiiłga neq bisie, ä?

¹² Sacduxhru te bejn loj te xiił, ni'cni susaan leii gun bejn dzunsa'c dxej nani rusilajz bejn.

¹³ Dxejcti räjpnii loj dade'ga:

—Baslii naalu.

Che basliimini, dxejc biajc naani, gujcni tebloj si'c najc stelaad naani. ¹⁴ Dxejcti birii reben guidoo ni laa farisee, bachagsa'zareni te bia'nreni diidx ju'treni Jesús.

Diidx ni guniireni xcuent Jesús

¹⁵ Che gucbee Jesús xhi xhigab cayujnreni, birini ro'c. Xhidajl bejn sanajlni, dxejc basiajc Jesús guiraa reben_ñracxhuu.

¹⁶ Dxejc räjpnii lojreni:

—Na'cpac gäbreni chu najcni.

¹⁷ Si'c gujc te gusojb diidx ni gunii Isaías ni gunii xtidx Dios che räjpnii:

¹⁸ Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'nii yälguxhtis xtenä lo guedxliuj.

¹⁹ Dini tilnäj bejn, dizani cuedxa'; rudza jiejndi diajgni xse'ni lad nezyuj.

²⁰ Dini qui'ch nicla te njit ni cabiejc, dizani gusuui te duxiil ni cayujn guxh, dxejli che gunni gaan guinibeeni yälguxhtis.

²¹ Lajtisni sustioob lastoo reben ni digac xpejn Israel.

Rucuaquijreni Jesús räjpnii yälrnibee xten bñdxab

(Mr. 3:19-30; Lc. 11:14-23; 12:10)

²² Dxejcti biädnäreni loj Jesús te bejn ni dii, dizani guinii, yu' te bendxbab lastooni. Dxejcti basiajc Jesúsni, te gujc guniini, te

gujcza bahuiini. ²³ Guiraa rebejn bidxelojreni, räjpreni:

—Xhaa laa Xi'n toDavidni, ä?

²⁴ Che biejn diajg reben guidoo ni laa farisee rediidxga, räjpreni:

—Bejtre rbää reben_ñdxab con yälrnibee xten Beelzebú ni rnibee loj reben_ñdxab.

²⁵ Che gucbee Jesús xhi xhigab cayujnreni, dxejc räjpnii:

—Guiraa yälrnibee nani rlia' sa'ni sinitojloj; te quedxro sigajc te famil nani rlia' sa'reni, nani ridilnäj sa'reni, sinitojreni.

²⁶ Sigajcza palga bendxbab rbää saben_ñdxabni, silia' sa'reni, dxejc ¿xho gac chanuu xcälrnibeeni? ²⁷ Palga narä rbää reben_ñdxab con yälrnibee xten Beelzebú, ¿chu xcälrnibee rajc rbää rexpejntu bendxbab, ä? Ni'cni lagajc laareni suluiireni xhet laadi rujntu xhigab. ²⁸ Palga narä rbää reben_ñdxab con Xprit xten Dios, guliipacni abidzjuñ xcälrnibee Dios lojtu.

²⁹ 'Bahuilaare. ¿Xho gac jiu' te bejn cuan rolizj te bendaan, xho gac cuanni xhixten bejng, palga dini gulibxgaani bendaanga? Che abiliib bejng, sajc cuanni rexhixten bejng.

³⁰ 'Nani xhet yu'di xladä, rdxe'chni loä. Nani di jiädnajl narä, rutie'chni reni siädnajl narä.

³¹ Ni'cni rniä guira'ti dojl, guira'ti yälrus-guee xte bejn sajc gusiäjäj lajzni xtebtis yälrniyaj Sprit Dyan xten Dios di Dios gusiäjäj lajzni. ³² Chutis ni guinii xhi te diidx yälrniyaj Xi'n Dios ni gujc Niguii sajc gusiäjäj lajzni, luxh chutis ni guiniyaj Sprit Dyan xten Dios, di Dios gusiäjäj lajzni, nicla lo guedxliujre, niclaza xhaguibaa.

Sajc gumbeetu bejn xcuent diidx ni rniiren

(Lc. 6:43-45)

³³ 'Palga nasa'c te yajg sicaj ninexhsa'c lojni, per che di yajg gac yagsa'c, xho xcaj ninexhsa'c lojni. Ni'cni huenliisi siembeetu te yajg che fiitu xho najc ninejxh ni rcaj lojni.

³⁴ Sa' la'tu benguijdx ni najc si'c te bäl niälasdukh, ¿xho gac guiniiti te didxsac'c, ni ro' bejn rniitits rexhigab ni yu' neq lastoo bejn. ³⁵ Te benga'c rniitits didxsac'c, sa'csi ganax xhigabsa'c yu' neq lastooni, te benguijdx rniititsi cosgуйdx sa'csi ganax xhigabgujdx yu' neq lastooni.

³⁶Narä rniäza, guiraa redidxgуйidx nani rnii bejn sudeedreni cuent lo Dios cheni gunni yälguxhtis, ³⁷sa'csi lagajc rextiidxlu sujn guinii Dios najclu beñsa'c, lagajc rextiidxlu sujn gunijtu lo Dios.

Rebenguijdx rniab te milagwr si'c te seen

(*Mr. 8:12; Lc. 11:29-32*)

³⁸Dxejcti rebejn ni ruluii xleii toMoisés näjza reben guidoo ni laa farisee, räjpreni loj Jesús:

—Mastr, nuurnu rlajznu guihuiinu te seen; bejn te milagwr te fiinuni.

³⁹Badzu' Jesús diidxre, räjpni:

—Rebenguijdx ni rusguee rniab te seen, niluxh xhetru seendi fiireni xseentis Jonás, dade' ni gunii xtidx Dios. ⁴⁰Sa'csi lagajc si'cni guyu' Jonás xque' te bälro chon dxej, chon yääl, si'cza chu Xi'n Dios ni gujc Niguii nen lastoo quedxliuj chon dxej, chonza yääl. ⁴¹Cheni gac yälguxhtis xten Dios pet sistie rebejn ni siääd Níniive te fiireni gac yälguxhtis rebejn ni tre' lo quedxliuj naj, niluxh säjb rebejn Níniive abanijt rebejnre sa'csi reben Níniive basiech lajzreni, bia xtojreni che basule' Jonás xtidx Dios lojreni. Luxh nani yu' lojtu naj, sadduxhruni loj Jonás. ⁴²Näjza reiñ xten rebeq sur sistieni te fiini gac yälguxhtis rebejn ni tre' lo quedxliujre naj, niluxh näjzani säjbni abanijtreni. Sa'csi laani zitduxh biriini te biädcuadiajgni reyälnajn xten Salomón, luxh nani yu' lojtu naj nanduxhruni loj Salomón.

Te spritdxuudx ni rbisac

(*Lc. 11:24-26*)

⁴³Räjpzani:

—Cheni rii te spritdxab nen lastoo te bejn, ricanzajni nez lo reyubijdz, ritilni cadro gusilajzni, per cad rdxäldini. ⁴⁴Dxejcti rijnni xhigab, naani, guibisacä cadro biriä. Cheni rbisacni ro'c, rdzujnni si'c rdzujn te bejn nen te yu' ni naya nenni, naliobsa'cni, sucheeni, luxh rut rbäjzdi ro'c. ⁴⁵Dxejcti rijni, rixiimi sgajdz sprit nani najc nadxuudxru lojni te jiädläznäjrenini nen lastoo bejngä. Dxejcti rxhinduxhru bejngä lojni gujcni galoo. Sigajcza gac rebejn ni tre' lo quedxliujre naj.

Xnan Jesús con rebejtzni

(*Mr. 3:31-35; Lc. 8:19-21*)

⁴⁶Lał ni caninäjni rebejn, bidzujn xnanni con rebejtzni, suga'reni rolä' rlajzreni guiniireni lojni. ⁴⁷Dxejcti biääd tej ni räjj loj Jesús:

—Xnanlu näjza rebejtzlu suga' rolä' rlajzreni guiniäjreni luj.

⁴⁸Laani badzu'ni diidx lo bejngä räjpni:

—¿Chuni'c najc xnanä? ¿Chuni'c najc rebetzä?

⁴⁹Dxejcti basgaani ñaani nez loj rexpejnpacni, räjpni:

—¡Redee najc xnanä redeeza najc rebetzä! ⁵⁰Chutis nani rujn si'cni rnibee Xtadä ni yu' xhaguibaa ni'c najc betzä, ni'c najc bisianä, ni'cza najc xnanä.

13

Xcuent bejn nani rbe'c binij

(*Mr. 4:1-9; Lc. 8:4-8*)

¹ Lagajc dxejga birii Jesús royu'ga, huicueni nez ro' nisdoo. ²Xhidualuxh bejn bire' cadro suga'ni, sas biu'ni neñ te barcw, ro'c gurejni. Dxejcti rebejn gurej nez lo plaii. ³Dxejc gusloj caguluii Jesús con recuent, räjpni:

—Colcuadiajg. Birii te dade' ni rbe'c binij te cue'cni binij. ⁴Lał ni cabe'cni binij yu' binij ni bitejb gajxh nez ro' nesiuj, biääd remane' ni rutajt, sas gudajwreni binija. ⁵Yu' binij ni bitejb nez nen reguij cadro guxii yu' yuj. Gulengajc binija sa'csi direni nibej jiät neq yuj. ⁶Che birii gubijdx, bigolreni sa'csi xhetiza xlobaani, dxejc gubijdzni. ⁷Yu'za binij ni bitejb neq reguejch. Che guroob reguejchga, dini nusaan niroob regäjle', gubijdztireni. ⁸Guyu' binij ni gurej lo reyusa'c, ro'c guduxhni. Yu' binij cuaj te gayuu, yu'za binij cuaj gayojñi, yu'za ni cuaj galbitzuni loj cade tej binij ni gurej. ⁹Nani rsobdiajg diidx gucuadiajgni diidxre.

Xhi pajr najc recuent xten Jesús

(*Mr. 4:10-12; Lc. 8:9-10*)

¹⁰Dxejcti gubig rexpejnpacni, gunabdiidx lojni, räjpreni:

—¿Xhicuent rusule'lü diidx loj rebejn con recuent?

¹¹Dxejcti badzu' Jesús diidx rajpni lojreni:

—Sacnäj Dios la'tu te gacbeetu recos xhiga'tz xten xcälrnibee Dios xhaguibaa, luxh laareni digacdi gacbeerenni. ¹²Chutis ni arajp yälracbee, sica'rungi te gapruni yälracbee. Sas nani guxii rajp yälracbee,

guiraa yälracbee ni rajpni sibicaj. ¹³ Ni'cni rniä lojreni con recuent sa'csi mase cadxelojreni, direni fii, mase cacuadiajgreni di diajgreni jiejn, xhet racbeedireni. ¹⁴ Laareni najcreni si'c te soob diidx ni gunii Isañas, dade' ni gunii xtidx Dios, che räjpni: Siejn diajgpactu, niluxh xhetliidi gacbeetu, sidxelopjactu, niluxh ditu fii.

¹⁵ Sa'csi guyalajz rebejnre, lastooreni najc si'c te guij,
di diajgreni jiejn,
luxh niäzu balojreni, didi fisa'creni con
balojreni,
didi jiejnza diajgreni, didi gacbeeza las-
tooreni,
didi gusiejch lajzreni guibi'reni loä te gusi-
acä lastooreni.

¹⁶ 'La'tu colgubialaznäj baloju tu sa'csi rhuisa'ctu, riensa'cza diajgtu. ¹⁷ Rniliápac, xhidajl redade' ni gunii xtidx Dios, näjza xhidajl bensa'c rlazduxh nuhuii sa' recos ni cahuitu, luxh direni nuhuii, rlajzreni niejn diajgreni sa' rediidx nani cayejn diajgtu, luxh di diajgreni niejnni.

Rusule' Jesús xcuent bejn ni rbe'c binij
(Mr. 4:13-20; Lc. 8:11-15)

¹⁸ 'Colcuadiajg xhi sälöj xcuent bejn nani rbe'c binij. ¹⁹ Rebejn nani rucuadiajg diidx xten xcälrnibee Dios, niluxh direni gacbeeni, najcreni si'c najc binij nani bitejb nez ro' nesuyj; riääd bendxab rudzucajni rediidx nani biu' nen lastooni. ²⁰ Rebinij nani bitejb nez nen reguuj, najc si'c rebejn nani rucuadiajg diidx, gustli rca'reni diidxga, ²¹ luxh guxii yu' xlobaani, direni sutijp. Che rdejdreni trabawj, che rdxe'ch bejn lojreni, sa'csi rucuadiajgreni xtidx Dios, rusiejch lajzreni, rbälazni diidxga. ²² Rebinij nani gurej nen reyaguejch sälöj rebejn nani rucuadiajg rextidx Dios rujnrurenii te gunreni dzuuun te ga'premi yälnsa'c ni yu' lo guedxliujre. Dxejcti rexçälñas a'c xten guedxliujre rusgueereni. Guiraa recosre rutau lo xtidx Dios nen lastoo rebejnre, dini gusaan gac te cosechsa'c nen lastoo rebejnre. ²³ Dxejc rebinij nani rtejb lo reyusa'c, ni'c najc si'c rebejn nani rucuadiajg xtidx Dios, nani racbee diidxga, nani rutie'ru sa'reni te racxhidajlreni. Yu' bejn ni najc si'c binij ni gujc te gayuu; yu' bejn ni najc si'c binij ni gujc gayojn; yu' za bejn ni najc si'c binij ni gujc galbitzuu.

Xcuent triuu cadro guyu' cuanguejch

²⁴ Dxejc bij Jesús stee cuent, räjpni:
—Xcälrnibee Dios xhaguibaa najc si'c te bejn nani gule'c ganax triusa'c lo xyujni.
²⁵ Lal nagaguejs bejnga, biääd te bejn nani rdxe'ch lajz loj xpaxhuaan binijga, biäidle'cni bedz cuanguejch lo xtriuu bejnga, dxejcti sääni. ²⁶ Cheni gulejn triuuga, birii doj lojni, dxejc biricaj näjza cuanguejch ro'c. ²⁷ Dxejcti räjj remos lo xlamreni; "Dad, ¿la et ganax triusa'c di gule'clu, ä? ¿Caxh bazaj cuanguejchre?" ²⁸ Räjj xlamreni: "Te bejn ni rdxechlajz loä biäidle'cchani." Dxejcti gunabdiidx rexmosni räjpreni: "¿La rlajz guejblu cholädxa'nu recuanguejchga, ä?" ²⁹ Dxejc räjj xlamreni: "Na'c, sa'csi che guiliäädxtu cuanguejchga, nägajcza triuu guiliäädxtu. ³⁰ Colsaan tioobreni tebloj. Che guire' cose'ch, dxejc guinibeä remos gutiexgaareni cuanguejch, guliibrenini gacni ters, dxejcti checni. Dx-ejcti sajc gutie'reni triuu chucheneen nen yu'!"

Xcuent bedz muxhtas
(Mr. 4:30-32; Lc. 13:18-19)

³¹ Bijza Jesús stee cuent räjpni:

—Xcälrnibee Dios xhaguibaa najcni si'c te bedz muxhtas nani cue'c te bejn lo xyujni. ³² Gulii bejdzga najc bäre'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riääd remane' ni rutajt riädyujn xpi-tiääzreni lo xajcw yajgga.

Xcuent levaduur
(Lc. 13:20-21)

³³ Bijzani stee cuentre, räjpni:

—Xcälrnibee Dios xhaguibaa najc si'c levaduur nani rugu'ch te gunaa lo chon mediid arin, dxejc ni'c rusaguijni guideb cojbgia.

Xhicuent baluui Jesús ganaxtis con cuent
(Mr. 4:33-34)

³⁴ Baluui Jesús guiraa rebejn ganaxtis con recuent, xhetiru stee mood nuluini, ganaxtis con cuent guniini lojreni. ³⁵ Si'c bejn ni te guzojb xtidx dade' ni gunii xtidx Dios che bacuaani lo reguijtz, räjpni:
Suiyä diidx con recuent,
suiyä diidx xcuent recos ni naga'tz che bencheeli Dios guedxliuj.

Rusule' Jesús xcuent cuanguejch nen triuu

³⁶ Dxejcti basadiidx Jesú斯 rebejn, biu'tini neñ yu' cadro bire' rexpejnpacni lojni, räjpreni lojni:

—Basule' loonu xcuent cuanguejch ni guyu' loniaa.

³⁷ Räjp Jesú斯 lojreni:

—Bejn nani rbe'c retriusa'c, nadj Xi'n Dios ni gujc Niguii; ³⁸ loniaaga nadj guedxliuj; retriusa'c nadj rebejn nani nadj xpejn Dios, nani rucuadajg xtiidxni; recuanguejchga nadj rebejn ni nadj xpejn bendxbab. ³⁹ Bejn nani rdxe'ch lajz nadj lagajc bendxbab. Cose'ch sälöj che nitloj guedxliuj; reni gutie' cose'ch nadj rexangl Dios. ⁴⁰ Sigacni guire' recuanguejch te chääni lo guiboo te checni, sigajcza gac che gac fis guedxliuj. ⁴¹ Xi'n Dios ni gujc Niguii suxhal rexanglini te jiädgutie'reni, te jiädlääreni lo xcälrnibeeni guiraa renani rujn riajb bejn nen dojl, näjza reni rujn cosgijidx. ⁴² Susälreni rebejngä neñ te or cadro cayedduxh. Ro'c sonduxhreni, sauya'reni läijyreni. ⁴³ Dxejcti rebensa'c sidimbicha'reni si'c gubidx lo xcälrnibeet Xtadreni. Palga sobdiajgtu, colgucuadiagsa'c.

Te cossacduxh ni naga'tz

⁴⁴ Räjpzani:

—Si'cza xcälrnibeet Dios xhaguibaa nadj si'c te cossacduxh ni naga'tz lo te yuj loniaa. Bidxäl te dade'ni, luxh bacuatzsacnini. Dxejcti rbalajzni, huijni, huito'ni guiraa xhix-tenni te rajpni meel siini yujga.

Perl nani sacduxh

⁴⁵ Räjpzani:

—Xcälrnibeet Dios xhaguibaa nadjcza si'c nadj te dad rapduxh nani caguiil perlsa'c te siini. ⁴⁶ Che bidxälni te perlsa'c, tejni sacduxh, bato'ni guiraa xhixtenni te gusiini perlga.

Guixh ni rniaaz bájl

⁴⁷ Räjpzani:

—Xcälrnibeet Dios xhaguibaa nadjcza si'c te guixh ni rusäl bejn lo nis te rniaazreni guiraloj cuaa bájl. ⁴⁸ Cheni agudxajni, rbäärenini nez ro' nisdoo, te ro'c rbereni loj rebäjl. Rebäjl ni nadj hueen rucheeni neñ te dxijm; nani di gac hueen rusälrenini te laad. ⁴⁹ Si'cza gac che gac fis guedxliuj; sirii rexangl Dios te sudzuajreni rebenguijdx

lo rebensa'c. ⁵⁰ Dxejcti susälreni rebenguijdx neñ te or cadro cayecduxh; ro'c sonduxhreni, sauya'reni läijyreni.

Te ben rajp

⁵¹ Dxejcti gunabdiidx Jesú斯 lojreni, räjpnit;

—¿La racbeetu guiraa ni caniä lojtu, ä?

Dxejcti räjpreni:

—O', racbeenuni Dad.

⁵² Dxejcti räjpnit lojreni:

—Cheni rsieed te bejn nani nadjn leii xcuent yälrnibee xten Dios xhaguibaa, na-jcni si'c te lam nani rajc rbää lo rexçal-nasa'cni recos ni nacoob, näjza recos biejw.

Jesús lo guedx Nazare't

(Mr. 6:1-6; Lc. 4:16-30)

⁵³ Che gulujx basule'ni recuentre, biriini ro'c, sääni. ⁵⁴ Huijni lagajc lajdixni. Ro'c gusloj caguluiini neñ xquidobäzreni ro'c. Dxejcti rdixeloduxh reben ro'c, räjpreni:

—¿Caro biseedni reyälnajnre? ¿Xho rajc rujnni remilagwr? ⁵⁵ ¿La et laadi dee ni nadj xi'n carpinter, ä? ¿La et Mariidi nadj xnanni? Dee ni nadj bejtz Jacoob, José, Simón con Judas. ⁵⁶ Luxh rebisiajnni rbäjzreni lo guejdxre. ¿Cacharo biseedni guiraa nani caguluiini?

⁵⁷ Dxejcti cayujnreni xhigab chugan la guliini, dxej räjp Jesú斯 lojreni:

—Guiraa rebejn rinälajz te niguu nani rnii xtidx Dios, biädla reben lajdxpacni di-reni jiu xtiidxni.

⁵⁸ Ni'c dini niujn xhidal milagwr ro'c sa'csi direni chalilajz xtiidxni.

14

Che gujt Juan Bautist

(Mr. 6:14-29; Lc. 9:7-9)

¹ Lagajc neñ redxejga Herodes, ni laaza tetrarca, bejn diajgni diidx xcuent ni cayujn Jesú斯. ² Dxej räjpnit lo rexmosni:

—Dee nadj Juan Bautist. Pet agubånsacni lo rebengut, ni'cni rajpni yälrnibee te ru-jnni remilagwr.

³ Si'c gunii Herodes sa'csi laani basä-uni Juan neñ latzguiib. Niluxh gunibeeni biliibni con cadeñ neñ latzguiib xcuent Herodías, ni gujc chääl bejtzni Felipe.

⁴ Bidxe'chni sa'csi räjp Juan lo Herodes:

—Et laadi rujnlu rbäznäjlu chääl bejtzlu.

⁵ Rlajz Herodes nugu'tni Juan, luxh rdx-
ejbnii rebenguejdx, sa'csi guiraareni rni-
ireni Juan najc te niguui ni rnii xtidx Dios.
⁶ Dxejc che gojl laj Herodes gujc lanij, birii
xindxa'p Herodías te baya'ni nez loj regol-
nejidx. Luxh sa'csi bidxaglazduxh Herodes
baya'ni, ⁷ räjpni loj gunaaga:

—Gunab xhtis ni rlajzlu, sa'csi gudix
lazä gunidxä ni guiniabtislu.

⁸ Dxejcti gunaaga, abalijdx xnannini,
räjpni lo Herodes:

—Loj te platón baniiidx bitiuyejc Juan
Bautist.

⁹ Diidxga benhuin lastoo reii Herodes,
per sa'csi abia'n diidx, niluxh abiejn diajg
rebejn, gunibeeni gudeedreni nani guiniab
gunaaga. ¹⁰ Dxejcti gunibeeni biru' yejc
Juan Bautist nen latzguiib. ¹¹ Sas biädnäreni
yejcni lo te platóñ, badeedrenini loj
gunaaga. Dxejcti gunaaga badeednini loj
xnanni.

¹² Dxejcti bidzujn rexpejñ Juan sanäreni
togoolga te huicua'tzrenini. Dxejcrú
huisa'nreni diidx loj Jesús.

Bayaan Jesús gaii mil bejn

(Mr. 6:30-44; Lc. 9:10-17; Jn. 6:1-14)

¹³ Che biejn diajg Jesús xhi guzajc Juan,
xtebni huä'pni neq te barcw huijni stee
laad nez lo reyubijdz. Che gucbee rebejn
caro sääni, huinajlreni Jesús lo yuj. Guiraa
nen reguejdxga biriiren. ¹⁴ Che birii Jesús
nen barcw, bahuiini loj xhidualduxh bejn,
dxejc balazlajzniren, basiajcní rebejn nani
racxuu. ¹⁵ Cheni acayu' guxhijn, gubig
rexpejnpacni lojni räjpreni:

—Rut rbäjzdi nez lo reyubijdzre, niluxh
agudzejq nqj. Basadiidx rebejn te jiireni nez
rerench te chasiireni xhi gaureni.

¹⁶ Räjp Jesús:

—Xhicuent jiireni. La'tu colgudeed xhi
gaureni.

¹⁷ Dxejcti räjpreni:

—Xhetru rajpdinu ree. Gaititis yätxtiil
näjza tio'p bälj rajpnu.

¹⁸ Laani räjpni:

—Coltanäni ree.

¹⁹ Dxejcti gunibeeni gurej rebejn lo
guixa'. Dxejcti cu'a'n guigaii yätxtiil
näjza guiro'p bälj, guläsnii lojni xhaguibaa,
badeednii xquixhtios lo Dios, dxejcti gula'nii
reyätxtiil. Badeednini loj rexpejnpacni.
Dxejcti rexpejnpacni gudisrenimi loj reben

xhidajl. ²⁰ Guiraareni gudajw, gudxaj
xque'reni. Dxejcti batie'reni yätxtilbiujy
nani bia'n. Si'cti tzubitio'p dxijm gudxajni.
²¹ Renani gudajw najcreni si'cti gaii mil
niguui, xhet näjdi regunaa niclaza rebiuu
bigab.

Gusaj Jesús lo nisdoo
(Mr. 6:45-52; Jn. 6:16-21)

²² Sas gunibee Jesús biu' rexpejnpacni nen
barcw te ganidreni tedreni stee lad nis lalñi
casadiidxni rebejn. ²³ Che gulujx basadi-
idxni rebejn, huä'p Jesús yecdajn te xtebni
guninäjni Dios Xtadni. Che gojl guxhijn,
ro'c sugaxteb Jesús. ²⁴ Luxh barcw galäii
lo nis sasaj. Cagusnibduxh reol barcw,
liriäazni lo nis sa'csi cabi' beduxh cadro
sääreni. ²⁵ Rsidooru gubig Jesús, bidzujni
lojreni, siädsajni lo nisdoo. ²⁶ Che bahuii
rexpejnpacni siädsajni lo nisdoo, bidxe-
jbreni, räjpreni:

—Colhuii te fantasmni —guredxa'reni
sa'csi bidxebduxhreni.

²⁷ Dxejc gunii Jesús lojreni, räjpni:

—Na'c guidxejbtu, laa naräni; colsutijp
lastootu.

²⁸ Dxejcti gunii Pedr lojni, räjpni:

—Dad, palga lujni, gunibee jiälä lojlu nez
lo nisre.

²⁹ Räjp Jesús:

—Gudaa pues.

Dxejcti birii Pedr neq barcw gusajni lo
nis te sääni nez loj Jesús. ³⁰ Che bahuii Pedr
beduxh ni cabi', bidxejbni, dxejc gusloj
cayäazni nen nisdoo. Guredxa'nii, räjpni:

—Dad, igulää narä!

³¹ Lagajc dxejc gunaaz Jesús naani, räjpni
loj Pedr:

—Guxii rajplu yälrililajz. ¿Xhicuent guci-
tio'p lajzlu?

³² Che huä'preni nen barcw, guläzgajc bej.

³³ Dxejcti renani sää neq barcw bazuxhi-
jbreni nez loj Jesús räjpreni:

—Gulipacni najclu Xi'n Dios.

*Basiajc Jesús reben racxhuu guedx Gene-
sare't*

(Mr. 6:53-56)

³⁴ Che gudejdreni lo nis, bidzujnreni nez
lo reyuj xten Genesare't. ³⁵ Che biembee
reben ro'cni, batie'chreni diidx guideb gab
lajdxreni. Dxejcti biädnäreni guiraa reben
racxhuu lojni. ³⁶ Gunabdukhreni gusaanni

canreni ro' xhajbtisni. Dxejcti guiraa re-nani gudajn xhajbni, biajcreni.

15

*Nani ruxhiñ bejn
(Mr. 7:1-23)*

¹ Dxejcti gubig gaii rebejn nani rului leii näjza rebejn guidoo ni laa farisee. Siäädreni guedx Jerusalén, räjpreni loj Jesús:

² —¿Xhicuent di rexpejnpaclu jiu xcostrumbr rebengool? ¿Xhicuent direni gusoob yälrdiib naareni che rajwreni?

³ Badzu'nii diidx, räjpni:

—¿Xhicuent di la'tu gusoobzatu xtidx Dios? Dee alga riurutu rexcostumbrtu.

⁴ Dios gunibeeni xho guntu che räjpni: "Gojp xpala'n xtdalu, xnanlu", näjza "Nani guiniyaj lo xtdadni o loj xnanni, suguetni."

⁵ Luxh la'tu rniiut sajc gäb chutis bejn loj xtdadni o loj xnanni: "Digacdí gacnäátu sa'csi guiraa ni rapä abadedäni lo Dios."

⁶ Luxh chutis ni guinii si'c, xhetru nanabdi gacnäjni xtdadni o xnani. Si'c ni cabälaztu rextidx Dios te gac chanuutu rexcostumbrtu.

⁷ Bejn ni rusguee najctu! Laaca gunii Isaías, bejn nani gunii xtidx Dios xcuenttu cheni räjpni:

⁸ Rebenguejdxre con ro'reni rliä'preni xpala'nä niluxh lastooreni zift suga' nez loä.

⁹ Xlia'si rajnreni narä, sa'csi ruluiireni si'c xtidxä reýärnibee xten reben guedxliuj.

¹⁰ Dxejcti gurejdxi rebejn, räjpni lojreni:

—Colcuadialg, colyacbee. ¹¹ Nani riu' ro' bejn di guxhiñ bejnga, sanga nani rii ro' bejnga ni'cni ruxhiñ bejnga.

¹² Dxejcti rexpejnpacni gubig lojni, räjpreni:

—¿La najnlu bidxe'ch rebejn farisee che biejn diajgreni diidx ni guniilu?

¹³ Dxejc laani räjpni:

—Xhitis yajg nani di Xtadä ni yu' xhaguibaa nusuj siliädex'a ni guideb xlobaani.

¹⁴ Colgusaanreni; lotiä'preni, ruluiireni nezyuj lo salotiä'preni. Luxh palga te ben lotiä'p guluij canejz chää stee lotiä'p, guiro'preni sitejbreni nen te gueed.

¹⁵ Räjp Pedr loj Jesús:

—Basule' cuentre loonu.

¹⁶ Räjp Jesús:

—¿La näjza la'tu ditu gacbee, ä? ¹⁷ ¿La ditu gacbee guiraa ni rajw bejn ru' xque'ni, dxejcti che rdejdni xque'ni, abigo'nni?

¹⁸ Niluxh diidx nani rii ro' bejn, nen lastoo bejn riini; dee ni ruxhiñ bejn. ¹⁹ Sa'csi nen lastoo bejn rii rexhigabguijdx xten rebejn ni rugu't sa'ni; xten rebejn ni rusguee guanaa; xten rebejn ni rusguee chääl sa'ni; xten rebejn ni rbajn; xten rebejn ni rnii didxxhii lo sa'ni; xtenza rebejn ni rutijl sa'ni. ²⁰ Laa sa' recosre ni ruxhiñ bejn. Che dini gusoob recostumbr xte yälrdiib naani, di ni'c guxhiñ bejn.

*Te gunazit nani huililajz xtidx Jesús
(Mr. 7:24-30)*

²¹ Birii Jesúro'c, sääni nez región xten Tiro näjza Sidón. ²² Nejzga rbäjz te guanaa cananee, cabedxa'ni biäädni lo Jesús, räjpni:

—Dad, xi'n toDavid, balaslajz narä. Xindxa'pä yu' xpej benädxab lastooni, niluxh cagusacsíduxhnini.

²³ Xhet räjpdi Jesús lojni. Dxejcti biädnab-duxh rexpejnpacni lojni, räjpreni:

—Barilaagw gunaare, didi rbedxa'ni siädnajlni luj.

²⁴ Dxejcti räjp Jesús lojni:

—Dios baxhal narä lojts xpen Israel nani agunijt nez dojl.

²⁵ Dxejcti gubig gunaaga, bazuxhijbnii nez loj Jesús, räjpni:

—Dad, gucnäj narä.

²⁶ Dxejc räjp Jesús lojni:

—Di gac hueen xca' bejn xcuxtil rex'i'nni gusälnini lo rebä'cw.

²⁷ Dxejc räjp gunaaga lojni:

—Guliini Dad, näjza rebä'cw rajw te la' yätxtiil ni rtebj lo mex xten xpaxhuaanni.

²⁸ Dxejcti räjp Jesús lojni:

—Nane', lacti guroob najc xcälrililajzlu. Sugac si'cni rlajzlu.

Lagajc dxejc biajc xindxa'pni.

Basiadjc Jesús xhidal bejn racxhuu

²⁹ Birii Jesúro'c gudejdni nez ro' nisdoo ni laa Galilee. Huäpgajcni yejc te dajn, ro'c gurejni. ³⁰ Xhidajl bejn bidzujn cad sobga'ni. Siädnäreni reben ni rajc ni'ni, reben ni najc lotiä'p, reben gop, reben ni xheti naani, näjza xhidalro ben racxhuu, bidzunnäjrenini nez loj Jesús. Dxejcti basi-ajcniren.

³¹ Ni'cni lacti bidxeloduxh reben

xhidajlga che bahuiireni rnii regop, riajc
reni xheti naani, rsiaj reni rajc ni'ni, ruhuii
reloetiä'p, dxejc rliä'preni xpala'n Xtios rex-
pen Israel.

*Badeed Jesús xhi gudajw tajp mil bejn
(Mr. 8:1-10)*

³² Gurejdx Jesús rexpejnpacni räjpni lo-
jreni:

—Riaá rebejnre sa'csi agujc chon dxej
yunäjreni narä luxh xhet ca'direni gauren.
Di rlazä guxhaläreni jiireni rolizreni palga
gajdreni gau didi guidxajgreni lo nezyuj.

³³ Dxejcti räjp rexpejnpacni lojni:

—¿Xho guidxalnu xhi gau reben xhidaj-
lre nez lo reyubijzre cadro rut rbäjzdi, ä?

³⁴ Räjp Jesús lojreni:

—¿Bal yätxtiil ca'tu?

Räjpreni:

—Gajdztisni, näjza gaii bälbäze'.

³⁵ Sas gunibee Jesús cue rebejn lo yuj.

³⁶ Dxejc cua' Jesús guigajdz yätxtiilga
näjza rebäj, badeedni xquixtios lo Dios
dxejc gula'ni reyätxtiilga näjza rebäjlgä
badeednireni loj rexpejnpacni. Dxejcti
laareni gudisreni yätxtiilga con rebäjlgä
lo rebejn xhidajlga. ³⁷ Guiraareni gudajw,
gudxaj xque'reni. Che gulujx gudajwreni,
batie'reni reyätxtiil ni bia'nга, gudxaj gajdz
dxijmni. ³⁸ Renani gudajwga najc si'cti tajp
mil bejn, niluxh xhet näjdi regunaa niclaza
rebiuux bigab. ³⁹ Dxejcti basadiidx Jesús
rebejn, biu'tini neñ barcw te gudejdni lo
nisdoo nez régión xten Magdala.

16

Reben guidoo ni laa farisee näjza sa-
ducee rniabreni te milagwr si'c te seen
(Mr. 8:11-13; Lc. 12:54-56)

¹ Refarisee näjza resaducee bidzujnreni
lo Jesús, gunabreni gunni te milagwr,
gudeedni te seen ni rien xhaguibaali.
Niluxh cagusgueesireni, sa'csi rlajzreni
guiga' Jesús. ² Dxejc badzu' Jesús diidxre
räjpni lojreni:

—Che rajl gudxej, rniitu: “Saru gac
te dxej guixee sa'csi naxniaa xhaguiba.”

³ Che rajl rsil rniitu: “Evlaadi gac te dxej
nadxej sa'csi naxniaa xhaguiba niluxh tre'
za.” Xhoxh numbeetu xhi sälöj reseen ni
rien xhaguiba, luxh ditu gumbee xhi sälöj
reseen xcuent redxejre, nalajznu recos ni
cayajc. ⁴ Reben guijdxre, reben guyalz

rniab te senro, te milagwr, luxh dirureni fii
stee milagwr; suhuiitisreni xsen Jonás.

Dxejcti basa'n Jesúsreni ro'c, sá'tini.

Levaduur xten refarisee

(Mr. 8:14-21)

⁵ Che gudejd rexpejnpacni stelaad nisdoo
biäl-lajzreni ninäreni yätxtiil. ⁶ Dxejcti räjp
Jesús lojreni:

—Bacuadijg, colnati levaduur xten re-
farisee näjza resaducee.

⁷ Dxejcti bejnreni xhigab neñ lastooreni:
“Si'c caniini sa'csi dinu niopnä yätxtiil.”

⁸ Luxh gucbee Jesús xhigabga, dxejc räjpni
lojreni:

—¿Xhicuent rujntu xhigab xhet yätxti-
ildi ca'tu, ä? ¡Huinduxh najc xcärlililajzu!

⁹ ¿La gajdu gacbee? ¿La diza lajztu guinaj
che gudisä gaii yätxtiil gudajw gaii mil bejn,
ä? ¿Bal dxijmni batie'tu, ä? ¹⁰ ¿La diza
lajztu guizaj che gudisä gajdz yätxtiil gu-
dajw tap mil bejn, ä? ¿Bal dxijmni batie'tu?

¹¹ ¿Xhicuent ditu gacbee et yätxtiildi ca-
gasü'tä cheni caniä lojtu colnati levaduur
xten refarisee näjza resaducee?

¹² Dxejcru gucbeereni dini niäjp: “Col-
nati levaduur xten yätxtiil.” Laani caniini:
“Colnaáti yälrlulii xten refarisee näjza re-
saducee.”

Bicäj Pedr Jesús najc Cristpac

(Mr. 8:27-30; Lc. 9:18-21)

¹³ Che bidzujn Jesús régión xten Cesarea
xten guedx Filipo, gunabdiidx Jesús loj rex-
pejnpacni, räjpni:

—¿Chu naj rebejn nacä narä Xi'n Dios ni
gujc Niguii?

¹⁴ Laareni räjpreni:

—Yu'reni naj luj najclu Juan Bautist;
yu'zareni rnii luj najclu Elías, peta sgaiirení
rnii luj najclu Jeremías o stee niguii ni rnii
xtidx Dios.

¹⁵ Dxejcti räjpni lojreni:

—La'tu, ¿chuni'c rniitu nacä?

¹⁶ Dxejc räjp Simón Pedr:

—Luj najclu Crist, Xi'n Dios nani nabajn.

¹⁷ Badzu' Jesús diidxre, räjpni:

—Chicbaalu, Simón Pedr, xi'n Jonás,
sa'csi xhet bejndi baluui dee lojlu, Xtagatís
ni yu' xhaguiba baluiinini lojlu. ¹⁸ Narä
rniä lojlu, luj najclu Pedr, nani sälöj: “Te
guj.” Sa'csi sibäxtiejlü guidxagsa'za re-
nani lilajz xtidxä, niluxh che guetreni,
direni nitloj. ¹⁹ Narä gunidxä yälrnibee lojlu

te gulijdxlu rebejn nani ahuiliilajz xtidxä. Xhitis ni gusaanlu gunreni, o xhitis ni dilu gusaan gunreni, susoob Dios xtiidxlu.

²⁰ Dxejcti gunibee Jesús rutlojdi gäb rex-pejnpacni laani najc Guejb Crist.

*Gunií Jesú斯 xho guetni
(Mr. 8:31-9:1; Lc. 9:22-27)*

²¹ Lagajc dxejc gusloj cagusule' Jesús diidx lo rexpejnpacni, guniimi lojreni xho nanabpac chääni guedx Jerusalén te ro'c tedni trabajwduxh ladznaa rebengool xten guidoo, ladznaa rebixhojz, näjza rebejn ni najn xleii Moisés. Guniizani sugu'trenini, niluxh ni riojñ dxej sibansacni lo rebengut.

²² Dxejcti huinä Pedr Jesús te laad, gusloj cadilñänjini, räjpni:

—¡Gacnäj Dioslu, Dad! ¡Gurniälojlu gaclu si'cl!

²³ Dxejc gubiré Jesús, räjpni lo Pedr:

—¡Gubicaj loä beñdxb! Na'c rusiejytisu loä. Luj dilu gun xhigab xten Dios, alga xhigab xten rebenguedxliuj rujnlu.

²⁴ Dxejcti räjp Jesús loj rexpejnpacni:

—Palga yu' chu tejtu rlajz guirinajl narä, succuälazni lagajc laani, suguuni xcruzjni, nalajznu tedni trabajw, sujiädnajlni narä.

²⁵ Sa'csi nani rlajz gunni gaan xcälnabajnni, sunijtnini. Luxh nani runijt xcälnabajnni por narä, sidxälni xcälnabajnni par tejpas.

²⁶ Sa'csi ¡xhi gaan gun te bejn palga ga'pni guideb guedxliuj, luxh nit xaimni lo Dios, ä? O ¡la yu' xhi gudeed bejn te siimi xaimni?

²⁷ Sa'csi narä Xi'n Dios ni gujc Niguii siälä lo yälrdimbicha' xten Xtadä con rexanglni, dxejcti siguixä tebgaj bejn si'ctis ni gujc xtzuunni. ²⁸ Rniliäpac lojtu, loj reni tre' ree naj, yu'reni di guet dxejli ni fixgaareni jiälä narä Xi'n Dios ni gujc Niguii lo xcälnibeä.

17

*Chuni'c najc guroob
(Mr. 9:2-13; Lc. 9:28-36)*

¹ Che gudeed xho'p dxej, huinä Jesús Pedr, Jacoop, con Juan betz Jacoop, xte-breni huijreni jiaa yejc te dajn. ² Dxejcti nez lojreni bidxaa xho rujn lojni. Lojni gusloj rdimbicha' si'c gubijdx; xhajbni gujc nolbäj si'c te bajl. ³ Dxejc bahuigajcreni loj Moisés näjza loj Elías, cayuwyreni diidx con Jesús. ⁴ Dxejcti räjp Pedr loj Jesús:

—Dad, ¡huenduxh suga'nu ree! Palga rlajzlu, sajc jiennu chon yuguijxh, tejni gac

xten guejblu, steeni gac xten Moisés, steeni gac xten Elás.

⁵ Lajni canii Pedr, biäjt te za ni rdimbicha' guideb gabireni; neñ zaga biejn te xse' ni räjp:

—Dee najc xi'nä ni sanälazä, rus-paduxhni lazä, colcuadiajg xtiidxni.

⁶ Che biejn diajg rexpejnpac Jesús diidxga, bazuxhjibreni, basajbreni lojreni lo yuj, bidxebeduxhreni. ⁷ Dxejcti gubig Jesús lojreni, batzuubni naani yejcreni, räjpni:

—Colchasulii, na'c rdxejbtu.

⁸ Che guläs lojreni, lojtsis Jesús bahuiireni, rutru sugarajdini.

⁹ Cheni sayäjtreni yejc dajnga, gunibee Jesús lojreni, räjpni:

—Rutlojdi gäbtu xhini'c bahuiitu dxejli ni guibansacä narä Xi'n Dios ni gujc Niguii lo rebengut.

¹⁰ Dxejcti gunabdiidx rexpejnpacni lojni:

¹¹ —¿Xhicuent rnii rebejn ni najn xleii Moisés ganid Elás nanab jiääd, ä?

¹² Badzu' Jesús diidxre, räjpni:

—Guliini siädxgaa Elás, laani guns'a'cni guira'ti, ¹² niluxh narä rniä lojtu, abiääd Elás, di rebejn nienbeeni, luxh ben-näjrenini si'ctis ni rlajzreni, basacsí-duxhrenini. Sigajcza gunnäjreni narä Xi'n Dios ni gujc Niguii, susacsíduxhreni narä.

¹³ Dxejcti gucbee rexpejnpacni caniini xcuent Juan Bautist.

Jesús basiajc te biuux ni guyu' xpej bendxb

(Mr. 9:14-29; Lc. 9:37-43)

¹⁴ Cheni bidzujreni cadro tre' xhidajl bejn, gubig te bejn lojni bazuxhjibni, dxejc räjpni:

¹⁵ —Dad, balaslajz xinä sa'csi laani cay-acxhuuni, rajcni yälguidxbej, rusacsíduxh yälguidxgani, yu' huält rtejbní lo guiboo yu' huält rtejbní lo nis. ¹⁶ Biädnäáni loj rexpejnpaclu, luxh di niajcdi nusiajcrenini.

¹⁷ Jesús badzu' diidxre lojreni räjpni:

—Benguijdx, bejn ni di chalilajz, ¿gucli yu'ä lojtu? ¿Cati gac gunä huant la'tu? ¡Coltanä biuuxga ree!

¹⁸ Dxejcti gudilnäj Jesús bendxb ni yu' lastoo biuuxga, gunibeeni biriini, lagajc dx-ejc biasc biuuxga.

¹⁹ Dxejc guninäj rexpejnpacni Jesús te laad, gunabdiidxreni räjpreni:

—¿Xhicuent di niajcdi nibäänu bendxab
nen lastoo biuuxga?

²⁰Jesús rájp lojreni:

—Sa'csi la'tu guxiduxh rililajztu. Rnil-iá lojtu, paru nadjc yärlilajz xtentu si'cti te bejdz muxhtas, sajc gäbtu loj dajn rec: “Gubicaj ro'c, gudejd stelaad”, luxh sibicaj dajnga. Palga rililajzpactu, xhetliidi yu' ni di gacdi guntu. ²¹Niluxh sa' benédxabre, dini guirii palga ditu guiniabduxh lo Dios, gucua'nzatu.

Jesús rusule' stehuält xho guetni

(Mr. 9:30-32; Lc. 9:43-45)

²²Lañni sasajreni nez región xten Galilee, rájp Jesús:

—Suteedreni nará Xi'n Dios ni guj Niguii ladznaa rebendojl te gusacsíreni nará. ²³Niluxh sugu'treni nará, dxejc ni riojn dxej sibañsacá lo rebengut.

Che biejn diajgreni diidxga, guc-huinduxh lajzreni.

Gudixni impuest xten guidoo

²⁴Che bidzujn Jesús näjza rexpejnpacni guedx Capernaum, biääd rebejñ ni rusquijx xcuent guidoo lo Pedr, gunabdiidxreni lo-jni, rájpreni:

—¿La di xmastrtu quiix impuest xten guidoo?

—Rájp Pedr:

—Rgújxnni.

Che biu' Pedr nen yu', ganid Jesús gunii lojni, rájpni:

—¿Xhi rchalolu, Simón? ¿Chuni'c rusquijx rebejñ ni rnibeel lo guedxliujre? ¿Chuni'c rgújx reimpuest, recuyo't? ¿Reben lajdxreni o rebenzijt?

²⁶Badzu' Pedr diidxre rájpni:

—Rebenzijt.

Rájp Jesús:

—Ni'cni di rexí'nreni quiixni. ²⁷Luxh te di guidxe'chreni, huij ro' nisdoo, bacuua ansuel, gulää bájl ni guiniazxgaalu. Ro' bájlga sidxällu te melpla't ni sajl te chati-jxlu impuest xcuentä näjza xcuentlu.

18

¿Chuni'c sajcrú lajdx Dios xhaguibaa?

(Mr. 9:33-37; Lc. 9:46-48)

¹Laa dxejcni gubig rexpejnpac Jesús lojni te gunabdiidxreni:

—¿Chuni'c sajcrú lajdx Dios xhaguibaa?

²Dxejcti gurejdx Jesús te biuxbáz, bazu-jnini nez galäiireni, ³dxejc rájpni:

—Rnilíápac lojtu, palga ditu gusiechla-jztu, palga ditu gac nadolajz si'c te biuxbáz, ditu jiu' lajdx Dios xhaguibaa. ⁴Ni'cni chutis bejñ nani gac nadolajz si'c biuixe're, laani gac ni sajcrú lajdx Dios xhaguibaa. ⁵Chutis ni riu te sa' biuixe're, sa'csi rinälajzni nará, lagajc nará riuni.

Riezgw jiajbni ney dojl

(Mr. 9:42-48; Lc. 17:1-2)

⁶Rájpzani:

—Chutis ni gudzucaj lo xnezyü te sa' biuixe're ni ahuililajzni xtidxä, maaazru huen niliib te guij xten molin dojb yejnni, chate-jbni loj nisdoo, palga gunni jiajb tej reni'c lo dojl. ⁷Proobza guedxliuj sa'csi yuduxh xhigabguijdx lojni. Sa'csi nanabpac chu xhigabguijdx. Gunatiro, bejñ ni ruzobloj rexhigabguijdxre, ni rujn riajbza lo dojl reni rililajz xtidxä, ni nadjc si'c biuixe're.

⁸Palga ni'lú o ñaalu gun jiajblu lo dojl, batiu'ni. Hueenru jiu'lú lo xcälnabajn Dios nituijnglu o natuijnglu lacuua jíilu con guiro'p ni'lú o guiro'p ñaalu lo balduxh ni rejc par tejpas. ⁹Palga te baloju rujn riajblu lo dojl, guläani. Hueenru jiu'lú lo xcälrnibee Dios näjclu lotiä'p lacuua chu guiro'p baloj chazälreni luj lo balduxh ni rejc par tejpas.

Xcuent xiil ni gunijt

(Lc. 15:3-7)

¹⁰Rájpza Jesús lojreni:

—Colnatiro, andi cuälaztu rebejñ ni nadjc si'c biuxbázre ni sasaj lo xnez Dios, sa'csi rexangl Dios ni cahuiireni, guiraatis dxej yu'reni loj Dios. ¹¹Sa'csi Xi'n Dios ni guj Niguii biääd te guslaani rebejñ nani agunijt nen dojl.

¹²Rájpzani:

—¿Xho rhuiitu? Palga rajp te bejñ te gayuu xiil, dxejc nit tejni, ¿laa dini gusaan stabitzubigaaga ni yu' neñ gurajl te chati-ilni xile' ni gunijt, ä? ¹³Luxh palga guidxälni xile'ga, rniliä lojtu, sibalazduxhruni xcuent rexil nani di ninijt. ¹⁴Sigajcza Xtradnu ni yu' xhaguibaa di rlajz nit lo Dios nicla tej reni ahuililajz xtiidxni, ni nadjc si'c biuxbázre.

Xho gunnäjlu bejtzu

(Lc. 17:3)

¹⁵Räjpzani:

—Palga gun bejtzu te cosguijdx lojlu, guninäjni xtebtislu, gojs lojni xhi dojl bejnni lojlu. Palga saru gucuadiajgni xtiidxlu, abiäjl lajztu. ¹⁶ Palga naaddini gucuadiajgni, dini jiu xtiidxlu, dxejc huinä stee o stio'p bejn chaninäjlni, te guiraa ni guinitu jiejn diajg rebejng, te arajplu tio'p o chon testiigw. ¹⁷ Palga di bejtzu gucuadiajg xtidx rebejng, luxh dizani jiu xtiidxreni, nen guidoo huile'c xquejlu loj rebejn ni ricuadiajg xtidx Dios. Palga dizani jiu reben guidoo, sugacni nez lojtu si'c te benguijdx ni di gumbee xtidx Dios o si'c rebejn nani rusquijx loj rebejn nani ruto'.

¹⁸'Ni'cni rniliápac lojtu, guiraa yälgxhtis xten bejn ni di gusiechlajz xtojlnreni ni guntu lo quedxliuj, si'c jia'nni xhaguibaa; guiraa redojl nani gusiäjl lajztu lo quedxliuj sa'csi basiechlajz bendojlg, si'cza jia'nni xhaguibaa.

¹⁹'Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtu lo Dios, Xtradä ni yu' xhaguibaa suniidxn ni rniabtu lojnu. ²⁰Sa'csi cadrotis nadxagsa' tio'p o chon bejn sa'csi rinäla-jzreni narä, anasuga'lä galäi rebejng.

²¹Dxejcti gubig Pedr loj Jesús, gunabdi-dxni:

—Dad, ¿palga gunijt betzä loä, bal huält nanab gusiäjl lazä? ¿La sajgajdzli huält, ä?

²²Badzu' Jesús diidxre lojni räjpni:

—Dina guiniä gajdztis huält, rniä gay-onbidzuu huält, malajznu si'ctiza huält basiäjl lajzlu.

Xcient tio'p bejn ni nazääb meal

²³'Xcälrnibee Dios xhaguibaa najc si'c te reii ni rlajz gunni cuent lac nazääb rex-mosni lojni. ²⁴Agusloj cayujnni xcuentni chela bidzunnäjreni te mos ni nazääb balti mil lojni. ²⁵Luxh mosre xhet rajpdini te quixni rexti'nni, ni'c gunibee reii guido'ni si'c sclav, näjza chäälni, näjza rex'inni, nägajcza guiralii xhixtenni, te gaxh xti'nni. ²⁶Dxejcti mosga bazuxhi-jbni loj xlamni, gunabduxhni lojni, räjpni:

"Guläzsijc tiop-chon dxej, Dad, te gac quixä xti'nä." ²⁷Dxejcti lamga balazlajzni xmosni, badzucajni guiraa ni nazääb mosga lojni, baslaanini. ²⁸Cheni birii mosga rolizj xlamni, bidxaagni stee samosni ni nazääb

bale'si beex lojni. Gunaaznini, baxhiya'ni yejnni, dxejc räjpni: "Gudijxga ni nazääblu loä." ²⁹Dxejcti ste mosga bazuxhjbni lojnni, räjpni: "Guläzsijc. Siguixäca guiraa ni nazääb lojlu." ³⁰Luxh steega naaddini, alga huiisäugacni samosni nen latzguib te bejnni gaan gudijxni guiraa ni nazääbni. ³¹Cheni bahuii sgaii mos xhini'c bejnni, guc-naduxhlajzreni, huiye'tzreni lo xlamreni xhi huiyejnni. ³²Dxejcti gurejdx xlamreni mosga, räjpni lojni: "¡Mos guijdx! Narä badzucä d'in ni nazääblu loä, sa'csi gun-abduxhlu loä. ³³Si'cza niunnäjlu sa'lu, nu-lazlajzuni sigajc ni balazlazälu." ³⁴Sas lacti bidzechduxh lamga, gunibeeni biäüuni te gudijxni guiragajc ni nazääbni lo xlamni.

³⁵Baluux Jesús cuentga, räjpni:

—Sigajcza gunnäj Xtradä ni yu' xhaguibaa guiraa rebejn ni di gusiällajzpac guiraa redojl ni rujn resa'ni lojni.

19

Jesús ruluij xcuent yälru'o'n sa'ni
(Mr. 10:1-12; Lc. 16:18)

¹Che gulujx gunii Jesús recuentre, biune-jzni Galilee, huijni lo región xten Judea, stelaad guee Jordán. ²Xhidajl bejn birina-jlni, ro'c basiajcní rebenracxhuu, ³dxejc gu-big refarisee lojni, rlajzreni gusgueesireni Jesús ni'c räjpreni lojni:

—¿La sajguro'n te niguui chäälni che rlajztsni, ä?

⁴Badzu' Jesús diidxre lojreni, räjpni:

—¿La gajdtu gol lo reguijtz nani bacuua toMoisés cadro caj xho benchee Dios bejn galooli: "Niguui näjza gunaa bencheenirení?" ⁵Guniiza Moisés: "Ni'cni gusaan niguui xtradni con xnanni te xca'ni chäälni, dxejc dirurení gac tio'p, tejtis bejn najcreni." ⁶Ni'cni dirurení gac tio'p, anajcreni tejtis bejn, digacdi guilia' rebejn lo sa'ni nani abachagsa' Dios lo sa'ni.

⁷Dxejcti gunabdiidxreni lojni, räjpreni:

—¿Xhicutent gunibee Moisés gudeed niguui te guijtz lo chäälni te si'c gac guro'nni gunaaga, ä?

⁸Räjp Jesús lojreni:

—Sa'csi najc lastootu si'c te guij, ni'c basaan toMoisés baro'n niguui chäälni, niluxh galodoo et si'cti gujci. ⁹Luxh rniä lojtu, niguui nani gusaan chäälni, luxh xhet dojldi bennäj chäälni stee niguui, dxejcti

guchnaani ste'ca gunaa, rujnni dojl. Siga-jcza niguui ni guchnaa gunaaga ni abaro'n chäälnini, rujnza niguiga dojl.

¹⁰ Dxejc räjp rexpejnpacni lojni:

—Palga si'c najc xcuent niguui con chäälni, hueenru na'c guchnaani.

¹¹ Jesús räjp lojreni:

—Xhet guiraadi bejn rajc gacbee rediidxre, rebejntis ni ruded Dios te xcäriensa'c ni'ctis racbee. ¹² Yu' xhicient digacdi guchnaa niguui: yu'reni digacdi guchnaa sa'csi si'c gojlreni; yu'reni digacdi guchnaa sa'csi baxhin sabeiñreni; yu'zareni digacdi guchnaareni sa'csi rlajzreni gunreni xtzuuntis Dios. Nani rajc racbeeni rediidxre, sugaceeniren.

Biädnäreni rebiuu loj Jesús

(Mr. 10:13-16; Lc. 18:15-17)

¹³ Dxejcti biädnäreni rebiixe' loj Jesús te gudzuubni ɳaani yejcreni, guiniabni lo Dios xcuentreni. Luxh rexpejnpacni gudilnäj rebejn ni siädnä rebiixe'ga. ¹⁴ Dxejc räjp Jesús lojreni:

—Colgunaan guibig rebiixe' loä, na'c gudxoijntrene, sa'csi xcälrnibee Dios xhaguibaajc najc xten reni nadolajz si'c najc rebiixe're.

¹⁵ Che gulujx badzuubni ɳaani yejc rebiixe', biunejzni ro'c.

Te ben ni rajp guninäj Jesús

(Mr. 10:17-31; Lc. 18:18-30)

¹⁶ Dxejc biääd te bi'n lo Jesús, gunabdiidxni lojni; räjpni:

—Mastr sa'c, ¿xhini'c nanab gunä te xca'ä yälnabajn lo Dios par tejpas?

¹⁷ Dxejc räjp Jesús lojni:

—¿Xhicuent rniliu mastr sa'c narä? Diostis najc sa'c. Per par rlajzlu xca'lü yälnabajn lo Dios, bazoob rextidx Dios ni caj lo xleii Moisés.

¹⁸ Dxejcti räjp bi'nga lojni:

—¿Xhi rediidxga?

Dxejc räjp Jesús lojni:

—Na'c ju'tlu, na'c guesnäjlu bejn nani di gac chäällu, na'c cuanlu, na'c guiliäslu didxxhii xcuent bejn. ¹⁹ Bazoob xtidx xtradlu con xnanlu, huinälajz sa'lü si'cni sanälajzlu lagajc luj.

²⁰ Dxejcti räjp bi'nga lojni:

—Guiraa rediidxre runä che nacáli bi-uuux. ¿Xhiruxni'c riäadx gunä?

²¹ Dxejc räjp Jesús lojni:

—Palga rlajzlu gaclu bensa'c lo Dios, huij, bato' guiraa ni rajplu, dxejc gudisni lo rebenproob, dxejc xhaguibaa sapduxhlu xhixtenlu. Dxejcti gudaa te jiädnajllu narä.

²² Cheni biejn diajg bi'nga rediidxre, guchuinduxh lajzni sa'csi rajpni xhidualdux xhixtenni.

²³ Sas Jesús räjp loj rexpejnpacni:

—Rniliápac lojtu, naganduxh jiu' te ben rajp loj xcälrnibee Dios. ²⁴ Rnisacä lojtu, guyasiru ted te cameii nej baloj te guux; naganduxhru jiu' te bejn ni rajp lo xcälrnibee Dios.

²⁵ Che biejn diajg rexpejnpacni rediidxre, bidkeloduxhreni, dxejc canabdiidx loj sa'reni:

—¿Chuni'c sajc jiu' lo xcälrnibee Dios?

²⁶ Dxejc bahuidzu'tz Jesús lojreni, räjpni:

—Naganduxh gun rebejn dee, Diostis sajc gun guiraloj.

²⁷ Dxejcti Pedr räjp lojni:

—Nuurnu basa'nnu guiraa xhixtenu te siopnalnulu. ¿Xhini'c jia'pnu ro'c?

²⁸ Jesús räjp lojreni:

—Rniliápac lojtu, la'tu ni biädnajltu narä, che guscobä guiraa recos cheni cueä narä, Xi'n Dios ni gujc Niguii, lo yagxhil cadro guinibeä lo guiraa reben guedxliuj, la'tu ni siädnajltu narä sibejzatu lo tzubitio'p yagxhil te guinibeetu loj guitzubitio'p gueidx xten rexpejñ Israel. ²⁹ Luxh guiraa rebejn ni basa'n rolizjni o rebejtzni, o rebisiajnni, o xtadni, o xnanni, o chäälni, o xi'nni, o rexhujni, te siädnajlni narä, rebejnga sajp te gayuu huält locni gojpnii, nägajc ga'preni xcälnbabajn Dios par tejpas. ³⁰ Rebejn nani rchalo najcreni beñroru lo sa'reni nez loj Dios, reni'c gac bejn ni guxii sajc nez loj Dios. Rebejn nadolajz ni di guchalo sajcrureni lo sa'reni, reni'c sajcrureni nez loj Dios.

20

Xcient reni rujn dzuun

¹ Räjpzani:

—Xcälrnibee Dios najc si'c te bejn ni najc baxhuaan xten te renchro. Rsil-dooru biriini te satiilni mos gun dzuun lo xyujni, lo reyaguub. ² Che bidxälni gaii mos, bachaagni diidx. Bia'nreni diidx quiixnireni te denaar tebdxej cade tej

remosga. Dxejc baxhalnireni loj xyujni sayujnreni dzuun. ³Birisacni, satiilni sgaii mos si'cti rcagaa, rsil. Bidxaagni sgaii bejn ni xhet cayujndi, suga'sireni nez lo guui. ⁴Räjpnii lojreni: "Näjza la'tu colchayujn dzuun lo xyuä. Narä siguixä si'cni riäj xca'tu." Sä'ti rebejngä lo dzuun. ⁵Birisac dade' si'cti läiidxej, birisaczani si'cti rachon gudxej. Bidxaagni sgaii bejn, sigajcza räjpnii loj rebejngä. ⁶Dxejc si'cti rcagaii birisacni, huijni lo guui. Ro'c bidxälni sgaii bejn ni xhet cayujndireni, suga'sireni nez lo guui. Dxejc räjpnii lojreni: "Xhicuent suga'tu ree guideb dxej xhet cayujnditu?"

⁷Dxejc räjpreni lojni: "Sa'csi rut siätiildinu te choyennu dzuun." Dxejcti räjpnii lojreni: "Näjza la'tu colchayejn dzuun lo xyuä. Narä siguixa'sätu." ⁸Che biu' guxhijn, räjp lam lo mos ni rnibee remos: "Gurejdx remos te quixluren. Gudix-xgaa reni biu' gudxejru lo dzuun. Lult gudix reni biu' ganid lo dzuun." ⁹Dxejc ganid biu' remos ni agudxej biu'reni lo dzuun. Cade tejreni cu'a' te denaar, si'cni rca' ni rujn dzuun guideb dxej. ¹⁰Cheni biu' reni biu' lo dzuun rsildoo, bejnreni xhigab sica'rurenii meel, per sigajcza laareni cu'a'reni te denaar cade tejreni. ¹¹Che cu'a'reni xcuentreni gusloj cadxe'chreni lo baxhuaan xten dzuunga. ¹²Räjpreni: "Redee ni biu' lult lo dzuun pet teb ortis bejnreni dzuun, luxh gudixlurenii sigajcni gudixlxnu nuurnu, luxh biennu dzuun guideb dxej, luxh biennu dzuun lo yälnanlaa." ¹³Dxejc räjp lamga lo tejreni: "Xamigwä, xhet cosgijdxdi cayunä lojlu. ¹⁴La xhet bia'ndinu diidix te denaar quixälü tebdxej?" ¹⁴Huij, cu'a' xmeellu. Narä rlazä quixä bejre ni biu' lult sigajc ni gudixä lojlu. ¹⁵La di gacdii gunä si'ctis ni rlazä con xmelä? ¹⁶O rdxechlajzlu loä sa'csi nacä hueen, ä?" ¹⁶Ni'cni reni biääd lult sajcreni tebлоj con reni biääd ganid, luxh reni biääd ganid sajcreni tebлоj con reni biääd lult.

*Gunisac Jesús xho guetni
(Mr. 10:32-34; Lc. 18:31-34)*

¹⁷Che sasaj Jesús lo nezyuj sääni Jerusalén, huinäni rexpejnpacni te laad te räjpnii lojreni:

¹⁸—La'tu ruhuitu sosaanu nez guedx Jerusalén. Ro'c narä, Xi'n Dios ni gujc Niguii, siabä ladzñaa reni rnibee lo

rebixhojz, näjza lo rebejn ni najn leii. Laareni sinibeereni guetä. ¹⁹Suteedreni narä ladzñaa rebenzijt te cubeereni narä quiinreni narä, dxejc gucuarenii narä lo crujz. Luxh ni rijojn dxej, sibañsacä loj rebengut.

*Ni gunab xnan Jacob näjza Juan
(Mr. 10:35-45)*

²⁰Dxejcti gubig xnan Jacob näjza Juan, xi'n Zebedeo loj Jesús. Bazuxhjibni nez loj Jesús, te gunabni lo Jesús. ²¹Gunabdiidx Jesús lojni:

—¿Xhini'c rlajzlu?

Räjp gunaaga lojni:

—Che jiu'lü lo xcälrnibeluu, gunibelaa cue tej rexi'nä xladbeelu, steeni cue xladbäjgwlu.

²²Dxejc räjp Jesús:

—Ditu gan xhini'c rniabtu! ²³La sajc teditu yärlsacsí sa'nä tedä? ²⁴La sajc teditu trabajwduxh sa' ni nanab tedä?

Dxejc räjpreni:

—Sajc tednuni.

²³Dxejcti räjp Jesús lojreni:

—Guliipacni. Sidedxgaatu trabajw, sidexgaazatu yärlsacsí. Et narädi cueä reni cue xladbägwä o xladbeä. Xtadä ni yu' xhaguibaa alagulenii rebejngä.

²⁴Che biejn diajg stzuu rexpejnpac Jesús, bidxé'chreni loj guiro'p rexi'n nane'ga.

²⁵Dxejc gurejdx Jesús reni, räjpnii:

—La'tu najntu xho rujn regubier ni rnibee lo rebenzijt, rnibeereni rebejngä si'c xlamreni. Luxh reni najc rebeno lojreni runnäjreni rebejngä si'ctis ni rlajzreni. ²⁶Et si'cni gunditu la'tu loj rebejn. Chutis rlajz gac bejro lojtu, nanab gunni dzuun gac-näjni guiraliitü si'c te mos. ²⁷Luxh chutis tejitu ni rlajz guiliä'p xpala'nni, nanab gacni si'c xmos lo guiraliitü. ²⁸Sigajcza biääd Xi'n Dios ni gujc Niguii. Dini niniab mos chu lojni, alga laani najc xmos bejn, badeedzani lagajc yälnabajñ xtenni te gudixni baslaani xhidal bejn ni yu' lo doj.

*Jesús rusiajc tio'p lotiä'p
(Mr. 10:46-52; Lc. 18:35-43)*

²⁹Che gojl guiriireni guedx Jericó, xhidalduxh bejn sanajlni. ³⁰Dxejcti sobga' tio'p bejn ni di fii cuä' nez yuj. Che biejn diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

³¹ Gudilnäj rebejnreni, te gusäureni ro'reni. Luxh laareni dipru guredxa'reni:

—¡Dad, Xi'n toDavid, balazlajz nuurnu!

³² Dxejc guzudxi Jesús, gurejdixni reni di fii, räjpni lojreni:

—¿Xhini'c rlajztu gunä?

³³ Räjpreni lojni:

—Dad, rlaaznu guixal balojnu te gac fi-inu.

³⁴ Dxejc balazlajz Jesúreni, gudajnni balojreni. Sas biacgajc balojreni, gujc bahuiiren, sanajltireni Jesús.

21

Biu'Jesús guedx Jerusalén

(Mr. 11:1-11; Lc. 19:28-40; Jn. 12:12-19)

¹ Cheni Siäddzungajxhreni guedx Jerusalén, bidzijnreni te guedxbáz ni laa Bettagé, cuä'l dajn ni laa Olib. Baxhal Jesús tio'p xpejnpacni, ² räjpni lojreni:

—Colchäj loj guedxbázre ni tre' ne lojtu. Ro'c guidxáltu te burgunaa caduu näjza teburhuin. Colguxhecn, coltanáni loä. ³ Palga yu' chu naa: “¿Xhini'c rujntu?”, colye'tz lojni: “Dad caquiinnini terate”. Suxhalgajcnini.”

⁴ Luxh guiraa dee gujc te guzojb diidx ni gunii dade' nani bacuua xtidx Dios agujc xchero, che räjpni:

⁵ Colye'tz loj reni rbáz guedx Sión, bahuii xreiilu siääd lojlu, nadolajzni bijbni te bürbáz, te bürbáz, xi'n man ni rujn dzuun, ni ruu cargw.

⁶ Dxejcti huij rexpejnpacni, bejnreni si'c gunibee Jesús gunreni. ⁷ Biädnäreni burga näjza bürbáz xi'nni. Gudixhreni xhajbreni detz bürbázga, dxejc gubijb Jesús bürbázga. ⁸ Xhidalduxh bejn' tre' ro'c, luxh yu' reni gudixh xhajbreni lo nez yuj, peta sgai-ireni batiu' balajg te gudixhreni rebalajg lo nez yuj cadro ted Jesús. ⁹ Rebejn ni nijd, näjza reni siääd dejtzni gusloj cabedxa'reni, räjpreni:

—¡Xchej guibajn Xi'n toDavid! ¡Chicbaa ni siääd xcuent Gueb Dios! Rliä'pnu xpala'n Guejblu Dios.

¹⁰ Cheni biu' Jesús neñ guedx Jerusalén, guiraa reben guejdxga gusloj camojm, yu'reni canabdiidxreni loj sa'reni:

—¿Chucha najc bejnre?

¹¹ Yu'zareni räjp:

—Dee najc Jesús, niguui ni rusule' xtidx Dios. Guedx Nazare't xten Galilee siäädni.

Basia Jesús guidoro

(Mr. 11:15-19; Lc. 19:45-48; Jn. 2:13-22)

¹² Dxejc biu' Jesús neñ guidoro xten Dios, guläani guiraa rebejn ni caguto' näjza rebejn ni casii. Barexhätni remex xten reni ruchaa meal xten rebejn, näjza reyaghxil xten reni ruto' repalom. ¹³ Dxejc räjpni lojreni:

—Loj reguijtz ni bacuua rebengaloo caj: “Sirilaj xquidoä yu' xten yälrbejdx, yälri-niab loj Dios.” Niluxh la'tu abejntuni xpiliää gubaan.

¹⁴ Lagajc neñ guidooga, gubig loj Jesús gaii bejn ni di fii näjza gaii bejn ni rsiacoj, luxh basiajcnireni. ¹⁵ Cheni bahuii reni rnibee loj rebixhojz, näjza reni najn leii remilagwr ni bejn Jesús, luxh biejnza diajgreni xho cabedxa' rebiixe' caniiren: “Rliä'pnu xpala'nlu Xi'n toteii David”, bidxe'ch rebix-hojzga. ¹⁶ Dxejc räjpreni loj Jesús:

—¿La riejn diajglu xhi caniiren, ä?

Badzu' Jesús diidxre lojreni räjpni:

—O'n, riejn diagäni. ¿La gadtu gol lo reguijtz ni bacuua te dade' ni gunii xtidx Dios? Ro'c caj xcuent redee, cadro caj rediidxre:

Abejnlu gol rebiuux näjza rebäznite' dij ni rliäpsa'cpac xpala'n Dios.

¹⁷ Dxejcti' basaan Jesúreni, biunejzn ro'c sääni guedxe' ni laa Betania, ro'c gudejdni yääl.

Te yag iigw ni gubijdz

(Mr. 11:12-14, 20-26)

¹⁸ Cheni bara yääl, rsilru gubisac Jesús guedx Jerusalén. Lał ni sääni, gusloj calaannni. ¹⁹ Bahuiini loj te yag iigw cuä' nezyuj. Gubigni gajxh ni' yajgga, per xhet ninejxhdí bidxälvi, ganaxhtis balajg caj lo yajgga. Dxejc räjp Jesús lo yajg iigwga:

—¡Nuncru xcaj nicla tej ninejxh lojlu!

Dxejcti gubidzgajc yajgga. ²⁰ Cheni bahuii rexpejnpacni, bidxeloduxhreni, gunabdiidxreni loj Jesús:

—¿Xhi cuent gubidzgajc yajgga?

²¹ Räjp Jesús lojreni:

—Rniliápac lojtu, palga chalilajzpactu, luxh ditu gun tio'p lajztu, xhet ganaxdi sa' cosre guntu, palga gäbtu lo te dajn: “Gubicaj ro'c, gusuj galäii nisdoo”, si'c gacni.

²²Guiraa ni guiniabtu loj Dios, palga chalila-jzpactu, suniidxnini.

Xcälrnibee Jesús
(Mr. 11:27-33; Lc. 20:1-8)

²³Dxejcti biu' Jesús neñ guidoro, dxejc lal ni caguluiini rebejn gubig reni rnibee loj rebixhoj näjza rebengool, gunabdiidxreni lojni:

—¿Xhi yälrnibee rajplu ni'cni rajc rujnlu recosre? ¿Chuni'c baniidx yälrnibeele lo-jlu?

²⁴Badzu' Jesús diidxre lojreni räjpni:

—Sajcza narä gunä te yälgunabdiidx lojtu; palga sajc gadzu'tu diidxga loä, dxejc guiniä lojtu chuni'c baniidx yälrnibee te runä recosre. ²⁵¿Chuni'c gunibee gutiob-nis Juan ni rutiobnis? ¿La Dios o la ben quedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, ¿xhicuenti ditu nililajz xtiidxnii? ²⁶Palga jie'tznu bejn quedxliuj gunibeeni, dxejc sixa't rebejn yejcnu sa'csi guiraareni rilila-zeni Juan najc te Dade' ni gunii xtidz Dios.

²⁷Dxejc räjpreni loj Jesús:

—Dinu guidon.

Dxejc räjp Jesús lojreni:

—Sajcza narä dina guiniä caro siääd yälrnibee te runä guiraa recosre.

Te dade' ni guyu' tio'p xi'nni

²⁸Jesús räjp lojreni:

—Guidon xho guichalootu diidxre. Te dade' guyu' tio'p xi'nni. Räjpni loj xingangalojni: "Xi'nä, nadxej chayujnlu dzuun cadro care' uu." ²⁹Dxejc badzu' xi'nni diidx lojni, räjpni: "Di rlazädi cha'a." Luxh che gojl ste ra't, basiech lajzni sää-tini sayujni xtzun xtadni. ³⁰Dxejc räjp dade'ga lo stee xi'nni: "Xi'nä, nadxej chayujnlu dzuun." Dxejc badzu' xi'nni diidxre, räjpni: "Mbaj, dad, sia'ä." Luxh dini nij. ³¹Loj guiro'preni, ¿chuni'c bejn si'cni rlajz xtadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliäpac lojtu, reni ruquijx guiraloj, näjza regunabdxab ganidreni jiureni lojtu loj xcälrnibee Dios, ³²sa'csi Juan ni rutiobnis biädluiini la'tu xho guibajntu, luxh ditu nililajz xtiidxnii. Biädla reni

ruquijx guiraloj, näjza regunadxab huililaz-duxhreni xtiidxnii. Niluxh la'tu bahuiitu guiraa recosga, ditu nusiechlajz te nililajzu xtiidxnii.

Xcuent remosguijdx
(Mr. 12:1-12; Lc. 20:9-19)

³³¡Colcuadiajg stee cuentre! Guyu' te dade' ni najc baxhuaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te queed te gujcnii te tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejñ ni rujn dzuun, sätini te biaj zjtro. ³⁴Che agojl guire' cose'ch baxhal baxhuaanga gaii xmosni loj xyujni te chaxiirenii cose'ch ni riäj xca' baxhuaanga. ³⁵Dxejc reni biannäj yujga sigajcza bennäjreni remosga.

³⁶Dxejcti bejn baxhuaanga xhigab: "Maazru huen guxhalä xi'nä; sucuadij-grureni xtiidxnii." ³⁷Cheni bahuiirenii lo xi'n baxhuaan xten yujga, bejnreri xhigab: "Deeni jiannäj yujre; do'o guigu'tnuni te jiannäänü yujre." ³⁸Dxejcti gunaazrenini, guläärenini te laad, dxejc bagu'trenini.

³⁹Dxejc gunabdiidx Jesús räjpni:

—Che jiääd baxhuaan xten yujga, ¿xhi gunnäjreni rebejn nani biannäj xyujni?

⁴⁰Dxejc räjpreni loj Jesús:

—Dini gulazlajz rebenguijdxga, sugu'tnireni, sudedlaani xyujni loj ste'ca bejn nani gudeed cose'ch ni riäj xca'ni che gal guire' cose'chga.

⁴¹Dxejcti räjp Jesús lojreni:

—¿La gajdtu gol lo reguizt nani bacuaa dade' nani gunii xtidz Dios galoo? Redi-didxre caj ro'c: Guij nani gulälaz reni runchee yu', cua' Dios lagajc guijga gudixhnini squiin yu', sajcruni loj guiraa reguij.

Dee bejn Gueb Dios, luxh rdxeloduxhnu dzunrore ni bejnni.

⁴²Ni'cni rnäjä lojtu, sibicaj xcälrnibee Dios lojtu, sidejdni loj rebejn nani gudeed ni riäj xca' xcälrnibee Dios, nalajznu renani chalilajzpac xtiidxnii. ⁴³Luxh xcuent guijga:

nani jiajb lo guijga, silia'ni, per nani guitejb guijga yejcni, li siujyni, gacni däj.

⁴⁵ Che biejn diajg reni rnibee lo rebixhojz näjza refarisee recuent ni canii Jesùs, gucbeereni cagusä'tni lagajc laareni.

⁴⁶ Rlajzreni niniaazrenini, per bidxejbreni rebejn sa'csi salilajz rebejn najc Jesùs bejn ni rnii xtidx Dios.

22

Xcuent yälruchnaa

¹ Guslosac canii Jesùs lojreni con recuent, räjpni:

² —Xcälrnibee Dios najc si'c te ūeii ni bejn te sa' te guchnaa xi'nni. ³ Baxhalni rexmosni te saxireni regolnejdx chääreni sa', niluxh rebejnre di rlajzdireni. ⁴ Dxejc baxhalnacni rexmosni, räjpni: “Colye'tz loj reni abidon, agujc comiid. ¡Abagutä balti gonsa'c, gonguro! Anacchee guira'ti yälrajw. Coltaa.” ⁵ Niluxh reni abidonga di niu xtiidxreni. Tejni sahuii rexyujni, steeni sää lo rexnegosni, ⁶ dxejcti sgaii reni niajc biooz gunaazreni rexmos ūeii, basacsíreni remosga, sas bagu'trenini. ⁷ Che biejn diajg ūeiga, bidxe'chduxhni, baxhalni rexsoldaadni te sagu'treni guiraa rebenguijdxga, te saze'czareni guejdx cadro rbäjzreni. ⁸ Dxejcti räjpni loj rexmosni: “Guiraa dee anacchee, di nungäjl jiäädru reni abidon. ⁹ Colchäj, pues, lo resquiin lo nezyuj, colcuejdx chutis bejn ni guidxaagtistu.” ¹⁰ Birii rexmosni, sääreni lo nezyuj. Dxejc bachagsa'reni guiraatis bejn ni bidxaagreni, reni najc benguijdx sigajc reni najc beñhueen te gudxaj rolizj reiiga.

¹¹ Dxejc biu' ūeii biädhuiini loj rebiooz. Bahuiimi loj te bejn ni sobga' ro'c, luxh xhet xhablanijdini najcwni. ¹² Dxejc räjp ūeii lojni: “Xamigwä, ¿xho bejnlu biu'l lu ree luxh xhet xhablanijdilu najcwlu?” Dxitis sobga' bejnga, xhet rniidini. ¹³ Dxejc räjp ūeii loj rexmosni: “Colguliiib ni'nii näjza naani, colsälni detzyu' cadro nacäjy te ro'c gonduxhni chubejli reläjyni.” ¹⁴ Sa'csi xhidajl najc reni bidon luxh guxii najc reni bibe.

La sajc quiixni impuest

(Mr. 12:13-17; Lc. 20:20-26)

¹⁵ Dxejcti sii refarisee, bia'nreni diidx siguiilreni xho gunijt Jesùs te diidx te guiga'ni. ¹⁶ Ni'c baxhalnreni gaii xpejñreni

näjza gaii bejn ni nadxaag Herodes te räjpreni loj Jesùs:

—Mastr, anajnnu rniliu ganax didxlii, ruluiizalu xtiidxpac Dios, luxh dilu jiu xhi rnii rebejn, sa'csi dilu cue bejn ni sajcrlo stee bejn. ¹⁷ Gunii loonu, pues: ¿La laaca najc quiixnu impuest lo César ni rnibee loonu o et laadi?

¹⁸ Dxejc gucbee Jesùs xhet laadi xhigab cayujnreni neñ lastooreni, dxejc räjpni lojreni:

—¡Benguijdx! ¿Xhicuent rlajztu guquiiltu narä? ¹⁹ Colguluii te meel loä.

Dxejc badeedreni te meel ni laa denario.

²⁰ Che bahuii Jesùs loj meelga, gunabdiidxni lojreni, räjpni:

—¿Chuni'c caj lo meelre?

²¹ Dxejc räjpreni:

—Loj César.

Dxejc räjp Jesùs lojreni:

—Colgudeed lo César ni riäjl xca' César, colgudeedza lo Dios ni riäjl xca' Dios.

²² Che biejn diajgreni rediidxre, bidxeloduxhreni. Dxejc basaanrenini, sää'tireni.

Canabdiidxreni xho gac che guibansac rebejn

(Mr. 12:18-27; Lc. 20:27-40)

²³ Lagajc dxejga bidzujn gaii reni laa saducee, reni di chalilajz sibansac bejn lo rebengut. Gubigreni loj Jesùs, gunabdiidxreni, ²⁴ räjpreni:

—Mastr, si'c naj toMoisés, palga yu' te bejn ni abachnaa, luxh ruti xi'nni che guetni, riäjl guchnaa bejtzni biuudga te chu xi'nreni xcuent bejtzni. ²⁵ Mbaj. Loonu yu' gajdz niguii ni najc bejtz sa'reni. Betzgoolga bachnaa, dxejc gujtni, luxh di xi'nni niu'. Basa'nni chäálni lo bejtzni. ²⁶ Sigajcza gusajc ni ro'p bejtzni; sigajcza gusajc ni riojin bejtzni. Si'c huinuu gujc che basa'lli guigajdz bejtzga. ²⁷ Sas che gujt guiraareni, näjza gunaaga gujt. ²⁸ Che guibansac rebejngá lo rebengut, ¿chu tej lo rebetzga gac chäälpac gunaaga, ni guiraareni bachnaareni gunaaga?

²⁹ Dxejcti badzu' Jesùs diidxre lojreni, räjpni:

—Et laadi rujntu xhigab sa'csi ditu gacbee xtidx Dios niclaza xcuent xcälrnibee Dios. ³⁰ Ni che guibajn rebengut, diru yälruchnaa chu, diruza bejn gudeed rexindxa'preni guchnaa. Dxejc sajcreni

23

si'c rexangl Dios ni yu' xhaguibaa. ³¹ Dxejc xcient yälrbansac loj rebengut, *¿la gajdту gol reguijtz ni bacuaа toMoisés che räjp Dios xcient retoxtadgoloonu:* ³² "Narä nacä Xtios Abram, Xtios Isaac, näjza Xtios Jacob", ä? Dios di gac Xtios bengut, Xtiostis rebejn ni nabajn najcni.

³³ Che biejn diajg rebejn xtidx Jesús, bidx eloduxhreni diidx ni ruluiini.

Diidx ni maazru sajc

(Mr. 12:28-34)

³⁴ Che gucbee refarisee basäu Jesús ro' resaducee, bidojpreni, bachaagreni diidx.

³⁵ Dxejc tejreni nani najn leii, rlajzni guquilni Jesús ni'c gunabdiidxni lojni räjpni:

³⁶ —Mastr, *¿xhi diidx ni gunibee Dios sajcru lojreni caj lo leii?*

³⁷ Räjp Jesús lojreni:

—Nani rnii scree: "Huinälajz Dad Xtioslu guideb lastoolu, guideb xaimlu, näjza guidebgajc xcäriejnlu." ³⁸ Diidxre ni gunibee Dios najc ni sajcru, luxh ganidni siäädni loj rextidx Dios. ³⁹ Ni ro'pga sigajcza najcni: "Huinälajz resa'lú sigajc ni sanälajzlú lagajc luj." ⁴⁰ Guiro'p remandamientre nanab te guzoob bejn guiraa rediidx ni bacuaа toMoisés näjza ni bacuaа redade' nani gunii xtidx Dios.

¿Chu xi'n najc Crist?

(Mr. 12:35-37; Lc. 20:41-44)

⁴¹ Lalni tre' refarisee, gunabdiidx Jesús lojreni, räjpni:

⁴² —*¿Xhi rujntu xhigab xcient Crist?*
¿Chu xi'n najcni?

Räjpreni lojni:

—Laani najc xajg toDavid.

⁴³ Räjp Jesús lojreni:

—*¿Xhicuent räjp David "Xtadä" lojni che basanij Sprit Dyan xten Dios lastooni? Ni'c bacuaа toDavid rediidx:*

⁴⁴ Dad Dios räjp lo Xtadä,

gurej xladbeä lał ni gudzugä guiraa reni rdxe'ch lojlu ladzni'lü.

⁴⁵ Palga lagajc David rnii: "Dad" lojni, *¿xho mood najcni xi'nni?*

⁴⁶ Dxejc rut gujcdi badzu' nicla te diidx lojni, luxh dxejliga rutru gojpdì xhi diidx niniabdiidxrurenlojni.

Rucuaquij Jesús refarisee näjza rebejn nani najn leii

(Mr. 12:38-40; Lc. 11:37-54; 20:45-47)

¹ Dxejc räjp Jesús loj reben xhidaalga näjza loj rexpejnpacni:

² —Rebejn ni najn leii näjza refarisee rajp yälnajn te gusule'reni xleii Moisés. ³ Ni'cni colguzoob guiraa rextidxreni, na'c guntu sa'recos ni rujnreni, sa'csi laareni rniirenii xhini'c guntu, dxejcti lagajc laareni direni gun ni rnibeereni guntu. ⁴ Rnibeereni gun rebejn cos naganduxh ni najc si'c te cargw naduxh ni di gac guu bejn, per laareni nicla con te biciueñaareni direni gusinibni. ⁵ Guiraa recos ni rujnreni, rujnreni te fiitis rebejn. Rchaglajzreni rcaj lo cuajsreni näjza roxhajgwreni recaje' cadro yu' tla' guijtz ni caj xtidx Dios lojni. Rustioolzareni xi' xhajbreni. ⁶ Rlajzreni ganidreni tedreni lo mex che gal te lanjj; rlajzreni cuereni lo rebancw ni suga' delant nen reguidobáz. ⁷ Sigajcza rlajzreni guchagro' bejn naareni nez lo guii, guiniiza rebejn "Mastr" lojreni.

⁸ Na'c gusaantu guinii rebejn "Mastr" lojtu, sa'csi tejtisni yu' ni najc Mastr, laani najc Crist. Peta la'tu guirauu najctu tejsi sa'tu. ⁹ Na'c guiniitu "Xtadä" loj te ben quedxliuj sa'csi yu' tejtis ni najc Xtadü, ni'c najc Dios ni yu' xhaguibaa. ¹⁰ Na'cza gusaantu guinireni lojtu "Mastr" sa'csi yu' tejtis Mastr, ni'c najc Crist. ¹¹ Ni yu' si'c mos lojtu ni'c najc benroru loj resa'ni. ¹² Sa'csi chutis ni rchaloni najcni benro lo sa'ni, ni'c sustuiyä lojni, chutis ni najc nadolajz loj Dios, ni'c sunäni bejro lo sa'ni.

¹³ ¹⁴ ¹⁵ Proobzatu remastr xten leii näjzatu refarisee, najctu benguijdx! Sa'csi rudzujntu jiu' rebejn loj xcälrnibee Dios. Lagajc la'tu ditu jiu' luxh dizatu gusaan jiu' rebejn ni rlajz jiu'.

¹⁴ ¹⁵ Proobzatu remastr xten leii näjzatu refarisee, najctu benguijdx! Sa'csi rudzujntu rolijz renanbiuud lałsi cabedx canabduxhtu lo Dios, naatu gusgueetu bejn si'c. Sa'csi rujntu scree, siabduxh fis xten Dios yejctu.

¹⁵ Proobzatu remastr xten leii näjzatu refarisee, najctu benguijdx! Zijt rijtu lo renezyuj näjza lo nisdoo te guntu gaan guchaa mase tejtis bejn xmoodni te ganñi

Dios si'c rajntuni. Luxh che ahuililajz be-jnga xtiidxtu, rujntuni tio'p huält maaazru te xi'n gabijl loj ni najctu.

¹⁶ **¶**Proobzatu, najctu si'c lotiä'p, rlajztu guluiitu nezyuj! La'tu ni rnii palga te bejn guiniliipac xtiidxni guzá'tni guidoro, xhet sajcdi xtiidxni. Palga guiniliipacni guzá'tni oor ni yu' nen guidoo, dxejc sii rniliimi dxejc nungäjl guzoobni xtiidxni. ¹⁷ **¶**Ben nayääl, ben lotiä'p! *¿Xhini'c sajcru?* *¿La oor la guidoro ni rundxan oorga?* ¹⁸ Rniizatu: "Palga te bejn guiniliipacni guzá'tni lo bacuug ni yu' nen guidoro, di xcientdi xtiidxni. Luxh palga yu' chu guiniliipac guzá'tni gojn ni dzuib lo bacuug, dxejc sii rniliipacni dxejc nungäjl gusoobni xtiidxni." ¹⁹ **¶**Ben nayääl, ben lotiä'p! *¿Xhini'c sajcru?* *¿La gojn o la bacuug nani rundxan gojngä, ä?* ²⁰ Nani ruzä'l lo bacuug che rniliipacni, et ganaxdi lo bacuug ruzä'tni, näjza guiraa ni tre' lo bacuug ruzä'tni. ²¹ Ni ruzä't guidoro che rniliipacni, et ganaxdi guidoro ruzä'tni, näjza Dios ni rbäjzza nen guidoro ruzä'tni. ²² Sigajcza ni ruzä't guibaa che rniliipacni caguzá'tzani yagxhilro xten Dios näjza lagajc Dios ni sobga' ro'c.

²³ **¶**Proobzatu remastr xten leii näjzatu refarisee, najctu benguijdx! Bedzxtiil, anis näjza comin ni rajptu, rudeddu lo Dios tej tantga yejc cade te tzuu, niluxh ditu jiu ni sajcru lo xtidx Dios, cadro caj xcient yäl-abanya, yäl'rulazlajz, näjza yälrlilajz. Deeza ni riäjlpac guntu lal ni cayujnzatu steega. ²⁴ **¶**La'tu, lotiä'p ni rlajz gului nezyuj! Riutu rediidx ni guxii sajc, niluxh rediidx ni sacerdudx ditu jiumi, najctu si'c bejn ni rbää te rex lo xpla'tni dxejcru räjmni te cameei.

²⁵ **¶**Proobzatu remastr xten leii näjzatu refarisee, najctu benguijdx! Rusiatu detz bas näjza pla't luxh neqni ajc-dxiuudx. Sigajcza la'tu riduxhtu recostumbr, luxh lastootu guidxa yälgubaan näjza yäldixe'chlajz. ²⁶ Farisee ni najc lotiä'p: gudibxgaa nen bas näjza nen pla't, dxejc näj dejtzni sajc naya.

²⁷ **¶**Proobzatu remastr xten leii näjzatu refarisee, najctu benguijdx!, sa'csí najctu si'c rebaa ni nacchesa'; nolbäjreni, saru rluiini, luxh nenreni guidxa dzujt xte bengut näjza bäluydx. ²⁸ Sigajcza najctu la'tu. Saru rujn lojtu, rchalo rebejn najctu

bensa'c, niluxh lastootu guidxa yälrusguee näjza yälguyalajz.

²⁹ **¶**Proobzatu remastr xten leii näjza refarisee, najctu benguijdx! Runcheetu xpaa redade' ni gunii xtidx Dios galoo, rusucheezatu ro' xpaa rebejn ni gujc bensa'c, ³⁰ dxejc rniit: "Paru nibajnnu nen redxej ni gubajn retoxtadgoloonu dinu niacnäj reni bagu't redade' ni gunii xtidx Dios." ³¹ Lagajc con rediidxre rcäjptu najctu rexajg renani bagu't redade' nani gunii xtidx Dios. ³² **¶**Colguscüäätz guntu sa' recos ni guläxtiej retoxtadgolootu!

³³ **¶**La'tu ni najc si'c bäl, la'tu ni najc si'c te bitiäätz guidxa bänialajz! *¿Xho guntu te na'c chäätu gabijl par tejpas?* ³⁴ Ni'cni, gux-halä rexpenä ni gunii xtidxä, näjza ben-najn, näjza mastr. Luxh yu'reni sugu'ttu sucuatureni lo crujz; yu'zareni siguijntu nen reguidobäz, sirinajltureni guejdx por guejdx. ³⁵ Si'cza yejctu jiajb xtejin guiraa rebennadolajz ni bagu't bejn xchejli Abel ni gujc nadolajz, xchejliiza Zacarías, xi'n Berequías, ni bagu'ttu nen guidoro gajxh lo bacuug. ³⁶ Rniliäpac lojtu, dojl xten guiraa recosga siäjb yejc rebejn ni tre' lo guedxliuj näj.

*Jesús biin xcient guedx Jerusalén
(Lc. 13:34-35)*

³⁷ Räjpza Jesús:

—¡Jerusalén, Jerusalén! Xpejñlu rugu't redade' ni rnii xtidx Dios, rucuaazareni guij yejc rebejn ni ruxhal Dios te gusule'reni xtiidxni lojtu. **¶**Balti huält rlazä nutie'ä la'tu si'cni rutie' guidco'c rexquidbäznu nen xhigani, per ditu nicäjb! ³⁸ Colhuii xho jianxteb xquidootu cuälazrenini. ³⁹ Rnixgaä lojtu, näj dirutu fii loä, dxejli che guiniit: "Benle' Dios nani siääd xcientni."

24

*Jesús räjp sibjl guidoro
(Mr. 13:1-2; Lc. 21:5-6)*

¹ Birii Jesús nen guidoro te asiini, dxejc gubig rexpejñpacni lojni, gusloj cagului-ireni reyuduxhga lojni. ² Dxejc räjp Jesús lojreni:

—¿La ruhuitu guiraa reyu're? Rniliäpac nicla tej guij di jia'n yejc sa'ní ree; guiragajc reyu're sibjl.

Cos ni guluiloj gac fis

(Mr. 13:3-23; Lc. 21:7-24; 17:22-24)

³Dxejcti huijreni yejc te dajn ni laa Oliib. Che gurej Jesús ro'c, biääd rexpejnpacni lojni te xhiga'tz gunabdiidxreni lojni:

—Rlaaznu guiniilu loonu guc gac guiraa recosre. ⁴Xhi seen guluiloj ameer jiäädlu näjza che ameer nitloj guedxliuj?

⁵Dxejc rájp Jesús lojreni:

—¡Colnatiro te rut gusgueedi la'tu!

⁵Sa'csi su' xhidajl reni jiääd, naareni: "Narä nacä Crist", luxh susgueereni xhidajl bejn. ⁶Siejn diajgtu xcuent cadro cayajc guer, näjza xcuent cadro rlajz chu guer, na'c guidxejbtu sa'csi si'c nungäj gac, niluxh gajd galdi nitloj guedxliuj. ⁷Sa'csi siäjs te nación sidilhäjni stee nación; te yälrnibee sujn guer con stee yälrnibee, luxh su' gubijn, su' yälgujdx, su'za xuduxh xhidajl lajt. ⁸Luxh guiraa redee cuäxtiejtis retrabajwdxuh ni churu chu.

⁹Dxejc guteedreni la'tu ladznaa reben-dojl te gusacs'reni la'tu, te gugu'tzareni la'tu, luxh guiraa rebejn sidxe'ch lojtu sa'csi sanälajztu narä. ¹⁰Nen redxejga, xhidajlreni sibälaz xcärlilajzreni, sidxe'ch lo sa'reni, suto' sa'reni lo sa'reni. ¹¹Dxejc siricaj xhidajl bejn ni rusguee, gäbreni xcuent Dios rniireni, luxh susgueereni xhidajl bejn. ¹²Sa'csi lacti suduxh yällat-siaj lo guedxliuj, diru bejn chanälajz sa'ni.

¹³Dxejcti bejn ni chasanäj xnezyujtis Dios, ni'c sun gaan xca'ni yälhabajl par tej-pas. ¹⁴Luxh sisule' xtidx Dios guideb lo guedxliuj te gacbee guiraa reben guedxliuj xtiidxn; dxejcru jiääd fis xten Dios.

¹⁵'Cheni fiitu asobga' te benguidxduxh nen yu' ni najc dxan nen guidoro, si'cni gunixgaa toDaniel ni gunii xtidx Dios gacni, bejn ni gol dee sugacbeeni nani rolni, ¹⁶dxejc renani rbäjz lo guedx Judea, sug-uxunreni gucatzlojreni nen dajn. ¹⁷Bejn ni niä'p yejc xyu'ni dxejga di galdi jiäjtni te chaläani xhixtreni nen xyu'ni; ¹⁸bejn nani cayujn duzuu lo niaa, na'c guibi'ni niclaza chaxhiini xhajbni. ¹⁹¡Proobza re-gunaa ni nuxi'n, näjza reni cagusiä' báz neñ redxejga! ²⁰Colnabduxh loj Dios xhet neñdi redxej ni cayacnalduxhdi nanab guxunditu, niclaza dxej che rusilajz bejn.

²¹Sa'csi su' trabajwdxuh nen redxejga, sa' ni gajd bejn fii dxejli ni guzobloj guedxliuj,

luxh che tedni, diru guibi' chuni. ²²Luxh palga di Dios gutiu' yejc redxejga, nicla te bejn di laa. Luxh sutiu' Dios yejc redxejga sa'csi rinälajzni reni agulen.

²³'Nen redxejga palga yu' chu naa lojtu: "Colhuii, aree Crist", o "Colhuii ani arec", na'c chalilajztuni. ²⁴Siääd xhidajl niguui ni rusguee, gäbreni najcreni crist; sidzunja rebejn ni rusguee ni gäb xtiidxpac Dios rusule'reni; luxh sujnreni remilagwr sujnzenareni senro, parsi gusgueereni, sus-gueduxhreni rebejn, niluxh rlajzreni gus-gueezreni rebejn ni agule Dios, ni rililajz xtiidxn. ²⁵Agunixaä lojtu xhini'c gac. ²⁶Ni'cni palga naareni lojtu: "Bahuui, a crist yu' nez lo reyubijdz", na'c chäätu; o palga naareni: "A crist suga' nen yu're", na'c chalilajztureni. ²⁷Sa'csi si'cni guideb xhaguibaa rieq che rdinya' ladjiaa näjza ladjiäatl, si'cza suhuiit loä, Xi'n Dios ni gujc Niguii, cheni jiälsacä lo guedxliuj. ²⁸Ni najntu cadro naga' te mangut, ro'c re' regolbetz.

*Cheni jiädsac Xi'n Dios ni gujc Niguii
(Mr. 13:24-37; Lc. 21:25-33; 17:26-30, 34-36)*

²⁹Räjpzani:

—Cuantsi ted guiraa retrabajwdxh, sicäj lo gubijdx, diruza bäii gusanij, sitejbza rebajl ni yu' xhaguibaa, sinibduxhza guideb xhaguibaa. ³⁰Dxejcti suhuiireni xhaguibaa seen xten Xi'n Dios ni gujc Niguii, luxh guiraa rebejn ni rbäjz nen guiraa regueidx lo guedxliujre, sonduxhreni suhuiireni siääd Xi'n Niguii lo reza xhaguibaali. Siäädni con yälrnibee näjza yälrdimbichaduxh. ³¹Dxejc suxhalni rexanglni con te trompet ni guscuedxa'reni dipduxh te guire' guiraa rebejn ni agulen lo guidajp lajd squiin guedxliuj, guideb lo guedxliuj näjza xhaguibaa.

³²'¡Colguisieed ni ruluii yajg iigw! Che naren renaani che cabäani be'n, asiääd bai curex, ³³sigajcza cheni fiitu cayajc guiraa recosre, sacbeetu asiädgajxh fis, rolä'lì abidzujnni. ³⁴Rniliápac lojtu, guiraa redee sajc laj ni nabajl gaii rebejn ni suga' ree naj. ³⁵Guibaa näjza guedxliuj sinitloj, niluxh xtidxä di nitloj.

³⁶'Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najn.

³⁷ 'Sigajcni gujc neñ redxej che gubajn toNoé, si'cza gac che jiälä Xi'n Dios ni gujc Niguii. ³⁸ Neñ redxe galoo, cheni gjad nisguiduxhga jiajb, rebejn ni nabajñ dxejc cayajwreni, cayä'reni, caguchñaareni, cagudeedza bejn xindxa'preni guchñaas, dxejli cheni biu' Noé neñ barcwro. ³⁹ DIRENI ni-acbee xtiidxni; cheni biäädli nisguiduxh ni sanä guiraareni dxejcru gucbeereni. Sigajcza gacni che jiälsäcä narä Xi'n Dios ni gujc Niguii. ⁴⁰ Neñ redxejga palga cayujn tio'p bejn dzuuñ lo niaa tejni guibee, steeni sia'n. ⁴¹ Palga cayo't tio'p gunaa xobniil, tejni guibee, steeni sia'n.

⁴² Ni'cni colsusin, sa'csi ditu gan xhi dxej jiääd Dad xtentu. ⁴³ Colganchee, paru ni-acbee baxhuaan xten yu' cor yääl niääd gubaan ni siädlan rolijzni, nisisusin dxejc, dini nusaan niu'ni rolijzni te cuanni. ⁴⁴ Ni'cni colsusinza la'tu, sa'csi siääd Xi'n Dios ni gujc Niguii lagajc or ni ditu gun xhigab jiäädni.

Xcuent te moss'a'c näjza te mosgujidx
(Lc. 12:41-48)

⁴⁵ ¿Chuni'c najc moss'a'c ni ruzoob diidx, ni basannäj xlamni rebejn ni yu' rolijzni te gudeedni xhi gaureni ä? ⁴⁶ Chicbaa mos ni saru cayujn xtzuunni che guidzujn xlamni. ⁴⁷ Rniliäpac lojtu, lamga susa'nni sa' mosga te fiini guira xhixtenni. ⁴⁸ Dxejc palga mosga di gusoob xtidx xlamni, gunni xhigab: "Sacladuxh guibi' xlamä", ⁴⁹ dxejc guisloj cagusacsíni resamosni, guislojni gaunäjni, yänäjni rebengu. ⁵⁰ Dxejc sidzujn xlamni dxej che dini gun xhigab jiäädni, luxh or ni dini gan guidzujnni. ⁵¹ Dxejc siguinduxhni mosgujdxga, surilaagwnini te guidxagsa'ni sabenguijdxni, dxejc son-duxhni, chubejli reläjyni.

25

Xcuent tzuu gunaa

Räjpxa Jesús:

—Pues xcälrnibee Dios najc si'c tzuu gunadxa'p nani cua' xcandilse'treni te hui-jreni te sa'. ² Gaii regunaaga nasin, sgairenii nayaäl. ³ Reni nayaälga sanäreni xcandil-reni, niluxh direni nica' sijl se't. ⁴ Niluxh reni nasinga sanäreni sijl se't te guze'creni nen xcandilreni. ⁵ Sa'csi bi'nga di nidzung-gaj, gunaaaz bacal regunadxa'pga, gudiejs-treni. ⁶ Dxejc si'cti garol yääl, beijn te xse'

ni räjp: "Bi'n asiääd, colchäj, colchachaglo-jni." ⁷ Guiraa regunaare huistieguxunreni, dxejc bensa'creni xcandilreni, te cuagui-jreni. ⁸ Dxejc guigaii regunayääl räjpreni loj reni nasin: "Colgunidxlaa te bo'c se't gusanijnu xcandilnu, sa'csi arlajzni jiuuni."

⁹ Dxejcti regunanasin räjp lojreni: "Digac-dini, dxejc dini gal nicla par nuurnu nicla par la'tu. Colchäj cadro ruto'reni se't colchazii xse'ttu." ¹⁰ Lalmi sasii guigaii regunaa-nayälgä se't, bidzujn bi'n. Regunaa-sin ni cabätz bi'n biunäjrenini lo sa', biäutu ro lä'. ¹¹ Cheni bidzujn regunayanälgä, räjpreni: "Dad, Dad, baxhal ro lä'!" ¹² Dxejc räjpni lojreni: "Rniliäpac lojtu, dina gumbeätu."

¹³ Dxejc Jesús räjp lojreni:

—Colsusinza, sa'csi ditu gan nicla xhi dxej nicla xhi or siääd Xi'n Dios ni gujc Niguii.

Xcuent lam ni badeed meel

¹⁴ 'Xcälrnibee Dios xhaguibaa najc si'c te bejn ni agoj guirii chääni zift te bija. Gurejdxni rexmosni, badeedni meel lojreni.

¹⁵ Lo tejni badeedni si'cti gaii mil meel, lo steeni badeedni si'cti tio'p mil, dxejc steeni cua' te mil. Loj tegani badeedni si'cti ni rujnni xhigab sajc gunnäjreni dzuuñ, dxejcti biriini xpiajni. ¹⁶ Ni cua' gaii mil meel bejn te dzunro, bejnni gaan sgaii mil meel. ¹⁷ Sigajcza ni cua' tio'p mil meel, bejnni gaan stio'p mil. ¹⁸ Dxejcti ni cua' te mil meel, huicua'tzni xmeel xlamni neñ te queed ni gudäanni lo yuj.

¹⁹ 'Gudejdti balti bäii, dxejc gubi' xlam remosga, bejnni cuent loj guiraareni. ²⁰ Che bidzujn ni cua' gaii mil meel, bidzuñnäjni sgaii mil meel ni bejnni gaan, räjpni loj xlamni: "Dad, baniidx guejblu gaii mil loä. Aree sgaii mil meel ni benä gaan."

²¹ Räjp xlamni lojni dxejc: "Hueenca, mos hueen najclu, rusoobzalu xtidxä. Sa'csi gujclu bensa'c con te cos báz, naj sunidzxä guinibeelu xhiroobru. Biu' loä, bibalaznäj narä." ²² Che bidzujn ni cua' tio'p mil meelga, räjpni loj xlamni: "Baniidx guejblu tio'p mil meel loä, aree stio'p mil meel ni benä gaan." ²³ Räjp xlamni lojni: "Mbaj. Mos hueen najclu rusoobzalu diidx. Sa'csi gujclu bensa'c con te cosbáz, naj sunidzxä guinibeelu xhiroobru. Biu' loä, bibalaznäj narä." ²⁴ Che bidzujn mos ni cua' te mil meel, räjpni lo xlamni: "Dad, ananä najclu

te bejn ni di gulazlajz; rca'lu cose'ch cadro dilu nibe'c binij, rutojpzalu cadro dilu nutie'ch binij.²⁵ Ni'cni bidxebä, huicua'tzä xmeellu neñ yuj. Niluxh axh aree xmeellu.”²⁶ Dxejc räjp xlamni lojni: “jMos guijdx, mos ploj! Najnlu rca'ä cose'ch cadro dina nibe'cä binij, rutopä cadro dina nutie'chä binij.²⁷ Riäjäl nisa'nlu xmelä neñ te bancw te che nibi'ä nicasacä xmelä con xi'nni ni niujni gaan.”²⁸ Dxejc räjpni loj reni suga' ro'c: “Colgudzucaj te mil meel ni ca'ni colgudeedni loj ni rajp tzuu mil meel.²⁹ Sa'csi loj ni rajp sudedäru, niluxh ni xhet rajpdi sudzucaä tудxen' nani rajpni.”³⁰ Dxejc räjpni: “Colca' mosre ni xhet sajcdi, colguzälni lo yälhäcajy, cadro chu yälronduxh, näjza yälrajw reläjy bejn.”

Yälgüxhtis xten reguejdx

³¹ 'Che jiädsac Xi'n Dios ni gujc Niguii con yälrdimbicha' xtensi, siädnäni rexangl Dios. Dxejc sibejni lo troj ni rdimbicha' xtensi te guinibeeni.³² Dxejc sidojp nez lojni guiraa reben guedxliuj. Dxejc sibenli lojreni, silia'ni sa'reni si'c rujn te baxtoor cheni rbeni rexil loj redxib, te rlia'reni loj sa'reni.³³ Suzujni rexili xladbeeni dx-ejc redxib xladbäjgwni.³⁴ Dxejc säjb reii loj reni suga' xladbeeni: “Coltaa, la'tu ni benle' Xtadä. Coljiu' lo yälrnibee ni gucheet cheni guzoblojli guedxliuj.³⁵ Sa'csi che calanä la'tu baniidx xhi gudauä, che cayolä, la'tu baniidx xhi gu'ä. Che cuanzaä si'c te benzijt, la'tu baniidxlaatu cadro bia'nä.³⁶ Che xheti xhabä, la'tu baniidxni, che gucxhuä, la'tu biädhuiitu narä, che guyu'ä neñ latzguiib, biädhuiitu narä.”³⁷ Dxejc sinii reni suga' xladbeeni, säjbreni: “Dad, žguc bahuiiu gulaanlu, baniidxnu xhi gudajwlu? ŽGuc bahuiiu cayoillu, baniidxnu xhi gu'lü?³⁸ ŽGuc bahuiiu najclu si'c te benzijt, baniidxnu cadro bianlaalu, o biäädix xhajblu, baniidxnu xhi gojtblu?³⁹ O žguc bahuiiu cayacxhuulu, o yu'lü neñ latzguiib, biophuiiu lojlu?”⁴⁰ Dxejc reiiga säjb lojreni: “Rniliápac lojtu, xhitis xhi bejntu loj te rexpenä ni rnii xtidä mase proobreni, lagajc loä bejntu recosga.”

⁴¹ 'Dxejc säjpzanli loj reni suga' labäjgwni: “Colguibicaj loä, benguijdx, colchäj lo balduxh ni cayejc par tejpas ni cayejc

par bendxbab ni rnibee näjza rexpendx-abni.⁴² Sa'csi gulänä, luxh ditu nuniidx xhi niauä; biolä, per ditu nuniidx xhi niä'ä;⁴³ cuanzaä si'c te benzijt, luxh ditu nuniidxlaa cadro nia'nä, biädxza xhabä, niluxh ditu nuniidx xhi niacwä; gucxhuä, guyu'äza neñ latzguiib, niluxh ditu niädhuhui loä.”⁴⁴ Dxejc laareni säjbreni: “Dad, žguc bihuiiu calaanlu, o cayoillu, o canzajlu si'c te benzijt, o cayäädix xhajblu, o cayacxhuulu, o yu'lü neñ latzguiib, luxh dinu niacnäjlu?”⁴⁵ Dxejc säjb reiiga lojreni: “Rniliápac lojtu, loj xhitis ni ditu niacnäj rebejn ni rililajz xtidä, mase proobreni naräni ditu niacnäj.”⁴⁶ Dxejcti sij rebejnre lo yälrusacsí par tejpas, per rebejn ni nadolajz, ni agule Dios, sijreni lo xcälnabajn Dios par tejpas.

26

*Bejnreni xhigab xho guiniaazreni Jesús
(Mr. 14:1-2; Lc. 22:1-2; Jn. 11:45-53)*

¹ Che gulujx gunii Jesús rediidxre, räjpni loj rexpejnpacni:

² —Anajntu stio'p dxejtis cayäädix gac lanij ni laa pascw. Luxh suteedreni narä, Xi'n Niguii ladznaa reni gucuua narä lo cruz.

³ Dxejc bidojp rebejn ni rnibee rebixhojz, näjza remastr xten leii, näjza rebengool lo rexpejñ Israel. Lo xle' Caifás, ni rnibee loj rebixhojz, bidojpreni. ⁴ Ro'c bachaagreni diidx xho guiniaazreni Jesús con yälrusguee, te ju'trenini. ⁵ Luxh räjpreni lo sa'reni:

—Na'c jiennuni neñ redxe lanij, te di gun rebejn bieiduxh.

*Te gunaa ni biädnä perfum
(Mr. 14:3-9; Jn. 12:1-8)*

⁶ Che yu' Jesús guedx Betania, rolizj Simón te bejn ni basiajcní che ral tiejxhni, ⁷ ro'c gubig te gunaa lojni, ca'ní te vaşgij ni laa onix, guidxani te perfum ni sajc melro. Che sobga' Jesús lo mex, bachajni perfum yejc Jesús. ⁸ Che bahuii rexpejnpacni xhi cayujnni, bidxe'chreni, gusloj cayäjpreni:

—Xhicuent casälxlia'ni perfumga?

⁹ Perfumre niajc nido'ní, nirii xhidajl meel lojni te niacnäjni rebenproob.

¹⁰ Biejn diajg Jesús xhi canireni, dxejc räjpni lojreni:

—¿Xhicuent cadxe'chnäjtu gunaare? Ni te coshueen najc dee nani bejnni loä. ¹¹ Ni guirasi dxej su' rebejn ni xhet rajpdi lojtu, peta narä guxii dxej su'ä lojtu. ¹² Nani bejn gunaare che bachajni perfumre guideb lagaa tiekhä, najcni par guzucheeni narä te guiga'tzä. ¹³ Rniliápac lojtu, cadrotis gusule'reni xtidxä lo guideb guedxliuj, su'jreni diidx xcient ni bennäj gunaare narä, te guinaj lajzreni gunaare.

*Judas bato' Jesús
(Mr. 14:10-11; Lc. 22:3-6)*

¹⁴ Dxejc lo retzubitio'p rexpenpac Jesús birii tej ni laa Judas Iscariote, huininäjni rebejn ni rnibee loj rebixhojz, ¹⁵ räjpni:

—¿Lac guniidxtu loä te gutedä Jesús ladznaatu?

Dxejc badeedreni galbitzuu melpla't lojni. ¹⁶ Dxejcli caguiil Judas xho gutedni Jesús lojreni.

*Lult xchej xten Jesús
(Mr. 14:12-25; Lc. 22:7-23; Jn. 13:21-30; 1Co. 11:23-26)*

¹⁷ Primer dxej lanij, dxej ni rajwreni yätxtiil ni di saguij, gubig rexpejnacni loj Jesús, räjpreni lojni:

—¿Caro rlajzlu chozucheenu te gaulu xchej xten lanipascw?

¹⁸ Dxejc räjpni lojreni:

—Colchäj lo guewdx roliz te dade', colye'tz lojni: “Si'c naj Dad mastr: Asiäddzungajxh xorni, ni'cni rolizlzu gaunäjni rexpejnni xchej lanipascw.”

¹⁹ Bejnti rexpejnacni si'cni gunibee Jesús gac, bazucheereni xchej xten pascw.

²⁰ Che biu' guxhijn, sobga' Jesús lo mex con retzubitio'p xpejnacni. ²¹ Lal ni caya-jwreni räjpni lojreni:

—Rniliá lojtu, yu' tejtu ni guto' narä.

²² Dxejc guc-huinduxh lajzreni, räjpreni lojni:

—Dad, ¿andi naräni?

²³ Dxejcti räjp Jesús lojreni:

—Ni gaunäj narä nen tejis pla't, laa ni'cni guto' narä. ²⁴ Xi'n Dios ni gujc Niguii sajc si'ctis ni caj loj guijtz xten Dios, per gunatiro bejn ni guto'ni. Huenru na'c niajl bejngä.

²⁵ Dxejcti gunii Judas, ni caguto' Jesús, räjpni:

—Mastr, ¿andi naräni?

Jesús räjp lojni:

—O'n, luijni.

²⁶ Lal ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejnacni, räjpni:

—Coltajw; dee najc si'c tiekhä.

²⁷ Dxejc guläsni te vas, badeedni xquixtios lo Dios, dxejcti badeednini loj rexpejnacni, räjpni:

—Guiraatu colyä', ²⁸ sa'csi dee najc si'c xtienä; ni'cni riannää la'tu te didxcoob, luxh rejne sixe'ni xcient xhidajl bejn te guslaanireni nen dojl. ²⁹ Luxh rniä lojtu, diruna yä'ä nis nani rii yejc uub, dxejlini yänäsacatu lo xcälrnibee Dios, Xtadä.

Räjp Jesús sibälaz Pedroni

(Mr. 14:26-31; Lc. 22:31-34; Jn. 13:36-38)

³⁰ Che gulujx bilreni te dij, biriireni, sääreni lo dajn ni laa Olib. ³¹ Dxejc räjp Jesús lojreni:

—Guiragactu sactio'p lajztu xcuentä, susa'ntu narä naguxhijn sa'csi lo reguítz xten Dios caj scree: “Sugu'treni baxtoor dx-ejc sire'ch rexil.” ³² Dxejc cheni guibansacä lo rebengut, ganidä cha'ä región Galilee, dxejcti jiädnejltu narä.

³³ Dxejc räjp Pedr loj Jesús:

—Masque guiraareni cuälazlu, narä dina cuälazälu.

³⁴ Dxejc räjp Jesús lojni:

—Rniliápac lojlu, lagajc guxhijnre, nicla gajd guidgaii cuedxa', luxh luj alagulälazlu narä choñ huält.

³⁵ Räjp Pedr loj Jesús:

—Masque riäjil guetnäälu, dina cuälazälu.

Dxejc sigajcza gunii guiraa rexpejnacni.

Gurejdx-gunab Jesús loj Dios nen Getsemaní

(Mr. 14:32-42; Lc. 22:39-46)

³⁶ Dxejcti bidzujn Jesús näjza rexpejnacni te lajt ni laa Getsemani, räjpni lojreni:

—Colcuésijc ree laj ni cuedx-guiniabä lo Dios.

³⁷ Dxejc sanäni Pedr näjza guiro'p xi'n Zebedeo, luxh gusloj cayachuinduxh lajzni, cayu'zani yärsiaduxh. ³⁸ Dxejc räjpni lojreni:

—Te yälhuinduxh yu' lastoä; astoocan agoj guetä. Coljia'n ree, coltie'ch bacal lojtu.

³⁹ Dxejc guzaj Jesús stla', guzuxhijbni dx-ejc basajb lojni lo yujli, gusloj cabedx-canabni lo Dios:

—Xtadä, palga sajcni, basanlaa tedcaj trabajwduxhre ni tedä, te na'c tedäni. Xhet si'cdi ni rlazä gacni; si'cpacni rlajzlu gac, si'c gacni.

⁴⁰ Dxejcti gubi'ni cadro suga' guichon rex-pejnpacni, che bidzujnni ro'c, nagayejsreni. Räjpnii lo Pedr:

—¿La di niajcdi nutie'cthu bacäl lojtu nicla tebor, ä? ⁴¹ Colguibajn, colnab lo Dios te na'c jiajbtu neñ dojl. Guliipacni, lastootu nadip, niluxh tiejxhtu rdxajg.

⁴² Gubi' Jesús stehuält, gurejdx-gunabni loj Dios, räjpnii:

—Xtadä, palga digacdi tedcaj tedä traba-jwre, sugacni si'ctis ni rlajzlu gacni.

⁴³ Dxejc gubisacni, bidxälni rexpejnpacni, nagayejsreni sa'csi yuduxh bacäl lojreni.

⁴⁴ Basaannireni, dxejc sásacni, gurejdx-gunabni lo Dios ni rioja huált, gunisacni la-gajc rediidx ni guniini galoo. ⁴⁵ Dxejc huijni cadro suga' rexpejnpacni, räjpnii lojreni:

—¡Naj sii, colguejs, colgusilajzl Abidzujn or ni gutedreni Xi'n Dios ni gujc Niguii ladznaa rebendojl. ⁴⁶ ¡Colchastie, colcho', colhuii! Asiääd nani guted narä ladznaa rebendojl.

Gunaazreni Jesús sanärenini pres
(Mr. 14:43-50; Lc. 22:47-53; Jn. 18:2-11)

⁴⁷ Lalni canii Jesús bidzujn Judas, nani najc tej retzubitio'p xpejnpacni. Bidzuñnäjni xhidalduxh bejn ni ca' espaad, ni ca' garo't, najcreni xpejñ reni rnibee rebixhojz, näjza xpejñ rebengool xten rexpejñ Israel. ⁴⁸ Judas, ni bato' Jesús, abadedxgaani te seen lojreni räjpnii:

—Nani guchagro'ä, ni'c najc laani; colguiniazgajcni.

⁴⁹ Dxejc gubigni loj Jesús, räjpnii:

—Xchan, Dad Mastr.

Dxejc bachagro'ni lojni. ⁵⁰ Jesús räjpv lojni:

—Xamigwä, ¿xhi siäadlu?

Dxejcti gubig rebejn lojni, gunaazrenini.

⁵¹ Per tej reni sugaränj Jesús gulääni te spaad, batiu'ni diajg te mos xten rebixhojz ni rnibee. ⁵² Dxejc räjpv Jesús lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad gue treni. ⁵³ ¿La ditu gan sajcza guiniabä lo

Xtadä, luxh laani suxhalgajcni gayonbitzu-bitio'p mil xanglni gacnäj narä? ⁵⁴ Dxejc xho gac soob diidx ni caj lo reguijtz xten Dios ni rnixgaa riäjil gac guiraa recosre lagajc si'cni cayajcni.

⁵⁵ Dxejc räjpv Jesús loj rebejn xhidajlgä:

—¿La siädnätu spaad näjza garo't te guiniaaztu narä astocanu naçä si'c te gubaan? Ni guirasi dxej gureä galäitiit, baluiätu neñ guidoro, luxh ditu niniaaz narä. ⁵⁶ Niluxh guiraa recosre cayajc te soob rediidx ni caj lo reguijtz ni bacuua redade' ni gunii xtidx Dios.

Dxejcti guiraa rexpejnpacni basanxtenebreni Jesús, baxunreni lojni.

Jesús nez loj rebixhojz

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Reni gunaaz Jesús huinänini nez loj Caifás, ni rnibee loj guiraa rebixhojz, bidzujnreni cadro abidojp guiraa rebejn nani rului leii näjza rebengool xten xpejñ Israel.

⁵⁸ Dxejcti zit-zijt biädnajl Pedr rebejngä, bidzujnlireni lole' xten bixhojz ni rnibeega. Ro'c biu'ni, gurenäjni rexquixhajg bixhojza te ro'c bia'nni te fiini xhini'c gac.

⁵⁹ Reni rnibee rebixhojz, näjza rebengool con guiraa reni rajp yälrnibee gusloj caguilreni xhitis te diidx, masque xhet gulidini, te gucuaquijreni Jesús te guinibeereni guetni. ⁶⁰ Niluxh xhet bidxäldireni, luxh gubig xhidajl bejn, guniireni xhidajl didzx-xhii xcuent Jesú. Dxejcti bidzujn tio'p dade' ni gunii didx-xhii, ⁶¹ räjpreni:

—Niguire gunii scree: “Narä sajc gutzulä guidoro xten Dios, sajcza gunch-esacäni nen chon dxej.”

⁶² Dxejc gusulii dade' ni rnibee lo rebixhojz, räjpnii loj Jesús:

—¿Xhicuent xhet rniidilu, ä? ¿Xhini'c canii reniguire cagucuaquijreni luj?

⁶³ Niluxh dxitis suga' Jesús. Dxejcti räjpv dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajn. Gunii don, ¿la luj najc Crist, Xi'n Dios?

⁶⁴ Jesús räjpv lojni:

—Lagajc guejblu naj si'c. Niluxh empac rnäj lojtu, desde najli suhuitu cueä narä Xi'n Dios ni gujc Niguii xladbée Dios ni rnibee, suhuiizatu jiälä lo reza ni tre' xhaguibaa.

⁶⁵ Dxejc batiäjs dade' ni rnibee loj rebix-hojz xhajbni, räjpni:

— ¡Niguiire aguniyajni Dios con xtiidxni! ¿Xhiru testiigw rquiinnu? Abiejn diajgtu didxyaj xtensi. ⁶⁶ ¿Xhi rchalotu?

Dxejc basejcreni diidx:

— ¡Abiga'ni! Riäjl guetni.

⁶⁷ Dxejc batiobxhejnreni lojni, gudijn-renini. Yu'reni gudajp lojni, ⁶⁸ räjpreni lojni:

— Palga najclu Crist, gunii chuni'c gudi-jnlu.

*Di Pedr nicäjp numbeeni Jesús
(Mr. 14:66-72; Lc. 22:56-62; Jn. 18:15-18,
25-27)*

⁶⁹ Lal ni cayajc reni'c, Pedr sobga' lole'. Dxejc gubig te dxape' ni rujn dzuuñ ro'c, räjpni lojni:

— Näjza luj cuansanäjlu Jesús, ni siääd nez Galilee.

⁷⁰ Per di Pedr nicäjp nez loj guiraareni, räjpni:

— Dina ganä xhini'c caniilu loä.

⁷¹ Asii Pedr nez ro' puert, che bidxaagni stee dxape' ni rujn dzuuñ ro'c. Dxape're räjp loj reni suga' ro'c:

— Näjza dade're cuansanäj Jesús ni siääd Nazare't.

⁷² Dxejc basguee Pedr stehuält, räjpni:

— Rniliápac dina gumbeä dade'ga.

⁷³ Che gojl sterate', gubig reni suga' ro'c loj Pedr, räjpreni:

— Guliini; näjza luj najclu te xpejnni; huenliisi riejn diidx ni rniiilu.

⁷⁴ Dxejcti guslojni cagueni, caguzä'tni Dios, räjpni:

— Dipacna gumbeä niguiiga.

Guniitisi si'c, chela guredxa' te guidgaii.

⁷⁵ Dxejcru banalajz Pedr rediidx ni gunii Jesús lojni che räjpni: "Che gjadli guidgaii cuedxa', chon huält alaguniilu dilu gumbee-narä." Dxejc birii Pedr ro'c, gusloj cayon-duxhni.

27

Batedreni Jesús loj Pila't

(Mr. 15:1; Lc. 23:1-2; Jn. 18:28-32)

¹ Che bianij lo guedxliuj, guiraa reni najc rebixhojz ni rnibee näjza rebengool xten rexpejñ Israel bia'nreni diidx xho gunreni ju'treni Jesús. ² Baliibrenini, guläärenini ro'c, huisa'nrenini loj Poncio Pila't, ni najc gubernadoor.

Xho gujt Judas

³ Dxejcti Judas, ni bato' Jesús, che bahui-ini bacuaquijreni Jesús, basiejch lajzni, guchuin lajzni, dxejc huidzu'ni galbitzuu meel pla't loj rebixhojz ni rnibee näjza loj reben-gool. ⁴ Räjpni:

— Banitduxhä lo Dios sa'csi bato'ä te bejn ni xhet bejndi.

Dxejc räjpreni lojni:

— Xhixh gunnu. Ni'c najc xcuentlu; lujti najn.

⁵ Dxejc bacua Judas meelga lo yuj neñ guidoro, biriitini ro'c. Sas huijni, baliibni te duu guejin, gojlni lo te yaig, ro'cti gujtni.

⁶ Rebixhojz ni rnibee batojpreni meelga, räjpreni:

— Di gac di guizälñu meelre neñ caj gojn sa'csi najcni xcuent xtejñ te bejn.

⁷ Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenzijt. ⁸ Ni'cni najli rniireni yujga: "Yurejn". ⁹ Si'c gusojb diidx ni gunii Jeremías, dade' ni gunii xtidx Dios galoo che räjpni: "Cua'reni galbitzuu melpla'tga si'cti basoob rexi'n Israel sajc bejngä. ¹⁰ Con meelga guziirení yuj lo bejn ni runchee guejs, sigacni gunibee xtradnu Dios."

Gusuj Jesús nez loj Pila't

(Mr. 15:2-5; Lc. 23:3-5; Jn. 18:33-38)

¹¹ Bidzunnäjreni Jesús loj Pila't ni najc gubernadoor. Dxejc gunabdiidxni, räjpni lo Jesús:

— ¿La luj najc reii xten rexpejñ Israel, ä?

Räjp Jesús lojni:

— Najcni si'cni najlu.

¹² Lañni cabe'c rebixhojz ni rnibee näjza rebengool rexquej Jesús xhetliidi guniidi Jesús. ¹³ Dxejc räjp Pila't lojni:

— ¿La di diajglu jiejn guiraa rediidx ni caniirení cagucuaquijreni luj, ä?

¹⁴ Per xhetliidi diidxdi basejc Jesús, nicla xcuent teysi diidx ni bacuaquijrenini. Ni'cni bidxeloduxh gubernadoorga.

Gunibeereni guet Jesús

(Mr. 15:6-20; Lc. 23:13-25; Jn. 18:38-19:16)

¹⁵ Nen redxe lanij räjpreni costumbruslaa Pila't tej bejñ ni cue rebejñ loj reni yu' neñ latzguuib. ¹⁶ Nen redxejga guyu' te bejñ ni sääb xtidxní ni laa Barrabás.

¹⁷ Cheni tre' guiraarení ro'c, gunabdiidx Pila't lojreni:

—¿Chuni'c rlajztu guslaá, la suslaá Barrabás o Jesús ni laa Crist?

¹⁸ Sa'csi najn Pila't rdxe'chlajzreni lo Jesús, ni'c bateedrenini lojni.

¹⁹ Lał ni sobga' Pila't lo yajgxhiil cadro ru-jnni yälguxhtis, baxhal chäälni diidx lojni, räjpni:

—Xhet gundilu dade'ga ni xhet be-jndi, sa'csi nuchej nadxuudx gunixcalä xcuentni.

²⁰ Niluxh rebixhojz ni rnibee näjza re-bengool baquillreni rebejn te gunabreni laa Barrabás, näjza te guet Jesús. ²¹Dxejcti gunii gubernadoor stehuált, räjpni lojreni:

—¿Chu tej loj guiro'preni rlajztu guslaá? Dxejc guredxa'reni, räjpreni:

—¡Barrabás!

²² Gunabdiidx Pila't, räjpni:

—¿Xhi gunnäá Jesús ni laaza Crist?

Guiraareni guredxa':

—Bacuaani lo crujz.

²³ Dxejc räjp Pila't lojreni:

—¿Xhi latsiaj bejnni?

Niluxh laareni guredxa'rureni, räjpreni:

—¡Bacuaani lo crujz!

²⁴ Che bahuii Pila't xlia'si caniini, alga gusloj rebejn cayujn te bieiduxh, cua'nii nis, gudiibni naani nez lojreni, räjpni:

—Dina xcaquiä xtiejn bejnjre ni xhet be-jndi. La'tu col'huii xho guntu. Xcienttitu nacni.

²⁵ Dxejc guiraa rebejngä badzu' diidxre, räjpreni:

—Suxcaquijnu xtiejnни, nuurnu näjza rexii'nnu.

²⁶ Dxejc baslaa Pila't Barrabás, dxejc gubi-beeni gudijnreni Jesús dxejc bateednini ladznaa rebejn te gucuaarenini lo crujz.

²⁷ Dxejc huinä resoldaad xten gubernadoor Jesús lo pretoor, yu' cadre rujnreni yälguxhtis, ro'c batojpreni guiraa resa'reni.

²⁸ Dxejc gulääreni xhajbni, bashuajcwrenin te lad xniaa. ²⁹ Dxejc bencheereni te coronguejch, basälrenini yejcni, basälreni te yabixijl naani, xladbeeni, sas bazuhijbreni nez lojni guslogajc caguxhisnäjrenini, räjpreni:

—¡Collä'p xpala'n reii xten rexpejn Israel!

³⁰ Sas batobxhejnreni lojni, cua'reni yabixijlgä te ni'c batäjlreni yejcni. ³¹ Che gulujx baxhiznäjrenini, gulääreni lad xniaa

ni najcwni. Dxejc bashuacwsacrenini lagajc xhajbni, sanätiremini te xcajni lo crujz.

Bacuaareni Jesús lo crujz

(Mr. 15:21-32; Lc. 23:26-43; Jn. 19:17-27)

³² Cheni sariiren, bidxaagreni te bejn ni siäad guedx Cirene, laani Simón, basguuren i dade'ga xcrujz Jesús.

³³ Che bidzujñreni te lajt ni laa Gólgota, nani sáloj: dan Calabeer, ³⁴ ro'c badeedreni bin nu'ch cuanlaa te gu' Jesús. Te bocbäztisni gu'nii, dxejc naaddiruni niä'nini.

³⁵ Cheni abacuaareni Jesús lo crujz, gudzujt resoldaad yejc xhajbni, te si'c gudisreni xhajb Jesús cua'reni, te si'c guzojb diidx xten te dade' ni gunii xtidx Dios. ³⁶ Gurejtireni ro'c, gusloj canäjreni Jesús. ³⁷ Yejc crujzga bacuaareni te guijtz con lettro. Lo guijtzga rcraj xhini'c najc xtojl nani cayejt. Lo guijtzga caj: “Dee najc Jesús reii xten rexpejn Israel.”

³⁸ Näjza tio'p gubaan cuaj lo stio'p crujz con laani. Tejni cuaj lo te crujz xladbee Jesús, steeni cuaj xladbäggwni. ³⁹ Luxh ren-nani sadejd nejzga guniyajreni Jesús, ca-gusniibreni yejcneni, ⁴⁰cayäjpreni lojni:

—Ja'á! Luj ni nutiexhlu guidoo, luxh chontis dxej niunchesacluni; palga gulii najclu Xi'n Dios, biäjt loj crujzga.

⁴¹ Näjza rebixhojz ni rnibee, näj remastr xten leii, baxhiznäjrenini räjpreni loj sa'reni:

⁴² Baslaani xhidajl bejn, xhoxh di gacdi guslaani lagajc laani. Palga najcni reii xten rexpejn Israel, sujiäjtni lo crujz nanaj te chalilaznu xtiidxn. ⁴³ Huinälazn Dios, naj susguslaa Diosni palga sanälazj Diosni; ni najni: “Narä næcä Xi'n Dios.”

⁴⁴ Regubaan ni caj lo recrujz sigajcza guniyajreni Jesús.

Che gujt Jesús

(Mr. 15:33-41; Lc. 23:44-49; Jn. 19:28-30)

⁴⁵ Dxejcti bicäjy guideb guedxliuj läidxej hasta rcachon gudxej. ⁴⁶ Si'cti rcachon gudxej guredxa' Jesús dipduxh, räjpni:

—Elí, Elí, ¿lama sabacataní? —dee sáloj: Xtiozä, Xtiozä, ¡xhicuent gulälazlu nará?

⁴⁷ Yu' reni suga' ro'c, che biejn diajgreni räjpni si'c, räjpreni:

—Cabejdx Dade're Elías.

⁴⁸ Baxungajc tejreni, huica'nii te sponj, bahuajdxnini loj binagr, bacuaanini yejc

te biquii te badzugni binagrga ro' Jesús.
⁴⁹ Dxejc reni tre' ro'c räjp:

—Basaan; guidon la siääd Elías te guslaamini.

⁵⁰ Dxejc guredxaduxh Jesús stehuält, baslaatini xpritni. ⁵¹ Lagajc orga biräsyä' ladro ni zääb neŋ guidoro, gujcní tio'p la' jiaali hasta lo yuj. Gujc te xuro, sas gusuj bej reguiro. ⁵² Dxejc gubicaj reguuj ni niäuu ro' rebaa, luxh gubansac xhidajl xpejñ Dios ni gujt aguc xchej. ⁵³ Dxejcti, che huäjs Jesús lo rebengut, biriireni neŋ baa, baluilojeni lo xhidajl bejñ ni rbäjz guedx Jerusalén.

⁵⁴ Dxejc capitán xten resoldaad näjza resoldaad ni canäj Jesús, che bahuiireni xuduxh näjza guiraa recos ni gujc ro'c, bidxejbreni, räjpreni:

—Gulipacni najc dade're Xi'n Dios.

⁵⁵ Zijtru tre' xhidajl regunaa ni biädnajl Jesús che biriini nez Galilee te bahuiireni. Cadxeljitisreni guiraa ni cayajc ro'c. ⁵⁶ Tej regunaaga najc Marii Magdalén, steeni najc Marii xnan Jacoob näjza José, steeni najc xnan rexí'n Zebedeo.

Huicua'tzreni Jesús

(Mr. 15:42-47; Lc. 23:50-56; Jn. 19:38-42)

⁵⁷ Che gojl gudxej, bidzujñ te beŋrajp ni siääd guedx Arimatea; laani José. Näjza dade'ga najc tej reni birinajl Jesús. ⁵⁸ Huij dade'ga loj Pila't, gunabni tiejxh Jesús. Dxejc gunibee Pila't gudeedrenini lojni. ⁵⁹ Cua'ti José tiejxh Jesús, batejnini neŋ te bariadya, ⁶⁰ huitixhnini nen xpaapacni. Nacob baaga, gojnni bidäänni cuä' te guilaj. Dxejc basäuni ro' baaga con guiro, dxejcti siini. ⁶¹ Sobga'za Marii Magdalén näjza stee Marii nez loj baa, bahuiireni biga'tzni.

Xhi räjp resoldaad ni cuanäj xpaa Jesús

⁶² Che gudejd dxej xten ni gulec-cheereeni lanij, bara yääl bidojp rebixhojz ni rnibee näjza rebejn ni laa refarisee, bidzujñreni loj Pila't, ⁶³ räjpreni lojni:

—Dad, banaj laaznu xhi räjp bejn ni rusgueere. Räjpni: “Che ted chon dxej sibansacni loj rebengut.” ⁶⁴ Ni'c baxhal chu chacanäj ro' baaga dxejli guisa' chon dxej, te di chää rexpejnpacni chaläärenini tiejxhni, dxejc gäbreni loj rebejn: “Agubansacni loj rebengut.” Yälrusgueega sajc cuentroru loj ni gujc ganid.

⁶⁵ Räjp Pila't lojreni:

—La'tu rajptu te cuaa soldaad; colchäj, basäutzu'tz ro' baaga si'ctis ni sajc guntu.

⁶⁶ Dxejcti sääreni, basäutzu'tzreni ro' baaga; con resoldaad bacuaareni te sei lojni te rut faldini. Dxejc basa'nreni resoldaad canäj ro'c.

28

Sibansac Jesús loj rebengut

(Mr. 16:1-8; Lc. 24:1-12; Jn. 20:1-10)

¹ Che gudejd sabd, dxej ni ruzilajz rexpejñ Israel, che gusloj cayänij lo guedxliuj te jiu' stee xmaan, bidzujñ Marii Magdalén näjza stee Mariiga, siädhuiireni lo baa. ² Luxh alaguje te xuro ni basniib lo yuj, sa'csi biääd te angl xten Dios xhaguibaali te badzucajni guij ni niäuu ro' baaga, dxejc gurejni yejc guijga. ³ Rdimbichaduxhni si'c najc che rdinya', luxh xhajbni najc nolbäj si'c najc yejg ni rijab. ⁴ Che bahuii resoldaadni, bichebduxhreni, sädiidxreni, gujcreni si'c bengut. ⁵ Dxejc räjp guixhajg xte Diosga loj regunaa:

—Na'c guidxejbütu. Ananä caguilltu Jesús ni cuaj lo crujz. ⁶ Rutini ree sa'csi agubansacni sigajc ni najni. Coltahuii cadro gojtni. ⁷ Colguxuñ, colchaye'tz loj rexpejñpacni agubansacni loj rebengut. Luxh naj agunijdni lojtu sääni régión xten Galilee. Ro'c suhuiitu lojni. Dee najc diidx ni rniä lojtu.

⁸ Dxejcti rusquenduxh regunaaga, biriireni ro' baaga. Cadxejbreni, cabalazduszareni sanäreni diidx loj rexpejñpac Jesús.

⁹ Chela bidxaagreni Jesús lo nejz, räjpni: “Xchan”, lojreni. Sas gubigreni loj Jesús, bazuxhijbreni, gudäazreni guenni'ni, gojñrenini. ¹⁰ Dxejc räjpni lojreni:

—Na'c guidxejbütu. Colchaná diidx loj rexpenä, chääreni régión Galilee, sa'csi ro'c suhuiireni loä.

Rediidx ni räjp resoldaad

¹¹ Lañni sää regunaaga, bidzujñ gaii soldaad ni huicanäj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga. ¹² Dxejc rebixhojz ni rnibee bachagsa'zareni con rebengool te bia'nreni diidx gudeedreni xhi-roob mee lo resoldaad, ¹³ räjpreni lojreni:

—Scree colye'tz lo rebejn: “Lañ ni nágayesnu, canäjnu ro' baa, biääd rexpejñpac Jesús guläxhiga'tzreni tiejxhni.” ¹⁴ Palga

jiendiajg gubernadoor dee, siohuiinuni te
di yu' xhi gunni la'tu.

¹⁵ Dxejcti cua' resoldaad meel, bejnreni
si'cni räjp rebixhojz. Luxh si'c bire'ch diidx
loj guiraa rexpen̄ Israel. Najli canisijcreni
si'c.

Baxhal Jesús rexpejnpacni

(*Mr. 16:14-18; Lc. 24:36-49; Jn. 20:19-23*)

¹⁶ Dxejcti sää retzubiteeb xpejnpac Jesús
lo región Galilee, lo dajn cadro bia'n Jesús
diidx guidxaagnireni. ¹⁷ Cheni bahuiireni
loj Jesús, bazuxhijbreni, gojñremini, per yu'
reni ractio'p lajzreni. ¹⁸ Dxejc gubig Jesús
lojreni, guninäjnireni, räjpni:

—Arapä guiraa yälrnibee xhaguibaa
näjza lo quedxliuj. ¹⁹ Ni'cni, colchäj, guideb
quedxliuj colchagajn bejn gac xpenä,
colgutiobnisreni, con laj Gueb Dios, näj laj
Xi'n Dios näjza laj Sprit Dxan xten Dios.
²⁰ Colguluiireni gusooobreni guiraa rediidx
ni guinibeä. Luxh lagajc narä suganää la'tu
guiraa redxej, dxejli che nitloj quedxliuj.
Sugacni si'c.

Diidx Xcuent Jesucrist Nani Bacuua San Marcw

Baluui Juan ni rutiobnis

(Mt. 3:1-12; Lc. 3:1-9, 15-17; Jn. 1:19-28)

¹ Scree gusloj diidx xcuent Jesucrist, Xi'n Dioś. ² Si'cni bacuua tolsañas, ni gunii xtidx Dios, che rájp Dios:

Bahuii gan, guxhalä ni chanä xtidxä, ganidni chääni lojlu te guzucheeni xnezyu-jlu.

³ Riejn xse' ni rbedxa' nez loj reyubijdz: "Colyunsa'c xnezyuj Dad, colslíi rexnezyulajzni."

⁴ Biricaj Juan ni rutiobnis nez loj reyubijdzga. Räpgajcni nanabpac gusech-lajzreni, tiobniscgajcreni, te jia xtojlreni.

⁵ Riädcuadiajg xhidajl reni rbäjz Judea, näjza reni rbäjz guedx Jerusalén. Dxejcti cheni ruxhobdojleni lo Dios, rustiobnis Juanreni neñ gueu Jordán.

⁶ Xhajb Juan nacchee con guichlajd cameii, xsindoorni nacchee con guijd, niluxh gudajwni guxha't näjza dzumbäser-guijxh. ⁷ Caguluiimi rebejn, räpgajcni:

—Detzä siääd tej nani sajcrú loä, nani nicla di nungäj surloä, cuäá xcura'chni. ⁸ Narä abatiobnisä la'tu con nis, biädla laani guxhalni Sprit Dxan xten Dios te cuääzni neñ lastootu. Si'c gustiobnis nani jiääd detzä la'tu.

Batiobnis Juan Jesús

(Mt. 3:13-17; Lc. 3:21-22)

⁹ Dxejc, neñ redxejga, birii Jesús guedx Nasare't ni yu' Galilee. Dxejcrú batiobnis Juan Jesús neñ gueu Jordán. ¹⁰ Che birii Jesús neñ nis, bahuii bixal guibaas, siädyäjt Sprit Dxan xten Dios yejcni si'c te palom. ¹¹ Dxejcti guibaali biejn xse' te ni rájp:

—Luj najclu xi'nä ni sanälazä; rbanälaz-duxhålú.

Bateed bendxbab prueb Jesús

(Mt. 4:1-11; Lc. 4:1-13)

¹² Sas baxhal Sprit Dxan xten Dios Jesús lo reyubijdz. ¹³ Dxejc guyu' Jesús ro'c tiuu dxej, guyu'ni cadro yu' reman. Sas gudiil bendxbab nani rnibee, nani laa Satanás, xho niujnni te nusoob Jesús xtiidxni. Dxejcrú biääd reangl xten Dios, biädhuiirenini.

Gusloj Jesús xtzuunni

(Mt. 4:12-17; Lc. 4:14-15)

¹⁴ Basälreni Juan neñ latzguiib. Dxejcti huij Jesús nez Galilee, huiluiini xtidx Dios. ¹⁵ Dxejc rájp Jesús:

—Abidzujn dxej, luxh yälrnibee xten Dios abidzujn gajxh. Colsiech lajztu, colchalilajz xtidx Dios.

Gurejdx Jesús tajp bejn ni rniaaz bäj
(Mt. 4:18-22; Lc. 5:1-11)

¹⁶ Sasajti Jesús nez ro' nis xten Galilee, che bahuiini lo Simón näjza loj Andrés bejtz Simón. Cazälreni xquijxhreni lo nis, sa'csi rniaazreni bäj. ¹⁷ Dxejc rájp Jesús lojreni:

—Cołtanajl narä, te gunä cueedxtu bejn lacuua ni guiniaaztu bäj.

¹⁸ Lagajc dxejc basa'nreni rexquijxhreni, sanätireniini.

¹⁹ Dxejc gusaj Jesús sche'n, sas bahuiini loj Jacoob näj Juan, rexi'n Zebedeo. Cayunsa'creni xquijxhreni neñ xcanurení. ²⁰ Guredxgajcni guiro'preni, dxejcti laareni basa'nreni xtadreni Zebedeo neñ canuu, näjza rexmosni, sanätireni Jesús.

Te bejn nani guyu' bendxbab neñ lastooni
(Lc. 4:31-37)

²¹ Bidzujñtireni guedx Capernaum. Dxejcrú sabd, dxej ni rusilajz rexpen Israel, biu' Jesús neñ guidobáz xten rexpen Israel. Dxejcti baluui Jesús rebejn ni tre' ro'c. ²² Bidxelojni rebejn xtiidxni, sa'csi caguluuinireni si'cpac te ni rnibee, xhet si'cdi remastr xten leiidi. ²³ Neñ xquidobázreni yu' te bejn yu' te bendxbab neñ lastooni. Bendxbabga guredxa', rájpni:

²⁴ —Jesús, ni siääd Nazare't, ¿xhicuent riu'lu loonu? ¿La siädgunitlojlu nuunu? Narä numbeälu, luxh nanä luj najclu bendzan ni siääd lo Dios.

²⁵ Dxejcti gudidxa' Jesús lo bendxbabga, rájpni lojni:

—Basäuu ro'lu, birii neñ lastoo niguiire.

²⁶ Sas bendxbabga batienguij niguiiga, luxh cabedxa'ni biriini neñ lastoo niguiiga.

²⁷ Bidxejbtí guiraarení, canabdiidx loj sa'reni:

—¿Xhi dee? ¿Xhi dzuun nacoobre ruluiini? Niguiire rnibeeni näj rebenxdab, luxh ruzoobreni xtiidxni.

²⁸ Di miaclaa gucbee rebejn guideb nez Galilee xhi rujn Jesús.

Basiajc Jesús xnan suegr Pedr
(Mt. 8:14-15; Lc. 4:38-39)

²⁹ Che biriireni xquuidobáz rexpejn Israel, huinä Jesús Jacoob näj Juan rolíjz Simón näjza Andrés. ³⁰ Luxh xnan suegr Simón naga', yu'ni xliaa. Dxejc rájpreni lo Jesús:
—Cayacxhuuni.

³¹ Dxejcti gubig Jesús lojni, gunaazni naani, gulásnini; lagajc dxejc biriini xliaa. Dxejc gusloj cayunireni.

Xhidajl benracxhhuu basiajc Jesús che huääz gubijdx
(Mt. 8:16-17; Lc. 4:40-41)

³² Che huääz gubijdx, luxh abiu' guxhijn, biädnäreni guiraa rebenracxhhuu loj Jesús, näjza renani yu' bendxbab neñ lastooni.

³³ Luxh guideb guejdixga bidojp ro' yu'ga. ³⁴ Basiajc Jesús xhidajl renani rajc garen-garen yälgujdx. Niluxh gulääzani xhidajl bendxbab, niluxh dini nusaan ninii rebendx-abga, sa'csi najnreni chu najcni.

Balluj Jesús nez Galilee
(Lc. 4:42-44)

³⁵ Che bara yääl, cäjyru bistic Jesús, biriini sääni te laad cadro ruti bejn. Ro'c cabejdx-canabni loj Dios. ³⁶ Dxejcti Simón näj resa'ni huitiilreni Jesús. ³⁷ Che bidxäl-renini, rájpreni lojni:

—Guiraa rebejn caguillu.

³⁸ Dxejc rájp Jesús lojreni:

—Colcho' reguejdx ni yu' gajxh, te gusuleä xtidx Dios ro'c. Par ni'cpac biälä.

³⁹ Dxejcrú cuansaj Jesús guideb nez Galilee, caguluiini xtidx Dios nen reguidobáz xten rexpejn Israel. Gubineezani birii rebendxbab neñ lastoo xhidajl rebejn.

Basiajc Jesús te bejn ni ral tiejxhni
(Mt. 8:1-4; Lc. 5:12-16)

⁴⁰ Gubig te benracxhhuu ni ral tiejxhni loj Jesús, bazuhijbni. Dxejcti rájpni lojni:

—Narä nanä sajc gusiajclu narä palga rlajzlu.

⁴¹ Balaslaiz Jesús besenracxhuuga, gunaazni naani, räpgajcni:

—Rlazä jiajclu. Biajc naj.

⁴² Cheni guniini scree, biacgajc benracx-huuga. ⁴³ Dxejcti gulunejz Jesús bejngá. Per räpxagaani lojni:

⁴⁴ —Ahuiire, rutlojdi guiniilu dee. Huilui tiejxhlu lo bixhojz. Badedgajc lo Dios nani

räjp toMoisés gudeed bejn lo Dios si'c te seen, te gacbee rebejn abiajclu.

⁴⁵ Dxejc sää bejngá. Sas gusloj cayujyni diidx lo rebejn xcuent guiraa nani gujcní. Ni'cni diru niajcdi niu' Jesús nicla tej gue-jdx. Cansajni te laad cadro ruti bejn. Niluxh guiranejz rii rebejn, siädhuiireni Jesús.

2

Basiajc Jesús te bejn ni di guniib
(Mt. 9:1-8; Lc. 5:17-26)

¹ Che agudejd balti dxej, biusac Jesús nen guedx Capernaum. Dxejcti bejnj diajg rebejn arbäjzni. ² Bidopgajc xhidalduxh bejn. Gudxaj neñ yu'. Nicla rolä' di niajł nisu-jreni. Dxejcti caguluii Jesús xtidx Dios lo rebejn. ³ Dxejcti bidzujn tajp bejn, nuurení te bejn ni digacti guiniib; siädnärenini lo Jesús. ⁴ Luxh di niajcdi nizdzujreni cadro suga' Jesús, sa'csi yu' xhidajl bejn ro'c. Ni'c baxhalreni yejc yu' nejz cadro sujní. Dxejcrú cadro baxhalreni basiäjtreni da' ni naga' benracxhuuga lojni. ⁵ Che bahuii Jesús rililajzreni, dxejc rájpni loj benracx-huuga:

—Xi'nä, agubicaj rextojllu.

⁶ Sas gaii bejn ni ruluii leii ni sobga' ro'c bejnreni xhigab neñ lastoorení, naarení:
—⁷ ¿Xhicuert rnii niguiire scree? Caniyajni Dios; rut rajcdi rudzucaj dojl. ¡Diostis rajc rudzucaj dojl! ⁸ Dxejcti gubegajc Jesús xhi xhigab cayujnreni. Dxejc rájpni lojreni:

—¿Xhicuert rujntu xhigab si'c neñ las-tootu? ⁹ ¡La guyasiru gäbni loj benracx-huure: “Agubicaj rextojllu”, o la gäbni: “Hivistie, cua' xta'lú, gusaj”? ¹⁰ Baj nadj, te gantu rajc rudzucaj Xi'n Dios, nani gujc Niguii, dojl lo guedxliujre, caniä loj benracxhuure:

¹¹ —Lojlu rniä, ¡Hivistie, cua' xta'lú, huij rolijzlu!

¹² Lagajc dxejc hivistie benracxhuuga, gulásni xta'ni, biriini ro'c nez loj guiraarení. Ni'cni bidxelo guiraarení. Dxejc gulä'preni xpala'n Dios, rájpreni:

—Gajdpacnu guihuii sa' dzuunre.

Gurejdx Jesús Levi
(Mt. 9:9-13; Lc. 5:27-32)

¹³ Dxejcrú gubisac Jesús ro' nis xten Galilee, luxh che bidojp guiraa rebejn lojni, baluiini xtidx Dios lojreni. ¹⁴ Sasaj Jesús che

bidxaagni Leví, xi'n Alfeo. Sobga'ni cadro rusquijxni rebejn. Dxejc räjp Jesús lojni:

—Gudanajl narä.

Sas huisuni, sanajltini Jesús.

¹⁵ Dxejc sobga' Jesús cayajwni roliz Leví. Luxh sobganäj Jesús xhidajl reni rusquijx, näjza rebendojl ni di chasanäj leii, näjza rexpejnpacni, lo mex. Xhidajlreni tre', luxh sanajlreni Jesús. ¹⁶ Dxejcru rebejn ni ruluii leii näj refarisee, che bahuiireni cayaunäjni renani rusquijx näjza rebendojl, räjpreni loj rexpejnpac Jesús:

—¿Xhicuent rbenäj xmastrtu reni rusquijx näj rebendojl, luxh raunäjnireni, ränäjnireni?

¹⁷ Che biejn diajg Jesús xhi caniiren, räjpni lojreni:

—Renani nadip nadaan di guiquin doctoor, per reni racxhux rquiin doctoor. Dina niätedxä rebensa'c, biäädtedxä rebendojl, te gusiech lajzreni.

*Gunabdiidxreni loj Jesús xcuent yälrucua'n
(Mt. 9:14-17; Lc. 5:33-39)*

¹⁸ Cagucua'n rexpejn Juan näj rexpejn refarisee, renani najc rebenguidoo loj guedx Israel. Dxejc biääd gaij bejn loj Jesús, gunabdiidxreni lojni räjpreni:

—¿Xhicuent cagucua'n rexpejn Juan näj rexpejn refarisee luxh rexpejnpacu di gucua'n?

¹⁹ Dxejcti räjp Jesús lojreni:

—¿La rucua'n rebejn ni rdon chää cadro ru' yälrucuñaa che meer suga' bi'n? Che meer suga' bi'n lojreni, direni gucua'n. ²⁰ Per sidzuñ dxej sibicaj bi'n lojreni, dxejc sii sucua'nreni.

²¹ 'Rut rucuaadi tla' ladcoob loj tla' ladyux, sa'csi ladcoob rxu'nni luxh rutiajzni ladyuxga, dxejc xhiroobruni räjs. ²² Rutza rusäldi bin ni gajd guilaj nen guidyx ni abigaa. Sa'csi bin ni gajd guilajga sutiajzni guijdga che guilajni, luxh sinijt binga näjza guijdga. Ni'cni nanab gusalñi bincoob nen guidcoobza.

*Batojp rebejn ni rinajl Jesús triuu sabd
(Mt. 12:1-8; Lc. 6:1-5)*

²³ Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejnpacni caläädx doj lo triuu. ²⁴ Dxejc räjp refarisee, renani najc benguidoo loj guedx Israel, loj Jesús:

—Arniä, ¿xhicuent rujn rexpejnpacu dzuun ni di guchaag gunni nen dxej ni rusilajznu, ä?

²⁵ Dxejcti räjp Jesús lojreni:

—¿La gajdu gol nani bejn toDavid te huält, laani näj resa'ni, ä? Che biääd xhi gauureni, gulaanreni. ²⁶ Biu' David neñ xyu' Dios chemi guyu' toAbiatar loj Dios. Abiatar sajcru loj rebixhojz ni guyu' nen xquidoo rexpejn Israel. Dxejc gudajw toDavid reyätxtil ni dzuub ro'c. Badeedzanini gudajw rebejn ni yunäjni. Luxh rebixhojzts rajc rajw yätxtiilga.

²⁷ Räjpza Jesús lojreni:

—Dios bejn dxe sabd sa'csi najnni naquinpac gusilajz bejn. Dini niujn sabd te gapda bejnni. ²⁸ Ni'cni narä, Xi'n Dios ni gujc Niguii, näjza sabd rnibeä.

3

*Niguii ni nabijdz te naani
(Mt. 12:9-14; Lc. 6:6-11)*

¹ Biu' Jesús stehuält neñ xquidobäz rexpejn Israel. Ro'c yu' te niguii nani nabijdz te naani. ² Niluxh ro'c cagula'tz rebejn Jesús don la susiajcní niguiiga sabd, dxej ni rusilajz rexpejn Israel, sa'csi rlajzreni cue'creni xquejní loj nani rnibee rexpen Israel. ³ Dxejc räjp Jesús lo niguii nani nabijdz naani:

—Huistie, guzuj galäiire.

⁴ Dxejcti gunabdidxgajcni loj gaij rebejnga, räjpni:

—¿La laaca gunni dzunza'c, o la dzunguidx, sabd, ä? ¿La suslaani yälnabajn, o la sugu'tni?

Luxh laareni biacdixireni. ⁵ Dxejc nadxe'ch bahuui Jesús lojreni, luxh guchuin lajzni, sa'csi guc najd lajzreni. Dxejc räjp Jesús loj niguiiga:

—Baslii naalu.

Dxejcti basliimi naani. Biajctimi. ⁶ Dxejcru biunejz refarisee. Guslogajcreni caguchaa-greni diidx con reni nadxaag Herodes, te don xho ju'treni Jesús.

Xhidajl bejn bire' ro' nis

⁷ Jesús näjza rexpejnpacni sääreni ro' nis, luxh xhidajl bejn Galilee birinajlni. ⁸ Che gojnreni redzunro ni rujn Jesús, xhidajl-reni biääd. Yu'reni birii Judea, yu'reni birii guedx Jerusalén, yu'reni birii Idumea, yu'zareni birii nejz stelaad gueu Jordán,

biriizareni nez guedx Tiro, näj nez guedx Sidón, biädhuiireni loj Jesús. ⁹ Ni'cni räjp Jesús loj rexpejnpacni quiilreni te canuu, te na'c gutää rebenxhidaalgani. ¹⁰ Abasiajc Jesús xhidajl beñracxhuu, ni'cni guiraasi beñracxhuu caxa't lojni, te canrenini te jiajcreni. ¹¹ Niluxh che rhuui rebeñdxab lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

¹² Dxejcti Jesús gudidxa' lojreni te na'c niäjbreni chu najcni.

Gule Jesús tzubitio p bejn loj reni rinajlni
(Mt. 10:1-4; Lc. 6:12-16)

¹³ Birii Jesús sääni lo te dajne' cadro gurejdxni renani rlajzni cueni. Gubigtireni lojni. ¹⁴ Dxejcti guleni tzubitio'preni te sanäjreni laani, te guxhalnireni chaluiirenixtidx Dios; ¹⁵ te ga'preni yälribee te gu-siajcreni beñracxhuu, te cuääzareni rebeñdxab. ¹⁶ Retzubitio'p bejn ni gule Jesús najc: Simón, ni gulälajzani Pedr. ¹⁷ Dxejcti Jacoboob con Juan, rex'i'n Zebedeo, gulälaj Jesú Boanerges. Con xtiidxnu sälöjni bejn ni nasesya', si'c guzii. ¹⁸ Näj Andrés, Felipe, Bartolomé, Mateo, Tomás, Jacobo xi'n Alfeo, Tadeo, Simón, ni di guidxejb rnigajc, ¹⁹ näj Judas Iscariot, ni bato' Jesús loj reni rdzechlajz lojni. Sä'tireni rolijz te dade'.

Yälriyaj loj Sprit Dxan xte Dios
(Mt. 12:22-32; Lc. 11:14-23; 12:10)

²⁰ Dxejc bidopsac rebeñxhidaalgaa; nicla niajc niaunäj Jesús rexpejnpacni. ²¹ Chebiejn diajg resa' Jesús dee, biädhuiirenini, sa'csi naareni, yejcní cayajc.

²² Rebejn ni ruluii leii ni birii guedx Jerusalén bidzujnza lo Jesús, dxejc räjpreni:

—Beelzebú, nani rnibee rebendxbab, yu'nen lastoo niguiire. Niluxh nani rnibee rebendxbab rudeed yälribee lo Jesús te cuääni beñdxab.

²³ Dxejc gurejdx Jesús rebejnga, bijyni te cuent ni ruluii lojreni, räjpni:

—¿Xho gurilaagw bendxbab lagajc sabenxdabni? ²⁴ Palga rebejn xten te yälribee la'reni, luxh tilnäj te cuanai ste cuaaga, di yälribeeaga chu xchej. ²⁵ Palga te famil rdiñäj lagajc sa'nii, di familga chu xchej. ²⁶ Palga bendxbab nani rnibee tilnäj lagajc laani, di xcälmibeeni chu xchej, sa'csi ni'c gun luuxni.

²⁷ 'Rut gacdi jiu' rolijz te niguidaan, cuanni xhixhtenni, palga dini gulibxgaani, si'ctis sajc cuanni xhixhtenni.

²⁸ 'Rniliápac lojtu guiraa dojl näjza yälriyaj xten rebejn sajc jia. ²⁹ Nani guiniyaj Sprit Dxan xten Dios, digacdi guibicaj rextojlni, anuutnisni xtojlni par tejpas.

³⁰ Räjpni si'c sa'csi caniireni yu' beñdxab neñ lastooni.

Xnan con rebetzhuin Jesús
(Mt. 12:46-50; Lc. 8:19-21)

³¹ Dxejcru bidzujn xnan Jesús, näj rebetzhuiinni. Direni niu', baxhaliisreni chu huitejdxi. ³² Rebejn ni sobga' gabí Jesús räjpreni lojni:

—Xnanlu näj rebejtzlu suga' ro lä', caguüllreni luj.

³³ Dxejcti räjp Jesús lojreni:

—¿Chu reni'c najc xnanä näj rebetzä?

³⁴ Bahuigajni loj renani sobga' gabini, dxejc räjpni lojreni:

—Redee najc xnanä, rebetzä. ³⁵ Chutis ni rujn ni rlajz Dios, ni'c najc betzä, bisianä, näjza xnanä.

4

Xcient niguui ni sale'c binij
(Mt. 13:1-23; Lc. 8:4-15)

¹ Suga' Jesús ro'nis guslosac caguluiini xtidx Dios, luxh bidojp xhidajl bejn cadro suga'ni. Xhidualduxh najcreni, ni'cni biu' Jesús neñ te canuu ni suga' ro'nisga. Dxejcti gurejni nenga, biääd guiraa bejn bia'ntireni ro'nis. ² Dxejc baluinireni guiraloj, ganax cuent ni ruluii guniini. Che caguluiini, räjpni lojreni:

³ —Gucuadiagtú dee. Guyu' te niguui. Biriini sale'cni binij. 'Che guslojini cabe'cni, yu' lajt biajb binijga cuä' nezyuj. Sas biääd reman xhagubaa, gudajwreni binijga. ⁵ Stee lajt biajb binijga nen guij cadro xheti xhidajl yuj. Binijga gulengajci, sa'csi xheti xhidajl yuj ro'c. ⁶ Dxejc, sa'csi lo jiaa yu' xlobaani, che birii gubidx, bigolni, gibijdztiny. ⁷ Stee lajt biajb binijga nen yaguejch. Dxejcti biroob reyaguejchga, luxh bejnreni balaa loj binijga, ni'cni gujcní ganax bilii. ⁸ Per stee lajtga biajb binij lo yusa'b'. Gulejn reyäjlga, guroobreni, gucs'a'creni. Yu'reni cuaj galbitzuu xob, yu'reni cuaj gayojn xob, yu'zareni cuaj tegayuu xob.

⁹Dxejc räjpnlo lojreni:

—Chutis ni rlajz guisieed, sucuadajgjni.

¹⁰Che asii xhidajl bejn, rebejn nani suga' gajxh cadro sugaraj Jesús guitzubitio' p xpejnpacni gunabdiidx lo Jesús xhi sáloj cuentre. ¹¹Dxejc rájp Jesús:

—Dios abejn gacbeetu te gantu xho najc yälxhiga'tz xten xcälrnibee Dios nani najc xhiga'tz najli. Niluxh lo ste'ca bejn con cuentis rniä guiraa recosre, ¹² te mase cahuireni direni gumbee, te mase cayiejin diajgreni, direni gacbee. Scree gacni, te na'c gusiech lajzreni, te na'c guibicaj xtojreni.

¹³Räjzpazi lojreni:

—¿La ditu gacbee cuentre? ¿Xhocha gacbeetu xhidajlru cuent? ¹⁴Niguiire nani sale'c binij najc si'c te nani rului xtidx Dios. ¹⁵Yu' bejn ni najc si'c binij ni biajb cuä' nezyuj: riejn diajgreni xtidx Dios nani rului bejn. Dxejc che jiejn diajgreni xtidx Dios, riääd Satanás rbägajcni xtidx Dios ni yu' nen lastooreni. ¹⁶Yu'za rebejn ni najc si'c binij ni biajb nen reguij, renani che jiejn diajgreni xtidx Dios, rbaa lajzreni rca'reni diidxga. ¹⁷Niluxh direni nisiudu'tz, sa'csi guxii huili lajzreni. Che rdejdreni trabaw o che rusacsí bejgreni xcuent xtidx Dios, rusaanreni xtidx Dios. ¹⁸Yu'zareni najc si'c binij ni biajb nen yaguejch, riejn diajgreni xtidx Dios, ¹⁹dxejc che ru'rureni yärsia' xcent recos quedxliujre, rsia' lajzreni ga'preni meel, rlajzreni ga'prurenii guiraloj recos, dxejc riu' redee neñ lastooren, rusäuuni lo xtidx Dios, xlia'si biejn diajgreni xtidx Dios. ²⁰Yu'za bejn ni riejn diajgreni xtidx Dios, rlii lajzreni diidxga, xhet xlia'ti biejn diajgreni xtidx Dios. Najcreni si'c binij ni biajb loj yusa'c. Yu' rebejn ni najc si'c nani cuaj galbitzuu xob lojni, yu'za rebejn ni najc si'c nani cuaj gayojuñ xob lojni, yu'za rebejn ni najc si'c nani cuaj tegayuu xob lojni.

Xhet yuchetzu'tzdi ni di guidzujn dxej sisäbdiidx

(Lc. 8:16-18)

²¹Räjpzai Jesús lojreni:

—¿La riädnätu te bajl te suumi dejtz te alm, o neñ te loon, ä? ¿La xhet nanabdi suumi jiaa te guzanijni, ä? ²²Xhet yuchetzu'tzdi ni di guidzujn dxej sisäbdiidx. Xhetiza xhicos naga'tztis. Naga'tzni

naj, niluxh sidzujn dxej sule'ni. ²³Pal yu' chu rlajz guisieed, sucuadajgjni.

²⁴Räjpzai Jesús lojreni:

—Colyunxgaa xhigab rediidx ni riejn diajgtu. Nani rusälju loj xhigabtu, ni'cza guniidix Dios xca'tu, luxh sisiojbru yejc ni xca'tu. ²⁵Renani rajp che'n yälhnajn, lojreni sudeedru Dios yälhnajn. Luxh renani xhetru rusälju loj xhigabreni, sudzucaj Dios yälhnajn nani rajpreni.

Xcuent binij ni roob

²⁶Guniiza Jesús lojreni:

—Yälrnibee xten Dios najc si'c rsiajc te nigui che rbe'cni binij lo yuj, ²⁷dxejc yääl riguesni, rdxee ristieni, dxejcti rliejn binijga, luxh di niguiiga gan xho roobni. ²⁸Acanajn yujga rajc binij lojni. Galoo rii cuane'ga, sas rii doj lojni. Dxejcru rdxaj bejdze' nen dojga. ²⁹Dxejcti che aguyajl bedze'ga, ruxhalni chu ritiuugni, sa'csi abidzujn dxej ni guidopjni.

Xcuent bedz muxhtas

(Mt. 13:31-32; Lc. 13:18-19)

³⁰Räjpzai Jesús:

—¿Xhini'c najc si'c najc xcälrnibee Dios? ¿Xhi te cuent guiniinu te guiluiinuni? ³¹Si'c te bedz muxhtas ni rbej loyuj, si'c nacjcn. Bedz muxhtas nacjcn bedz bäre'ru loj guiralii bedze' ni yu' loj quedxliuj. ³²Dxejc che agurejni, roobni, rajcni yagroru loj recuaan. Dxejcti roob rexajcwni te rajc rujn reman xhaguibaax xpitääzni neñ xpalaani.

Si'c baluui Jesús ganax con cuent

(Mt. 13:34-35)

³³Si'c ruluii Jesús rebejn xtidx Dios guniini xhidal cuent sa' redee, si'ctis ni rajc racheereni. ³⁴Con recuent ni ruluiitis gunii Jesús lojreni. Niluxh lo rexpejnpacni basule'ni guiraa recuentre.

Rusiacdxi Jesús bej näj nisdoo

(Mt. 8:23-27; Lc. 8:22-25)

³⁵Lagajc gudxejga rájpnloj rexpejnpacni:

—Colcho', chonnu stelaad nis xten Galilee.

³⁶Basa'ntireni rebejn, sanätireni Jesús neñ canuu cadro sobgajcni. Dxejcti sgaii canuu sanajlni. ³⁷Chela gubi' te beduxh, gusloj cayu' nis neñ canuuga. Cadxaj canuuga nis. ³⁸Nagayejs Jesús dejtz canuuga,

nagayejsni. Bacuäänreni Jesús, räpgajcreni lojni:

—Dad mastr, ¿la dilu jiu siääznu neñ nis, ä?

³⁹Dxejc huistie Jesús, gudidxa'ni lo bejga, räjpzanlo nis:

—Guredxi.

Guläzgajc bej, biacdixini. ⁴⁰Räjp Jesús loj rexpejnacni:

—¿Xhicuent cadxebduxhtu? ¿La ditu chalilajz xtidxä, ä?

⁴¹Luxh laareni bidxelojreni, räjpreni loj sa'reni:

—¿Chucha dee ni rnibee bej con nis, luxh ruzoobreni xtiidxni?

5

*Nigui Gadara ni yu'bendxbab neñ lastooni
(Mt. 8:28-34; Lc. 8:26-39)*

¹Bidzujintireni stelaad ro' nisga, lo yuj xten Gadara. ²Si'ctis ni birii Jesús nen canuu, biädgajc te nigui lojni ni birii neñ rebiliää cadro rga'tz bengut. Yu' bendxbab neñ lastoo niguiiga. ³Rbäjzni neñ rebiliääga luxh rut rajcdi rucuaduuni, nicla con cadenguiib. ⁴Xhidajl huält agacbacuadureni ni', naa niguiiga con cadenguiib, luxh litis batiuugni recadenguiibga, rut rajcdi rusiacdxini. ⁵Si'ctis canzajni, dxej, yääl. Rbedxa'ni neñ redajn, neñ rebiliää, luxh cagutiuugni tiejxhni con reguij. ⁶Che bahuiini loj Jesús zижtrу, baxunni huicha-glojoni Jesús, bazuxhjibni lojni. ⁷Dxejcti rbedxaduxhni, räjpni:

—¿Xhicuent siäädlu loä, Jesús, Xi'n Dios ni yu' jiaro? Rniäbä lojlu nez loj Dios na'c gusacsflu narä.

⁸Sa'csi agac cayäjb Jesús lojni:

—Luj, benðxbab, birii nen lastoo niguiiga.

⁹Dxejcti gunabdiidx Jesús räjpni:

—¿Chu laalu?

Dxejc räjpni:

—Närä laä Legion, nani säloj xhidalro, sa'csi xhidajl najcnu.

¹⁰Sanuutis canabni lo Jesús na'c gux-halni rebendxbabga ste'ca guejdx. ¹¹Ro'c tre' xhidalduxh cuch cuä' dane'ga, caya-jwreni. ¹²Dxejc gunab rebendxbabga loj Jesús, räjpreni:

—Baxhal nuure loj recuchre te jiu'nunen lastooreni.

¹³Dxejcti basaan Jesúsreni. Biriiti rebenðxbabga neñ niguiiga, dxejc biu'reni nen

lastoo recuchga. Yu' si'cti tiop mil' cuch ro'c. Baxun recuchga, dxejc birolreni ro' guilaj, bitejbreni neñ nis, gujittireni neñ nisga.

¹⁴Renani cayajp recuchga baxunreni, huiyeiireni diidxga neñ guejdx, näjza lonnia. Dxejc biääd bejn biädhuii nani guyc ro'c. ¹⁵Che bidzujnreni cadro suga' Jesús, bahuiireni loj nigui nani guyc' rebendxbabga neñ lastooni. Sobga'ni ro'c, najcwni xhajbni luxh nasa'c yejcni. Niguiire najc nani guyc' benðxbab ni laa Legion neñ lastooni. Bidxejbt rebejn nani bahuii lojni. ¹⁶Dxejcru rebejn ni bahuii xhi guyc ro', huiyeiireni diidx xho guzajc niguiire nani guyc' benðxbab nenni galoo, näjza nani guzajc recuch. ¹⁷Dxejc gusloj canabreni loj Jesús jiunejzni.

¹⁸Che biu' Jesús nen canuu, nigui nani guyc' benðxbab neñ lastooni gunabni loj Jesús, räjpni:

—Huinä narä.

¹⁹Per di Jesús nusaan nijni. Räjp Jesús lojni:

—Huij rolijzlu, lo resa'lü. Huiyeii diidx lojreni xho bennäj Dadlu, näjza xho balasla-jzni luj.

²⁰Sä'ti niguiiga, gusloj cayujyni diidx neñ reguejdx xten Decápolis xho bennäj Jesúsn. Guiraa rebejn bidxeloi.

Xindxa'p Jairo näjza gunaa ni bahual xhajb Jesús

(Mt. 9:18-26; Lc. 8:40-56)

²¹Che bidzun'sac Jesús stelaad ro' nisga neñ canuu, bidzujn xhidalduxh bejn cadro suga'ni. Bia'nti Jesús ro' nisga. ²²Dxejcru biääd te nigui nani laa Jairo, ni rnibee neñ xquidobäz rexpeñ Israel. Che bahuiini loj Jesús, bazuxhjibni lojni. ²³Canabpacni lojni, räjpni:

—Xindxapä'ä acayejt. Gudaa, guzujlu naalu yejcni, te jiajcn, te guibajnni.

²⁴Sanäti Jesús bejnga. Xhidajl bejn sana-jlni, luxh cagutäärenini. ²⁵Loj rebenðx-hidaalgayu' te gunaa ni agujc tzubitio'p ijjz racxhuuni yälguidxbäi.

²⁶Agudedduxhni trabajw, abahuui xhidajl doctoorni. Xlia'si abanijtni guiraa nani rajpni, luxh xhet racnäjdini, alga rxuuru. ²⁷Sa'csi biejn diajgni xhini'c canii rebejn xcuent Jesús, gubig gunaaga nez dejtz Jesús, guideb neñ rebejn, bahualni xhajb Jesús. ²⁸Cayujnni

xhigab, naani: "Palga narä falä xha-jbtisni, siacä." ²⁹ Lagajc dxejc guläjz caxe' xtiejnni, gucbeeza tiejxhni abirii xcälracx-huuni. ³⁰ Gucbegajc Jesús yu' chu abasiajcn. Gubiregajcni nən rebeñxhidaalga, räjpni:

—¿Chuni'c bahual xhabä?

³¹ Dxejcru räjp rexpejñpacni lojni:

—Rhuiilu beñxhidaal cagutäälu, luxh naalu: "¿Chuni'c bahual xhabä?"

³² Sas cahuii Jesús nez ree, nez rec, te fiini loj nani bahuañi. ³³ Dxejc bidxejb gunaare, racsejsni, sa'csi gucbeeni xhini'c gujcn. Dxejc biäädni, bazuxhijbni loj Jesús, räbliini loj Jesús guira'ti ni bejrn. ³⁴ Dxejc räjp Jesús lojni:

—Xindxa'pä, abiajclu sa'csi huililajzlu. Gulecdxi lajzlu, huij rolijzlu, abiajcxälracxhuulu.

³⁵ Canisijc Jesús si'c che bidzujn renani birii rolijz dade' ni rnibee nən xquidobáz rexpejñ Israel. Räjpreni:

—Agujt xindxape'l. ¿Xhicuent rusie-drulu Dad mastr?

³⁶ Dxejc che biejn diajg Jesús nani cani-reni, räjpni lo dade'ga:

—Na'c guidxejblu. Bililajztis.

³⁷ Luxh dini nusaanru nij chu ninäni, Pe-drtis näj Jacob näjza Juan bejtzni. ³⁸ Che bidzujnni rolijz dade'ga, bahuui Jesús biejy ni cayujn rebejn ni rbedxa' roon. ³⁹ Biu'tini räjpni:

—¿Xhicuent rujntu si'c? Gajd dxape're guet. Nagayejssini.

⁴⁰ Alga baxhiznäjrenini. Dxejc gunibee Jesús birii guiraa rebejng. Dxejcti huinäni xcuzajn dxape'ga con renani sanäni. Biu'reni cadro naga' dxape're. ⁴¹ Gunaazni nña dxape'ga, dxejc räjpni:

—Talita cumi —nani sáloj con xtiidxnu: Dxape', lojlu rniä, huistie.

⁴² Dxejcti huistiegajc dxape'. Tzubitio'p ijj, yu' dxape'ga. Bidxeloduxh rebejn ni bahuui guläs Jesús dxape'ga. ⁴³ Dxejc balijdx Jesús reni te rut lojdi chaye'tzreni xhini'c gujc. Gunibegajcni gudeedreni xhi gauu dxape'ga.

6

Che guyu' Jesús Nazare't

(Mt. 13:53-58; Lc. 4:16-30)

¹ Dxejcru birii Jesús ro'c, huijni lajdxni, sanätzani rexpejñpacni. ² Che bidzujn sabd,

dxej nani rusilajz rexpejñ Israel, gusloj cag-uluuni neñ xquidobáz rexpejñ Israel. Bidxe-loj xhidajl bejn nani biejn diajg rextiidxn, räjpreni:

—¿Caro bisieed niguiire guiraa recosre? ³ Xhi yälnajnre cua'ni ni'c rajc rujnni rextzunduxh Dios con naani? ⁴ ¿La xhet laadi carpinter, xi'n Marii, bejtz Jacoop, näj José, näj Judas, näjza Simón dee, ä? ⁵ ¿La xhet reedi rbäjz rebisianhuinni?

Luxh bidxechlajzreni lojni. ⁶ Dxejc räjp Jesús lojreni:

—Catis rinälajzreni te ni rnii xtidx Dios. Lajdxtisni, lagajc loj resa'ni, rolijztisni, ro'c rut rinälajzdini.

⁵ Luxh di niajcdi niujn Jesús xhidajl mi-laagwr ro'c. Tiopchontis beñracxhuu basi-ajcni, bazujni naani yejcreni. ⁶ Bidxelo Jesús sa'csi di lajzreni nilii. Caguluiitini nən guiraa reguejdxe' ni ria'n gajxh nejzga.

Baxhal Jesús tzubitio'p bejn ni rinajlni chaluiireni xtidx Dios

(Mt. 10:5-15; Lc. 9:1-6)

⁷ Dxejcru gurejdxni guitzubitio'p xpejñpacni. Gusloj caguxhalni tiopga-jreni; badeedzani yälrnibee lojreni te guinibeereni loj rebeñdxab. ⁸ Gunisteeni xhet chanädireni lo nejz, ganaxhtis te yajg te sanäjreni. Di nungäjl chanäreni nicla bisiuud, nicla yätxtiil, niclaza meel neñ dobdäj. ⁹ Nungäjlza xcaj gura'ch ni'reni, nägajc ga'preni tejtis gamangw, xhet tio'pdini. ¹⁰ Dxejcti räjpni lojreni:

—Cadrotis jiu'tu neñ te guejdx, coljia'n neñ tejtis yu' guiraa redxej ni chutu gue-jdxga. ¹¹ Palga yu' te guejdx cadro direni gusaan jiu'tu luxh di rlajzreni cuadijgreni diidx ni sanätu, colrii guejdxga, colcuijb guxhuj ni'tu si'c te seen te gacbeereni xhet laadi bejnreni. Rniliápac lojtu, guxiuru tra-bajw ted reben Sodoma näj reben Gomorra quela rebejn ni yu' guejdx cadro direni gusaan jiu'tu.

¹² Dxejc biriireni, sääreni. Cayäbgajc-reni nanabpac gusiejch lajz rebejn.

¹³ Gulääzareni xhidajl bendxbab dxejcti gudääbreni se't yejc xhidajl beñracxhuu, luxh biajcreni.

Xcälguit Juan ni rutiobnis

(Mt. 14:1-12; Lc. 9:7-9)

¹⁴ Herodes najc nani rnibee dxejc. Biejn diajgni xpala'n Jesú, sa'csi guiralii rebejn calä'p xpala'nni. Dxejc räjp Herodes:

—Juan nani rutiobnis ahuäjs loj rebengut, ni'c rajc rujnni remilagwre.

¹⁵ Sgaii bejn räjp:

—Laa Elfás ni gunii xtidx Diosni.

Sgaiireni räjp:

—Laa te bejn ni rnii xtidx Dios, o sa' te rebejn ni gunii xtidx Dios agujc xchero.

¹⁶ Che biejn diajg Herodes si'c, räjpni:

—Laa Juan dee, nani gunibeä biru' yejcni, luxh naj agubansacni loj rebengut.

¹⁷ Sa'csi lagajc Herodes gunibee biga' Juan, dxejc bacuaduurenini con cadenguiib nen latzguiib, xcälnasa'c Herodías. Herodías gujc chää'l Lib, bejtz Herodes, dxejc cua' Herodes gunaga si'c chäälni.

¹⁸ Räjp Juan loj Herodes:

—Xhet laadi rbäznäjlu chää'l bejtzlu.

¹⁹ Ni'cni rdxechlajz Herodías loj Juan, luxh rlajzni ju'tnini, luxh di niajcdini ²⁰ sa'csi rdxejb Herodes Juan, sa'csi najnni benṣa'c, bendxan najc Juan, ni'cni dini nusaan niujn Herodías latsiajni. Mase dini gacbesa'c ni rnii Juan, rucuadiagsa'cni xti-idxn. ²¹ Niluxh guyu' xmood Herodías. Che gojl laj Herodes, bayaanni rexpe-jnni ni rnibee, näjza rebejn nani sajc nez regióon Galilee. ²² Dxejcti biu' xindxa'p Herodías cadro cayajwreni, baya'ni nez lojreni. Bidxaglazduxh Herodes näjza rexpioozni baya' gunaga, xindxa'p Herodías. Dxejc räjp Herodes loj gunaga:

—Gunab ni rlajtislu loä, narä sunidxäni.

²³ Dxejcru räpli Herodes lojni:

—Sunidxä xhitis ni guiniablu. Mase gala' yuj ni rnibeä.

²⁴ Biriitini neq yu', huiye'tzni loj xnanni, räjpni:

—¿Xhini'c guiniabä lojni?

Dxejc räjp xnanni lojni:

—Gunab yejc Juan ni rutiobnis lojni.

²⁵ Huigajcni loj reii, sas gunabni lojni, räjpni:

—Rlazä gunidxgajclu loä yejc Juan ni rutiobnis. Nen te pla't baniidx yejcni.

²⁶ Dxejcti guc-huinduxh lajz Herodes, sa'csi abadeedni xtiidxn lojni, luxh sa'csi abiejn diajg renani sobganäjni lo xmexni, ni'c dipac rlajzni nudxoijnni nani gunab gunaga lojni. ²⁷ Baxhalgajc reii te soldaad

ni rcanäj ro'c, baxhalnini, te chaxiini yejc Juan. ²⁸ Ni'c huij, dxejcti bagu'tni Juan nen latzguiib, biädnätini yejc Juan nen te pla't. Badeedtinini loj gunaga. Dxejcti gunaga badeednini loj xnanni.

²⁹ Che biejn diajg rexpejnpac Juan si'c, biädläsreni togoolga. Dxejcti bacu'a tzrenini nen te baa.

Bayaan Jesú mil bejn

(Mt. 14:13-21; Lc. 9:10-17; Jn. 6:1-14)

³⁰ Che gubi' renani baxhal Jesú, bijreni diidx guiraa ni bejnreni näjza ni baluiereni.

³¹ Dxejc räjp Jesú lojreni:

—Coltaa, xtebnu chopnu cadro rut rbäjzdi, guisilaaznu tudxe'n.

Räjp Jesú si'c sa'csi yu' xhidajl bejn ni sää, ni siääd, nicla gal gauuren. ³² Dxejcti sääreni nen te canuu cadro rut rbäjzdi.

³³ Bahui xhidajl bejn sääreni, biembeereni Jesú. Dxejc xhidajlreni huini' ro'c, xhidajl gueidx birüreni, gamidreni bidzujnreni loj Jesú näjza rexpejnpacni, dxejcti bido-jpreni lojni. ³⁴ Birii Jesú nen canuu, bahuiini loj benxhidaalga. Dxejc balazla-jzniren, sa'csi najcreni si'c rexiil ni rutibaxtoor xtenreni. Dxejc gusloj caguluiniren guiraloj. ³⁵ Che gojl gudxej, gubig rexpejnpacni lojni, räjpreni:

—Rut rbäjzdi ree, luxh agudxej näj.

³⁶ Baxhal rebejn te chääreni lo reguejdx, näjza rerench, te chasiirenäj yätxtiil gauurenäj sa'csi xheti xhi gauurenäj ree.

³⁷ Dxejc räjp Jesú lojreni:

—La'tu coldeed xhi gauurenäj.

Dxejc räjpreni loj Jesú:

—¿Xhixh sajl tiop gayuu meel yätxtiil choisiinu gauu guiraa rebenxhidajlre?

³⁸ Dxejcti räjp Jesú lojreni:

—¿Bal yätxtiil rajptu? Colchahuii.

Che gojnreni balni dxejc räjpreni:

—Gaii yätxtiil, näjza tiop bälj.

³⁹ Dxejcru gunibee Jesú räjpreni loj guiraa rebejn:

—Colcnej xcua-xcuaatu loj guixhaya'.

⁴⁰ Sas gurej xcua-xcuaareni. Yu' lajt gurej tegayurenäj, yu' lajt gurej garol gayurenäj. ⁴¹ Dxejcti cua' Jesú guigaii yätxtiilga näjza guiro'p bäljga, bahuiini xhaguibaa, badeedni xquixhtios loj Dios. Dxejcti gula'ni yätxtiil näjza guiro'p bälj, badeednini loj rexpejnpacni te badeedrenini loj guiraa rebenxhidaalga. ⁴² Dxejc gudajw

guiraareni, gudxaj xque'reni. ⁴³ Dxejcrú ba-tojpreni tzubitiot dxijm guidxadoo yáxtxi näjza bájl ni bia'n. ⁴⁴ Luxh loj guiraa rebejn ni gudajw yu' si'cti gaii mil niguui.

Guzaj Jesús loj nis
(Mt. 14:22-27; Jn. 6:16-21)

⁴⁵ Gunibee Jesús jiu' rexpejnpacni nen canuu, chágajcreni Betsaida, ni tre' dejtz nis stelaad, lalni cagusadiidxni rebejn. ⁴⁶ Che gulujx basadiidxnireni, sääni neñ redane', sanabni lo Dios. ⁴⁷ Cheni acayu' guxhijn, yu' rexpejnpacni neñ canuu galäii nis lal ni suga' Jesús xtebni ro' nis. ⁴⁸ Dxejcti bahuii Jesús abadxajgreni cagusajreni xcanuurenri, sa'csi säbduxh bej. Bejga rulanaarenri nez dejtzreni stehuält. Dxejcrú che acara yääl, gusaj Jesús loj nis, huijni cadro sasajreni, rlazni ninijndni lojreni. ⁴⁹ Dxejcti che bahuiireni sasaj Jesús loj nis, naarenri pet te beñmalni, ni'c guredxa'reni. ⁵⁰ Guiraareni bahuiireni lojni, bidxebduxhreni. Sas gunigajcni lojreni, räjpní:

—Colsutijp lajztu. Laa naräni. Na'c guidxejbtu.

⁵¹ Dxejcti huä'p Jesús neñ canuu cadro yu'reni. Lagajc dxejc biacdxi bej, luxh laarenri bidxeloduxhreni, ⁵² sa'csi direni ni-acbee xhini'c bennäj Jesús reyäxtxiil. Guc najd lajzreni, ni'c direni niacbee.

Basiajc Jesús rebenracxhuu neñ guedx Genesare't
(Mt. 14:34-36)

⁵³ Gudejdreni lo nis, bidzujnreni lo yuj xten Genesare't. Ro'c bacuaduurenri canuu ro' nis. ⁵⁴ Che biriirenri neñ canuu, biembegajc rebejn Jesús, ⁵⁵ dxejcti birii rebejn guideb nejzga. Guslojti siädnäreni beñracxhuu loj Jesús, naga' rebenracxhuuga lo da'. Cadrotis riejin diajgreni yu' Jesús riädnäreni rebenracxhuu. ⁵⁶ Niluxh cadrotis rij Jesús, neñ reguedxbáz, neñ reguedxro, näjza loj rejench, rguixhreni rebenracxhuu cadro rajc guii. Dxejcti rniabreni loj Jesús te gac caanreni xhajbni, niluxh biajc guiralii renani gudajn xhajb Jesús.

Nani runijt lastoo bejn
(Mt. 15:1-20)

¹ Dxejcti refarisee, renani najc benguidoo loj guedx Israel, näjza gaii rebejn ni ruluii leii, renani birii Jerusalén, bidojpreni loj Jesús. ² Bahuiireni cayajw gaii rexpejnpac Jesús, luxh canii rebejn nacdxuudx naarenri (dee sáloj direni quiib naarenri si'ctis ni rdiib naa reben lajdxreni). Ni'cni guniyajreni rexpejnpac Jesús. ³ (Guiraa rebejn xten Israel, näjza refarisee, sasanäj nani baluui rebengool ni yu' guedx Israelreni. Direni gauu palga direni quib naarenri balti huält. ⁴ Che rbi'reni rijreni lo guii, rguibsa'creni naarenri, lojreni, ni'reni, dxejcti rajc rajwreni. Niluxh guyu' xhidajl costumbr ni sasanäjrureni, luxh yu' mood rguibreni rextrastreni näjza rexploorenri, näjza rextrastguiibreni, näjza rexloonreni.) ⁵ Dxejcti gunabdiidx refarisee näjza rebejn ni ruluii leii loj Jesús, räjpreni:

—Xhicuent di rexpejnpacu gun si'cni baluui rebengool, niluxh rajwreni guideb nacdxuudx naarenri?

⁶ Dxejcti gunii Jesús lojreni räjpní:

—¡Ben guijdx! Laaca gunii Isaás xcienttu che guniini xtidx Dios. Scree cajni loj guijtz: Guejdxre sanälajz narä con rextiidxni, niluxh lastoorenri zitro suga' loä.

⁷ Xlia'si ruzuxhijbreni, sa'csi direni chanälajz narä.

Ruluiireni si'c xtiidxpac Dios nani rnii rebejn.

⁸ Rusa'ntu xleii Dios, sasanädzu'tztu costumbr nani baluui rebengool. Rdiba'sc rexplooru, rextrasttu, luxh rujnzatu xhidajlru cos sa' redee.

⁹ Räjpní Jesús lojreni:

—Rusa'ntu xtidx Dios te risanäjtu re-costumbr xtentu. ¹⁰ Sa'csi räjpní Moisés: "Huinälajz xtadlu con xnanlu." Räjpní: "Suju'tpactu nani gudzubde yejc xtadni o yejc xnanni." ¹¹ Niluxh la'tu rnitu sajc gäb bejn loj xtadni o loj xnanni: "Dina gapä xhi cojin gacnääu" (nani sáloj, abadedä guira'ti loj Dios). ¹² La'tu ditu gusaan gunru bejn por xtadni nicla por xnanni. ¹³ Si'c rbälastzu xtidx Dios, te sasanäjtu recostumbr nani ruluiitu, luxh xhidajl cos sa' dee rujntu.

¹⁴ Gurejdx Jesús guiraa rebejn, dxejcti räjpní loj guiraa-reni:

—Colcuadiajg, colyacbee xtidxä.

¹⁵ Rexhicos yälrajw ni rajw bejn, dini gunijt

bejnḡa, rediidx ni rii neñ lastoo bejn, näjza recos ni rujn bejn, ni'c runijt bejnḡa. ¹⁶ Pal yu' chu rlajz guisieed, sucuadajḡni.

¹⁷ Dxejcti gula'reni loj rebenxhidaal, biu'reni neñ yu'. Dxejc gunabdiidx rexpejnpacni loj Jesús xhi sáloj cuent ni guniini. ¹⁸ Basejc Jesús diidx lojreni, rájpni:

—¿La näjza la'tu xheti xcăriejntu? ¿La di'tu gacbee xhtis yälrajw nani ri'u' neñ bejn digaci gunijtni lastoo bejn, ä? ¹⁹ Sa'csi dini jiu' neñ lastooni; riu'ni xque'ni, rdejd-tini.

Si'c guniini te baluuiini guira'ti xhicos najc naya. ²⁰ Dxejc rájpni:

—Rediidx ni rii neñ lastoo bejn, näjza recos ni rujn bejn, ni'c sii runijt lastoo bejn.

²¹ Sa'csi neñ lastoo rebejn rii rexhigabgu-jdx, näjza yälresnäj chäälni, yälresnäj ni xhet najcdi chäälni, yälrugut sa'ni,

²² yälgubaan, yälrlajzni ga'pni xhixhten bejn, yälltsiaj, yälrusgueeni, yäl xheti xtuuy lojni, yäldxechlajz, yälrudzubde sa'ni, yälnayechlajzni, yälguyalajz. ²³ Guiraa reyällatsajre neñ lastoo bejn riireni, luxh reni'csi runijt bejn.

Tej guna Sirofenicia ni bililajz xtidx Jesús
(Mt. 15:21-28)

²⁴ Dxejc biriini ro'c, sääni nez guedx Tiro näjza nez Sidón. Ro'c bia'bnni neñ te yu' sa'csi di rlajzni niacbee rebejn caro yu'ni, miluxh di niajcdi niuxhiga'tztsini.

²⁵ Biengajc diajg te gunaa ro'c yu' Jesús. Xindxape' gunaaga yu' bendxbab neñ lastooni. Bidzujn gunaaga, bazuxhijbni lo Jesús. ²⁶ Gunaaga rnii griegw, najcni ben Sirofenicia. Gunabni lojni guinibeeni guirii bendxbab neñ lastoo xi'nni. ²⁷ Dxejc rájpni Jesús lojni:

—Basaan gauxgaa rebiuux, sa'csi xhet laati gudzucajni xcuxtiil rebiuux te gudeed-nini loj rebä'cw.

²⁸ Dxejc gunii gunaaga, rájpni loj Jesús:

—Yo, Dad. Näjza rebäcue' ni suga' neñ mex rajw nani rtejb ro' rebiuux.

²⁹ Dxejcti rájp Jesus lojni:

—Laaca rniliilu. Huij rolizlu. Abirii bendxbab neñ lastoo xindxape'lu.

³⁰ Luxh che bidzujn gunaare rolizjni, a dxape' naga' lo da'. Gucbegajc gunaaga abirii bendxbab neñ lastoo dxape'ga.

Basiac Jesús te bengop

³¹ Dxejcrū birii Jesús stehuält lo rexuyj guedx Tiro, gudejdni nez Sidón näjza rexuyj Decápolis. Bidzujntini ro' nis xten Galilee. ³² Biädnä gaii bejn te niguii ni nacua't diajgni lo Jesús. Digacdiza guinisa'c niguiiga. Biädnabreni lo Jesús nusujni naani yejc niguiiga. ³³ Dxejcti badzucajnini loj rebejn. Baquitzgajcni rebicueñaani nen diajgni, dxejcrū batiboxhejnni, gudajntini lujdxni. ³⁴ Bahuiini xhaguibaa, bazaaj lajzni, dxejc rájpni:

—Efata! —nani sáloj bixal.

³⁵ Dxejcrū bixalgaçc rediajgni, gubangajc lujdxni, gunisa'cni. ³⁶ Dxejcti gunibee Jesús rutlojdi gäbreni, per che rájpni lojreni si'c, laareni batie'chrurení diidxga.

³⁷ Rdxeloduxhreni, rájpreni:

—Guira'ti laaca rujnni; ruxhalni diajḡ rediagcua't, luxh rusniini regop.

8

Bayaan Jesús tajp mil bejn
(Mt. 15:32-39)

¹ Neñ redxejga bidojp xhidalro bejn, luxh xheti xhigauereni. Dxejc gurejdx Jesús rexpejnpacni ni rinajlni, rájpni lojreni:

² —Rulazlazä rebejnre, sa'csi naj rajc choñ dxej tre'reni loä, luxh xhet yu'di gau-uren. ³ Niluxh palga guxhaläreni rolizreni, xliazreni, sidxajgreni lo nejz; sa'csi yu' renani zijtru siäädreni.

⁴ Dxejcrū rájp rexpejnpacni lojni:

—Caro chaca'nú yätxtiil te cha xque' rebejnre ree, cadro rut rbäjzdi?

⁵ Sas gunabdiidx Jesús lojreni:

—¿Bal yätxtiil rajptu?

Dxejcrū rájpreni:

—Gadjtztsni.

⁶ Gunibee Jesús gurej rebenxhidaalga loj yuj. Sas cua'ní guigajd yätxtiilga, badeedni xquixhtios lo Dios, gula'ni reyätx-tilga. Dxejc badeednini loj rexpejnpacni te guteedrenini loj rebenxhidaal. Bateedtireni yätxtiilga lo rebenxhidaal.

⁷ Rajpzareni gaii bälbäz, dxejcti badedsac Jesús xquixhtios lo Dios, gunibeeni bateedzareni rebälbäzre loj rebenxhidaalga.

⁸ Dxejc gudajwreni, gudxaj xque'reni. Dxejc batojp rexpejnpac Jesús gjadz dxijm reyätx-til näj rebäjl dxuc ni bia'n. ⁹ Niluxh renani gudajwga najcreni si'cti tajp mil bejn. Dxejcti basadiidxnireni. ¹⁰ Biunägajc Jesús

rexpejnpacni neñ canuu, biäädreni nez Dal-manuta.

Gunab refarisee te senro loj Jesús

(Mt. 16:1-4; Lc. 12:54-56)

¹¹ Biääd refarisee, renani najc rebenguidoo loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni. ¹² Dxejcti bazaa lajz Jesús neñ lastooni, räjpni:

—¿Xhicuent rlajz rebejn ni nabajñ naj fii gac resenro xten Dios? Rniliápac lojtu, di rebejn ni nabajñ ñaj fii nicla tej sen xhaguibaali.

¹³ Dxejcti basa'nnirení ro'c, biusacni neñ canuu, sää'tini stelaad nisga.

Levaduuru xten refarisee

(Mt. 16:5-12)

¹⁴ Biallajzreni nica'reni yätxtiil, luxh xhetliidi sanädireni. Tejis yätxtiil nuurení neñ canuu. ¹⁵ Cagulijdx Jesús rexpejnpacni, räjpni lojreni:

—Colsusin, colnati levaduuru xten refarisee, colnatiza levaduuru xten Herodes. (Nalajznu, xtiidxreni najc si'c levaduuru.)

¹⁶ Dxejcti cayeinäj sa'reni diidx xcuent nani gunii Jesús lojreni, dxejc räjpreni:

—Sa'csi dinu jia'p yätxtiil, ni'c rnii scree.

¹⁷ Che gucbee Jesús xhini'c caniirení, räjpni:

—¿Xhicuent rnii: “Sa'csi dinu jia'p yätxtiil”? ¿La gajdtu fii, la gajdtu gacbee? ¿La lałtis nacnajd lastootu? ¹⁸ ¿La yu' balo-jtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj? ¹⁹ Che gula'a guigaii yätxtiil te gudajw gaii mil niguui, ¿bal dxijm yätxtiil biujy batojptu?

Sas räjpreni lojni:

—Tzubitio'pni.

²⁰ —Che gula'a guigajdz yätxtiil te gudajw tajp mil bejn, ¿bal dxijm yätxtiil biujy batojptu?

Sas räjpreni:

—Gajdzni.

²¹ Dxejc räjpni lojreni:

—¿La gajdtu gacbesa'c xhi benä?

Basiajc Jesús te lotiä'p Betsaida

²² Bidzuññäj Jesús rexpejnpacni guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejnga.

²³ Dxejc gunaaazni naa lotiä'pga, gulääñini

nen guejdx. Che batiobxhejnni neñ rebalo-jni, basugajcni naani yejc baloj lotiä'pga, gunabdidxgajc Jesús:

—¿La yu' xhi rhuiilu, ä?

²⁴ Luxh che bahuui bejngä räjpni:

—Rhuiäa sasaj rebejn, luxh si'c yaqg rhuiä lojreni.

²⁵ Basusac Jesús naani yejc rebaloj bejngä. Dxejc bejn Jesús bahuui bejngä. Biajctini, zijtru gujc bahuisa'cni lo guiraa rebejn.

²⁶ Dxejcti baxhal Jesúsni rolizzni, räjpni:

—Basquejn, huijga rolizzlu, na'c jiu'lun guejdx, na'c gäblu xhi gujclu lo rebejn ni yu' neñ guejdx.

Basule' Pedr Jesús najc Crist

(Mt. 16:13-20; Lc. 9:18-21)

²⁷ Birinäj Jesús rexpejnpacni lo reguejdx ni ria'n nez Cesarea xten Filipo. Lałni sasajreni lo nejz räjp Jesús loj rexpejnpacni:

—¿Chuni'c rnii rebejn naçä narä?

²⁸ Sas räjpreni lojni:

—Yu'reni rnii najclu Juan ni batiobnis, yu'zareni rnii najclu Elías, yu'zareni rnii najclu te rebejn ni gunii xtidz Dios.

²⁹ Dxejc räjpni lojreni:

—¿La'tu a'? ¿Chuni'c rnii naçä narä?

Dxejc bazejc Pedr diidx, räjpni lojni:

—Luj najclu Crist.

³⁰ Dxejcti räjp Jesús lojreni:

—Rutlojdi gäbtu chu naçä.

Gunii Jesús xho guetni

(Mt. 16:21-28; Lc. 9:22-27)

³¹ Dxejcti gusloj Jesús caguluiini rexpejnpacni, räjpni:

—Narä naçä Xi'n Dios, ni gujc Niguii. Nanabpac tedä trabajwduxh. Sibälaz rebengool ni najc guxhtis neñ guedx Israel narä, näjza renani rnibee loj rebixhojz, näjza rebejn ni ruluii leii: sugu'treni narä, luxh ni riojn dxej guibansacä lo rebengut.

³² Guyasi guniini rediidvre. Sas huinä Pedr Jesús telaad, dxejc räjpni loj Jesús:

—Na'c guiniilu si'c.

³³ Dxejc batzuré loj Jesús, bahuui loj rexpejnpacni. Dxejc gudilnäjni Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn rebejntis rujnlu.

³⁴ Dxejc gurejdxni rebenxhidaal con reni najc xpejnpacni, räjpni lojreni:

—Palga yu' chu rlajz gac xpenäpac, su-cuääz gunni ni rsia' lajzni gunni, sutedni trabajw si'c tej ni caj lo crujz, su-jiädnejlni narä. ³⁵ Sa'csi nani rlajz guslaa xcälñabajnni, sunijtni xcälñabajnni. Luxh nani runijt xcälñabajnni xcälñasa'c narä, xcälñasa'c xtidxä, siliaapac xcälñabajnni. ³⁶ Xlia' ga'p bejn guiraloj lo quedxliujre palga nitni lo Dios par tejpas. ³⁷ Xhet gacdi gudejd bejn te guibannäjni Dios. ³⁸ Nani guituinäj narä con rextidxä naj, cheni najc rebejn bendojl, narä, Xi'n Dios nani gujc Niguii, situinäázani che jiädnäá reangl xten Dios che jiäläa lo xcälrdimbicha' Xtadä.

9

¹ Dxejc rájp Jesús lojreni:

—Rniliápac lojtu, yu'reni suga' ree nani di guet fixgaareni abiääd xcälñibee Dios.

Gubixhlo Jesús garencia
(Mt. 17:1-13; Lc. 9:28-36)

² Che gudejd xho'p dxej, Jesús cua' Pedr, näj Jacob, näjza Juan, laatisreni huinäni yejc te danro. Ro'c gubixhlojni garencia lojreni. ³ Gusloj rdimbicha' rexhajbni, gujc xhajbni nolbäj. Rut rajcti rusquijtz lajd lo quedxliujre si'c biquijtz xhajbni.

⁴ Dxejc baluiiloj Elías näjza Moisés lojreni, cayuinäjreni Jesús diidx. ⁵ Sas rájp Pedr loj Jesús:

—Dad, laaca dxunnu ree. Naj jiennu chon yuguixa', tejni xtenlu, steeni xten Moisés, steeni xten Elías.

⁶ Si'c guniini sa'csi nicla niacobeni xhini'c guiniini, sa'csi cadxebduxhreni. ⁷ Dxejc biääd te za bejn balaa yejcreni. Neñ zaga biejn xse' te ni rájp:

—Dee najc xi'nä nani sanälazä, colcuadi-aç xtiidxni.

⁸ Che batzuré lojreni, bahuiireni rutru sugaränjti Jesús, xtebtis Jesús suga'.

⁹ Che siädjäjtreni dajnga, gunibee Jesús rut lojdi guiniireni xcient ni bahuiireni, guibañxgaasi Xi'n Dios nani gujc Niguii lo rebengut. ¹⁰ Basälcheereni rediidxre nen lastooren. Dxejcru canabdiidx lo sa'reni xhicha säloj guibansacni lo rebengut. ¹¹ Sas gunabdiidxreni lojni, rájpreni:

—¿Xhicuent rnii remastr xten leii naqui-impac jiädxgaa Elías?

¹² Dxejcti bazejcni diidx lojreni, rájpni:

—Guliirení siädxgaapac Elías, luxh sunsa'cni guira'ti xhi cos. Naj a', ¿xhicuent caj lo guijtz xcient Xi'n Dios ni gujc Niguii, sidejdni trabajwdxh, rutza jiudini? ¹³ Luxh narä rniä lojtu, abiääd Elías, luxh bennäjrenini si'ctis ni rlajzreni, si'cpac ni caj loj guijtz ni rusule' xcientni.

Basiadjc Jesúste biuux ni guyu' bendxbaben lastooni

(Mt. 17:14-21; Lc. 9:37-43)

¹⁴ Che asiäädreni cadro tre' sgaii rexpe-jnpac Jesús, bahuiireni loj xhidalro bejn ni tre' lojreni, luxh cayeinäj rebejn ni ruluii leiireni. ¹⁵ Che bahuii guiraa rebejn loj Jesús, bidxeloduxhreni, baxuñreni, huiye'tzreni xchan lojni. ¹⁶ Dxejc gunabdiidx Jesús lojreni:

—¿Xhini'c rusieinäjtu laareni?

¹⁷ Sas gunii tej reni yu' lo benxhidaalga, rájpni:

—Dad, ree siädnäá xi'nä lojlu, yu' bendxbab neñ lastooni, nani rujn najcni gop.

¹⁸ Cheni rniaaznini, rutienta'ni xi'nä, luxh riduxh bitzun ro'ni, näjza rauya'ni ro'ni, luxh cabijdzni. Aräpä loj rexpejnpaclu cuääreni bendxbagga, niluxh di niajcdi nibäärenimi.

¹⁹ Dxejcti gunii Jesús lojreni, rájpni:

—La'tu, bejn ni di chalilajz, ¿gucli chu'ä lojtu te chalilajtu? ¿Gucli gusieedtu narä? ¡Coltanäni loäl!

²⁰ Dxejc biädnäreni biuuxga lojni. Che bahuii bendxbab lo Jesús, basijnii bi'nga, basälta'tinini lo yuj. Sädiidxni, luxh carii bitzun ro'ni. ²¹ Gunabdiidx Jesús loj xtadni:

—¿Gucli rajcni si'c?

Dxejc rájp dade'ga:

—Che gujclini biuxbäz. ²² Balti huält rusälñini lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnäj nuunu.

²³ Sas rájp Jesús lojni:

—¿Xhicuent rnabdiidxlu la sajc gac-näálu? Xhitis sajc gac par nani rililajz.

²⁴ Guredxa' xtad bi'nga, rájpni:

—¡Rililazä! Gucnäj narä te chalilur lazä.

²⁵ Che bahuii Jesús bixa't xhidajl bejn lojni, gudidxa'ni lo bendxbagba rájpni lojni:

—Bendxbab ni rujn gop, narä canibeä, birii nen lastoo bi'nga. Na'cru chulu nen lastooni.

²⁶Dxejcru guredxa' bendxbag, luxh bas-nibzejsni bi'nga, dxejcru biriini nen las-tooni. Astoo te bengut bia'n bi'nga ro'c. Xhidajl rebejn räjp:

—Agujtni.

²⁷Dxejc gunaaz Jesús naa bi'nga guläs-nini. Guzuliiti bi'nga. ²⁸Dxejcti che abiu' Jesús nen yu', gunabdiidx rexpejnpacni lo-jni:

—¿Xhicuent di niajcdi nibäanu bendx-abga?

²⁹Dxejc räjp Jesús lojreni:

—Di gacdi cuäätu sa' bendxbare palga ditu cuedx-guinab lo Dios, palga ditu gu-cuanxgaa.

Gunisac Jesús xho guetni

(Mt. 17:22-23; Lc. 9:43-45)

³⁰Dxejc birüreni ro'c, gudejdreni Galilee. Luxh di rlajz Jesús niacbee rebejn sade-jdreni nejzga, ³¹sa'csi caguluini rexpejnpacni. Cayäjpnlojreni: "Xi'n Dios ni gujc Niguii sidejdni ladznaa rebejn, niluxh sugu'trenini. Che guiza' choñ dxej gujtni, sibajnni stehuält." ³²Niluxh laareni direni niacbee xhini'c guniini, bidxejbzareni nini-abdiidxreni lojni.

—¿Chuni'c sajcr?

(Mt. 18:1-5; Lc. 9:46-48)

³³Bidzujntireni Capernaum. Che biu'nin en yu' räjpni lojreni:

—¿Xhini'c cagusiejtu lo nejz?

³⁴Dxejc xhet guniitireni, sa'csi laareni ca-gusieinäj sa'reni lo nejz don chuni'c sajcr lojreni. ³⁵Sas gurej Jesús, dxejc gurejdxni guitzubito'p xpejnpacni, räjpni lojreni:

—Palga yu' chu rlajz gasajcr lojtu, sug-acxgaani si'c te nani xhet sajcti, sugunzani xtzuun chutis.

³⁶Dxejcti cua'nii tej biuxbäz, huinänini galäiireni. Dxejc gudäätzni biuxbäzga, räjpni lojreni:

³⁷—Chutis ni gacnäj te rebioxre'sa'csi rinälajzni narä, sacnäjni narä, luxh nani gacnäj narä, xhet naräatis gacnäjtini, näjza xtadä nani baxhal narä racnäjni.

Nani di guiniyaj nuunu, xladnu yu'ni

(Lc. 9:49-50; Mt. 10:42)

³⁸Dxejcti gunii Juan räjpni lojreni:

—Bahuinu lo te bejn ni rbää bendxbab con xcälrnibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

³⁹Dxejc räjp Jesús lojni:

—Na'c gudxoju tu gunni si'c sa'csi bejn nani rujin milagwr con xcälrnibee laä digacdi guiniyagajcni narä. ⁴⁰Nani di guidx-agdijl nuunu, xlaadnu yu'ni. ⁴¹Rniliápac lojtu, chutis ni guniidx te bas nis lojtu sa'csi najctu xpejnpac Crist, siguijx Diosni xcuent nani bejnni.

Nani rujin jiajb bejn lo dojl

(Mt. 18:6-9; Lc. 17:1-2)

⁴²Chutis ni gusiu' tej rebiuixe' ni rililajz narä nen dojl, sugal te guimolin yejnni dxejcti gucuaarenini lo nisdoo. ⁴³Palga tej naalu gun gunlu dojl, batiu'ni: hueenru natijuinglu chaläjzlu cadro yu' Dios quela sojb guiro'p naalu gusälreni luj gabijl, loj bajl ni di jiuii, ⁴⁴cadro diza xpisiujgreni guet, diza bajl jiuii. ⁴⁵Luxh palga tej ni'l gun gunlu dojl, batiu'ni: hueenru natijuinglu chaläjzlu cadro yu' Dios quela sojb guiro'p ni'luxh chäälü gabijl, lo bajl ni di jiuii, ⁴⁶cadro di xpisiujgreni guet, diza bajl jiuii. ⁴⁷Luxh palga tej baloju gun gunlu dojl, gulääni: hueenru chäälü cadro rnibee Dios natäi'p lojlu quela sojb guiro'p baloju chäälü gabijl, ⁴⁸cadro di xpisiujgreni guet, diza bajl jiuii.

⁴⁹'Si'cni rloj sejd yejc xhi cos yälrajw, si'cza guiloj bajl yejc guiraareni. Guilo-jza sejd lo guira'ti ni rdeed bejn lo Dios. ⁵⁰Hueen nadj sejd, luxh palga agudejd yälnadzij yejcni, ¿xho guntu te gacsacni nadzij? Colyajc nadzij la'tu, colguibannäsa'c sa'tu.

10

Baluii Jesús xcuent rälruo'n sa'ni

(Mt. 19:1-12; Lc. 16:18)

¹Dxejcru birüi Jesús ro'c huijni nez Judea näjza nez ro' gueu Jordán stelaad. Ro'c bidojx xhidajl bejn lojni stehuält, sas gus-losacni caguluinireni si'ctis ni ruluiinireni.

²Sas farisee, renani nadj rebenguidoo loj guedx Israel, gubigreni loj Jesús, cag-ula'tzreni Jesús. Ni'c gunabdiidxreni, räjpreni:

—La laaca gun niguii gusaan chäälni, ä?

³Dxejc laani bazejcnii diidx, räjpni lojreni:

—¿Xhini'c gunibee Moisés guntu?

⁴Dxejcru räjpreni:

—Moisés basaan gudeedni te guitz gusaan chäälni che guro'nnini.

⁵Dxejc Jesús räjp lojreni:

—Sa'csi guyaa lajztu, ni'cni bacuua Moisés diidxga lojtu. ⁶Niluxh che birixtiej beñ guedxliuj, “niguii con gunaa benchee Diosreni.” ⁷“Ni'cni te niguii siriini loj xtdadni, loj xnanni te cuäznäjni chäälni. ⁸Niluxh renani gujc tiop bejñ sajcreni si'c tejsi bejñ”, dirureni gac tiop bejñ, si'c tejsi bejñ gacreni. ⁹Na'c gudzucaj bejñ lo sa bejñni nani abachaag Dios lo sa'ni.

¹⁰Che biu'reni nen yu' gunabidxsac rexpejnpacni lojni xcuent rediidxre. ¹¹Dxejc räjpni lojreni:

—Chutis niguii ni gusaan chäälni, sas guchnaani ste'cani, rujnni dojl. ¹²Niluxh palga gunaa guro'n chäälni sas guchnaani ste'ca niguii, rujnzani dojl.

*Gunab Jesús gunle' Dios yejc rebiuxbäz
(Mt. 19:13-15; Lc. 18:15-17)*

¹³Biädnäza rebejñ biuxbäz lojni te gutzuub Jesús naani yejcreni, sas gudidxa rexpejnpacni lojreni. ¹⁴Che bahuui Jesús xhi cayujn rexpejnpacni, bidxe'chni räjpni lojreni:

—Colsaan jiääd rebiuxbäz loä. Na'c gudxoointureni, sa'csi xcälrnibee Dios najc xten reni najc nadolajz si'c najc biuxbäz. ¹⁵Rniliäpac lojtu, chutis ni rlajz jiu' lo xcälrnibee Dios nanab guzobdiajgreni xtidx Dios si'c ruzobdiajg rebiuxe' xtidx xtdadreni. Palga dini gun si'c, dini jiu' lo xcälrnibee Dios.

¹⁶Dxejcti gudäaz Jesús rebiuxbäz, bazu-jzani naani yejcreni, gunab Jesús gunle' Dios yejcreni.

Te bi'n ni rapduxh guninäj Jesús

(Mt. 19:16-30; Lc. 18:18-30)

¹⁷Che birii Jesús loj xnejzni, ruxun te niguii biääd lojnu, bazuxhjbnii. Dxejcti gun-abdiidx niguiiga lojni räjpni:

—Dad, bensa'c, xhini'c gunä te xca'ä yälhabajñ par tejpas?

¹⁸Sas räjp Jesús lojni:

—*Xhicuent rniilu loä bensa'c?* Tejtisni najc bensa'c; Diostis najc bensa'c. ¹⁹Najnlu xhini'c gunibee Dios gunni: “Na'c gues-näjlu chäälni sa'lü, na'c ju'tlu, na'c cuanlu, na'c gusgueelu chutis, na'c cuääu yejx xhixten sa'lü, huinälajz xtdadlu, xnanlu.”

²⁰Dxejc räjp niguiiga lojni:

—Dad, guiraa redee cayunä cheni gucäli bi'n.

²¹Che bahuui Jesús lojni, huinälajznni, räjpni lojni:

—Tejtis nani cayäädx gunlu. Huij, huito' guiraa xhixtenlu, badeed xcentuni loj rebejñ nani diga'p, dxejcti guniidxs Dios xhidalj xhi ga'plu xhaguibaa. Gudanajl narä, mase tedlu trabajw.

²²Dxejc che biejn diajgni diidxre, guch-huin lajzni, xhet laadi yu'ni siini, sa'csi naclenduxh xhixtenni yu'.

²³Dxejc bahuui Jesús guideb gabi lojreni, räjpni loj rexpejnpacni:

—Naganduxh jiu' rebejñ nani yu'duxh xhixtenni lo xcälrnibee Dios.

²⁴Dxejc bidxelö rexpejnpacni che biejn diajgreni rextiidxni. Dxejc räjp Jesús lojreni stehuält:

—Aiitu xi'nä!, lacti naganduxh gusaan renani sanälajz xhixtenni guinibee Dios-reni. ²⁵Guyasiru ted te cameii ni' te guux quela gusaan te bejñ ni yuduxh xhixtenni guinibee Diosni.

²⁶Dxejc bidxeloduxhreni, räjpreni lojni:

—*¿Chuxhni'c sajc laa lo dojl?*

²⁷Dxejc bahuui Jesús lojreni, räjpni:

—Bejñ digacdi guslaa sabejnni, Diostis rajc ruslaa bejñ lo dojl, sa'csi Dios rac rujn guira'ti.

²⁸Sas gusloj Pedr cayäjp lojni:

—Naj nuure ahuilälaznu guira'ti te siop-najlnu luj.

²⁹Dxejc räjp Jesús:

—Rniliäpac lojtu, chutis nani cuälaz rolijzni, rebejtzni, rebisiajnni, xtdadni, xnanni, chäälni, rexí'hni, rexyujni, xcälñasa'c narä, näjza xcälñasa'c xtidx Dios, ³⁰sica'ni lo guedxliujre te gayuu huält xhidaljru. Sica'ni rolijzni, rebejtzni, rebisiajnni, xnanni, rexí'hni, rexyujni. Sisiunajlrenini naj, dxejc xhaguibaa sica'ni yälñabajñ par tejpas. ³¹Xhidalj rebejñ nani sajc lo guedxliujre xhet sajcdireni xhaguibaa; niluxh rebejñ nani xhet sajcdi lo guedxliujre, xhaguibaaru gasajcreni.

Gunisac Jesús diidx xho guetni

(Mt. 20:17-19; Lc. 18:31-34)

³²Dxejcru sasaj Jesús, njidni lo rexpejnpacni sääreni Jerusalén, luxh cadxelojreni. Cadxejbza rebejñ nani sanajlreni. Dxejcti gulásac Jesús rexpejnpacni lo rebejñ, gusloj cayäjpni lojreni guira'ti nani sacni. ³³Räjp Jesús:

—Sionnu Jerusalén, luxh narä, Xi'n Dios nani gujc Niguii, sidedä ladzñaan rebix-hojz nani rnibee näjza rebejn ni rului leii. Luxh sinibeereni guetä. Suteedreni narä lo rebenzijt nani digac xpejn Israel.³⁴ Suxhisnäjreni narä, siguijreni narä, sutiobxhejnziareni loä, dxejcru sugu'treni narä. Che riojn dxejc sibañsacä.

*Gunab Jacoob näjza Juan te yälñasa'c
(Mt. 20:20-28)*

³⁵ Dxejcti gubig Jacoob näjza Juan, rex'i'n Zebedeo, räjpreni lojni:

—Dad, rlaaznu gunlaalu nani guiniabnu lojlu.

³⁶ Dxejc räjp Jesús lojreni:

—¿Xhini'c rlajztu gunä xcuent la'tu?

³⁷ Räjpreni:

—Cue tejnu cuä'l lu ladbee, xteenu cue cuä'l lu labdbäjgw che acanibeelu.

³⁸ Dxejc räjp Jesús lojreni:

—Ditu gan xhini'c rniabtu. ¿Xhixh sajc yätu nani yä'ä? ¿Xhixh sajcza guirobnistu si'cni guirobnisä? Nalajznu, xhixh sajc teditu trabajw nani tedä narä.

³⁹ Sas räjpreni lojni:

—Sajc tednuni.

Dxejc räjp Jesús lojreni:

—Guliini sajc yätu nani yä'ä, luxh guirobnistu si'cni guirobnisä narä.⁴⁰ Te cue tejtu ladbee xtenä steeetu cue xladbägwä, xhet xtenä dini te gunidzäni. Rebejn nani agule Dios, reni'c cue xladbeä, xladbägwä.

⁴¹ Luxh che biejn diajg stzuureni bidxe'chreni loj Jacoob näjza loj Juan.⁴² Sas gurejdix Jesúreni, räjpni lojreni:

—La'tu najntu renani rnibee lo rebejn nani digac xpejn Israel, rdxaglajz gasajcrureni lo rebejn. Luxh rebejn ni sajc rnibeduxhreni lo rebejn.⁴³ Xhet si'cdi guntu la'tu. Chutis nani rlajz gasajcrureni lojtu, riäjl gacni mos lojtu.⁴⁴ Luxh chutis la'tu nani rlajz gasajcrureni, riäjl gacni xmos guiraatu.⁴⁵ Di Xi'n Dios ni gujc Niguii niääd, te ga'ptisni mos, biäädzani te quiixni con xcälnabajnni te laa xhidajl bejn lo dojl.

*Basijac Jesús Bartimeo, ni natiä'p lojni
(Mt. 20:29-34; Lc. 18:35-43)*

⁴⁶ Dxejcti biäädreni Jericó. Che birii Jesúros ro' guredx Jericó con rexpejnpacni näjza rebenxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabääni gojn.⁴⁷ Che biejn diajgn laa Jesús ni siääd

Nasare't ni sadejd ro'c, guslojni rbedxa'nii, räjpni:

—Jesús, xi'n David, balazlajz narä.

⁴⁸ Xhidajlreni gudidxa' lojni, te jiäuu ro'ni. Dxejc laani dipru rbedxa'nii räjpni:

—Xi'n David, balazlajz narä.

⁴⁹ Dxejc guzudxi Jesús, gunibegajcni gucrejdx niguiiga.

Gurejdixreni lotiä'pga, räjpreni lojni:

—Basutijp lajzlu, gusulii, luj cabejdxni.

⁵⁰ Sas rolcä xhablajzni gudixhni, huisulini, biäädtini lo Jesús.⁵¹ Dxejc räjp Jesús lojni:

—Naja', ¿xhini'c rlajzlu gunä?

Dxejc räjp lotiä'pga loj Jesús:

—Dad, rlazä gunlu fiä.

⁵² Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuiini. Sanajltini Jesús lo nejz.

11

Biu' Jesús Jerusalén

(Mt. 21:1-11; Lc. 19:28-40; Jn. 12:12-19)

¹ Cheni sadzujnreni gajxh Jerusalén, gudejdreni nen reguedx Betfagé näjza nen guedx Betania nez cuä' dajne' ni laa dan Oliib. Baxhal Jesús tiop xpejnpacni,² räjpni lojreni:

—Colchäj guedxe' ni ria'n nez lojtu. Che guidzujntu ro' guejdxga, sidxältu te bure' ni caduu. Gajd bejn cuibni. Colxhecni, coltanägajcni.³ Palga yu' chu naa lojtu: “¿Xhicuent rujntu si'c?” Colye'tztis: “Dad caquüinni.” Dxejc suxhalgajcni bure'ga ree.

⁴ Säätireni ro'c. Dxejcru ronejz bidxälreni te bure' caduu ro' te lä'. Dxejcti baxhreni.⁵ Gaii bejn ni tre' ro'c räjp lojreni:

—¿Xhicuent caguxhectuni?

⁶ Dxejc räjpreni loj rebejngä si'cni räjp Jesús lojreni gäbreni. Basangajc rebejngä sanäreni bure'ga.⁷ Dxejcru biäädnäreni bure'ga loj Jesús. Badzuubreni xhablajzreni dejtz bure'ga. Gubijbti Jesús bure'ga.⁸ Xhidajlza bejn gudixh xhablajzreni lo nezyuj, sgaiirení gudi'ch balajg lo reyajg te gudixhreni lo nezyuj.

⁹ Rebejn ni nijd lojni näj reni sanajl dejtni guredxa'reni, räjpreni:

—Colguiliä'p xpala'nni! Coldeed xquixhtiooz loj Dios sa'csi baxhalni nani siääd xcuentni.¹⁰ Coldeed xquixhtiooz loj Dios

sa'csi agubiré xcälrnibee toxtadnu David.
¡Colguliä'p xpala'n Dios ni yu' jiaro!

¹¹ Dxejcti biu' Jesús nen guedx Jerusalén. Biu'zani nen guidoro. Che bahuii Jesús guira'ti ni cayajc nenga, sanäni guitzubitio'p xpejnpacni, sääreni Betania sa'csi agudxej.

Batzubde Jesús yejc te yagiigw ni xhet cajdi lojni

(Mt. 21:18-19)

¹² Che bara yääl, biunejzreni Betania. Dx- ejcti gusloj calaan Jesús, ¹³ bahuiini zift sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajtis caj lojni, sa'csi xhet xtiempdi iigw dxejc. ¹⁴ Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.

Biejnza diajg rexpejnpacni.

Gulää Jesús renani ruto' näj renani rsii nen guidoor

(Mt. 21:12-17; Lc. 19:45-48; Jn. 2:13-22)

¹⁵ Dxejcti bidzuñsacreni guedx Jerusalén. Biu' Jesús nen guidoro. Gusloj cabäani renani ruto' näj renani rsii nen guidooga. Niluxh batiejxhni remxmex renani ruchaa meel, näjza reyagxhil xten renani ruto' paloom. ¹⁶ Diruni nusaan nidednäjreni xhicos nez nen guidooga. ¹⁷ Dxejc cagului- inireni, räpgajcni lojreni:

—¿La et screedi caj loj guijtz? “Xyu'äシリ
ilaj yu' cadro rrinab guiraa rebenguedxliuj
lo Dios.” La'tu abejntuni si'c xpiliää
gubaan.

¹⁸ Rebixhojz ni rnibee näjza remastr xten leii biejn diajgreni nani gunii Jesús. Sas gudiilreni xho ju'trenini, sa'csi rdxejbreni Jesús, sa'csi guiraa rebejn rdxeloj rextidx Jesús. ¹⁹ Che biu' guxhijn, birii Jesús gue- jdxga.

Gubijdz yagiigw ni bidzubde

(Mt. 21:20-22)

²⁰ Che bara yääl gudejdreni, bahuiireni agubijdz guideb yagiigw, näj rexlobaani.

²¹ Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcni, agubijdzni.

²² Dxejcti gunii Jesús räjpni lojni:

—Colchalilajz Dios. ²³ Rniliäpac lo- jtu, chutis nani gäb loj dajnre: “Gubicaj,

bitejb loj nisdoo”, luxh dini guntio'p la- jzni, chalilajztisni scree gac nani guniini, sajcpac nani guniini. ²⁴ Ni'cni rniä lojtu, xhitis nani guiniabtu lo Dios che rrinäjtun, colchalilajz xca'tuni, dxejc sica'tuni. ²⁵ Luxh che guiniabtu Dios, palga yu' chu loj rdxechlajtu, colsiäjlza lajztu, te näjza Xtadtu nani yu' xhaguibaa gusiäjlza rexo- jltu. ²⁶ Palga ditu gusiäjl lajztu con resa'tu, diza Xtadtu nani yu' xhaguibaa gusiäjl la- jzni rexojltu.

Yälrnibee xten Jesús

(Mt. 21:23-27; Lc. 20:1-8)

²⁷ Sas bidzuñsacreni guedx Jerusalén. La- ni sasaj Jesús nen guidoro, rebixhojz nani rnibee, näjza rebejn ni ruluii leii, näjza reguxhtis gubig lojni. ²⁸ Räjpreni lojni:

—¿Xhi yälrnibee rajplu, ni'c rujnlu redzuunre? ¿Chu baniidx yälrnibee rujnlu redzuunre?

²⁹ Dxejc räjp Jesús lojreni:

—Guiniabdidxäza lojtu. Coltu'ni loä, dxejcti guiniäza xhi yälrnibeere rapä ni'c runä redzuunre. ³⁰ ¿Chu baxhal Juan ni batiobnis? ¿La Dios o la rebejn? Colnii loä naj.

³¹ Dxejcti gunii loj sa'reni, räjpreni:

—Palga jie'tznu “Dios”, naani “¿xhicuent diitu nililajz xtiidxni?” ³² Diza niacti näjbreñi “rebejn” sa'csi rdxejbreni rebeñxhidaal, sa'csi guiraa rebejn huililajz Juan gujc te bejn ni guniipac xtidx Dios.

³³ Dxejcti guniireni, räjpreni loj Jesús:

—Dinu guidon.

Sas räjp Jesús lojreni:

—Dizana guiniä xhi yälrnibeere rapä runä redzuunre.

12

Te xcient rebenguijdx ni rbäzlaa

(Mt. 21:33-46; Lc. 20:9-19)

¹ Dxejcti gusloj caguseed Jesús rebejn con recuent ni ruluii, räjpni:

—Yu' te bejn bazuj yaguub loj xyujni, bejnzani bazaani, dxejcrú gudänni te lajt cadro jiä't uubga. Dxejcti bejnni te yu' jiaa, te ro'c cue nani ga'p lo xyujni.

—Badedlaatinini loj gaii bejn, sä'tini zift.

² Che bidzuñ xpäii uub, baxhal baxhuuan uubga te xmosni loj rebejn ni rbäzlaa ro'c, te xca'ni uub nani riäjl xca' bejngi.

³ Dxejc rebejn ni rbäzlaa ro'c gunaazreni

mosga, gudijnrenini, luxh bazejcrenini si-ini ganaxni. ⁴ Dxejcru baxhal baxhuaanga stee mos lojreni. Niluxh laareni bacuaareni guijni, gudilguijdxreni yejc mosga, xho rni-ajni gubi'ni. ⁵ Dxejc baxhal bejnga stee mos, dxejc bagu'trenini. Baxhalni xhidajlrureni. Gaii gudilguijdxreni, sgaiini bagu'treni.

⁶ Yu'za tejtis xi'nni, luxh sanälajznini. Por lult näjza xi'nni baxhalni, naani: "Siucareni xi'nä." ⁷ Dxejc rebejn nani rbäzlaa ro'c rájp loj sa'reni: "Dee najc laa ni jian-näj ree. Coltaa, guigu'tnuni, te xca'nu yujre." ⁸ Sas gunaaazrenini, bagu'trenini. Guläätireni lo yujga.

⁹ ¿Xhicha gun baxhuaan yaguubga rebejnre? Siäändi luxh sugu'tni rebejnre, dxejcti gudeedni yujga loj ste'ca bejn.

¹⁰ ¿La gajdut gol guijtz ni rnii scree? Guij nani guläcaj renani runchee yu', ni'c agujc mastr ni guzuj galoo.

¹¹ Dad xtenuu bejn scree, cos sacduxhni nezlojnu.

¹² Dxejc rlajz reguxhtis nani bacuadiagj cuentre niniaaz Jesús, sa'csi gucbeereni laareni cacuua Jesús diidxre. Sa'csi bidxejbreni rebenxhidaal, ni'c basa'nrenini, sä'tireni.

Diidx xcuent reimpost

(Mt. 22:15-22; Lc. 20:20-26)

¹³ Dxejcti baxhalreni gaii xpejn refarisee näjza gaii xpejn Herodes loj Jesús te gula'tzreni don xho gac guiniaazreni Jesús.

¹⁴ Dxejcti biäädreni, rájpreni lojni:

—Dad, nadonnu luj najclu te bejn ni rnili. Par luj guiraasi bejn sajc tebloj, sa'csi dilu fii la sajc bejn o la xhet sajcdi bejn. Luu ruluiipacla xhini'c rlajz Dios gun bejn. ¿La laaca quiix bejn reimpost lo xcubieer César o la xhet laadi? ¿La guidiixnu o la dinu guidiix?

¹⁵ Dxejcti laani gucbegajcni rujnsiren si'cni rniabdiidxreni. Räjpni lojreni:

—¿Xhiquent runnäjtu narä scree? Coltanä te meelga loä, te fiä lojni.

¹⁶ Badeedtireni te meel lojni, dxejc rájpni lojreni:

—¿Chu yejc caj lojni, chu laj caj lojni?

Dxejc rájpreni:

—Xten César.

¹⁷ Dxejc rájp Jesús lojreni:

—Coldeed nani najc xten César loj César; coldeedza nani najc xten Dios loj Dios.

Baschelojni rebejnga con xtiidxní.

Yälrnabiidx xcuent yälrbansacni lo rebengut

(Mt. 22:23-33; Lc. 20:27-40)

¹⁸ Sas biädhuii resaducee loj Jesús. Resaducee najc rebejn nani rnii di rebengut guibansac. Dxejc gunabdiidxreni lojni, rájpreni:

¹⁹ —Dad, xleii Moisés rului loonu, palga guet te niguii luxh gusa'nni chäälni ruti xi'nni, nanabpac xca' bejtzni chäälni, te chu xi'nni con laani lacua niu' xi'n tobezjtni. ²⁰ Guyu' gajdz niguii, bejtz najcreni. Sas cua' niguiigalooga chäälni. Che gujtni ruti xi'nni. ²¹ Dxejcti cua' ni rojpga gunaaga. Che gujtni, rut gajcdi xi'nni. Si'cza gusajc ni riojngá. ²² Si'cza guläznäj gunaaga guigajdzreni. Per nicla tej reni di xi'nreni niu'. Dxejcti gujtz gunaaga. ²³ Guigajdzreni guläznäjreni gunaare. Cheni guibansacreni lo rebengut, ¿chu chääl gacni?

²⁴ Dxejc bazejc Jesús diidx lojreni, rájpni:

—Et laadi rniiitu, sa'csi ditu gumbesa'c rextidx Dios nani bacuua reniguii lo guijtz, dizatu gumbee yälrnibee xten Dios. ²⁵ Che guibansacreni loj rebengut, direni guchnaa, rutza gudeedtireni te guchnaareni. Niluxh sajcreni si'c najc rexangl Dios nani yu' xhaguibaa. ²⁶ Palga canabdiidxtu la rbansac rebengut, ¿la di lajztu guisaj bíltu guijtz ni bacuua Moisés? Moisés bacuua nani gunii Dios lojni nen bajl, rájpni: "Narä nacä Xtios Abraham, Xtios Isaac, Xtios Jacoob." ²⁷ Palga Dios najc Xtios rebejnre, direni gac bengut, nabañnjreni Dios. Et laadi najc xhigabtu.

Yälrnibee ni sajcru

(Mt. 22:34-40)

²⁸ Dxejcru bidzuijnej rebejn ni najn leii, biejn diajgni xhi canaireni, biejnza diajgni laaca gunii Jesús lojreni. Dxejcti gunabdiidxni loj Jesús:

—¿Xhi mandamient sajcrú lo guiraareni?

²⁹ Dxejc rájp Jesús lojni:

—Mandamient nani sajcrú loj guiraareni najc dee: "Bacuadiagj luj, gueidx xten Israel, Dad Xtiosnu, Dad tejtis najcni.

³⁰ Chanälajzlu Dad Xtioslu guideb lastoolu, näj xaimlu, näj guideb xcäriejnlu, näjza guideb xcälnadiplajzlu." ³¹ Sigajcza najc mandamient ni rojpga: "Huinälajz sabejnlu

si'ctis sanälajzlu lagajc luj." Redee najc remandamient nani sajcr loj guiraareni.

³² Dxejcti räjp bejngna ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani. ³³ Luxh sacduxh chanälajz bejn Dios guideb lastooni, näj xcäriejnni, näja xaimni, näj guideb xcälnadiplajzni, luxh chanälajzni resabejnni sigajc laani. Redee sajcr loj ni rujn bejn che rudeedreni gojn lo Dios.

³⁴ Che bahuii Jesús laaca guniini, räjpni lojni:

—Guxii cayäädx te jiu'lloj xcälrnibee Dios.

Sas rutru biajxhdì gunabdiidx loj Jesús.

Chu xi'n najc Crist

(Mt. 22:41-46; Lc. 20:41-44)

³⁵ Che caguseednì Jesús nen guidoro, räjpni:

—¿Xho mood rnii rebejn ni najn leii Crist najc xi'n David? ³⁶ Sprit Dyan xten Dios basnii David che bacuaani:

Räjp Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

³⁷ Palga lagajc David räjp: “Dad, xtenä”, che guniini xcient Crist, ¿xhoxh najc Crist xi'n David?

Rebenxhidaal nani yu' guejdxga bacuaadiagsa'creni xtiidxni.

Gule'c Jesús xquej remastr xten leii

(Mt. 23:1-36; Lc. 11:37-54; 20:45-47)

³⁸ Lañni caguseedni rebejn, räjpni lojreni:

—Colsusin, na'c gu'chtu loj rebejn ni rului leii. Laarenri rlajz sanäj reladsiool xtenreni. Rdxaglajzreni rnii bejn lojreni nez lo regui. ³⁹ Rlajzzareni cuereni cadro rbej renani sajcru nen reguidoo näja cadro ru' relanij. ⁴⁰ Rudzucajzareni xhixten rebiuud, rnii zareni xhidalduxh diidx che rolreni le', te rusäuurenloj rebejn. Castigwroru gac redee.

Gojn xten te biud proob

(Lc. 21:1-4)

⁴¹ Dxejcti gurej Jesús cuä' caj cadro rusäl bejn gojn. Cahuiini cagusäl rebejn meel nen cajga. Xhidajl reni rajp cagusäl xhidajl meel nenga. ⁴² Che biääd te biud proob, basälni tiop melbäz ni sajc si'cti tej cantaab. ⁴³ Dxejcru gurejdx Jesús rexpejnpacni, räjpni lojreni:

—Rniliäpac lojtu, biud proobre basäl xhidajlru lo guiraa renani basäl nen cajre,

⁴⁴ sa'csi guiraareni abasäl che'nsi xhixtenreni. Luxh gunaare basäl guiraa nani räjpni. Ni'ctis najc nani gaunäjni.

13

Gunii Jesús sibjl guidoo

(Mt. 24:1-2; Lc. 21:5-6)

¹ Cheni sariireni nen guidoro, räjp tej rexpejnpacni lojni:

—Dad, bahuii lacti reguij, lacti reyu'.

² Dxejcti räjp Jesús lojni:

—¿La rhuiilu loj reyu're? Nicla tej guij dijia'n dzuub yejc sa'ni, guiralireni sire'ch.

Recos ni gac che ameer nitloj quedxliuj

(Mt. 24:3-28; Lc. 21:7-24; 17:22-24)

³ Dxejcti sobga' Jesús yejc dajne' ni laa dan oolib, cahuiini nez ro' guidoo. Che sugaxhtebreni, gunabdiidx Pedr näj Jacob näjza Juan näjza Andrés lojni, räjpreni:

⁴ —Gunii loonu, ¿guc gac dee? ¿Xhi guihuui te gacbeenu asiäddzungajxh soob guiraa rediidxre?

⁵ Dxejcti gusloj gunii Jesús lojreni, räjpni:

—Colhuii, te rut gusgueedi la'tu, ⁶ sa'csi xhidalduxh bejn jiääd con laä, gäbreni: “Narä nacä Crist”, luxh rniisireni si'c, susgeezareni xhidajl bejn.

⁷ Che jiejin diajgtu yu' guer näj yälnadxeeb xten guer, na'c guidxejb. Nanabpac gacni; et dxejcdi nitloj quedxliuj. ⁸ Säjs nación yejc sanacionni, näj yälrnibee yejc sayälrnibeeni. Xhidajl lajt sajc xu, siliaanza bejn, luxh säjs rebejn yejc sa'ni. Redee najc ni guisloj guidxejb, gachuinza lajzn.

⁹ Dxejcti la'tu colsusin sa'csi suteedreni la'tu ladznaa reguxhtis, siguijnareni la'tu nen reguidoo. Sacrejdxtu lo regubieer näjza loj rebejn xcälnasa'c narä, te si'c gac guinii txdixä lojreni. ¹⁰ Nanabpac guirechxgaa txdix Dios loj guiraa reben quedxliuj. ¹¹ Che guiniaazreni la'tu, che chanäreni la'tu loj reguxhtis, na'c gunxgaatu xhigab xhi diidx guiniit. Colnii nani jiäjttis yejctu dxejcti, sa'csi xhet la'ditu ni guinii, Sprit Dyan xten Dios ni guinii.

¹² Luxh suto' bejn lagajc bejtzni te guet bejtzni. Suto'za dad lagajc xi'nni. Säjs rebiuux yejc rexcusajnni te guet reguzajngia. ¹³ Sidxechljaz guiraa rebejn lojtu sa'csi najctu xpenä; nani ted guiraa retrabajwre, ni'c gudeen Dios xcälnabajnni.

¹⁴ 'Che fiitu loj nani najc yälrdxechlajz, nani najc yälrunlitoj, nani gunii Daniel ni gunii xtidx Dios. Che fiitu nani suga' cadre di nunyäjl suuni, dxejcti suguxuñ renani yu' nez Judea chääreni nez neñ redajn. (Nani goł guijtzre sugacbeenini.) ¹⁵ Bejn nani suga' yejc yu' na'c jiätni jiu'ni neñ te yu' xca'ni gaii xhixtemni. ¹⁶Nani yu' loj niaa, di gal jiäjt te xca'ni xhablajzni. ¹⁷¡Aii! Xhiza nalaas chu regunaa ni nuu bätz, luxh renani rusiä! xi'nni, neñ redxejga. ¹⁸Colnab loj Dios na'c sanctu scree neñ rebäinajl. ¹⁹Neñ redxejga su' trabawduxh, nani gajd chu che benccheeli Dios quedxliuj, luxh diruni chu, dxejctis chuni. ²⁰Paru di Dad gusia'tz redxejga, nicla tej bejn di laa. Susia'tzni redxejga sa'csi sanälajzni rexpejnni nani agulen.

²¹Dxejc palga yu' chu naa lojtu: "Colhuii, aree Crist", o "Colhuiire, ani suga' rec", na'c chalilajztuni. ²²Sal'sci su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueereni, te palga sajcn, rlajzreni gusgueelireni renani agule Dios. ²³Ni'cni la'tu colsusin; agunixaä lojtu guira'ti ni gac.

Xho gac che jiääd Xi'n Dios ni gujc Niguii
(Mt. 24:29-35, 42-44; Lc. 21:25-36)

²⁴ Neñ redxejga, cheri luux retrabajw-duxhga, sicäj lo gubjidx, luxh diru bäii gusanij. ²⁵Sitejb rebalxhaguibaa, sinibsejs recos nani nasnäj rebalxhaguibaa. ²⁶Dxejcti suhuii rebejn loä, Xi'n Dios nani gujc Niguii, siälä neñ reza guideb yälrnibeduxh xtenä, näjza xcäldimbicha'ä. ²⁷Dxejcti guxhalgacä rexanglä jiätojpreni renani guleä guideb lo quedxliuj, cat nalooli quedxliuj näjza cadre nalooli guibaa.

²⁸'Colguiseed nani ruluii yagiigw. Cheni rii rebäte' lojni luxh che rcaj balajg lojni, acaxhnajntu bäii gusguj asadzungajxh. ²⁹Sigajza, che fiitu acayajc recosre, sacbeetu asiädgaxhä, ameer guidzunä. ³⁰Rniliápac lojtu, rebejn ni nabajn dxejc, direni nitloj, fixgaareni gac recosga. ³¹Sinitloj guibaa näjza quedxliuj, rextidxä di nitloj.

³²'Naj, rut najndi guc gac recosga, nicla rexangl Dios ni yu' xhaguibaa, niclaza narä Xi'n Dios, Xtadätis najn.

³³Colhuii, colsusin, colnab loj Dios, sa'csi ditu gan guc guidzujn redxejga. ³⁴Dee najc si'c najc te bejn ni birii sää zift. Che gajdlini guirii, badeedni xtzun rexmosni, luxh gu-nibeezani susin nani canäj rolä'. ³⁵Si'cza colsusin, sa'csi ditu gan guc jiääd baxhuaan yu'ga, la jiäädni gudxej, o la jiäädni garol yääl, o la cäjy, o la jiäädni rsil. ³⁶Colsusin, te di guiga'tu nagayejstu che guidzujnni. ³⁷Rediidx nani rniä lojtu, loj guiraa rebejn rniäni: colsusin.

14

Ruchaagreni diüdx te guiniaazreni Jesús
(Mt. 26:1-5; Lc. 22:1-2; Jn. 11:45-53)

¹Riäädxi tiop dxej guidzujn lanij, dxej ni ruzaa lajzreni gulaareni ladżnaa reEgipto. Neñ redxejga rajwreni yäxttil nani di saguij. Rebixhojz nani rnibee neñ guidoo xten rexpejñ Israel näj rebejn ni ruluii leii rlajzreni niniaazreni Jesús con yälrusguee, te nugu'trenini. ²Dxejcti räjpreni lo sa'reni:

—Na'c ijiennu scree neñ redxelanij, te na'c gun benguejdx biejy.

Te gunaa ni basäl se't yejc Jesús Betania
(Mt. 26:6-13; Jn. 12:1-8)

³Yu' Jesús Betania, rolijz Simón, nani guyu' guejch ni ral tiejxhni. Che sobga'ni lo mex, biääd te gunaa ca' te bo'tgуй yu' set-nard nenni. Rlianexhduxhni, sacduxhni. Dxejc gudi'chni yejn bo'tgуйja, te basälni se'tga yejc Jesús. ⁴Yu'za gaiireni ro'c ni bidxe'ch, räjp loj sa'reni:

—¿Xhicuent banijtni setnejxhga? ⁵Paru nido' se'tga, nijni si'cti chon gayuu denar, te nica' meelega rebejn ni xhet rajpdi meal.

Luxh caguidxa'reni loj gunaaga.

⁶Dxejc räjp Jesús lojreni:

—Colsaanni, ¿xhicuent rudxojntu nani cayujn gunaare? Cos sacduxh dee bennäjni narä. ⁷Guideb ni guibajntu, su' rebejn nani xhet rajpdi lojtu, luxh che rlajztu sajc gacnäjttureni. Narä et xchejdi chu'ä lojtu. ⁸Gunaare abejnni nani gujctis bejnni. Abaslanexhxgaani tiexhä, te chää tiexhä neñ baa. ⁹Rniliápac lojtu, cadrotis guidzujn xtidx Dios, guideb lo quedxliuj, sinizareni xcuent nani bejn gunaare, te guinaj lajzreni gunaare.

Rlajz Judas guto' Jesús
(Mt. 26:14-16; Lc. 22:3-6)

¹⁰ Dxejcti huij Judas Iscariot, nani najc tej retzubitio'p xpejnpac Jesús, loj rebixhojz nani rnibee te guuto'ni Jesús lojreni. ¹¹ Che biejn diajg rebixhojz xtiidxni, bibalajzreni. Räjpreni sudeedreni meeñ lojni. Dxejcti caguuiil Judas xho guuto'ni Jesús.

*Gudauxchej Dad con rexpejnpacni
(Mt. 26:17-29; Lc. 22:7-23; Jn. 13:21-30; 1Co.
11:23-26)*

¹² Biu'ti xmaan che rajwreni yättxiil ni di saguij. Dxej lanijga, rugu'treni xiiil, te ruzaa lajzreni dxej ni gualaareni ladzqaa reEgipto. Räjpr Rexpejnpacni loj Jesús:

—¿Caro rlajzlu chosucheenu te gauulu nadxej, dxelanij?

¹³ Dxejc baxhalni tiop rexpejnpacni, räjpní lojreni:

—Colchäj neñ guejdx, ro'c guidxaagtut te niguui ni nuu te re'nis. Colchanajl niguiga. ¹⁴ Cadro jiu'ni colye'tz loj bejn ni najc rolijzn ro'c: "Naj Dad mastr, ¿con yu' cadro ria'n rebiooz, cadro gaunäjni rexpejnpacni nadxej, dxelanij?" ¹⁵ Dxejcti guluiini lojtu te yu' ni sojb jiaaliga yejc sa'ni, ni asuchexgaa neñni. Colyujn xhi guidauunu ro'c.

¹⁶ Sas huij rexpejnpacni, bidzujnreni neñ guejdxga. Bidxälreni te yu' si'cni räjpr Jesús lojreni. Ro'c bejnreni xhi gudajwreni dxelanij.

¹⁷ Che huääz gubijdx, bidzunnäj Jesús guitzubitio'p xpejnpacni. ¹⁸ Lalni sobga'reni lo mex cayajwreni, räjpr Jesús lojreni:

—Rniliápac lojtu, tej la'tu ni cayaunäá, suto'ni narä.

¹⁹ Dxejcti gusloj cayac-huin lajzreni, räjptebgajreni lo Jesús:

—¿La naräni?

Räpgajc steeni:

—¿La naräni?

²⁰ Dxejcti guniini, räjpní lojreni:

—La tej retzubitio'p, tej ni cayajw loj xpla'tä. ²¹ Sa'csi narä Xi'n Dios nani gujci Niguii, sia'ä, si'cpacni caj loj xtiidx Dios, per xhiza nalajz niguui ni guuto' narä. Huentejti na'c nijaij niguuire.

²² Lalni cayajwreni, cua' Jesús yättxiil, badeedzani xquixthiooz loj Dios dxejc gula'nini, badeednini lojreni. Dxejcti räjpní:

—Colca' yättxiilre. Dee najc si'c tiekhä.

²³ Cuagajcni te bas. Che abadeedni xquixhtiooz loj Dios, badeednini lojreni, gu'

guiraareni neñ basga. ²⁴ Dxejcti räjpr Jesús lojreni:

—Dee najc si'c xtienä ni ruluii diidx ni biä'nnu, nani guixe' xcuent xhidajl rebejn. ²⁵ Rniliápac lojtu, diruna yä'ä bin nani rii yejc uub, dxejli yä'äni stehuält loj xcälrnibee Dios.

*Gunii Jesús sinii Pedr dini gumbeeni
(Mt. 26:30-35; Lc. 22:31-34; Jn. 13:36-38)*

²⁶ Che gulujx bilreni te dij xten Dios, biriireni, sääreni nez dajne' ni laa dan Oliib.

²⁷ Dxejcrú räjpr Jesús lojreni:

—Guiratu sibálaztu narä naguxhijñ, sa'csi si'c cajni lo guijtz: "Sugu'tä baxhtoor luxh suxuñ rexiil." ²⁸ Che guibañsacä loj rebengut, ganidä cha'a Galilee, dxejcti jiäädtu.

²⁹ Dxejc räjpr Pedr loj Jesús:

—Palga guiraareni cuälazlu, narä dina cuälazälu.

³⁰ Dxejc räjpr Jesús lojni:

—Rniliápac lojlu, lagajc guxhijñre, nicla gajd guidgaii cuedxa' tiop huält, luj aguiniilu chon huält dilu gumbee narä.

³¹ Luxh laani sanuutis xtiidxni, räjpní:

—Cadru guetlu setäza, dina guiniä dina gumbeälu.

Luxh guiraa rexpejnpacni gunii si'c.

Gunab Jesús loj Dios che yu'ni Getsemaní

(Mt. 26:36-46; Lc. 22:39-46)

³² Dxejcti bidzujnreni te lajt cadro laa Getsemaní. Dxejc räjpní loj rexpejnpacni:

—Colcuez ree lalni chanabä lo Dios.

³³ Dxejcrú sanäni Pedr näj Jacob näjza Juan. Dxejc gusloj cayac-huinduxh lajzni, luxh cayu'ni yä'lrsiaduxh. ³⁴ Dxejc räjpní lojreni:

—Cayac-huinduxh lazä, an sugu'tni narä. Coljia'n ree, coltie'ch bacal.

³⁵ Sas gusajni tla', bazuxhijbní lo yuj, dxejcti gunabni lo Dios don la niajc nidedcay nani sacni dxejc. ³⁶ Räjpní:

—Abba, xtagä, luj rajc rujnlu guira'ti: badzucaj retrabajwre loä. Xhet si'cni rlazädi narä, bejn si'cni rlajzlu luj.

³⁷ Dxejc biäadni gunaaznirení nagayejsreni. Dxejc räjpní lo Pedr:

—Simón, ¿la nagayejslu? ¿La nicla te rate' diniajcdi nutie'chlu bacal? ³⁸ Coltie'ch bacal, colnab lo Dios, te na'c guntu dojl.

Lastootu rlajz gutie'ctu bacal, luxh tiejx-
htu abadxajg.

³⁹ Huij Jesús stehuält, binabni loj
Dios, guniini lagajc rediidx ni guniini
galoo. ⁴⁰ Dxejcti biädsacni cadro tre'reni,
gunazsacnireni nagayejsreni, sa'csi yuduxh
bacal lojreni. Luxh direni nidxál xhi
niniireni lojni. ⁴¹ Ni riojn huält biäädni,
dxejc rájpni lojreni:

—Agojl colguejs, colsilajz, agujc,
abidzujn or ni ted Xi'n Dios ni gujc Niguii
ladznaa rebendojl. ⁴² Colchastie, colcho'.
Asiäddzungajxh ni guto' narä.

Gunaazreni Jesús
(Mt. 26:47-56; Lc. 22:47-53; Jn. 18:2-11)

⁴³ Canisijcni scree, che bidzujn Judas, ni
najc te retzubitio'p xpejnpacni, siädnäni
xhidajl bejn. Ca'reni spaad, ca'reni yajg
birireni lo rebixhojz nani rnibee, näjza
rebejn ni ruluum leii, näjza rebengool nani
najc guxhtis. ⁴⁴ Niluxh nani ruto' Jesús
abadeedni te seen lojreni, rájpni:

—Nani guchagro'ä, ni'c najc laani. Col-
naazni, colyaptzu'tzni te si'c chanätuni.

⁴⁵ Che bidzujn Judas, gubigni loj Jesús,
rájpni lojni:

—Dad, Dad.

Sas bachagro'nini. ⁴⁶ Dxejcti gunaazreni
Jesús ro'c.

⁴⁷ Dxejc tej reni suga' ro'c, gulää xspaadni,
gudilgijidxni xmos bixhojz nani sajcru,
batiu'ni diajgni. ⁴⁸ Dxejc rájp Jesús loj re-
bejn:

—¿La siädhiiitu narä con spaad näjza
garo't si'c rixiit te gubaan? ⁴⁹ Guiraa dxej
guyu'ä lojtu neñ guidoo, cagulüätu xtidx
Dios luxh ditu niniaaztu narä. Scree caya-
jcn, te soob diidx ni caj lo reguítz.

⁵⁰ Dxejcti rexpejnpacni gulälazrenini,
baxuqtireni.

Bi'n nani baxun

⁵¹ Sanajlza te bi'n Jesús, nadejbni
ganaxhtis te bariaad. Si'c gunaazrenini.

⁵² Dxejcti baxunni, libasa'nni bariaadga,
sä'tini xhabäälni.

Suga' Jesús loj reguhtis
(Mt. 26:57-68; Lc. 22:54-55, 63-71; Jn.
18:12-14, 19-24)

⁵³ Dxejc biädnäreni Jesús loj bixhojz ni
sajcru. Bidojp rebixhojz nani rnibee, näj re-
bengool ni najc guxhtis, näjza rebejn ni ru-
lui leii. ⁵⁴ Luxh Pedr zift zift sanajlni Jesús.

Che bidzujntini lo xle' bixhojz ni sajcru,
gurenäjni rebejn nani rajp ro'c, cagucha'
lajzni lo bajl.

⁵⁵ Rebixhojz nani rnibee, näjza guiraa re-
bengool ni najc guxhtis, caguiilreni xhi tej
xquej Jesús nidxälreni, te nugu'treni Jesús,
xhet bidväldireni. ⁵⁶ Xhidajl bejn gunii
didxxhii, rájpreni et laadi rujn Jesús, niluxh
di xtiidxreni nile', sa'csi garen garen guni-
reni. ⁵⁷ Dxejc huisulii gaii bejn ni guniireni
stee didxxhii xcuent Jesús, rájpreni:

⁵⁸ —Nuunu biejn diaagnu guniini: "Su-
tiehxä xyu' Dios ni guc-chee con naa re-
bejn, luxh chontis dxej guncheä steeni, ni
nac-chee et con naadi rebejn."

⁵⁹ Nicla si'c di xtiidxreni nile', sa'csi garen
garenza guniireni.

⁶⁰ Dxejcti huisulii bixhojz ni sajcru galäii
guiraa rebejn, gunabdiidxni loj Jesús rájpni:

—¿La digacdi guiniilu xhi guiniilu
xcuent requej ni cabe'c reniguire, ä?

⁶¹ Laani niäututis ro'ni, xhet guniidini. Dx-
ejcti gunabdidxsac bixhojz ni sajcru lojni,
rájpni:

—¿La luj ni najc Crist, xi'n Dios nani
rliä'p bejn xpala'nni, ä?

⁶² Dxejcti rájp Jesús lojni:

—Naräni. Suhuiitu loä, Xi'n Dios nani
gujc Niguii, sobga'ä xladbee Dios ni rnibee,
siäläza neñ reza ni tre' xhaguiba.

⁶³ Dxejcti bixhojz ni sajcruga, batäjsni
tla' xhajbni, rájpni:

—¿Xhi jienrunu guidiilnu diidx
xcuentni? ⁶⁴ Abiejn diajgtu xho guniyajni
Dios. Naja', ¿xhi najtu?

Dxejcti guiraareni rájp nungäjlpac
guetni.

⁶⁵ Dxejc yu' reni gusloj cagutiobxhejn
lojni, luxh basäureni lojni, dxejc
huäärenini, rájpreni lojni:

—Gunii, ¿chuni'c huääzlu?

Luxh renani canäjni gudajp lojni.

Gunii Pedr dini gumbee Jesús
(Mt. 26:69-75; Lc. 22:56-62; Jn. 18:15-18,
25-29)

⁶⁶ Dxejc suga' Pedr lo yuj, nez lo le'ga, che
biääd te xcriaad bixhojz ni sajcru. ⁶⁷ Luxh
bahuiini cagucha' lajz Pedr, cadxelojni lo-
jni. Dxejcti rájpni:

—Näj luj nadxaaglu Jesús ni siääd
Nazare't.

⁶⁸ Dxejc Pedr basgueeni, rájpni:

—Dina gumbeäni. Dizana ganä xhini'c caniilu.

Dxejcti biriini sääni ro' suaan. Dxejcti guredxa' guidgaii. ⁶⁹ Dxejc bahuisac cri-aadga lojni, räjpni loj renani suga' ro'c:

—Niguiire najc laa tejreni.

⁷⁰ Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi ben Galileelu, luxh guyasi riejn rniiilu si'c rnii reben Galilee.

⁷¹ Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumeä niguui nani caniitü.

⁷² Dxejcti barojp huält guredxa' guidgaii. Dxejc banalajz Pedr nani räjp Jesús lojni: "Che gajdli guidgaii cuedxa' tiop huält, luj gacla chon huält aräjplu dilu gumbee narä."

Dxejc guslojni cayoonni.

15

Suga' Jesús loj Pila't

(Mt. 27:1-2, 11-14; Lc. 23:1-5; Jn. 18:28-38)

¹ Che bara yääl bidxaag sa' rebixhojz ni rnibee, näj rebengool ni najc guxhtis, näjza rebejn ni rului leii, näjza guirali reguxhtis. Dxejcti gusloj cachaagreni diidx xho gunreni. Baliibreni Jesús, sanätirenni, niluxh badeedreni loj Pila't. ² Dxejc gunabdiidx Pila't loj Jesús räjpni:

—¿La luj ni najc reii xten rexpejñ Israel, ä?

Räjp Jesús lojni:

—Si'cni guniilu, si'c najcni.

³ Dxejc gusloj rebixhojz nani rnibee cabe'c rexquej Jesús. ⁴ Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'creni.

⁵ Bidxeloj Pila't sa'csi nicla si'c xhetru guniidi Jesús.

Gunibeereni guet Jesús

(Mt. 27:15-31; Lc. 23:13-25; Jn. 18:38-19:16)

⁶ Dxelanijjpac ruslaa Pila't tej rebejn ni yu' latzguuib. Ruslaani chutis te ni rnibab rebejn. ⁷ Lo rebejn ni yu' latzguuib nadxaag te niguui ni laa Barrabás. Bagu'tni te bejn che nu'chni lo te cuaa bejn ni gudilnäj gubieer. ⁸ Dxejc bidojp xhidajl bejn loj Pila't, gunabreni lojni gunni si'ctis rujnni

casob lanij. ⁹ Dxejc gunabdiidx Pila't lojreni, räjpni:

—¿La rlajztu guslaá reii xten rexpejñ Israel, ä?

¹⁰ Sa'csi gucbegajcni rdxechlajz rebixhojz loj Jesús, ni'c bateedrenini lojni. ¹¹ Ni'cni baquilza rebixhojz ni rnibee rebenxhidaal te gäbreni lo Pila't:

—Baslaa Barrabás loonu lacuua ni guslaalu Jesús.

¹² Dxejc räjp Pila't lojreni stehuält:

—¿Xhini'c rlajztu gunnaá nani rniiut reii xten rexpejñ Israel?

¹³ Dxejcru guredxa'reni:

—¡Bacuaani lo crujz!

¹⁴ Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'rurení:

—¡Bacuaani lo crujz!

¹⁵ Baslaati Pila't Barrabás, sa'csi rlajzni nuspaani lajz rebenxhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj crujz.

¹⁶ Dxejc huinä rexsoldaadni Jesús nen Pretoor, yu' cadro rujnreni yälguxhtis, ro'c batojpreni guiraa resa'reni. ¹⁷ Dxejcti bashuajcwreni Jesús te lad moraad, bencheereni te coroñ guejch basälenri yejcni. ¹⁸ Guslogajc caguxhi näjrenini, caniirenloj:

—¡Colguiliá'p xpala'n reii xten rexpejñ Israel!

¹⁹ Batiäjreni te yabixhijl yejcni, batioxbxhejreni lojni, luxh guzuxhijbreni te rajñrenini. ²⁰ Che gulujx basacsíreni Jesús, guläereni lad moraad ni najcwni, sas bashuajcwrenini xhajbpacni. Gulägajcreni Jesús te cuarenini lo crujz.

Bacuaareni Jesús loj crujz

(Mt. 27:32-44; Lc. 23:26-43; Jn. 19:17-27)

²¹ Te niguui ni laa Simón, ni siääd Cirene, sadejd ro'c, bajazni lo nejz. Niguiire najc xtag Alejandro näjza Rufo. Che sadejdni nejzga, la fuerz basguurenini xcrujz Jesús.

²² Dxejcti huinäreni Jesús cadro laa Gólgota, nani sáloj: dan Calabeer. ²³ Ro'c badeedreni lo Jesús bin nani nu'ch mir lojni, dxejc laani naaddini niäni binga. ²⁴ Che gulujxti bacuaareni Jesús loj crujz, gudzujtreni yejc rexhajbni, te don xhini'c xca' tejgareni.

²⁵ Agujc chon or gulejn gubijdx che bacuaareni Jesús lo crujz. ²⁶ Letreer cadro

bacuaareni xtojlni scree bejnrenini: “Reii xten rexpejn Israel.”²⁷ Bacuaazareni lo stiop crujz tiop gubaan, tejni xladbbee Jesús, xtee xladbäjgwni.²⁸ Dxejc guzojb diidx ni caj loj guijtz nani rnii: “Loj rebenguijdx bigabni.”

²⁹ Luxh renani sadejd nejzga guniyajreni Jesús, cagusnibreni yejcreni, räjpreni lojni:

—¡jaa! Luj nutiejxhlu guidoo luxh chontis dxej niunchesacluni.³⁰ Naj baslaa lagajc luj, biäjt loj crujzga.

³¹ Nälja rebixhojz ni rnibee, näj rebejn ni rului leii, baxhiznärenini, räjp loj sa'reni:

—Ste'ca bejn ruslaani, xhoxh digacdi guslaani lagajc laami.³² Naj suijiäjt Cristre, reii xten rexpejn Israel, lo crujz te guihui-nu, te chalilaaznu.

Nälj regubaan ni caj lo crujz guniyajzareni Jesús.

Xcälgujit Jesús

(Mt. 27:45-56; Lc. 23:44-49; Jn. 19:28-30)

³³ Che gojl läidxej, bicäjy si'cti chon or,³⁴ Che gudejd chon orga, guredxa' Jesús dipro, räjpni con xtiidxni:

—Eloi, Eloi, ¿lama sabactani? —dee sáloj: Xtiozä, Xtiozä, xhícient gulälazlu-narä?

³⁵ Biejn diajg gaii bejn ni suga' ro'c räjpni si'c, dxejc räjpreni:

—Colcuadajg, Elías cabejdxni.

³⁶ Sas baxuñ tejni, bahuajdxni te sponj loj binagr. Dxejcru basälñini yejc te yabixhijl, badeednini loj Jesús te yänini, räbgajcni:

—Colgusaan guihuiinu don la siädläjäd Elásni loj crujz.

³⁷ Dxejcru guredxaduxh Jesús, gujttini.

³⁸ Dxejc lajd ni najl nen guidoro biräjsni, gujcnii tiop la', jiaali lo yujil.³⁹ Suga' capitán nani rnibee te gayuu soldaad nez loj Jesús, luxh che bahuiini xho guredxa' Jesús scree näj xho gujtni, räjpni:

—Guli'pacni, niguire najc Xi'n Dios.

⁴⁰ Suga'za gaii gunaa, zift cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee.⁴¹ Che guyu' Jesús Galilee biringajl regunaare Jesús, luxh bahuiirenini. Yu'za xhidajlru regunaa ni biädnajl Jesús che biäädni Jerusalén.

Biga'tz Jesús

(Mt. 27:57-61; Lc. 23:50-56; Jn. 19:38-42)

⁴² Biu' gudxhijn, luxh najcni dxe bispr che rusucheereni par sabd, dxej ni rusilajz rexpejn Israel.⁴³ Biääd José ni siääd Aribatea, najcni te rebejn ni sajc loj reguxhtis. Nälja laani cabäjzni xcälrnibee Dios. Guideb yälñabajn gunabni tiekh Jesús lo Pila't.⁴⁴ Bidxelo Pila't alagujt Jesús, sas gurejdxni capitán ni rnibee tej gayuu soldaad, gunabdiidxni lojni la balagujt Jesús.⁴⁵ Che räjp capitánga lojni agujt Jesús, dxejc badeed Pila't tiekh Jesús loj José.⁴⁶ Agusii José te bariaad, luxh che gulätni Jesús lo crujz, batejbnini neñ bariaadga. Dxejc gudixhni Jesús neñ te biliää ni caj cuá' te guilaj, dxejcru batzugni te guiro ro' bil-iääga.⁴⁷ Bahuui Marii Magdalen näj Marii xnan José cadro biga'tz Jesús.

16

Huäjz Jesús loj rebengut

(Mt. 28:1-10; Lc. 24:1-12; Jn. 20:1-10)

¹ Che gudejd sabd, dxej ni rusilajz rexpejn Israel, Marii Magdalen näj Marii xnan Jacoob näjza Salomee gusii setnejxh te chatääbreni se'tga tiekh Jesús.² Che biu' xmaan, rsidooru, che calejin gubijdx, biää-dreni ro' xpaani.³ Cayäjp loj sa'reni:

—¿Chu gudzucaj guiroga ro' xpaani te jiu'n?

⁴ Che gudixhlojreni, bahuiireni alagubi-caj guijga, luxh najcni te guirodukh.⁵ Che biu'reni neñ biliääga, bahuiireni lo te bi'n sobga' ladbee neñ biliääga. Najcw bi'nga te ladnol ni najc siool. Dxejc bidxejb regu-naaga.⁶ Dxejcti räjp bi'nga lojreni:

—Na'c guidxejbtu. Caguiilt Jesús ni siääd Nazare't, nani cuaj lo crujz. Rutiruni ree. Agubajnni lo rebengut, coltahuui cadro gudixhreni tiejxhni.⁷ Colchäj, colchaye'tz lo rexpejnpacni, loj Pedr, ganidla Jesús guidzujn Galilee, dxejcti guidzujntu. Ro'c fiitu lojni, si'cni guniini lojtu.

⁸ Biriitireni ro' biliääga, racsejslireni sa'csi cadxejbreni. Rut lojdi guniidireni sa'csi cadebduxhreni.

Baluiloj Jesús loj Marii Magdalen

(Jn. 20:11-18)

⁹ Gubajn Jesús loj rebengut rsidooru che biu' xmaan. Baluilojni galoo loj Marii Magdalen, nani agacgulääni gajdz bendxbab nen lastooni.¹⁰ Dxejcti huij Marii Magdalen,

huiye'tzni loj renani cuansanäj Jesús, renani cayac-huin lajzni, cayoonreni. ¹¹Che biejn diajgreni ahuäzsac Jesús lo rebengut, luxh Marii abahuii lojni, di lajzreni nilii.

Baluiloj Jesús loj tiop xpejnpacni
(Lc. 24:13-35)

¹² Ste'ca najc Jesús baluilojni loj tio'p renani sasaj sääreni lo nejz. ¹³Dxejcti gubi'reni, huiye'tzreni loj sgaiga, luxh nicla xtidx reni'c di lajzreni nilii.

Baxhal Jesús repost
(Mt. 28:16-20; Lc. 24:36-49; Jn. 20:19-23)

¹⁴Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubangajcni loj rebengut. ¹⁵Räjp Jesús lojreni:

—Colchäj guideb lo quedxliuj, colnii xtidx Dios lo guiraa rebejn. ¹⁶Nani chalilajz luxh tiobnisni, siliaani loj dojl; biäda nani di lajzni chalii sinijtni lo dojl. ¹⁷Niluxh remilagwre jiannäj renani chalilajz: sibääreni bendxb xcuentä; siniireni ste'ca diidx;

¹⁸guiniaazreni bäl con naareni; masque yäreni xhicos ni rugu't bejn, xhet gadireni; susujreni ɳaareni yejc rebenracxhuu luxh siajc rebenracxhuu.

Huä'p Jesús xhaguibaa
(Lc. 24:50-53)

¹⁹Gulujxti gunii Dad Jesús si'c lojreni. Dxejc huäjsni sääni xhaguibaa. Ro'c huicueni cuä' Dios ladbee. ²⁰Dxejcti laareni bire'chreni, guniireni xtidx Dios guiranejz. Lagajc Dadga gucnäjreni, bejnni milagwr te gucbee bejn laapac xtidx Dios ni caniireni. Sugacni si'c.

Redidx Nani Bacuaa Lucas Xcient Jesucrist

Xhicuent bacuaa Lucas redidxre

¹ Xhidajl bejn abacuaa lo guijtz xcient guiraa redzuun ni gujc nez loonu te cuäxne-
jzreni redzuunga ² si'cpac ni biääd redidxga loonu. Rebejn nani bahuiloj guiraa recosre
cheni guslojireni, näja reni gucnäj basule' xtidx Dios najc renani basule' redidxga
loonu. ³ Luxh sa'csi abilä, abahuiloä, aben-
duxhä xhigab xcient guiragajc ni gusajc
che gusoblojlini, ni'c runä xhigab laaca
gucuaä redidxre, xnejz-xnejzni lo guejblu,
Dad Teófilo, ⁴ te gacbesa'c guejblu ni najc
didxlili xcient guiraa redidx ni abisieed
guejblu.

*Te xangl Dios gunii xho gaal Juan ni rutiob-
nis*

⁵ Cheni gujc Herodes reii xten región Judea, guyu' te bixhojz ni laa Zacarias, ni nadxaag lo rexpejn Abías. Chäälni laa Elisabe't, ni najcza te xagdoo bixhoz Aarón. ⁶ Guiro'preni najcreni nadolajz nez loj Dios, rusobreni xtidx Dios näjza xleii Dios, ni'c digacdi gucuaquij bejnreni xcient nicla tej dojl. ⁷ Luxh ruti xi'nreni, sa'csi chäälni digacdi chu xi'nnni. Luxh guiro'preni ana-
jcreni bengool.

⁸ Te dxej, lał ni cayujn Zacarías dzuun neñ guidoro si'c bixhojz nez loj Dios, ⁹ dxejc con daad bibebee chuni'c jiu' neñ yudxan xten guidoro te guze'creni yaal si'cni najc costumbr xten rebixhojzga. Dxejc si'c gulereni Zacarías gunni. ¹⁰ Lał ni caguze'cni gux-
hyaal, suga' guiraa rebejn lo xle' guidoro, cabedx-canabreni lo Dios. ¹¹ Dxejcti baluiloj te xangl Dios lo Zacarías, suliini ladbee lo dxan cadre cayejc guxhyaal. ¹² Che bahuii Zacarías lo xangl Dios, di jien xhi gunni, lacti bidxebeduhni. ¹³ Sas xangl Dios räjp
lojni:

—Na'c guidxejblu, Zacaríi, sa'csi Dios abiejn diajgni xtiidxlu, luxh su' te xi'n chäälu, Elisabe't; cuälajluni Juan. ¹⁴ Sibalazduxhlu, siroob lastoolu; xhidajl bejn sibalajz sa'csi gaalni, ¹⁵ sa'csi benro gac xi'nlu nez loj Dios. Dini yä bin, nicla maxcaal. Sibäjz Sprit Dxan xten Dios nen lastooni cheni gaallini. ¹⁶ Sujnni gusiechlajz

xhidajl rexpejn Israel, guibi'reni lo Gueb Dios. ¹⁷ Juanre sinijdni loj Dad, sujni lagajc xhigab, sajpni lagajc yälrnibee ni gojp profe't Elías, te che jiejn diajgreni xtiidxni susiechlajz redad, susiäjlzareni diidx con rexin'reni. Sigajcza rebejn ni di gusoob xtidx Dios siseedreni gusoobreni xtidx Dios, te si'c jiädsucheeni lastoo rebejn te chalilajzreni xtidx Dad ni jiääd.

¹⁸ Gunabdiidx Zacaríi loj anglga, räjpni:
—¿Xho mood gacbeä gulilu? Sa'csi anacä bengol, sigajcza chälä.

¹⁹ Dxejcti räjp anglga lojni:
—Närä nacä Gabriel, runä dzuun lo Dios. Laani baxhalni närä te guininää luj, jiädnää didxhueentre lojlu. ²⁰ Luxh naj, sa'csi dilajzlu nilii xtidxä, sia'nlu gop, digacdiru guini-
luni, cheni gaalli xi'nlu sinisaclu. Rextidxä sisiojb che guiduzijn dxej che riäjl gacni.

²¹ Lałni cayajc dee, cadxeloi rebejn ni suga' nez ro' yudxan cabäjzreni guirii Zacaríi sa'csi cayaclaani neñ yudxan. ²² Che birii Zacaríi, di niajcdiru niniini loj rebejn; dxejc gucbeereni yu' xhi cosro bahuiini neñ yudxan xten guidoo. Dxejc con seen guninäjni rebejnga, sa'csi xheti xse'ni te niniini.

²³ Che gulujx bejnni dzuun neñ guidoro, gubi'ni rolizjni. ²⁴ Che gudejd redxjej dxejcti bazeñ nuu Elisabe't, chäälni, báz, gaii báii dirunu nirii rolizjni. Bejnni xhigab, räjpni:
²⁵ “Si'c bejn Dad Dios närä naj, gucnäjni närä te diru bejn cuälaz närä sa'csi ruti xi'nä.”

Biäddeed te xangl Dios diidx lo Marii gaal Jesüs

²⁶ Che gudejd xho'p báii, baxhal Dios xanglni Gabriel lo te guedx Galilee ni laa Nazare't, ²⁷ te chahuiini te dxapteeb ni laa Marii. Agojt xtiidxni te guchnaani te dade' ni laa José. Dade're najc xagdoo torei David. ²⁸ Biu' anglre cadre sobga' dxape'ga, räjpni lojni:

—Xchan, dxa'p ni sanälajz Dios, ni agule Dios loj guiraa regunaa. Dios gacnäjlu. Abenle' Dioslu loj guiraa regunaa.

²⁹ Luxh che bahuiini lo xangl Dios bidxejlojni lo rextidxni, rujnni xhigab: “¿Xhicuent caniini si'c loä?” ³⁰ Dxejc räjp xangl Dios lojni:

—Na'c guidxejblu, Marii; agule Dios luj.
³¹ Bacuadijg diidx. Suulu báz, su' te xi'nlu. Che gaalni guirilajni Jesús. ³² Laani sajcni te

bejn ni sacduxh. Sirilajzani Xi'n Gueb Dios ni yu' xhaguibaro. Gueb Dios sujn gacni ^{reii} sigajc ni gujc toxtadgoldooni David, ³³ te tejpas guinibeeni loj rex'i'n Israel, luxh dipac xcälrnibeeni nitloj.

³⁴ Dxejc gunabdiidx Marii lo xangl Dios, räjpnii:

—¿Xho mood gac dee? Ni dxapxteeb narä, gajd narä gumbeä niguui.

³⁵ Badzu' xangl Dios diidxre lojni, räjpnii:

—Sprit Dyan xten Dios siääd lojlu, xcälrnibee Gueb Dios ni yu' xhaguibaa suhuajcwni luj si'c te za. Ni'cni báz ni gaal sajcni te bendxan, sibälaj bejnji Xi'n Dios. ³⁶ Näjza sa'lü Elisabe't su' te xi'nni luxh anajcni te bengool; ni'cni gunaa nani najreni digacdii chu xi'nni aguic xho'p bääi nuunii báz. ³⁷ Xheti te cos ni naganduxh tejnez loj Dios —räjp Xangl Dios.

³⁸ Dxejcti räjp Marii:

—Narä nacä xmos Xtadnu Dios; mbaj, sugunnäj Dios narä si'ctisni gunii gueblu loä.

Dxejcti biunejz angl xten Dios lojni, sä'tini.

Bihuii Marii lo Elisabe't

³⁹ Neq redxejga, basquejn Marii sääni lo te guewdx ni tre' neq redajn xten Judea.

⁴⁰ Biu'ni rolijz Zacaríi, guniini xtidxbree loj Elisabe't.

⁴¹ Che biejn diajg Elisabe't guniini, biniibii xi'nni xque'ni, gudxaj Sprit Dyan xten Dios lastoo Elisabe't. ⁴² Dxejc dipdxuh guniini räjpnii:

—Abenle'ru Gueb Dios luj loj guiraa regunaa. Abenle'zani xi'nlu. ⁴³ ¿Chu narä te siädhuii xnan Xtioozä narä? ⁴⁴ Biejntis diagä xtiidxlu, bibalazgajc xi'nä, biniibni xque'ä. ⁴⁵ Sibaa lajzlu, luj ni huillilajz sisiojbpac nani guniini Xtadnu Dios.

⁴⁶ Dxejc räjp Marii:

Xaimä rliä'p xpala'n Xtadnu Dios.

⁴⁷ Rbalazduhxha lastoä xcient Dios ni ruslaa narä lo dojl.

⁴⁸ Sa'csi agule Dios narä, nacä te mos gunaa ni xhet sajcdi, luxh najli sinii rebejn näjza reni churu chu lo quedxliuj, chicbaani loj guiraa regunaa.

⁴⁹ Sa'csi Gueb Dios ni rajp guiraa yälrnibee abejn xhidajl cosro loä, dxanduxh najc lajni.

⁵⁰ Dini cuääz gulaslajzni guiraa rebejn ni riutxiidxni, reni rajnni.

⁵¹ Xhidajl cosnagajn abejnni con lagajc naani, abatie'chni renani rustioob lastooreni rliä'p lagajc xpala'nreni.

⁵² Abasajbni reni rnibee, per rebennadrolajz bejnji gacreni beñro.

⁵³ Bachajni xque' reni calaan, badeedni ganax cossa'c, niluxh badzu'ni rebejn ni yu' xhixtenreni xhet badeed dini lojreni.

⁵⁴ Gucnäjni nacióñ xten xpejñ Israel, ni najc xmos Dios.

Di lajzni niä'l nulaslajznireni

⁵⁵ sa'csi si'c bia'nni diidx con retoxtad-goloonu, sinuu gulazlajzni toAbram näjza rexagdooni par tejpas.

⁵⁶ Dxejc bia'n Marii rolijz Elisabe't si'cti choñ bääi, dxejc gubisacni rolijzni.

Che gojl Juan ni rutibonnis

⁵⁷ Che baza' xpäi Elisabe't, dxejc gojl xpäzni te báz niguini. ⁵⁸ Dxejc bidzujn repisinni näjza resa'ni biädhuiireni guiro'preni che gucbeereri lacti hueen gujc Dios con laani. Bibalaznäjrenini. ⁵⁹ Che gudejd xhujñ dxej, huinäreni baze'ga chuni bee. Rlajz rebejn nirlaj baze'ga si'c laa xtadni, Zacaríi. ⁶⁰ Niluxh xnanni räjp:

—Na'c, guirilajpacni Juan.

⁶¹ —¿Xhicuent? —räjpreni—. Ruti xfamillu ni laa si'c.

⁶² Dxejcti gunabdiidxreni con seen lo xtad baze'ga te gacebeereri xho rlajzni guirilaj baze'ga. ⁶³ Xtadni gunab te la'l gijitz, dxejc bacuaani: “Lajni najc Juan.” Dxejc guiraareni bidxelojreni. ⁶⁴ Luxh lagajc dxejc gujc gunii Zacaríi stehuält, dxejc guslojini cal'pni xpala'n Dios. ⁶⁵ Bidxeloduxh repisirreni xhini'c gujc ro'c. Luxh bire'ch diidx xcient recosre guideb nen redajn xten Judea. ⁶⁶ Guiraa reni biejn diajg rediidxga gusloj cayujnreni xhigab, dxejc gunabdiidxreni loj sa'reni:

—¿Chuchani'c gac biuxe'ga?

Si'c guniirenii sa'csi huenliisi abenle' Diosni.

Dij ni bil Zacaríi

⁶⁷ Dxejcti biääd Sprit Dyan xten Dios nen lastoo xtadni Zacaríi, gusloj caniini rediidxni badeed Dios lojni, räjpnii:

⁶⁸ Guiliä'pnu xpala'n Dios, Xtios rexpejn Is-
rael,
sa'csi abiädhuiini loonu, ni najcnu rexpe-
jnni,
te siägduslaani nuurnu nen dojl.
⁶⁹ Abaxhalni loonu te bejn ni rajp
yärlrusladuxh bejn nen dojl.
Najcni te rexagdo toxmosni David.
⁷⁰ Lagajc si'cni badeed Dios gunii redade' ni
bacuua xtiidxnii lo gujitz galoo:
⁷¹ Suslaani nuurnu loj reni rdxe'ch loonu,
näjza ladznaa rebejn ni gulälaz nurnu.
⁷² Te gulaslažjni retoxtadgoloonu,
te soob diidx ni bia'nni con rebejng.
⁷³ Scree bia'nni diidx con toxtadgoloonu,
Abram:
⁷⁴ Suslaani nuurnu ladznaa rebejn ni rdxe'ch
loonu,
te na'c guidxebnu chunu lojni gusoobnu
xtiidxnii,
⁷⁵ con yälnabañsa'c näjza yälguxhtis guiraa
redxej ni guibajnnu.
⁷⁶ Luxh luj, bäge', sirilajlu dade' nani rnii
xtidx Gueb Dios ni yu' xhaguiba,
sa'csi sinijdlu lo Dad te gusucheel
rexnezyulajzn,
⁷⁷ te gunlu gacbee rexpejnni xho gac laani lo
dojl,
te gac guibicaj xtojreni.
⁷⁸ Sa'csi Dios sanälajz bejn,
näjza rulaslažjni bejn ni'cni xhaguibaali
suxhañni xi'hni te jiädnäni te dxe-
coob,
⁷⁹ te gusanijni lo rebejn ni nabajn lo yälxcäjy
xten dojl,
näjza rebejn ni nabajn lo xpala yälgujt,
te guluiini xho sánu lo xnez yälrbecdxilajz.
⁸⁰ Dxejc gunís biuxe'ga, guyuduxh
xcäriejnni xcuent recos xten Dios.
Gubajnni nez loj reyubijdz cheni bidzujnni
dxej che baluilojni loj rexpejn Israel, che
gusloj cagusule'ni xtidx Dios.

2

Che gojl Jesús
(Mt. 1:18-25)

¹ Neñ redxejga, gunibee Augusto César
xcaj laj rebejn guideb guedxliuj lo xquijtzni.
² Ni'c nacobgujç yälbigabre cheni najc
Cirenio gobernadoor xten Siria.
³ Guiraa
rebejn nanab chääreni lagajc lajdxreni te
ro'c guigabreni.
⁴ Ni'cni birii José guedx
Nazare't Galilee, te huijni Judea, lo guedx

Belén, cadro gojl toDavid, sa'csi najc José
xagdoo toDavid.
⁵ Huinäni Marii, nani
guchñaani, huijreni guedx Belén te ro'c
guigabreni. Luxh nuu Marii báz.
⁶ Lalsi
yu'reni guedx Belén, bidzujn dxej ni gaal
xi'n Marii.
⁷ Ro'c gojl xi'n galooni, dxej
batejbni te xzuudni. Dxejc gudixhnini
cadro rusälreni guijxh rajw reguidxaa sa'csi
xhetiru yu' xcalareni jia'nreni.

Rexangl Dios näjza rebaxtoor

⁸ Gajxh guejdxga guyu' gaii baxtoor caya-
jpreni xhiilreni lo niaa guxhijñ.
⁹ Chela
baluiloj te xangl Dios, luxh bianij guideb
gabirení con yälrdimbicha' xten Dios, dxejc
bidxebduxhreni.
¹⁰ Sas angla räjp lojreni:

—Na'c guidxejbtu, narä siädnää lojtu te
didxsac ni suspalajz guiraa ben guedxliuj.
¹¹ Nadxej gojl neñ guejdx xten toDavid, tej
ni guşlaa bejn neñ dojl, laani najc Crist ni
najc Dad.
¹² Dee najc te seen lojtu, sidxältru
bäze'ga nadejbni nen te xzuudni, naga'ni
cadro rusälreni guijxh rajw reguidxaa.

¹³ Lagajc dxejc guideb gabi angla baluiloj
naclejn xangl Dios, gulä'preni xpala'n Dios,
räjpreni:

¹⁴ Collä'p xpala'n Dios ni yu' xhaguibaali.
Suchu yälrbecdxilajz lo reben guedxliuj ni
balazlajzni.

¹⁵ Che gubi' rexangl Dios xhaguibaali, gus-
loj rebaxtoor canii loj sa'reni:

—Colcho' guedx Belén colchohuui ni
guzajc ro'c ni gunii Xtradnu Dios loonu.

¹⁶ Rusquenduxhreni sääreni, dxejc
bidxälreni Marii näjza José näjza bäge'
ni naga' neñ cadro rusälreni guijxh rajw
reguidxaa.
¹⁷ Cheni bahuiireni loj rebejng,
bijreni diidx xhi räjp rexangl Dios lojreni
xcuent bäze'ga.
¹⁸ Niluxh guiraa reni biejn
diajg rediidxre bidxeloduxhreni xtidx
rebaxtoorga.
¹⁹ Niluxh Marii gulucheeni
guiraa rediidx ni biejn diajgni nen
lastooni, rujntisni xhigab xcuent redi-
idxga.
²⁰ Dxejcti rebaxtoorga gubisacreni
cayolreni, calä'pzareni xpala'n Dios xcuent
guiraa rediidx ni biejn diajgreni näjza
ni bahuiireni sa'csi guiraani gujc si'cni
räjpreni lojreni.

Cheni huinäreni Jesús chuni bee

²¹ Che gudejd xhujn dxej, huinäreni
bäze'ga chuni bee, dxejc gulälajrenini

Jesús, lagajc laj ni räjp xangl Dios loj Marii guirilajni galooli guuni bätzga.

²² Che basa' redxej ni gac naya te nan si'cni gunibee toMoisés loj xquijtzni, huinäjreni bäge'ga guedx Jerusalén, nen guidoro gunabreni gacnäj Diosni par tejpas.

²³ Bejnreni scree sa'csi caj lo guijtz xten Dios: "Guiraa rexingangaloo xten bejn guilia'tu lo sa'reni te gunreni xtzunä", räjp Dios. ²⁴ Bidzujreni ro'c ca'reni te gojn si'cni rnibee rexquijtz Dios: "Tio'p gugue' o tio'p palombáz."

²⁵ Nen redxejga, nen guedx Jerusalén rbätz te dade' ni laa Simeón. Najcni te bensacduxh, randuxhni Dios, cabätzni jiääd te bejn ni guslaa rexpejñ Israel. Rbätz Sprit Dxan xten Dios nen lastoo Simeón. ²⁶ Sprit Dxan abejn gacbeeni dini guet ansde fiini loj Crist ni guxhal Dios. ²⁷ Dxejcti räjp Sprit Dxan xten Dios lojni chääni guidoro. Lalni yu'ni nen guidoo, bidzujn José con Marii, biädnäreni bätz Jesú, te gunnäjreni Jesú nani rnibee xtidx Dios gunreni. ²⁸ Dxejc gudäätz Simeón bäge'ga, gusloj calä'pni xpala'n Dios, räjpni:

²⁹ Dad, asajc gusaanlu guetä con yälrbedxi-lajz,

sa'csi abasooblu nani bia'n diidx gunnäjlu xmoslu.

³⁰ Sa'csi abahuiloä nani siädguslaa nuurnu nen dojl,

³¹ ni abasujlu nez loj guiraa reben guedxliuj.

³² Laani najc bianij ni susanij loj rebejn ni di gac xpejñ Israel, näjza nani gac xpala'n rexpejñlu guedx Israel, lajdxlu.

³³ Bidxeloj José näjza xnan Jesú rediidix ni canii Simeón xcuent bäge'ga. ³⁴ Dxejc benle' Simeón yejcreni, dxejc räjpni lo Marii xnan Jesú:

—Buhui gan; bäge're biääd te loj rexpejñ Israel chu reni sibälaz xtiidxni, te chuza reni sililajz xtiidxni. Laani gacni te seen nani sibälaz bejn, ³⁵ te si'c jienloj xhi xhigab rujn cade tej rexpejñ Israel nen lastooreni. Dxejcti par luj sajcní asdoö chäätz te spaad lastoolu, sa'csi gac-huinduxh lastoolu.

³⁶ Suga'za te nane' ni laa Ana ro'c, rnini xtidx Dios xcuent recos ni churu gac. Najcni xindxa'p Fanuel, ni najc famil xten Aser. Anajcni bengolduxh. Bachnaani che najcni dxaphuin, luxh gjadztis ijz

guläznäjni chäälni che bia'nni biuud.

³⁷ Najcni te gunabiud ni yu' tajbitajp ijjz. Diruni guirii guidoro, ro'ctis yu'ni dxej, yääl te yu'tisni lo Dios con yälrucua'n näjza yälrbedx-rniab lo Dios. ³⁸ Che gubigni lojreni lagajc dxejc, badeedni xquixtios lo Dios sa'csi abidzujn tej ni guslaa rebejn lo dojl. Dxejc gusloj caniini diidx xcuent bätz Jesú loj guiraa renani cabätz yälruslaa xten Jerusalén.

Che gubi'reni guedx Nazare't

³⁹ Che gulujx bejn xcuzajnni guiraa recos ni caj lo xquijtz Dios gunreni, gubisacreni Galilee, lo guedx Nazare't, la-jdxreni. ⁴⁰ Gunís biuxe'ga, guc nadaanni, guc nasinruzani sa'csi cayacnäj Diosni.

Che biu' Jesú guidoro

⁴¹ Casob ijjz rij rexczuajni Jesú guedx Jerusalén te rinäreni te gojn xten lanij pascw.

⁴² Che basa' Jesú tzubitio'p ijjz, huij guiraareni guedx Jerusalén si'c najc costumbr gac lanijga. ⁴³ Che gulujx lanijga, gubisacreni. Bia'n Jesú guedx Jerusalén, luxh nicla xnanni niclaza José direni ni-acbee bia'nni. ⁴⁴ Bejnreni xhigab pet siädsanäjni rebensa'ni. Si'c guzajreni tebdxej, dxejc gudiilrenini loj resa'reni, näjza loj reni rumbeereni, ⁴⁵ direni nidzälni. Dxejc gubisacreni guedx Jerusalén te huitillerenini ro'c.

⁴⁶ Chon dxej gudiilrenini dxejc bidxälrenini nen guidoro, sobga'ni nez galäii rebejn ni najn leii, cacuadiagñi xtiidxreni, cayujnzani yälgunabdiidx lojreni. ⁴⁷ Luxh guiraareni cacuadiagñi xtiidxni, cadxeloduxhreni yäljnajn xtenni, näjza rediidix ni cagudzu'ni lojreni. ⁴⁸ Che bahuui rexcuajnni lojni, bidxelorení. Dxejc räjp xnanni lojni:

—Xi'nä, ¿xhicuent bennäjlu nuurnu scree? Narä näjza xtaldu cayunduxhnu xhigab caguilnu luj nezree, nezre'c.

⁴⁹ Dxejcti räjp Jesú lojreni:

—¿Xhicuent caguilu narä? ¿La ditu gan riäjl gunä xtzun Xtadä, ä?

⁵⁰ Luxh laareni direni niacbee rediidix ni guniini lojreni.

⁵¹ Dxejcti gubinäjnireni guedx Nazare't, sanuuni rusoojni xtiidxreni. Luxh Marii gulucheetisni guiraa recosre nen lastooni.

⁵² Duurtis gunís Jesús, caroobruza xcälña-jnni. Sanälajz Diosni, sanälajzza guiraa rebejnni.

3

*Yälrusule' Juan ni rutibnisi
(Mt. 3:1-12; Mr. 1:1-8; Jn. 1:19-28)*

¹ Neñ redxej chemi agujc tzuun ijz najc Tiberio César reii, Poncio Pila't najc gobernadoor xten Judea; Herodes najc gobernadoor xten Galilee; Felipe, bejtz Herodes najc gobernadoor xten Iturea näjza Traconite; Lisanias najc gobernadoor xten Abilinia. ² Lagajc neñ redxejga Anás näjza Caifás najc rebixhojzro xten guidoro guedx Jerusalén. Neñ redxejga biääd xtidx Dios lo Juan, xi'n Zácarí cheni rbájzni nez lo reybijdz. ³ Ni'c cuanzaj Juan guideb nez reyuj xten gueu Jordán, ro'c basule'ni xcient yälrusiechlajz, yälrubnis ni nanab gunreni te gudzucay Dios xtojlreni. ⁴ Si'cni caj lo xquijtz Isaías, dade' ni gunii xtidx Dios, cadre räjpni:

Riejn xse' te ni rbedxa' nez loj reyubijdz: "Colyunsa'c xnezyuj Dad, colslíi rexnezyu-lajzni."

⁵ Guiraa cadre sojb gueed sidxe'ni, guiraa relom sibicajreni, guiraa renezyuj ni xhet naliidi, siliireni, guiraa renezyuduxudx, sacsa'creni.

⁶ Dxejcti guiralii bejñ suhuij loj nani guxhal Dios.

⁷ Che bahuui Juan siääd xhidalduxh bejñ te guirobnisreni, räjpni lojreni:

—¡La'tu benguijdx ni najc si'c bänjalajz! ¿Chuni'c balijdxtu guxuntu loj xcälderxe'ch Dios ni siädgajxh, ä? ⁸ Colguchaa xmoodutu te si'c fii bejñ guliini abasiechlajztu. Na'c cuentis rniitu lagajc neñ lastootu "Abram najc xtadnu", sa'csi narä rniä lojtu, sajc xca' Dios reguijre te con laareni guncheeni bejñ gac rexagdoo to Abram. ⁹ Aguibyaig naga' cuä' xlobaa reyajg; ni'cni guiraa reyajg nani di ninexhsa'c xcaj lojni, sidinreni te checreni.

¹⁰ Dxejcti gunabdiidx rebejñ lojni, räjpni:

—¿Xhini'c nanab jiennu?

¹¹ Dxejcti badzu' Juan diidxre räjpni:

—Ni rajp tio'p xhajbni, sugudeedni tejni lo bejñ ni xhet rajpdi. Sigajcza gun reni

rajp xhi gaurení, quisrenini loj ni xheti xhi gauni.

¹² Näjza gaii bejñ nani rusquijx xcient reimpuest bidzujñ lojni te guirobnisreni, dxejc gunabdiidxreni lo Juan räjpreni:

—Dad, mastr, ¿xhini'c nanab jiennu?

¹³ Räjp Juan lojreni:

—Na'c gusquijxtu bejñ maazdi ni nungäj quixreni.

¹⁴ Näjza gaii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejc räjpni lojreni:

—Na'c guchejbtu bejñ; na'c gäbtu chale'ctu xcälquij bejñ ni xhet bejndi parsí guniidxreni meel lojtu; colbalznäj nani rujntu gaan.

¹⁵ Cadxeloj rebejñ, cayujnreni xhigab-duxh, naarení, "pet Juan najc Crist ni jiääd." ¹⁶ Dxejc badzu' Juan diidxre, räjpni loj guiraa rebejñ:

—Gulipac rutiobnisä la'tu con nis, luxh siääd tej ni sajcrú loä, nani nicla gac sur-loä, cuää xcura'chni. Laani sutiobnisni con Sprit Dxan xten Dios te cuääzni nen lastootu näjza con guiboo, sa'csi rajpruni yälrubnis loä. ¹⁷ Aca'ni pal te gusiani triuu te cuääni triusa'c lo guijxh te cucheení triuu neñ ngodx xtenni, dxejcti reguixhtri-uuga suze'cnini lo bajl ni rejç par tejjas.

¹⁸ Rediidxre näjza xhidajl yälrulijdx gu-nii Juan te basule'ni rediidxcoob loj rebejñ.

¹⁹ Näjza lo Herodes ni najc gobernadoor basule' Juan diidx, gudiñänjini sa'csi xhet laadi cayujnni, sa'csi rbäznäjini Herodías, chääl bejtzni Felipe, näjza xcient sgaij dojl ni bejnni. ²⁰ Di Herodes niu xtidx Juan, alga bejnni stee dojl, basälni Juan neñ latzguiib.

Che gurobnis Jesús

(Mt. 3:13-17; Mr. 1:9-11)

²¹ Che batiobnis Juan rebejñ, näjza Jesús birobnis. Cheni cabedx-canabni lo Dios, bixal xhaguibaa, ²² dxejc biäjt Sprit Dxan xten Dios si'c te palom, bidzujñni cadre suga' Jesús. Dxejc xhaguibaali biejn xse' te ni räjp:

—Luj, najclu xi'nä ni sanälazä. Rbanälaz-duxhä luj.

Resa' Jesús

(Mt. 1:1-17)

²³ Yu' Jesús galbitzuu ijz che gusloj cayu-jnni dzuun ni badeed Dios gunni. Rchalo

rebejn najcni xi'n José, xi'n Elí. ²⁴ Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José. ²⁵ José gujc xi'n Matatías. Matatías gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai. ²⁶ Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José gujc xi'n Judá. ²⁷ Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri. ²⁸ Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er. ²⁹ Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat. ³⁰ Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim. ³¹ Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán. ³² Natán gujc xi'n David. David gujc xi'n Isaí. Isaí gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón. ³³ Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá. ³⁴ Judá gujc xi'n Jacob. Jacob gujc xi'n Isaac. Isaac gujc xi'n Abraham. Abraham gujc xi'n Taré. Taré gujc xi'n Nacor. ³⁵ Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber gujc xi'n Sala. ³⁶ Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec. ³⁷ Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán. ³⁸ Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

4

*Che biricaj bəndxbab loj Jesús
(Mt. 4:1-11; Mr. 1:12-13)*

¹ Jesús, sa'csi rbäjz Sprit Dxan xten Dios lastooni, biunejzni gueu Jordán, dxejc huinä Sprit Dxan xten Diosni lo reyubijdz. ² Ro'c bia'nni tiuu gubijdx, tiuu guxhijn. Ro'c bidzujn bəndxbab ni rnibee te rlajzni gunni gusoob Jesús xtiidxni. Luxh calaan

Jesús, sa'csi gajdni gau guiraa neñ redxejga.

³ Dxejc räjp bendxbab lojni:

—Palga guliliu Xi'n Dioslu, gunibee gac reguijre yätxtiil.

⁴ Badzu' Jesús diidx lojni räjpni:

—Acaj loj reguijtz xcuent Dios: “Xhet ganaxdi yätxtiil gun sajc guibajn bejn, näjza guiraa diidx nani rnii Dios sujn guibajn bejn.”

⁵ Dxejcti huinä bendxbab Jesús jiaa yejc te dajn. Teratbäztis baluilojni guiraa reguedxro ni tre' lo guedxliuj. ⁶ Dxejc räjp bendxbab lojni:

—Narä sunidxä guiraa yälrnibee näjza reyälnasa'c ni yu' loj reguejdxa sa'csi xtenä guiraareni, luxh sajc gudedäni lo chutis ni rlazä. ⁷ Palga luj suzuxhijbлю loä, guiliä'plu xpala'nä, guiraani sajc xtenlu.

⁸ Dxejc Jesús badzu' diidx, räjpni lojni:

—Acaj loj xquijtz Dios: “Dad Xtiostislus ganlu, luxh lojtisni chulu gunlu dzuun.”

⁹ Dxejcti huinä bendxbabni lo guedx Jerusalén, huinänini jiaa yejc xques guidoro. Dxejc räjp bendxbab lojni:

—Palga guliliu najclu Xi'n Dios, gutiäjs lo yuj ¹⁰ sa'csi si'c caj loj rexquijtz Dios:

Suxhal Dios rexanglhi te ga'preni luj,

¹¹ guiniaazreni luj didi jiajblu lo guij.

¹² Badzu' Jesús diidx lojni, räjpni:

—Cajza lo rexquijtz Dios: “Na'c fallu Dad ni najc Xtiioozlu.”

¹³ Che baluux bendxbab rextiidxni, gubi-cajni lo Jesús sa'csi dini niujn gaan nusoob Jesús xtiidxni. Guläjzni guidzujn stee dxejte gusacsfruni Jesús.

Gusloj Jesús cayujn xtzuunni

(Mt. 4:12-17; Mr. 1:14-15)

¹⁴ Dxejc gubi' Jesús lo rexuyj Galilee räjpni yälrnibee xten Sprit Dxan. Bire'ch diidx xcuentni guiraa neñ reguejdx ni tre' nejzga.

¹⁵ Ruluiini neñ reguidobáz luxh guiraa re-bejn rliä'p xpala'nni.

Jesús guyu' guedx Nazare't

(Mt. 13:53-58; Mr. 6:1-6)

¹⁶ Dxejcti huij Jesús guedx Nazare't cadro gulaani. Che gojl dxej ni rusilajz rexpejn Israel, biu'n ni nen guidobáz sigajc ni rujnpacni, dxejc huisuliini te bilni ¹⁷ reguijtz xten Dios. Badeedreni lojni guijtz ni bacuaa Isaías; cheni baxhalni guijtzga, bidxälni cadro rnii scree:

¹⁸ Sprit Dxan xten Dios sugaräj narä,

sa'csi agule Dios narä te gusule'ä xtidx-
coobni lo rebenproob.
Baxhalñi narä te gusiacä lastoo renani di
lastooreni cuedxi,
te gusule'ä yälruslaa lo rebejn ni yu' lo dojl,
te gusiacä baloj reben lotiä'p, te guslaä
reben ni cadejd trabajw,
¹⁹ te gusule'ä abiu' ijza'a che rulaslajz Dios
rebejn.

²⁰ Dxejc basäü Jesús reguítzga, badeed-
nini loj bejn ni cayacnäj nen guidooga,
dxejc gurejni. Sa'csi guiraa rebejn ni sobga'
nen guidooga cahuidzu'tzreni lojni, ²¹ gusloj
guniini, räjpnii lojreni:

—Lagajc nadxej guzojb rediidx ni caj lo
reguítzre nez loj guiraatu.

²² Guiraareni sarú guniireni xcuent Jesús,
bedxeloduxhzareni redidxsaruduxh ni gu-
niini lojreni. Gunabdiidxreni loj sa'reni,
räjpreni:

—¿La et xi'ndi José dade're, ä?

²³ Dxejc räjp Jesús lojreni:

—Siniipactu rediidxre loä: “Doctoor,
basiajc lagajc lui”; siniizatu loä: “Recos ni
biejn diajgnu bejnlu nez guedx Capernaum,
lagajc recosga bejn nez ree cadre najc la-
jdxlu.”

²⁴ Dxejc huinuu xtiidxni, räjpnii lojreni:

—Rniliäpac lojtu, nicla tej redade' ni
rnii xtidx Dios, di rebeq lajdxreni jiu xti-
idxni. ²⁵ Luxh rniliä lojtu, che gubajn
Elías lo guedxliuj, guyu' xhidajl gunabiuud
guedx Israel che di nisguij niajib chon ijj
garol, dxejc guyu' yälrianduxh guideb gue-
jdxga. ²⁶ Luxh di Dios nuxhal Elías rolijz
nicla tej regunabiuid ni guläjz guedx Israel,
alga baxhalñini lo benzijt, rolijz te gunabi-
uud ni rbäjz Sarepta, gajxh guedx Sidón.

²⁷ Sigajcza che gubajn Eliseo lo guedxliuj,
guyu' xhidajl ben racxhuu ni ral tiejxhreni
guedx Israel, luxh dini nusiajc nicla tejreni,
alga basiajcni dade' ni laa Naamán, ni siääd
te guedxjift ni laa Siria.

²⁸ Che biejn diajg reni sobga' nen
guidoo rextidx Jesús, bidxehduxhreni,
²⁹ huisuliireni, guläärenini nen guejdxga.
Dxejc huinärenini yejc dajn cadre tre'
guejdxga cadre yu' te balaro, te ro'c
rlajzreni nustejbrenimi. ³⁰ Dxejc Jesús sigaj
gudejdni galäöreni, sätini ste'ca lajt.

Gulää Jesús bendxbab lastoo te dade'
(Mr. 1:21-28)

³¹ Dxejc huij Jesús guedx Capernaum, te
guejdx xten Galilee. Ro'c gusloj cagusle'ni
diidx loj rebejn che gojl dxej ni rusilajz
rexpejn Israel. ³² Bidxeloduxhreni xtiidxni
sa'csi rusule'ni si'c te benñajin, si'c te ni
rnibee.

³³ Nen guidooga suga' te dade' ni rbäjz te
bendxbab neñ lastooni. Guredxa'ni ³⁴ räjpnii:

—¡Ai! ¡Basaan nurnu! ¿Xhicuent riäd-
chu'llo loonu Jesús ni siääd Nasare't? ¿La
siäädlu te gunitlojlu nuurnu, ä? Narä num-
beälu, nanä najclu Xin Dxan Dios.

³⁵ Gudidxa' Jesús lo bendxbabga, räjpnii
lojni:

—Basäü ro'lu, birii lastoo niguiire.

Dxejcti bendxbabre basäl niguiiga lo yuj
nez loj guiraareni, dxejc biriini neñ las-
too dade'ga, per xhet bejndini dade'ga.
³⁶ Bidxeloduxh rebejnga, dxejc gusloj cani-
reni lo sa'reni, räjpreni:

—¿Xhi diidx najc redee? Bahuii xho
rnibee dade're rebendxbab con yälribee,
luxh rusooob rebendxbab xtiidxni, riireni las-
too bejn.

³⁷ Dxejc gusäab xtidx Jesús lo guiraa
reguejdx ni tre' guideb gabi guejdxga.

Rusiajc Jesús xnan xueerg Pedr
(Mt. 8:14-15; Mr. 1:29-31)

³⁸ Birii Jesús guidobáz, huijni rolijz Simón.
Dxejc naga' xnan sueerg Simón, cayacx-
huuni, yu'ni xliaduxh. Sas gunabduxhreni
lojni te gusiajcni. ³⁹ Gubig Jesús loj
nane'ga, gudidxa'ni xliaaga, luxh lagajc
orga biriini xliaa. Dxejc huistiegajcni, gus-
loj cayujnni mandaad, cahuiinireni.

Rusiajc Jesús xhidajl yälracxhuu
(Mt. 8:16-17; Mr. 1:32-34)

⁴⁰ Lał ni cayäaz gubijdx, guiraa reni rajp
benracxhuu ni rajc garen garen yälracx-
huu biädnäreni rebejnga lo Jesús. Dxejc
laani batzuubni naani yejc tejgareni, dxejc
biajc rebenracxhuuga. ⁴¹ Loj rebenracx-
huuga, yu'reni birii rebendxbab neñ las-
tooren, rbedxa'reni räjpreni:

—Luj najclu Xi'n Dios.

Luxh Jesús gudilnäjni rebendxbab, dini
nusaa niniireni sa'csi laareni najnreni na-
jcni Crist ni cabätzreni.

Rusule' Jesús xtidx Dios
(Mr. 1:35-39)

⁴² Che bianij, biriini lo guejdx, huijni te lajt cadro rut rbäjzdi. Niluxh gudiil rebejnji, dxejc bidzujnreni cadro suga'ni. Rlajzreni nuscuääzrenini te di nuini. ⁴³ Dxejc Jesús räjp lojreni:

—Nanab cha'a chasule'ä rextidx xcient xcälribee Dios xhidajlruza guejdx, ni'cni baxhälpac Dios narä.

⁴⁴ Dxejc si'ctis cuanzaj Jesús basule'ni xtidx Dios nen guiraa reguidobäz nen reguejdx xten Galilee.

5

Che gunaazreni xhidajl bälj

(Mt. 4:18-22; Mr. 1:16-20)

¹ Cheni suga' Jesús ro' nis ni laa Gensesare't, gubig xhidajl bejn lojni te jiejn diajgreni xtidx Dios. ² Dxejc bahuii Jesús tio'p barcw ni suga' ro' nisga, rud yu'di neñreni sa'csi rebejn ni rniaaz bälj abiriireni neñ rebarcw te caguiibreni xquijxhreni ro' nisga. ³ Dxejc biu' Jesús neñ te barcw ni najc xten Simón, dxejc gunab Jesús chää barcwga lo nis te la', te guibicajni ro' yuj. Dxejc gurej Jesús neñ barcwga, ro'cli guslojni caguluiini rebejn. ⁴ Che guluj xtiidxni, räjpni loj Simón:

—Huinä barcw cadro jiätru, colcuaa xquijxhtu lo nis te guiniaaztu bälj.

⁵ Räjp Simón lojni:

—Mastr, guideb yääl biennuuzuun, luxh dinu niniaaz nicla tej bälj, niluxh naj aguibeelu gusälsacnu guijxh lo nis.

⁶ Cheni basälreni xquijxhreni lo nis, guinaazreni xhidalduxh bälj, dxejc guslojli caräjs xquijxhreni. ⁷ Dxejc bejreni seen loj resa'reni ni yu' neñ stee barcwga te jiädyacnäjreni. Bidzujntireni, bachajreni guiro'p barcw. Gudxaduxh rebarcw, ameer niääzreni neñ nis. ⁸ Che bahuii Simón Pedr recosre, bazuhijbni nez loj Jesús, dxejc räjpni:

—Gubicaj loä Dad, sa'csi narä nacä te benđojl.

⁹ Si'c gunii Simón sa'csi bidxejb laani näjza guiraa rebejn ni yunäjni sa'csi guinaazreni xhidalduxh bälj. ¹⁰ Näjza Jacob näjza Juan, rex'i Zebedeo, ni runnäj Simón dzuun, näjzareni bidxejbreni. Per Jesús räjp lo Simón:

—Na'c guidxejblu, najli guisloj cueedxlu bejn lacuua ni guiniaazlu bälj.

¹¹ Dxejc, che bidzunnäjreni rebarcw ro'nis, basa'nreni guiraa xhixtenreni, te sanajlreni Jesús.

Basiadj Jesús te bejn ni ral tiejxhni
(Mt. 8:1-4; Mr. 1:40-45)

¹² Cheni guyu' Jesús tej reguejdx, bidzujn te bejn lojni ni rajc lepra te yälguiduxh ni ral tiejxhni. Che bahuiini loj Jesús, bazuhijbni, basajbni lojni lo yuj, räjpni lojni:

—Dad, palga rlajzlu, sajc gusiajclu narä.

¹³ Dxejc batzuub Jesús ɳaani yejcni räjpni lojni:

—Rlazä jiajclu. Susiacälu.

Che guniini rediidixe, biacgajc ben racxhuuga. ¹⁴ Dxejcti gunibee Jesús lojni rut lojdi gäbni xhi guzajcni. Räjpni lojni:

—Huijtis lo bixhojz te fiini lojlu, huisa'nza gojn xcient ni biajclu si'cni rnibee xleii Moisés, te filoj rebejn abiajclu.

¹⁵ Luxh xpala'n Jesús sanuutis cayä'pruni, guixe-guixee care'ch diidx xcientni. Rdojpza xhidalduxh bejn te gucuadiajgreni xtidx Jesús näjza te gusiajcnii yälracxhuu xtenreni. ¹⁶ Yu'za huält riunejz Jesús ri-jni relajt cadro ruti rebejn, te ro'c rbedxrniabni lo Xtadni Dios.

Basiadj Jesús te bejn ni digacdi guiniib
(Mt. 9:1-8; Mr. 2:1-12)

¹⁷ Te dxej lajni caguluini rebejn, neñzga sobga' gaii farisee näjza gaii bejn ni ruluii leii garen-garen reguejdx, siäädreni guideb nez reguejdx xten Galilee, näjza régión Judea, näjza guedx Jerusalén. Dxejc huenliisi rluiloj sugaräj xcälribee Dios Jesús te rajc russiajcnii rebenracxhuu.

¹⁸ Dxejc bidzujn gaii dade' nuurenlo te lonbäz te bejn ni di gacdi guiniib, rlazreni gusiu'renini neñ yu' te quixhrenini nez loj Jesús. ¹⁹ Niluxh direni nidxäl canejz niu'reni sa'csi nadäduxh ro'c sa'csi tre' xhidajl rebejn. Dxejc huäpnäjrenini yejc yu'ga, badzucajreni gaii tej, dxejc basajbreni xloon berenracxhuuga yejcli yu'ga te gujc bidzujnnez loj Jesús. ²⁰ Che bahuii Jesús yärlililajz xtenreni, räjpni loj berenracxhuuga:

—Dade', agubicaj xtojllu.

²¹ Dxejc rebejn ni ruluii leii näjza farisee gusloj cayujnreni xhigab, naareni: “*Chucha niguiire ni caniyajni Dios con*

rextiidxni? Ruti te bejn ni sajc gudzucaj xtojl rebejn, Diostis rudzucaj dojl.”

²² Dxejc gucbee Jesús xhi xhigab cayujn-reni, ni'c räjpni lojreni:

—¿Xhicuent rujntu xhigab si'c neñ las-tootu? ²³ ¿Xhini'c najc guyasiru guiniini: “Agubicaj rextojllu”, o guiniini: “Huistie, guzaj”, ä? ²⁴ Mbaj naj, suluiä nez lojtu Xi'n Dios ni gujc Xi'n Niguii rajp yälriibee, yälnidip lo quedxliujre te gudzucajni xtojl rebejn.

Dxejc räjpni lo bejnga ni digacdi guiniib:

—Lojlu rniä, jhuistie, guläs xloonlu, huij rolijzlu!

²⁵ Lagajc dxejc nez lojreni huistiegajc bejn ni digacdi guiniib, guläsni xloonni cadro naga'ni, dxejc siini rolijzni, calä'pni xpala'n Dios.

²⁶ Guiraareni rdixeloduxhreni recosga, dxejc guslojreni calä'preni xpala'n Dios, rdxejbireni räjpreni:

—Abihuiinu cosro, cos ni guidxeloi bejn nadxej.

Rbejdx Jesús Leví

(Mt. 9:9-13; Mr. 2:13-17)

²⁷ Che gudejd guluijx recosre, birii Jesús ro'c. Dxejc bahuiini lo te bejn ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuii Jesús lojni. Räjp Jesús lojni:

—Gudanajl narä.

²⁸ Dxejc huisu Leví, basa'nni guiraa re-cosga, dxejc sanajlni Jesús.

²⁹ Dxejc bejn Leví te lanij rolijzni par Jesús. Biääd xhidajl bejn ni rusquijx xcuent impuest näjza sgaii bejn; sobganänireni lo mex. ³⁰ Dxejcti refarisee näjza rebejn ni ru-luii leii guslojreni cayeinäjreni rexpejnpac Jesús, räjpreni:

—¿Xhicuent raunäjtu, ränäjtu rebejn ni rusquijx impuest näjza rebendojl, ä?

³¹ Dxejc badzu' Jesús diidxre, räjpni lo-jreni:

—Rebejn ni nadaan di guiquiin te doc-toor, ganaxtis rebejn nani racxhuu rqui-in-reni te doctoor. ³² Dina niätdtedxä rebensa'c, narä biätdtedxä rebendojl te gusiechla-jzreni.

Gunabdiidxreni loj Jesús xcuent yälrucua'n

(Mt. 9:14-17; Mr. 2:18-22)

³³ Dxejc gunabdiidx rebejngä loj Jesús, räjpreni:

—¿Xhicuent lacti rucua'n rexpejn Juan näjza rexpen refarisee, lacti rbedx-rniabreni loj Dios; niluxh rexpejnpacu alga rajwreni, rä'reni?

³⁴ Badzu' Jesús diidxre lojreni, räjpni:

—¿La sajc gucua'n rebejn ni yu' lo te sa' lañni yunäjreni bi'n, ä? ³⁵ Niluxh sidzujn dxej cheni sibicaj bi'n lojreni, dxejc sii su-cua'nreni.

³⁶ Guniaje Jesús cuentre lojreni, räjpni:

—Rut rucuadi te remiend ladcoob loj te ladyujxh, sa'csi che rxu'n ladcoob rutiajzni ladyujxhga, dxejc xhiroobruni guiräjs, luxh diza ladcoob guchaag lo ladyujxh. ³⁷ Di gacdi gusälñi bincoob nen te guidbiejw sa'csi bincoobga sutiäsy'a ni guidbiejwgä dxejc sixe' binga, sixijnza guidbiejwgä. ³⁸ Ni'cni nanab gusälñi bincoob nen guidcoob si'c sigucheeza guiro'preni. ³⁹ Luxh nicla tej bejn ni agu' bin ni yu' agujc xchej rlajz yä bincoob, sa'csi säjbni: “Bin ni yu' agujc xchej najc huenru.”

6

Rutie' rexpejñ Jesús triuu dxej nani rusi-lajzreni

(Mt. 12:1-8; Mr. 2:23-28)

¹ Te dxej ni rusilajz rexpejñ Israel sasaj Jesús näjza rexpejnpacni nez loj reyuj cadro naga' triuu. Dxejc, sa'csi calaanreni gusloj caläädxreni doj lo triuu te cayajwrenini.

² Dxejc gunabdiidx gaii refarisee ni najc benguidoo, räjpreni lojreni:

—¿Xhicuent rujntu dzuu ni di nungäj-luntu che rajl dxej ni rusilajznu?

³ Dxejc räjp Jesús lojreni:

—¿La gajdju go! loj reguijtz xhi bejn to-David cheni calannäjni rebejn nani sanäni, ä? ⁴ Biu'ni neñ xquidoo Dios, gudajwni yätx-tiil nani di nungäj l gau bejn sa'csi xtebtis rebixhojz rajc rajwni, luxh badeedni yätx-tiilga gudajw resa'ni.

⁵ Räjpza Jesús lojreni:

—Sigajcza narä, Xi'n Dios ni gujc Niguii, rnibeä dxej ni rusilajztu.

Niguii ni nabijdz naani

(Mt. 12:9-14; Mr. 3:1-6)

⁶ Che gojl stee dxej ni rusilajz rexpejn Israel, biu'ni neñ te guidobäz, dxejc guslo-jni caguluiini rebejn. Lagajc ro'c sobga' te dade' ni nabijdz naani ladbee. ⁷ Dxejc remastr xten leii näjza refarisee cagula'tzreni

te don la susiajcní bejngá dxej ni rusila-jzreni, sa'csi caguilreni xho gacuaquijreni Jesús. ⁸ Niluxh laani najnni xhi xhigab cayujnreni, dxejc guniini lo dade' ni nabijdz naani, rājpni:

—¡Huisulii! ¡Gudaa nez galáire!

Dxejc huisulii bejngá, gubigni lojni.

⁹Dxejc rājp Jesús lojreni:

—Rlazá guinabididx lojtu dee: ¿Xhini'c najc huen gunni che rajl dxej ni rusilajznu? ¿La te dzunsa'c o la te dzunguijdx? ¿La gac-najnu bejn laa xcālnabajnni o la gudzucajnu yālnabajnni, ä?

¹⁰Che gulujx bahuui Jesús loj guiraa rebejn ni tre' guideb gabini, rājpni loj bejn ni nabijdz naani:

—¡Baslii naalu!

Dxejc bejinni si'c, luxh biagcrajc naani. ¹¹Dxejc bidxechduxh rebejn ni tre' ro'c, gus-loj canabdiidxreni lo sa'reni xhi gunnajreni Jesús.

Gule Jesús guitzubito'p rexpejnpacni
(Mt. 10:1-4; Mr. 3:13-19)

¹²Nen redxejga, huij Jesús loj te dajn te huininajni Xtdadni Dios. Ro'c gudejdni yāäl cabedx-canabni lo Dios. ¹³Che bianji lo yuj, gurejdxni rexpejnni. Ro'c guleni tzu-bitio'preni te gacreni xpejnpacni. Gulālajnireni reapost. ¹⁴Renani guleni najc Simón ni gulālajni Pedr; Andrés, bejtz Simón; Jacoob; Juan; Felipe; Bartolomé; ¹⁵Mateo; Tomás; Jacoob xi'n Alfeo; Simón ni nagab loj rexpen cananista; ¹⁶Judas, bejtz Jacoob; näjza Judas Iscariote ni guto' Jesús loj rebix-hojz.

Ruluii Jesús xhidajl bejn

(Mt. 4:23-25)

¹⁷Che biātnäj Jesúsreni yejc dajnga, guzudxireni yejc te danbáz sa'csi suga' xhidajl bejn ro'c. Siäädreni guiraa nez reguedx Judea, näjza guedx Jerusalén näjza reguejdx ni tre' gajxh nisdoo Tiro con Sidón. Rebejngá bidzujnreni te gacuadiajgreni xtidx Jesús, te gusiajczanirení xcālracxhuurení. ¹⁸Guiraa ni rdejdza trabajw yu' bendxbab nen lastoorení näjza reni'c biajc. ¹⁹Guiraa rebejn rlajz caan Jesús, sa'csi rusiajcní guiraarení con xcālrnibeeni.

Balidx Jesús rebejn

(Mt. 5:1-12)

²⁰Dxejc bahuui Jesús loj rexpejnpacni rājpni lojreni:

—Chicbaatu, bejn nani xheti xhixtentu, sa'csi xtentu najc cadro rnibee Dios xhaguibaa.

²¹Chicbaatu, bejn nani calaan naj, sa'csi suniidx Dios lojtu nani rniabtu.

—Chicbaatu, bejn nani roon naj sa'csi susiäjl Dios lajztu dxejcru suxhijztu.

²²Chicbaatu, bejn nani rdxechlajz bejn lojtu, rbääreni la'tu te laad, rniyajreni la'tu, luxh rbälatzreni lajtu si'c te cos guijdx sa'csi rililajztu xtidx Xi'n Dios ni gujc Niguii. ²³Colguibalajz nen redxejga, na'c gac-huin lastootu sa'csi sunidxduxh Dios xhi xtentu xhaguibaa. Sigajcza basacsí retoxtadgolodooreni rebejn nani gunii xtidx Dios galoo.

²⁴Probe'zatu, la'tu beñrajp, sa'csi ago-jptu xcālnasa'ctu, xcālrabalajztu lo guedxli-ujre.

²⁵Probe'tu nani rajp guiraloj xhixtentu naj, sa'csi sidejdtu yāirliaan.

—Proobzatu ni ruxhijztu naj, sa'csi son-duxhtu sidejdtu yālhuinduxh, yālnalas.

²⁶Probe'tu palga rliä'p rebejn xpala'ntu naj, sa'csi si'c bejn retoxtadgolodooreni rebejn ni gunii didx-xhii lacuua niniireni xti-idxpac Dios.

Chanālajzni rebejn nani rdxe'ch lojni
(Mt. 5:38-48; 7:12)

²⁷Rājpzani:

—La'tu ni cacuadiajgtu rextidxä rniä diidxre lojtu: colchanālajz rebejn ni rdxe'ch lojtu, colyujn dzunsa'c loj rebejn ni rdxechlajz lojtu. ²⁸Benle' yejc rebejn ni rgube la'tu. Gunab lo Dios xcient rebejn ni rcuaquij la'tu. ²⁹Palga yu' chu rlajz quiin te laad lojlu, badeedza stelaad quiinni. Palga yu' chu gudzucaj xhablojiaalu, badeedza näj xciamanglu xca'ni. ³⁰Xhitis ni guiniabreni lojlu, badeedni; ni gudzucaj te xhi xtenlu lojlu, na'c guiniabsacluni lojni. ³¹Sigajc ni rlajzlu gunnaj bejn la'tu, si'cza la'tu colyen-näj bejn.

³²Palga la'tu sanālajztistu rebejn nani sanālajz la'tu, xlia'sini, sa'csi sigajcza rujn rebendojl. ³³Palga guntu hueen lojts rebejn ni rujn hueen lojtu, xhet laadi cayu-jntu, sa'csi sigajcza rujn rebejn ni nabajn nen dojl. ³⁴Palga gudedlaatu lojts reni rujntu xhigab gunidxsacni lojtu, xhi cos

hueen rchalotu rujntu? Ni rebendojl rud-edlaazarenloj rebejn ni najnreni siguixsac ni nasääbreni.³⁵ La'tu, nanab chanälajztu rebejn ni rdxe'ch lojtu, guntu hueen lojreni, gudedlaatu loj rebejn, na'c gunlojtu xcasactu recos ni rudedlaatu, te si'c guroob gac nani guzalajz Dios lojtu; te si'c gactu xi'n Gueb Dios ni nabajn xhaguibaa. Sa'csi si'cza najc Dios huenduxh loj reni di gudeed xquixtios lojni, näjza loj rebendojl.³⁶ Colgulaslajz resa'tu si'c rulaslajz Xtradnu Dios guiraa rebejn.

**Colgulaslajz sa'tu
(Mt. 7:1-5)**

³⁷ Räjpzani:

—Na'c guntu yälgxuhtis nani rujn bejn, naatu xhet laadi rujnni; te na'cza gun Dios yälgxuhtis rextojltu. Na'c gucuauquijtu bejn te sigajcza di Dios gucuauquij la'tu. Colgusiäj-lajz dojl ni rujn sa'tu, te si'cza gusiäj-lajz Dios rextojltu.³⁸ Colgudeed loj bejn ni rquiinreni te si'cza guzalajz Dios ni rquiintu. Suniidxreni xca'tu te mediid guidxadoo, sibetipj ni yu' nenni, cupe'tlini gusälenreni neñ xpolstu. Dios suniidx lojtu lagajc con mediid ni rudeedtu loj rebejn.

³⁹ Guniza Jesús stee cuent räjpni:

—¿La sajc gului te ben lotiä'p nez yuj lo stee ben lotiä'p, ä? ¿La di guiro'preni guitejb nen te gueed, ä?⁴⁰ Te bejn ni casieed di gacdi guisieedruni loj ni najn xmastrni. Te bejn, che agulujx biseedni, sajcni si'cni najc mastr xtensi.

⁴¹ ¿Xhicuent cahuiilu guixhe' ni yu' baloj bejtzu, luxh dilu fii yagro ni yu' balojlu?

⁴² O, ¿xho mood gäblu lo bejtzu: "Guidon cuää guixhe' ni yu' balojlu"; luxh dilu gacbee yu' te yagro balojlu, ä? ¡Bengui-jdx! Guläxgaa yagro ni yu' balojlu, dxejc sajc fis'a'clu te cuäälu guixhbäz ni yu' baloj bejtzu.

Ninehsa'c ni rcaj loj te yajg sujn gumbeeni yajg

(Mt. 7:17-20; 12:34-35)

⁴³ Räjpzani:

—Xheti te yagsa'c ni rudeed ninejxh ni xhet sajcdi, xhetiza te yajg ni xhet sajcdi ni rudeed ninehsa'c.⁴⁴ Sa'csi tebgaj reyajg rusenlojni xhi yajgni xcuent ninejxh ni rcaj lojni. Di bejn gutie' iigw lo reyaguejch, diza bejn gutiu' uub lo te yag balagrejn.

⁴⁵ Rebensa'c rnii didksa'c, sa'csi xhigabsa'c yu' nen lastooni. Niluxh rebenguijdx rnii ganax didxguijdx sa'csi xhigabguijdx yu' nen lastooni, sa'csi ro'ni rnii nani yu' nen lastooni.

*Tio'p bejn ni benchee tio'p yu'
(Mt. 7:24-27)*

⁴⁶ Räjpzani:

—¿Xhicuent rniitu loä: "Dad, Dad," luxh ditu gun nani rniä guntu?⁴⁷ Guiniä lojtu chuni'c najc si'c bejn ni riääd loä, rucuadiajgni xtidxä luxh rusooibni xtidxä.

⁴⁸ Najcni si'c te bejn ni benchee rolizjni, ganid gudäänni jiät, dxejcti bejnni cimient yejc te guilaj. Cheni biäjt nisro ro'gueuu, bidijn nisro cuä' yu'ga, luxh nicla nusniib-nini, sa'csi yu'ga sobgadzu'tz yejc te guilaj.

⁴⁹ Niluxh reni rucuadiajg xtidxä, dxejc direni guzoob xtidxä, najcreni si'c te bejn ni bejn xyu'ni loj yujxh, dini niujn cimient xten yu'ga. Dxejcni biäjt nisro, bidijnni cuä' yu'ga, dxejc li gurebä'n yu'ga, gunitlojtni.

7

*Basiajc Jesús xmos te ben roman ni rnibee
(Mt. 8:5-13)*

¹ Che gulujx gunii Jesús loj rebejn, huijni te guejdx ni laa Capernaum. ² Ro'c yu' te ben roman ni rnibee, yu' te mos lojni, luxh sanälazduxhni mosga. Cay-acxhodoxhni mosga, ameerli guetni. ³ Che biejn diajg capitán cagusä'treni Jesús, bax-halgaçcni gaii bengool lo rexpej Israel te chagajnreni Jesús jiäadni te guiajcn xmos dade'ga. ⁴ Che gubigreni loj Jesús, gusloj gunabdukhreni lojni, räjpreni lojni:

—Dade're najc bensa'c, nungäj l gac-näjluni ⁵ sa'csi sanälajzni lajdx rexpej Israel, luxh lagajc laani gunibee guc-chee xquidobäznu.

⁶ Dxejcti huinä Jesúsreni. Cheni siädzungajxhreni royu', baxhal capitánga gaii xamiigwini, gäbreni loj Jesús:

—Si'c naj capitán: "Di rlazä gutalä xtzunu. ¿Chu narä te jiu'l urolizä? Xhet sacädi. ⁷ Ni'c dina niapä baloor te lagajc narä niädgänä guejblu, sa'csi raj-plu yälrnibedu xhniluxh narä rut nacädi. Ni'cni gunibeetis jiajc xmosä, luxh laani siacgajcni. ⁸ Sa'csi narä næcä xmos rebejn ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj

steeni: Gudaa ree, riäädnii; che gäpä loj xmosä: Bejn dee, rungajcnini."

⁹Che biejn diajg Jesús rediidxre, bidxeloduxhni, gubiréni loj rebejn ni siädnajlni, räjpni lojreni:

—Rniliápac lojtu, nicla lo rexpejn Israel gajdna guidxälä te bejn ni rililajzduxh si'c ni rililajz capitánre.

¹⁰Che gubi' rebejn ni huij loj Jesús roliz capitán, bahuiireni abiajc xmosni.

Baspañsac Jesús xi'n te gunabiuud

¹¹Nen redxejga, huij Jesús te guejdx ni laa Naín. Huináni rexpejn pacni näjza xhidajl bejn ni sanajlni. ¹²Che bidzujnni gajxh ro' guejdxga, bahuiini sacua'tzreni te bengut, te bi'n ni najc xtebtis xi'n te gunabiuud. Xhidalduxh bejn sacua'tzni. ¹³Che bahuii Jesús loj gunabiuudga, biani nane'ga, räjpni lojni:

—¡Na'c roonlu!

¹⁴Dxejc gubig Jesús lo rebejn ni sanä bengutga, dxejc guzudxi reni nuu bengutga. Dxejc räjjp Jesús loj bengutga:

—¡Bi'n!, narä rniä lojlu; ¡Huistie!

¹⁵Dxejc huistie bengutga, sobga'ni guslojni caniini. Dxejc badeed Jesúsni lo xnanni. ¹⁶Che bahuiireni xhini'c gujc, bidxejbreni, bidxeloduxhreni, guslojreni calä'preni xpala'n Dios, räjpreni:

—Te niguiscaduxh ni rnii xtidx Dios abidzujn nez loonu.

Caniizareni:

—Lagajc Guejb Dios abiädhui rexpejnni.

¹⁷Dxejc bire'ch diidx xcuent Jesús guideb nez reguedx Judea näjza guiraa reguejdx ni tre' nejzga.

Xpejn Juan ni rutiobnis huinabdiidx loj Jesús

(Mt. 11:2-19)

¹⁸Rexpejn pac Juan ni rutiobnis bij rediidxga lojni che yu'nii latzguiib. ¹⁹Dxejc baxhalni gaïireni lo Jesús te sanabdiidxreni: “¡La gulipac najclu Crist ni jiääd o sibäjznu chu stee bejn, ä?” ²⁰Dxejcti gubig rexpejn Juan loj Jesús, räjpreni:

—Juan ni rutiobnis baxhal nuurnu te guiniabdiidxnu lojlu: “¡La luj najc Crist ni jiääd o la sibäjznu chu stee bejn?”

²¹Lagajc dxejc che bidzujnreni, basiajc Jesús xhidajl bejn ni rajc garen-garen yälguijdx, ni yu'za rebendxbab lastooreni,

basiajczani baloj ni di fii. ²²Dxejcti badzu' Jesús diidxre, räjpni:

—Colchaye'tz lo Juan guiraa ni abahitu näjza ni abiejn diajgtu. Colye'tz lojni: “Relotiä'p ruhuisac; rebençoj rsiasa'c; rebejn ni ral guejdx tiejxhni, abiajc tiejxhni; rediagcua't riensac diajgreni; rebengut, agubansacreni; luxh loj rebenproob nani cabätz xcälracnäj Dios riejn diajgreni rsiule' xtidx Dios xcuent xho laa bejn lo dojl. ²³Chicbaa nani rumbee narä, nani di cuälaz narä.”

²⁴Cheni sii rexpejn Juan, gusloj Jesús caniini xcuent Juan loj rebejn, räjpni:

—¿Chuni'c huihuiitu nez lo reyubijdz? ¿La te nijt ni rusniib bej, ä? ²⁵¿Xhini'c huihuiitu? ¿Te bejn ni sucheduxh, ä? La'tu najntu rebejn ni sucheduxh näjza reni nabansa'c, roliz rereii yu'reni. ²⁶¿Chuxhni'c biriitu huihuiitu? ¿Te niguui ni rnii xtidx Dios, ä? O'n, rniliá lojtu, luxh te ni saduxhru loj guiraa reniguii ni rnii xtidx Dios. ²⁷Juan najc niguui ni ruzä't rexquijtz Dios cadro caj scree:

Narä guxhalä te niguui nani guinii xtidxä, te nidni lojlu, te laani guzucheeni xnezyu-jlu nez lojlu.

²⁸Rniliápac, loj guiraa rexingaan regunaa, nicla tejni gajd guiricaj ni najc te bensac-duxhru nez loj Dios si'c najc Juan ni rutiobnis. Niluxh nani guxiiru sajc lo xcälrnibee Dios ni jiääd, sajcruni loj Juan.

²⁹Che biejn diajg rebejn näjza reni rusquijx impuest rextiidxni xcuent Juan, gucbeereri rujn Dios yälguxhtissa'c, sa'csi abatiobnis Juanreni. ³⁰Niluxh refarisee näjza rebejn ni ruluii leii gulälazreni nani niuñn Dios par laareni, sa'csi direni nicäjb nutiobnis Juanreni. ³¹Räjpza Jesús lojreni:

—¿Xochaa guiniä najc rebejn nani tre' naj? ³²Najcreni si'c rebiuxbáz nani rguijt nez lo guji cadro rdo', rbedxa'reni loj sa'reni, rniireni: “Bielnu te bizej te guya'tu, niluxh ditu nuya”. Bielzanu te dij ni nabaduxh dxejcti dizatu nioon.” ³³Sa'csi che biääd Juan, dini niauxha't, dizani niä'bin, luxh räjptu: “Yu' bendxbab lastoonei.”

³⁴Dxejcti biälä narä, Xi'n Dios ni gujc Niguii, rauü, rä'ä. Dxejc räjptu: “Bahuilaare, dade're rauxha't, rä'zani, najcni xamiigw rebendoj näjza rebejn ni rusquijx reim-puest xten gubier.” ³⁵Ni'cni xcälnajn Dios

huenliisi rienloj loj dzuun ni rujn rebejn ni nain.

Jesús huij rolizj Simón ni najc farisee

³⁶ Dxejc tej refarisee gunii loj Jesús, räjpni:

—Jääädlu rolizä te guidaunu.

Dxejc huij Jesús rolizjni, ro'c gurejni lo mex. ³⁷ Rbäjz te gunagubejxh lo gue-jdxga. Che biejn diajgnii satajw Jesús roliz fariseega, bidzugnäjni te bo't guidxa se't nejxh, luxh bo'tga najc si'c onix, botsa'cni.

³⁸ Che biu' gunaaga, bidzujnni lo ni' Jesús, guslojni cayoonni. Con nisbee cagubilni ni' Jesús, dxejc caguspjdzni ni'ni con xquidxejcni. Dxejc bachagro'ni ni'ni bazaazani setnejxhga ni' Jesús. ³⁹ Che bahuui farisee ni gurejidx Jesús rolizjni, recosre, bejnni xhigab: "Palga gulii najc niguiire Xi'n Dios, sacbeeni chu najc näjza xho najc gunaare ni cagajin ni'ni, sacbeezanii najcni te gunadol-duxh." ⁴⁰ Dxejc gunii loj fariseega, räjpni:

—Simón, yu' xhi rlazä guiniä lojlu.

Dxejc räjp fariseega lojni:

—Guniini, Dad mastr.

⁴¹ Dxejc räjp Jesús lojni:

—Tio'p bejn nazääb meel lo te bejn ni rudedlaa meel. Tej reni nazääb si'cti gai-igayuu meel. Steeni nazääb si'cti tiubit-ztu meel. ⁴² Cheni di niajcdi niguijxreni xti'nreni, basiäl lajzni xti'h guiro'preni. Naj gunii loä, ¿chu tejreni sianälajzru dade'ga, ä?

⁴³ Badzu' Simón diidxre lojni, räjpni:

—Rchaloä bejn ni nazääbru lojni.

Dxejc räjp Jesús:

—Laaca rniliu.

⁴⁴ Dxejc gubiré Jesús, bahuui loj gunaaga. Dxejc räjpni loj Simón:

—¡Bahuui loj gunaare! Che biu'a roli-jzlu, dilu nuniidx nis te nidiib ni'ä. Per gunaare gudibnäjni ni'ä nisbee ni birii balo-jni, dxejc baspjdzni ni'ä con xquidxejcni.

⁴⁵ Dilu nuchagro' narä, luxh laani cheli biu'a ree, gajdni cuääz guchagro'ni ni'ä. ⁴⁶ Dilu nusäl se't yecä, niluxh laani basälni se't ni rlianexhdukh ni'ä. ⁴⁷ Ni'cni rniä lojlu, dojl xten gunaare, luxh xhidalduxh na-jcreni, abadzucaj Dios redoijlga sa'csi huen-liisi sanälajzni Dios. Luxh rebejn ni rudzu-caj Dios guxii xtojlnreni, guxiiza sanälajzreni Dios.

⁴⁸ Dxejcti räjpni loj gunaaga:

—Agubicaj rextojllu.

⁴⁹ Dxejc rebejn ni sobga' lo mex con laani, che biejn diajgreni rediidxre, gusloj canii lo sa'reni, räjpreni:

—¿Chuchani'c najc niguiire, ni'cni rudzucajlini xtojl bejn, ä?

⁵⁰ Räjp Jesús loj gunaaga:

—Agualaaloo lo xtojllu sa'csi ahuililajzlu; huij naj, bascuedxi lajzlu.

8

Regunaa ni gucnäj Jesús

¹ Dxejcti gusloj huij Jesús guiraa reguejdx näjza rerench, cagusule'ni xtidx Dios, caguluini xcient xcälnibee Dios loj rebejn. Sanäni rexpejnpacni ² näjza gaii gunaa ni abasiajci, agulääni rebendxbab lastooreni, näjza basiajci xcälguijdxreni. Tejni laa Marii ni laaza Magdalén, ni gulää Jesús gajdz bendxbab neñ lastooni. ³ Stee gunaa laa Xuan, ni najc chääl Chuza, ni ruhuii xhixten Herodes. Stee gunaa laa Susan. Guyu'za sgaii gunaa. Guiraa reni'c rudeed lagajc xhixtenreni te rio' recos ni rquiiri-reni.

Xcient bejn ni rbe'c binij

(Mt. 13:1-9; Mr. 4:1-9)

⁴ Dxejcti bire' xhidajl bejn lojni ni birii xhidajl reguejdx. Lojreni gunii Jesús con te cuent ni ruluii, räjpni:

⁵ —Birii te bejn sale'c binij. Cheni cabe'cni binij, yu'binij ni bitejb cuä' nezyuj. Che sadejd rebejn baläjreni yejc binijga, biiäädza remane' ni rutajt xhaguiba, gudajwrenini. ⁶ Yu'za lajt bitejb binijga neñ reguuj cadro xheti xhidajl yuj. Che gulejn binijga, gubidzgajcni sa'csi xheti xcojp ro'c. ⁷ Yu'za lajt bitejbni neñ neyaguejch. Che gulejnni, di reyaguejch nusaan niroob gäjlgä. ⁸ Yu'za lajt bitejb binijga lo yusa'c, ro'c gucdukhni. Cheni guroobni, yu' binijga guje te gayuu xob loj tejga binij ni gule'c dade'ga.

Che gulujx guniini scree, dxejc guniini dip räjpni:

—Palga sajc gucuadijgtu rediidxga, colcuadiagsa'cni.

Xhicuent gunii Jesús recuent

(Mt. 13:10-17; Mr. 4:10-12)

⁹ Dxejcti gunabdiidx rexpejnpacni lojni räjpreni:

—¿Xhi sáloj cuentre?

¹⁰Dxejc rájpni lojreni:

—Lojtu ni nadjc rexpejnä sumiidx Dios yälhnajn te gaceetu reyälxhiga'tz xten xcälrnibeen. Loj chutis stee bejn, siniä recuent lojreni te mase cadxelojreni, direni fisa'c, luxh mase cacuadiagreni, direni gacbesa'c.

*Rusule' Jesús xcient ni rbe'c binij
(Mt. 13:18-23; Mr. 4:13-20)*

¹¹Räjpzani:

—Scree sälöj cuentre, rebinij nadjc si'c xtidx Dios. ¹²Binij ni biajb lo nezyuj nadjc si'c rebejn ni rucuadiajg xtidx Dios. Dxejc riääd bendxbab, riäddzucajni rediidxga lastooreni te na'c chalilajzreni xtidx Dios, te na'cza laareni lo dojl. ¹³Binij ni biajb nen reguij nadjc si'c rebejn ni rucuadiajg xtidx Dios, rbaalajzreni; per sa'csi xheti xlobaareni, nälajznu, direni gandzu'tz xtidx Dios, rililajzreni te bo'c, per che rsacsí rebejnreni, rbälazreni xtidx Dios. ¹⁴Binij ni biajb nen reyaguejch nadjc si'c rebejn ni rucuadiajg xtidx Dios, per laj ni sanuureni xnejzreni, rijia'nreni lo recos quedxliuj, lo yälNASA'a'c ni ruhuiireni, näjza rujnreni si'ctis ni rlajz tiejxhreni. Reni'c rujn runijtreni xtidx Dios, ni'cni direni guzoob xtidx Dios, direni chanuu te gunreni xtzunsa'c Dios. ¹⁵Binij ni riajb lo reyusa'c nadjc si'c rebejn nani rucuadiajg xtidx Dios, ni rililajz diidxga guideb te lastoya ni nadjc hueen. Randzu'tzreni xtidx Dios, dxejc rudedreni te yälNASA'a'c, nalajznu ruzoobreni xtidx Dios, rujnreni xtzunsa'c Dios.

*Xhet yu'di ni naga'tz par tejpas
(Mr. 4:21-25)*

¹⁶Räjpzani:

—Ruti te bejn ni rucuaguij te bajl dxejc rusäuni te caj yejc bajlga, dizani gusujinji dejtz te loon. Alga rusoobnini nen can-dilieer loj te mex te guzanijni guideb nen yu'ga te reni jiu' fireni lo bajlga. ¹⁷Xhet yu'di ni yuchetzu'tzdi ni di guidzujn dxej guiluiini; xhet yu'diza ni naga'tz näj ni di guidzujn dxej gacbee bejnni.

¹⁸'Ni'cni colcuadiagsa'c diidx; sa'csi guiraa rebejn ni rajp yälracbee, sajprurenii yälhnajn. Luxh reni di ninuu nucuadiajg xtidx Dios, lojni sibicaj näj ni abacuadiagjni, ni rchaloni najnni.

Xnan Jesús con rebetzni

(Mt. 12:46-50; Mr. 3:31-35)

¹⁹Dxejc bidzujn xnan Jesús näjza rebetzni cadro suga'ni, niluxh di niajcdi nibigreni lojni sa'csi tre' xhidalduxh bejn ro'c.

²⁰Dxejcti huisa'n te bejn diidx loj Jesús, rájpni:

—Xnan guejblu näjza rebetz guejblu sua'rolä', luxh rlajzreni fiireni lo guejblu.

²¹Badzu' Jesús diidxre lojreni, rájpni:

—Xnanä näjza rebetzä nadjc rebejn ni rucuadiajg, ni ruzoobza xtidz Dios.

Basiacdxi Jesús te beduxh

(Mt. 8:23-27; Mr. 4:35-41)

²²Te dxej biu' Jesús näjza rexpejn pacni nen te barcw. Dxejc rájpni lojreni:

—Colcho' stelaad ro'nisre.

Basyu'reni barcw lo nis, sä'tireni. ²³Cheni sadejdreni galäii nisga, gudiejs Jesús nen barcw. Dxejc gubi' te beduxh lo nisga, luxh sa'csi lacti nadip ro' bejga, gusloj cayu'nis nen barcw, ameerli jiääz barcwga lo nis.

²⁴Dxejcti huicüänreni Jesús, rájpreni lojni:

—¡Mastr! ¡Mastr! ¡Cayääznu lo nis!

Che gubajnni, huistieni, dxejc gudidxa'ni lo bejga näjza lo nis ni cayásjiaa. Dxejc guläjz bejga, guredxiza nisga. ²⁵Dxejc rájpni lojreni:

—¿Con xcälrililajztu, ä?

Per laareni bidxejbreni, bidxelo-duxhreni, canabdiidxreni lo sa'reni:

—¿Chuni'c nadjc niguiire te rnibeeni bej näjza nis, luxh rusobdiajg bej näjza nis xtiidxni?

*Te ben Gadara ni guyu' rexsprit
benedxab lastooni*

(Mt. 8:28-34; Mr. 5:1-20)

²⁶Bidzujntireni lo yuj xten Gadara ni tre' stelaad ro' nis nez loj reyuj xten Galilee.

²⁷Cheni biäjt Jesús nen barcw baläjni lo yuj, gubig te bejn ni siääd guejdxga lojni. Agujc xchej yu' rebendxbab nen lastooni. Dini gacw xhajbni, dizani cuääz nen yu', alga rbäjzni cadro yu' rebaa. ²⁸Che bahuiini loj Jesús bazuxhijbni nez lojni, guredx'a'ni rájpni:

—¿Xhicuent riädcchu'l loonu, luj, Jesús Xi'n Gueb Dios ni rbäjz xhaguibaa? Rniabdukhä lojlu, na'cru gusacsílu nuurnu.

²⁹Guniini rediidxre sa'csi canibee Jesús guirii rebendxbagá nen lastoo bejnre. Agujc xchero cazob rniaaz rebendxbagá

bejngä ruliiib rebejn ni'ni, naani con cadenguiib te guilibdu'tzni, te xhet gundini bejn. Niluxh laani rutiugya'ní recaden, dxejc rebendxabga rinärenini nez lo reyubijdz. ³⁰ Jesúus gunabdiidx lojní, räjpni:

—¿Chu laalu?

Dxejc badzu'ni diidxre loj Jesúus räjpni:

—Legión najc laä.

Si'c guniini sa'csi xhidalduxh najc rebendxab ni yu' neñ lastooni. ³¹ Dxejc gunabduxhreni loj Jesúus na'c guxhalşacnireni cadro biriireni. ³² Lagajc dxejc suga' xhidajl cuch cayajwreni guixa' lagajc nejzga lo te bala'. Dxejc gunab rebendxabga loj Jesúus te gusaanni jiu'reni neñ recuchga. Che cuájb Jesúus, ³³ birii rebendxabga neñ lastoo dade'ga, biugajcreni neñ recuchga. Che biu'reni neñ recuch, baxun recuchga bitejbreni ro' te bala', dxejc biajbreni lo nis, ro'cti gujtreni.

³⁴ Baxun reni cayaip recuchga che bahui-ireni xhini'c gujc ro'c, huisa'nreni diidx lo rebenguejdxga näjza lo reben rench. ³⁵ Dxejc biádhuii rebejn xhini'c gujc ro'c. Che bidzujnreni cadro suga' Jesúus, bahui-ireni loj bejn ni birii bendxbab lastooni. Sobga'ni cuá' ni' Jesúus, najcwni xhajbni, luxh xhetru rajcdi yejcni; dxejc bidxeb-duxh rebejinga. ³⁶ Sas reni bahuiloj xho gujcni, bijreni diidx xho basiajc Jesúus bejn ni guyu' rebendxbare lastooni. ³⁷ Dxejc guiraa reben Gadara näjza reguejdx ni tre' nejzga, gunabreni jiunejz Jesúus ro'c sa'csi cadxeb-duxhreni. Ni'cni biu' Jesúus neñ barcw te gubisacni nejz cadro siäädni. ³⁸ Dade' ni birii rebendxbab lastooni gunabni lo Jesúus gusaanni chanajlnini, niluxh Jesúus gunibee jia'nni, räjpni lojni:

³⁹ —Gubi' rolijzlu te güili diidx recosro ni bejn Dios xcuent luj.

Dxejc sääni, batie'chni diidx guideb lo guejdxga xhi bennäj Jesúusni.

Xindxa'p Jairo näjza te gunaa ni gudajn xhajb Jesúus

(Mt. 9:18-26; Mr. 5:21-43)

⁴⁰ Che gubi' Jesúus stelaad nis, bibal-ajz rebejn gubi'ni, sa'csi cabätzpacreni gubisacni. ⁴¹ Dxejc bidzujn te bejn ni laa Jairo, ni rnibee te guidobáz, bazuxhijbni nez loj Jesúus, gunabni chanänini rolijzni

⁴² sa'csi yu' tejtis xindxa'pni. Yu'ni tzubitio'p ijz, luxh cayacxhuuni, ameerli guetni. Lalsi sää Jesúus rolijzni, birinajl xhidalduxh bejnni, catäälirenini.

⁴³ Loj rebejngä nadxaag te gunaa ni agujc tzubito'p ijz cayacxhuuni, cayajci yälguidxbäi. Xlia'si abanijtni guiraa xhix-tenni cua' renani rujn remeed. ⁴⁴ Gubig gunaaga dejtz Jesúus te gudajnni ro' xhajbni. Lagajc dxejc biacgajcni.

⁴⁵ Dxejcti gunabdiidx Jesúus räjpni:

—¿Chuni'c najc ni gudajn narä, ä?

Guiraa rebejn räjp:

—Dinu gan.

Räjpza Pedr:

—Mastr, ni yu'lü galäii reben xhidajl, luxh cagutäälirenli luj. ¿Xhicuent rniabdiidxlu: “¿Chu gudajn narä?”

⁴⁶ Räjppac Jesúus lojni:

—Yu' chu gudajn narä, sa'csi gucbeä yu' chu basiajc xcälrnibeä.

⁴⁷ Che gucbee gunaaga anajn Jesúus gudajnni xhajbni, bidxejzlu, racsejslini gubigni loj Jesúus, bazuxhijbni lojni. nez loj guiraa rebejn räjpni xhicuent gudajnni xhajbni näjza xho biacgajcni.

⁴⁸ Dxejc räjp Jesúus lojni:

—Huij. Gulecdilajzlu, xinda'pä. Abiaj-clu sa'csi huililajzlu.

⁴⁹ Lalni canii Jesúus si'c bidzujn te bejn ni siääd rolijz Jairo, ni rnibee te guidobáz. Räjpni loj Jairo:

—Agujt xindxa'plu. Na'cru gutajllu xtzuu Dad Mastr.

⁵⁰ Che biejn diajg Jesúus rediidxga, räjpni loj Jairo:

—Na'c guidxejblu. Huililajzts te jiac xindxa'plu.

⁵¹ Che bidzujnreni rolijzni, xtebtis Pedr, Jacoob, Juan näjza xcuazajn dxape'ga bi-unäjni nen yu'ga. Peta rebejn ni siädnajlni bia'nreni rolä'. ⁵² Cayonduxh guiraa rebejn ni sobga' neñ yu'. Dxejc Jesúus räjp lojreni:

—Na'c roontu, gajd dxape're guet, na-gayejstisi.

⁵³ Alga baxhiznäjrenini, sa'csi anajnreni agujt dxape'ga. ⁵⁴ Dxejcti gunaaz Jesúus naa dxape'ga, dip guniini, räjpni lojni:

—¡Dxape', huistie!

⁵⁵ Dxejc gubansac dxape'ga, huistiegajcni. Dxejc gunibee Jesúus gudeedreni xhi gauni.

⁵⁶ Bidxeloduxh rexczajnni. Per gunibee Jesús na'c güireni diidx xhini'c gujc ro'c.

9

Ruxhal Jesús guitzubitio'p rexpejnpacni

(Mt. 10:5-15; Mr. 6:7-13)

¹ Batie' Jesús guitzubitio'p rexpejnpacni te badeedni yälrnibee lojreni te cuääreni rebendxbab lastoo rebejn, näjza te gusiajcreni rebenracxhuu. ² Baxhalnirení te gusule'reni diidx xcuent xçälrnibee Dios näjza te gusiajcreni rebenracxhuu. ³ Dxejc räjpní lojreni:

—Xhet chanädítu lo nejz, nicla baston, nicla bols, nicla yätxtiil, nicla meel; na'cza chanätu tio'p xhajbtu; tejtismi chanätu. ⁴ Chutis rolíjz bejn cadro guidzujntu, ro'c coljia'n cheni guiriilitu lo guejdxga. ⁵ Palga direni gusaan jiu'tu rolíjzreni, che jiunejztu lo guejdxga, colçujjb guxhuj ni'tu si'c te seen direni nililajz xtiiadxu.

⁶ Dxejc biriireni sääreni garen-garen reguejdx, cagusule'reni xtidx Dios, cagusiajczareni rebenracxhuu cadrotis rdzujnreni.

Xho gujt Juan ni rutiobnis

(Mt. 14:1-12; Mr. 6:14-29)

⁷ Che biejn diajg Herodes ni rnibee guiraa ni cayujn Jesús, guyu'ní yärsia', dini gan xho gunni xhigab, sa'csi yu' reni canii laa Juan ni agubansac lo rebengut. ⁸ Sgaiireni canii abaluiloj Elías. Yu'zareni canii pet laa stee niguui ni gunii xtidx Dios galoo ni agubansac. ⁹ Per räjp Herodes:

—Lagajc narä gunibeä biru' yejc Juan ni rutiobnis, ¿chuchani'c najc niguuire ni riejn diagä xhidajl didxro xcuentri?

Dxejc rlajzpac Herodes fii lojni.

Bayaan Jesús gaii mil bejn

(Mt. 14:13-21; Mr. 6:30-44; Jn. 6:1-14)

¹⁰ Che gubi' rexpejnpacni, bijreni diidx loj Jesús xhini'c bejnreni. Sas huinä Jesúsreni te lajt cadro ruti bejn, gajxh te guejdx ni laa Betsaida. ¹¹ Che gucbee rebejn caro sääreni, huinajlrenini bidxalrenini. Che siäädreni lojni huichaglojneni, sas gusloj cagusule'ni lojreni xcuent xçälrnibee Dios. Basiajczani rebejn ni cayacxhuu.

¹² Che gusloj cayäz gubijdx, gubig rexpejnpacni loj Jesús, räjpreni lojni:

—Gojs loj rebejnre, agojl jiireni te chatilreni xhi gaureni, näjza cadro tedreni guxhijn lo rerench, nen reguedxbätz, sa'csi ree xhet yu'di.

¹³ Dxejcti räjp Jesús loj rexpejnpacni:

—¡La'tu colgudeed xhi gaureni!

Dxejc räjpreni lojni:

—Xhet rajpdinu, gaitis yätxtiil näjza tio'p bälj. Ni'ctis yu' palga dinu chasiuru xhi gau reben xhidajlre.

¹⁴ Luxh najc rebejnra si'cti gaii mil niguui.

Dxejc räjp Jesús loj rexpejnpacni:

—Colyejtz lojreni cuereni xcua-xcuaareni, si'cti tiuubitzugajreni te cuaa.

¹⁵ Si'c bejnrenini, sas gurej guiraa rebejninga si'c. ¹⁶ Dxejc cua' Jesús gaii yätxtiilga näjza tio'p bäljga, gulänsi lojni xhaguibaa, badeedni xquixtios lo Dios xcuent yärlrajwga. Che gulujx badeedni xquixtios gula'ni reyätxtiilga näjza rebäljga, dxejc sanuutis badeednini loj rexpejnpacni te gudisrenini loj rebejngá. ¹⁷ Guiraa reben xhidaalga gudajw, gudxaj xque'reni. Dx-ejcti batojpreni ni bia'n bachajreni tzubitio'p dxijm yätxtilbiuyj näjza bälbiuyj ni bia'n.

Gunii Pedr Jesús najc Crist

(Mt. 16:13-19; Mr. 8:27-29)

¹⁸ Te dxej lajní cabedx-canab Jesús lo Dios, xtebni näjza rexpejnpacni, gunabdiidxni lojreni, räjpní:

—¿Chuni'c rnii rebejn nacä?

¹⁹ Dxejc räjpreni lojni:

—Yu'reni rnii najclu Juan ni rutiobnis; yu'zareni rnii najclu Elías; sgaiireni rnii najclu stee niguui ni gunii xtidx Dios galoo ni agubansac.

²⁰ Dxejc gunabdiidxni lojreni, räjpní:

—¿La'tu a? ¿Chuni'c rniiu nacä?

Dxejc räjp Pedr lojni:

—Luj najclu Crist Xi'n Dios ni cabäaznu.

Jesús rnixgaa xho guetni

(Mt. 16:20-28; Mr. 8:30-9:1)

²¹ Dxejc gunibee Jesús lojreni, räjpní:

—Na'c gäbtu si'c lo rebejn.

²² Räjzpazi lojreni:

—Nanab ted Xi'n Niguii trabajwdxh; rebengool xten guidoo, näjza rebixhojz, näjza rebejn ni ruluii xleii Moisés sibälazreni narä, naarení dina gacä Crist

ni cabäääznu. Sugu'treni narä Xi'n Dios ni gujc Niguii, niluxh sibansacä ni riojn dxej.

²³ Dxejc rájpni loj guiraareni:

—Palga chu tejtü rlajz guirinajl narä, nanab jiällajzni xhixtenni, te guixe-guixee guntisni nani gudedä gunni. ²⁴ Sa'csi nani rlajz guiniazdu'tzni xcälhabajjni, sunijtni yälnabajn lo Dios; luxh nani runijt xcälnabajnni xcient xtidxä, sica'ni yälnabajn par tejpas. ²⁵ Sa'csi ¿xhi gaan gun te bejñ palga xca'ni guideb quedxliuj, luxh gunijtni xcälhabajnni lo Dios? ²⁶ Niluxh nani guituinäj narä näjza xtidxä, sigajcza narä, Xi'n Dios ni gujc Niguii, situinääzani cheni jiälä si'c reii guideb yäldimbicha' xten Xtdä näjza rexanglni. ²⁷ Guliipac rniä lojtu, yu' gaii reni suga' ree, ni di guet, suhuixgaareni xcälrnibee Dios.

Bachaa xho rluiloj Jesús
(Mt. 17:1-8; Mr. 9:2-8)

²⁸ Gudejdti xhujñ dxej gunii Jesús diidxre, dxejcru huinä Jesús Pedr näjza Jacoboob näjza Juan, huijreni jiaa yejc te dajn te guredx-gunabni loj Dios. ²⁹ Lañni cabedx-canab Jesús lo Dios, bidxaa xho ruluij lojni; dxejc xhajbni gujc nolbäj, rdimbicha'lini. ³⁰ Biricajza tio'p dade' caninäjrenini. Redade'ga najc toMoisés näjza Elías. ³¹ Rdimbicha'za redade'ga. Caninäjreni Jesús xcient xho guetni guedx Jerusalén. ³² Luxh Pedr näjza resa'ni guyuduxh bacal lojreni; che bire'ch bacal lojreni bahuiireni lo yäldimbicha' xten Jesús näjza loj guiro'p redade' ni caninäjni. ³³ Cheni agojl jiunejz redade'ga loj Jesús, rájp Pedr loj Jesús:

—Dad, Mastr, huenduxh suga'nú ree. Basaan jiencheenu chon yue', tejni par luj, tejni par Moisés, steeni par Elías.

Luxh di Pedr gaan xhini'c caniini. ³⁴ Lañni caniini si'c, bire' te za gusloj cayäjt yejcreni, dxejc bidxejbreni che biu'reni neñ zaga. ³⁵ Dxejcti biejn diajgreni neñ zaga te xse' te ni gunii, rájpni:

—Dee najc Xi'ná ni sanälazä, colcuadijg xtiidxni.

³⁶ Che gulujx gumiini rediidxga, bahuiireni sugaxteb Jesús. Dxejc niäutis ro'reni nen redxejga, rut lojdi bijreni diidx xcient ni bahuiireni ro'c.

Basiajc Jesús te biuux ni guyu' bendxbab lastooni

(Mt. 17:14-21; Mr. 9:14-29)

³⁷ Barayääl cheni biäjtreni yejc dajnga, xhidalduxh bejñ cabäjz Jesús. ³⁸ Dxejcti te dade' ni nadxaag rebejngä guredxa'ni, rájpni loj Jesús:

—Mastr, baslasljz narä, gudahuii xi'nä, sa'csi xtebtisni najcni xinganä. ³⁹ Luxh bendxbab rniaazni, sas ruscuedxa'ni, rajcni si'c yälguidxbzej, rbäani bitzun ro'ni, rusacsíduxhnini, luxh dini guasaanni. ⁴⁰ Agunabä loj rexpejnpaalu nibääreni bendxbabga, luxh di njajcdini.

⁴¹ Dxejc badzu' Jesús diidxre, rájpni:

—¡Bejñ ni di chalilajz, benguiidx! ¡Gucli chunäätu, gucli gunä huant la'tu! ¡Gudanä xi'nlu reel!

⁴² Dxejc che cabig biuuxga lojni, basält'a' bendxbabga biuuxga lo yuj, sas gusloj caya-jcni si'c yälguidxbeduxh. Dxejc gudidxa' Jesús loj bendxbabga, basiacgajci biuuxga, dxejc badeednini lo xtdnii. ⁴³ Guiraa rebejñ bidxeloduxh yälrni beduxh xten Dios.

Rnii Jesús stehuält xho guetni

(Mt. 17:22-23; Mr. 9:30-32)

Lañni cadxeloj rebejñ lo recos ni bejñ Jesús, rájpni loj rexpejnpacni:

⁴⁴ —Colcuadijgsa'c rediidxre, na'cza jiällajtureni, sa'csi sutedreni narä Xi'n Dios ni gujc Niguii ladznaa rebejñ.

⁴⁵ Niluxh di rexpejnpacni niacbee xhi säloj rextiidxni, sa'csi Dios bacua'tznni lojreni te di niacbeerrenini. Bidxejbareni niniabdiidxreni loj Jesús xhi säloj rediidxga.

Chuni'c sajcrú

(Mt. 18:1-5; Mr. 9:33-37)

⁴⁶ Gusloja rexpejñ Jesús canabdiidx lo sa'reni:

—¿Chuchani'c sajcrú loonu?

⁴⁷ Per gucbee Jesús xhi xhigab cayujnreni. Dxejc cua'ni te biuxbäz, bazujnini cuä'ni, ⁴⁸ rájpni lojreni:

—Chutis ni xca' te biuxe' sa'csi sanälazä ni narä, naräni rca'ni luxh ni rca' narä, rca'ni xtdä ni baxhal narä. Ni najc maaazru nadolajz lojtu, ni'c najc ni sajcrú.

Nani di guiniyaj nuurnu, xladnu yu'ni

(Mr. 9:38-40)

⁴⁹ Dxejc rájp Juan loj Jesús:

—Mastr, bihuiinu loj te bejn ni rbäǟ rexpendxb neñ lastoo bejn con xcälrnibee lajlu. Dxejc rie'tznu lojni na'cru gunni si'c, sa'csi dini sanäj nuurnu.

⁵⁰ Dxejc rájp Jesús lojreni:

—Na'c gudxoxtuni, sa'csi nani di guiniyaj nuurnu, xlaadnu yu'ni.

Jesús gudidxa' loj Jacob näjza Juan

⁵¹ Che siäddzuñ redxej ni chäǟ Jesús xhaguiba, bejnni xhigab chäǟpacni guedx Jerusalén. ⁵² Baxhalñi gaii bejn gunijd lojni chäǟreni te guejdx xten Samaria te sati-ilreni cadro jia'nreni ro'c. ⁵³ Luxh rebejn samaritan di rlajzreni gudedlaereni te lajt cadro jia'nreni, sa'csi najnreni chäǟreni guedx Jerusalén. ⁵⁴ Che bejn diajg Jacob näj Juan, tio'p xpejnpacni, si'c, sas rájpreni loj Jesús:

—Dad, ¿La rlajzlu guinibeenu jiäjt guiboo xhaguibaali te guze'cni guiraa rebenguejdxga si'cni bejn Elías?

⁵⁵ Dxejc bahuui Jesús lojreni, gudidxa'ni lojreni, rájpni:

—Ditu gaan chuni'c rnibee lastootu.

⁵⁶ Sa'csi narä Xi'n Dios ni gujc Niguii dina niälä te guducaä xcälnabajn rebejn. Narä biälä te guslääreni lo dojl.

Dxejcti huijreni garenca guejdx.

Reni rlajz narinajl Jesús

(Mt. 8:19-22)

⁵⁷ Lalni sääreni lo nezyuj, biääd te bejn gunii loj Jesús, rájpni:

—Dad, narä rlazä jiädnalä guejblu cadrotis chäǟ guejblu.

⁵⁸ Dxejc badzu' Jesús diidxre lojni, rájpni:

—Rebäjz rajp xpiliääreni, remane' ni ruttajt rajp xpitääzreni, niluxh narä Xi'n Dios ni gujc Niguii, dina gapä nicla te lajt cadro guscugä yecä.

⁵⁹ Dxejcti rájp Jesús lo stee bejn:

—Gudanajl narä.

Luxh laani rájpni:

—Dad, basaan suchacula'tzxgaá xtadä, dxejcru jiädnalä guejblu.

⁶⁰ Dxejc rájp Jesús lojni:

—Basaan suchacula'tz rebejn ni najc si'c bengut, resabengutreni. Per luj, huij, huisule' diidx xcuent xcälrnibee Dios.

⁶¹ Dxejc rájp steeni lojni:

—Dad, rlazä jiädnalålu, niluxh basanx-gaa chasadidxä resa'ä ni tre' rolizä.

⁶² Dxejc rájp Jesús lojni:

—Nani ruzuj naani yejc garaad, dxejc rudzuré lojni ruhuini nez dejtzni di gacdi gunni dzuun lo xcälrnibee Dios.

10

Ruxhal Jesús regayonbitzuu

¹ Che gulujx reni'c, gule Jesús gayonbitzuu bejn, baxhalnireni tio'pgajreni te bas-nijndnireni lojni loj reguejdx cadro nanab tedni. ² Räjpni lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni colguiniab lo baxhuaan xten cose'ch te guxhalñi xhidajlru bejn ni gun dzuun gutie' xcose'chni. ³ Colchäj la'tu; colhuii xho ruxhalä la'tu si'c xil galäi recuyo't sa'csi sunnäjreni la'tu si'ctisni rlajzreni. ⁴ Na'c chanätu ngodx, niclaza guijxh, niclaza xcura'ctu, luxh na'c sudxitu guininäjtu bejn lo nejz. ⁵ Cheni jiu'tu rolizj te bejn, ganiddoo colye'tz: "Sucedixilajz reni rbäjz ree." ⁶ Palga najcni te bejn ni rdxaglajz yärlbecdixilajz sia'n xcälrbecdixilajztu ro'c, luxh palga dini gac, sibi' xcälrbecdixilajztu lojtu. ⁷ Coljia'n lagajc rolizj bejn cadro guidzujntu. Ro'c coltajw, colyä'za xhitis ni guniidxreni, sa'csi nani rujn dzuun, riäj xca'ní xcuent dzuunga. Coljia'n tejtis lajt dxejtis ni chutu lo guejdxga. ⁸ Xhitis te guejdx ni jiu'tu, palga jiurenla'tu, colgajw xhitis ni guniidxreni lojtu. ⁹ Colgusiajc rebenracxhuu ni yu' ro'c, colye'tz lojreni: "Abidzungajxh xcälrnibee Dios." ¹⁰ Palga jiu'tu te guejdx cadro di rlajzreni gucuadajgreni xtiidxtu, colrii lo nezyuj, ro'c colye'tz lojreni: ¹¹ "Guxhuj xten lajdtu ni rcaj ni'nú, rudzu'nuni nez lojtu si'c te seen sa'csi ditu nililajz xtiidxn. Colgacbee dee, abidzungajxh xcälrnibee Dios lojtu." ¹² Ni'cni rniliäpac lojtu, che gac fis xten Dios, nalaru gac fis xten Dios lo guejdxga loj ni gujc guedx Sodoma ni guyu' galoo.

Reguejdx ni di niu xtidx Jesucrist

(Mt. 11:20-24)

¹³ Räjpzani:

—¡Probe'tu ben guedx Corazín! ¡Probe'zatu ben guedx Betsaida! Paru nuhuii rebenzijt ni gubajn guedx Tiro näjza Sidón remilaagwr ni benä nez

lojtu, pet gucli nusiechljazreni, niajcwreni ladnagas, nibejjzareni lo cobdäj si'c te seen abasiechljazreni.¹⁴ Che gun Dios fis rextojl rebejn guedxliuj, guxiuru gac xfis Dios lo rebenzijt ni gubajn guedx Tiro näjza Sidón. Fisroru gun Dios reguedx Corazín näjza Betsaida.¹⁵ Luxh luj guedx Capernaum, rchalolu siäjslu xhaguibaa, alga siajbilji, cadre gaclu fisro xten Dios.

¹⁶ Rajpzani lo rexpejnpacni:

—Ni riu xtidxtu, laa xtidxä ni riuni. Nani di jiu xtidxtu, laa xtidxä ni dini jiu. Luxh ni di jiu xtidxä, laa xtidx ni baxhal narä ni dini jiu.

Rbi' regayonbitzuu

¹⁷ Che gubi' regayonbitzuu bejn nani baxhal Jesú, rbaduxh lajzreni, räjpreni:

—Dad, näjza rebendxbab rusobdiajg xtidxnu che rusä'tnu lajlu.

¹⁸ Räjp Jesú lojreni:

—O'n. Ni'lcní narä bahuiä che gunijt xcälrnibee bendxbab, bitejbni xhaguibaa si'c bianij xten guzii.¹⁹ Colgabee. Narä runidxä yälrnibee lojtu te guläjtu yejc bäl näjza yejc naxejb; runidxäza yälrnibee te guntu gaan lo xcälrnibee bendxbab. Xhetliidi gun daan la'tu.²⁰ Na'c guibalajztistu sa'csi rusobdiajg rebendxbab xtidxtu; colgubalajzru sa'csi acuaj lajtu lo xquijtz Dios xhaguibaa.

Bibalajz Jesú

(Mt. 11:25-27; 13:16-17)

²¹ Lagajc dxejc bibalaznäj Jesú Sprit Dxan xten Dios, dxejc räjpni lo Dios:

—Rliä'pä xpala'nlu Xtradä ni rnibee xhaguibaa näjza guedxliuj, sa'csi bacua'tzlu xnezyujlu lo reben nanduxh, per baluiliu xnezyujlu loj rebejn ni najc nadolajz si'c te biuxbäz. O'n, Xtradä, sa'csi si'c rlajzlu gunlu.

²² 'Guiraa recosre abaniidxlú loä Xtradä. Dadtis najn chuni'c najc Xi'nni, rutru najndi chu najcni. Rutza najndi chuni'c najc Guejblu Xtradä, xtebtis narä ni najc Xi'nlu, con rebejn ni rlazä gumbee luj.

²³ Dxejc bahuui Jesú loj rexpejnpacni, räjpni lojtsreni:

—Chicbaa la'tu näjza renani ruhuii guiraa nani cahuilojtu.²⁴ Sa'csi rniliä lojtu, balti redade' ni gunii xtidx Dios galoo, baltiza rereii rlajz nuhuiireni guiraa ni cahuilojtu, niluxh direni nuhuiara.

Rlajzreni niejn diajgreni rediidxre ni cayejn diajgtu, luxh di diajgreni niejnni.

Xcuent te behhuen ni siääd Samaria

²⁵ Dxejc huisuli te mastr xten leii, huinänjni Jesú, rlajzni nuxhiidni Jesú lo xtidxn, gunabdiidxni lojni:

—Dad, Mastr, ¿xhini'c nanab gunä te guibañnaä Dios par tejpas?

²⁶ Sas räjp Jesú lojni:

—¿Xhini'c caj lo guijtz xten leii? ¿Xho rolluni?

²⁷ Dxejc badzu'ni diidxre, räjpni:

—Chanälajzlu Dad, Xtioslu guideb las toolu, guideb xaimlu, guideb xtiplu, näjza guideb xcäriejnlu. Huinälajzza resa'lü si'ctis ni sanälajzlu lagajc luj.

²⁸ Dxejc räjp Jesú lojni:

—O'n, laacá rudzu'lü diidx. Palga gunlu si'c, sajplu yälhabajre.

²⁹ Per mastr xten leii, rlajzni nidedbiani ni'cni gunabdiidxni loj Jesú räjpni:

—¿Chuni'c najc resa'ä?

³⁰ Dxejc räjp Jesú lojni:

—Te ben laadxnu birii guedx Jerusalén, sääni guedx Jericó. Dxejc lo nezyuj biricaj gaii gubaan, gulajnreni guiraa xhix tenni, näjli xhajbni ni najcwni. Sas gudijnrenini, basa'nrenini ro'c, guxii cayäadx nugu'trenini.³¹ Gudejd te bixhöjz ni siääd laadxnu, sazaj lagajc nezyujga, cheni bahuiini lojni, alga gudejdni stee laad, sä'tini.

³² Gudejdza te levita, bejn ni rujnza dzuun nen guidoo. Che bidzujnni cadre naga' bejnga, gudejdni stelaad, sä'tini.³³ Dxejcti te ben Samaria, lajni sääni bij, gudejdni nezyujga, bidzujnni cadre naga' bejnga. Che bahuiini lojni, balaslajznini.

³⁴ Gubigni loj bejnga, basälni set näjza bin loj bejn ni nadxälguijdx, dxejc batejbnini te la' lajdz. Dxejc bascujbnini dejtz lagajc xmanni, huinänini cadre rudedlaareni yu', ro'c cuanäjnini.³⁵ Che bara yääl, gulääni tio'p meel badeedni lo baxhuaan yu'ga. Dxejc räjpni: "Cuanälala bejnre; palga guni-jtrulu, siguixätini lojlu che guibi'ä."

Sä'tini.

³⁶ Dxejc räjp Jesú lo mastr xten leii:

—¿Chu tej lo guidxon rebejngä najc si'c sa' xten dade' ni bijb ladznaa gubaan?

³⁷ Dxejc räjpni loj Jesú:

—Ni balaslajz bejnga.

Dxejc räjp Jesú lojni:

—Huij te sigajcza chayejnlu.

Bidzujn Jesús rolijz Mart näjza Marii

³⁸ Lalni huinuu xnezyujni, bidzujnni te guejdx. Ro'c bidxaagni te gunaa ni laa Mart ni huinänini rolijzni. ³⁹ Yu' te bájl Mart ni laa Marii, luxh laani gurejni cuä' ni' Jesús te cacuadiagni xtiidxni. ⁴⁰ Mart cagusquejnni cayujnni xhi gaurenii. Sas gubigni loj Jesús, räjpni lojni:

—*La dilu jiu rusanxteb bälä narä te xtebä cayunä remandaad?* ¡Gojs lojni gac-näjni narä!

⁴¹ Dxejc räjp Jesús lojni:

—Mart, Mart, cayuduxhlu yärsia', riulu xhidajl cos, ⁴² luxh yu' tejtis ni nanabpac. Agule Marii ni najc huenru, rut sajcdi gudzucajnni lojni.

11

Ruluii Jesús xho guiniabni lo Dios
(Mt. 6:9-15; 7:7-11)

¹ Te huält cabedx-canab Jesús loj Xtagdi Dios, suga'ni te lajt. Che gulujx cabedx-canabni, gunii te xpejnpacni lojni, räjpni:

—Dad, baluui nurnu xho cuedx-guiniabnu lo Dios, si'c baluui Juan ni batibnis rexpejnpacni.

² Dxejc räjp Jesús lojreni:

—Che cuedx-guiniabtu lo Dios, scree colnii:

Xtagdu ni yu' xhaguibaa,
suchä'p xpala'nlu, sujiääd xcälrnibeelu.
Sugac si'ctisni rlajzlu gac lo guedxliuj
si'cpac rajcni xhaguibaa.

³ Guira dxej baniidx xcu'nmu si'ctis ni rqui-innuni.

⁴ Basiäjl lajzlu redojl xtenuu si'cni riäjl la-jznu redojl ni rujn rebejn loonu.
Na'c gusaanlu jiajbnu lo xcälrnibee bendxbab.

Baslaa nuurnu lo dojl.

⁵ Dxejc räjpja Jesús lojreni:

—Paru tejtu yu' te xamiigwni, luxh guidzujnni rolijzni garol yääl, gäbni: “Xamigwä, banidxlaa chon yättxtil, ⁶ sa'csi bidzujn te xamigwä roližä ni bazaj biaj, luxh xhet ra'pädi te gudedä xhi gauni.”

⁷ Xhixh sinii ni naga' nen xyu'ni, gäbni: “Na'c riädtie'chlu bacal loä. Niäu rola' luxh rex'iä naga' cuä'lä, digacdi chästieä te gunidxä xhi gunidxä lojlu.” ⁸ Rniliä lojtu, mase dini chastie te gudeednini sa'csi

najcni xamiigwni, sistieni, sudeedni nani rquiintisni te na'cru gutie'chni bacalni.

⁹ Sigajcza rniä lojtu, palga guiniabtu xhi guiniabtu, sica'tuni. Palga chatiiltu xhi chatiiltu, sidxältuni. Palga chasejzu rolä', suxhalreni rolä' lojtu. ¹⁰ Sa'csi chutis ni rniab, rca'ni nani rniabni; chutis ni rguil xhi cos, rdxälñini; nani rusejz rolä', suxhalzareni lojni.

¹¹ Paru tejtu ni najc dad, jiääd te xi'ntu guiniabni te yättxtil lojtu, ¹² la sudeedu te guij, ä? O palga guiniabni te bájl, ¹³ la sudeedu te bål, ä? ¹⁴ O palga guiniabni te tzutbejt, ¹⁵ la sudeedu te naxejb, ä? ¹⁵ Palga la'tu, ni najc bendojl, rajc rudeedtu cossa'c loj rex'iäntu, aticaxh Dios ni yu' xhaguibaa sudeedni Sprit Dxan xtelli loj renani rniabni lojni.

Rucuaquijreni Jesús, rniireni rajpni yälrnibee xten bendxbab
(Mt. 12:22-30; Mr. 3:19-27)

¹⁴ Gulää Jesús te bendxbagop lastoo te bejn. Che birii bendxbagpa lastoo bejngaa, guslogajc canii bejngaa, dxejc bidxeloduxh reben xhidaalgaa. ¹⁵ Dxejc yu' reni räjp:

—Niguire rbäärebendxbab con yälrnibee xten Beelzebú ni rnibee loj rebendxbab.

¹⁶ Sgaiireni rlajz guquilrenini, ni'c canabremi gunni te seen ni siääd xhaguibaali. ¹⁷ Niluxh laani gucbeeni xhi xhigab cayujnreni dxejc räjpni lojreni:

—Xhitis gubieer ni rlia' sa'ni lo sa'ni, luxh tilnäj te cuaani stee cuaaga, di gaclaa sinijt gubierga lo guedxliuj. Palga te famili rdilnäj lagajc sa'ni, di gaclaa sinitoj familga. ¹⁸ Palga guiliä' sa' rebendxbab, ¹⁹ xho mood chanuu xcälrnibeereni? Dee rniä sa'csi la'tu rniitu narä rbäärebendxbab con lagajc yälrnibee xten Beelzebú. ²⁰ Palga si'c najcni, ²¹ chuni'c rudeed yälrnibee loj rex-pejntu te rbääreni bendxbab? Lagajc laereni ruluii xhet laadi rujntu xhigab. ²² Palga narä rbäärebendxbab con xcälrnibee Dios, ni'c ruluijo abidzujn xcälrnibee Dios lojtu.

²¹ 'Cheni suga' te bendaan, ca'ni guuib, canäjni rolijzni, rutliidi ruhuajdi rexhixtelli. ²² Niluxh che jiääd stee ni nadipru lo bendaanga, rudxagdijlnini, rujnni gaanni, dxejc ruzducajni xquuibni ni badeed yälbendaan lojni, dxejc sajc chanäni guiraa rexhixtelli. ²³ Reni xhet

yu'di xladä, rdxe'chreni loä. Ni di gutopnäj narä, rutie'chni.

²⁴Räjpzani:

—Cheni rii te bendxbab nen lastoo te bejn, ricansajni nez lo reyubijdz, caguiilni cadro gusilajzni. Che cad rdxäldini, rujnni xhigab, naani: “Guibisacä rolizä cadro biriä.” ²⁵Cheni guibi'ni, rdxäljni lastoo bejngä si'c te yu' ni entis gulujx bilioobni, suchesa'cni. ²⁶Dxejcti rixiini sgajdz bendxbab ni rujnru latsiaj lojni. Dxejc riu'reni nen lastoo bejngä, dxejc nalasrria'n bejngä loj ni gujcnii galoo.

Chicbaa renani riu xtidx Dios

²⁷Lal ni canii Jesús rediidxre, te nane' ni yu' lo rebejn xhidaalga dipli guniini, räjpni:

—¡Chicbaa nan ni biädnälu quedxliuj! Chicbaaza nani baslaa luj.

²⁸Luxh laani räjpni:

—Xhet si'cdi najcni; chicbaaru rebejn ni rucuadiajg xtidx Dios, ni ruzoobza xtiidxni.

Rebenguijdx rnocab te milagwr si'c te seen

(Mt. 12:38-42; Mr. 8:12)

²⁹Sanuutis cadojp rebejn gabii Jesús, dxejc guslojni caniini, räjpni:

—Rebejn ni yu' naj benguidduxhreni, rnocabzareni te milagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni. ³⁰Lagajc si'c ni gujc Jonás te seen loj rebejn quedx Nínive, si'cza narä, Xi'n Dios ni gujc Niguii, gacä te seen lo rebejn ni nabajn naj. ³¹Cheni guidzujn dxej ni gac fis sistie te nane' ni gujc rein lo reyuj ni tre' ladbjägw, sucuaquijni rebejn ni tre' quedxliuj naj sa'csi laani biriini zitduxh te bacuadiajgpacni yälajn xten Salomón. Ree suga' galäitu tej ni saduxhru lo Salomón, ³²luxh ditu chalilajz xtiidxni. Rebejn ni guläjz quedx Nínive sisiunäj rebejn ni nabajn naj neñ redxej ni gac fis. Dxejc sucuaquijreni rebejn ni nabajn naj sa'csi laareni, che huinäli Jonás xtidx Dios lojreni, basiechlajzreni, basa'nreni xtojlreni. Ni suga' lojtu naj sajcruni lo Jonás, niluxh ditu jiu xtiidxni.

Ni rusanij xcäriejn bejn

(Mt. 5:15; 6:22-23)

³³Räjpzani:

—Rut rucuaguijdi te bajl, te gusujninte lat xhiga'tz, ni claza neñ te caj. Susujni bajlga jiaa te rajc ruhuisa'c chutis ni riu' neñ yu'. ³⁴Balojlu najc si'c bajl xten xcäriejnlu. Palga ruhuisa'c balojlu, guideb xcäriejnlu yu' si'c bianij. Palga rajc balojlu dilu fisa'c, guideb xcäriejnlu yu' si'c lo nacäjy. ³⁵Gunatiro te di gac xpianijlu yälacäjy. ³⁶Palga guideb xcäriejnlu yu' bianijtis, xheti te lajt nacäjy, sajc fisa'clu guira'ti, si'c najc che rusani te bajl neñ yu'.

Rucuaquij Jesús refarisee näjza rebejn ni najn leii

(Mt. 23:1-36; Mr. 12:38-40; Lc. 20:45-47)

³⁷Che gulujx gunii Jesús, biädgajn te farisee Jesús chääni rolijzni te chatajwni. Sä'tireni. Che biu' Jesús, gurejni lo mex.

³⁸Bidxeloi fariseega sa'csi dini niguib naanii si'cpac caj lo xleii Moisés gunreni te gauereni, sa'csi rujnreni xhigab si'c racnayareni lo Dios. ³⁹Dxejcti räjj Jesús lojni:

—La'tu ni najc refarisee, rguiibtu nez dejtz te bas näjza te pla't, niluxh la'tu guidxa lastootu yälgubaan näjza yällat-siaj. ⁴⁰¡Beñ nadduxh! ¡La ditu gacbee? Nani benchee dejtni, bencheeza neñni. ⁴¹Colyajc nadolajz, colyacnäj rebejn con ni rniiut, dxejc guiraa recos sajc naya par la'tu.

⁴²¡Probe'zatu, beñ farisee! Rudeedtu lo Dios tej lo tejga tzuu ni rajptu: rudeedtu bedzxtiil näjza ruud, näj guiraa recuane' ni rajptu lo le', niluxh ditu jiu xcälguxhtis Dios näjza xcälrinälajz Dios. Dee nanab guntu ganid, luxh na'cza gusaantu guntu ni alacayuntu par Dios.

⁴³¡Proobza la'tu reben farisee! Rchaglajztu rbejtu lo reyagxhil xten rebejn ni sajc neñ reguidobäz; rchaglajztu saru rnii rebejn "xchan Dad" lojtu che rijtu lo guui.

⁴⁴¡Probe'zatu! La'tu najctu si'c rebaa ni di guzen, rsiaj rebejn yejc cadro naga'reni luxh direni gan.

⁴⁵Dxejcti badzu' tej rebejn ni ruluii leii diidxre lojni, räjpni:

—Dad mastr, che rniiul rediidxre, rnijalu nuurnu.

⁴⁶Dxejc räjj Jesús lojreni:

⁴⁷¡Proobza la'tu rebejn ni ruluii leii! Sa'csi rnibeetu gun rebejn recos nagan-duxh ni najc si'c te cargw naduxh ni di

gacdi guu bejn. Luxh la'tu di rlajztu faltuni nicla con te bicuenabäztu.

⁴⁷ 'Proobzatu! Sa'csi runcheetu xpaa redade' ni gunii xtidx Dios galoo, luxh na-jctu rexajg renani bagu't redade'ga. ⁴⁸Ni'cni najnpactu xhi gusajcreni, rchaglajzzatu redzuu ni bejn retoxtadgoldootu; si'cza gunnäjtu narä sa'csi laareni bagu'treni redade'ga, dxejc la'tu runcheetu xpaareni.

⁴⁹ Ni'cni gunii Dios, sa'csi yuduxh xcäl-najnni, räjpni: "Suxhalä renigui ni guinii xtidxä näjza reapost, luxh sugu'treni gai-ireni, susacsízareni sgaiireni." ⁵⁰ Loj re-bejn ni nabajn naj siniab Dios gudeedreni cuent xcent xteijn guiraa redade' ni gunii xtidx Dios ni bagu'treni cheni guc-cheeli quedxliju. ⁵¹Guislojni xteijn toAbel, näjza xtejnli Zacarías ni bagu'treni galäii nez lodxan nen guidoro. Ni'cni rniä lojtu, siniab Dios cuent xten xcälgujt guiraareni loj rebejn ni nabajn naj.

⁵² 'Probe'za la'tu, rebejn ni ruluii leii! Sa'csi rniitu la'tistu rajptu yäljnajn, luxh di rlajztu chalilajztu xtidx Dios, dizatu gusaan chalilajz rebejn ni rlajz chalilajz xtidx Dios.

⁵³ Cheni räjp Jesú rediidxre, bidx'e ch rebejn ni ruluii leii näjza refarisee lojni. Dxejc guslojreni canabdiidxreni xhidalduxh diidx, ⁵⁴te cagula'tzreni don la sajc guiga'nii lo xhitis te diidx ni guiniini.

12

Jesús ruluii xcent levaduhr

¹ Lał ni caniini, bidojp xhidajl mil bejn ro'c, calaro'l li sa'reni. Dxejc gusloj canixgaa Jesús loj rexpejnpacni, räjpni lojreni:

—Colnati levaduhr xten refarisee, rus-gueereni rniitisenri xhidajl diidx luxh di-reni gunni. ² Sa'csi xheti xhi niäu lojni ni di guxal lojni luxh xheti xhi naga'tz ni di jienloj. ³ Ni'cni guiraa ni guniitu lo nacäjy, sienni lo bianij xten dxejc. Luxh ni gunii xhiga'tztu nen reyu' ni niäudzu'tz, sibedxa'renini rediidxga yejcli reyu'.

Chuni'c nanab guidxejbtu

(Mt. 10:28-31)

Räjpzani:

—Rniä lojtu, xamigwä, na'c guidxejb tu rebejn ni sajc ju't tiejxhtu, dxejc xhetru sajcdi gunreni. ⁵Guiniä lojtu chuni'c nanab guidxejbtu. Colguidxejb nani che abadzu-cajni yälhabajn rajpni yälrnibee gusälji

la'tu gabijl lo bajl ni cayejc par tejpas. Ni'csii colguidxejb.

⁶ 'Anajntu sajc jio' gaii mane' tio'p mel-bätz, luxh di Dios jiällajz nicla tej remane'ga. ⁷ Rexquidxejctu abigab tebgajni. Na'c guidxejbtu; la'tu sajcrutu loj xhidajl remane'ga.

Reni riembee Jesúnez loj rebejn

(Mt. 10:32-33; 12:32; 10:19-20)

Räjpzani:

—Rniä lojtu, guiraa rebejn nani rcäjjp rililajzni xtidxä nez loj rebejn, narä Xi'n Dios ni gujc Niguii sicäpä najcni xpenä nez loj rexangl Dios. ⁹Luxh reni di guicäjp rililajzni xtidxä nez loj rebejn, sigajca sunnäáni nez loj rexangl Dios xhaguibaa.

¹⁰ 'Chutis ni guinii te didxnaj xcentä, susiällajz Dios laani. Niluxh chutis ni guiniyaj Sprit Dxan xten Dios, di Dios gusiällajz xtojlni.

¹¹ 'Cheni chanäreni la'tu nez loj reben guidobätz o nez loj reguxhtis, na'c guntu xhigab xhi gudzu'tu diidx o xhini'c guini-itu, ¹²sa'csi che guidzujn or ni guiniitu, Sprit Dxan xten Dios suluiini xhini'c guiniitu.

Reyälnasa'c rusajb bejn neñ dojl

¹³ Te niguui ni nadxaag rebejn xhidaalga räjpnloj Jesú:

—Dad, Mastr, gojs lo betzä guniidxni gala' xhixtenä ni basa'n toxtadnu loonu.

¹⁴ Dxejc räjp Jesú lojni:

—Dade', ¹⁵chuni'c gule narä gunä yälguxhtis o gacä abogaad lojlu, ä?

¹⁵ Dxejc räjpsac Jesú lojreni:

—Colhatiro, colgantzu' te di rlajztistu ga'ptu yälnasa'ctis sa'csi xcälhabajn bejn dini gac yälrajptis xhidajl xhi cos.

¹⁶ Dxejcti bij Jesú te cuent, räjpni lojreni:

—Guyu' te ben rapduxh. Racduhx cose'ch lo rexcäjlni. ¹⁷ Dxejcti gusloj bejnni xhigab: "¿Xhocha gunä? Dina gapä cadro cucheä recose'ch." ¹⁸ Sas bejnni xhigab: "Ananä xhini'c gunä. Gudzulä reyu' cadro rgucheä recose'ch, te gustiobä reyu'ga, te ro'c cucheä guiraa recose'ch näjza rexhixtenä."

¹⁹ Dxejcti sinia lo lastoä: "Lastoä, aguluceelu xhidajl xhi cos, sajlni xhidajl ijj. Basilajz naj, gudaw, gu', bibalajz."

²⁰ Dxejc räjp Dios lojni: "¡Ben najd! Lagajc guxhijne siniaabä xaimlu. ¿Dxejca'? ¿Chu

xca' guiraa recos ni gulucheelu?" ²¹ Si'c sisi-
ajc guiraa rebejn ni rguiiltis xcālnasa'creni
lo quedxliujre, niluxh xhet rajpdireni loj
Dios.

Rcanāj Dios rexínni

(Mt. 6:25-34)

²² Che gojl stera't, rājp Jesús loj rexpejñ-
pacni:

—Ni'cni rniä lojtu, na'c rujntu xhigab
xcent xho guibajntu o xhini'c gautu te
guibajntu, niclaza xcent lajd ni gacwtu.
²³ Yālnabajn sajcruni lo yālrajw; tiejxhni
sajcruni lo lajd ni rajcw bejn. ²⁴ jColhuii
rebaloo! Direni cue'c binij, dizareni gutojop
cose'ch, dizareni ga'p nicla yu' nicla te
cadro chuchee cose'ch, per rudeed Dios xhi
rajwreni. ¿La xhet sajcdirutu loj rebalooga,
ä? ²⁵ Luxh jChu teju palga runduxhni
xhigab sajc tioobruni sgarol metr? ²⁶ Palga
di gadci guntu nicla te cosbáz, jxhicuent
ru'tu yārsia' xcent xhi stee cos?

²⁷ jColhuii xho rga' reguino'ch! Direni
gun dzuum, dizareni gun lajd lo dzujb, luxh
rniä lojtu, nicla reii Salomón con guiraa
xcālnasa'cni, dini nisicuhee si'c rsiucuee
reguiga. ²⁸ Palga rusuchee Dios recuaan ni
rga' lo niaa, ni rial nadxej, luxh guixee-
huijdx, che agubijdzni, rejcn lo dāj, ati-
caxh Dios suniidx xhi gacw la'tu, jbejn nani
guxii rililajz! ²⁹ Ni'cni rniä na'c runtejtu
xhigab xho quilltu xhini'c gautu, xhini'cza
yätu, na'c chutistu yārsia'. ³⁰ Si'ctis rujn
rebenguedxliuj guideb xtijpreni rguilreni
rexhicosre. Niluxh xadtdu ni yu' xhaguibaa
anajnni xhini'c rquintu. ³¹ La'tu colquiltis
xcālrnibee Dios, dxejcti laani suniidxzani
guiraa recos ni rquintu.

Yālnasa'c ni yu' xhaguibaa

(Mt. 6:19-21)

³² Rājpzani:

—La'tu ni najc rexilä'ä, na'c guidxe-
jbtu, sa'csi rbaali lajz Dios, aguleni la'tu
te la'tu guntu yālguxhtis lo xcālrnibeeni.
³³ Colguto' xhixtentu, colgudeedni loj
rebejn ni caquinduxhni, te si'c guntu te bols
ni di jiujxh, te chu yālnasa'c neqni xh-
aguibaa cadre di gubaan jiu' niclaza xcabāj
rexhicos. ³⁴ Sa'csi cadre rajptu xcālnasa'ctu,
ro'cza yu' lastootu.

Nanab susintu

³⁵ Rājpzani:

—jColsusin! jCojhualguij rebajl!
³⁶ Colyujn si'c remos ni cabajz guibi'
xlamreni ni sää te sa', te cheni guibi'ni
guxhalgajcreni rolä!. ³⁷ Chicbaa remos
ni susin che guibi' xlamreni. Rniliápac
lojtu, lagajc xlamreni sajcwni xhajbni
sibe'cni rexmosni lo mex, dxejc lagajc
laani sudeedni xhi gaureni. ³⁸ Mase
guidzujnni garol yääl, mase guidzujnni
cäjyru, palga guidxálni arexmosni susin,
jchicbaa remosga! ³⁹ Colyacbee pac, paru
gacbee baxhuaan xten yu' xhi or guidzujn
gubaan rolijzni, dini gusaan guxhalreni
rolijzni te cuanreni xhixtenni. ⁴⁰ Nājza
la'tu colsusin, sa'csi or ni ditu gun xhigab
jiäädni, sidzujn Xi'n Dios ni gujc Niguii.

Te mos guijdx

(Mt. 24:45-51)

⁴¹ Dxejc gunabdiidx Pedr lojni, rājpni:

—Dad, jla lootisnu rujylu cuentre o la
najcni par guiraa rebejn?

⁴² Dxejc rājp Jesús lojreni:

—jChuni'c najc mos hueen, mos nasiñ,
ni rusannäj xlamni guiraa rexmosni te
gudeedni xhi gaureni che gal oor, ä?
⁴³ Chicbaa mosga palga laaca cayujnni che
guibi' xlamni. ⁴⁴ Rniliápac lojtu, lamga
sudeed guiraa rexhixtenni te xcanāj mos-
gani. ⁴⁵ Per palga gun mosga xhigab nen
lastooni: "Saclaa guibi' xlamä", sas guslo-
jni gusacisni resamosni, gunaa sigajc niguui,
dxejc gusloj gauni, yäni, soozni; ⁴⁶ sibi'
xlamni te dxej ni xhet cabajzdnini, or
ni dini gun xhigab guidzujnni. Dxejc sii
sudeedni te castigwro lojni, sutiäjlni te duu
dejtzn i dxejc sinibeeni jiini, guidxaagni re-
bejn ni di gusobdaijg diidx.

⁴⁷ Mosga ni najn xhini'c rlajz xlamni gac,
luxh dini susin, dizani guzoob xtiidxni,
sutiälduxhreni duu dejtzn. ⁴⁸ Niluxh mos
ni di gan xhi rlajz xlamni gac, ni'c ru-
jnni redzuun ni di xlamni guidxaglajz gac,
guxiiru castiigw gacni. Reni rca' xhidajl,
xhidajlza riäj gudeedreni; loj reni rca'
yālrnibeduxh, xhiroobza siniabni lojni.

Rlia' Jesús bejn lo sa'ni

(Mt. 10:34-36)

⁴⁹ Rājpza Jesús:

—Närä biälä te gucuaguiä quedxliujre;
jmalaii alagusloj cayejcni! ⁵⁰ Niluxh nanab
tedä te yālrobnis ni säloj te trabajwdxh,

ni'c cayuduxhä yärsia' cheni chale'lini.
⁵¹ *¿La rujntu xhigab biälä te jiädnää yärlbedxi loj quedxliuj, ä?* Rniä lojtu, dini gac si'c. Alga biälä te guilia'ä bejn lo sa'reni.
⁵² Silia' sa' te famili; loj gaiireni, sidxe'ch chonreni loj tio'preni, luxh tio'preni sidxe'chza lo chonreni. ⁵³ Silia' sa'reni; sidxe'ch dad lo xingaanni, luxh xingaanga sidxe'chza lo xtadni; nane' sidxe'ch lo xindxa'pni, luxh xindxa'pga sidxe'chzani lo xnanni; nansuegr sidxe'chni lo xculizjni, luxh gulijzga sidxe'ch lo xnansuegrni.

Reseen xten retiemp

(Mt. 16:1-4; Mr. 8:11-13)

⁵⁴ Caniiza Jesús lo reben xhidajlga, räjpni:

—Cheni rhuiitu räjs reza nez lad jiät, rniitu: “Siajb nisguj.” Luxh riajbni. ⁵⁵ Che rbi' bej nez lad danbägw, rniitu: “Sacnalaanadxej”, luxh si'c rajcni. ⁵⁶ *¡Bejn ni rusguee!* La'tu racbeetu xhi sälöj reseen ni rien lo quedxliuj näjza xhaguiba, *¿Xhicuent ditu gan xhi sälöj retiemp ni dxunnu naj, ä?*

Basiäjl diidx con rebejn ni rdxe'ch lojlu
 (Mt. 5:25-26)

⁵⁷ Räjpzani:

—*¿Xhicuent ditu quil lagajc la'tu xhini'c najc hueen, xhini'c najc laaca te gutunti?* ⁵⁸ Sa'csi palga yu' chuni'c chale'c xquejlu lo guxhtis, lałni sanäni luj ro jusgaad, basiäjl diidx con laani lo nejz, te na'c chanäni luj lo reguxhtis, sa'csi dxejc reguxhtis suteedreni luj lo reguixhajt te gusäureni luj neñ latzguiib. ⁵⁹ Luxh rniä lojlu, dilu guirii ro'c hasta gusa'lu quiixlu guiraa lojreni.

13

Colgusiech lajztu te di guettu

¹ Lagajc dxejc, gubig gaii reni huisa'nreni diidx loj Jesús xcient gaii ben Galilee ni bagu't Pila't neñ guidoo, bagu'chni xtiejenreni con xtiejen reman ni siädhäreni si'c gojn lo Dios. ² Sas räjp Jesús lojreni:

—*¿La rujntu xhigab si'c gusajc reben Galileeega sa'csi najcrurenii ben dojl lo rebejn lajdxreni?* ³ Narä rniä, dini gac si'c. Palga di'tu gusiechlajz sigajcza sejt guiragajctu.

⁴ O xcient guitzunbichon rebejn nani gujt che gubixh te or ni laa Siloé yejcreni, *¿La rujntu xhigab najcrurenii ben dojl lo rebejn ni rbäjz guedx Jerusalén, ä?* ⁵ Narä rniä, dini

gac si'c. Palga di'tu gusiechlajz, sigajcza sejt guiragajctu.

Xcient te yag iigw

⁶ Dxejcti gusloj bij Jesús te cuent ni ruluiini lojreni, räjpni:

—Te dade' gojp te yagiwg ni basujni lo xyujni. Sas huihuini don la caj ninejxh lojni. Luxh xhet ninejxhdi bidxälñi. ⁷ Dxejc räjpni loj bejn ni canäj xyujni, agujc chon ijj siätilä ninejxh lo yajgre, luxh xhetini. Batin yajgre. *¡Xlia'si sujni lo yuj!* ⁸ Luxh xmosni räjp lojni: “Dad, basaanni steb ijj, guslää yuj ni'ni, guslää abonni. ⁹ Palga xcaj ninejxh lojni steb ijj, laaca, palga dini xcaj, dxejc guitinnuni.”

Rusiajc Jesús te gunaa

¹⁰ Te dxej ni rusilajz rexpejn Israel caguluui Jesús neñ te guidobáz. ¹¹ Ro'c suga' te nane' ni agujc tzunbichon ijj racxhuuni. Benxab caguscoodni, niluxh di gacdi suliini. ¹² Che bahuui Jesús lojni, gurejdxnini, dxejc räjp Jesús lojni:

—Gunaa, abasaan yälguijdxga luj.

¹³ Che basujni naani yejcní, lagajc dxejc gujc gusulii nane'ga. Dxejc guslojni calä'pni xpala'n Dios. ¹⁴ Luxh dade' ni rniibe guidobáz bidxe'chni sa'csi basiaj Jesús nane'ga che najcni dxej ni rusilazreni, ni'c gusloj cayäjpní loj rebejn:

—Xho'p dxej sajc gun bejn dzun; nen redxejga sajc jiäädstu te jiajctu, per na'c jiäädstu dxej ni rusilajz rexpejn Israel.

¹⁵ Dxejc badzu' Jesús diidxre, räjpni lojni:

—*¡Bejn rusguee!* *¿La di chutis tejtu guxhec xconni o xpurni te chanänini yäni nis, mase najcni dxej ni rusilajz bejn, ä?* ¹⁶ Luxh nane're najc te xagdoo toAbram, nani numbee Dios, ni agujc tzunbichon ijj baliib bendxbarni, *¿la digacdi guixeri lo xcälguijdxni mase najcni dxej ni rusilajz bejn, ä?*

¹⁷ Che gunii Jesús rediidxre, bianxtuyj rebejn ni rdxe'ch loj Jesús, luxh reben xhidaalga cabalazduxhreni sa'csi cayujn Dios redzunro nez lojreni.

Xcient bedz muxhtas

(Mt. 13:31-32; Mr. 4:30-32)

¹⁸ Ni'cni räjp Jesús lojreni:

—*¿Xhocha najc xcälmabee Dios?* *¿Xhicha cojn guiniä najcni tebлоj?* ¹⁹ Najcni si'c te bedz muxhtas ni rbe'c te bejn lo

xyujni. Luxh che guiroobni, rajcni te yagro. Dxejc riääd remane' ni rutajt siädyunchee xpitiaäzni loj rexhajcwni.

*Xcient cojb ni rusaguij
(Mt. 13:33)*

²⁰ Guniiza Jesúus stehuält te gacbeereni xho guire'ch rextidx Dios. Räjpni lojreni:

—¿Xhicha cojn guntebloä xcälrnibee Dios? ²¹ Najcni si'c levaduur ni rugu'ch te gunaa lo chon mediid ariñ, luxh rusaguijni guiraa cojbga.

*Dää' rolä' cadro jiu'ni xhaguibaa
(Mt. 7:13-14, 21-23)*

²² Huinuu Jesúus xnejzni sääni guedx Jerusalén. Lalni sadejdni reguejdx näjza rerench caguluini rebejn. ²³ Dxejc gunabdiidx te bejn lojni, räjpni:

—Dad, ¿la guxii nacj rebejn ni caña loj rextojleni, ä?

Dxejc räjpni lojreni:

²⁴ —Dää' rolä' cadro jiu' bejn xhaguibaa. Ni'cni coltip lajztu te jiu'tu ro'c, sa'csi xhidajl bejn rlajz jiu'reni ro'c, niluxh di-reni gun gaan. ²⁵ Cheni abasäu baxhuaan xten yu' rolä', dxejc la'tu ni suga' detz yu' guisloj gusejstu rolä', guiniitu: “Dad, baxhal-laa rolä”, dxejc laani sudzu'ni di-id, siniini: “Dina ganä caro siäädtu.”

²⁶ Dxejc guislojtu, guiniitu: “Bidxunnäänu, bidaunäänu, bidunniäänu luj, baseedlu nuurnu lo xnezyunu.” ²⁷ Dxejc siniini lojtu: “Rniliä lojtu, dipacnä gumbeä la'tu. Coljj guiraatu, benlatsaj.” ²⁸ Dxejcti sonduxhtu, chubejli läjytu che fiiu abiu' toAbram, con toIsaac, con toJacoob, näjza guiraa redade' ni gunii xtidx Dios, suga'reni lo xcälrnibee Dios xhaguibaa, luxh la'tu di gacdi jiu'tu.

²⁹ Dxejga sidzujn xhidajl benzijt ni siääd ladjiaa, ladjiät, ladbjägw, näjza ladbee, te jiu'reni lo xcälrnibee Dios xhaguibaa, ro'c sibejzareni lo mex. ³⁰ Luxh yu' reni rujntu xhigab guxii sajcreni naj, sacduxhreni dxejc. Yu'za reni rchalotu sacduxh naj, xhet sajcdireni dxejc.

*Jesús biin xcient guedx Jerusalén
(Mt. 23:37-39)*

³¹ Lagajc dxejga, bidzujn gaii refarisee, räjpreni lojni:

—Huij, biunejz ree, sa'csi Herodes rlajz ju'tlu.

³² Dxejc laani badzu'ni diidxre lojreni, räjpni:

—Gojz lo bätzga, ben rusguee: “¡Bahuii! cabää rebenxbab lastoo rebejn, cagusiacä rebejn ni racxhuu nadzej näjza guixee, luxh huijdxli guluxä xtzunä.” ³³ Niluxh mase si'c gacni nanab chanüä xnezyüä nadzej näjza guixee, huijdx, sa'csi di gacdi guet te dade' ni rnii xtidx Dios ste'ca guejdx, guejdxtis Jerusalén sajc guetni.

³⁴ —¿Probe'tu, la'tu ben Jerusalén! Rugu'ttu redade' ni riädnii xtidx Dios lojtu, rucuaazatu guij yejc rebejn ni ruxhal Dios lojtu. Balti huält rlazä nuchagä sa'tu si'c ruchagsa' te guidco'c rexquidbäzni lajd xhigani, niluxh ditu nicäjj. ³⁵ Bahuii xho bianxteb xquidoottu. Ni'cni arinxgä lojtu, dirutu fii loä cheni guidzujnli dxej ni guiniitu loä: “Chicbaa ni siääd xcient Dios.”

14

Rusajc Jesúus te bejn ni guidxa guij

¹ Che gojl te dxej ni rusilajz rexpejñ Israel, huitajw Jesúus rolizj tej ni rnibee loj refarisee. Cagula'tz gaii refarisee, guidon xhini'c gun Jesúus, ² sa'csi nez loj Jesúus suga' te dade' ni guidxa guij tiejxhni. ³ Dxejc gunabdiidx Jesúus lo rebejn ni ruluii leii näjza lo refarisee, räjpni lojreni:

—¿La sajc gusiajcní te benräcxhuu dxej ni rusilajz bejn o la di gacdini?

⁴ Per laareni dxitis suga'reni, niäutis ro'reni. Dxejc cua' Jesúus benräcxhuuga, basiajcní, gunibeezani biunejzni. ⁵ Dxejc räjpni loj refarisee:

—Chu la'tu ni rajp te buq o te gon, palga jiajbni neq te bisie, ¿la ditu chalägajcni mase nacjci dxej ni rusilajz bejn, ä?

⁶ Dxejc di niajcní nudzu'reni diidx lojni.

Reni bidon chää sa'

⁷ Cheni bahuii Jesúus xho rchaglajz rebejn rbereni latsa'c te cuereni cuä' rebejnro, bijni te cuent ni ruluii lojreni, räjpni:

⁸ —Cheni guidontu chäätu te sa', na'c guntu te cuetu cuä' rebengro, te di guidzujn te benroru lojlu, ⁹ dxejc jiääd bejn ni cayujn lanij, naani lojlu: “Badeed cue dade're ro'c.” Dxejc situjylilu chacuelu ste'ca lajt lo le'li. ¹⁰ Maazru hueen, cheni guidonlu chäälu te sa', huicue lo mex ni zuj lo le' te che guidzujn bejn ni cayujn lanij,

naani lojlu: "Xamigwä, gudaa cuelu nen yu' cadro rbej rebenro." Si'c sä'p xpala'nlu nez loj guiraa rebejn ni sobganäjlu lo mex.¹¹ Sa'csi ni rlajz chä'p xpala'nni nez loj rebejn, sianxtujnyi nez lojreni. Luxh bejn ni najc nadolajz, sä'p xpala'nni nez loj guiraa rebejn.

¹² Räjpzani loj bejn ni cagudeed xhi gau-reni:

—Cheni gunlu te lanij o guteedlu bejn lo xmexlu, na'c cueedxtislu rexamigwlu con rebejtzlu, con resa'l, niclaza rex-pisiq lu ni najc ri'cw, sa'csi laareni sigajza sibejdxreni luj che gunreni te lanij, luxh si'c agudijxreni ni badeedlu lojreni.¹³ Che gunlu te lanij, alga gurejdx rebenproob, rebencoj, näjza rebenlotiä'p,¹⁴ dxejcti sibaa lajzlu sa'csi laareni di gacdi gunidxsacremi ni badeedlu lojreni; luxh si'c siguixsac Dios ni bejnlu che gal dxej ni guibansac rebejn loj rebengut.

Xcuent te laniro

¹⁵ Che biejn diajg tej reni sobga' lo mex, räjpni loj Jesús:

—Chicbaa rebejn ni gau yätxtiil cadro rnibee Dios.

¹⁶ Dxejc räjp Jesús lojni:

—Guyu' te dade' ni bejn te laniro rolijzni. Gunibeeni bidoñ xhidajl bejn te jiädtautänjrenini.¹⁷ Che bidzujn or ni gauren, baxhal dade'ga te xmosni chatejdxni rebejn ni abidon, räjpni lojreni: "Colchäj, asuchee lo mex."¹⁸ Dxejc guiragajcreni gusloj cayäjb di gacdi chääreni. Tejni räjp: "Entis gusiä te la' yuj, luxh naj nanab chahuiä xho najcni. Goslaa di gacdi jiälä."¹⁹ Steeni räjp: "Gusiä gaii nejs gon, luxh nanab chahuiä xho rujn-reni dzuu. Goslaa di gacdi jiälä."²⁰ Steeni räjp: "Entis bachnaä ni'cni di gacdi jiälä."

²¹ Che gubi' mosga, badeedni diidx lo xlamni xhi räjp rebejngä lojni. Dxejc bidxechduxh lamga, räjpni lo xmosni: "Basquejn huij ladnezyuj näjza ladnezyuj dää, gudanä rebenproob, rebencoj, rebenlotiä'p, rebennatiujnc."²² Si'c bejn mosga. Che gubi'ni räjpni lo xlamni: "Dad, abenä si'c ni gunibeelu, luxh lajtru yagxhiil."²³ Dxejc räjp lamga lo xmosni: "Huij lo renezyuj ni sii loj reguedxjizt, gudanäj rebejn ni guidxaaglu nejzga, te cha bejn rolizä.²⁴ Rniliä lojtu, nicla tej reni bidon ganid di gau xhuej nani benä."

Ni nanab gunni te chanajlni Crist

²⁵ Lał sasaj Jesú lo nejz, xhidualdugh bejn sanajlni. Dxejc gubiréni, gusloj cayäjpni lojreni:

²⁶ —Palga yu' chu tej ni jiääd loä, ni di cuälaz xtadni, xnanni, chäälni, rexi'nni, rebejtni, näjza rebisiajnni, nägajcza xcäln-abajnni, di gacdi gacni te rexpenä.²⁷ Palga yu' chutis tej ni di rlajz tedni trabajw te jiädnajlni narä, di gacdi gacni te rexpenäpac.

²⁸ Chu tejtu ni rlajz gun te yuro, ni di gunxgaa xhigab lacti meel chanä yu'ga, te guidon la sajc guluuxxnini.²⁹ Didi cheni abejnni recimient, di gacdi guluuxxnini, dx-ejc guiraa reni fii lojni suxhiznäjrenini,³⁰ säjpreni: "¡Bahuilaare! Bejñre gusloj bencheeni te yu' per di niajcdi nuluuxxnini."

³¹ ¿Chu te reii ni gun xhigab chachagdijlni stee reii, ni di gunxgaa xhigab don laa sajc gunni gaan con tzuu mil soldaad loj stee reii ni siääd con gajl mil soldaad, ä?

³² Palga di gacdi gucuanäjnni, che gacbeeni zjüli siääd stee reiiga, suxhalni te xpe-jnni chanab yälrbedxi lojni.³³ Ni'cni palga chutis tejtu di gusaan rexhixtenni te jiädnajlni narä, di gacdi gacni te rexpenäpac.

*Che diru sejd gac nadzuyj
(Mt. 5:13; Mr. 9:50)*

³⁴ Räjpzani:

—Huen najc sejd. Per cheni diruni gac nadzuyj, ¿xho gacru gac nadzuyjni?³⁵ Xhetru sajcdini, nicla te chääni loj yuj, niclaza te chääni lo abon. Gusältis bejn sejdga. Reni rlajz gucuadiajg xtidxä, sucuadiagsa'creni.

15

Xcuent xiil ni gunijt (Mt. 18:10-14)

Guiraa reni rusquijx impuest näjza rebendojl cabigreni loj Jesús, te cuadijgreni rextiidxni.² Refarisee näjza rebejn ni ruluii leii gusloj camojmreni, räjpreni:

—Bejñre rusaan rbig rebendojl lojni, luxh raunäjzanireni.

³ Dxejcti bij Jesús cuent ni ruluiire lojreni, räjpni:

⁴ —Chutejtu ni rajp tegayuu xiil, palga chanijtni tejni, ¿la dini gusaan stapbitzu-ubigaa rexilni lo niaa te chatilni xile' ni gunijt, hasta guidxällinini, ä?⁵ Luxh che

guidxälnini sibaduxh lajzni, dxejc sutzuub-nini ro xhajcwni. ⁶Che guidzujnni rolizzni sutojpni rexamiigwni näjza repisinni te gäbni lojreni: "Colguibalaznäj narä sa'csi abidxälä xile' ni gunijt." ⁷Rniä lojtu, sigajcza su'ru yärlbalajz xhaguiba xcuent tejtis bejn ni guibig lo Dios ni gusiechlajz xtojlni quela xcuent tapbitzubigaa bejn ni di guiquin gusiechlazreni xtojlreni.

Xcient meeñ ni gunijt

⁸Räjpzani:

—Sigajcza te gunaa ni rajp tzuu meel, palga chasälni tejní, žla dini gusanij te bajl te guloobni neñ yu' hasta guidxälnini, ä? ⁹Luxh che guidxälnini, sutojpni rexamiigwni näjza repisinni, säjpni lojreni: "Colguibalaznäj narä sa'csi abidxälä meel ni gunijt." ¹⁰Rniäza lojtu, sigajcza sibalajz rexangl Dios xhaguiba xcuent te bendojl ni rusiechlajzni.

Te bejn ni baxun te xi'nni

¹¹Dxejc bijza Jesús cuentre lojreni:

—Guyu' te dade' ni yu' tio'p xingaanni. ¹²Dxejc xi'nni ni najc huinruga, räjpni lo xtadni: "Dad, baniidx yälhasa'c nani nungäjil xca'a." Sas badeed xtadni xeren-sni. ¹³Di niaclaa, balsi dxej gudejd, chela bato' xinhuinni guiraa xhixtenni, dxejc sääni, bidzujnni te guedxijt. Ro'c banijtni guiraa xmeelni lo recosguijdx. ¹⁴Che aban-ijtni guiraa xhixtenni, biääd te gubinduxh guedxijtga cadro yu'ni. Sas guslojzani calaanni. ¹⁵Dxejc huitilni dzuun lo te benguejdxga. Baxhal bejngani te huigajpni cuch lo xyuj dade'ga. ¹⁶Luxh calanduxhni bejnni xhigab malaij sajc gauni recuaan ni najc si'c lia ni cayaw recuch, niluxh rut badeeddi xhi niajwni. ¹⁷Lal ni cadejdni trabajwga, bianij xcäriejnni bejnni xhigab, naani: "Balti rexmos xtadä rausa'c, ria'nru xhi gaureni. Luxh narä ree calanduxhämmerli guetä. ¹⁸Guibi'älis ladxä, rolizz xtadä, gäpä lojni, Dad, banitä lo Dios näjza lojlu. ¹⁹Diru nungäjil guirilaä xi'nlu. Cua' narä si'c te xmoslu." ²⁰Dxejc gunazgajcni nejz te gubi'ni rolizz xtadni.

'Cheni zijtru siäädni, bahuii xtadni lojni. Dxejc balaslajznini, ruxunlini, huicha-glojnnini, sas gudäänznni, bachagro'ni lojni.

²¹Dxejc räjp xi'nni lojni: "Dad, abanitää

lo Dios näjza lojlu. Diru nungäjil guirilaä xi'nlu." ²²Per räjp xtadni loj rexmosni: "Coltanä te ladsa'c, colshuajcwnini xi'nä, colgusäj te niil bicueñaani, xcajza te gura'ch ni'ni. ²³Coltanä te biser ni guro' colgu'tni. ¡Colosquejn te guidauunu, jiennu te lanij! ²⁴Sa'csi xi'näre abenä xhigab gujtni, luxh naj si'cni agubañsacni, gunijtni niluxh naj abidxäjlni." Dxejc guslojreni bejnnreni te lanij.

²⁵*Lal ni cayajc dee, xingangalooni cayujn dzuun lo niaa. Che gubi'ni, siäddzungajxhni rolizzni, che biejn diajgni cayel rolizzni, caguya'zareni. ²⁶Dxejcti gurejdxni te mos, gunabdiidxni lojni xhi cayajc royu'.

²⁷Dxejc räjp mosga lojni: "Gubisac bejtzlu, luxh xtadlu gunibee gujt te biser guro' te gac lanij sa'csi nadaanni gubi'ni." ²⁸Dxejc bidxe'ch xingangalooni. Naadtini jiu'ni rolizzni. Che gucbee xtadni naadtini jiu'ni, bihuii xtadnini te gunabni jiu'gani. ²⁹Dxejc räjpni lo xtadni: "¡Bahuilaare! Agujo xchej cayunä dzuun lojlu, luxh rusobdiagä guiraa xtiidxlu, per nicla tej huält gajdlu guniidix nicla te dxibe' loä te gunä te lanij con rexamigwä. ³⁰Luxh naj ni abidzujn xi'nlu, ni banijt xmeellu con regunadxab, xhoxh bagu'tlu te biser guro' te cayujnlu xlanijni."

³¹Dxejc räjp xtadni lojni: "Xi'nä, sugagajcju loä, luxh guiraa ni rapä najc xtenlu.

³²Niluxh naj riälpac jiennu lanij, guibal-aaznu, sa'csi bejtzlu ni benä xhigab agujt, agubi'ni naj, najcni si'cni gubanäsanacni; gunijtni, naj abidxäjlni."

16

Xcient te ni rnibee loj remos

¹Dxejc cayujza Jesús stee cuent loj rexpejnpacni, räjpni:

—Guyu' te bejräjp ni guyu' lojni te ni rnibee loj rexmosni. Dxejc biääd reni badeedreni diidx lojni, räjpreni: "Bejn ni rnibee loj rexmoslu xhetlaadi cayujnni ca-gunjtni rexhixtenlu." ²Dxejcti gurejdx xlamnnini, räjpni lojni: "¿Xhi dee ni riejn diajä caniireni xcuentlu, ä? Naj guniidixlu loä cuent xte xtzuunlu, sa'csi dirulu chanuu guinibeelu lo rexmosä." ³Dxejc bejngä bejn xhigab: "¿Xhichani'c gunä naj ni gudzucaj xlamä dzuun loä? Dina ga'pä yärlstijp te gunä dzuun lo niaa, luxh situuya chanabä gojn. ⁴Ananä xhini'c gunä te

che dirunä ga'pä dzuun, sibejdx rexamigwä narä rolijzreni.”⁵ Dxejcti gurejdxni tebgajreni rebejn ni nazääb lo xlamni, dxejc räjpni loj ni bidzuñxgaa: “¿Lac nazääbä lo xlämä?”⁶ Dxejc räjpni: “Nazäbä si'c te gayuu baril se't.” Dxejc räjpni lojni: “Basquejn, cua' guijtzre, bacuaa tiubitzuutis baril nazääbälojini.”⁷ Dxejc gunabdiidxni loj steeni, räjpni: “¿Luj a'? ¿Lac nazääbä lo xlämä?”⁸ Dxejc räjpni lojni: “Te gayuu dximro triuu.” Dxejc räjpzani: “Aree xquijtzlu; bacuaa tajtis dximro.”⁹ Bidxeloy xlamni, gulä'pni xpala'n benguijdxga ni gunibee sa'csi bisinnyi bejnni recosga. Dxejc räjpza Jesús, rebejn ni di gumbee xtidx Dios nadxällajzrurenlo rextzuunreni con sa'reni loj rebejn ni arumbee xtidx Dios.

⁹ Rniä lojtu, colquil rexamiigwtu con reyälناسا'c ni räjptu loj quedxliujre, te che abaraj xhixtentu, sica' Diostu xhaguibaa cadro yu'rolijztu par tejpas.

¹⁰ Renani runsa'c dzuun lo te dzunbäz, sajczu gunsa'cni dzuun lo te dzunro, luxh reni di gacdi gunsa'c dzuun lo te dzunbäz, di gacdzia gunsa'creni dzuun lo te dzunro.¹¹ Ni'cni palga xhetlaadi cuarälnäjtu reyälناسا'c xten quedxliuj, jxho guniidx Dios reyälناسا'c xtenni lojtu!¹² Palga xhetlaadi cuarälnäjtu xhixten bejn, ¿chu guniidx lojtu ni gac xtenpactu, ä?

¹³ Nicla tej mos di gacdi gunni dzuun lo tio'p lam, sa'csi sidxe'chni lo tejni, steeni sinälajzni o susobdajgpacni xtidx tejni, sibälazni steeni. Di gacdi gun bejn xtzun Dios laj ni sanälajztsni xcälnasa'cni.

¹⁴ Mbaj naj, refarisee, sa'csi rchaglazduxhreni meal, cacuadiagdzut'zreni xtiidxni, dxejc caguxhisnäjreni Jesús.¹⁵ Dxejcti räjp Jesús lojreni:

—La'tu najctu bejn ni ruhui rebejn lojtu, naareni bensacduxhtu, niluxh acanajin Dios xhi xhigab rujntu neñ lastootu. Sa'csi guiraa ni rchalotu najc yälnasacduxh, guiraa ni'c rbixhlajz Diosni.

Xleii Moisés con xcälrnibee Dios

¹⁶ Räjpzani:

—Dxejli ni biääd Juan ni rutiobnis, guyu' xleii Moisés, näjza xtidx redade' ni gunii xtidx Dios. Cheni biääd Juan gusloj rsule' didxsa'c xcuent xcälrnibee Dios, ni'cni xhidajl bejn cagusutip lajzni te jiu'reni loj yälnibeega.

¹⁷ Per guyasiru nitloj xhaguibaa näjza quedxliuj quela di jialoj guiralii rediidxni ni bacuaa Moisés; nicla tej diidxga di nitloj.

Ruluii Jesús xcuent ruro'n sa' bejn
(Mt. 19:1-12; Mr. 10:1-12)

¹⁸ Räjpzani:

—Palga guro'n te bejn chäälni, dxejc guchñaani stee gunaa, rujnni dojl, luxh nani ruchnaa te gunaa ni abaro'n chäälnni, niguiga rujnzani dojl.

Te benrajp näjza Lázaro

¹⁹ Räjpzani:

—Guyu' te benrajp ni rchaglajz rajcwni ganax reladsacduxh, luxh guixe-guixee rujnni laniro.²⁰ Guyu'za te benproob ni laa Lázaro ni rniab gojn, ricueni ro xlä' benrajpga, yu'guejdx ni rgaadz tiejxhni.

²¹ Rlajzni maläii xho gunni gauni nani rtejb loj xmx benrajpga, luxh direni gusaan. Dxejc rebä'cw siääd rilejp loj reguejdx ni rgaadz ni guidxa tiejxhni.²² Guyu'ti te dxej gujt benproobga, biädläs rexangl Dios xaimni, huinärenini cadro yu' Abram xhaguibaa. Dxejcti näjza benrajpga gujt, huicua'tztireneni.²³ Che yu'ni gabijl cadro rij guiraa rebendojl, ro'c cadejdni trabajwduxh. Dxejcti guläsni lojni, bahuiini zitduxh cadro sugaränj Abram Lázaro.

²⁴ Dxejcti guredxaduxh benrajpga, räjpni lo Abram: “¡Xtadä Abram! Balazlajz narä, baxhal Lázaro guhuajdxni yejc bicuenaani ni te gusiälyujni ludxä, sa'csi ree cadedä trabajwduxh lo guiboo.”²⁵ Luxh räjp Abram lojni: “Xi'nä, basaa lajzlu che gubajnlu lo quedxliuj gojplu guira'ti xhixtenlu, luxh sigajcza Lázaro gudejdni trabajwduxh. Per naj ree casilajzni, naj luj cadejdlu trabajwduxh.”²⁶ Luxh di gacdi jiääd Lázaro ro'c, sa'csi yu' te baladuxh ni rlia'sa'nü, te mase rlajz bejn guirii ree te tedreni lojlu ro'c, di gacdzia. Di gacdzia ted reni yu' ro'c te jiäädreni loonu.”²⁷ Dxejcti räjp benrajpga lojni: “Rniabduxhä lojlu, xtadä, baxhalaa Lázaro chääni rolijz xtadä,²⁸ sa'csi ro'c yu' gaii betzä, te chalijdxni laareni, te gusiechlajzreni, te di näjza laareni jiäädreni ree cadro rdejd bejn trabajwduxh.”²⁹ Dxejc räjp Abram lojni: “Arajpreni guijtz cadro caj xleii Moisés näjza xtidx redade' ni gunii xtidx Dios, sugusobdajgreni rediidxga.”³⁰ Luxh benrajpga badzu' diidxre,

räjpni lojni: "Gulii dad Abram, per palga chäs te bejn loj rebengut, chanii lojreni, dxejc sii pet susiechlajzreni." ³¹ Dxejc räjp Abram lojni: "Palga direni gusobdiajg xtidx toMoisés näjza xtidx redade' ni gunii xtidx Dios, dizareni chalilajz xtidx te bejn ni guibānsac loj rebengut."

17

Riesgw jiajbni lo dojl
(Mt. 18:6-7, 21-22; Mr. 9:42)

¹Räjp Jesús loj rexpejnpacni:

—Siäädpac recos ni gun jiajb bejn lo dojl. Proobza bejn ni rujn riajb bejn lo dojl. ²Maaz gulibnii te guij xten molin guejnni, gusäl bejnni lo nisdoo cadro jiäetro quela gunni jiajb rexi'nä ni ahuililajz xtidxä. ³[Colsusin!]

'Palga gun bejtzlu dojl lojlu, balijdxni. Palga gusiechlajzni, basiäjäliiidx con laani. ⁴Masque gajdz huält nep teb dxej gunni dojl lojlu, palga jiädniini lojlu gajdz huält, naani: "Xhet laadi benä, basiäjälii lajzlu", basiäjälii lajz con laani.

Bastioob xcälrlilaaaznu

⁵Gunii rexpejnpacni lo Jesús, räjpreni:

—Dad, baniidxrū yälrlilajz loonu.

⁶Dxejc räjp Jesús lojreni:

—Palga rajptu yälrlilajz, mase najcni si'cti te bedzbäz xten muxhtas, sajc gäbätu lo yagro rec: "Biliädxa' ro'c, guzuj galäii nisdoo", susobdiajg yajgga xtiidxtu.

Ni riäjälii gun te mos

⁷Räjpzani:

—¿Chu teju ni rajp te mos ni riga'n o ni rigajp rexquidxaani ni gäbni lojni che guibi'ni lo niaa: "Biu'ga, gurej lo mex te gaulu"? ⁸Dini gäb si'c. Niluxh säjpnii lojni: "Bachaa xhajblu. Bejn xhi gauä, gudanäni loä. Che luux gauä, yä'ä, dxejc sajc gauzalu, yäzalu." ⁹Dini gudeed xquixtios lo mosga sa'csi rujnni recos ni gunibeeni sa'csi si'c riäjälii gunni. ¹⁰Sigajcza la'tu, che luux guntu guiraa redzuun ni guniä guntu, riäjälii guniitülo Dios: "Najcnu mos ni xhet sajcdi, nani riäjälii jienmu, ni'ctis biennu."

Basiäjc Jesús tzuu bejn ni ral tiejxhreni

¹¹Lal ni sasaj Jesús nez guedx Jerusalén, gudejdni loj región Samaria näjza región Galilee. ¹²Che biu'ni tej reguejdxga, huicha-gloj Jesús tzuu bejn ni rajc te yälgujdx ni ral

tiejxhreni, niluxh zijtru guzujreni. ¹³Dxejc rbedxa'reni räjpreni:

—Jesús, Dad, Mastr, balaslajz nuurnu.

¹⁴Che bahuii Jesús lojreni, räjpni lojreni:

—Colchäj, te fii rebixhojz abiajctu.

Lał ni sääreni, bia tiejxhreni. ¹⁵Dxejc tejreni, che bahuii abiajcti, gubigux-unni, cabedxa'ni calä'pni xpala'n Dios.

¹⁶Bazuxhijbni nez loj Jesús, basajbni lojni lo yuj cagudeedni xquixtios loj Jesús. Luxh bejnre najc te benzijt, te ben Samaria.

¹⁷Dxejcti räjp Jesús lojni:

—¿La et tzuudi najc reni biajc, ä? ¿Con sgaareni? ¹⁸¿La rutru gubi'di loä te guiliä'preni xpala'n Dios, xtebtis benzijtre, ä?

¹⁹Dxejc räjp Jesús loj bejnre:

—Huisulii, huj! Abiajclu sa'csi huililajzlu.

Xho guidzujn xcälrnibee Dios

(Mt. 24:23-28, 36-41)

²⁰Dxejc, sa'csi agunabdiidx refarisee loj Jesús guc guidzujn xcälrnibee Dios, badzu'ni diidxre, räjpni lojreni:

—Di xcälrnibee Dios guidzujn con seen ni sajc fiitu. ²¹Diza bejn naa: "Bahuui, aniree", o "Anirec", sa'csi abidzujn xcälrnibee Dios lojtu.

²²Dxejc räjp Jesús lo rexpejnpacni:

—Sidzujn dxej rlajzgatu fiitu te dxej sa' ni chu che jiädsac Xi'n Dios ni gujc Niguii, luxh ditu fiini. ²³Luxh siniireni lojtu: "Aniree", o "Anirec", per na'c chäätu, na'cza chanajltu reni rihuui. ²⁴Sa'csi sigajc ni rien che rdinya' te laad xhaguibaasta stelaad xhaguiba, si'cza gac che jiälä narä, Xi'n Dios ni gujc Niguii, che gal dxej guibi'ä.

²⁵Luxh ganiddoo sidedä trabajwdxh, sa'csi sibälaz reben guedxliuj ni tre' naj narä. ²⁶Si'cni gujc nen redxej cheni gubajn toNoé, si'cza gac nen redxej che jiälä narä, Xi'n Dios ni gujc Niguii. ²⁷Neñ redxej ni gubajn toNoé gudajwreni, gu'reni, bachnaereni, badezdareni xindxa'preni guchnaa bejn, bidzujnli dxej cheni biu' toNoé neñ barcwro ni bencheeni. Dxejc biääd nisguiduxh, gujt guiraa reben dojl, guzäbreni lo nis.

²⁸Sigajcza gujc nen redxej ni gubajn toLo': gudajwreni, gu'reni, gusiireni, bato'reni, gule'creni binij, bencheezareni rolizreni. ²⁹Niluxh cheni birii Lo't lo guedx Sodoma, biajb guiboo xhaguibaali, näjza te däj ni

rudxuii, gunitlojti guiraa rebejn dojl, hue-jcreni. ³⁰ Sigajcza gac neñ redxej cheni jiälä narä, Xi'n Dios ni gujc Niguii.

³¹ Dxejga, palga yu' chu niä'p yejc yu', diru galdi jiäjtni te chaläani rexhixtenni ni yuchee neñ yu'; palga yu' chu suga' nezjiät, di galdiruni guibi'ni rolijzni. ³² Colgusnaj lajztu xhi gujc chääl toLo't. ³³ Ni rlajz ga'p xcälnabajnni lo guedxliujre, sunijtnini, nani gunijt xcälnabajnni lo guedxliujre xcuent rextidxä, xcälnabajnni rajpni xhaguibaa.

³⁴ 'Rniä lojtu, guxhijngä ni jiälä lo tio'p reni naga' lo te da', chää tejni, steeni jia'n.

³⁵ Lo tio'p gunaa ni cayo't, chää tejni, steeni jia'n. ³⁶ Lo tio'p bejn ni yu' lo niaa, chää tejni, steeni jia'n.

³⁷ Che biejn diajgreni rediidxre, gunabdi-dixreni lojni, räjpreni:

—Dad, ¿caro gac recosre?

Badzu' Jesús diidxre, räjpni:

—Cadro naga' te mangut, ro'c rdojp re-golbetz.

18

Xcient te gunabiud con te juejz

¹ Bijza Jesús te cuent ni ruluii lojreni, te guisiedreni xho riajl cuedx-guiniabreni lo Dios lacuua gac-huin lajzreni, ² räjpni lojreni:

—Te guejdx guyu' te juejz ni di chalilajz xtidx Dios, dizani jiu rebejn. ³ Lagajc gue-jdxga guyu' te gunabiud. Guixe-guixee rijni lo juejz, rniabni lojni gunni yälguxhtis lo bejn ni rdxe'ch lojni. ⁴ Balti dxej naadti juejzga gun yälguxhtisga. Dxejcti bejnni xhigab, naani: "Mase dina guidxebä Dios, dizana jiuä rebejn, ⁵ sa'csi gunabi-uudre sanuutisni siäädni loä, abasiedliini narä, gunälis yälguxhtis xten gunaaga, te di chanuutis riädgusiedni narä."

⁶ Dxej räjp Jesús lojreni:

—Riejn diajgtu xtidx juezguyjdxga, ⁷ Naj zxo di Dios, ni najc hueen, gucuadaijg xtidx rexi'nni ni rbedx-rniab lojni dxej-yääl? Di gaclaa gunni yälguxhtis xcient reni agulen. ⁸ Ni'cni rniä lojtu, sungajcni yälguxhtis par laareni. Luxh che guibi' Xi'n Dios ni gujc Niguii, ¿la sidxälni bejn ni rililajz xtiidxni lo guedxliujre?

Xcient te farisee con te ni rusquijx impuest

⁹ Bij Jesús stee cuent ni ruluii loj rebejn ni rluusi najc bensa'c, ni rchalo xhet sajcdi resabejnreni. Räjpni:

¹⁰ —Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest. ¹¹ Sulii fariseega laj ni canabni lo Dios, räjpni:

"Dad, Dios, runidxä xquixtios lojlu sa'csi dina gacä si'c najc rebejn ni najc gubaan, ni najc ben nadiplajz, ni najc bendojl, dizana gacä si'c najc bejnre ni rusquijx impuest. ¹² Rucua'nä tio'p huält nen te xmaan, luxh rudedä te tzuu lo te beex loj guiraa ni runä gaan." ¹³ Niluxh bejn ni rusquijx impuest, zijtru suga'ni, dini guiliäs lojni xhaguibaa. Catiälnaatismi lastooni, caniini lo Dios, räjpni: "Dad, Dios, jbal-aslajz narä, naçä te bendojl!" ¹⁴ Rniliäpac lojtu, ni rusquijx impuest rbaali lajzni gubi'ni rolijzni sa'csi badzucaj Dios rextojl, niluxh di Dios nudzucaj rextojl ben farisee. Sa'csi guiraa rebejn ni rlajz guiliä'p lagajc xpala'nni, susanxtiuyj Diosreni, dx-ejc reni di rlajz guiliä'p lagajc xpala'nreni, siliä'p Dios xpala'nreni.

Benle' Jesús yejc rebiuxbäz

(Mt. 19:13-15; Mr. 10:13-16)

¹⁵ Yu'reni siädnä repiuxbäzreni loj Jesús te guzunji naani yejcreni. Che bahuii rex-pejnpacni si'c, gusloj cadildiidxreni con rebejn te na'c jiädnäreni rebiuxe'. ¹⁶ Dxej gurejdx Jesúreni, räjpni lojreni:

—Colgusaan jiääd rebiuxe' loä, na'c gudxoijtureni, sa'csi xcälrnibee Dios najc xten reni najc nadolajz si'c rebiuxbäze're.

¹⁷ Rniliäpac lojtu, chutis ni rlajz jiu' lo xcälrnibee Dios nanab gusobdiajgreni xtidx Dios si'c rusobdiajg rebiuxe' xtidx xtadreni. Palga dini gun si'c, dini jiu' lo xcälrnibee Dios.

Te bi'n ni rajp xhidajl xhixtenni

(Mt. 19:16-30; Mr. 10:17-31)

¹⁸ Te bi'n ni rnibee gunabdiidx loj Jesús, räjpni:

—Dad, mastrsa'c, ¿xhini'c nanab gunä te xca'ä yälnabajn par tejpas?

¹⁹ Dxej räjp Jesús lojni:

—¿Xhicuent rniilu narä: "Mastrsa'c"? Rutru najcdi bensa'c, xtebtis Dios.

²⁰ Anajnlu xho najc remandamient ni caj lo xleii Moisés: "Na'c guesnäjlu gunaa ni di

gac chäällu; na'c ju'tlu bejn; na'c cuanlu, na'c guiniilu didx-xhii xcient bejn; bazoob xtidx xtadlu, xnanlu, bahuiizareni."

²¹ Dxejc räjp bi'nga lojni:

—Guiraa remandamiento rusobä cheni gucáli biuux.

²² Che biejn diajg Jesús xtiidxni, räjpni lojni:

—Tejis cayäadx gunlu. Bato' guiraa rexhixtenlu, gudisni loj rebejn ni xhet rajpdi dxejc sajplu xcälñasa'clu xhaguibaa. Dxejc gudanajl narä.

²³ Che biejn diajg bi'nga rediidxre, guchuinduxh lajzni, sa'csi najcni te bejn ni rapduxh. ²⁴ Dxejc rdxelojtis Jesús lojni, guchuinza lajzni räjpni:

—Naganduxh jiu' rebenrajp lo xcälñabee Dios. ²⁵ Guyasiru ted te cameii ni' te guux lo ni jiu' rebenrajp lo xcälñabee Dios.

²⁶ Reni biejn diajgni rediidxre, räjpni:

—¿Chuxhni'c sajc laa lo dojl, palga si'c najcni?

²⁷ Dxejc räjp Jesús lojreni:

—Guira'ti ni di gacdi gun rebejn, guyasi rajc rujn Diosni.

²⁸ Dxejc räjp Pedr lojni:

—Dad, nuurnu abasa'nnu guiraa rexhix-tennu te siopnalnu luj.

²⁹ Dxejc badzu' Jesús diidxre lojni, räjpni:

—Rniliápac lojtu, chutis ni gusaan rolijzni näjza rexcuzajnni, rebejtni, chäälni, xi'nni xcient xcälñabee Dios, ³⁰sica'ni xhi-roobru lo guedxliujre, luxh sica'ni yälñ-abajn par tejpas.

Rusule' Jesús stehwält xho guetni

(Mt. 20:17-19; Mr. 10:32-34)

³¹ Gurejdx Jesús rexpejnpacni te laad, te räjpni lojreni:

—Naj chonnu guedx Jerusalén cadre nanab soob rediidx nani bacuua dade' ni gunii xtidx Dios galooli xcient Xi'n Dios ni gujc Niguii. ³² Sutedrenini ladznaa rebenzijt, suxhiznäjrenini, susacsírenini, su-tiobxhejnlireni lojni, ³³luxh che luux qui-renini, dxejc sugu'trenini, luxh ni riojn dxej-sibañsaci loj rebengut.

³⁴ Dxejc laareni direni niacbee rediidxre, dizareni gan xhini'c caniini, sa'csi najcreni diidx ni di gacdi gacebeereni.

Rusiac Jesús te ben lotiä'p

(Mt. 20:29-34; Mr. 10:46-52)

³⁵ Cheni sadzujn Jesús te guejdx ni laa Jericó, sobga' te ben lotiä'p ro' nezyuj, can-abni gojn. ³⁶Che biejn diajgni cadejd xhidajl bejn lo nezyujga, gunabdiidx ben lotiä'pga xhini'c cayajc. ³⁷Dxejc räjpreni:

—Jesús ni siääd Nazare't cadejdni nezga.

³⁸ Dxejc guredxa'ni räjpni:

—Jesús, xi'n toDavid, balaslajz narä!

³⁹ Rebejn ni nijd lojreni gudilhajreni ben lotiä'pga te jiäu ro'ní, niluxh laani dipru guredixa'ni, räjpni:

—¡Xi'n toDavid, balaslajz narä!

⁴⁰ Dxejc guzudxi Jesús ro'c, gunibeeni jiädnäreni bejngä lojni. Che bidzujnni lojni, gunabdiidx Jesús lojni, räjpni:

⁴¹ —¿Xhini'c rlajzlu gunnäá lu?

Badzu' ben lotiä'pga diidxre, räjpni:

—Dad, rlazä jien loä.

⁴² Dxejc räjp Jesús lojni:

—¡Sujien baloju! Abiajclu sa'csi huililaj-zlu.

⁴³ Lagajc dxej, biengajc lojni, calä'pni xpala'n Dios, huinajlni Jesús. Luxh guiraa rebejn ni bahuii xhi guzajcni, gulä'pzareni xpala'n Dios.

19

Huij Jesús roliz te bejn ni laa Zaquo

¹Dxejc biu' Jesús guedx Jericó, sadejdzan guejdxga. ²Ro'c rbäjz te beñrapduxh, ni laa Zaquo, ni rnibee lo reni rusquijx xcient impuest. ³Rlajz Zaquo fiini loj Jesús te gumbeenini, per digacdi fiini lojni sa'csi najcni te beñkhate', luxh xhidajl bejn siädsaj guideb gabí Jesús. ⁴Ni'c baxuñni gunijdni lojreni, huä'pni lo te yajgro ni suga' gajxh nez cadro ted Jesús te si'c sajc fiini loj Jesús.

⁵Che gudejd Jesús nejzga, guläsmi lojni jiaa, bahuiini cadro sobga' beñvre. Dxejc räjpni lojni:

—Zaquo, basquejn biäjt ro'c, lagajc nadxej rlazä chajia'nä rolizlu.

⁶Dxejcti biätgxuñ Zaqueo lo yajgga, rbalazduxhni huinäni Jesús rolizni. ⁷Che bahuii guiraa rebejn xhi gujc, gusloj camo-jmreni, direni jiulajz, räjpreni:

—Jesús sajia'n roliz te bendojl.

⁸Dxejcti huisulii Zaqueo, räjpni loj Jesús:

—Bahuilaare, Dad, gala' xhixtenä gud-edä loj rebenproob; luxh palga yu' chu loj cua'ä xhixteni con yälrusguee, sudzu'ä lojni tajp huält si'cti ni cua'ä.

⁹Räjp Jesúus lojni:

—Lagajc nadxej gubicaj xtojllu näjza xtojl reni rbäjz rolizlu, sa'csi gulipac na-jclu te xagdoo toAbram. ¹⁰Pues Xi'n Dios ni gujc Niguii biädtiil rebendojl te guslaani rebejnga ni gunijt nen dojl.

Xcient tzuu meal

¹¹Lal ni cagucuadiajgreni xtidx Jesúus, bijzani te cuent ni rulului, sa'csi asiäddzujn-gajxhreni guedx Jerusalén, luxh laareni ru-jnreni xhigab sisloj guinibee Jesúus si'ctisni guidzujnni guejdxga. ¹²Dxejc rájpni lojreni:

—Guyu' te bejn, benrajpni, huijni te gue-jdx ziftro te gacni reii, dxejc guibisaci. ¹³Che gajdni guirii, gurejdxni tzuu xmosni, te badeedni lo tebgajreni te melpla't ni sacduxh, rájpni lojreni: “Colyuun dzuun con meélre che guibisacáli.” Sä'tini. ¹⁴Per reben lajdixni dipacreni guichaglajz bejngaa, ni'c baxhalreni gaii bejn te saye'tzreni: “Di rlajzdinu gacni xreinu.” ¹⁵Luxh empac gu-jcni reii, dxejc guibisaci lajdixni. Che bidzu-jnni gurejdxni remosni ni badeedni meal cu'a'reni, te gacbeeni lac bejn tejgareni gaan. ¹⁶Ni bidzujn ganid rájpni lojni: “Dad, xmeellu bejn gaan stzuu meal.” ¹⁷Dxejc rájp reii lojni: “Hueenca, luj najclu te mossá'c, sa'csi laaca bejnlu dzuun lo te dzunbáz, naj sunidxä guinibelu loj tzuu guejdx.” ¹⁸Bidzujn stee mos lojni, rájpni: “Dad, xmeellu bejn gaan gaii meal.” ¹⁹Dxejcti rájpni lojni: “Luj guinibelu loj gaii gue-jdx.” ²⁰Bidzujnti stee mos lojni, rájpni: “Dad, aree xmeellu, guluchedzu'tzäni nen te baii ²¹sa'csi bidxebä guejblu, sa'csi najc guejblu te ben nadiplajz, rutojp guejblu cadre di guejblu nuzuj, luxh rliás guejblu cose'ch cadre di guejblu nibe'c.” ²²Dxejcti rájp reii lojni: “¡Mosguwdx! lagajc ro'lubirii diidx ni gunälu yälguxhtis. Palga najnlu näcä te ben nadiplajz, najnlu rutopä cadre dina nusuä, najnlu rliäsä cose'ch cadre dina nibe'cä, ²³¡Xhicuent dilu nisa'n xmelä nen te bancw te che nibi'ä nica'a xmelä nägajc xi'n meelga?” ²⁴Dxejc rájpni loj reni suga' ro'c: “Colgudzucaj meelga lojni, colgudeedni loj ni rajp tzuu meal.”

²⁵Laareni rájpni: “Dad, per laani arajpni tzuu meal.” ²⁶Dxejc badzu' reii diidxre lojreni, rájpni: “Ni'cni rniä, reni rajp, sica'rureni, niluxh reni di ga'p lojreni sibicaj guiraa recosbäz ni rajpni. ²⁷Luxh

xcuent reni rdxe'ch loä, ni di rlajz niacä reii lojreni, coltanäreni ree, colgugu'treni nez loä.”

Che biu' Jesúus guedx Jerusalén

(Mt. 21:1-11; Mr. 11:1-11; Jn. 12:12-19)

²⁸Che gulujx gumiini guiraa rediidxre, huinuuni xnejzni, sääni nez lo guejdx Jerusalén. ²⁹Che asadzungajxhni reguejdx ni laa Betfagé näjza Betania, gajxh lo dajn ni laa Oliib, baxhalni tio'p rexpejnpacni, ³⁰räjpni lojreni:

—Colchäj lo guejdxni suga' lad rec. Che guidzujntu, guidxältu caduu te bur huin ni gajd bejn cuib. Colguxhecnii, coltanäni ree. ³¹Palga yu' chu guiniabidiidx lojtu: “¿Xhicuent caguxhectuni?” colye'tz lojreni: “Dad caquiinnini.”

³²Sä'ti rexpejnpacni nani baxhalni, bidxälreni manga sigajctisni rájp Jesúus.

³³Cheni caguxhecreni bure'ga, repax-huaan bure'ga rájp lojreni:

—¿Xhicuent caguxhectu bure'ga, ä?

³⁴Dxejc badzu'reni diidxre, rájpni:

—Sa'csi caquiin Dadni.

³⁵Sas huinäreni bure'ga loj Jesúus, gudixhreni xhajbreni dejtzi, te gubijb Jesúsmi. ³⁶Guideb cadre gudejd Jesúus gudixhreni xhajbreni lo nezyuj cadre tedni.

³⁷Cheni ameer guidzujnni bajaad xten dan Oliib, gusloj cabaa lajz guiraa rebejn, rbedxa'lireni calä'preni xpala'n Dios sa'csi bahuiireni guiraa remilagwr ni bejnni. ³⁸Räjpni:

Chicbaa reii ni siääd xcient Xtadnu Dios te guinibeeni loonu.

Sucuedxilajz guiraa reni yu' guibaa, chä'p xpala'n Dios xhaguibaali.

³⁹Dxejc gaii refarisee ni suga' galäii rebejn, rájpni loj Jesúus:

—Mastr, gudidxa' lo rebejn ni siädnajllu te na'cru guiniireni si'c.

⁴⁰Dxejc Jesúus rájp lojreni:

—Rniläj lojtu, palga redee gusäu ro'reni, sibedxa' reguigure.

⁴¹Che bidzujnni gajxh, che bahuiini guedx Jerusalén, biin Jesúus xcient gue-jdxga, ⁴²räjpni:

—¡Maläiä gacbeelu, masque neq redxe-jre, xhini'c sajc guniidz yälrbedxilajz lo-jlu! Per naj naga'tzni, luxh digacdi fiilu lojni. ⁴³Sidzujn dxejga lojlu, cheni jiääd reni rdxe'ch lojlu sujnreni si'c te guraluyj

guideb gabilu, nez lojlu sigajc nez dejt-zlu sisiujreni. ⁴⁴ Sausalta'reni luj lo yujli. Sugut'renre rebejn ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biääd Dios biädhuiilu.

Rusia Jesúš nen guidoro

(Mt. 21:12-17; Mr. 11:15-19; Jn. 2:13-22)

⁴⁵ Dxejcti biu' Jesúš nen guidoro, guslojni cabääni rebejn ni caguto' näjza reni casii.

⁴⁶ Dxej räjpni lojreni:

—Loj rexquijtz Dios caj rediidxre: “Rolizä sajc te yu' cadro jiädnabtu lo Dios”, niluxh la'tu abejntuni si'c te biliäa xte gubaan.

⁴⁷ Guixe-guixee caguluii Jesúš nen guidoro, luxh reni rnibee loj rebixhojz näjza rebejn ni ruluii leii, näjza rebengool xte guejdxga caguilreni mood te ju'trenini, ⁴⁸ luxh direni nidxäjl xho niujnrenini sa'csi guiraa rebejn cacuadiagdzu'tzreni xtiidxni.

20

Xäylrnibee Jesúš

(Mt. 21:23-27; Mr. 11:27-33)

¹ Te dxej suga' Jesúš nen guidoro, caguluiini rebejn, cagusule'zani diidx xcient xho guibicaj xtojleni, che bidzujn reni rnibee loj rebixhojz näjza rebejn ni ruluii leii näjza rebengool, ² räjpreni lojni:

—¿Xhi yälrnibee rujnlu recosre? ¿Chubaniidx yälrnibeega lojlu?

³ Dxejcti räjp Jesúš lojreni:

—Narä sigajcza gunä te yälgunabdiidx lojtu, colgudzu' diidxre loä, ⁴ ¿chuni'c baxhal Juan te gutiobnisni rebejn? ¿La Dios o la rebejn, ä?

⁵ Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhalni, dxejc naani loonu: “¿Xhichucent ditu ninilajz xtiidxni?” ⁶ Palga jie'tznu: “Rebejn baxhalni”, guiraa rebejn sucuaa guij yejcnu, ju'tlireni nuurnu sa'csi laareni rujnpacreni xhigab gunii Juan xtidx Dios.

⁷ Dxej badzu'reni diidxre, räjpreni:

—Dinu guidon chuni'c baxhal Juan te biädtiobnisni.

⁸ Dxej räjp Jesúš lojreni:

—Dizana guiniä xhi yälrnibee rapä te runä recosre.

Xcient remosguijdx

(Mt. 21:33-44; Mr. 12:1-11)

⁹ Dxej gusloj canii Jesúš loj rebejn, bijni cuentre lojreni, räjpni:

—Guyu' te bejn bazuj yaguub lo xyujni. Dxej baedlaanini lo gaii bejn chääreni meed, sät'nini zift, gucladuxhni ro'c. ¹⁰ Che bidzujn dxej ni guidojp cose'ch, baxhalni te xmosni sanab cose'ch ni riäjl xca'ni. Per laareni gudijneni mosga, xhetliidi badeedreni chanäni lo xpaxhuuan yujga. ¹¹ Dxejcti baxhalni stee mos lojreni. Dxej sigajcza gudilnäjrenini, gudijnenini, luxh xhetza badeeddireni lojni, ganaxni gubi'ni lo xlamni. ¹² Dxejcti baxhalni ni riojn mos lojreni, per sigajcza gudinduxhrenini, bari-laagwrenini.

¹³ Dxej bejn baxhuaanga xhigab, naani: “¿Xhichani'c gunä? Suxhalä xi'nä ni sanälazä; che fiireni lojni, pet siuren xtiidxni.” ¹⁴ Dxejcti che bahuui reni go'n-meed lo xi'nni, dxej räjpreni lo sa'reni: “Laa deeni gac xtenni reyujre. Do'o guigu'tnuni te nuurnu xca'nu yujre gacni xtenuu.” ¹⁵ Dxejcti barilaagwrenini lo yujga, sas bagu'trenini.

Dxej gunabdiidx Jesúš lojreni, räjpni:

—¿Xhichani'c gunnäj xpaxhuuan yujga reben guijdxre, ä? ¹⁶ Sidzujnini, sugu'tni guiraa reni cayujn dzun-meed lo yujga, dxej sudeedni yujga lo garencia bejn.

Che biejn diajgre ni rediidxre, räjpreni:

—¡Na'c gusaan Dios gacni si'c!

¹⁷ Bahuui Jesúš lojreni, dxej räjpni:

—¿Xhixhni'c caj lo guijtz ni bacuua redade' ni gunii xtidx Dios galoo? Ro'c cajni:

Guij nani guläcaj renani runchee yu', ni'c agujc guisa'c ni guzuj galoo.

¹⁸ Chutis ni jiajb yejc guijga, sianduxhni, per nani jiajb guijga yejcni siujypacni, li däj gacni.

Xcient reimpost

(Mt. 21:45-46; 22:15-22; Mr. 12:12-17)

¹⁹ Reni rnibee loj rebixhojz, näjza reni ruluii leii rlajzreni guiniaazreni Jesúš lagajc orga, sa'csi gucbeereni lojreni gunii Jesúš cuentre, luxh xhet bejndireni sa'csi rdx-ejbreni rebejn. ²⁰ Dxej cagula' tztisrenini, baxhalreni gaii bejn te gunsireni si'c ni najcreni bendxan, te gucuadiajgreni xtiidxni don gaxäjssi guiga'ni lo te diidx te guteedrenini lo yälguxhtis, yälrnibee xte

gubernadoor.²¹ Dxejc gunabdiidxreni lojni, räjpreni:

—Dad, Mastr, nadonnu laaca rnii guejblu, laaca ruluii guejblu, luxh di guejblu fixgaa la yu'ch uajc bejn, ruluisa'c guejblu xnez lo Dios. ²² Gunilaa loonu, *¿la* laaca guidiixnu reimpuest loj xcubieer César o la xhet laadini, ä?

²³ Sas gucbegajc Jesús cayujsireni yäl-gunabdiidxga, dxejc räjpni lojreni:

—*Xhicuent runnäjtü narä scree?*

²⁴ Baluui loä te xmeeltu. *¿Chucha yejc caj lojni, chucha laj caj lojni?*

Dxejc räjpreni:

—Xten César.

²⁵ Dxejc räjpni lojreni:

—Coldeed lo César nani najc xten César; coldeeda lo Dios nani najc xten Dios.

²⁶ Luxh direni niujn gaan nigalni loj nicla te diidx ni guniini nez loj rebejn. Rdxelotjisreni lo rextiidxni, biäuti ro'reni, guzudxireni.

Rniabdiidxreni xcient yälrbänsac lo rebengut

(Mt. 22:23-33; Mr. 12:18-27)

²⁷ Dxejc huij gaii resaduceos huihuiirenloj Jesús. Di resaduceos chalilajz rbañsan bejn lo rebengut. Ni'cni gunabdiidxreni loj Jesús,²⁸ räjpreni:

—Dad, Mastr, basa'n Moisés guijtz loonu, lojga caj: “Palga guet te bejn, gusaanni chäälini ruti xi'nni, nanabpac xca' bejtzni gunaaga te chu xi'nni con laani xcient tobejtzni.” ²⁹ Guyu' gajdz niguui, bejtz najcreni. Sas cua' niguigalooga chäälini. Che gujtni ruti xi'nni. ³⁰ Dxejcti cua' ni rojpga gunaaga. Che gujtni, rutiza xi'nni. ³¹ Sigajcza guzajc ni riongga. Si'cza guläsñäj gunaaga guigajdzreni. Guiraareni gujt, nicla tejreni di xi'nreni niu'. ³² Dxejcti näj gunaaga gujt. ³³ Guigajdzreni guläsñäjreni gunaare, ni'cni, che guibänsacreni lo rebengut, *¿chu chääl gacni, ä?*

³⁴ Dxejc räjp Jesús lojreni:

—Lo guedxliujre ruchñaa rebejn, rudeedzreni xindxa'preni ruchñaa.

³⁵ Niluxh rebejn ni agule Dios te chääreni xhaguibaa, näjza te guibänsacreni loj rebengut, di reni'c guchñaa, dizareni gudeed xindxa'preni guchñaa, ³⁶ sa'csi diru gac guetreni, anajcreni si'c najc rexangl Dios. Laareni najc xi'n Dios sa'csi

abaspansac Diosreni. ³⁷ Moisésli basule' xcient ni rbañsan reben loj rebengut che bacuaani diidx xcient yajg ni gurebajl. Ro'c gurejdxni Dios räjpni: “Xtios Abram, Xtios Isaac, näjza Xtios Jacob”, ni'cni nabajnpacreni lo Dios. ³⁸ Sa'csi di Dios gac Xtios rebengut; najcni Xtios rebejn ni nabajn par tejpas, sa'csi par laani guiraa rebejn nabajn.

³⁹ Dxejc gaii reni ruluii leii badzu'reni diidxre, räjpreni lojni:

—Mastr, laaca guniilu.

⁴⁰ Sa'csi dirurenii niajx niniabdiidxrurenii lojni.

Chu xi'n najc Crist

(Mt. 22:41-46; Mr. 12:35-37)

⁴¹ Dxejcti räjp Jesús lojreni:

—*Xho mood rniireni Crist najc xi'n to-David, ä?* ⁴² Ni lagajc toDavid bacuaa lo reguijtz ni laa reSalmo:

Dad Dios räjp lo Xtdäd:

⁴³ “Gurej xladbeä cheni guidzujnli dxej ni gudzugä guiraa ni rdxe'ch lojlu te gacebeereli luj rnibeelu guira'ti.”

⁴⁴ *Xho mood gacni xi'nni palga rnii toDavid lojni “Dad”?*

Rucuaquij Jesús reni ruluii leii

(Mt. 23:1-36; Mr. 12:38-40; Lc. 11:37-54)

⁴⁵ Guiraa rebejn cagucuadijg che räjp Jesús loj rexpejnpacni:

⁴⁶ —Colyajp cuiadaad reni ruluii leii, sa'csi rdxaglajzreni rajcwreni lajd siool, rlajzreni saru guinii guiraa rebejn “xchan” lojreni, rlajzreni jiu bejñreni nez loguui, rlajzreni cuereni lo reyaghilsa'c neñ reguidobäz, näjza cadro rajc lanij. ⁴⁷ Rudzucajzareni rexhixten regunabiud, dxejc rolreni rele' siolduxh che rniabreni lo Dios te fii rebejn, te naa bejn najcreni bëndxan, luxh lojreni suxhal Dios te castigwroru.

21

Gojn xten te gunabiuud

(Mr. 12:41-44)

¹ Nen guidoro bahuii Jesús cagusäl rebenrajp gojn nen te guijn cadro rdojp gojn.

² Bahuiizani lo te gunabiuud, lacti proobni. Basälñi xcojnni nen guijnga, tio'ptis melbäz basälñi. ³ Dxejc räjp Jesús:

—Rniliápac lojtu, gunabiuud proobga basälruni loj guiraa reni casäl gojn, ⁴ sa'csi

guiraa redec ni cagusäl xcojnni casälreni tudxe'nsi xmeelreni, niluxh gunaare loj xcälproobni, basälni guiragajc ni rajpni te jio' xhi gauni.

*Räjp Jesúś sibijl guidoro
(Mt. 24:1-2; Mr. 13:1-2)*

⁵ Yu' reni cayujy diidx xcient guidoro, räjpreni:

—Lacti sacruduxh rieñni sa'csi guisa'c naccheeni, suchenäjzani xhidajl recossa'c ni badeed bejn si'c gojn.

Dxejc gunii Jesús lojreni, räjpni:

—Sidzujn dxej sibijl guiralii ni cahuiitu, nicla tej guij di jia'n yejc sa'ni, guiragajcni sibijl.

*Reseen ni chu che nitloj guedxliuj
(Mt. 24:3-28; Mr. 13:3-23)*

⁷ Dxejc gunabdiidx rexpejnpacni lojni, räjpreni:

—Dad, Mastr, ¿guc gacni? ¿Xhi seen chu che gac recosga?

⁸ Räjp Jesúś lojreni:

—¡Colsusin te na'c gusgueereni la'tu! Sa'csi xhidajl reni jiääd sinii: "Narä nacsi Crist", o "Asiadgajxh redxej che jiäädni", per na'c chalilajztu xtiidxreni, na'cza chanajtureni. ⁹ Luxh che jiejn diajgtu cayajc guer cadilnäj sa' bejn, na'c guidxejbtu, sa'csi ganid recosga gac, luxh gad galdi nitloj guedxliuj.

¹⁰ Dxejc sanuu cayäjpnii lojreni:

—Säjs te nación, sucuanäj stee nación, näjza te ladx bejn sucuanäj stee lajdx bejn. ¹¹ Sajcza xuro, su' gubijn, su'za yälgujidx nez ree nez rec. Luxh xhaguibaali sien guiraloj ni ruchejb näjza seenro.

¹² Luxh ganid gac recosre, siniaazreni la'tu, sirinajlreni la'tu, suteedreni la'tu trabajw. Suteedreni la'tu lo reben guidobäz, susälzareni la'tu nen latzguiib, sinäzareni la'tu nez loj reii näjza gubernadoor sa'csi rinälajztu xtidxä. ¹³ Luxh guiraa dee sajctu te gac gusule'tu xtidxä lojreni. ¹⁴ Na'c gunxgaatu xhigab nen lastootu xhini'c guiniitu lojreni, ¹⁵ sa'csi narä sunidxä diidx guiniitu, sunidxäza yälñajn lojtu te digac gudzu'reni diidx lojtu niclaza gacdi guiniyajreni xtiidxtu. ¹⁶ Näjza rexuzajntu sibire lojtu, suto'reni la'tu, sigajcza rebejztu, resa'tu, rexamiigwtu, luxh yu'tu sugu'treni. ¹⁷ Guiraa rebejn guedxliuj sibälaz la'tu sa'csi rinälajztu

xtidxä. ¹⁸ Niluxh ni'cla tej xquidxejctu di nitloj. ¹⁹ Luxh palga sutijptis lajztu, sajptu yälñabajn par tejpas.

²⁰ 'Che fiitu tre' xhidajl soldaad guideb gabi guedx Jerusalén colyacbee abidzujn dxej ni guibijlni. ²¹ Dxejc reni yu' guedx Judea, nanab guxuñreni chacuatzlojreni nen redajn; reni yu' guedx Jerusalén, nanab jiunejzreni ro'c; reni suga' lo niaa, na'c guibi'reni lo guejdxga, ²² sa'csi nen redxejga sujn Dios fis lo guejdxga te soob rediidx ni caj lo reguítz xten Dios. ²³ Probe'za regunaa ni nuu báz nen redxejga, näjza regunaa ni ca' báz, sa'csi su' yälñuinduxh lo guedxliuj, näjza fis ni gun Dios loj rebnejinga. ²⁴ Yu'reni guet lo quer, yu'zareni chää pres, sijreni balti guedxzijt. Dxejc rebenzijt sinibee guedx Jerusalén che guiza'li redxej ni gusaan Dios guinibee rebejn ni di gac xpejñ Israel.

Cheni jiääd Xi'n Niguii

(Mt. 24:29-35, 42-44; Mr. 13:24-37)

²⁵ Räjpzani:

—Dxejc su' seen lo gubijdx näjza lo bääi, näjza loj rebajle' ni yu' xhaguiba. Luxh lo renacion guedxliuj su' rebejn yärsia', di jien xhi gunreni, sidxebduxhreni sa'csi siejn diajgreni chubeduxh lo nisdoo, sásduxh nis ni räjs lo nisdoo. ²⁶ Sitiol rebejn xcient yälrdxebduxh che gunreni xhigab xhicharuni'c gac lo guedxliuj, sa'csi näj guideb guibaa sinibsejs. ²⁷ Dxejcti suhui-ireni lo Xi'n Dios ni gujc Niguii, siäädni lo te za guideb xcälrnibeeni, näjza yälrdim-bichaduxh. ²⁸ Che guisloj gac recosre, col-sutijp lajztu, colgualias yejctu, colgualabajz sa'csi asadzujn dxej gusilajztu.

²⁹ Gunizani stee cuent lojreni, räjpni:

—¡Colhuii lo yagiigw näjza lo guiraa reyajg! ³⁰ Che fiitu acabääni be'n, coly-acbee lagajc la'tu, abidzungajxh bääi nis-guij. ³¹ Sigajcza che fiitu agusloj cayajc recosre, colyacbee asiäddzujn xcälrnibe Dios.

³² 'Rnlíápac lojtu, guiraa recosre sajcs ansde guet rebejn ni yu' naj. ³³ Guibaa näjza guedxliuj sinitloj, rextidxä dini nitloj.

³⁴ '¡Colsusin lagajc la'tu! Na'c gusaantu cha lajztu yälrausa'c, yälrä', yälga'ptu xhix-tentu, dxejc ditu gacbee che bidzujn dxejga. ³⁵ Sa'csi si'c sidzujn dxejga loj guiraa reben

guedxliuj. ³⁶ Colsusin, colbejdx, colguini-abtis lo Dios, te gac laatu lo guira'ti ni gac, gacza suutu nez loj Xi'n Dios ni gujc Nigui.

³⁷ Rdxee ruluij Jesús neñ guidoro dxejc guxhijn sajia'nni yejc dan Oliib. ³⁸ Rsilru ristie rebejn te rdzujnreni lo Jesús neñ guidoro casob rsil, te gucuadiajgreni rextiidxni.

22

*Ria'nreni diidx xho guiniaazreni Jesús
(Mt. 26:1-5, 14-16; Mr. 14:1-2, 10-11; Jn.
11:45-53)*

¹ Siäddzungajxh dxe lanij che rajwreni yätxiil ni di sägуй, laaza lanija pascw. ²Dxejc reni rnibee loj rebixhojz näjza rebejn ni ruluij leii caguilreni xho gunreni te ju'treni Jesús, sa'csi rdxejbreni rebengue-jdx.

³ Dxejc biu' beñdxab lastoo Judas ni laaza Iscariote, ni najc tej retzubitio'p xpejnpacni. ⁴Dee huininäjni dade' ni rnibee loj rebixhojz näjza loj reni rnibee rexduxhtis guidoo. Guninäj Judasreni xho gunni te guteedni Jesús ladznaareni. ⁵ Dxejc bibal-ajreni, bia'nnreni diidx gudeedreni meal lojni. ⁶Cuäjbti Judas, dxejcni guslojni caguiilni xho gunni guteedni Jesús ladznaareni che rut bejndi suga'.

*Xchej xten Dad Jesús
(Mt. 26:17-29; Mr. 14:12-25; Jn. 13:21-30; 1Co.
11:23-26)*

⁷Bidzujn dxe lanij che rajwreni yätxiil ni di sägуй, che rugu'tzareni te xil si'c ni caj lo xleii toMoisés. ⁸ Dxejc baxhal Jesús Pedr näjza Juan, räjpni lojreni:

—Colchayejn xchej xten pascw te guidaununi.

⁹ Dxejc laareni gunabdiidxreni lojni, räjpreni:

—¿Caro rlajzlu choyennuni?

¹⁰Räjp Jesús lojreni:

—Cheni jiu'tu lo guejdx, sidxaagtut te dade' ni nuu te re' nis. Colchanajlni, coljiu' rolijz bejn cadro jiu'nii laani. ¹¹ Dxejc colye'tz lo bejn ni najc rolijzni ro'c: "Si'c naj Dad Mastr: ¿Con yu' cadro sajc gauxchenää rexpenä naj pascw?" ¹² Dxejc guluiini lojtu te yu' ni sojb jiaa yejc stee yu'. Asuchexgaa yu'ga. Ro'c colyejn xhi guidaunu.

¹³ Sä'tireni. Si'ctis ni räjp Jesús lojreni, si'cpac bidxälreni. Dxejc bejnreni xchej xte lanij pascw gauren.

¹⁴ Che bidzujn or, gurenäj Jesús rexpejnpacni lo mex. ¹⁵ Dxejc räjpni lojreni:

—Guyuduxhä gaan gaunääpactu xchej xten pascw ansde tedä trabajwduxh.

¹⁶ Sa'csi rniä lojtu, diruna gaunää la'tu pascw cheni guidzujnli dxej ni gacni lo xcälrnibee Dios.

¹⁷ Dxejc cua'ni te co'p, badeedni xquixtios lo Dios, räjpni:

—Colyä' dee, colgudeedni lo sa'tu.

¹⁸ Sa'csi rniä lojtu, diruna yä'lä nis ni rii yejc uub stehüält cheni guidzujnli xcälrnibee Dios.

¹⁹ Dxejcti cua'ni yätxiil, badeedni xquixtios loj Dios, gula'nini, gudisnini lojreni, räjpni:

—Dee najc si'c tiehxä ni gudedä ju'treni xcuenttu. Colyejn screeza te guinalajztu narä.

²⁰ Si'cza bennäjni co'p che gulujx guda-jwreni, räjpni lojreni:

—Ni yu' neñ co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn ni agulen.

²¹ Per bahuilaare, bejn ni guto' narä sob-ganäj narä lo mexre. ²² Guliipacni, Xi'n Dios ni gujc Nigui sinuu tedni loj nezyuj ni abalui Dios lojni. Luxh proobza bejn ni guto' narä.

²³ Dxejc gusloj canabdiidxreni lo sa'reni, žchuchani'c gunni?

Cayejyreni chuni'c najc beñroru

²⁴ Sas gusloj cayejyreni, don chuni'c guibee gac beñro lojreni.

²⁵ Dxejcti räjp Jesús lojreni:

—Rereii ni rnibee ladjx bejn ni digac xpejñ Israel, rnibeereni lojreni astoo xten-pacreni najc reguejdxga. Luxh rebengue-jdxga rnii lacti hueen najc rereiiga. ²⁶ Per la'tu na'c gactu si'c. Nani najc bengoolru lojtu, ni'c riäjil gacni si'c najc ni huinru lojtu. Luxh nani rnibee riäjil gacni si'c mos.

²⁷ ¿Chuni'c sajcr lo bejn? ¿La bejn ni rbej lo mex te gauni o la ni ruteed xhi gaurenlo mex? ¿La xhet sajcdiru bejn ni sojb lo mex, ä? Niluxh narä yu'ä lojtu si'c ni ruteed xhi gauni.

²⁸ 'La'tu najctu ni gusunäj narä guideb ni gudedä retrabajw ni gudedä. ²⁹ Ni'cni

narä runidxä yälrnibee lojtu sigajc ni bani-idx xtad yälrnibee loä, ³⁰ te gautu, yätu lo xmexä xhaguibaa, te cuezatu lo yagxhil cadro guntu yälguxhtis loj rexpejn guitzu-bitio'p rexagdoo Israel.

*Räpxgaa Jesús di Pedr guicäjp numbeeni
(Mt. 26:31-35; Mr. 14:27-31; Jn. 13:36-38)*

³¹ Räjp Jesús loj Simón:

—Simón, Simón, agunab bendxab ni laa Satanás luj te gusniibni luj si'c rusniib bejn xob te jiani. ³² Narä agunabä lo Dios xcuentlu te na'c jiäadx xcälrililajzlu. Luxh luj che gusiejch lajzlu, guibi'lu, bastioob lastoo resa'lulu.

³³ Räjp Simón lojni:

—Dad, narä sirinalälu; mase gusäureni luj latzguiib, näjza narä siäunäälu; mase ju'treni luj, näjza narä setnäälu.

³⁴ Dxejcti räjp Jesús loj Simón:

—Pedr, rniä lojlu, nicla gajd guidgaii cuedxa' nadxej niluxh luj alaräjplu chonli huält, dipaclu gumbee narä.

*Nanab soob rediidx ni bacuaareni xcuent
Jesús*

³⁵ Dxejcti gunabdiidx Jesús lojreni räjpni:

—Che ganaxtu baxhalä la'tu, xhet bolsdi sanätu, nicla carteerdii, niclaza stee gura'chdi, ³⁶ la yu' xhi biquiintu, xhi biäädx lojtu, ä?

Dxejcti räjpreni:

—Xheti.

³⁶ Dxejcti räjpni lojreni:

—Luxh ³⁷ rniä lojtu, ni rajp bols, suchanänini; sigajcza carteeer. Luxh ni di ga'p espaad, guto'nii xchamarni te siini tejni. ³⁸ Sa'csi rniä lojtu, sisiojb rediidx ni caj lo requijtz Dios xcuentä, cadro caj: "Bigab-näjni reben latsiaj." Guiraa ni caj lo reguijtz xten Dios xcuentä nanab soobpacni.

³⁸ Dxejcti räjpreni lojni:

—Dad, aree tio'p espaad.

Dxejcti räjpni lojreni:

—Sajl reni'c.

*Rbedx-rniab Jesús loj Dios
(Mt. 26:36-46; Mr. 14:32-42)*

³⁹ Dxejcti birii Jesús, si'cni rujnpacni, sääni nez dajn ni laa Oliib. Dxejcti sanajl rexpejn pacni. ⁴⁰ Che bidzujnreni ro'c, räjpni lojreni:

—Colcuejdx, colhab lo Dios te na'c jia-jbtu lo dojl.

⁴¹ Dxejcti gubicaj Jesús lojreni, huijni te lajt zite' cadro suga'reni, si'cti cadro rdzujn te guij che rucuaanini. Ro'c bazuxhijbni, gurejdx-gunabni lo Dios, ⁴² räjpni:

—Xtadä, palga rlajzlu, baslaa narä loj trabajwduxhre. Niluxh na'c gacni si'c ni rlazä narä. Bejn si'cni rlajzlu gunlu.

⁴³ Dxejcti biricaj te xangl Dios lojni te badeedni yälrutiplajzni. ⁴⁴ Lalni cadejdni trabajwduxh, cayac-huinduxh lajzni, cabedx-canabruni lo Dios. Guzunislini gusloj catejb lo yuj biniduxh si'c rejn lojni.

⁴⁵ Chemi huisuni, gulujx gurejdx-gunabni lo Dios, huijni cadro suga'renxepjnpacni. Ro'c bidxälnireni nagayejs guiraereni sa'cni cayac-huin lajzreni. ⁴⁶ Dxejcti räjpni lojreni:

—¿Xhicuent nagayejstu? ¡Colchastie! ¡Colhab lo Dios te na'c jiajbtu lo dojl!

Che gunaazreni Jesús

(Mt. 26:47-56; Mr. 14:43-50; Jn. 18:2-11)

⁴⁷ Lal ni canii Jesús lojreni, bidzujn xhidajl bejn. Tej rexpejnpacni ni laa Judas, nijdni nez loj rebejngä. Dxejcti gubigni loj Jesús, te bachagro'ni loj Jesús. ⁴⁸ Dxejcti räjp Jesús lojni:

—Judas, ⁴⁹ la con te yälruchagro' ruteedlu Xi'n Dios ni gujc Niguii ladznaa rebejne, ä?

⁴⁹ Che bahuui reni sugaränäj Jesús xhini'c cayajc ro'c, gunabdiidxreni loj Jesús, räjpreni:

—Dad, ⁵⁰ la sixa'tnu yejcreni con spaad, ä?

⁵⁰ Sas tej rexpejn Jesús gudilnäj te mos xten ni rnibee loj rebixhojz, batiu'nii diajgni ladbee. ⁵¹ Dxejcti räjp Jesús lojreni:

—¡Agujc! ¡Colgusaanreni!

Dxejcti gudajn Jesús diajg mosga, basi-ajcnini. ⁵² Gunigajc Jesús loj reni rnibee loj rebixhojz näjza reni najc guixhajg xten guidoo näjza rebengool, guiraa reni siädx-inini, räjpni:

—¿La siädnätu spaad näjza garo't, astoocanu siädxiiut te gubaan, ä? ⁵³ Cheni suga'a lojtu guixe-guixee nen guidoo, ditu nuhuäl narä. Per dee najc xortu, luxh arnibee yälhäcajy la'tu.

Di Pedr guicäjp numbeeni Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Dxejcti gunaazreni Jesús huinärenini rolizb bixhojz ni rnibee lo guiraa rebixhojz. Siädnäj Pedrni zit-zijt. ⁵⁵ Che bidzujnreni

gule'creni guiboo galäii lole' xten bixho-jzga, gurejreni guideb gabí, te bidxa' la-jzreni. Näj Pedr nadxaag lojreni gurej ro'c.

⁵⁶ Dxejc te gunaa ni rujn dzuun ro'c, che bahuiini sobga' Pedr ro'c, rdxelotjsni lojni, räjpni:

—Näj niguire guyunäj Jesús.

⁵⁷ Dxejc basuni' Pedr räjpni:

—Nan, dina gumbeäni.

⁵⁸ Che gojl stera't, che bahuii stee bejn lojni, räjpni lojni:

—Näj luj najclu te rexpejnni.

Per Pedr räjp lojni:

—Gurniälöjlu, Dad, dina gacä xpejnni.

⁵⁹ Che gudejd si'cti teb or, räjp stee bejn lojni:

—Guliipacni, näj bejnre guyunäjni, sa'csi laani najczani te ben Galilee.

⁶⁰ Dxejc räjp Pedr lojni:

—Gurniälöjlu Dad, dipacna ganä xhini'c caniilu loä.

Läjni canii Pedr rediidxre, guredxa' te guidgaii, ⁶¹ luxh gubiréza Jesús, bahuidzu'tzni lo Pedr, dxejc banalajz Pedr nani gunii Jesús lojni, räjpni: "Che gajd guidgaii cuedxa', abazumi'lu chon huält, räjplu dilu gumbee najrä." ⁶² Dxejcti guchuin lajz Pedr, biriini ro'c, ronduxhni.

Rniyajreni Jesús

(Mt. 26:67-68; Mr. 14:65)

⁶³ Rebejn ni canäj Jesús, gusloj cagux-hisnäjrenini, caguijnarenini. ⁶⁴ Dxejc basäureni lojni, gudajpreni lojni, räjpreni lojni:

—¡Guni chuni'c gudijnl!

⁶⁵ Luxh guiraloj cayäjbreni lojni, caniyaduxhrenini.

Bidzunnäjreni Jesús nez loj rebixhojz

(Mt. 26:59-66; Mr. 14:55-64; Jn. 18:19-24)

⁶⁶ Che bara yääl, bidojp rebengool ni rnibee, näjza reni rnibee loj rebixhojz, näjza rebejn ni ruluii leii, huiñäreni Jesús te suuni nez lojreni neñ yu' cadro rujnreni yälguxhtis. Dxejcti räjpreni lojni:

⁶⁷ —Palga luj najclu Crist, bicäjpní loonu.

Dxejc badzu' Jesús diidxre lojreni, räjpni:

—Palga guicäpäni, ditu chalilajz. ⁶⁸ Luxh palga gunä te yälgunabdiidx lojtu xcuent Crist, ditu gudzu' diidxga loä. ⁶⁹ Per najlisibej Xi'n Dios ni gujc Niguii xladbee Gueb Dios ni yu' xhaguiba.

⁷⁰ Dxejc gunabdiidx guiraareni lojni, räjpreni:

—Mabaj pues, ¿la lu jajclu Xi'n Dios, ä?

Dxejc badzu' Jesús diidxre lojreni räjpni:

—Nacäni, si'cni najtu la'tu.

⁷¹ Dxejc räjpreni lo sa'reni:

—¿Xhirucxhamaaz rlajztu? Dirunu guiquiin diidx guinii bejn, sa'csi lagajc nuurnu abiejn diajgnu diidx ni guniini lagajc laani.

23

Jesús nez loj Pila't

(Mt. 27:1-2, 11-14; Mr. 15:1-5; Jn. 18:28-38)

¹ Dxejc huisu guiraareni, huinäreni Jesús nez loj Pila't. ² Ro'c guslojreni cabe'creni xquejni, räjpreni:

—Bidzálnu bejnre cayujni biey lo rex-pejnnu. Räjpzani xhet nanabdi quiixnu impuest lo reii César. Caniizani laani najcni Crist, nalajznu najczani reii.

³ Dxejc gunabdiidx Pila't lojni, räjpni:

—¿La lu ni najc reii xten rexpejñ Israel, ä?

Sas badzu' Jesús diidxre räjpni:

—Najcni lagajc si'c ni guniilu.

⁴ Dxejc räjp Pila't loj reni rnibee loj rebix-hojz näjza loj guiraa rebejn:

—Dina guidxälä nicla tej dojl xten bejnre.

⁵ Niluxh laareni sanuutis caniirení, dipru caniirení, räjpreni:

—Guiraa reben Judea cayu' yärsia' xcuent xcärluluiini. Guslojni guedx Galilee, luxh reeli sanuu caguluuinini.

Jesús nez loj Herodes

⁶ Che biejn diajg Pila't rediidxre, gun-abdiidxni: "¿La Galilee siääd bejngá?"

⁷ Cheni räjpreni ro'c siäädni, baxhaljni loj Herodes ni najc gubernadoor xten Galilee, sa'csi neñ redxejga yu' Herodes guedx Jerusalén. ⁸ Che bahuii Herodes loj Jesús, bibalajzni sa'csi agujc xchej rlajzni fiini lojni, sa'csi abiejn diagni diidx xcuent ni cayujni. Luxh rlajzni fiini gunni te milaagwr. ⁹ Xhidajl yälgunabdiidx bejn Herodes, luxh xhet gunidi Jesús. ¹⁰ Ro'c suga'za reni rnibee loj rebixhojz näjza rebejn ni ruluii leii, cabecduxhreni xquejni. ¹¹ Dxejc gulälaz Herodes näj rexsol-daadni Jesús, baxhiznäjrenini, ni'c bashua-jcwrenini te ladsa'c sa' ni rajcw reii, dxejcti

baxhalsacrenini loj Pila't. ¹² Lagajc dxejga, Pila't näjza Herodes gujcreni amiigw, luxh galoo bidxe'ch lo sa'reni.

Gunibeereni guet Jesús

(Mt. 27:15-26; Mr. 15:6-15; Jn. 18:39-19:16)

¹³ Dxejc gurejdix Pila't reni rnibee loj bix-hojz, näjza rebengool ni nadj guxhtis, näjza rebenguejdx. ¹⁴ Dxejc räjpni lojreni:

—La'tu biädnätu bejäre loä, najtu caguquilni rebejn gunreni bieyj, luxh narä agunabdiidxä guiraloj lojni nez lojtu, luxh abahuuiu dina nidxälä nicla tej dojl ni cagucuaquijtuni. ¹⁵ Niclaza Herodes di nidxäl nicla tej dojl, ni'cni baxhalsacnini loomu, luxh abahuuiu xhet dojldi bejnni te guetni. ¹⁶ Ni'cni quinäni, dxjecti gusläáni.

¹⁷ Nadj costumbr ruslaa Pila't te bejn ni yu' neñ latzguiib casob rajc lanijre.

¹⁸ Per guiraareni guredxa'reni si'c tejsi bejn, räjpreni:

—¡Bagu't bejnre, baslaa Barrabás!

¹⁹ Barrabás nadj ni basälremi latzguiib sa'csi batojpni te cuaa bejn ni bacuanäj resoldaad xten Rom, näjza sa'csi yu' chubagu'tnii. ²⁰ Rlajzpac Pila't guslaani Jesús, ni'c gunisacni lojreni, ²¹ niluxh rebejn dipru guredxa'reni, räjpreni:

—¡Baculaani lo crujz, bacuaani lo crujz!

²² Riojn gunisac Pila't lojreni, räjpni:

—¿Xhi dolduxh bejnni? Xhetlidi dojl rdxälä bejnni te guetni. Ni'cni siguinäni dxejc susläáni.

²³ Luxh laareni sanuutis guredxa'reni, gunabreni xcajni lo crujz. Luxh sa'csi guredxa'tisreni, bejintireni gaan gujc si'c ni rlajzreni. ²⁴ Dxejc cuäjb Pila't gunibeeni gac si'c ni gunabreni. ²⁵ Dxejc baslaani bejn ni yu' latzguiib sa'csi bejnni bieyj, bagu'tzani bejn, dxejc badeedni Jesús lojreni te gun-näjrenini si'ctis ni rlajzreni.

Che cuaj Jesús lo crujz

(Mt. 27:32-44; Mr. 15:21-32; Jn. 19:17-27)

²⁶ Cheni sanäreni Jesús xcaj lo crujz, gunnaazreni te bejn ni laa Simón ni siääd güedx Cirene; basaj bejinga lo niaa. Dxejc basgurenini crujz, siädnajltini dejtz Jesús.

²⁷ Siädnajlza xhidalduxh bejn, näjza xhidajl gunaa ni cayonduxh, cabedxa'reni sa'csi cayac-huinduxh lajzreni xcient Jesús. ²⁸ Dxejc gubiré Jesús, räjpni lojreni:

—Gunaa Jerusalén, na'c roontu xcientä, colyoon lagajc xcienttu näjza xcient rex'i'ntu. ²⁹ Sa'csi sidzujn dxej gäbreni: “Chicbaa regunaa ni di gacdi chu xi'nni, chicbaaza reni di nuxi'n, renani di nusiä'bäz.” ³⁰ Dxejc guisloj rebejn gäb loj redajn: “Coljiajb yejcnu”, säjbzareni loj relom: “Colgucua'tz nuurnu.” ³¹ Palga scree runnäjreni narä ni nacä si'c te yagnaga, aticaxh gunnäjreni la'tu ni nadj si'c te yagbjidz.

³² Sanäzareni tio'p benguijdx xcajzareni loj recrujz, guetnäjreni Jesús. ³³ Che bidzujnreni te lajt ni laa Calabeer, ro'c bacuaareni Jesús lo te crujz, bacuaazareni guiro'p rebenguijdxga lo stio'p crujz, tejni xladbee, steeni xladbäjgwni. ³⁴ Cheni cagucuaa rebejn reni lo crujz, gunii Jesús, räjpni:

—Xtadä, badzucaj xtoj rebejnre, sa'csi direni gan xhini'c cayujnreni.

Dxejc gudzujt resoldaad daad yejc xhajbni, te gudisreni xhajbni cua'renini.

³⁵ Suga' rebejn ro'c cadxelotjisreni. Näjza reguxhtis caguxhisnäjreni laani, cayäpreni:

—Balti bejn baslaani, naj suguslaani la-gajc laani palga gulinini laani najcni Crist ni nüle Dios.

³⁶ Näjza resoldaad caguxhisnäjni, gubi-greni lojni te badeedreni bin-nii yäni.

³⁷ Dxejc räjpreni lojni:

—Palga gulii najclu ɻeii xten rexpejin Israel, baslaa lagajc luj.

³⁸ Luxh bacuaareni gaii diidx loj te baräjd ni cuaj yejc crujz. Con didx griegw, con didx latín, näjza didx hebreo, bacuaareni scree: “Dee nadj Reii xten rexpen Israel.”

³⁹ Te reben guijdx ni najl lo te crujz ni caj cuä'ni caniyajni Jesús, räjpni lojni:

—Palga luj najclu Crist, baslaa lagajc luj nägajcza nuurnu.

⁴⁰ Per benguijdx ni najl lo crujz stelaadga gudidxa'ni loj stee benguijdx ni caniyaj Crist, räjpni:

—¿La dilu guidxejb Dios? ¡Ni cayajczal tejsi castiigw! ⁴¹ Per nuurnu cayajcnu castiigw ni riäj gacnu te guidiixnu redojl ni biennu. Luxh laani xhet dojldi bejnni.

⁴² Dxejc räjpni loj Jesús:

—Bazalajzlu narä che guidzujn lu xoçärnibeelu.

⁴³ Dxejc badzu' Jesús diidxre, räjpni lojni:

—Rniliápac lojlu, lagajc nadxej chunäjlu
narä xhaguibaa.

Che gujt Jesús

(Mt. 27:45-56; Mr. 15:33-41; Jn. 19:28-30)

⁴⁴ Agojl si'cti läidxej. Dxejc bicäjy guideb
guedxliuj, si'c bianxcäjy si'cti rcachonti.

⁴⁵ Bicäjy lo gubijdx, luxh ladró ni najl nen
yudxanro xten guidoro, biräjsni gucni tio'p
la'. ⁴⁶ Dxejcti guredxa' Jesús, räjpni:

—Xtadä, ladznaaluu rutedä xaimä.

Che guniini si'c, gujtini.

⁴⁷ Che bahuii capitán ni rnibee loj resol-
daad guiraa ni guzajc, gulä'pni xpala'n Dios,
räjpni:

—Guliipacni, xhet dojldi bejn bejnre.

⁴⁸ Guiraa rebejn ni suga' ro'c ni bahuii
guiraa ni guzajc ro'c, gubi'reni rolizjreni,
cayääzreni lagajc lastooreni. ⁴⁹ Luxh guiraa
reni rumbee Jesús, näjza regunaaga ni biädnajlni
che biriilini Galilee, zijtru bia'nreni
cahuiireni guiraa recos ni cayajcre.

Che biga'tz Jesús

(Mt. 27:57-61; Mr. 15:42-47; Jn. 19:38-42)

⁵⁰ Guyu' te bejn ni laa José, lacti
huen najcni, luxh laaca rujnni guira'ti.
Siäädni guedx Arimatea, régión Judea.
Nadxaaggzani loj reni rnibee nen guidoro
xten rexpejñ Israel. ⁵¹ Cabäjzza José jiääd
yälrnibee xten Dios, ni'cni dini nidxaglajz
nani bejn resa'nii. ⁵² Dxejcti huijni lo Pila't,
gunabni tiejxh Jesús. ⁵³ Che gulätnini lo
crujz, batejbnini neñ te bariaad, dxejcti
bacua'tznini neñ te baa ni guc-chee cuä'
te guilaj. Nacoob baaga, nicla tej bejn
gajd guiga'tz ro'c. ⁵⁴ Dxejga najc dxej ni
rusucheereni guira'ti, luxh agojl jiu' dxej ni
rusilajzreni.

⁵⁵ Regunaa ni guzanäj Jesús che biriilini
Galilee huihuiireni robaaga te bahuiireni
xho gudixhreni togoolga neñ baa. ⁵⁶ Che
gubi'reni rolizjreni bencheereni recuaan ni
rlianexhduxh näj te ni najc si'c te saj ni
rlianexhduxh ni ruzaareni retogool. Dxej-
cti basilajzreni dxej ni rusilajz bejn, si'cni
caj lo xleii Moisés gunreni.

24

Che gubañsac Jesús lo rebengut

(Mt. 28:1-10; Mr. 16:1-8; Jn. 20:1-10)

¹ Dxej ni gusloj xmaanga, rsilodoor huinä
regunaaga robaa recuaan ni rlianexjh ni
bencheereni. ² Che bidzujñreni, bahuiireni

agubicaj guij ni rusäu ro' baa. ³ Dxejc che
biu'reni neñ baaga, direni nidxäl tiejxh
Jesús. ⁴ Lal ni cadxelojreni, di jieñ xhi
gunreni, biricaj tio'p dade' gusuj cuä'reni.
Rdimbichaduxh xhajbreni. ⁵ Bidxebeduxh
regunaaga, basajbreni lojreni lo yuj. Dxejc
räjp redade'ga lojreni:

—¿Xhicuent siädtiiltu te bejn ni nabajin
lo rebengut, ä? ⁶ Rutini ree. Agubansaci.
Colgusnaj lajztu redidx ni guniini cheni
guyusijcni Galilee, ⁷ che najni lojtu: “Riäj
jiajb Xi'n Dios ni gujc Niguii ladznaa reben-
doj, xcaczani lo crujz, dxejc ni riojn dxejga
sibansaci loj rebengut.”

⁸ Dxejc banaj lajz regunaaa xtidx Jesús,
⁹ biriireni robaa, gubi'tireni te bijreni diidx
lo retzubiteeb rexpejñpacni näjza loj rebejn
ni yunäjreni. ¹⁰ Reni huisa'n diidx loj rex-
pejñpac Jesús najc redee: Marii Magdalen,
näjza Xuan, näjza Marii xnan Jacob, näjza
sgaai gunaa. ¹¹ Niluxh rexpejñpacni bejn
xhigab didxnayälni, direni nililajz xtidx
regunaaga.

¹² Dxejc huisu Pedr, ruxunlini huijni ro'
baa. Che gudixhlojni, bahuiini neñ baaga,
ganaxtis bariaad dzuub te laad. Dxejc
gubi'ni rolizjni, rdxelotjismi xcuent ni gujc.

*Ni gujazc lo nezyu ni sii guedx Emaús
(Mr. 16:12-13)*

¹³ Lagajc dxejga, tio'p rexpejñpacni
sääreni te guejdx ni laa Emaús, ni ria'n
si'cti tzubiteeb kilómetro loj guedx
Jerusalén. ¹⁴ Lal ni sasajreni lo nezyujga,
cayujyreni diidx xcuent reni gujc ro'c.
¹⁵ Lal ni canifireni gubig Jesús lojreni, gusloj
sasanäjnenreni. ¹⁶ Luxh mase cahuiireni lojni,
yu' xhi badxojn niembeerenni. ¹⁷ Dxejc
gunabdiidx Jesús lojreni, räjpni:

—¿Xhini'c ruytu lal ni sasajtu, ä?
¿Xhicuent cayac-huin lajztu?

¹⁸ Tejreni ni laa Cleofas badzu' diidxre,
räjpni:

—Guiraasi bejn najn xhi gujc nen guedx
Jerusalén. ¹⁹ La lujtis bia'nlu neñ guejdxga
ni di gan xhi gujc ro'c, ä?

¹⁹ Dxejcti räjp Jesús lojreni:

—¿Xhini'c gujc ro'c?

Dxejc räjpreni lojni:

—Recos xcuent Jesús ni siääd guedx
Nazare't, ni gujc te niguii ni gunii xtidx
Dios, rajpni yälrnibeduxh xten Dios loj
redzuun ni rujnni näjza loj redidx ni

rniini, nez loj Dios näjza nez loj rebejn.
²⁰ Näjza xho bejn reni rnibee loj rebixhojz näjza rexcuxhtisnu, bateedrenini ladznaa reni gunibee guetnii, dxejc bacuaarenini lo crujz. ²¹ Niluxh nuurnu cabääznu laani gacni nani nuslaa rexpejñ Israel ladznaa rebenzijt. Naj agujc choñ dxej ni gujc recosre. ²² Luxh yu' gaai gunaa ni nadxaag loonu ni baschelojreni nuurnu. Barsil, che huijreni robaa xtemni, ²³ direni nidxäl tiejhixni. Biäds'a'nreni diidx loonu najreni bahuiireni lo tio'p xangl Dios ni räjp lojreni, agubansac Jesús lo rebengut. ²⁴ Dxejcti huuhuii gaai sa'nu robaa, bahuiizreni najcni si'ctis ni naj regunaaga loonu, niluxh direni nuuhui loj Jesús.

²⁵ Dxejc räjp Jesús lojreni:

—¡Lacti nayääl tre' xcäriejntu! Lacti nen rililajztu xtidx redade' ni gunii xtidx Dios xcient Crist. ²⁶ ¿La di nungäj tedxgaa Crist retrabawduxhre dxejcti jiu'ni lo xcälrdim-bicha' Dios, ä?

²⁷ Dxejc gusloj cagusule'ni guiraa rediidx ni caj lo xquijtz Dios xcient Crist. Gusalonäjni xtidx Moisés, dxejc huunuuni basule'ni guiraa reguijtz ni bacuua redade' ni gunii xtidx Dios.

²⁸ Che bidzujñreni guejdx cadro sääreni, bejn Jesús si'cni chanuuni chääni lo nezyuj.

²⁹ Dxejc laareni bascuääzrenini te jian-näjnireni, räjpreni lojni:

—Biannäj nuurnu, sa'csi acayajc gudxej, agojl jiu' guxhijn.

Dxejcti biu' Jesús te jianäjnireni. ³⁰ Cheni sobganäjnireni lo mex, cua'ni yätxtiil, benle'nini, dxejc gula'nini, gudisnini lojreni. ³¹ Lagajc dxejc, baxhal Dios balojreni, biembeereni Jesús, dxejc laani gunitlojni lojreni. ³² Dxejcti räjpreni lo sa'reni:

—¿La di lastoonu nibeguiboo cheni siädniini loonu lo nezyuj, che cagusule'ni xtidx Dios?

³³ Dxejc dirureni nibäjz ro'c, alga gunas-gajcreni nez, gubi'reni guedx Jerusalén. Ro'c bidxälneni abidojp xpejñpac Jesús näjza sgaai bejn. ³⁴ Dxejcti bijreni diidx loj guiro'preni bidzujn, räjpreni:

—Guliipac gubansac Jesucrist, luxh baluilojni loj Simón.

³⁵ Dxejc guiro'p reni bidzujn bijzareni diidx ni gusajcreni lo nezyuj, näj xho biem-beezareni Jesús che gula'ni yätxtiil.

Baluiloj Jesús loj rexpejñpacni

(Mt. 28:16-20; Mr. 16:14-18; Jn. 20:19-23)

³⁶ Canisi'creni rediidxre chela baluiloj lagajc Jesús galäiireni, guniini xchan lojreni, räjpni:

—¡Colcuecdxi lajztu!

³⁷ Per laareni rdxelojreni bidxejbreni, naareni cahuiireni lo te sprit. ³⁸ Dxejc räjp Jesús lojreni:

—¿Xhicuent cadxejbtu? ¿Xhicuent rac-tio'p lastootu? ³⁹ ¡Colhuii reñaä, näjza reni'ä! Lagajc naräni. Colcajn narä te fiipactu laa naräni, sa'csi anajntu di te sprit ga'p bael niclaza tzujt si'c rapä narä.

⁴⁰ Che guniini rediidxga, baluigajcni reñaani näjza reni'ni. ⁴¹ Lal ni cadxelojreni, di gacdi chalilajzreni, sa'csi cabaduxh lajzreni, räjpni lojreni:

—¿La yu' xhi rajptu gauä ree, ä?

⁴² Dxejc badeedreni te la' bälbigue', näjza te la' seer ni yu' tzujn. ⁴³ Ni'c cua'ni guda-jwnini nez lojreni. ⁴⁴ Dxejc räjpni lojreni:

—Dee najc xtidzä ni rniä lojtu cheni yusicä lojtu, rniä riäj soob guiraa rediidx xcentä ni caj lo xleii Moisés, näjza lo rexquijtz redade' ni gunii xtidx Dios näjza ni caj lo rexquitz Salmos.

⁴⁵ Dxejcti basanijni xcäriejnreni te gucebeereni xhi sälöj rediidx ni caj lo rexquijtz Dios xcientni. ⁴⁶ Dxejc räjpni lojreni:

—Scree caj lo reguijtz: Nanab guet Crist, dxejc ni riojñ dxej, guibansaci loj rebengut. ⁴⁷ Sire'chza diidx xcient xho ruslaa Crist rebejn nen dojl che rusiechreni lajzreni, che rililajzreni xtiidxni. Guedx Jerusalén guislojni, dxejc sire'ch diidx guideb guedxliuj. ⁴⁸ La'tu najctu testi-igw guiraa recosre. ⁴⁹ Narä suxhalä Sprit Dxan xten Dios lojtu, ni'c coljia'n guedx Jerusalén cheni jiädläjzlini nen lastootu, guniidixnii yälrniibe ni siääd xhaguibaali.

Huäjs Jesús xhaguibaa

(Mr. 16:19-20)

⁵⁰ Dxejc huinä Jesúsreni stelaad guedx Jerusalén gajxh lo te guejdx ni laa Beta-nia. Ro'c guläsnii naani, benle'nii yejcreni.

⁵¹ Lal ni cayujnni si'c, gubicajni lojreni,

huäjsni xhaguibaa. ⁵²Peta laareni gulujx go-jnrenini, dxejc cabalazduxhreni gubi'reni guedx Jerusalén. ⁵³Ro'c guixe-guixee guyu'reni neñ guidoro, calä'preni xpala'n Dios. Sugacni si'c.

Redidxhuen Xten Jesucrist Ni Bacuua San Juan

Xtidx Dios najc te Niguii

¹ Galodoo che gusloj guira'ti, ala yu' Diidx. Luxh nani najc Diidxga yunäj Dios, luxh Diidxga najc Dios. ² Che gajd gaccheeli guedxliuj, yunäjni Dios. ³ Xcuent laani benchee Dios guedxliuj näjza guira'ti ni yu' lojni. Guiraa recos ni yu' di gacdi niu'reni paru rutini. ⁴ Laani gojp yälnabajn. Yälnabajnga najc bianij xten rebejn. ⁵ Luxh bianijga rdimbicha' nez lo yälçäjy, niluxh yälçäjyga di niajcdi nusuiinini.

⁶ Guyu' te niguii birilaj Juan, ni baxhal Dios. ⁷ Laani biäädni te basule'ni diidx. Biädsule'ni diidx xcuent bianij te nililajz guiraa rebejn diidx xcuent bianij. ⁸ Laani dini gac bianij, laani biädsule'ni diidx xcuent bianij. ⁹ Laa bianijpacga ni rusani lastoo guiraa rebejn, luxh naj abiäädni lo guedxliujre.

¹⁰ Nani najc Diidxga guyu' lo guedxliujre, xcuent laazani guc-chee guedxliujre, luxh di reben guedxliujre nililajz chu najni na-jcni. ¹¹ Biäädni loj rexpen Israel, niluxh rexpejñi direni nicäjb niu'nii lojreni. ¹² Dxejc loj guiraa reni cuäjb guyu'ni lojreni, loj renani huililajz xtiidxni, loj reni'c badeedni yälrnibee gacreni xi'n Dios. ¹³ Laa reni'c ni di gac si'c xi'n ben guedxliuj, ni gojl sa'csi rlajz te biniet chu xi'nni, dee najcpacreni Xi'n Dios sa'csi sudeedni yälnabajn par tej-pas lojreni.

¹⁴ Diidxga gujc te beñ guedxliuj. Guläjzni lo guedxliujre, bahuilojzanu xcälrdimbicha'ni, si'c yälrdimbicha' xten xingan xteb xtdadi, laani najcpacni nani sanälajz nuurnu, nani rnii didxllo loonu. ¹⁵ Juan gunii xcuent Jesú. Guredxa'ni, räjpni:

—Laa dee ni rnää, nani siääd detzä sajcruni loä, sa'csi laani ganidni nabajnni loä.

¹⁶ Sa'csi guiraanu cua'nu xcälnasacduxhni, yälracnäj detzä yälracnäj. ¹⁷ Leii xten Dios biädnä toMoisés, niluxh yälracnäj näjza redidxliu biädnä Jesucrist. ¹⁸ Rut chu tejdi abahui lo Dios, xinxtebni ni yunäjpac Dios, laani basule'ni diidx xcuent Dios loonu.

Juan ni rutiobnis gunii chuni'c najc Jesucrist

(Mt. 3:11-12; Mr. 1:7-8; Lc. 3:15-17)

¹⁹ Dee najc diidx nani gunii Juan ni rutiobnis che baxhal rexpejñ Israel rebixhojz näjza rexpejñ guidoo ni laa levitas, biriireni guedx Jerusalén te sanabdiidxreni lo Juan, räjpreni lojni:

—¿Luj chu najclu?

²⁰ Dxejcti bicäjpmi lojreni, xhet bacua'tzdini lojreni, räjpni:

—Et narädi nacä Crist ni jiääd.

²¹ Dxejcti gunabdiidxreni lojni, räjpreni:

—¿Chuxhni'c najclu? ¿La lujni najc Elías?

Räjpni:

—Dina gacäni.

Räjpreni:

—¿La najclu te dade' ni gunii xtidx Dios ni cabääznu jiääd?

Dxejc räjpni:

—Dina gacäni.

²² Räjpreni:

—¿Chuxhni'c najclu? Te chonänu diidx loj reni baxhal nuure. ¿Xhi rniilu, chuxhni'c najclu?

²³ Räjp Juan:

—Narä nacä nani rbedxa' nez lo reyubidz si'c ni gunii Isaás, ni gunii xtidx Dios scree: “Colyensa'c xnezyuj Dad.”

²⁴ Rebejn ni baxhal redee najc reni rniireni “farisee”. ²⁵ Dxejc gunabdiidxreni stee, räjpreni lo Juan:

—¿Xhicuent rutiobnislu palga dilu gac Crist ni jiääd niclaza Elías ni claza stee niguii ni rnii xtidx Dios ni cabääznu jiääd, ä?

²⁶ Dxejcti räjp Juan lojreni:

—Narä rutiobnisä con nis, niluxh galäitiyu' tej nani ditu gumbee. ²⁷ Laa dee ni siääd detzä niluxh di nungäjil ni claza surloä cuääk xcura'chni, sa'csi sajcruni loä.

²⁸ Guiraa recosre gujc stelaad cadro laa Betábara, ni ria'n stelaad ro' gueu Jordán cadro cagutiobnis Juan.

Jesús najc Xile' xten Dios

²⁹ Che bara yääl, bahui Juan siääd Jesú lojni. Dxejc räjpni:

—Colhui! Aree Xile' xten Dios nani rudzucaj xtojl reben guedxliuj. ³⁰ Lagajc xcuent dee ni rnää cheni guniä lojtu: “Detzä siääd te niguii ni sajcrui loä, sa'csi ganidli

narä agac nabajnni.”³¹ Luxh dina niem-beäni, per biädtiobnisä con nis te guluiä lo rexpejn Israel chu najcni.

³² Guniza Juan stee diidx xcientni, räjpni:

—Narä bahuiä biäjt Sprit Dxan xten Dios xhaguibaa si'c te palom guzudxini yejcní.

³³ Dina niembeäni, per nani baxhal narä gutiobnisä con nis, laani najni loä: “Cheni filiu jiäjt Sprit Dxan xten Dios xhaguibaa si'c te palom, sudxini yejc te bejñ, laanini najc ni gutiobnis con Sprit Dxan xten Dios.”

³⁴ Narä abahuiä lojni, ni'cni rniliä: “Dee ni najc Xi'n Dios.”

Reni gujc xpejñ Jesú ganiddoo

³⁵ Che bara stee yääl, sugarasac Juan ro'c, sugaränji tio'p rexpejñni. ³⁶ Bahuiini lo Jesú che sasajni, dxejc gunii Juan, räjpni:

—¡Colhuii! ¡Laa dee ni najc Xiił xten Dios!

³⁷ Biejn diajg guiro'p rexpejnpac Juan diidxga, dxejc sanajlreni Jesú. ³⁸ Che gubiré Jesú bahuiini siädnajlreni, dxejc räjpni:

—¿Xhi caguillt?

Räjp rebejngá:

—Mastr, ¿caro rbäjzlu?

³⁹ Badzu' Jesú diidxre, räjpni:

—Coltaa, te fiitu.

Dxejcti huijreni te bahuireni caro rbäjzni ro'c. Biannäjrenini ro'c sa'csi agojl si'cti rcatajp gudxej.

⁴⁰ Tej reni biejn diajgni xtidx Juan laa Andrés, bejtz Simón Pedr dxejc huinäjlni Jesú. ⁴¹ Ganiddoo huitilni bejtzni, dxejc räjpni lojni:

—Abidxälnu Mesías nani sälöjza Crist ni cabääznu jiääd.

⁴² Sas huinänini loj Jesú. Che bahuii Jesú lojni, räjpni:

—Luj najclu Simón xi'n Jonás; sirilajlu Cefas nani sälöjza Pedr.

Gurejdx Jesú Felipe näjza Natanael

⁴³ Bara yäälga rlajz Jesú chää nez Galilee. Dxejc bidxaagni Felipe, räjpni lojni:

—Gudanajl narä.

⁴⁴ Felipe siääd guedx Betsaida, guedxro ni najcza lajdz Andrés näjza Pedr. ⁴⁵ Felipe bidxaag Natanael räjpni lojni:

—Abidxälnu bejñ nani bacuaa toMoisés xcientni lo reguijtz xten leii agujc xchej, nani bazä'lta reniguii ni gunii xtidx Dios, Jesú xi'n José ni siääd Nazare't.

⁴⁶ Räjp Natanael:

—¿La sajc guirii te bensa'c guedx Nazare't, ä?

Räjp Felipe lojni:

—Gudaa, te fiilu.

⁴⁷ Che bahuii Jesú siääd Natanael nez lojni, räjpni:

—Colhuii te ben Israelpac nani dipacni gusguee.

⁴⁸ Räjp Natanael:

—¿Xho numbeelu narä?

Badzu' Jesú diidxre lojni räjpni:

—Che gajd Felipe cueedx luj, che suga'lilu ni' te yagiigw, bahuiä lojlu.

⁴⁹ Badzu' Natanael diidxre, räjpni:

—Mastr, luj najc Xi'n Dios, luj najc Reii xten rexpen Israel.

⁵⁰ Räjp Jesú lojni:

—Sa'csi rniä lojlu, “bahuiä suga'lilu ni' yagiigw”, ¿ni'c rililajzlu, ä? Xhidajl cosroru suhuiliu.

⁵¹ Dxejcti räjpzaní:

—Rniliäpac lojtu, suhuilitu guixal xhaguibaa, näjza rä'p riäjt rexangl Dios yejc Xi'n Dios ni gujc Niguii.

2

Te sa' ni guyu' guedx Caná xten Galilee

¹ Che gudejd choq dxej, guyu' te sa' guedx Caná xten Galilee. Ro'c guyu' xnan Jesú.

² Huijza Jesú näjza rexpejnpacni, sa'csi bidonreni chääreni lo sa'ga. ³ Gubijdz bin. Dxejc räjp xnan Jesú lojni:

—Dirurení ga'p bin.

⁴ Dxejc badzu' Jesú diidxre räjpni:

—¿Xhicuent rniilu si'c loä, xnanä? Gajd xhorä guidzujn.

⁵ Niluxh räjp xnanni loj remos ni tre' ro'c:

—Colyejn guira'ti si'ctis ni guiniini lojtu.

⁶ Suga' xho'p guesguij nani rdxaj nis te rdiib *nña* rexpejn Israel te racnayarení te si'c guisa' xleii toMoisés. Nen tejga guesguijga ru' si'cti te gayuu litr nis. ⁷ Räjp Jesú loj remos:

—Colguchaj reguesguijre nis.

Dxejcti bachadoo rebejngani. ⁸ Dxejcti räjp Jesú lojreni:

—Colca' che'nni naj te colchanäni lo nani cahuii cayajc sa're.

Dxejc huinä remosga che'n bin lojni.

⁹ Che gu' dade'ga che'n nis ni gubixhloj bin (luxh dini gan caro siäädni, remostis

ni gulä'p nis, ni'ctis najn). Dxejcti gurejdx dade'ga bi'n. ¹⁰Dxejcti räjpni:

—Guiraa rebejn rudeedreni binsa'c räx-gaa rebejn, dxejcti che agudxaj xque'reni, rudeedreni bin nani di xcuent, niluxh luj gulucheelu binsa'cre najli.

¹¹ Seenre najc ganiddoo ni gusloj bejn Jesús; bejnnini neñ guedx Caná xten Galilee. Seenga bazäbdiidx yälrnibee xtensi luxh ni'cni huililajz rexpejnpacni xtiidxni.

¹² Che gudejd sa'ga, huijni guedx Caper-naum con xnanni, rebejtzni näja rexpejnpacni. Ro'c bia'nreni tio'p-chon dxej.

Basia Jesucrist guidoro

(Mt. 21:12-13; Mr. 11:15-18; Lc. 19:45-46)

¹³ Sa'csi abidzungajxh lanij pascw xten rexpejñ Israel cheni rnalajzreni guxhijñ ni gudejd guixhajg xten yälgujt neñ Egipto, ni'c sää Jesús guedx Jerusalén. ¹⁴ Nen guidoro bidxálni xhidajl bejn nani ruto'gon, xiił, palom näja reni sobga' caguchaa melzijt. ¹⁵ Dxejc bejnni te chico't con gaii duu, gulaäni regon con rexil neñ guidoo. Batie'chni xcoobr rebejn nani ruchaa melzijt, barexh-xhätni remmexreni. ¹⁶ Räjpzani loj reni caguto' repalom:

—Colcuää redhee, na'c rujntu rolizj xtradä si'c te guui cadro rdo' guiraloj.

¹⁷ Dxejcti banajlajz rexpejnpacni xhi caj lo reguítz ni bacuua redade' ni gunii xtiidx Dios: “Gucnaj lazä xcuent ni runnäjreni rolijzu.”

¹⁸ Dxejcti gunabdiidx reni najc xpejn Is-rael lojni, räjpreni:

—¿Xhi seen guluiilu loonu naj te fiinu arajplu yälrnibee te abejnlu recosre?

¹⁹ Badzu' Jesús diidxre räjpni:

—Colgutzujl guidoore, luxh narä nen chontis dxej sunchesacäni.

²⁰ Räjp rexpejñ Israel lojni:

—Tiubixho'p ijz guclaa ni guc-chee guidoore, ¿xhixh sajc gunchesacluni nen chontis dxej, ä?

²¹ Niluxh laani caniini xcuent guidoo ni najc lagajc tiejhni. ²² Ni'cni cheni gubansacni loj rebengut, banajlajz rexpejnpacni rediidxre ni guniini, dxejc huililajzreni nani caj lo rexquítz Dios näjza rediidx ni gunii Jesús.

Numbee Jesús guiraa rebejn

²³ Cheni guyu' Jesús guedx Jerusalén cadro cayajc lanij pascw, lał ni cayajc lani-jga, xhidajl rebejn huililajz xtiidxni, bahui-izareni remilagwr ni bejnni. ²⁴ Luxh di Jesús nililajz xtidx rebejnga, sa'csi arumbeeni xho najc rebejn. ²⁵ Niluxh dini niquiin chu gäb lojni xho najc bejn, sa'csi lagajc laani anancheeni xho najc lastoo tejga bejn.

3

Jesús con Nicodem

¹Guyu' te niguii lo rexpejñ refarisee ni laa Nicodem, najcni te beñroru loj reni rnibee rexpejñ Israel. ² Te guxhijñ biädxhiga'tzni nez loj Jesús, räjpni lojni:

—Mastr, nadonnu lo Dios siäädli si'c te ni ruluii, sa'csi rut rajcdi rujn sa' remilagwr nani rujnlu palga di Dios sunäjni.

³ Dxejcti räjp Jesús lojni:

—Rniliápac lojlu, nani di gaal stehuält, di gacdi fiini xcälrnibee Dios xhaguibaa.

⁴ Dxejcti räjp Nicodem lojni:

—¿Xho gac gaal te bejn stehuält niluxh anajcni bengool? ¿Xhixh sajc chusacni xque' xnanni stehuält te galsacni, ä?

⁵ Badzu' Jesús diidxre räjpni:

—Rniliápac lojlu, nani di gaal con nis, näjza con Sprit Dxan xten Dios, di gacdi jiu'ni lo xcälrnibee Dios xhaguibaa. ⁶Nani rajl xi'n ben guedxliujre, ni'c najctisni bejn guedxliuj, luxh nani rajl por Sprit Dxan xten Dios, Spritzta najcni. ⁷ Na'c rdxeljulu sa'csi rniä: “Nanabpac gaallu stehuält.”

⁸Rbi' bej cadrotis rlajzni; riejn diajglu rubejni niluxh dilu gan caro siäädni, dizalu gan caro sääni. Si'cza rebejn guedxliuj direni gan xho rajl rexpejñ Dios stehuält con Sprit Dxan xten Dios.

⁹ Badzu' Nicodem diidxre, räjpni:

—¿Xho mood sajc gac recosre?

¹⁰ Räjp Jesús lojni:

—La najclu te mastr xten rexpejñ Is-rael luxh dilu gan recosre, ä? ¹¹ Rniliápac lojlu, aguniinu xcuent recos ni nadonnu, abasule'nu recos ni abahuiloonu, niluxh la'tu ditu nililajz xtiidxnu. ¹² Palga ditu chalilajz xtiidxnu che guniinu xcuent recos guedxliuj nani rniinu: ¿Xho chalilajzu xtiidxnu palga guniinu xcuent recos xhaguibaa?

¹³Rut chutejdi ahüä'p xhaguibaa, xtebtis nani biäjt xhaguibaa, lagajc Xi'n Dios ni

gujc Niguii. ¹⁴ Lagajc si'cni guläsjiaa to-Moisés bäl guiib lo yajg neñ reyubijdz, sigajcza nanab chäs Xi'n Dios ni gujc Niguii jiaa; ¹⁵ te guiraa renani chalilajz xtiidxni direni nit lo Dios, sica'reni yälnabajn par tejpas.

Xho huinälajz Dios rebeñ guedxliuj

¹⁶ 'Sa'csi huinälazduxh Dios rebejn guedxliuj, ni'cni badeedni biääd Xinxtebni lo guedxliuj, te guiraa renani chalilajz xtiidxni direni nit lo Dios, sa'csi sajpreni yälnabajn par tejpas. ¹⁷ Sa'csi di Dios nuxhal xi'nni te gusnijtni rebejn guedxliuj, alga baxhalnini te laa rebejn neñ xtojlenri xcuentni.

¹⁸ 'Nani chalilajz xtiidxni näjza chalilajz najcni chu najni najcni dini nit, luxh nani di chalilajz xtiidxni agunijtni sa'csi dini nililajz xtidz Xinxteb Dios. ¹⁹ Ni'cni dee najc yälnijtgä: abiääd bianijga loj guedxliuj, biädnä Xi'n Diosni, niluxh rebejn guedxliuj bidxaglajzreni yälnacäjy cadro tre'reni, gulälazreni bianijga sa'csi xhet laadi najc xtzuuunreni. ²⁰ Guiraa reni rujn dzunguidx, rbälaz bianijga, dizareni guibig loj bianijga, didi guluiloj bianijga rextzunguidxreni. ²¹ Luxh reni rusooib didxlii, rbigreni loj bianijga, te bianijga ruluiloj najc rextzuunreni redzunsa'c xten Dios.

Rnisac Juan ni rutiobnis xcient Jesús

²² Dxejcti biääd Jesús näjza rexpejnpacni nez lo reyuj xten Judea. Ro'c guyuniäjnireni, batiobniszca rexpejnpacni rebejn. ²³ Juan ni Rutiobnis cagutiobniszani bejn te lajt ni laa Enón ni tre' gajxh Salim, sa'csi ro'c yu' sijl nis. Ro'c sää rebejn lojni te cagutiobnisnireni. ²⁴ Dxejc gajdreni gusäu Juan neñ latzguiib.

²⁵ Dxejcti gusloj rexpejñ Juan cayujy diidx con gaii xpejñ Israel xcient yäldiib naareni ni najc xcostumbr rexpejñ Israel. ²⁶ Dxejc biäädreni lo Juan, räjpreni:

—Mastr, dade' nani guyunäjlu stelaad gueu Jordán, nani basule'lü xcientni, adade'ga cagutiobnis, luxh guiraa rebejn asää lojni.

²⁷ Dxejc badzu' Juan diidxre, räjpni lojreni:

—Nicla tej bejn digacdi ga'p te xhi cos palga di Dios gudeedni lojni. ²⁸ Lagajc la'tu nancheetu guniliä: “Dina gacä Crist ni cabäjztu jiääd.” Guniäza: “Narä nacä nani biädnijd lojni.” ²⁹ Che rajc sa', nani sobganäj

dxa'p, ni'c najc bi'n ni gac chäälni, luxh xamigw bi'n nani suga' ro'c, riejn diajgní rniini, rbalazduxhni sa'csi riejn diajgní xse' bi'n. Sigajcza abibaduxh lazä xcuentni. ³⁰ Nanab gacni laani benroru, bensajcru, biädla narä riajl gacä beñhuinru, ni guxiuru sajc lojni.

Nani siääd Xhaguibaa

³¹ 'Nani siääd jiaali, ni'c rnibee guiralii, niluxh nani najc beñ guedxliuj ni'c rnii xcient recos guedxliuj. Nani siääd xhaguibaa ni'c rnibee guiralii. ³² Nani bahuiini, nani biejn diajgni, ni'c rusule'ni niluxh guxiu rililajzreni xtiidxni. ³³ Nani rililajz diidx ni rusule'ni, bejnga ruluiloj guliipac najc xtidz Dios. ³⁴ Nani baxhal Dios, ni'c rnii xtidz Dios sa'csi che rudeed Dios Sprit xtenni, dini gudeed guxiini. ³⁵ Dad Dios sanälajzni xingaanni, abadeedzani guiraliti chu ladznaani. ³⁶ Nani rililajz xtidz xingaanni arajp yälnabajn par tejpas, luxh ni di chalilajz xtidz xi'nni, dini fii yälnabajn, siääd xcäldxe'ch Dios yejcní, sujn Dios castiigwni.

4

Rdxaaag Jesús te gunaa Samaria

¹ Che gucbee Jesús abiejn diajg refarisee xhidajlru bejn sanajl Jesús luxh guxiiru sanajlreni Juan, luxh cagutiobnisreni, ² (niluxh xhet Jesúsdi cagutiobnis. Rexpejñni ni catiobnis), dxejc ³ biriini Judea gubisaci nez Galilee.

⁴ Lał ni sasajni, nanab tedni nez Samaria.

⁵ Ni'c bidzujñni te guedxro xten Samaria ni laa Sicar, gajxh nejz loj te la' yuj ni badeed tojacoop lo xi'nni toJosé. ⁶ Ro'c sojb te bisie ni rniireni “xpisie Jacob”. Sa'csi abadxajg Jesús siädsajni, gurejni ro bisiega. Agojl läidxej. ⁷ Bidzujn te gunaa siäldä'pni nis, dxejc räjy Jesús lojni:

—Baniidx che'n nis yä'ä.

⁸ Sa'csi rexpejnpacni asääreni guejdxga sasiireni xhi gaurení.

⁹ Räjpti guna samaritanga lo Jesús:

—Xho mood rniablú nis loä, luj ni najc te beñ Israel luxh narä nacä gunaa samaritan?

(Sa'csi di rexpejñ Israel chanä sa'reni rebejn Samaria.) ¹⁰ Räjy Jesús lojni:

—Paru najnlu xhini'c najc yärlulasljz xten Dios, paru numbeelu chuni'c canab nis

lojlu, luj siniablu lojni te laani guniidxni
nisnabajn^u lojlu.

¹¹Räjpti gunaaga lojni:

—Dad, xhet ca'dilu te guiliä'plu nis,
luxh bisiere najc jiätduxh. ¹²¿La beñrorulu lo
toxtadgolfoonu Jacobo ni basa'n bisiere
cadro huä'p nis gu'ni, gu'za rex'i'nni, näjza
rexquidxaani, ä?

¹³Badzu' Jesús diidxre lojni, räjpni:

—Guiraa reni rä' nis bisiere, siojleni
stehuält. ¹⁴Luxh nani yä nis nani gudedä,
diruni jiojl, sa'csi nis nani gudedä neñ^u las-
tooni sajcni si'c te bisie nani rdatis nismi te
gudeedni yäl nabajn^u par tejpas.

¹⁵Dxejcti räjp gunaaga lojni:

—Dad, baniidx nisga yä'ä, te na'cru jiolä,
te na'cruza guibi'ä jiädlä'pä nis ree.

¹⁶Räjp Jesús:

—Huij, huitejdx chäälu gudanäni ree.

¹⁷Räjp gunaa loj Jesús:

—Ruti chäälä.

Räjp Jesús lojni:

—Laaca guniilu, ¹⁸sa'csi aguyu' gaiili
chäällu. Luxh nani rbäznäjlu naj dini gac
chäällu; guliica najlu.

¹⁹Che biejn diajg gunaaga si'c, räjpni:

—Dad, rchaloä najclu te niguii ni rnii
xtidx Dios. ²⁰Retoxtadgolfoonu gojnreni
Dios lo dajnre, luxh la'tu rniiut guedx
Jerusalén najc cadro nanab ganni Dios.

²¹Räjp Jesús lojni:

—Gunaal, huililajz xtidxä, sidzujn^u or
cheni niela lo dajnre, niela guedx
Jerusalén ditu chagajn^u Dad Dios. ²²La'tu ra-
jntu Dios nani ditu gumbee, nuunu rajnnu
Dios nani rumbeenu; sa'csi yärluslaa bejn
lo dojl siääd xcent rexpejñ Israel. ²³Niluxh
sidzujn^u or, luxh alabidzujnni, che reni
guliipac rajn^u Dad, reni'c neñ lastooreni, lo
xcäriejnreni sajnreni Dios. Sa'csi sa' bejnre
rguiil Dad Dios te gañrenini. ²⁴Dios najc te
Sprit. Reni rajn^u Dios nanab ganrenini neñ
lastooreni, lo xcäriejnreni, guideb xtijpreni
sa'csi rumbeerenini.

²⁵Räjp gunaa lojni:

—Ananä siääd Mesías ni laaza Crist.
Cheni jiäädni, laani susule'ni guiralii
loonu.

²⁶Räjp Jesús lojni:

—Narä ni caniä lojlu, nacä laani.

²⁷Dxejcti bidzujn^u rexpejñpacni, bidxelo-
jreni sa'csi gunii Jesús lo gunaaga, niluxh
rut gunabdiidxdi xhi rlajzni, niela guedx
gunabdiidxdi xhini'c caninäjni gunaaga.

²⁸Dxejcti basa'n gunaaga xtie'ni, sä'tini
guedxroga. Dxejcti räjpni loj rebejn:

²⁹—Coltaa, fiitu te niguii ni gunii loä
guira'ti nani abenä. ³⁰La et laadi dee Crist
ni cabääznu jiääd, ä?

³⁰Dxejcti birii rebejnguejdxa, bidzu-
jintireni lojni. ³¹Reni najc rexpejñpacni
canabduxhreni gau Jesús, räjpreni:

—Mastr, gudajw.

³²Laani räjpni:

—Narä rapä xhi gauä nani ditu gumbee.

³³Dxejcti räjp rexpejñpacni lo sa'reni:

—¿Xhaa yu' chu abiädnä xhi gudajwni,
ä?

³⁴Räjp Jesús:

—Yälrajw xtenä najc gunä si'cni rlajz
nani baxhal^u narä, näj guluxä xtzuunni.

³⁵La'tu rniiut riäädx tajp bääi te guire'
cose'ch. Narä rniiä colguliäs lojtu, col-
fisa'c loniaa, abiquijtz regäjl, agojl guire'
cose'ch. ³⁶Nani rujn dzuu rutie' cose'ch
rca'ni xcuentni, luxh ni caca'ni najc par
yäl nabajn^u par tejpas, te tejsi guibalaznäj
nani gule'c binij näj nani batie' cose'ch.

³⁷Sa'csi guli najc diidx nani rnii bejn, rni-
ireni: “Tejni rbe'c binij, ste'cani rutie'ni.”
³⁸Narä abaxhalä la'tu gutie'tu cose'ch nani
ditu nibe'c; ste'ca najc nani bejn dzuu
gule'cni binij, dxejcti la'tu jiu'tu gutie'tu
cose'ch loj xtzuunni.

³⁹Xhidajl reben Samaria huililajz xtidx
Jesús xcuent rediidx ni räjp gunaaga lo-
jreni che räjpni: “Guniini loä guiralii nani
abenä.” ⁴⁰Ni'cni, che biääd reben guedx
Samaria lojni gunabreni loj Jesús jia'nni
lajdxreni. Dxejcti bia'nni ro'c tio'p dxej.

⁴¹Dxejcti xhidajlurenii huililajz xtiidxni ni
guniini lojpacreni. ⁴²Dxejcti räjpreni loj
gunaaga:

—Dirunu chalilajz ganaxtis xcuent diidx
ni guniil loonu, sa'csi lagajc nuure abiejin
diajgnu xtiidxni, ni'c nancheenu dee najc-
pac ni rusläa rebejñ guedxliuj loj dojl. Laani
najc Crist ni cabääznu jiääd.

Basijac Jesús xi'n te bejn ni rujn xtzuun
gubier

⁴³Che gudejd tio'p dxej, biriini guedx
Samaria, huinuuni xnezyujni nez Galilee.

⁴⁴ Sa'csi lagajc Jesús gunii, räjpni: Te bejn nani rnii xtidx Dios di reben lajxpacni chanälajz xtiidxni. ⁴⁵ Che bidzu-jnni rexyuj Galilee, reben Galilee huichaglojrenini sa'csi näj laareni huijreni lanij pascw guedx Jerusalén, ro'c bahuireni guiraa redzuun nani bejni.

⁴⁶ Gubisacni, bidzujnni guedx Caná xten Galilee cadro bejnni bidxaa nis gujcní bin. Dxejcti guyu' te dade' nani rujn xtzuun reii. Guedx Capernaum naga' te xi'nni cayacxhuu. ⁴⁷ Che biejn diajg dade'ga abirii Jesús Judea, abidzujnni nez Galilee, huijni lo Jesús, gunabduxhni lojni chääni te gu-siajcní xi'nni nani naga' cuentro, ameerli guetni. ⁴⁸ Dxejcti räjjp Jesús lojni:

—Paru ditu fii reseen, remilagwr, ditu chalilajz chuni'c naçä narä.

⁴⁹ Dade' ni rujn xtzuun reii, gunii lojni, räjpni:

—Do'o Dad, te di guet xi'nä.

⁵⁰ Räjp Jesús lojni:

—Huij. Di xi'nlu guet.

Huililajz dade'ga, sä'tini. ⁵¹ Che gubi'ni rolizjni, birii rexmosni, huichaglojni, badeedreni diidx nabajnxi'nni.

⁵² Dxejcti gunabdiidxneni lojni:

—¿Corti gusloj cayajcni?

Räjpreni lojni:

—Nai si'cti rcatej gudxej biriini xliaa.

⁵³ Dxejcti gucbee dade'ga lagajc orga ni räjp Jesús lojni: “Di xi'nlu guet.” Dxejc dade'ga näjza guiraa rebejn ni yu' rolizjni huililajzreni Jesús najc ni cabázreni jiääd.

⁵⁴ Dee barojp seen ni bejn Jesús cheni biriini Judea, biu'ni Galilee.

5

Bejn Betesda nani naxu'n

¹ Che gujcti recosre, guyu' te lanij xten rexpejn Israel, dxejc huij Jesús guedx Jerusalén. ² Guedx Jerusalén, gajxh ro'puert ni laa xten rexiil, yu' te guipilro nis; xtidx hebreo laani Betesda. Cuä! guipilroga caj gaii cordoor. ³ Ro'c naga' xhidajl bejn racxhuu, yu' bejn ni di fii, bencoj, näj bejn nani bixu'n tiejxhni. Cabázreni guiniib nisga ⁴sa'csi gucti-guc riääd te xangl Dios rusniib nisga. Dxejc bejn nani gun gaan chachu' lo nis ganiddoo che guiniibni, ria-jcni lo xhitis yälgujdx ni rajcni. ⁵Ro'c guyu'

te ben racxhuu nani agujc galbitzubix-hujn ijz cayacxhuuni. ⁶Cheni bahuii Jesús naga'ni, badeedzani cuent lacti xchero rax-chuuni, räjpni lojni:

—¿La rlajzlu jiajclu?

⁷ —Dad —räjp bej racxhuuga lojni—, dina gapä chugusäl narä neñ nis cheni rniib nisre. Cheni rlazä chachu'ä lo nis, stee bejn rujn gaan narä, ganidni richu'ni lo nisga.

⁸ Räjp Jesús lojni:

—Huistie, gulás xta'lú, guzaj, huij.

⁹ Lagajc dxejc biajc bejnga, gulásni xta'ní, gusloj gusajni. Niluxh dxejga najc dxej nani rusilajz rexpejn Israel, ¹⁰ni'c räjp rexpejn Israel lo bejn ni biajcgá:

—Nadxej najc dxej ni rusilajz bejn. Di gacdi guulu xta'lú.

¹¹ Laani räjpni:

—Nani basiajç narä, laani naj loä: “Gulás xta'lú, gusaj.”

¹² Dxejc gunabdiidxreni lojni:

—¿Chuni'c naj lojlu “Gulás xta'lú, gusaj”?

¹³ Dxejcti ben racxhuu ni biajcgá dini gaan, sa'csi gunitloj Jesús, biriini ro'c lal ni tre' xhidajl bejn lätjga. ¹⁴ Che bidxaagni Jesús stehuält neñ guidoro, räjp Jesús lojni:

—Ahuii, naj ni abiajclu, na'c gunlu dojl stehuält, didi sajclu xhi stee ni najc cuen-troru.

¹⁵ Sä'ti bejnga, huiye'tzni loj rexpejn Is-rael laa Jesús ni basiajcní. ¹⁶ Ni'cni gusloj rexpejn Israel carinajlreni Jesús, rlajzreni guiga'ni te ju'trenini, sa'csi rujnni redzu-unja dxej ni rusilajzreni. ¹⁷ Luxh räjp Jesús lojreni:

—Xtadä Dios najli cayujnni dzuuun, ni'cni näjza narä cayunä dzuuun.

¹⁸ Ni'cni rlajzru rexpejn Israel ju'tni, xhet ganaxdi sa'csi rujnni dzuuun dxej ni rusilajzreni, per näjza sa'csi räjpni Dios najc Xtadni, rniizani tebloj najcni con Dios.

Yälribex xten Xi'n Dios

¹⁹ Badzu' Jesús diidxre räjpni lojreni:

—Rniliä, rniliápac lojtu. Di gacdi gun Xi'n Dios dzuuun xtebni, palga dini fixgaa rujn Xtadni dzuuunga, sa'csi guira'tis dzuuun ni rujn Xtadni, dzuuunga rujnza Xi'nni sigajc rujn Xtadni. ²⁰ Sa'csi rinälajz Dad xi'nni, ruluiini lo xi'nni guiraa redzuun nani rujnni, luxh dzunroruza suluiini lojni gunni, te guidxelotu. ²¹ Sigajc ni rliäs

Dios rebengut, rudedni yälnabajn lojreni, sigajcza sudeed xi'nni yälnabajn lo renani rlajztisni. ²² Nicla Dad di gun yälguxhtis, alga badeedni guiralii yälguxhtis gun Xi'nni, ²³ te guiraa bejn guiliä'p xpala'n xi'nni si'cni rliä'preni xpala'n Dad. Nani di guiliä'p xpala'n Xi'nni, dizani guiliä'p xpala'n Xtdadi ni baxhalni biäädni.

²⁴ Rniliä, rniliäpac lojtu, nani rucuadajg xtidxä, ni chalilajzani nani baxhal narä, ni'c rajpni yälnabajn par tejpas; niluxh dinit ed lo yälguxhtis, alga abiriimi lo yälgujt, agudejdni lo yälnabajn. ²⁵ Rniliä, rniliäpac, sidzujn or, luxh alabidzujnmi, cheni siejn diajg rebengut xse' Xi'n Dios, luxh reni riejn diajgni diidzxa sibansacreni lo rebengut. ²⁶ Si'cni rajp Dad Dios yälnabajn lagajcsi laani, sigajcza badeedni lo Xi'nni ga'pri yälnabajn lagajcsi laazani. ²⁷ Badeedzani lojni yälrnibee te gunni yälguxhtis, sa'csi najcni Xi'n Dios ni gujc Niguii. ²⁸ Na'c rdexeljtu rediidxre, sa'csi sidzujn or cheni guiraa reni yu' neq baa siejn diajgreni xse'ni ²⁹ siriizareni neq baa. Reni bejn dzunsa'c siriireni te guibansacreni loj yälnabansa'c, niluxh reni bejn dzunguijdx, siriireni te guibansacreni te tedreni lo xcälguxhtis Dios.

Nani ruluiloj yälrnibee ni rajp Jesús

³⁰ 'Xhet rajcdi runä lagajcsi narä. Sigajcza ni riejn diagä, sigajcza runä yälguxhtis. Luxh yälguxhtis ni runä laaca najcni sa'csi dina quilä gunä nani rlazäts, rguiläts gunä si'c ni rlajz Dad nani baxhal narä. ³¹ Palga naräts rniä diidx lagajc xcientä, xhet sajcdi diidxga. ³² Yu' stee nani rniliä diidx xcientä, luxh nancheä diidx ni rniini xcientä sacduxhni, gulipacni. ³³ La'tu abaxhal tu chu huij loj Juan, huinabdiidxreni lojni "chu najc bejngä", niluxh badzu'ni diidx lojreni guniimi diidx gulipac xcient chu nacä. ³⁴ Narä dina jiüä diidx nani rnii rebejn xcientä luxh canisäcä rediidxre te laatu lo xtojltu. ³⁵ Juan gujc si'c te bajl ni ralguij, basanijzani. Luxh la'tu huihuiituni bibalajztu lo xpianijni balsi dxej. ³⁶ Luxh narä rapä xhi ruluilojru chu nacä lo diidx ni gunii Juan; sa'csi lagajc dzuun nani baniidx Xtdadi gunä, lagajc redzuun ni runä, huenliisi ruluilojreni Xtdadi Dios baxhal narä. ³⁷ Xtdadi ni baxhal narä lojtu agunilii chu nacä. Gajdpactu jiejn diajg xse'ni, gajdzatu

fii lojni. ³⁸ Dizatu ga'p xtiidxni nen lastootu, sa'csi di lajztu chalii xtiidx nani baxhal narä. ³⁹ La'tu rolduxhtu reguiztz xten Dios sa'csi rchalotu si'c sidxälta yälnabajn par tejpas, luxh lagajc reguiztzga rusule' chu narä. ⁴⁰ Naadditu jiäädtu loä te ga'ptu yälnabajn par tejpas.

⁴¹ 'Narä dina quilä chu bejn guiliä'p xpala'nä nez loä. ⁴² Luxh narä anumbeätu, ananä ditu chanälajz Dios nen lastootu. ⁴³ Narä biälä xcuent Xtdadi, luxh ditu gucuadajg xtidxä; paru jiääd chu stee bejn xcuentcani, ni'c sii sucuadajgtu xtiidxni. ⁴⁴ Xho gac chalilajztu, ni rliä'ptu xpala'n lagajc sa'tu. Ditu quiil xho gac guiliä'p Gueb Dios xpala'ntu. ⁴⁵ Di naatu pet narä ni chale'c xquejtu lo Xtdadi. ToMoisés ni chale'c xquejtu, luxh rujntu xhigab lagajc xleiini gacnäj la'tu. ⁴⁶ Paru la'tu nilila-jzpactu xtidx toMoisés, dxejc niliiza lajztu xtidxä sa'csi xcientä bacuua toMoisés lo reguiztz. ⁴⁷ Palga ditu chalilajz nani bacuani lo reguiztz, ¿xho chalilajztu rediidx nani caniä lojtu, ä?

6

Bayaan Jesús gaii mil niguii

(Mt. 14:13-21; Mr. 6:30-44; Lc. 9:10-17)

¹ Che gulujx gujc recosre, dxejc sää Jesús stelaad nezro' nisdoo xten Galilee, nani rnii-ziareni nisdoo xten Tiberias. ² Sanajl xhidajl bejnni sa'csi rhuiireni remilagwr ni rujnni lo rebenräcraxhuu. ³ Dxejcti huä'p Jesús yejc te dajn, ro'c gurenäjni rexpejnpacni. ⁴ Niluxh ameer gac lanij pascw xten rexpejñ Israel, cheni rudedreni xquixhtios lo Dios xcent dxej ni biriireni Egipto. ⁵ Cheni guläs Jesús lojni, bahuiini siääd xhidalduxh bejn, siäädreni nez lojni, dxejcti räjpni loj Felipe:

—¿Caro guisiinu yätxtiil te gau rebejnre?

⁶ Dxejc räjpzani si'c te don xhi xhigab gun Felipe, luxh laani anajnni xho gunni. ⁷ Räjp Felipe lojni:

—Di tio'p gayuu beex yätxtiil gal te gau-reni tlajag.

⁸ Tej rexpejnpacni ni laa Andrés, bejtz Simón Pedr, räjp lojni:

⁹ —Ree suga' te biuux ca' gaii yätxtiil con tio'p bälj, ¿xhixh sajñ ni'c gau reben xhidaljre?

¹⁰ Dxejcti räjp Jesús:

—Colyejtz loj rebejnre cuereni.

Yuduxh guixa' ro'c. Dxejcti gurej renigui. Si'cti gaii mil najc renigui.

¹¹ Dxejcti cua' Jesús yätxtiilga, badeedni xquixtios lo Dios, gudisni yätxtiilga lo rexpejnpacni. Dxejcti rexpejnpacni gudisrenini loj rebejñ nani sobga'. Sigajcza gudisreni rebajl si'ctisni rlajzreni gauren.

¹² Che gulujx gudajwreni, gudxaj xque'reni, dxejcti räjp Jesús loj rexpejnpacni:

—Colgutie' gürraa reyätxtilbiujy nani bia'n te xhet nitdi.

¹³ Batie'tireni reyätxtilbiujy, gulärseni tzubitio'p dxjm yätxtilbiujy nani bia'n lo gaii yätxtiilga nani gula' gudajwreni. ¹⁴ Che bahuii rebejngä reseen, remilagwr nani bejn Jesús, dxejc räjpreni:

—Guluipacni, laa dee ni najc niguii ni rnii xtidx Dios nani cabäaznu jiääd lo quedxliuj.

¹⁵ Sas che gucbee Jesús cayujnreni xhigab jiädnazarrenini te niujnreni gacni reii te guinibeeni lojreni, biriini ro'c, xtebni gubisacni nen dajn.

Gusaj Jesús lo nisdoo

(Mt. 14:22-27; Mr. 6:45-52)

¹⁶ Che gojl guxhijñ, bidzujn rexpejnpacni lo nisdoo. ¹⁷ Biu'reni neñ te barcw te fedreni lo nisdoo nez quedx Capernaum. Abicäý lo yuj niluxh gajd Jesús guibi' lojreni te chääni. ¹⁸ Gusloj cayäjs nisdoo xcient te beduxh nani cabi'. ¹⁹ Ni'cni che gusajreni si'cti gaii o xho'p kilómetro, bahuiirení siäddzungajxh Jesús lo barcw, lo nisdoo siädsajni. Bidxebduxhreni. ²⁰ Luxh laani räjpni lojreni:

—Naräni. Na'c guidxejbtu.

²¹ Dxejcru cuäjbreni biu'ni neñ barcw. Dxejcti bidzungajcreni stelaad lo yuj cadre sääreni.

Caguil rebejñ Jesús

²² Che bara yääl, rebejñ nani bia'n stelaad ro' nisdoo, bahuiirení asanä rexpejnpacni barcwbäz nani suga' ro'c, niluxh di Jesús nij, xtebsireni sääreni. ²³ Luxh bidzungajc sgaii barcw nani birii quedx Tiberias, te lajt ni tre' gajxh cadro gudajwreni yätxtiil che gulujx badeed Jesús xquixtios lo Dad. ²⁴ Che bahuii rebejñ ruti Jesús ro'c, niclaza rexpejñmi, biu'reni neñ rebarcw, sääreni quedx Capernaum satiilreni Jesús.

Jesús najc yätxtiil xten yälnabajñ

²⁵ Che bidxälreni Jesús stelaad ro' nisdoo, räjpreni lojni:

—Mastr, ¿guc bidzujñlu ree?

²⁶ Badzu' Jesús diidxre, räjpni lojreni:

—Rniliá, rniliápac lojtu, caguilltu narä sa'csi gudajwtu, gudxaj xque'tu, et sa'csi bahuiidit remilagwr nani benä. ²⁷ Na'c guntu dzuun ganax par yälrjaw nani rnitloj. Colyejin dzuun par yälrjaw nani di nitloj, ni runiidx yälnabajñ par tejpas. Yalrajwre suniidx Xi'n Niguïi, sa'csi loj rebejñ baluui Xatdi, Diospac, laani najc Xi'npacni.

²⁸ Dxejcti räjpreni:

—¿Xhini'c jiennu te gac jienpacnu dzuun ni rlajz Dios?

²⁹ Räjp Jesús lojreni:

—Dee najc ni rlajz Dios guntu: chalilajzxtidx narä, nani baxhalni.

³⁰ Räjpreni lojni:

—¿Xhi seen gunlu te guihuiinu xcälrnibeuu te cholilajznu xtiidxlu? ¿Xhi dzuun rujnlu? ³¹ Retoxtadhu gudajwreni yätxtiil ni laa mana loj reyubijdz si'cni caj loj reguijtz: “Badeedni yätxtiil ni biajb xhaguibaa gudajwreni.”

³² Räjpza Jesús:

—Rniliá, rniliápac lojtu, xhet toMoisésdi ni badeed yätxtiil ni biajb xhaguibaa. Xatä ni suniidx yätxtiil nani siäädpac xhaguibaa.

³³ Sa'csi yätxtiil xten Dios najc bejn ni siääd xhaguibaa, niluxh laani rudedni yälnabajñ par tejpas loj reben quedxliuj.

³⁴ Räjpreni:

—Dad, baniidx yätxtiilga loonu.

³⁵ Dxejcti räjp Jesús lojreni:

—Narä nacä yätxtiil xten yälnabajñ nani riäjñ jiääd; chutis ni jiääd loä diruni guiliaan, niluxh chutis ni rililajz xtidxä diruni jiojñ par tejpas. ³⁶ Aguniä lojtu, la'tu ditu chalilajz, luxh abahuiit loä. ³⁷ Guiraa re-nani abaniidx Xatä loä, siäädni loä, niluxh chutis ni jiääd loä dina cuälvazäni. ³⁸ Sa'csi narä siälä xhaguibaali te gunä si'c ni rlajz Xatä, xhet si'cdi ni rlazädi. ³⁹ Dee najc ni rlajz Xatä nani baxhal narä: na'c nit nicla tej renani baniidxni loä, te guspansacä guiragajcreni che gal dxej lult ni riäjñ jiääd.

⁴⁰ Scree rlajz nani baxhal narä: guiraa re-nani fii lo Xi'n Dios, näj chalilajzreni xtiidxni, xca'reni yälnabajñ par tejpas niluxh narä suspansacäreni che gal dxej lult ni riäjñ jiääd.

⁴¹ Rediidxre bejn gusloj casiey rexpejn Israel xcuent Jesús sa'csi räjjpi: "Narä nacä yätxtil ni biäjt xhaguibaa." ⁴² Dxejcti räjpreni:

—¿La et Jesúsdi, xi'n José dee, ä? Nuure numbeenu xtradni, xnanni, xhoxh rniini xhaguibaa biäjtni?

⁴³ Dxejc räjp Jesús lojreni:

—Na'c rusieinäj sa'tu. ⁴⁴ Rut rajcdi riääd loä palga di Xtradä ni baxhal narä jiädnäni loä, te guspansacäni che gał dxej lult ni riäjl jiääd. ⁴⁵ Loj reguijtz ni bacuua redade' ni gunii xtidx Dios caj scree: "Sului Dios guiraareni." Ni'cni guiraa reni rucuadijg xtidx Xtradä, reni rsieed lojni, reni'c ni jiääd loä.

⁴⁶ 'Dinä guiniä yu' chu abahuii lo Dios; tejtit ni abahuii lojni: nani baxhal Dios, ni'ctis abahuii lojni. ⁴⁷ Rniliä lojtu che rniä: nani chalilajz xtidxä, ni'c rajp yälnabajn par tejpas. ⁴⁸ Narä nacä yätxtil nani rudeed yälnabajn. ⁴⁹ Retoxtadtu gudajw mana ni bastejb Dios lo reyubijdz, dxejcti gujtzareni. ⁵⁰ Dee najc yätxtil ni siääd xhaguibaa, te chutis ni gau yätxtilga dini guet. ⁵¹ Narä nacä yätxtilbajn ni siääd xhaguibaa. Palga yu' chu gau yätxtilre, sibajnni par tejpas. Yätxtil nani runidxä narä te xca' reben guedxliuj yälnabajn najc lagajc bältiexhä.

⁵² Dxejcti gusloj casiey rexpejn Israel räjpreni:

—¿Xho gac guniidz dee bältiexhni guidauunu, ä?

⁵³ Räjp Jesús:

—Rniliä, rniliápac lojtu, palga ditu gau bältiexh Xi'n Dios ni gujc Niguii, palga dizatu yä xtiejnni, digacdi ga'ptu yälnabajn. ⁵⁴ Nani gau bältiexhä, nani yäza xtienä, ni'c rajp yälnabajn par tejpas, niluxh suspansacäni che gal redxej lult.

⁵⁵ Sa'csi bältiexhä najc te yälrausa'cpac, xtienä najcza te yälräsa'cpac. ⁵⁶ Nani gau bältiexhä, nani yäza xtienä, ni'c yu'pac con narä, luxh narä yu'äza con laani. ⁵⁷ Xtradä ni baxhal narä rajp yälnabajn par tejpas. Narä nabaqä xcuent laani. Sigajcza nani rajw narä, sibajnni xcuent narä. ⁵⁸ Dee najc yätxtil nani biääd xhaguibaali; dini gac si'c mana ni gudajw xtradtu dxejc empac gujtreni, sa'csi nani gau yätxtilre sibajnni par tejpas.

⁵⁹ Recosre baluui Jesús neñ te guidobäz lal ni guyu'ni guedx Capernaum.

Diidx xten yälnabajn par tejpas

⁶⁰ Che biejn diajgreni si'c, xhidajl rexpejnpacni räjp:

—Naganduxh najc rextiidxni. ¿Chu laa nani gac cuadiajgni?

⁶¹ Dxejcti gucbee Jesús cagusiejreni xcuent rediidxga, dxejc gunabdiidxni räjjpi:

—¿La rusieed rediidxre la'tu, ä?

⁶² ¿Xhicha guntu paru fiitu chä'p Xi'n Dios ni gujc Niguii cadro guyu'ni galoo?

⁶³ Sprit xten Dios najc ni rudeed yälnabajn; bältiexhni xhet rujndini gaan. Rediidx nani guniä lojtu najc didxlíi xcuent recos xten Sprit, luxh rediidxga ruded yälnabajn par tejpas. ⁶⁴ Luxh lałtis yu' lojtu reni di chalilajz.

Sa'csi Jesús nancheeni galooli chu reni'c di chalilajz, anajnzani chuni'c guto'ni, guteedni laani ladznaa reben dojl. ⁶⁵ Dxejcti räjpni:

—Ni'cni rniä lojtu, nicla tej rut sajcdi jiääd loä palga di Xtradä jiädnäni loä.

⁶⁶ Lagajc dxejc gusloj cabicaj xhidajl rebejn ni agujc xchej gusanäj Jesús, diruren ni nisanäj Jesús. ⁶⁷ Dxejcti räjp Jesús loj guidzubitio'p rexpejnpacni:

—¿La nägajcza la'tu rlajztu jitu, ä?

⁶⁸ Badzu' Simón Pedr diidxre, räjpni:

—Dad, ¿chuloj chonnu? Luj rajplu diidx ni rudeed yälnabajn par tejpas. ⁶⁹ Nuure abiolilaaznu, anajnnu najclu Crist Xi'n Dios nani nabajn.

⁷⁰ Badzu' Jesús diidxre, räjpni:

—¿La et lagajc narädi guleä guitzubito'ptu? Luxh tejtu najc bendxbab.

⁷¹ Diidxga guniini xcuent Judas Iscariote, xi'n Simón, sa'csi Judas najc ni guto'ni mase nadxaagni lo guitzubito'p rexpejnpac Jesús.

7

Dí rebejtz Jesús chalilajz

¹ Che gujcti recosre, cansaj Jesús nez reyuj xten Galilee, di rlajzni jia'nni nez reguedx Judea sa'csi rlajz reben ro'c ju'tni.

² Luxh ameer gal lanij xten cose'ch xten guidoguid, te relanij xten rexpejn Israel.

³ Ni'c räjp rebejtz Jesús lojni:

—Na'c jia'nlu ree. Huij Judea te näjza rexpejnpaclu fii redzunro nani rujnlu.

⁴ Sa'csi rut rujndi xtzunni xhiga'tz palga rlajzni gacbee bejn xhi dzuun rujnni, te gumbee bejnji. Palga rujnpaclu redzuunre, baluiini lo guiraa reben guedxliu.

⁵ Gunireni si'c lojni sa'csi nicla rebejtjni di chalilajz xtiidxn. ⁶ Dxejcti räjp Jesùs lojreni:

—Gajd xhorä guidzuijñ, niluxh par la'tu xhitis or najc hueen. ⁷ Di gacdi guidxe'ch reben guedxliu lojtu, luxh rdxe'chreni loä sa'csi narä rniliä xcuentreni: dzunguijdx najc xtzunreni. ⁸ La'tu colchäj lanij; narä dina cha'a laniga sa'csi gajd xhorä gal.

⁹ Che gulujx guniini si'c lojreni bia'ntini nez Galilea.

Huij Jesùs lanij xten retabernaculos

¹⁰ Dxejcti che asää rebejtjni lanij, dxejc näjza laani sääni lanij, luxh dini nusäbidiidx, si'c xhiga'tz sääni. ¹¹ Dxejcti caguiil rexpejñ Israelni lo lanijga, räjpreni:

—¿Concha niguiiga?

¹² Lo rebejn xhidaalga yu' xhidajl bejn ni cagusieyreni xcuentni. Yu'reni räjp: "Hueen najcni", per sgaiireni räjp: "Dini gac hueen. Cagusgueeni rebenguejdx."

¹³ Nicla tejreni xhet casäbidiidxdireni xhini'c caniireni. Direni guinii dip sa'csi rdxejbreni rexpejñ Israel nani rnibee.

¹⁴ Agurojl lanij, che biu' Jesùs nen guidoro. Dxejcti gusloj caguluiini. ¹⁵ Dxejcti rdzeloj rexpejñ Israel nani rnibee, räjpreni:

—¿Xho najn dee guiraloj, niluxh dini nisieed xleiñ toMoisés?

¹⁶ Badzu' Jesùs diidxre, räjpni:

—Yälrluui nani caluiyä et xtenädini, xten nani baxhal naräni. ¹⁷ Palga yu' chu rlajz gun nani rlajz Dios, sachbeenri la xten Dios najc reylrluui xtenä, o la lagajcsi narä rbää diidx ni caguluiä. ¹⁸ Nani rusule'ni diidx nani lagajc laani rbääni, ni'c rnii ni diidxga te guiliä'p rebejn xpala'hni, luxh nani rguil chä'p xpala'n nani baxhalni, ni'c ni rnii didxlii, xheti yälrusguee nen las-tooni. ¹⁹ ¿La di toMoises nuniidx leii lojtu, ä? Niluxh nicla tejtu di gusoob xtidx leiiga, ¿Xhicuert rlajzju'tu narä, pes?

²⁰ Badzu' reben xhidajlga diidxre, räjpreni:

—¡Xprit bëndxbab yu' lastoolu! ¿Chuni'c rlajz ju'tlu?

²¹ Badzu' Jesùs diidxre lojreni, räjpni:

—Tejtis dzuun benä con xcälrnibeä, dx-ejc guiraatu cadxelotu sa'csi benäni dxej nani rusilajztu. ²² Ni'cni baniidx toMoisés lojtu yälru'tu bee, luxh etlaadini guläxtieijnini, agac guläxtiej retoxtadgoldootuni. La'tu rusälzu bee rebiuux mase najcni dxej nani rusilajztu. ²³ Mbaj pes, palga rajc rusälzu bee bejn te dxej nani rusilajztu didi nit xleii Moisés, ¿xhicuert rdxe'chtu loä sa'csi basaciäpac te bejn te dxej nani rusilajztu, ä? ²⁴ Na'c rujntu yälguxhtis si'ctis ni rlajztu. Colyejn yälguxhtis con yälguxhtis xten Dios.

Rusule' Jesùs casiäädni

²⁵ Dxejcti gusloj gaii bejn Jerusalén cayujn yälgunabdiidx, räjpreni:

—¿La etlaadi dee ni caguiilreni te ju'trenini, ä? ²⁶ Ani asuga', caniini nez loj guiraa rebenguejdx, niluxh rut rudxojdini. ¿Xha ahuililajz reguxhtis, regubier laani najcpacni Crist, ä? ²⁷ Niluxh nuure nadoncheenu caro siääd niguiire, niluxh che jiääd Crist, rut gacbeedi caro siäädni.

²⁸ Caguluii Jesùs nen guidoo che biejn diajgní rediidxre, dxejc dipduxh guniini, räjpni:

—La'tu numbeetu narä, najntu caro siälä; luxh dina niälä lagajcsi narä; nani baxhal narä guliipac nabajni, luxh la'tu ditu gumbeeni. ²⁹ Luxh narä numbeäni, sa'csi lojni biriä, laani baxhalzani narä.

³⁰ Dxejcti rlajzreni niniaazrenini, niluxh rut gunaazdini, sa'csi gajd xhorni gal. ³¹ Xhidajl bejn lo reben xhidajlga huililajz xtiidxn, dxejcti räjpreni:

—Cheni jiääd Crist, ¿xhixh sujnrundi milagwr loj nani rujn dee, ä?

Ruxhal refarisee guixhajg guiniaaz Jesùs te jiäuni

³² Che biejn diajg refarisee xhi canii rebejn xcuent Jesùs, laareni näjza rebixhojz nani rnibee lo rebixhojz baxhalreni guixhajg te guiniaazreni Jesùs te jiäuni. ³³ Sas räjp Jesùs lojreni:

—Bale'si dxej su'ä lojtu, dxejcti guibi'ä loj nani baxhal narä. ³⁴ Siguilltu narä, niluxh ditu guidxäl narä, sa'csi cadre cha'ä digacdi jiäädtu.

³⁵ Ni'c gunii rexpejñ Israel lo sa'reni, räjpreni:

—¿Cacharo chääni ni'c di gacdi guidxäl-nuni? ¿Xhaa sijni loj rexpejn Israel nani nare'ch nez laidx regriegos te guluiini re-griegos? ³⁶ ¿Xhi sälloj diidxre nani guniini loonu: "Siguilto narä, niluxh ditu guidxäl narä, sa'csi cadro cha'ä di gacdi jiäädtu"?

Regueu nisnabajn

³⁷ Lult dxe lanij, ni nadjc dxero, gusulii Jesús dipdugh guniini, räjpni:

—Palga yu' chu cayojl, sujäädni loä te yäni. ³⁸ Nani chalilajz xtidxä si'cni caj lo rexquijtz Dios neñ lastoolini siliejn nisnabajn.

³⁹ Rediidxre guniini xcuent Sprit Dxan nani churu jiädlätz neñ lastoo reni rililajz xtiidxni, sa'csi gajd Sprit Dxan jiääd, sa'csi gajd Jesús guibansac lo rebengut.

Gucgala' rebejn

⁴⁰ Lo reben xhidajla yu' reni biejn diaj-greni rediidxga, dxejc räjpreni:

—Guliipacni, dade're nadjc laapac ni siääd, si'c ni rnii xtidx Dios.

⁴¹ Yu'zareni räjp:

—Dade're nadjc Crist ni cabääznu.

Yu'za sgaai ni räjp:

—Gurnialojujiääd Crist nez Galilee. ⁴² Ni loj rexquijtz Dios caj riäjlpac gac Crist te rexagdoo torei David, jiäädzani guedx Belén, lagajc guejdx cadro siääd torei David.

⁴³ Dxejcti gucgala' rebejn xcuent Jesús.

⁴⁴ Yu'reni rlajz chääni pres luxh rut biajxdii gunaazni.

Di reguixtis chalilajz biääd Crist

⁴⁵ Gubi' reguixhajg xten guidoo loj rebix-hojzro näjza refarisee. Dxejcti gunabdi-dixreni loj reguixhajg, räjpreni:

—Xhiciuent ditu niädnäni?

⁴⁶ Badzu' reguixhajg diidxre, räjpreni:

—Gajdpac te bejn guinii si'cni rnii be-jngal!

⁴⁷ Dxejc räjp refarisee:

—La näj la'tu abasgueeni, ä? ⁴⁸ Xhixh loj regubier o loj refarisee yu' chu tej ni ahuililajz xtiidxni, ä? ⁴⁹ Reben xhidajlre ni di gan xleii toMoisé, reni'c agunijtpac.

⁵⁰ Nicodem, nani huij lojnt te guxhij, nadjc te refarisee. Laani räjpni lojreni:

⁵¹ —Lo xleiuu caj: digacdi guntu yälgux-htis te bejn palga gajdtu gucuadiagxga xtiidxni, te don xhi bejnni.

⁵² Badzu'reni diidxre räjpreni lojni:

—¿La näjza luj siäädlu Galilee, ä? Bilsa'c xhi caj lo xquijtz Dios, suhuiliu nicla tej niguii nani rnii xtidx Dios di jiääd nez Galilee.

Gunaan nabi biga' carälguijxh con te niguii

⁵³ Dxejc cade tejreni sii rolizreni.

8

¹ Dxejcti huij Jesús nez dan Oliib. ² Rsilru gubi'ni, bui'ni nen guidoo. Luxh sanuutis siääd guiraa rebenguejdx lojni. Dxejc ro'c gurejni, gusloj caguluinireni. ³ Dxejcti biääd refarisee näjza reben nadjn, biäädnäreni te gunaa nabi biga' carälguijxh con te niguii. Basujrenini galäii reni suga' ro'c. ⁴ Räjpreni loj Jesús:

—Mastr, gunaare biganäj te niguii carälguijxhreni, niluxh yu' chäälni. ⁵ Loj leii xten Moisé caj guicuaanu guij yejc sa' gunaaga te guetni. Luj xhicha naalu?

⁶ Si'c räjpreni lojni te gaxäjsi gunijtni te diidx te gac cue'creni xquejni. Niluxh Jesús basajbtisi lojni lo yuj, gusloj cagucuaani lo yuj con bicuëñaani. ⁷ Dxejc sanuutisreni canabdiidxreni, huisutini, räjpni:

—Nani yu' lojtu ni xhettipac xtojlni, ni'c ganiddoo sugucuaani guij yejc gunaare.

⁸ Basabsac lojni lo yuj sanuutis cagu-cuaani con bicuëñaani lo yuj. ⁹ Luxh laareni che biejn diajgreni diidxga, sa'csi yu' xto-jlreni, gusloj biriireni tebgajreni, ganid ni nadjc bengolru, dxejcti ni nadjc huinru. Dxejcti bianxteb Jesús näjza gunaa ni suga' galäiireni. ¹⁰ Dxejc gusulii Jesús, luxh sa'csi rutru lojdi bahuiini, xtebtis gunaaga, räjpni lojni:

—Gunaa, ¿con reni cabe'c xquejlu? ¿La rut bacuaquijdiru luj, ä?

¹¹ Räjp Gunaaga:

—Nicla tejreni, Dad.

Dxejcti räjp Jesús lojni:

—Niclaiza narä dina gucuaciäru luj. Huij, na'cru gunlu dojl.

Jesús nadjc bianij xten guedxliuj

¹² Gunii Jesús lo rebejn stehuält, räjpni lojreni:

—Narä näcä bianij xten guedxliuj; nani jiädnajl narä dini sa lo yälnacäjy, sica'nii bianij ni rudedepac yälnabajn.

¹³ Dxejcti räjp refarisee lojni:

—Luj caniilu diidx lagajcsi xcuentlu.
Xhet sajcdi sa' diidxga.

¹⁴Badzu' Jesús diidxre, räjpni lojreni:

—Masque lagajc narä rniä diidx xcuentä, sajc xtidvä, guliipacni, sa'csi ananä caro siälä, ananäza caro cha'ä. Niluxh la'tu ditu gan caro siälä, niclaza caro cha'ä. ¹⁵La'tu rujntu yälguxhtis si'c najctis rexhigab xten ben güedxliuj. Narä rut lojdi runä yälguxhtis. ¹⁶Palga gunä yälguxhtis, yälguxhtis xtenä laaca najcni, sa'csi et xtebädi runä yälguxhtis, sa'csi narä näj Xtadä ni baxhal narä irennuni. ¹⁷Luxh lo xleitu caj diidxre: "Che rnii tio'p bejn tejsi diidx, didxliini, colchalajzni." ¹⁸Narä rniliäpac diidx lagajc xcuentä, dxejcti Xtadä nani baxhal narä rniliizani diidx xcuentä.

¹⁹Räjpreni loj Jesús:

—¿Caro yu' xtdadlu?

Räjp Jesús lojreni:

—Ditu gumbee nicla narä, niclaza Xtadä; paru niembeetu narä, niembeezatu Xtadä.

²⁰Rediidxre gunii Jesús cadro re' gojn, lał ni caguluiini nen guidoro niluxh rut gunaazdini sa'csi gajd xhorni guidzujn.

Cadro cha'ä, la'tu digacdjiäädtu

²¹Gunisac Jesús lojreni, räjpni:

—Narä sia'ä, luxh la'tu siguilitu narä, niluxh loj xtojltu sejttu. Cadro cha'ä di gacdi jiäädtu.

²²Räjp rexpejn Israel loj resa'reni:

—¿Xhaa sugu'tni lagajc laani, ni'cni na-jni di gacdi chonnu cadro chääni?

²³Räjp Jesús lojreni:

—La'tu najctu ben lo yuj. Narä nacä ben ni siääd jiaa. La'tu najctu ben güedxliujre. Luxh narä dina gacäti ben güedxliujre. ²⁴Ni'cni guniä lojtu, sejttu lo xtojltu sa'csi palga ditu chalilajz nacä chu nacä, sejtpactu lo xtojltu.

²⁵Dxejcti räjpreni lojni:

—¿Chuxh najclu?

Dxejcti badzu' Jesús diidxre lojreni, räjpni:

—¿Xhini'c guniä lojtu galooli? ²⁶Xhidajl diidx rlazä guiniä, xhidajlza yälguxhtis rlazä gunä xcuenttu sa'csi ditu chalilajz, per nani baxhal narä najc ben guliipac; nani biejn diagä guniini, rediidxga rniä loj reben güedxliuj.

²⁷Luxh laareni direni niacbee la xcuent Dad Dios ni caniini. ²⁸Ni'cni räjp Jesús lojreni:

—Cheni guiliästu Xi'n Niguii jiaa, dx-ejc sacbeetu laa narä ni baxhalni, luxh xhetliidi runä lagajcsi xcuentä. Si'cni baluui Dad narä, si'ctis rniä. ²⁹Nani baxhal narä sugaränji narä. Gajd Dad gusanxtreb narä, sa'csi runiäts ganax redzuun nani rchaglajzni.

³⁰Lał ni caniini si'c, xhidajlreni huililajz xtiidxn.

Rexi'n Dios con remos xten dojl

³¹Dxejcti räjp Jesús lo rexpejn Israel nani huililajzga:

—Palga la'tu sutijptu, guzoobtu xtidvä, dx-ejc guliipac najctu xpenä. ³²Sumbeezatu nani najc didxgulii, niluxh didx guliiga suslaa la'tu lo xtojltu.

³³Räjpreni lojni:

—Rexagdoo toAbraham najcnu, rut chu lojdi gudo'nu si'c mos. ¿Xho mood naalu "siliaatu"?

³⁴Räjp Jesús:

—Rniliä, rniliäpac lojtu, chutis ni rujn dojl najc mos xten dojl. ³⁵Nani najc mos, dini jia'n rolijz xlamni guideb guibajnni, niluxh nani najc xi'n lamga, ni'c sii sia'n rolijz xtadni guideb guibajnni. ³⁶Ni'cni, palga ruslaa xi'nni la'tu lo dojl, dxejcsii apac gulaatu. ³⁷Ananä najctu xagdoo toAbraham, luxh la'tu rlajztu ju'ttu narä sa'csi di xtidvä jiu'lo xcäriejntu. ³⁸Narä rniä nani abahuiä con Xtadä; luxh la'tu rujntu nani biejinza diajgtu lo xtadtu.

³⁹Badzu'reni diidxre, räjpreni lojni:

—Xtadnu najc toAbraham.

Dxejcti räjp Jesús lojreni:

—Palga la'tu najcpactu xi'n toAbraham, sujntu sa'dzuun ni bejn toAbraham. ⁴⁰Luxh najr rlajztu ju'ttu narä, sa'csi rniliä rediidx nani baluui Dios loä. ¡Di toAbraham niujn si'c! ⁴¹La'tu rujntu xtzuun xtadtu.

Dxejcti räjpreni lojni:

—Nuure dinu gac xi'n chälbejndi; nuure tejtis xtadnu yu', laani najc Dios.

⁴²Dxejcti räjp Jesús:

—Paru guliini najc xtadtu Dios, ninäla-jztu narä sa'csi loj Dios biriä siälä ree. Xhet lagajcsi xcuentä siälädi; Dios baxhal narä.

⁴³¿Xhicuent ditu gacbee rediidx ni rniä lojtu? Sa'csi di rlajztu gucuadiajgtu rextidvä.

⁴⁴ Xtadtu najc bəndxbab. La'tu najctu xi'nni, rlajztu guntu nani rlajztisni guntu. Xtadtu galooli najcni te ni rugu't, dini suu xlaad didxlili, sa'csi xheti didxlili neñ lastooni. Che rniini didx-xhii, si'c rniini sa'csi si'cpac najcni, sa'csi najcni beñ didx-xhii, najczani xtdat didx-xhii. ⁴⁵ Niluxh narä rniä didxlili, ni'c ditu chalilajz xtdixä. ⁴⁶ ¿Chu teju sajc guluii te dojl ni benä? Narä rniä didxlili. ¿Xhicuentu ditu chalilajz xtdixä, ä? ⁴⁷ Nani najc xpejñ Dios, ni'c rucuadijg xtdix Dios. Sa'csi la'tu ditu gac xpejñ Dios, ni'cni ditu gucuadijg xtdixä.

Anse toAbraham, agac nabajñ Crist

⁴⁸ Dxejcti badzu' rexpejñ Israel diidxre, räjpreni lojni:

—Laaca rniinu luj najclu te bejn ni siääd Samaria, bəndxbab yu' lastoolu.

⁴⁹ Räjp Jesúus lojreni:

—Xhet bəndxbabi yu' lastoä. Nani runätis rliä'pä xpala'n Xtdä, luxh la'tu alga rbälzatu narä. ⁵⁰ Luxh narä dina quilä chu guiliä'p xpala'nä, yu' chu rguiil guiliä'p bejn xpala'nä, niluxh laani rujnni yalguxhtis. ⁵¹ Rniliäpac lojtu, nani riu, nani rusooib xtdixä, dipacni guet.

⁵² Dxejcti räjp rexpejñ Israel lojni:

—Naj agucbeepacnu yu' bəndxbab lastoolu. ToAbraham näjza reniguii nani gunii xtdix Dios, guiraareni agujt. Luxh luj rniiliu: “Nani riu, nani rusooib xtdixä, dipacni guet.” ⁵³ ¿Xhixh sajrulu lo toxadtadnu Abraham, ä? Ni laani gujtni, gujta reniguii ni gunii xtdix Dios. ¿Chuxh rchalolu najclu?

⁵⁴ Badzu' Jesúus diidxre, räjpni lojreni:

—Palga lagajc narä rliä'pä xpala'nä, xhet sajcdi xpala'nä. Per nani rliä'p xpala'nä najc Xtdä, lagajcza Xtdä ni rniitu najc Xtiostu. ⁵⁵ Niluxh la'tu ditu gumbeeni. Narä numbeäni. Paru guiniä dina gumbeäni, sacä te beñ didx-xhii si'c najctu la'tu. Niluxh dee, numbeäpacni, luxh riuäni mriini, rusobä xtiidxni. ⁵⁶ ToAbraham toxtagoldootu, bibalajzni sa'csi nuhuini dxej nani jiälä, niluxh bahuiniini dxej bibalazduxhni.

⁵⁷ Dxejcti räjp rexpejñ Israel lojni:

—Nicla gajdlu chu tiubitzuu ijz, ¿xho naalu abahuiliu lo toAbraham?

⁵⁸ Räjp Jesúus lojreni:

—Rniliäpac lojtu, che gajdli guibajñ toAbraham, agac nabajñä narä.

⁵⁹ Dxejcti cua'reni guij te nucuaareni yejc Jesúus, per di Jesúus niga', biriini neñ guidoro, gudejdni galäiireni. Sä'tini.

9

Basiac Jesúus te bejn ni natia'p balojni che gojllini

¹ Che cadejd Jesúus te lajt, bahuini sobga' te bejn ni che gojlli bejngä agajc natia'p balojni. ² Dxejc gunabdiidx rexpejñpacni lojni, räjpreni:

—Mastr, ¿chuni'c bejn dojl, la bejnre o la xcuazjnni, ni'c natia'p balojni che gojlni, ä?

³ Räjp Jesúus:

—Nicla laani, niclaza xcuazjnni di niujn dojl. Si'c gojlni te xcuent ni sajc bejnre suhuii bejn xho nadj xtuun Dios. ⁴ Nanab gunä xtuun nani baxhal narä naj ni najc rdxee, sa'csi cheni guidzujn guxhijn rut gadci gun dzuuun. ⁵ Lalni yu'ä lo rebejn quedxliuj, nacä xpianij quedxliuj.

⁶ Che gulujx guniini si'c, batiobxhejnni lo yuj, bejnni bajñ con xhejnni, gudääbnini con bicuenaani lo rebaloj lotiä'pga. ⁷ Dxejcti räjpni:

—Huij, huitiib lojlu neñ nis ni laa Siloé. Laj nisga säloloja “baxhañi”.

Dxejcti huijni. Huitiibni lojni. Che gubi'ni, aruhuiini. ⁸ Dxejcti rexpisin lotiä'pga, näj renani galoo bahuireni natia'p lojni, räjpreni:

—¿La et laadi dee ni rbej te rutie'ni gojn, ä?

⁹ Yu'reni räjp:

—Laanini.

Yu'zareni räjp:

—Et laadini, rujnsi lojni si'c.

Laani räjpni:

—Laa naräni.

¹⁰ Räjpreni lojni:

—¿Xho mood arien baloju?

¹¹ Dxejcti räjp dade'ga nani gujc lotiä'p:

—Dade' ni laa Jesúus bejn bajñ, gudääbnini baloä, dxejcti najni: “Huitiib lojlu neñ te nis ni laa Siloé”, dxejcti che huitibä loä, lagajc dxej bien loä.

¹² Dxejcti räjpreni lojni:

—¿Con dade'ga naj?

Räjpti bejngä:

—Dina ganä.

Reben farisee bejn yälgunabdiidx lo dad lotiä'p nani biajc lojni

¹³ Huinäreni nani gujc lotiä'pga nez loj refarisee. ¹⁴ Luxh sa'csi najcni dxej ni rusilajzreni che bejn Jesús bajn ni gudääbni loj lotiä'pga te biajc balojni, ¹⁵ gunabdiidxsac refarisee loj dade' nani biajc balojni, xho mood arien balojni naj.

Laani räjpni lojreni:

—Bajn gudääbni loä, dxejc gudibä loä, naj aruhuiä.

¹⁶ Dxejc yu' refarisee ni räjp:

—Di dade' ni bejn dee gac xpejñ Dios, sa'csi dini jiu dxej ni rasilajz xpejñ Israel.

Yu'zareni räjp:

—¿Xho gac gunni sa' remilagwrga paru najcni ben dojl?

Ni'cni gula' sa'reni, gujcreni tio'p gala'.

¹⁷ Dxejcti gunabdiidxsacreni lo ni gujc lotiä'p:

—Luj a', ¿xhi rniliu xcuent nani basiajc balojlu?

Dxejc räjp dade'ga:

—Narä rnäa najcni te bejn nani rnii xtidx Dios.

¹⁸ Luxh rexpejñ Israel naaddireni chalilajzreni gujcpacni te lotiä'p ni abien balojni, dxejcti gurejdxreni xcuazajn dade' ni gujc lotiä'pga. ¹⁹ Dxejcti gunabdiidxsreni lojreni, räjpreni:

—¿Laa xi'ntu dee nani najtu cheni gojllini natiä'p lojni? ¿Xhoxh arien lojni naj?

²⁰ Badzu' rexcuzajnni diidxre, räjpreni:

—Nadonnu laa xi'nnuni, luxh che gojlni natiä'p lojni. ²¹ Niluxh dinu guidon naj xho mood arien lojni, dizanu guidon chu basiajc balojni. Colguiniabdiidxs lojni, anajcni ben-gool, lagajc laani sajc guiniini xhi gusajcni.

²² Si'c gunii xcuazajnni sa'csi rdxejbreni rexpejñ Israel, sa'csi agac bia'nreni diidx sibääreni, diruren gusaan jiu' neñ guidoo chutis te bejn ni naa Jesús naj Crist nani abiääd. ²³ Ni'cni räjp rexcuzajnni:

—Anajcni bi'n ni ayu' xcäriejnni. Lojni colguiniabdiidxs.

²⁴ Dxejcti gurejdxreni nani gujc lotiä'pga, räjpreni lojni:

—Gulä'p xpala'n Gueb Dios. Nuure nadonnu ben dojl najc dade'ga.

²⁵ Dxejcti badzu' dade'ga diidxre, räjpni:

—Dina ganä la najcni ben dojl o la dini gac. Tejtis nanä: gucä lotiä'p, luxh naj arien baloä.

²⁶ Stehuält gunabdiidxsreni, räjpreni lojni:

—¿Xho bennäjni luj? ¿Xho bejnni basiajcni balojlu?

²⁷ Badzu' dade'ga diidxre, räjpni:

—Ni aguniä guira'ti lojtu, luxh la'tu ditu jiu xtidxä. ¿Xhicuent rlajztu guinisacäni? ¿Xhixh näj la'tu rlajztu gactu xpejnpacni, ä?

²⁸ Dxejc gudilnäjrenini, räjpreni:

—Luj najclu xpejnni, per nuure najcnu xpejñ toMoisés. ²⁹ Anadonnu guninäj Dios toMoisés, niluxh dade're dinu guidon casiäadni.

³⁰ Dxejcti räjp dade' lojreni:

—Dee najc te cos ni guidxeloi bejn: la'tu ditu gan casiäadni, jniluxh laani basiajcni baloä! ³¹ Nadoncheenu di Dios cuadiagg xtidx reben dojl; palga yu' chu rajn Dios, ni rusoobxa xtiidxni, rucuadiagg Dios xtidx sa' bejngä. ³² Che guslojli guedxliuj gajd diajgnu jiejn xcuent te bejn nani rusiajc baloj te ben lotiä'p nani natiä'p lojni cheni gojllini. ³³ Palga xhet lo Diosdi siääd dade're, xhet sajcdi gunni.

³⁴ Badzu'reni diidxre räjpreni lojni:

—Luj, lo dojlpac gojllu, ¿xho jiädluiliu nuure?

Dxejcti guläärenini neñ guidoro, bari-laagwrenini.

³⁵ Bejn diajg Jesús guläärenini nen guidoro, che bidxälnini, räjpni lojni:

—¿La rililajzlu xtidx ni najc Xi'n Dios ni gujc Nigui, ä?

³⁶ Badzu'ni diidxre, räjpni:

—¿Chuni'c najcni, Dad, te chalilazä xtidxni?

³⁷ Räjp Jesús:

—Abahuili lojni, lagajcza laani caninäjlu naj.

³⁸ Dxejcti räjpni:

—Rililazä Dad.

Dxejcti bazuxhijbni te gojnnini.

³⁹ Räjp Jesús:

—Par yälguxhtis biälä lo guedxliujre, te fii renani di lojni jieñ, niluxh reni rien lojni sajcreni lotiä'p.

⁴⁰ Refarisee nani sugaräjreni, che biejn diajgreni diidxre, räjpreni:

—¿Xhixh najczanu ben lotiä'p, ä?

⁴¹ Räjp Jesús:

—Paru najctu lotiä'p, rut gucuaquijditu xtojltu, naj sa'csi rniiut rien lojtu, sicaquijtu rextojltu.

10

Jesús najc te baxtorsa'c

¹'Rniliá, rniliápac lojtu, nani di jiu' ro' gurajl xte rexiil, alga richu'ni stelaad, rā'pni cuá' gurajl, ni'c najcni te gubaan. ²Nani riu' nez ro' gurajl xten rexiil, laani najc xpaxtoorreni. ³Che guidzujn baxtoor, rux-hal nani rcanäj ro lä', te jiu'ni. Rexiilga numbeereni xse' baxtoor, dxejctiru laani rbejdixni rexiilga, tebgaj xiilga yu' lajni, rinázanireni cadro naga' guixasa'c. ⁴Che rii rexiilga nen gurajl, sanä baxtoorenari, luxh numbee rexiilga xse'ni, ni'c rsianäjreni baxtoorga. ⁵Luxh dipacreni chanä te baxtoor nani direni gumbee, ruxunreni lojni sa'csi direni gumbee xse' garenca bejn.

⁶Bij Jesús rediidxga lojreni, niluxh direni niacbee xhi sáloj ni guniimi.

⁷Dxejcti gunisac Jesús diidx lojreni; rájpni:

—Rniliá, rniliápac lojtu, narä naçä si'c roxlä' xcurajl rexiil. ⁸Guiraa reni abiääd galoo, najcreni ganax gubaan luxh di rexiil nucuadijg xse'ni. ⁹Narä naçä si'c rólä' xten gurajl, nani jiu' nejzga, silaami loj xtojlni, siu'ni, siriimi te guidxälni guixasa'c gauni.

¹⁰'Ni najc gubaan riäädtisi te cuanni, te ju'tni, te guxhinzani, niluxh narä siälä te ga'ptu yälnabansa'c, yälnabajn par tejpas. ¹¹Narä naçä baxtorsa'c; luxh baxtorsa'c sudeed lagajc xcälnabajn xcient rexiilni. ¹²Niluxh te mos ni rajxh, di gac baxtoorpac, ni xhet xtendini najc rexiil, che rhuiini siääd te cuyo't, ruxuñni, li rbälazni rexiil. Dxejc rniaaz cuyo't rexiil, rutie'chzani rexiil. ¹³Mosga ruxuñ sa'csi najcni mostis, luxh dini jiu xhi rsiajg rexiil.

¹⁴'Narä naçä baxtorsa'c; numbeä' reni najcpac rexilä; rexilä numbeezareni narä ¹⁵sigajc numbee Xtradä narä, sigajc numbeäza Xtradä; luxh sudedä xcälnabanä xcient rexiilga. ¹⁶Rapäza ste cuaa xiil, ni di gac xten gurajlre; näjza laareni nanab chaxiä, te gusobdiajgreni xtidxä, te guidxagsa' guiro'p cuareni, gacreni tejtis gurajl, tejtisza baxtoor.

¹⁷'Narä siguixäza xcälnabanä, guetä, te dxejcru siliässacä xcälnabanä, guibansacä, ni'cni sanäljaz Xtradä narä. ¹⁸Rut sajcdi ju't narä, lagajc narä gudedä xcälnabanä,

guetä. Rapä yälnibee te gudedä xcälnabanä, guetä, rapäza yälnibee te xcasacä xcälnabanä te guibansacä, sa'csi dee najc yälnibee ni baniidx Xtradä loä.

¹⁹Xcient rediidxre gula' sa' rexpejn Israel, gujcreni tio'p gala'. ²⁰Xhidajlreni canii:

—¿Xhicient riutuni? ¿La ditu gan te bendxab yu' lastooni? Yejcní rajc. Xhigac rcuadijgtu xtidxni.

²¹Dxejc ste cuarenai:

—Dini gac. Di rediidxre gac xtidx te bendxab. ¿Xhixh sajc rusiajc bendxab baloj relotiä'p, ä?

Rdxe'ch rebejn loj Jesucrist

²²Lagajc nen redxejga gujc lanij xten xquidoo rexpejn Israel guedx Jerusalén.

²³Najcni bái najl. Biu' Jesús guidoro, sasajni nez nen cordoor ni laa xten Salomón.

²⁴Gubig rexpejn Israel guideb gabi Jesús, rájpreni lojni:

—¿Gucli gucua'tzlu loonu chu najclu? Palga luj najclu Crist ni cabäätznu jiääd, guiniliini loonu tejpas.

²⁵Dxejc badzu' Jesús diidxre, rájpni lojreni:

—Aguniä lojtu si'c, niluxh ditu nililajz. Redzuun nani runä xcient xcälnibee Xtradä, huenliisi rululojreni chuni'c naçä.

²⁶La'tu ditu chalilajz sa'csi ditu gac rexilä. ²⁷Rexilä numbee xse'ä, luxh narä numbeätzareni, riädnajlzareni narä. ²⁸Narä rudedä yälnabajn par tejpas loj rexilä, luxh direni nitloj par tejpas. Rutzla laadi nani sajc gudzucajreni ladznaä. ²⁹Xtradä baniidxreni loä, laani najcni guroobru, nadipru loj guiraareni. Rut laadi nani sajc gudzucajreni ladznaä Xtradä. ³⁰Narä näjza Xtradä najcnu tejsi.

³¹Dxejc gulässac rexpejn Israel guij, te nucuareni yejc Jesús. ³²Dxejcti rájp Jesús lojreni:

—Xhidajluzuun xten Xtradä abaluiä lojtu, ¿lo redzuunga, xhi tejuzuun rujn gujatu guij yecä?

³³Dxejcti rájp rexpejn Israel lojni:

—Xcient redzuun ni rujnlu dinu gucuaa gujulu. Sa'csi guniyajlu, ni'c nucuaanu guij yejclu. Ben guedxliujlu, luxh najlu najclu tejsi con Dios.

³⁴Badzu' Jesús diidxre, rájpni lojreni:

—¿La et loj xleiiditu caj rediidxre: “Narä rniä, la'tu najc redios”? ³⁵ Nancheenu digacdi guidcaa xquijtz Dios. Palga gulalajni redios rebejn nani bejn yälgxuhtis loj rexpejñ Israel, dxejc ³⁶ naj, xhicuent guniit u loä: “Caniyajlu Dios”, sa'csi guniä lojtu narä nacä Xi'n Dios? Ni gule Dios narä, baxhañi narä lo guedxliujre. ³⁷ Palga dina gunä redzuun xten Xtdä, na'c chalilajztu rextidxä. ³⁸ Luxh palga runnäni, mascä ditu chalilajz xtidxä, colchalilajz ni ruluii reyälmilagwr nani runä, te gacbeetu par tejpas, Xtdä yunäj narä, narä yunääza laani.

³⁹ Che rlajzreni niniaazrenimi stehuält, laani biriini ladznaereni.

⁴⁰ Dxejcti sääni, gubisacni nez stelaad gueva Jordán, nejzga huijia'mni, cadro gusloj batibonis Juan. ⁴¹ Xhidajl bejn bidzujñ lojni ro'c, räjpreni:

—Di Juan niujn nicla tej yälmilagwr luxh guiraa rediidx ni gunii Juan xcuent dade're nejc didxliipac.

⁴² Xhidalduxhreni huililajz xtiidxni ro'c.

11

Gujt Larz

¹ Yu' te dade' ni cayacxhuu ni laa Larz. Rbäjzni guedx Betania, lajdxza rebisiajnni Marii näjza Mart. ² Mariire, bisiajin Larz, najc name' ni basäl setnejxh ni' Jesús, bati-aazani ni'ni con xquidxejcn. ³Ni'cni baxhal guiro'p bäljre diidx loj Jesús, räjpreni lojni:

—Dad, xamiigwlu nani sanälajzlu cayacxhuu.

⁴ Che biejn diajg Jesús rediidxga, räjpni:

—Di yälracxhuure ju'tni, sa'csi yälracx-huure najc te gululojni xcälrniibe Dios. Te gululojza yälracxhuure xcälrniibe Xi'n Dios.

⁵ Sanälajz Jesús Mart, bäljni, näjza Larz, ⁶che räjpreni lojni cayacxhuu Larz, bia'nni stio'p dxej cadro yu'ni. ⁷Dxejcti räjpni loj rexpejnpacni:

—Colcho', chonnu stehuält región Judea.

⁸Räjp rexpejnni lojni:

—Mastr, gajd gac xchej rlajz rexpejñ Israel ni rnibee nucuua guij yejclu te nugu'treni luj, luxh naj rlajzlu chäsaclu ro'c.

⁹Dxejcti räjp Jesús lojreni:

—¿La xhet tzubitio'p ordi yu' lo tebdxej, ä? Palga sa bejn rdxee, dini jiajb sa'csi ruhuiini lo bianij nani yu' lo guedxliujre. ¹⁰ Palga chasajni guxhijñ, siliaro'ni, sa'csi xheti bianijga.

¹¹ Dxejcti räjp Jesús lojreni:

—Nagayejs xamigwä Larz. Cha'a te chacuänäni.

¹² Dxejcti räjp rexpejnpacni lojni:

—Dad, palga agudiesni, pet siajcn.

¹³ Jesús canii lojreni agujt Larz, niluxh rexpejnpacni bejn xhigab caniini xcuent yälrejs xten bacaltis.

¹⁴ Ni'cni guniliipac Jesús räjpni lojreni:

—Agujt Larz. ¹⁵Rbalazä sa'csi rutinu ro'c, te chalilajztu xtidxä. Colcho' te chohuiuni.

¹⁶ Dxejcti Tomás ni rniizareni “cua'ch”, räjpni loj resa'ni:

—Colcho' te guetenäzanuni.

Jesús najc yälrbansac lo yälgujt

¹⁷ Che bidzujñ Jesús lo guejdixa, agujc tajp dxej biga'tz Larz. ¹⁸Guedx Betania tre' gajxh lo guedx Jerusalén, si'cti tio'p garol kilómetro. ¹⁹Xhidajl rexpejñ Israel abidzujñ, siädhuiiren Mart, näjza Marii, te di gac-huin lajzreni sa'csi gujt bisiajneni. ²⁰Che gucbee Mart abidzujñ Jesús, biriini huichaglojnni; niluxh Marii bia'n rolizreni. ²¹Dxejcti räjp Mart lo Jesús:

—Dad, paru suga'lú ree, di bisianä niejt.

²²Narä nanä suniidx Dios guiraa nani guini-ablu lojni.

²³Jesús räjpni lojni:

—Sibansac bisiajnl.

²⁴Räjp Mart lojni:

—Acananä sibansacni che guidzujñ dxej ni guibansac bejn loj rebengut dxej lult che gun Dios yälgxuhtis.

²⁵Dxejcti räjp Jesús lojni:

—Narä nacä yälruspansac bejn loj rebengut, näjza yälnabajñ par tejpas. Nani rililajz rextidxä, masä agujtni, sibansacni.

²⁶Chutis tej bejn ni nabajñ ni chalilajz xtidxä, dini nitloj par tejpas, xriliga lajzlini, ä?

²⁷Dxejcti räjp Mart lojni:

—Rililazáni, Dad. Ahuililazä luj najclu Crist, Xi'n Dios nani bia'n diidx guxhal Dios lo guedxliujre.

Biin Jesús cuä' xpaa Larz

²⁸ Che guluux gunii Mart, huitejdxni bäljni Marii, xhiga'tz räjpni lojni:

—Abidzujn Mastr. Cabejdxzani luj.

²⁹ Che biejn diajg Marii rediidxga, huisug-ajcni, sahuiini Jesús. ³⁰ Gajd Jesús jiu' gue-jdxga, lałtis suga'ni cadro bidxaagni Mart.

³¹ Rexpejn Israel nani biädcuenäj Marii, ni cahuui didi gac-huin lajzni, che bahuiireni huisu Marii, sääni, näjza laareni huirinajl-reni Marii, naareni pet lo baa sayoonnii.

³² Ni'cni che bidzujn Marii cadro suga' Jesús, basuxhjbnii lojni, räjpni:

—Dad, paru suga'luree, di bisianä niejt.

³³ Che bahuui Jesús cayoon Marii, näjza rexpejn Israel ni siädnajl Marii, guc-huin lastooni, biääd te rsliajz lastooni. ³⁴ Dxejcti räjpni lojreni:

—¿Caro bacua'tztuni?

Räjpreni lojni:

—Dad, gudaa ree te fiilu.

³⁵ Dxejcti biin Jesús. ³⁶ Ni'cni cayäjp rex-pejn Israel:

—Colhuii, lacti sanälajznini.

³⁷ Yu'zareni räjp:

—Dade're basiajc ben lotiä'p. ¿Xha di niajcdi nusiajcnii bejñre te di niejtni, ä?

Gubansac Larz

³⁸ Guc-huinduxh lastoo Jesús, gubigni lo baa. Baaga najc si'c te biliää, suga' te guiro ni rusätureni ro'ni. ³⁹ Dxejcti räjp Jesús lojreni:

—Colgudzucaj guijga.

Mart, ni najc bisiajn bengutga, räjpni lojni:

—Dad, pet acaladxuudxni, sa'csi agujc tajp dxej guijtni.

⁴⁰ Dxejc räjp Jesús lojni:

—¿Et rniä lojlu, palga rililajztu, suhuilu xcälrnibee Dios, ä?

⁴¹ Dxejcti badzucajreni guijga. Guläs Jesús lojni xhaguiba, räjpni loj Xtadni:

—Xtadä, runidxä xquixtios lojlu sa'csi abiejn diajglu xtidxä. ⁴² Narä nanä guli-ica rucuadiajglu xtidxä, luxh naj caniäni xcent rebejn ni tre' ree, te chalilajzreni luj baxhallu narä.

⁴³ Che gulujx guniini rediidxga, guredxa'ni räjpni:

—¡Larz! ¡Gudaa ree!

⁴⁴ Dxejc birii bengutga nen biliää. Naliib renaani, reni'ni, niäuu te baii lojni. Dxejcti räjp Jesús lojreni:

—Colguslaani, colgusaan jiini.

Bachaagreni diidx xho guiniaazreni Jesús (Mt. 26:1-5; Mr. 14:1-2; Lc. 22:1-2)

⁴⁵ Xcuent dzunrore huililajz rextidx Jesús xhidajl rexpejn Israel nani huinajl Marii, che bahuiireni xhi bejn Jesús. ⁴⁶ Yu' reni huihuii loj rexpejn Israel ni laa farisee, bijreni diidx xhi bejn Jesús. ⁴⁷ Dxejcti refariseega, näjza rebixhojz ni rnibee, bire'reni bidxagsa'reni lo Junt Suprem, räjpzareni:

—¿Xho jiennu? Niguiire cayujn xhidajl milagwr. ⁴⁸ Palga guisaannuni si'c, guiralii bejn sililajz xtiidxni, sinajlrenini. Dxejcti jiääd reben roman ni rnibee, gudzucahreni xcälrnibee, sudzujlzareni lajdxnu.

⁴⁹ Dxejc Caifás, bixhojzro ni riäj gu-nibeeni lo rebixhojz ijzga, räjpni lojreni:

—La'tu xhetliidi najnditu. ⁵⁰ Ditu gun xhigab laaca guet tejtis bejn xcient guideb guejdx, didi nitloj guideb lajdxnu.

⁵¹ Niluxh Caifás dini ninii diidxre xcient-canii. Sa'csi ijzga rnibeeni lo rebixhojz, lagajc Dios badeed diidxga guniini. Ni'c gunixgaani guet Jesús xcient nación xten rexpejn Israel. ⁵² Luxh xhet ganaxtis xcient nacionga, näjza te guire' guiraa rexpejn Dios nani nare'ch loj guideb guedxliujre. ⁵³ Ni'cni dxejliga bachaag rebejngä diidx te don xho gunreni gugu'treni Jesús.

⁵⁴ Ni'cni diru Jesús nisiaj nez loj rexpejn Israel. Biriini región Judea, huijni te lajt gajxh nez lo reyubijdz, lo te guejdx ni laa Efraín. Ro'c biannäjní rexpejnpacni.

⁵⁵ Guxii dxej cayäädix guidzujn lanij ni laa pascw ni rujn rexpejn Israel. Xhidal-duxh rebenguejdx huij guedx Jerusalén te guisiareni lastoorenii, te gac gunreni lanij xten pascw. ⁵⁶ Cansajreni caguilreni Jesús; che yu'zareni nen guidoro, canabidiidx lo sa'reni, räjpreni:

—¿Xhi najtu? ¿La siäadni lanijre o laa dini jiääd, ä?

⁵⁷ Refarisee näjza rebixhojz ni rnibee loj rebixhojz, agunibeereni palga yu' chu najn caro yu' Jesús, chaye'tzni lojreni te guini-aazrenini.

¹ Che riäädx xho'p dxej gal lanij pascw, huij Jesús guedx Betania cadro rbäjz Larz nani baspansac Jesús loj rebengut. ² Ro'c bejnreni te xchej te gau Jesús. Mart bateed xchejga, näjza Larz sobganej Jesús näjza rexpejnpacni lo mex. ³ Dxejcti bidzunnäj Marii si'cti garol litr se't ni rlianexhduxh si'c nard. Sacduxh se'tga. Dxejcti gudääbni se'tga lo reni' Jesús, baspijdzni ni'ni con xquidxejcni. Guideb nen yu'ga gulanejxh se'tga. ⁴ Dxejcti räjp Judas Iscariot, xi'n Simón, ni nadj te rexpejnpac Jesús, lagajc ni abejn xhigab guto'ni Jesús, räjpi:

⁵ —¿Xhicuent di se'tre nido' chon gayuu denar te nidis meelga loj rebenproob? (Chon gayuuga nadj si'cti ni xca' te niguu paru gunni dzuun tzubiteb bääi.)

⁶ Guniini si'c, xhet sa'csi riadini reproob, per sa'csi laani najcni te gubaan, luxh laani ca'ni bols cadro ruchee mee, luxh rbäani meel lojga te rca'nini. ⁷ Ni'cni räjp Jesús lojni:

—Na'c gudxoijnluni; subasälxgaanini, che gajd guidzujn dxej nani guiga'tzä. ⁸ Dxej-yää'l yu' rebenproob lojtu, luxh narä dina chuä lojtu xchej.

Laareni rlajzreni nugu'tzareni Larz

⁹ Dxej che gucbee xhidajl xpejn Israel yu' Jesús rolizj Larz ni gubasac lo rebengut, bidzujnreni, xhet xcientis Jesús. Biäädreni te fiizareni loj Larz nani baspansacni lo rebengut. ¹⁰ Dxejcti rebixhojz ni rnibee bachaagzareni diidx te ju'tzareni Larz, ¹¹ sa'csi xhidajl rexpejn Israel salilajzreni xtidx Jesús sa'csi bahuiireni gubasac Larz.

Biu' Jesús guedx Jerusalén

(Mt. 21:1-11; Mr. 11:1-11; Lc. 19:28-40)

¹² Che bara yää'l, rebejn xhidajl ni bidzujn lanij biejn diajgreni asiäddzujn Jesús guedx Jerusalén, ¹³ dxejcti batiu'reni naa reyagzjin, biriireni nen guejdx, sachaglojrenini. Guredxa'reni, räjpreni lo Jesús:

—¡Colguiliä'p xpala'n Dios! ¡Chicbaa nani siääd xcuent Dad nani nadj ɻeii lo rexpejn Israel!

¹⁴ Bidxäl Jesús te burbáz, gubijbnini, si'cni caj lo regujitz:

¹⁵ Na'c guidxejbtu, bejn ni rbäjz nen guedx Sión.

¡Colhuii! Reii xtentu asiääd, bijbni dejtz te burbáz.

¹⁶ Di rexpejnpacni niabee recosga che gujcreni, niluxh che gubansacni loj rebengut, dxejc banaj lajzreni recos nani caj lo guijtz xcientni, näjza guiraa recos ni bejn rebejn lo Jesús te guzojb rediidxga.

¹⁷ Reben xhidajl ni sugaranjni che gure-jdxni Larz te biriini nen baa che baspansacnini lo rebengut, bijzareni diidx xcuent guiraa ni bahuiireni. ¹⁸ Ni'cni biädcagloj reben xhidajlgani, sa'csi abiejn diajgreni laani bejni milagwre. ¹⁹ Ni'cni räjp re-farisee lo sa'reni:

—Aruhuiit u xhet sajcdi jiennu. ¡Colhuii! Empac sanajl guideb guedxliuji.

Riädtiil regriegw Jesús

²⁰ Yu' gaii bengriegw nadxaag lo rebejn ni biädded lanij guedx Jerusalén. ²¹ Rebejnre bidzujn loj Felipe nani siääd guedx Bet-saidia xten Galilee, gusloj gunabreni lojni, räjpreni:

—Dad, rlaaznu guihuiin lo Jesús.

²² Biääd Felipe, räjpi loj Andrés, dxejcti guiro'preni huiye'tzreni lo Jesús. ²³ Dxejcti räjp Jesús lojreni:

—Abidzujn oy ni chä'p xpala'n Xi'n Dios ni gujc Niguii. ²⁴ Rniliäpac lojtu, palga di te xob binij jiajb lo yuj, neñ xhurc cadro cueni, te rianxtebni, guetni, dini guiliejin. Luxh palga guetni, siliejnni, rajcza te nisro lojni, rajc xhidajl xob binij. ²⁵ Nani sanälajz xcälnabajnni, sunijtnini, luxh nani rbäiaz xcälnabajnni lo guedxliujre, sica'ni yäln-abajn par tejpas. ²⁶ Palga yu' chu tej ni rlajz chu loä, sujädnajlni xnezyüä, te cadro yu'ä, ro'cza cuääz ni ru' loä. Palga yu' chu gun xtzunä, siliä'pza Xtradä xpala'nni.

Rniixgaa Jesús guetni

²⁷ Räjzani:

—Naj cayac-huin lastoä. ¿Xhichani'cza gäpä lo Xtradä? ¿La siniä: Dad, gucnäj narä te di tedä or ni siääd? Ni te tedäpac orga biälä lo guedxliujre. ²⁸ Xtradä, bejn si'cni riäjl gac te guiliä'p bejn xpala'nlu.

Dxejcti xhaguibaali biejn te xse' te ni räjp:

—Agulä'pä xpala'nä, siliä'pä xpala'nä stehuält.

²⁹ Ni'cni lo rebejn ni tre' ro'c, ni biejn diajgreni se'ga, yu' reni räjp:

—Lascanu gunii te guzii.

Guyu'zareni räjp:

—Te xangl Dios ni gunii lojni.

³⁰Dxejc räjp Jesús lojreni:

—Et xcuentädi gunii xse' ni gunii, xcuentis la'tu guniini. ³¹Naj abiääd xcälguxhtis Dios lo guedxliuj. Naj sibicaj xcälrnibee nani rnibee lo guedxliujre. ³²Naj, che guiliärsreni narä jiaa lo guedxliuj, te galä ro'c, sutie'ä guiraa bejn loä.

³³Rediidxre gunii Jesús te canixgaani xho guetni. ³⁴Räjp rebejn lojni:

—Nure'e biejn diajgnu bilreni lo leii, Crist ni jiääd sibajn par tejpas. ¿Xho mood rniilu, nanab chäs Xi'n Dios ni gujc Niguii jiaa lo guedxliuj? ¿Chuxhni'c najc Xi'n Dios ni gujc Niguii ni ruzä'tlu?

³⁵Dxejcti räjp Jesús lojreni:

—Sterä'tsiyu' bianij lojtu. Colsaj lal ni rajptu bianijga, te di guiniaaz yälxräjy la'tu, sa'csi ni rsiaj loj nacäjy, dini gan caro chääni. ³⁶Lal ni rajptu bianij, colchalilajz bianijga te gactu rex'i'n bianij.

Gunii Jesús rediidxga lojreni, dxejcti binejzni ro'c, bicuatzlojni.

Xhicuent di rexpejñ Israel nililajz xtidx Jesús

³⁷Xhidajl remilagwr bejn Jesús nez loj rexpejñ Israel, niluxh direni nililajz xtidxn, gulälazreni nani baxhal Dios lojreni.

³⁸Ni'cni guzojb diidx nani gunii Isaías, ni gunii xtidx Dios galoro, räjpni:

Dad, ¿chuni'c huililajz xtiidxlu?

¿Chuloj baluiilu xcälrnibeduxhlu, ä?

³⁹Ni'cni di niajcdi nililajzreni, sa'csi guniiza Isaías, räjpni:

⁴⁰Abascäjyni lojreni,
abennajdni lastoorenii,
te di rebalojreni ffi,
te di lastoorenii gacbee,
te di gusiech lajzreni,
te di gusiacäreni.

⁴¹Rediidxre gunii Isaías, sa'csi bahuiini xcälrdrimbicha' Jesús xhaguibaa, dxejc guniini xcuentni.

⁴²Dxejcti gaii rebejn ni rnibee huililajz xtiidxn che räjpni abaxhal Diosni, niluxh bidxejbreni reben farisee, ni'c direni nicäjy ahuililajzreni, te di gurilaaggreni laareni, gudxoijnreni jiu'reni neñ guidoo.

⁴³Sa'csi rdxaglajzurenii guiliä'p rebejn xpala'nreni luxh guxiiru rlajzreni guiliä'p Dios xpala'nreni.

Xtidx Jesús sigubee rebejn

⁴⁴Dxejcti gudidxa' Jesús:

—Nani chalilajz xtidxä, et ganaxdi ni caniä rililajzni, näjza xtidx Xtadä nani baxhal narä rililajzni. ⁴⁵Nani ruhui loä, ruhuiizani loj ni baxhal narä. ⁴⁶Narä biälä si'c bajl lo guedxliujre, te guiraa renani chalilajz xtidxä, dirureni chu lo yälçäjy. ⁴⁷Nani riediajg xtidxä, luxh dini gusoob rediidxga, dina gunä yälguxhtis lojni, sa'csi dina niälä te gunä yälguxhtis rebenguedxliuj, biälä te guslaä' reben guedxliuj lo dojl. ⁴⁸Nani rbälaz narä, ni di gusoob xtidxä, yu' chu gun yälguxhtis xtojlni; lagajc rediidx nani guniä gun yälguxhtis xtojlneni che gal lult dxej. ⁴⁹Sa'csi narä dina niändniä lagajc xcuentä, lagajc Dad ni baxhal narä, lagajc laani gunibeeni xhini'c guniä, xhini'c guuliä. ⁵⁰Luxh nancheä gunibeeni chu yälnabajn par tejpas. Ni'cni rediidx nani rniä, rniäreni si'cpacni gunii Xtadäni loä.

13

Jesús gudiibni ni' rexpejñpacni

¹Che gajd gal dxe lanij ni laa pascw, najn Jesús asiäddzungajx xorni, or ni jiunejzni lo guedxliujre te chääni lo Xtadni. Luxh sa'csi agajc sanälajzni rexpejñpacni nani yu' lo guedxliujre, sinälajzzaniren par tejpas.

²Ni'cni lal ni cayauxchejreni biu' benäxben neñ lastoo Judas Iscariote, xi'n Simón, te guito'ni Jesús. ³Sa'csi agucbee Jesús abateed Xtadni guira'ti ladzñaani, gucbeezani loj Dios biriini, lo Dios guibi'zani, ni'c huisu Jesús lo xchejga, gulääni xhablojiaani, gudojbni te tuäii, batejbnini xque'ni. ⁴Dxejcti cu'a'ni nis nen te chaa, guslojni gudiibni ni' rexpejñpacni, baspidzni ni'reni con tuäiiga. ⁵Che bidzujnni loj Simón Pedr, räjp Pedr lojni:

—Dad, ¿xhixh luj siguiiblu ni'ä?

⁷Dxejc räjp Jesús lojni:

—Nani cayunä dilu gacbeeni naj, guixee-huijdx sacbeeluni.

⁸Räjp Pedr lojni:

—Dipaclu quiib ni'ä!

⁹Räjp Jesús lojni:

—Palga dina quibä ni'lü, digacdiru gaclu xpenä.

⁹Räjp Pedr lojni:

—Dad, na'c quiiblu ni'ätis näjza naä näjza yecä gudiib.

¹⁰Räjp Jesús lojni:

—Nani agojz di guiquiin gazzacni; ni'tisni guidiib, sa'csi naya guidebni; nayazatu, per xhet guiraaditu naya.

¹¹ Sa'csi anajnni chu guto'ni, ni'cni guni-ini: "Xhet guiraaditu naya."

¹² Ni'cni che gulujx gudiibni ni' rexpejñni, gotsacni xhajbni, guresacni lo mex, räjpní:

—¿La najntu xhini'c benä lojtu, ä?

¹³ La'tu rniitu narä, Mastr näjza Dad. Luxh laaca rniitu sa'csi nacáni. ¹⁴ Mbaj, palga narä ni nacä Dad, nacäza Mastr, gudibä ni'tu, la'tu sigajza riäjl quiibtu ni' resa'tu.

¹⁵ Sa'csi abaluiä lojtu xho gacni, te chanuu guntu sigajc ni benä lojtu. ¹⁶ Rniliä, rniliäpac lojtu, di te mos gac beñroru lo xlamni; diza te ni rij xmandaa beñj gac beñroru loj nani baxhalni. ¹⁷ Palga najntu recosre, chicbaazatu palga si'c guntu.

¹⁸ Dina guiniä diidxre lo guiraatu. Numbeä reni aguleä, niluxh nanab soob xtidx Dios ni caj lo rexquijtzni. Scree najc rediidxga: "Nani rajw xcuxtilä, ni'c agubiréni, agulälazni narä." ¹⁹ Ni'cni agunixaäni, che gajdni gac, te che gacni chalilajtu nacä chu rniä nacä. ²⁰ Rniliä, rniliäpac lojtu, nani riu xtidx nani ruxhalä, riuzani xtidxä; luxh nani riu xtidxä, riuzani xtidx nani baxhal narä.

Räjp Jesús chuni'c guto'ni

(Mt. 26:20-25; Mr. 14:17-21; Lc. 22:21-23)

²¹ Che gulujx gunii Jesús rediidxre, guchuinduxh lastooni, dxejc guniliini:

—Rniliä, rniliäpac lojtu, tejtu suto' narä.

²² Dxejc gusloj cadxeloj rexpejnni lo sa'reni, di jien chuchani'c cagusä'tni. ²³ Tej rexpejnni nani sanälajzruni sobga' cuä'ni.

²⁴ Dxejcti beñj Simón Pedr seen lojni te guiniabdiidxni loj Jesús chu xcuent caniini.

²⁵ Dxejc nani sobga' cuä'ni, gubigruni loj Jesús, gunabdiidxni lojni, räjpní:

—Dad, ¿chuni'c rusä'tlu?

²⁶ Dxejcti räjp Jesús lojni:

—Guhuadxä te la' yätxtiil. Loj nani gudedäni, ni'c najcni.

Dxejcti bahuajdxni tla' yätxtiil, badeed-nini loj Judas Iscarioite, xi'n Simón.

²⁷ Che gulujx gudajw Judas yätxtiilga, biu' bendxb lastooni. Dxejcti räjp Jesús lojni:

—Ni rlajzlu gunlu, bejngani.

²⁸ Nicla tej reni sobga' lo mex direni ni-acbee xhicuent räjpní lojni si'c. ²⁹ Sa'csi

Judas ca' bols meel, gaiireni beñj xhigab pet guniini si'c sa'csi yu' xhi chasiini par lanij, o pet yu' xhi gudeedni loj reben ni xhet rajpdi. ³⁰ Che gudajw Judas yätxtiilga, birigajcni, luxh abiu' guxhijñ.

Didxcoob ni gunibee Jesús

³¹ Dxejcti che abirii Judas lojreni, räjp Jesús lojreni:

—Naj sienloj xcälrnibee Xi'n Dios ni gujc Niguii, luxh lojni sienloj xcälrnibee Dios. ³² Palga suluiloj Xi'n Dios ni gujc Niguii xcälrnibee Dios, dxejc suluilojza Dios xcälrnibee Xi'n Dios ni gujc Niguii, luxh siojb gunnini. ³³ Rexi'nä nani sanälazä, diru

gac xchej chunää la'tu. La'tu siguilltu narä, per si'cni räpä lo rexpejñ Israel si'cza rniä lojtu naj: Di gacdi jiäädtu cadre cha'a. ³⁴ Te didxcoob rnibeä guntu: Colchanälajz sa'tu. Sigajc ni sanälazä la'tu, sigajcza colchanälajz sa'tu. ³⁵ Palga rinälajz sa'tu, si'c sacbee guiraa benguedxliuj najcpactu rexpejñä.

Xhini'c gun Pedr loj Jesús

(Mt. 26:31-35; Mr. 14:27-31; Lc. 22:31-34)

³⁶ Dxejcti räjp Simón Pedr loj Jesús:

—Dad, ¿caro chäälu?

Räjp Jesús lojni:

—Cadro cha'ä digacdi jiädnajllu narä naj; niluxh sidzujñ dxej jiäädlu ro'c.

³⁷ Räjp Pedr lojni:

—Dad, ¿xhicuent digacdi jiälä naj? Palga rquiin guetä xcuentlu, suguetä.

³⁸ Räjp Jesús lojni:

—¿La guliilu guetlu xcuentä, ä? Rniliäpac lojlu, nicla gajd guidgaii cuedxa' chon huält, säjblu dilu gumbee najrä.

14

Jesús najc nezyuj lo Dad

¹ Dxejcti räjp Jesucrist lojreni:

—Na'c chutu yärsia'. Rililajztu xtidx Dios, colchalilajzza xtidxä. ² Yu' xhidualduxh yu' cadre rbäjz Xtadä. Palga xhet si'cdi nacni, dizana niniä lojtu si'c. Sia'ä chasucheä reyu' par la'tu. ³ Luxh palga chasucheä cadre cuääztu, che guluxäni, sibisacä, te chanäåtu ro'c, te cadre yu'ä, ro'cza chutu.

⁴ La'tu anajntu caro cha'ä, anajnzatu nezyuj ni chääütu.

⁵ Dxejcti räjp Tomás loj Jesús:

—Dad, dinu guidon caro chäälu, *¿xho* guidonnu nezyujga, ä?

⁶Räjp Jesús lojni:

—Narä nacä nezyuj. Narä nacä didxli-ipac, nacäza yälnabajn. Por naräts sajchää bejŋ cadro rbäjz Xtradä. ⁷ Palga la'tu niembeetu chuni'c nacä, niembeeatzu Xtradä. Luxh najli abiembeepactuni sa'csi acahuiitu lojni.

⁸Räjp Felipe loj Jesús:

—Dad, basaan guihuiinu loj Xtradlu; ni'ctis rlaaznu.

⁹Dxejcti rájp Jesús lojni:

—Felipe, *¿la* gajdu gumbee narä, luxh lacti xchej yu'ä lojtu, ä? Nani ruhuii loä, abahuiini lo Xtradä. *Xhicuent rniabl* filiu lo Xtradä, ä? ¹⁰*¿La* dilu chalilajz najrä yunää Xtradä, luxh Xtradä yunäjzani narä, ä? Rediidx nani rniä dina guiniäni lagajc xcientä, sa'csi Xtradä ni yunäj narä laani rujn lagajc rextzuunni. ¹¹ Colchalilajz xtidxä, che rniä narä yunää Xtradä, luxh Xtradä yunäj narä. O palga ditu chalilajzni sa'csi na-jcni xtidxä, colchalilajzni sa'csi abahuiitu rextzuun ni runä. ¹² Rniliápac lojtu, nani chalilajz xtidxä, sajc gunni redzuun nani runä, luxh sujnni dzunroru sa'csi sia'a cadro yu' Xtradä. ¹³ Luxh guiraa ni guiniabl lo Xtradä xcientä, narä sunäni, te gululioä xcälrnibee Xtradä. ¹⁴ Narä sunä xhitis ni guiniabtu por laä.

Ria'n diidx guxhal Jesús Sprit Dzan

¹⁵Räjpzani:

—Palga sanälajztu narä, susooftu xtidxä. ¹⁶Dxejc siniabä lo Xtradä, te guniidxnii stee nani gacnäjtu te chunäjni la'tu par tejpas. ¹⁷Nalajznu, Xprit Dzan xten Dios, ni rnili. Di gacdi xca' reben guedxliuji, sa'csi direni fii lojni, niclaza gumbeeranini. Niluxh la'tu numbeetuni sa'csi yunäjni la'tu, yu'ni nen lastootu. ¹⁸Dina gusanbisäbä la'tu; sibisäc jiädhuiä la'tu. ¹⁹Diru gac xchej, dxejc diru reben guedxliuji fii loä, niluxh la'tu suhuiitu loä. Sa'csi nabanjä, la'tu nabanjzatu. ²⁰Nen redxejga, dxejc sacbeetu yunää Xtradä, la'tu yunäjtu narä, luxh narä yunäjzä la'tu. ²¹Nani numbee Xtradä, nani rusobza xtidxä, ni'c ruluiini sanälajzpaczni narä. Luxh Xtradä sinälajzza nani sanälajz narä,

najza narä chanälazä bejŋga, luxh suluiloä lagajc narä lojreni.

²²Dxejcti rájp Judas (xhet Iscariótedi) lojni:

—Dad, *¿xhini'c* gunlu te gululiojlu lojtsnu, xhet najdi loj reben guedxliuji, ä?

²³Dxejcti rájp Jesús lojni:

—Nani sanälajz narä, ni'c riu xtidxä. Ni'c chanälajz Xtradä, dxejc jipläznäännu guiro'pnu Xtradä. ²⁴Nani di chanälajz narä, dini jiu xtidxä. Luxh rediidx nani biejn diajgtu, et xtidxädini; xtidx Xtradäni ni baxhal narä.

²⁵Caniä guiraa rediidxre lojtu lajni yu'ä lojtu, ²⁶per Sprit Dzan xten Dios nani jiädyacnäjtu, nani guxhal Xtradä xcientä, laani suluuii lojtu guira'ti, najza susnajni lajztu guiraa rediidx nani aguniä lojtu. ²⁷Yärlbecdxilajz rusa'nä lojtu, xcälr-becdxilazä runidxä lojtu, et si'cdini runiidx guedxliuji najc nani runidxä lojtu. Na'c chutu yärsia', na'cza guidxejbtu. ²⁸Abiejn diajgtu ni guniä lojtu: Sia'ä luxh siälsäcä lojtu. Paru ninälajzpactu narä, sibalajztu xcientä che guniä sia'ä lo Xtradä, sa'csi Xtradä najc benroru loä. ²⁹Scree agunixa-gäni lojtu, te che soobni, dxejcru chalilajztu xtidxä.

³⁰Diruna guniduxhä lojtu, sa'csi asiääd nani rnibee loj guedxliuji, luxh digacdi guinibeeni narä; ³¹riäjl gac recosre te gacbee reben guedxliuji sanälazä Xtradä, rusobza xtidx Xtradä, runä nani gunibeeni. Colchastie, colcho'j iunejznu ree.

15

Jesús najc si'c te yaguub

¹Räpzani:

—Narä nacä si'c te yaguub. Xtradä najc si'c nani rusuj yajgga. ²Rebejn najc si'c renaa yajgga. Guiraa renaa yajgga nani xhet cajdi lojni rutiuugnini. Luxh guiraa renaa yajgga ni caj ninejxh lojni, rusianini te xcajru ninejxh lojreni. ³La'tu anajctu beñnaya xcient rediidx nani aguniä lojtu. ⁴Colguibañjä narä, sigajc ni nabanjä yu'ni yagguub. Sigajza la'tu, palga guibicajtu loä, di gacdi guntu xtzunä.

⁵Narä nacä si'c yaguub. La'tu najctu si'c renaa yajgga. Nani riannäj narä, naräza ri-annäjäni, ni'c sajc runduxhni xtzunä, sa'csi

che guibicajni loä, xhet sajcdi gunni. ⁶Nani di chupac loä, sibicajni si'c renaa yajg nani rdin sa'csi xhetru rcajdi lojni, dxejcti rbi-jdzni, rusäl bejnreni lo däj te checni.

⁷'Palga chupactu loä, palgaza chupac xtidxä lastootu, colhab nani rlajztistu, luxh narä sunidxäpacni. ⁸Che gunpactu xtzun Dios, dxejc fii bejn najcpactu xpenä, siliä'p bejn xpala'n Xtadä, Dios. ⁹Si'cpacni sanälajz Xtadä narä, sigajcza sanälazä la'tu. Colchanuu lo xcälrinälazä. ¹⁰Palga jiutu rextidxä, sinuutu lo xcälrinälazä, sigajc ni abasobä xtidx Xtadä, luxh rinuä lo xcälrinälazj Xtadä.

¹¹'Rniä rediidxre lojtu te guibalaznäjtu narä, te si'c guibalazduxhpactu. ¹²Dee najc diidx ni rnibeä guntu: colchanälajz sa'tu si'cni sanälazätu. ¹³Xheti te yälsanälajz ni guroobru lo yälsanälajzre, gudeed te bejn xcälnabajnni, guetni lacuua resa'ni. ¹⁴La'tu najctu resalä' palga gusoobtu diidx nani guinibeä guntu. ¹⁵Diruna cuälaä "mos" la'tu, sa'csi di remos gan xhi rujn xlämenri. Luxh narä agulälaä la'tu "rexam-igwä", sa'csi guira'ti rediidx ni biejn diagä lo Xtadä aguniäza rediidxga lojtu. ¹⁶Et la'ditu gule narä, narä guleä la'tu. Guleä la'tu te guntu xtzun Xtadä, te na'cza nitloj dzuunga. Te guira'tiza nani guiniabtu lo Xtadä por laä, ni'cza gumiidxni lojtu. ¹⁷Dee rnibeä guntu: colchanälajz sa'tu.

Rbälaz rebejn güedxliuj Jesú斯 näjza rex-pejnni

¹⁸'Palga cuälaz reben güedxliuj la'tu, anajntu agulälazxaareni narä. ¹⁹Paru najctu ben güedxliujre, sinälajzreni la'tu. Per ditu gac ben güedxliuj, sa'csi narä guleä la'tu te jiutu xtidx Xtadä, ni'cni rbälaz reben güedxliuj la'tu. ²⁰Colsnaj lajztu diidx nani gumiä lojtu, 'di te mos gac beñroru lo xlämmi'. Palga basacsireni narä, susac-sízareni la'tu. Palga rusooobreni xtidxä, su-soobzareni xtiidxtu. ²¹Guiraa recosre sun-näjreni la'tu xcentä sa'csi direni gumbee nani baxhal narä.

²²'Paru dina niädniä lojreni direni niujn dojl xten xcäldrxechlajzreni loä, per naj di gacdi guiniirenii direni gacbee yu' xto-jlreni. ²³Nani rbälaz narä, rbälazzani Xtadä. ²⁴Palga dina niunä nez lojreni remilagwrro,

sa' nani rutru rajcdi rujn, direni niajp dojlga; sa'csi abahuiireni redzuunga, ni'c agulälazreni narä, näjza Xtadä. ²⁵Bejnreni si'c te guzojb diidx nani cuaj lo guijtz agujc xchero: "Gulälazreni narä, luxh xhetlidi benä."

²⁶'Che jiääd nani gacnäj la'tu, laani sinii xcientä, chu nacä. Laani najc Sprit ni yu' lo Xtadä, siniiini didxlji. Narä suxhaläni lojtu; lo Xtadä guiriini jiäädni lojtu. ²⁷Näjza la'tu sinitu diidx xcientä, chu nacä, sa'csi guyu'tu loä cheni gusloäli cagusule'ä diidxga.

16

¹'Rediidxre rnixgaä lojtu, te didi yu' xhi gun jiajbtu te gunijttu lo xtidxä. ²Sidzijn dxej sibääreni la'tu dirureni gusaan jiu'tu neñ guidoro. Sidzijn or chutis ju't tejtu, suchaloni cayacnäjni Dios. ³Guiraa recosre sujnreni sa'csi direni gumbeepac Xtadä, niclaza narä. ⁴Agunixgää rediidxre lojtu, te che guidzijn orga sinaj lajztu xcient rediidx ni guniä lojtu.

Redzuun ni rujn Sprit Dzan xten Dios
'Dina niniä rediidxre lojtu che gusloä cagusule'ä diidx, sa'csi sugaränä la'tu. ⁵Naj agojl guibi'ä loj nani baxhal narä, luxh nicla tejtu di guiniabiidx: "¿Caro chääu?"
⁶Dxejc sa'csi aguniä recosre lojtu, ni'c cayac-huin lastootu. ⁷Luxh rmiliäpac lojtu, hueenru par la'tu cha'ä. Palga dina cha'ä, di gacdi jiääd lojtu nani racnäj. Niluxh palga cha'ä, suxhaläni lojtu. ⁸Luxh laani, che jiäädni lo güedxliujre, susanijni xcäriejn rebejn te gacbeereri xcient dojl, näjza xcient xcälnabannaya Dios, näjza xcient yälguxhtis xten Dios. ⁹Guluiizani xcient dojl lojreni sa'csi direni chalilajz xtidxä. ¹⁰Guluiini xcälnabannaya Dios lojreni sa'csi sibisacä lo Xtadä, luxh dirutu fii loä. ¹¹Guluiini xcient yälguxhtis xten Dios lojreni sa'csi abejn Dios yälguxhtis loj bendxb nani rnibee lo güedxliujre.

¹²'Yu' xhidajlru diidx rlazä guiniä lojtu, niluxh digacdi gacbeetureni naj. ¹³Che jiääd Sprit xten didxlji xten Dios, laani susanijni xcäriejntu te gacbeetu guiraa redidxgulii, sa'csi dini guinii diidx xcientcani, sinitisni ganax rediidx nani gudeed Dios lojni te guiniini. Siniizani xcient recos nani churu gac. ¹⁴Laani siliä'pni xpala'nä sa'csi sica'nii

xhixtenä, suluinini lojtu. ¹⁵ Guiraa ni rajp Xtadä najc xtenä, ni'cni rniä suluini xhixtenä lojtu.

Xcälrac-huin lajztu sibixloj ni yälrbalajz

¹⁶ 'Sbale'si dxej, dxejc dirutu fii loä; dxejctiru sgaii dxej suhuisactu loä sa'csi narä sia'a lo Xtadä.

¹⁷ Dxejcti räjp rexpejnpacni lo sa'reni:

—¿Xhini'c caniini loonu? Sbale'si dxej, dxejc dirutu fii loä, dxejctiru sgaii dxej suhuisactu loä, näjza: sa'csi sia'a lo Xtadä.

¹⁸ Ni'cni cayäjpreni lo sa'reni: ¿Xhi dee rniini, "sbale'si dxej"? Dinu gacbee xhini'c caniini.

¹⁹ Gucbee Jesús xhini'c rlajzreni guiniabidiidxreni lojni, dxejcti räjpni lojreni:

—Canabdiidx lo sa'tu xhi såloj nani guiniä che guniä, sbale'si dxej, dxejc dirutu fii loä; dxejcrubale'si dxej, suhuisactu loä. ²⁰ Rniliápac lojtu, la'tu soontu, niluxh reben guedxliujre sibalazduxhreni. Sac-huinduxh lastootu niluxh yälrac-huinre sibixlojni yälrbalajz. ²¹ Te gunaa che gaal xi'nni, rdejdni trabajw, dxejcti che aguyu' xi'nni, riäl lajzni gudejdni trabajw, dxejc arbaa lajzni gojxi'nni te nigui lo guedxliujre. ²² Ni'cni, sigajcza rac-huin lastootu naj, dxejcti che jiädhuisacätu, dxejc sii sibalajztu nen lastootu, luxh rut gacdi gudzucajdi yälrbalajzga.

²³ Nen redxejga xhetiru xhi yälguiniabidiidxdi gutu loä. Rniliápac lojtu, nani guinabtu lo xtadä xcuentä, laani suniidxnini lojtu. ²⁴ Naj xhet canabditu xcuentä. Colnabni, te xca'tuni, te guibalajztu.

Jesús, nani abejn gaan lo guedxliujre

²⁵ Aguniä guiraloj lojtu con cuent ni rului, niluxh sidzujn dxej che diruna guiniä cuent ni rului lojtu. Siniä didxguyasi lojtu xcuent Xtadä. ²⁶ Nen redxejga guiniabtu por laä. Luxh dizana guiniä siniabä narä loj Xtadä par la'tu, ²⁷ sa'csi lagajcza Xtadä sanälajzni la'tu, sa'csi la'tu sanälajztu narä, luxh ahuililajzattu loj Dios biriä biälä lo guedxliujre. ²⁸ Biriä lo Xtadä xhaguibaa, biälä lo guedxliujre, siunuezäa lo guedxliujre, sibisacä lo Xtadä xhaguibaa.

²⁹ Räjp rexpejnpacni lojni:

—Naj sii caniilu guyasi, dini gac si'c redidx-xhiga'tz xten cuent ni rului. ³⁰ Naj sii gucbeenu racbeelu guira'ti rexhicos,

xhetru nanabdi guiniabdiidxrunu lojlu; ni'cni ahuililajznu biriilu lo Dios ni yu' xhaguibaa.

³¹ Räjp Jesús lojreni:

—¿La rililajzpactu naj, ä? ³² Asiäddzungajxh teb or luxh ala bidzujn orga, che guire'chtu, cade tejtu xnez-xnejztu, te gusanxtebtu narä, luxh dina jianxtebä sa'csi Xtadä sugaränä narä. ³³ Aguniä redidiidxre lojtu te cuedxi lastootu lo guedxliujre xcuentä. Lo guedxliujre sidejdpactu trabajw, colgusutip lastootu sa'csi narä abenä gaan loj guedxliujre.

17

Gunab Jesús lo Dios xcuent rexpejnpacni

¹ Che gulujx guniini loj rexpejnpacni redidiidxga, guläsnii lojni xhaguibaa, räjpni lo Dios:

—Xtadä, abidzujn or; gulä'p xpala'n xi'nlu te guiliä'pza xi'nlu xpala'nlu, ² sigajc ni badeedlu lojni yälrnibee loj guiraa reben guedxliuj, te gac gudeedni yälnbabajn par tejpas lo guiraa renani badeedlu lojni. ³ Redee rajp yälhabajn par tejpas; numbeereni luj ni najc tejtis GuebDios, näjza narä Jesucrist nani baxhallu lo guedxliujre.

⁴ 'Narä gulä'pä xpala'nlu lo guedxliujre, abaluxä dzuun nani baniidxlu gunä ree.

⁵ Naj Xtadä, gulä'p xpala'nä con luj, con bala'n, con yälrdimbicha' ni gopä galooli che gajdli guirixtiej guedxliuj.

⁶ 'Loj rebejn nani baniidxlu loä, ni gulelu lo reben guedxliujre, loj reni'c abasule'ä, abaluiä chu najclu. Xtenpaclu najcreni, baniidxlurenloä, luxh rapdzu'tzreni xtiididxlu. ⁷ Naj agucbeereni guiraa redidiidx ni guniä lojreni lojpaclu siäädni. ⁸ Sa'csi redidiidx nani baniidxlu loä, aguniä redidiidxga lojreni, luxh ahuililajzreni redidiidxga, agucbeepacreni lojlu biriä, ahuililajzreni lujpac baxhal narä.

⁹ 'Narä rniabä xcuentreni, dina guiniabä xcuent reben guedxliujre, ganaxtis xcuent renani abaniidxlu loä, sa'csi laareni najcreni xpejnlu. ¹⁰ Guiralii ni najc xtenä, najczani xtenlu. Guira'tiza ni najc xtenlu najczani xtenä. Agulä'pzareni xpala'nä.

¹¹ 'Narä diruna jia'nä lo guedxliujre, laareni sia'nurureni lo guedxliujre. Luxh narä siälä lojlu. Xtadä ni najc Dxanro, gucnäj renani baniidxlu loä con xtiididxlu,

nani baniidxlú loä te gunreni tejsi xhigab sigajcni riennu nurnu tejsi xhigab.¹² Che guyunááreni lo quedxliujre, gucnáá con xtiidxlú guiraa renani baniidxlú loä, luxh nicla tejreni di ninítloj, xtebtis nani gunijt te gusojb ni caj lo xtidx Dios.

¹³ 'Luxh naj sibisacä lojlu. Caniä rediidxre lal ni yu'ä lo quedxliujre, sa'csi rlazä guibaa lajzreni si'c ni rbaa lazä. ¹⁴ Abasule'ä xtiidxlú lojreni, luxh rebejn quedxliuj rdxe'chreni lojreni sa'csi direni gac bejn quedxliujre sigajc ni dizana gacä bejn quedxliujre. ¹⁵ Dina guiniabä cuäälurení lo quedxliujre, rniabä gudzucajlurení loj beñdxab. ¹⁶ Direní gac bejn quedxliuj, sigajc ni dizana gacä narä bejn quedxliuj. ¹⁷ Basyarení con xtiidxlú, sa'csi xtiidxlú najc didxgulipac. ¹⁸ Sigajc ni baxhallu narä lo quedxliujre, sigajcza ruxhaläreni te chääreni guideb quedxliuj. ¹⁹ Xcuentreñi rudedä lagajc narä, te näj laarení gacnayarení con xtidxgulipacu. ²⁰ Dina guiniabä xcuent laatisreni, rniabäza xcuent guiraa renani churu chalilajz xtidxä ni gusule'reni. ²¹ Rlazä gun guiraarení tejsi xhigab, sigajc ni rujnlu, Xtadä, si'c runäza; te sigajc ni yu'äza con luj, sigajcza churení con nuurnu, te gacbee rebejn quedxliuj luj baxhallu narä. ²² Yälrnibee ni baniidxlú loä, lagajc yälrnibeega badeñä lojreni te gunreni tejsi xhigab, si'cni riennu tejsi xhigab. ²³ Narä cayunnááreniuzuun, luj cayunnäjlu naräuzuun, te jiennu tejsiuzuun, te gacbee rebejn quedxliuj luj baxhallu narä, luxh sanälajzlurení si'cni sanälajzzalu narä.

²⁴ 'Xtadä, guiraa renani baniidxlú loä, rlazäza churení cadro chuä xhaguibaa, te fiireni xcälrnibeä nani baniidxlú, sa'csi huinälajzlú narä galooli che gajdli guirixtiej quedxliujre. ²⁵ Xtadä ni rujn cossa'ctis, di rebejn quedxliuj gumbeelu, luxh narä numbeälu, luxh redee agucbeezarení luj baxhallu narä. ²⁶ Aräpä lojreni chu najclu; sápäzaru lojreni te chu yälsanälajz sa' ni rajplu par narä nen lastoorení, te cuäzáza nen lastoorení.

¹ Che gulujx gunii Jesús rediidxga, huinäni rexpejnpacni dejtz gueu Cedró. Ro'c yu' xhiroob yuj cadro sojb guiraloj reyajg. Ro'c biu' Jesús näjza rexpejnpacni.

² Anajn Judas, nani guto' Jesús, caro rij Jesús con rexpejnpacni sa'csi si'csi'si'c rdxaag sa'reni ro'c. ³ Dxejcti Judas, che biääd lojni te cuaa soldad roman, naj rebixhojz ni rniabee, näjza refarisee, huinätinireni ro'c, ca'reni balguejd näjza lintern, näjza spaad näjza lans. ⁴ Ni'cni Jesús, sa'csi ananxgaani xhini'l sacni, gubigni lojreni, räjpni lojreni:

—¿Chu rguiiltu?

⁵ Räjpreni lojni:

—Jesús nani siääd quedx Nazare't.

Räjp Jesús lojreni:

—Laa naräni.

Näjza Judas ni bato'ni sugaränjirení.

⁶ Che gunii Jesús lojreni: "Laa naräni", biäxhanreni, biajbreni lo yuj. ⁷ Dxejcti gunabidxsac Jesús lojreni:

—¿Chu rguiiltu?

Dxejc räjjpzarení stehuält:

—Jesús nani siääd quedx Nazare't.

⁸ Räjp Jesús lojreni:

—Aguniä lojtu, laa naräni. Palga narärguiiltu, colgusaan jii redee.

⁹ Gunini rediidxga te gusojb rediidx nani guniini che räjpni: "Loj guiraa ni baniidxlú, nicla tejní di ninijt." ¹⁰ Dxejcti Simón Pedr, sa'csi ca'ni te spaad, guläänini, batiuugni diag ladbee xten xmos bixhojzroga. Laj mosga najc Malco. ¹¹ Dxejcti räjp Jesús lo Pedr:

—Guluchee spaad xtenlu nen xpaguinni.

¿La dina tedä trabajwduxh nani agunibee Xtadä tedä, ä?

Jesús nez loj bixhojzro

(Mt. 26:57-58; Mr. 14:53-54; Lc. 22:54)

¹² Dxejcti resoldaadga näjza comandant, näjza reguxhtis ni rniabee rexpejñ Israel, gunaaazreni Jesús baliibrenini. ¹³ Dxejcti ganid huinärenini lo Anás, sa'csi najcni xtdsueegr Caifás, luxh ijzga biäjl najc Caifás bixhojzro ni rniabee lo rebixhojz. ¹⁴ Caifás najc nani balijdx rexpejñ Israel nanab guet te nigui xcuent rebenguejdsga.

Cadro gunii Pedr dini gumbee Jesús

(Mt. 26:69-70; Mr. 14:66-68; Lc. 22:55-57)

¹⁵ Simón Pedr näjza stee xpejñpacni huinajl dejtz Jesús. Luxh numbee bixhojzro bejnga, biunäjzani Jesús lo xle' bixhojzro.

¹⁶ Bia'nti Pedr rolä'ga. Dxejc birii xpejnpac Jesús nani numbee bixhojzroga, guniini lo nani cayajp rolä'ga, te biu' Pedr nez lo le'ga.

¹⁷ Dxejcti räjp mos gunaa ni rcanäj rolä', räjpni lo Pedr:

—¿La et näjdi luj najclu te xpejnpac Jesús, ä?

Räjp Pedr loj gunaaga:

—¡Xho gacäni!

¹⁸ Dxejcti sa'csi cayacnalduxh, caguse'creni boo te cagucha'lajzreni. Näjza Pedr sugaränjreni, cagucha'lajzni ro guibooga.

Bixhojzro cayujn yälgunabdiidx lo Jesús
(Mt. 26:59-66; Mr. 14:55-64; Lc. 22:66-71)

¹⁹ Dxejcti gusloj cayujn bixhojzro yälgunabdiidx loj Jesús xcuent chuni'c nadj rexpejnpacni näjza xcuent xhini'c ruluiini.

²⁰ Dxejcti räjp Jesús lojni:

—Narä xhet xhiga'tzdi guniä rextidxä, guniäni lo guiraa rebejn guedxliuj. Basule'ä diidx nen rexquidobätzü näjza nen guidoro cadro re' guiraa rexpejn Israel, nícla tej diidx dina ninixhiga'tzädi. ²¹ ¿Xhicient cayujnlu yälgunabdiidxga loä? Gunabdiidx loj renani biejn diajg xhini'c guniä lojreni. Laareni najnreni xhini'c guniä.

²² Che gulujx gunii Jesús rediidxre, te rexpejn bixhojzroga huäaz loj Jesús, räjpni lojni:

—¿La si'c rudzu' bejn diidx loj bixhojzro, ä?

²³ Dxejcti räjp Jesús lojni:

—Palga xhet laadi guniä, baluui narä xhi diidxgxa nadj xhet laadi, niluxh palga laaca nadj ni guniä, ¿xhicient huuäzlu loä?

²⁴ Dxejcti guideb naliibni baxhal Anásni lo bixhojzro lo ni laa Caifás.

Gunisac Pedr dini gumbee Jesús

(Mt. 26:71-75; Mr. 14:69-72; Lc. 22:58-62)

²⁵ Sugasijc Pedr ro'guiboo, cagucha'lajzni, che räpjreni lojni:

—¿La et näjdi luj najclu te xpejnpac nigliiiga, ä?

Badzu'ni diidxgxa räjpni:

—¡Xho gacäni!

²⁶ Dxejcti te xmos bixhojzroga, sa'csi sa'nai nadj mos ni batiu' Pedr diajgni, räjpni lojni:

—¿La et lujdi ni bahuiä nen huert con laani, ä?

²⁷ Dxejcti räjp Pedr stehuält:

—Nicla gumbeäni.

Cuantis guniini si'c, guredxagajc te guidgaii.

Jesús nez loj Pila't

(Mt. 27:1-2, 11-14; Mr. 15:1-5; Lc. 23:1-5)

²⁸ Dxejc birinäjreni Jesús rolizj Caifás, huinärenini rolizj gubernadoor cadro laaza Pretorio, niluxh direni niu' ro'c sa'csi ameer guiliejn gubijdx, te di gacdxu-udxreni dxejc di gacdi gaurení lani pascw.

²⁹ Ni'cni birii Pila't lojreni räjpni lojreni:

—¿Xhi yälquij xten niguiire siädle'ctu loä?

³⁰ Dxejcti räjpreni lojni:

—Paru di niguiire niajc te ben latsiaj, dinu niopnäni ladznaa guejblu.

³¹ Räjp Pila't lojreni:

—Colchanäni, colhuii xho gunnätjuni yälguxhtis con lagajc xleiitu.

Dxejc räjp rexpejn Israel lojni:

—Di xleiitu gusaan ju'tnu te bejn.

³² Guniirení si'c te guzojb diidx nani gunii Jesús xcuent xho guetni.

³³ Ni'cni biusac Pila't neñ Pretorio, gure-jdxni Jesús räjpni lojni:

—¿La luj najclu reii xten rexpejn Israel, ä?

³⁴ Dxejcti räjp Jesús lojni:

—¿La lagajc luj rmiilu si'c, ä? O ¿laa yu' churení'c naj lojlu si'c?

³⁵ Dxejcti räjp Pila't lojni:

—¿Xhixh näj narä näcä te xpejn Israel? Lagajc reben lajdxlu näjza rebixhojz ba-teeedlu ladznaä. ¿Xhi bejnlu?

³⁶ Dxejcti räjp Jesús lojni:

—Xcälrnibeä dini gac yälrnibee sa' ni yu' guedxliujre. Paru nadj xcälrnibeä te yälrnibee sa' ni yu' guedxliujre, ala caguacua rexpenä te di tedä ladznaa rexpejn nani rnibee Israel. Naj di xcälrnibeä gac yälrnibee sa' ni yu' lo guedxliujre.

³⁷ Ni'cni räjp Pila't lojni:

—¿Reii najclu, ä?

Räjp Jesús lojni:

—Laaca najlu näcä reii. Par ni'cpac golä, par ni'cpacza biälä lo guedxliujre, partis gusule'ä didxliipac. Guiraa renani nadj didxlii, reni'c rucuadajgreni xtidhä.

³⁸ Räjp Pila't lojni:

—¿Xhini'c nadj didxlii?

Che guniini si'c gunisacni loj rexpejn Israel:

—Dina guidxälä nicla tej xtojl bejnre.
³⁹ Niluxh la'tu rajptu te costumbr, casob lani pascw, ruslaanu te bejñ ni yu' neñ latzguiib. ¿Xhi najtu? ¿La rlajztu guslaá ni najc reii xten rexpejñ Israel, ä?

⁴⁰ Dxejcti guiragajcreni guredxa', räjpreni:

—¡Na'c guslaalu niguiga! ¡Baslaa Barrabás!

Niluxh Barrabás najc te gubaan.

19

¹ Ni'cni gunibee Pila't gudijnreni Jesús con duu ni yu' guechguiib lojni. ² Bejn resoldaad te coronguejch, bazalrenini yejc Jesús. Dxejcti bahuajcwrenini te lad-moraad. ³ Dxejcti gusloj gubigreni lojni, te räjpreni lojni:

—¡Gubajñ par tejpas Reii xten rexpejñ Israel!

Dxejc huääzreni lojni.

⁴ Dxejcti birisac Pila't, räjpni lojreni:

—¡Colhuii! Acabááni nez lojtu, te gacbeetu dina guidxälä nicla tej xtojñi.

⁵ Dxejcti birii Jesús nez lojreni, yu' coronguejch yejci, najcwzaní lad-moraadga. Dxejcti räjp Pila't lojreni:

—¡Colhuii! ¡Aree niguire!

⁶ Ni'cni, che bahuui rebixhojzro näjza rexquixhajgreni lojni, guredxa'reni, räjpreni:

—¡Colgucuaani lo crujz! ¡Colgucuaani lo crujz!

Räjp Pila't lojreni:

—Lagajc la'tu colchanäni te gucuaatuni lo crujz. Per narä dina guidxälä nicla tej xtojñi.

⁷ Dxejcti räjp rexpejñ Israel lo Pila't:

—Nuurnu rajpnu te leii, luxh xcent leiiga, nanab guetni sa'csi najni najcni Xi'n Dio.

⁸ Che biejn diajg Pila't rediidxga, bidxejbruni, ⁹ biusacni neñ Pretorio, räjpni loj Jesús:

—¿Caro siäädlu?

Per xhet räjpdí Jesús lojni.

¹⁰ Dxejcti räjp Pila't lojni:

—¿La dilu guinii loä? ¿La dilu gan narä rapä yälrnibee te gucuaälu lo crujz, rapäza yälrnibee te guslaálu, ä?

¹¹ Räjp Jesús lojni:

—Xhetliidi yälrnibee niajplu loä paru dilu nica'ni xhaguibaali. Ni'cni bejñ nani

bato' narä lojlu rapduxhruni dojł loj ni rajplu.

¹² Ni'cni gudiil Pila't xho nuslaani Jesús, niluxh rexpejñ Israel rbedxaduxhrureni, räjpreni:

—Palga luj guslaalumi, dilu gac xamiigw reii César, sa'csi chutis ni rnii najcni reii, najcni xcontraat César.

¹³ Che biejn diajg Pila't rediidxre, gulääni Jesús, dxejcti gurej Pila't lo yagxhiil cadre rujnni yälgxuhtis, cadre laa Litóstroros con didx-griegw sálojni naga' guisa'c, con didx-hebreo laani Gabata. ¹⁴ Najcni dxej vispr lani pascw, si'cti läidxej, dxejcti räjpni loj rexpejñ Israel:

—Colhuii, aree xreiit.

¹⁵ Ni'cni guredxa'reni räjpreni:

—¡Suguetni! ¡Suguetnil! ¡Bacuaani lo crujz!

Dxejcti räjp Pila't lojreni:

—¿La sucuaá xreiit lo crujz, ä?

Dxejcti räjp rebixhojz ni rnibee lojni:

—Rutru reiidi rajpnu, Césartis najc xrei-inu.

¹⁶ Ni'cni bateed Pila't Jesús lojreni te chacuaarenini lo crujz.

Che bacuaarenini lo crujz

(Mt. 27:32-44; Mr. 15:21-32; Lc. 23:26-43)

¹⁷ Dxejcti cua'reni Jesús, biriini ro'c guideb nuuni xcrujzni, cheni bidzujñlireni te lajt ni laa lajt xten Calabeer, con didx hebreo laani Gólgota. ¹⁸ Ro'c bacuaarenini lo crujz. Bacuaazareni tio'p niguui lo stio'p crujz, tejganí te laad cuä' Jesús. ¹⁹ Dxejcti bacuaa Pila't diidx ni chäë yejc xcrujzni; rediidxga najc scree: “Jesús, ben Nazare't, Reii xten rexpejñ Israel.” ²⁰ Xhidajl bejñ bil diidx ni caj yejc xcrujzni, sa'csi lajt cadre bacuaarenini lo crujz najc gajxh ro' guejdxga, luxh didx hebreo, didx griegw, näjza didx latin bacuaareni rediidxga.

²¹ Dxejcti räjp rebixhojzro xten rexpejñ Israel loj Pila't:

—Na'c nucuaalu: “Reii xten rexpejñ Israelni”, laacaru nacuaalu: “Laani najni, najcni reii xten rexpejñ Israel”.

²² Dxejcti räjp Pila't lojreni:

—Nani abacuaá, abacuaá. Si'c jia'nni.

²³ Dxejcti resoldaad, che gulujx bacuaareni Jesús lo crujz, cua'reni rexhablojiaani bejnrenini tajp la', te cade tejreni cua'reni te la'ni. Luxh yu' stee

xhajbni ni laa tunica, nadibjni, guejnni hasta lo yuj guc-cheeni. ²⁴ Ni'cni räjpreni lo sa'reni:

—Na'c guitiäjznuni; do'o guidzujtnu te daad lojní, te don chu xten gacni.

Si'c bejnreni te gusojb xtiidx Dios cadro caj scree: "Batiäjsreni xhablojää; yejcza xhabä ni bia'n gudzujtreni daad."

Ni'cni bejn resoldaad recosre. ²⁵ Niluxh cuä' xcruz Jesús suga' xnanni, con bälj xnanni, ni laa Marii chääl Cleofas, näjza Marii Magdalen. ²⁶ Che bahuii Jesús loj xnanni, dxejc bahuiizani loj xpejñpacni nani sanälazduxhni, räjp Jesus loj xnanni:

—Nan, ¡bahuii, aro'c xi'nlu!

²⁷ Dxejcti räjp Jesus loj xpejñpacni nani sanälazduxhni:

—¡Bahuii, aro'c xnanlu!

Ni'cni dxejcli sinä nani najc xpejñpacni xnan Jesus rolizpacni.

Xho gujt Jesús

(Mt. 27:45-56; Mr. 15:33-41; Lc. 23:44-49)

²⁸ Ni'cni, sa'csi najn Jesus alagujc guiraa recos ni nanab gac te soob rextidx Dios, räjpni:

—Cayolä nis.

²⁹ Ro'c suga' te guejs vinagr, nenga bahuajdxreni te esponj dxejc bacuaarenini lo te yajg ni laa hisopo, gulärsreni esponjga batzugrenini ro'ni. ³⁰ Che gulujx gu' Jesus vinagrga, räjpni:

—Agulujxni.

Dxejcti basajb yejcni, baslaani xaimni.

Xhi bejn te soldaad lo Jesús

³¹ Dxejga najc dxe vispr xte lani pascw, che ru' mandaad par lanijga. Rexpejn Israel di rlajzreni nia'n rebejnga lo re-cruz, sa'csi dxe sabdga najc dxej ni rusila-jzreni. Ni'cni gunabreni lo Pilä't guxhalni chu qui'ch ni'reni te guetreni, te jiäjtreni loj recrujz. ³² Dxejcti bidzujn resoldaad, gudi'chreni guiro'p ni' nani caj te laad, sigajcza bennäjreni stee ni caj ste laadga.

³³ Che gubigreni lo Jesus, bahuireni alagu-jtni, direni nigui'ch ni'ni. ³⁴ Tej soldaadga baqui'tzni te lans ro' xcustiini, dxejc bixe'rejn näjza nis. ³⁵ Lagajc narä Juan bahuiä recosga, ni'cni caniä rediidxre, luxh diidxga guliipacni. Lagajc narä nanä didxguliipac caniä, te chaliiza lajztu xcientni. ³⁶ Sa'csi si'c gujc guira'ti, te guzojb xtiidx Dios cadro caj: "Nicla tej xtzujtni di guech." ³⁷ Sigajcza

lo stee guijtz caj diidxre: "Sidxelojreni loj nani biguijtz te lans."

Huicua'tzreni Jesús

(Mt. 27:57-61; Mr. 15:42-47; Lc. 23:50-56)

³⁸ Che gulujx recosga, dxejcti huij José, te ben Arimatea, nacxhiga'tzni te xpejn Jesús, sa'csi rdxejbni rexpejn Israel, ni'c huijni loj Pila't, gunabni loj Pila't te laani guiliätni Jesús lo crujz. Cuäjbza Pila't, dxejc biääd José gulätni Jesús, sanätini toogolga.

³⁹ Näjza Nicodem biääd dxejc, nani galoo huininäj Jesús te guxhijñ. Biädnäni si'cti tiu kil te dänejxh ni najc si'c yaal ni laa mirra näjza áloes.

⁴⁰ Dxejcti cuá'reni Jesús batejbrenini te la' lad lino, basälzareni däjga ni laa mirra con áloes, sa'csi si'c najc xcostumbr rexpejn Israel che rucua'tzreni te togool.

⁴¹ Gajxh cadro cuaj Jesús lo crujz, yu' te huert, neñ huertga yu' te bacoob si'c te biliää, cadro nicla tej bejn gajd guiga'tz.

⁴² Sa'csi abidzujn dxej vispr lani pascw xten rexpejn Israel, luxh gajxh suga' biliääga, nenga gudixhreni Jesus; si'c biga'tztini.

20

Gubansac Jesús loj rebengut

(Mt. 28:1-10; Mr. 16:1-8; Lc. 24:1-12)

¹ Primer dxej xten xmaanga, cäjyru, gajd lo quedxliuj jianij che huij Marii Magdalen lo baaga. Che bidzujn ro' baaga, bahuiini agubicaj guij ni suga' ro' baaga. ² Dxejcti ruxuñni gubi'ni te huiye'tzni lo Simón Pedr näjza lo stee xpejñpac Jesus ni sanälazduxhni, räjpni lojreni:

—Ahuilääreni Dad neñ baa, luxh dinu guidon caro sanärenini.

³ Dxejc biriguxuñ Pedr näjza stee bejinga, huijreni nez lo baa. ⁴ Ruxuñ guiro'preni. Niluxh stee bejinga ruxunduxhruni loj Pedr. Laani ganid bidzujn lo baaga. ⁵ Dxejcti guretänni te bahuiini neñ ba-biliääga. Bahuiini te laad naga' relajdtis nani bidej Jesus, luxh dini ni' neñ baaga. ⁶ Dxejc bidzungajc Pedr, biugajcni neñ baaga, bahuiini naga' relajdgä te laad. ⁷ Bahuiizani lajd ni guyu' yejcni, ni'c nie'tni saru, naga'ni te laad. ⁸ Dxejcti biu' stee bejinga nani bidzujn ganid. Che bahuiini neñ baaga, huililajzni gubansac Jesus. ⁹ Sa'csi gajdreni gacbee ni caj lo reguijtz, cadro caj nanab guibansacni loj rebengut. ¹⁰ Dxejc gubisac guiro'p rexpejñpacni rolizjreni.

*Baluiloj Jesús loj Marii Magdalen
(Mr. 16:9-11)*

¹¹ Laltis suga' Marii cuä' baaga, cayoonni. Ni'cni lał ni cayoonni, basajb lojni te bahuiini neq baaga. ¹² Dxejcti bahuiini lo tio'p xangl Dios, najcwreni ladnolbäj, sobga'reni, tejni nez cadro gojt yejc Jesús, steeni nez cadro gojt ni'ní. ¹³ Dxejcti räjpreni lojni:

—Nane', ḫxhicuent roonlu?

Räjpni lojreni:

—Sa'csi sanäreni Dad, luxh dina ganä caro huisa'nrenini.

¹⁴ Che gulujx guniini si'c, gubiréni, dxejcti bahuiini loj Jesús suga' ro'c, niluxh dini niembee Jesús. ¹⁵ Dxejc räjp Jesús lojni:

—Nane', ḫxhicuent roonlu? ḫChu rguiillu?

Marii bejn xhigab laa dade' ni rcanäj huertga, ni'c räjpni lojni:

—Dad, palga luj sanäluni, gunii caro gudixhluni te guiliäsáni te chanääni.

¹⁶ Dxejcti räjp Jesús lojni:

—¡Marii!

Dxejc gubiré Marii, räjpni nen xtidx hebreo:

—¡Raboni!

(Saloj diidxga "Mastr".)

¹⁷ Dxejcti räjp Jesús lojni:

—Na'c guiniazlu narä sa'csi gadna cha'a lo Xtadä xhaguiba. Huij loj rebetzä, huiye'tz lojreni, cha'a lo Xtadä, näjza Xtadtu, loj Xtiözä näjza Xtiooztu.

¹⁸ Dxejcti huij Marii Mađdalen, bidzu-jnni loj rexpejnpacni badeedni didxcoob, räjpni:

—Abahuiä lo Dad Jesús.

Räjpzani lojreni guiraa recos ni gunii Jesús lojni.

*Baluiloj Jesús loj rexpejnpacni
(Mt. 28:16-20; Mr. 16:14-18; Lc. 24:36-49)*

¹⁹ Che gojl gudxej, najcni dumingw, primer dxej xten xmaan, abiäudzu'tz ro lá' ro' yu' cadro tre' rexpejnpacni, sa'csi rdxejbreni rexpejñ Israel. Chela bidzujn Jesús, guzujni nez galäireni, räjpni lojreni:

—Suchu yälrbedxi lastootu.

²⁰ Che guniini si'c, baluigajcni renaanni lojreni näjza cuä' xcustiini. Ni'cni bibaduxh-lajz rexpejnpacni che bahuiireni lo Dad Jesús. ²¹ Dxejc räjp Jesús lojreni stehuält:

—Suchu yälrbedxi lastootu. Si'c ni bax-hal Xtadä narä, si'cza ruxhalä la'tu.

²² Che gulujx guniini rediidxga, balejbni yejcreni, räjpni, lojreni:

—Suguibajŋ Sprit Dyan xten Dios nen lastootu. ²³ Rextojl rebejn nani siällajztu, sibcajreni. Rextojl rebejn nani ditu jiällajz, siannäjreni redoijga.

Tomás bahuii lo Jesús ni gubansac

²⁴ Tomás, ni laaza Didimo, najcni te ret-zubitio'p xpejnpac Jesús. Rutini che biääd Jesús loj rexpejnpacni. ²⁵ Dxejcti räjp rexpejnpacni lojni:

—Abihuiinu loj Jesús, agubansaci loj rebengut.

Dxejcti laani räjpni lojreni:

—Palga dina fiä loj reñaani cadro caj seen xten reclaab, palga dina guqui'tzä bicuenää cadro guyu' claabga, guqui'tzäza naa cadro bixal cuä'ni, di lazä chalii gubansaci loj rebengut.

²⁶ Che gudejd xhujñ dxej, tresac rexpejnpacni nen yu', nadxaagza Tomás lojreni. Niäudzu'tz yu'ga, luxh chela gucbeereni abidzujn Jesús, guzujni galäireni, räjpni lojreni:

—Suchu yälrbedxi lastootu.

²⁷ Dxejcti räjpni loj Tomás:

—Baqui'tz bicuenäalu ree loj patñaä, basälza naalu cuä'äre, na'c ractio'p lajzlu, huililajzpac gubansaci loj rebengut.

²⁸ Dxejcti räjp Tomás lojni:

—¡Xtadä, Xtioozä!

²⁹ Dxejcti räjp Jesús lojni:

—Sa'csi abahuiilu loä, Tomás, huililajzlu. Chicbaa renani mase direni ffi, rililajzreni xtidxä.

Xhicuent bacuaani reguijtzre

³⁰ Xhidalroduxhru dzuun bejn Jesús nez loj rexpejnpacni, nani di nicaj lo guijtz.

³¹ Redzuunre nani bejn Jesús nani cuaj lo guijtzre cuajni te chalilajztu diidxre: Jesús najc Crist, nani cabätz rebejn jiääd, Xi'n Dios. Luxh che chalilajz te bejn xtiidxni, sajpni yälnabajŋ par tejpas.

Tomás ni laaza Didimo, näjza Natanael, nani siääd Caná xten Galilee, rexi'n Zebedeo, näjza stio'p rexpejnpacni.³ Dxejcti räjp Simón Pedr loj resa'ni:

—Chanaazä bälj.

Räjpreni lojni:

—Näjza nuure chonnu.

Dxejcti sääreni, huä'preni nen te barcw.

Guideb guxhijnga xhet bäljdi gunaazreni.

⁴ Che acayanij loj quedxliuj, suga' Jesús ro' nisdooga, di rexpejñni niembeeni. ⁵ Ni'cni räjp Jesús lojreni:

—Rexi'nä, ¿la xhet bäljdi rajptu, ä?

Räjpreni lojni:

—Xhet rajpdinu.

⁶ Dxejcti räjpni lojreni:

—Colgusäl xquixxhtu ladbee xten barcwga, te ro'c siniaaztuni.

Dxejcti bacuaareni guijxhga ladbee xten barcwga, dxejcti ameer diniajcdi nibääreni guijxhga ro'c sa'csi gudxadotzu'tzni bälj. ⁷ Dxejcti bejn nani sanälazduxh Jesús, räjp loj Pedr:

—Laa Dad Jesús.

Che biejn diajg Simón Pedr laa Dad Jesús, gotgajcni xhablojiaani sa'csi ladxhagiätis najcwni sa'csi canaaazni bälj, dxejcti gutiäjsni lo nisdoo. ⁸ Sgaii rexpejnpacni biädnäreni rebarcwga sa'csi ameer guidzujnreni ro' nisdooga, si'cti tegayuu metrtis cayäadx. Siädnäzareni guijxh guidxa rebälj. ⁹ Che biduzijnreni ro' nisdooga, bahui ireni re' guiboo, ro'c dzuub te bälj näjza yätxtiil cague'. ¹⁰ Dxejcti räjp Jesús lojreni:

—Coltaa gaii bälj nani entis gunaaztu.

¹¹ Dxejcti huij Simón Pedr, guläani guijxhga, guidxani bälro. Guyu' si'cti te gayuu garol con choj bälj nen guijxhga, niluxh dini niräsyä' mase guyu' xhidalduxh bälj neenni. ¹² Dxejcti räjp Jesús lojreni:

—Coltaa te gaukharejntu.

Nicla tej rexpejnpacni dini niabdiidx lojreni: “¿Chu luj?” sa'csi anajnreni laa Jesúsni.

¹³ Dxejcti cua' Jesús yätxtiil, badeedni lojreni, sigajcza rebälj.

¹⁴ Dee najc ni riojñ huält baluilojni loj rexpejnpacni, che gubansacni loj rebengut.

Jesús rninäj Simón Pedr

¹⁵ Che gulujx gudajwreni, räjp Jesús loj Simón Pedr:

—Simón xi'n Jonás, ¿la sanälajzrulu narä loj chu stee, ä?

Räjpni lojni:

—O'n, Dad, luj najnlu sanälazä luj.

Räjp Jesú lojni:

—Gojp rexilä'ä.

¹⁶ Räpsacni lojni ni rojp huält:

—Simón, xi'n Jonás, ¿la sanälajzlu narä, ä?

Räjpni lojni:

—O'n, Dad. Luj najnlu sanälazä luj.

Räjpni lojni:

—Gojp rexilä.

¹⁷ Räpsacni lojni ni riojñ huält:

—Simón xi'n Jonás, ¿la sanälajzlu narä?

Guc-huin lastoo Simón Pedr sa'csi gunabdiidx Jesús lojni chog huält: “¿La sanälajzlu narä?” Dxejcti räjp Simón lojni:

—Dad, luj najnlu guira'ti. Luj najnlu sanälazä luj.

Räjp Jesú lojni:

—Gojp rexilä. ¹⁸ Rniliápac lojlu, che gujclu bi'nru, lagajc luj rajcwlu xhajblu, rijlu cadrotis rlajzlu. Che anajclu bengool, susgaatislu naalu te gushuajcw ste'ca bejn xhajblu, te chanäreni luj cadre di rlajzlu.

¹⁹ Luxh diidxga gunii Jesús te cagusule'ni xho gugu'treni Pedr te guiliä'pni xpala'n Dios. Che gulujx guniini si'c, räjpni loj Pedr:

—Gudanajl narä.

²⁰ Che gubiré Pedr, bahuiini loj stee xpejnni, nani sanälajzru Jesús, siädnajlni dejtzreni. Lagajc bejnre ni gurej cuä' Jesús lo lult xchej, ni räjpozla loj Jesús: “Dad, ¿chuni'c najc nani guto'lú?” ²¹ Ni'cni, che bahui Pedr lojni, räjpni loj Jesús:

—Dad, deea', ¿xhi gun dee?

²² Dxejcti räjp Jesús lojni:

—Palga rlazä jia'nni che guibisacäli loj quedxliujre, ¿xhixh najcni? Basaanni. Luj gudanajl narä.

²³ Ni'cni bire'ch diidx lagajc loj resa'ni, di bejngu guet. Di Jesús niäjb lojni dini guet, alga räjpn: “palga rlazä jia'nni loj quedxliujre che guibisacäli lo quedxliujre, ¿xhixh najcni?”

²⁴ Luxh bejngu najc narä, xpejñ Jesús nani bahui loj guíraa recosre, nani bacuaazreni. Anadonnu didxliipac najc recos nani rniini.

²⁵ Yu'r u xhidalduxh dzuun ni bejn Jesús. Palga gucuaanu guiralii redzuun ni bejn Jesús, nicla lo quedxliujre di gal chu reguijtz cadre xcajni.

Redzuun Rexpej_n Dios

Siääd Sprit Dyan xten Dios te cuääzni nen lastootu

¹ Xamigwä Teófilo, abacuaä lojlu xcient guiraa recos nani bejn Jesucrist näjza nani baluui Jesucrist, che guslojlini, ² hasta dxejli ni huäjsni xhaguibaa. Gunibexgaani xhini'c gun renani guleni gac xpejnpacni. Sprit Dyan xten Dios baluui Jesucrist xhi guiniini lojreni. ³ Gudejd Jesucrist trabajwduxh, dxejcti gujtni. Dxejc gubangsacni lo rebengut, baluilojni lo rexpejnpacni. Tiuu dxej baluilojni loj rexpejnpacni balti huält te gacbeereni agubangsacni. Guniizani lojreni xcient xcälrnibe Dios.

⁴ Che gudejd tiuu dxejga, batojp Jesucrist rexpejnpacni, gunibeeni na'c guiriireni guedx Jerusalén, cuääzreni jiääd Sprit Dyan xten Dios nani aguniipac Dios jiääd. Räjpn:

—Dee abiejn diajgtu guniá lojtu. ⁵ Juan batiobnis con nis, luxh naj guxii dxej cayäadx dxejcrü siääd Sprit Dyan xten Dios te cuääzni nen lastootu. Si'c guirobnistu —räjpn:

Huäjs Jesucrist siini xhaguibaa

⁶ Lagajc dxejc che abidojpreni loj Jesucrist, gunabdiidxreni lojni:

—La naj gudedasclu yälrnibee lo rexpejn Israel, ä?

⁷ Dxejcti räjp Jesucrist loj rexpejnpacni:

—Di riäjäl gacbeetu xcient redxej näjza retiemp nani abasobxgaa Dios con xcälrnibeeni. ⁸ La'tu sica'tu yälrnibee che abiääd Sprit Dyan xten Dios nen lastootu. Dxejc chatie'chtu xtidä näjza rextzunä nen guedx Jerusalén, nen guiraa reguedx Judea, nen guiraa reguedx Samaria, näjza nen guideb guedlxliu —räjpn:

⁹ Gulujxtis gunii Jesucrist rediidxga, luxh lajni cahuii rebejn_n lojni huäjsni xhaguibaa, sa'csi gurejdx Diosni. Dxejc biääd te za, biu'nii nen zaga. Ro'cti diru rebejn_n nuhuii lojni. ¹⁰ Lajni cadxelodxi rebejn_n xhaguibaa cadro gunitloj Jesucrist, tiop angl xten Dios ni najcw ladnol suga' gajxh cadro suga'reni.

¹¹ Dxejc räjp reangl loj rebejn_n:

—Xhi rajctu ben Galilee? Xhicuent cadxelotu xhaguibaa? Abahuiitu xho

huäjs Jesucrist siini xhaguibaa. Lagajc si'c guibisacni —räjpreni.

Gulereni Matías ni nadj apostcoob

¹² Dxejc birii rebejn_n yejc dajne' ni laa Dan Oliib, siireni guedx Jerusalén. Dan Oliib suga' gajxh Jerusalén. Gusajrenini si'cni rnii leii sajc sareni dxej ni rusilajzreni. ¹³ Che biu'reni Jerusalén, biduzjreni ro' yu' cadre rbäzlaareni. Yu'ga nadj jiaa yejc stee yu'. Ro'c rbäzlaa Pedr näjza Jacoob, Juan, Andrés, Felipe, Tomás, Bartolomé, Mateo, Jacoob xi'n Alfeo, Simón nani laaza Zelote, näjza Judas bejtz Jacoob.

¹⁴ Ro'c yu' guiraareni näjza regunaa näjza Marii xnan Jesucrist näjza rebetzhuin Jesucrist. Cabejdx, canabreni loj Dios; tejsi nadj xhigab xten guiraareni.

¹⁵ Nadxagsa' te gayuu gajl bejn. Dxejcti huisulii Pedr galäiireni, räjpmi loj rebejn_n:

¹⁶ —Caniaä lojtu, resa'ä, nanabpac soob xtidx Sprit Dyan xten Dios ni bacuua toDavid lo guijtz xcient Judas, nani bato' Jesucrist loj renani gunaazni. ¹⁷ Gujc Judas sa'nu, bejnzani lagajc dzuuu ni biennu.

¹⁸ Cua' Judas meel ni badeedreni lojni che bato'ni Jesucrist. Che gulujx bejnni dzunguijdx ni bejnni, badedsacni meel lojreni. Gusiireni te la' yuj. Dxejcti lagajc Judas basäl duu guejnni, guzäbnajlni lo bej, gujtni. Gusagujni, dxejcti biräjs xque'ni birii guiraa rezini. ¹⁹ Che biejn diajg rebejn_n Jerusalén si'c, gulälajreni yujre Aceldama, ni sälöj yurejn. ²⁰ Nen guijtz ni laa Salmos abacuaa toDavid rediidxre:

Sujianxeb rolizjni;
na'c cuääzru bejn_n rolizjni;
näjza:

Suxca'za ste'ca niguii xtzuunni.

²¹ Naj nanab cuenu stee niguii —räjpn Pedr—. Nanab gacni tej ni gusanäj nuunu guideb redxej ni guyunäj Jesucrist nuunu,

²² dxejli ni gusloj batiobnis Juan hasta dxej ni huäjs Jesucrist xhaguibaa. Te gacnäj niguiire nuunu gusule'nu diidx gubangsacpac Jesucrist lo rebengut.

²³ Dxejc gulääreni tiop niguii lojreni, tejni laa José Barsabás ni rbälajreni Justo, steeni laa Matías. ²⁴ Gurejdx, gunabreni lo Dios, räjpreni:

—Dad, Dios, ni racbee lastoo guiraa rebejn_n, baluui loonu con ni nadj niguii ni agulelu loj guiro'p niguiire, ²⁵ te jiu'ni lo dzuuu

näjza lo yälapost ni basa'n Judas cheni sääni gärencia nejz —räjpreni.

²⁶ Dxejcti gudzujtreni daad te gulereni lo guiro'preni. Che biajb daad, gulereni Matías. Dxejc bigabnäj Matías stzubiteeb reapest te gujcreni tzubitio'p apost.

2

Biääd Spirit Dzan xten Dios

¹ Che bidzuujn dxej ni rajc lanij xten Pentecostés, tre' guiraareni tejsi lajt nen te yu', ² chela gusloj cayubej xhaguibaa si'c te beroduxh, bachajni guideb nen yu' cadro suga'reni. ³ Dxejc bahuiireni astoo carechx-teb xhidajl bale' casanij rebajlgä yejc tejga reni sojb ro'c. ⁴ Biu'ti Sprit Dzan xten Dios nen lastoo guiragajcreni. Dxejc gusloj cani-ireni garen-garen didxsaj si'ctisni badeed Sprit Dzan xten Dios guiniireni.

⁵ Neq redxejga, xhidajl rexpejn Israel ni sasanäjpac xtidx Dios bidzuujn guedx Jerusalén. Xhidajl lajt biriireni siäädreni. ⁶ Che biejn diajgreni guyubej beduxhga, bidojp rebejn xhidaalga, bachaag sa'reni. Rdxeloduxh reben xhidalga sa'csi cayejn diajgreni canii reapost xtidxsajpac cade tejreni. ⁷ Cadxelojreni räjpreni:

—¡Bahuilaare! ¿La et ben Galileedi re-nani canii, ä? ⁸ ¿Xhoxh riejn diajgnu cani-ireni xtidxpacnu si'ctis ni rniinu laadxnu, ä? ⁹ Najcnu ben nación Partia, ben nación Media, ben región Elam, ben Mesopotamia, ben Judea, ben estad Capadocia, ben región Ponto, näjza ben Asia. ¹⁰ Najczanu ben distrit Frigia, ben estad Panfilia, ben nación Egipto, näjza bejn ni siääd stelaad Cirene, te estad neñ Africa. Loj rebejn ni siääd Roma yu' reni najc xpejn Israel, yu'za reni bazuhijb lo Dios sa'csi rililajzreni si'cni rililajz rexpejn Israel. ¹¹ Yu'za ben Creta. Yu'za ben nación Arabia. Guiragajcnu riejn diajgnu caniireni xtiidxpacnu si'ctis ni rniinu laadxnu. Caniireni loonu xcient recos-roduxh ni cayujn Dios.

¹² Bidxeloduxh reben xhidaalga, dijiejn xhi xhigab gunreni. Räjpreni lo sa'reni:

—¿Xhi sälöj dee?

¹³ Dxejcti guyu' rebejn ni baxhiznäjreni, räjpreni:

—Agusojz redee.

Gunii Pedr loj rebejn

¹⁴ Dxejcti gusulii Pedr näjza tzubiteeb sa'nii, guredxa'nii guniini lo reben xhidaalga:

—Guejbtu, rexpejn Israel, nani rbäjz dis-trit Judea näjza guedx Jerusalén. Colcuadiajg diidx nani guiniä. ¹⁵ Xhet sojzduin si'cni cayujntu xhigab. Rsielu naj, entis gojl rcagaa. ¹⁶ Dxejc scree gunii Joel che guniini xtidx Dios agujc xchero. ¹⁷ Räjp Dios:

Sidzujn dxej che guxhalä Xsprit Dzanä cuääzni nen lastoo guiraa rebejn. Rexinganta näjza rexindxa'ptu sinii xtidxä xcient recos ni gajd gac. Rexi'ntu sinixcal, rextadgoldootu suluiloj bacal recos nani guluiä lojreni.

¹⁸ Guxhalä Xsprit Dzanä loj guiraa reni siädnajl narä.

Siniireni rediidx ni gudedä lojreni xcient recos nani gajd gac.

¹⁹ Suluüä lojtu balti senro xhaguibaa näjza lo guedxiuij.

Resenro ni gac najc rejn con guiboo, luxh guxh sire' si'c te za.

²⁰ Sicäjy loj gubijdx, sajc bääi si'c rejn. Sajc guiraa recosre, dxejcru sidzuujn dxeduxh che jäälsacä narä, Dios.

²¹ Dxejc guiraa rebejn nani cueedx guiniab gacnäj Diosreni, reni'c siliaa lo dojl.

²² Räjp Pedr lojreni:

—Rexpejn Israel, colcuadiajg xtidxä. Dios baluui Jesucrist, ben Nazare't, lojtu por recosro, remilagwr, reseen nani bejnni nez lojtu. Lagajc Dios badeed yälrnibee loj Jesucrist te bejnni redzunroga. La'tu nancheetu dee. ²³ Galooli ananchee Dios xhi guntu loj Jesucrist Xi'nni. Basaanza Dios bateedu Jesucrist ladznaa rebenguidx te bacuaareni Jesucrist lo crujz te bagu'trenini. ²⁴ Baspansac Dios Jesucrist, baslaa Diosni ladznaa yälgujt, sa'csi di niajcdi nica' yälgujtni par tejpas, sa'csi laani rnibee lo yälgujt. ²⁵ Che gubansac Jesucrist, guzojb diidx ni bacuaa David lo guijtz xcient Jesucrist. Räjp David lo Dios: Guira dxej ruhuiä lojlu, Dios.

Suga'lü xladbeä cayacnäjlu narä te di guidxejb lastoä.

²⁶ Ni'cni bibalajz lastoä, guniäza lojlu lacti rbaa lazä. Rbalazä sa'csi suhuiliu narä che guetä.

²⁷ Dizalu gusaan jia'n xaimä neñ baa.

Dizalu gusaan gudx tiejxh xi'nlu nani sanälajzlu.

²⁸ Abaluiilu loä xho guibañä par tejpas.

Sibalazduxhä sa'csi guibañnää luj,
si'c räjp David xcient Jesucrist.

²⁹ Räjp Pedr:

—Guyasi guiniä lojtu agujc xchero gjut David. Aguyutz'u tzni neñ baa. Sajc guihuinu baa cadro biga'tz David. ³⁰ Gunii David xtidx Dios. Che nabajnl David bia'n diidx gudeed Dios te xajgni ni guirilaj Crist, luxh laani gacni reii si'cni gujc David. ³¹ Sa'csi baluixgaa Dios recosre lo David, ni'c räjp David sibansac Crist lo rebengut sa'csi di Dios gusaan jia'n xaimni neñ baa, dizani gusaan gudx tiejxhni. ³² Guläs Dios Jesucrist lo rebengut. Nuure bahuiloonuni, najcnu testiigw gubañsacni lo rebengut.

³³ Gurejdx Dios Jesucrist. Naj nabajñ Jesucrist xhaguibaa, nabejni xladbee Dios ro'c canibeemi. Badeed Dios Xsprit Dxanni loj Jesucrist si'cni bia'n diidx. Naj abaxhal Jesucrist Sprit Dxan lo quedxliuj. Jesucrist cayujn guira'ti nani cahuitu, nani cayeijn diajgtu nadxej. ³⁴ Di David nij xhaguibaa, sa'csi lagajc David räjp:

Gunii Dios lo Dad nani rnibee loä: "Gurej xladbeä

³⁵ che guidzujnl dxej gudzugä guiraa reni rdxe'ch lojlu te gacebeereni luj rnibelu guira'ti."

³⁶ 'Rniliápac lojtu —räjp Pedr—. La'tu bacuaatu Jesús lo crujz. Ni'cni, colgacbee, guiraua xpen Israel, abejn Dios gac Jesúsre Dad nani rnibee loonu.

³⁷ Che biejn diajgreni laareni bacuaareni Jesús lo crujz, guc-huinduxh lajzreni. Räjpreni lo Pedr näjza lo reapost ni suga' ro'c:

—Aiilu, resa'nü, ýxhini'c jiennu naj?

³⁸ Dxejcti räjp Pedr lojreni:

—Colgusiech lajztu, colguirobnisza, sa'csi ni'c najc te seen rlajztu chanajltu Jesucrist, te si'c jia xtojltu. Dxej suniidx Dios Sprit Dxan cuäáz nen lastootu. ³⁹ Si'c rlajz Dios guniidx Xsprit Dxanni lojtu näjza loj rexí'ntu, näjza lo rebejñ ni rbäjz zijtru, näjza loj guiragajc rebejñ nani cueedxni —si'c gunii Pedr lo rexpejñ Israel.

⁴⁰ Dxejcru gunii Pedr xhidajlru diidx, balijdxni rebejñ:

—Colguirii loj reben latsaj ni re' lo quedxliuj naj, te laatu lo dojl.

⁴¹ Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti chon mil bejn.

⁴² Sanuutis rusooobreni diidx ni baluui reapost, bibalazduxhreni sa'csi bidxaag sa'reni con rexpejñ Jesucrist, gudaunäj sa'reni si'c gudaunäj Jesucrist rexpejnpacni, bidojpreni tejsi lajt te guniireni lo Dios.

Xho gubajñ rexpejñ Jesucrist galoo

⁴³ Bidxeloduxh guiraa rebejñ luxh bejn reapost redzunro, remilagwr. ⁴⁴ Bichaag sa'renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni. ⁴⁵ Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni. ⁴⁶ Guixe-guixee bidojpreni nen guidoro xten Israel. Tejsi nadjc rexhigabreni. Gudaunäj sa'reni rolizj cadejtejreni, guiraareni bibalaznäduxh sa'reni.

⁴⁷ Gula'preni xpala'n Dios. Guiraa rebejñ guni rexpejñ Jesucrist nadjc bensa'c. Guixe-guixee batie' Dios xhidajlru bejn nani rililajz xtiidxni, badzucajni rextojlreni, dx-ejc bachaagreni lo rexpejñ Jesucrist.

3

Biajc niguii nani racxhuu ni'ni

¹ Guyu' te dxej sää Pedr näjza Juan nez loj guidoro si'cti rcachon gudxej. ² Guyu' te niguii nani racxhuu ni'ni, digacdi sani che gojllini. Guixe-guixee rile'c bejn niguiiga ro' puertroga xten guidoro. Puertroga laa Sacrú. Ro'c rbejni rniabni gojn lojreni riu' guidoo. ³ Che bahuiini agoj jiu' Pedr näjza Juan neñ guidoroga, gunabni te gojn lojreni. ⁴ Dxejcti bahuui Pedr näjza Juan lojni. Räjp Pedr lojni:

—¡Bahuui loonu!

⁵ Che biejn diajg niguiiga xtidx Pedr, bahuui lojreni sa'csi naani sudeedreni meel lojni.

⁶ Räjp Pedr lojni:

—Xhetliidi meeldi rapä, nani rapäties sunidxä lojlu. Xcient xcälrnabee Jesucrist, ben Nazare't, rniä lojlu: ¡Gusuli! ¡Gusaj! —räjpni.

⁷ Dxejcti gunaaz Pedr naani, guläsmini. Biligajc ni'ni, gusutijp ni'ni. ⁸ Huisuyälni, gusajni. Biunäjni Pedr näjza Juan neñ guidoro. Rsiajni, rtiásni, calä'pni xpala'n

Dios. ⁹ Bahuii xhidajl bejn lojni nen guidoro, rsajjni, calápzani xpala'n Dios. ¹⁰ Biembeereni laa niguii ni rbej ro' puerro xten guidoro, rniabni gojn. Guiraareni bidxeloduxhreni bahuiireni xhi gusajc niguii ni gucxhuu ni'ni.

Baluii Pedr xtidx Dios nen cordoor xten guidoro

¹¹ Ro' guidoroga yu' te cordoor ni laa Cor-doors xten Salomón. Ro'c suga' Pedr näjza Juan, naztzu'tz niguiiga naareni. Ruxun guiraa rebejn bidzujn nen cordoorga. Bidxe-lojreni sa'csi arsaj niguii ni gucxhuu ni'ni. ¹² Che bahuii Pedr lo rebejn räjpni lojreni:

—¿Xhicuent rdxeloj guejbtu, rexpejn Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcälrnibee Jesucrist biajc ni' niguiire. ¹³ Xtiooznu, ni nadj Xtiooz toxtadgoldoonu Abram, toxtadgoldoonu Isaac, näjza toxtadgoldoonu Jacob, lagajc Diosga abadeed yälrnibee loj Xi'nni Jesús. Niluxh la'tu bateedtuni ladznaa reguxhtis. Che rlajz Pila't ni rnibee nuslaa Jesucrist, ditu nícajñ niriini, alga guniyajtuni nez loj Pila't. ¹⁴ Niluxh la'tu baro'ntu Xi'n Dxan xten Dios nani rujn ganax dzunsa'c. Alga gunabtu birii te niguii nani bagu't bejn. ¹⁵ Jesucrist rudeed yälñabajn, luxh la'tu gunabtu bacuwareni Jesucrist lo crujz. Gulássac Dios Jesucrist lo rebengut. Bahuiloonu nabajn Jesucrist, nadjcnu testiigw gubansac Jesucrist lo rebengut. ¹⁶ Cahuiitu loj niguiire nani gucxhuu ni'ni, luxh rumbeetuni. Xcälrnibee Jesucrist abasiajc niguiire, sa'csi huililajzni. Sa'csi huililajznu xtidx Jesucrist, ni'c biajcni te nadjcni si'cni rhuiituni naj.

¹⁷ 'Rexpejn Israel, narä nanä di'tu niacbee, diza rexcuxhtistu niacbee laa Xindan xten Dios ni bacuatu lo crujz.

¹⁸ Scree gujc te guzojb xtidx Dios ni cuaj lo guijtz aguja xchero. Diidxre bacuua reniguii ni gunii xtidx Dios, Crist xten Dios sidejd trabajwduxh. ¹⁹ Ni'cni colsiechtlajztu, colguibi' loj Dios te guibicaj xtojltu. Dxejc susiälyu Dios lastootu, sujnni gac nacoob guira'ti, si'cni bia'n diidx gacni. ²⁰ Lojtu suxhalza Dios Jesucrist nani rnibee, nani agulen galooli. ²¹ Naj nungäjl jia'n Jesucrist xhaguibaa dxejli guscoob Dios guiralii recos si'cni bia'n diidx gac, si'cni gunii

Dios lo reniguii nani gunii xtiidxni lo retoxtaggoldootu agujej xchero. ²² Scree gunii toMoisés lo retoxtaggoldoonu, räjpni: "Xtadnu Dios suxhal te niguii sa' narä nani cueni lo resa'tu. Siniini xtidx Dios. Colgusobdiajg guiralii diidx nani guiniini lojtu. ²³ Renani di gusooob rextiidxni, sinitlojreni, direni gac rexpejn Dios."

²⁴ Räjpza Pedr:

—Sigajcza agunii guiralii reniguii nani gunii xtidx Dios. Si'c agunixgaa toSamuel, näjza guiraa reniguii ni siädnajlni, xcuent recos ni cayajc nen redxejre. ²⁵ La'tu nadj xajg reniguii ni gunii xtidx Dios. La'tu biannajtu diidx nani gunii Dios loj retoxtaggoldoonu. Bia'n diidx, räjp Dios loj toxtadgoldoonu Abram: "Jiädjiaj te xajglu ni guspalaždugh reben guedlxliuj, sa'csi suslaanireni lo dojl." ²⁶ Dxejcti ganiddoo lojtu baxhal Dios Jesucrist te guibaaj lajztu che gusiech lajztu, te na'cru guntu dojl —räjp Pedr.

4

Baluii Pedr näj Juan xtidx Dios loj reguxhtis

¹ Lal ni caniireni lo rebejn, ro'c bidzujn rebixhojz xten Israel näjza nani rnibee lo resoldaad xten guidoro näjza resaduceos.

² Bidxe'chdukhreni sa'csi cagulidzxreni rebejn, cayäjpreni:

—Sibansac rebejn lo rebengut sa'csi gubañsac Jesucrist lo rebengut.

³ Gunaaz reguxhtisreni, biäurení sa'csi agudzej luxh abiäu jusgaad. Nen latzguiib barareni yääl. ⁴ Xhidajl reni biejn diajg xtiidxreni huililajz xtidx Dios. Si'cti gaii mil niguii huililajz xtidx Dios.

⁵ Che bara yääl, bachaag sa' guiraa rebengool, renani rnibee guedx Jerusalén, näjza rebejn ni ruluii leii, ⁶ näjza Anás ni rnibee guiraa rebixhojz, näjza xpagojzní ni laa Caifás, näjza Juan, näjza Alejandro, näjza guiraa reniguii ni nadj sa' rebixhozro ni rnibee. ⁷ Gunibeereni biääd Pedr näjza Juan gusuj galäireni te gunabdiidxreni lojreni:

—¿Chu xcälrnibee rajptu? ¿Chu lajbasä'ttu te basiajctu niguiire?

⁸ Dxejcti sa'csi cayu Pedr diidx ni canii Sprit Dxan xten Dios nen lastooni, räjpni lojreni:

—Caniä lo guejbtu, reguxhtis näjza rebengool xten rexpejn Israel, ⁹ palga canabdiidxtu xhicient gucnäjnu niguui nani gucxhuu ni'ni, palga canabdiidxtu xho basiajcnu niguuiiga, ¹⁰ gusule'nu xcient dee te gacbeetu te gacbeeza guiraa rexpejn Israel. Xtidx Jesucrist najc yälrnibeduxh. Diidxga abasiajc ni' niguire, xhet rajcdini suga'ni nez lojtu. La'tu abacuatu Jesucrist lo crujz, niluxh Dios guläsni lo rebengut. ¹¹ Di'tu minälajz xtidx Jesucrist. Laani najc si'c te guij nani rbäcajtu che runcheetu te yu'. Per Dios abejn najc Jesucrist si'c guij nani mazra nacs'a', nani guyu' squuin xte yu'. ¹² Xtebtis Jesucrist ruslaa bejn lo dojl, ruti stee bejn lo quedxliuj nani baxhal Dios te guslaani bejn lo dojl —si'c räjp Pedr.

¹³ Che biejn diajreni xtidx Pedr, bidxelojreni sa'csi di Pedr näjza Juan guidxejb, dizareni guituuy. Dxejcti räjp rebixhojz ni sajcru lo sa'reni:

—DIRENI GANDUXH GUIJTZ, BEJNTISRENI.

Dxejcti gucbeereni gusanäj redee Jesucrist, lojni biseedreni. ¹⁴ Bahuiiza rebixhojz lo niguui ni abiajc ni'ni, sugaränjni guiro'preni. Ro'cti xhetru gujcdi gunii rebixhojz sa'csi laaca bejnreni. ¹⁵ Dxejcti gunibee rebixhojz birii guidxojnreni telaad te bij rebixhojz diidx ensilaareni. ¹⁶ Räjpreni lo sa'reni:

—¿XHI JIENNÄÄNU RENIGUIIRE? Guiraa reben Jerusalén anajn xcient dzunroduxhre ni cayujnreni. Digacdi gucuatzlaaznuni. ¹⁷ Per te di guire'ch xtidx Jesucrist ste'ca guejdx, do'o gulíjdxnu guidxojnreni te na'c guiniiruren xtidx Jesucrist ste'ca guejdx.

¹⁸ Huixisac rebixhojzreni. Dxejcti räjpreni lojreni:

—NA'C GULURUTU XTIDX JESUCRIST, NA'C RU GUINIITU XTIIDXNU.

¹⁹ Dxejcti gunii Pedr näjza Juan, räjpreni lojreni:

—¿COLGUINII LOONU CHU XTIIDX SAJCRU GUICUAIDIAGNU? ¿XTIIDX LA'TU, O XTIIDX DIOS? ²⁰ Digacdi gusäunu ro'nu. Nanabpac gusule'nu diidx xcient recos nani abahuiñu näjza rediidx ni abiejn diajgnu.

²¹ Balidsac rebixhojzreni te na'cru guiniireni xtidx Jesucrist. Dxejcti baslaa rebixhojz guiro'preni, sa'csi xhetru niajcdi niujnreni lo Pedr näjza Juan, sa'csi canii rebejn bejnreni te dzunsa'c. Xhidajl rebejn gulä'pza

xpala'n Dios sa'csi bahuiireni xhini'c gujcro'c. ²² Sa'csi niguui ni basiajcreni xcient yälmilagwr agudejdni tiuu ijz.

Guredx-gunab rexpejn Jesucrist lo Dios

²³ Che baslaa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz näjza rebengool lojreni. ²⁴ Che biejn diajg rexpejn Jesucrist xtiidxreni, tejtis xhigab bejnreni guredx-gunabreni lo Dios, räjpreni:

—XTADNU DIOS, NANI BENCHEE XHAGUIBAA näjza quedxliuj näjza nisdoo näjza guira'ti ni yu' lojreni, neñreni, ²⁵ nani bejn basoob toDavid xtidx Sprit Dxan te bacuaani xtiidxlu, räjpn:

¿XHICIENT GUYUDUXH REBEÑ QUEDXLIUJ YÄRSIA?

¿XHICIENT BEJN REXPEJN ISRAEL XHIGAB NI XHET SAJCDI?

²⁶ Bidxagsa' rereii lo quedxliuj näjza reguxhtis xten reguejdx te gudxojnreni xtzun Dios näjza xten Dad Crist nani baxhal Dios, si'c gunii toDavid.

²⁷ 'Aguozjb diidxre, sa'csi lo guejdxre bidxagsa' Herodes näjza Poncio Pila't näjza rexpejn Israel näjza rebenzijt nani di gac xpejn Israel. Bidxechnäjreni Xi'nlu nani najc Crist ni baxhallu. ²⁸ Naj abejnreni dzunguidx si'cni galooli guniilu gac. ²⁹ Naj Guejblu Xtiosnu, bahui xho cagusacs'reni nuure, gucnäj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejyulu. ³⁰ Baniidx xcälrnibeelu loonu te guisajcnu rebejn, te jienzanu redzunro, remilajgwr con xcälrnibee Xi'ndxanlu Jesucrist.

³¹ Che gulujx gurejdxreni lo Dios, gusloj canibsez yu' cadro tre'reni, cayac si'c te xu. Dxejcti biääd Sprit Dxan xten Dios basutijpruni lastooren. Dxejcti diruren i nidxejb guniireni xtidx Dios.

Rudeedreni xhixtenreni lo sa'reni

³² Guiraa renani huililajz xtidx Dios, tejsi xhigab bejnreni. Rut chu tejdiren bejn guinibexte xhixtemni: bachaagreni sa' rexhixtenreni te xca' guiraareni nani rquiinreni. ³³ Gucnäj Dios reapost, gusutz'zreni bijreni diidx bahuilojreni loj Jesucrist che gubansacni lo rebengut. Gucnäj Dios guiraa rexpejn Jesucrist, luxh

gopduxh reben guejdx respe'treni.³⁴ Ni'cla tejreni di niäädx xhixtenni sa'csi renani gojp xyujni, rolijzni, bato'renini, dxejcti biädnäreni xcuentni,³⁵ badeedreni meelga lo reapost. Dxejcti gudis reapost meelga lo guiraa renani rquinni.³⁶ Guyu' te niguui ni laa José. Lajdxni nadj Chipre, ni re' lo nisdoo. Najcni sa' rexamil levita. Reapost gulälajni Bernabé (ni sälöj xtiidxreni bejn ni rbecdxi lajz sa'ni).³⁷ Scree gulälajrenini sa'csi bato'ni te la' yuj xtelli, dxejcti badeedni meel ni cua'ni lo reapost.

5

Ananías näj chäälni rujin doj

¹Guyu' stee niguui ni laa Ananías. Chäälni laa Safira. Bato'reni te la' yuj.² Niguiire biannäjni gala' meel, dxejc sgala' meelga badeedni lo reapost si'c guiraa xcient yujux luxh chäälni nanchee xhi cayujnni.³Dxejcti räjp Pedr lojni:

—Ananías, ¿xhicuent rusooobl xtidx Satanás ni rnibee lo rebendxbab, ä? ¿Xhicuent rlajzlu gusgueelu Sprit Xtan xten Dios? Biannäjlu gaii meel ni cua'l u che bato'l u te la' yuj.⁴ Che gajdlu guto' yujga, xtenluni. Che bato'l u yujga, ¿la xhet xtendilu meel ni cua'l u? ¿Xhicuent bejnlu xhigab nen lastoolu gunlu dee? Loj Dios gumiilu didx-xhii, xhet loodinu.

⁵Che biejn diajg Ananías xtidx Pedr, bia-jbni lo yuj, gujtni. Bidxebduxh rebejn che biejn diajgreni xhi gusajcni.⁶Sas gubig gaii bi'n batejbreni Ananías neñ lajd. Dxejcti sanärenini huicua'tzrenini neñ baa.

⁷Pet agujc choñ or gujtni chela bidzujn chää'l Ananías. Dini gan agujt chäälni.⁸Räjp Pedr lojni:

—Guni, ¿la bato'tu xyujtu si'cni naj chäällu hujjni, ä?

Räjp Safira lojni:

—O'n, si'c hujjni.

⁹Dxejcti räjp Pedr lojni:

—¿Xhicuent bejnlu tejsi xhigabguijdx con chäällu? ¿Xhicuent rlajzlu gusgueetu Sprit Xtan xten Dios? Ro lä' siääd re-nani huicua'tz chäällu. Naj näjza luj chacua'tzreni neñ baa.

¹⁰Si'ctis biajb Safira, gutgajczani. Dxejcti bidzujn rebi'n, bahuiireni agujtni. Dxejcti guläsrenini, biriireni huicuatgac-jcrenini cuä' baa cadro biga'tz chäälni.

¹¹Bidxebduxh guiraa rexpejn Jesucrist, näjza guiraa rebejn nani biejn diajgni recosre.

Bejn repost xhidajl redzunro, remilagwr

¹²Xhidajl redzunro, remilagwr bejn reapost nez loj rebenguejdx. Nadxaag sa' rexpejn Jesucrist, caguchaagreni diidx nen cordoor ni laa Salomón.¹³ Guyu' xhidajl bejn ni di nuchaag lo rexpejn Jesucrist sa'csi bidxejbreni guchaagreni lojreni. Rebenguejdxga guläpduxhreni xpala'n rex-pejn Jesucrist.¹⁴ Neñ redxejga xhidualuxh rebejn huililajz xtidx Jesucrist, niguui sigajc gunaa.¹⁵ Dxejcti gulääreni lo nezyuj rebejn nani cayacxhuu. Siädnä rebejn benracxhuu naga' lo da', te gaxäjsi ted xpala Pedr yejcreni che ted Pedr ro'c, te si'c jiajcreni.¹⁶ Guedx Jerusalén bidzujn xhidajl rebejn ni siääd ste'ca guejdx. Biädnäreni rebejn ni cayacxhuu näjza balti bejn ni yu' beñdxab neñ lastooreni. Con xcälrnibee Jesucrist basiajc reapost reben racxhuu, guläázareni rebendxbab neñ lastoo balti bejn.

Gudejd repost trabajw

¹⁷Dxejcti bidxechlajz bixhojz ni rnibee, näjza reniguii ni laa saducee, sa'csi calä'p rebenguejdx xpala'n reapost sa'csi basia-jcreni reben racxhuu.¹⁸ Gunaaazreni reapost. Basäurenini neñ latzguuib.¹⁹ Niluxh yäälgä, biääd te angl xten Dios, baxhalni ro' latzguuibga. Dxejcti guläáni reapost neñ latzguuib. Räjpni lojreni:

²⁰—Colchäj guidoro. Ro'c colguinii lo re-bejn xho gac guibañnäjreni Dios par tejas.

²¹Che biejn diajgreni si'c, rsildooru biu'reni neñ guidoro, ro'c baluiireni xtidx Dios lo rebejn.

Dxejc bixhojz nani rnibee, näjza rebengool, bachagsa'reni gurejdxreni guiraa reguxhtis xten guidoo, näjza guiraa reguxhtis xten rexpejn Israel. Dxejcti gunibeereni jiädnä reguixhajg reapost nani biäu neñ ladzguuib.²² Che bidzujn reguixhajg latzguuib, bahuii reguixhajg neñ latzguuibga, niluxh rut yu'di neñ latzguuib. Che gubi'reni biädnäreni diidx, räjpreni loj reguxhtis:

²³—Che bidzujnu latzguuib, niäudzu'tz ro' latzguuib luxh resoldaad ni cayajp ro' latzguuib suga' guiro'p laad. Che baxhalni ro' latzguuib, rut yu'di neñ latzguuib.

²⁴ Che biejn diajg bixhojz ni rnibee, näjza capitán nani rnibee resoldaad xten guidoro, näjza rebixhojz, ben tio'p lajzreni, räjp lo sa'reni:

—¿Xhini'c gujc? ¿Xhoni gac naj? —räjpreni.

²⁵ Dxejcti bidzujn te niguii, räjpni lojreni:

—Reniguii ni basäutu nen latzguiib, areni suga' nen guidoro, luxh caguluiireni rebejn —räjpni.

²⁶ Dxejcti sanä capitán xten resoldaad rexuxhtis guidoro te biädnäreni reapost, luxh direni nusacsí reapost sa'csi rdxejbreni nucuaareni guij yejcreni. ²⁷ Che bidzunñäreni reapost, räjpreni suurení nez loj reguxhtis xten Israel, sas gunii bixhojz ni rnibee, ²⁸ räjpni loj reapost:

—¿Et agunibeenu lojtu na'cru guiniitu xtidx Jesucrist? Xhoxh naj cagutie'chtu rediidxga lo guiraa rebejn nen guedx Jerusalén. La'tu rlajztu cuaquijtu nuure bagu'tnu Jesucrist.

²⁹ Dxejc räjp Pedr näjza reapost lojreni:

—Nanabpac gusoobnu xtidx Dios, lacuua gusoobnu xtidx bejn. ³⁰ Bagu'ttu Jesucrist che bacuaatuni lo crujz. Niluxh Xtios xtadgoldoonu guläsmi lo rebeengut. ³¹ Naj agule'c Diosni xladbeení cadro rnibeeni, abadeedza Dios yälrnibee loj Jesucrist te guslaani nuure, te si'c rlajzni guibicaj xtojl guiraa rexpejn Israel nani gusiechlajzreni. ³² Bahuiloonu xhi bejn Dios. Ni'c cagusule'nu. Nadoncheenu Sprit Dxan xten Dios cayacnäj nuure te gusule'nu rediidxre. Badeed Dios Sprit Dxan xtelli lo guiraa renani susoob xtiidxni.

³³ Che biejn diajg reguxhtis rediidxga, bidxechduxhreni, rlajzreni nugu'treni reapost.

³⁴ Dxejcti huisulii te niguii ni laa Gamaliel, nani najc te farisee nani rulului leii xten Israel, rebejn rapduxh respe't dade'ga. Gubnibee Gamaliel guirii reapost nen yu'ga.

³⁵ Dxejcti räjp Gamaliel lo rebixhojz:

—Guejbtu rexpejn Israel, colyensa'c xhigab xhini'c rlajztu gunnäjtu reniguiire.

³⁶ Colzaa lajztu gajd gac xchej guyu' tej ni laa Teudas, räjpni rnibeduixhni. Dxejc huinajl tajp gayuu bejnni. Che bagu'trenini, bire'ch guiraa rexpejnni, xhetru bejndiri. ³⁷ Nen ijz ni guyu' cens, biriiza Judas ni siääd Galilee. Dxejc gurejdxni xhidajl

bejn ni huinajlni. Bagu'tza bejnni, dxejcti bire'chza guiraa reni huinajlni. ³⁸ Naj rniä, colguibicaj, colgusaan reniguiire, rexpejn Jesús. Palga guejbcareni cayujnreni dzuunre, xtebcani sinítlojni. ³⁹ Palga xtzuuun Dios ni cayujnreni, digacdi guscuääznu dzuunga, sa'csi guidilnu guidxe'ch Gueb Dios loonu.

⁴⁰ Bichaglajz rebixhojz xtiidx Gamaliel. Gurejdixreni reapost, dxejcti gudijnreni reapost, gunibeereni loj reapost na'cru guiniireni xtidx Jesús. Dxejc baslaarenini. ⁴¹ Biriitireni nez loj rebixhojz. Cabaduxh lajzreni sa'csi gujc gudejdreni trabajw xcient Jesucrist. ⁴² Guixe-guixee lałtis baluiireni xtidx Jesucrist nen guidoro näjza rolizj bejn. Cagusule'reni diidx lo rexpejn Israel:

—Jesús najc Crist nani cabääztu jiääd.

6

Gulereni reniguii ni gudeed yätxtiil lo rexpejn Jesucrist

¹ Nen redxejga, xhidalro gujc rexpejn Jesucrist. Niluxh gusloj camojm rexpejn Jesucrist nani rnii didx griegw. Räjpreni:

—Xhet laadi cayujn rebejn ni rnii didx hebreo. Rebiuud nani rnii didx hebreo rca'ru loj rexpiuudnu. Rebiuud ni rnii didx hebreo rca'ru xhi gaureni che rguisreni xhi gau rebiuud guixe-guixee.

² Dxejcti batie' guitzubitio'p reapost guiraa rexpejn Jesucrist, räjpreni lo guiraareni:

—Et laadi guisaannu guluiinu xtidx Dios te quisnu xhi gau rebiuud. ³ Ni'c nanab cuetu lo resa'tu gajtz niguii nani najntu najc bensa'c, nani rbäjza Sprit Dxan xten Dios nen lastooreni, nani yu' xcäriejnreni. Reniguiire quis xhi gaureni. ⁴ Te si'c sajce chanutis guiniabnu lo Dios, guiluiizanu xtidx Dios lo rebejn.

⁵ Guiralii rebejngá bidxaglajzreni diidxga. Dxejcti gulereni Esteban, te niguii ni rilajz-pac xtidx Dios, rbäjza Sprit Dxan xten Dios nen lastooni. Gulezareni Felipe, Prócoro, Nicánor, Timón, Parmenas; gulezareni Nicolás nani siääd guedx Antioquía. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist. ⁶ Sas biädnä rexpejn Jesús guigajtz niguiiga lo reapost. Dxejcti guredx-gunab reapost

lo Dios xcuent reniguiiga, batzuubreni naarení yejc reniguiiga si'c te seen abiu'reni lo xtzunreni.

⁷ Birechduxh xtidx Dios. Xhidajl ben Jerusalén huililajz xtidx Dios, näjza xhidajl bixhojz.

Gunaazreni Esteban sanärenini lo rebixhojz nani rnibee

⁸ Gucnäduxh Dios Esteban, bejnni redzunro, remilagwr nez lo rebejn. ⁹ Dxejc reben guidoo ni laa Libertados gusloj cadilnäj Esteban. Lojreni nadxaag ben Cirene, näjza ben Alejandría, näjza gaii ben Cilicia, näjza sgaii bejn ni siäad reguedx Asia. ¹⁰ Reniguiire di niajcdi nuzejcreni diidx lo Esteban, sa'csi nasinduxhni, luxh cayacnäj Sprit Dxan xten Diosni. ¹¹ Dxejcti baquilreni sgaii niguui ni di gac xpejn Jesús, te rájpreni:

—Biejn diaagnu caniyaj Esteban to-Moisés näjza Dios.

¹² Scree gujc bache'chreni rebejn näjza rebejn ni ruluii leii näjza rebengool. Dxejcti bachagsa'reni, gunaaazreni Esteban. Huinärenini lo reguxhtis xten Israel. ¹³ Dxejcti biädnäreni reniguii nani baquilreni te gunireni didx-xhii. Rájp reniguiire:

—Entis rniyaj Esteban leii xten to-Moisés näjza guidodxanre. ¹⁴ Abieijnza diaagnu gunii Esteban: “Jesús nazareno sutzujl guidoro, suchazani leii nani baniidx to-Moisés loonu.”

¹⁵ Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

7

Diidx ni basule' Esteban lo rebixhojz

¹ Dxejcti rájp te bixhojz nani rnibee lo Esteban:

—¿La gulii si'c guniili, ä?

² Rájp Esteban lojreni:

—Colgucuadiajg rextidxä, guejbü dad, näjza resa'ä. Xtoznu ni saduxh, ni rnibee, baluiloj lo toxtadgoldoonu Abram che gulätzni Mesopotamia, che gajdni chaläjz nen guedx Harán. ³ Rájp Dios loj toAbram: “Birii lajdxtu, basa'n guiraa resa'lü. Huij cadrotis gulüä lojlu” ⁴—rájp Esteban—. Dxejcti birii toAbram lajdix reCaldeos. Huilätzni guedx Harán. Che

gujt xtadni, biädnä Dios toAbram nez ree, cadro rbääznu naj. ⁵ Di Dios nuzalajz nicla tla' yuj cadro suu te ni' toAbram. Niluxh rájp Dios sudeedni yujga lo rexajg toAbram, jiannäjreni yujga che guet toAbram. Niluxh nicla gajd xi'n toAbram chu dxejc. ⁶ Stee huält rájp Dios lo toAbram: “Rexi'nlu, rexagdoolu, silätzreni si'c benzijt. Ladxbjen gacreni mos, ro'c susacsí bejñreni si'cti tajp gayuu ijz.” ⁷ Rájp Dios: “Narä sunä castiigw rebejn ni gusacsíreni che najcreni mos. Narä cuää rexagdoolu ro'c, te ree guzuxhijbreni loä nen guejdxre”, si'c rájp Dios ⁸—rájpza Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni be; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujn dxej, basälza toAbram beegani si'c te seenza. Sigajcza bennäj Isaac xi'nni Jacoob. Sigajcza bennäj Jacoob guitzubitio'p rex'i'nni nani najc rexpengoldoo xpen Israel.

⁹ Rájp Esteban:

—Guitzubitib rex'i'nni Jacoob guyu' te yälrudxojn lo bejtzreni José. Dxejc bato'reni José lo te ben Egipto. Dxejc Dios goptzu'tz José. ¹⁰ Che gudejd José trabajwdxh, gucnäj Diosni. Badeed Dios yälñasinduxh lojni. Bejn Dios bichaglajz reii Faraón José. Badeed reii Faraón gujcní guber-nadoor xten Egipto. Gunibeeza José guira'ti xhixten reiiga.

¹¹ Rájpza Esteban:

—Che bidzujn dxej gujc te gubijn, guiraa nen reguedx Egipto näjza guiraa nen reguedx Canaán, trabajwdxh cadejd guiraa rebejn. Xhet guyu'di xhi niajw retoxtadgoldoonu. ¹² Che bijn diajg xtaggoldoonu Jacoob yu' xhi gaurení nen reguejdx xten Egipto, ro'c baxhalni rex'i'nni, bica'reni xhi gaurení te huält.

¹³ Che huijreni stehuält, dxejc bazäbdiidx José lojreni laani najc bejtzreni. Biembeeza Faraón resa' José. ¹⁴ Dxejcti baxhal José diidx jiääd xtadni Jacoob, näjza guiraa resa'ni, cuääzreni Egipto. Najc rebejnja si'cti gayonbitzubigai bejn. ¹⁵ Si'c gujc te huij Jacob guedz Egipto. Ro'c gulätzni, ro'c gujtni. Ro'c gujta retoxtadgoldoonu.

¹⁶ Dxejcti huinäreni rextzujtreni loj Siquem te biga'tzsacreni nen baa nani gusii

toxtadgolnu Abram lo rexi'n Hamor nen guedx Siquem.

¹⁷Räjp Esteban:

—Che bidzungajxh dxej, si'c diidx ni bia'n Dios con toxtadgolduonu Abram, bidalduxh rexpengoldoonu neñ guedx Egipto. ¹⁸Dxejcti guyu' te xrei Egipto ni di gan guiraa redzunsa'c nani bejn toxtadgolduonu José. ¹⁹Reiiga basgueeni rexpengoldoonu, basacsínireni, trabajw-duxh bateedni rexpengoldoonu. Gunibee reiiga basäl'reni guiraa rebáz niguui te di laareni, te guetreni. ²⁰Neñ redxejga, goj Moisés. Che gujc Moisés báz, te báz daani, saru rujn lojni, huinälajz Diosni. Guulaani chon báii rolizjni. ²¹Dxejc huisälrenini, te guzojb xtidx Faraón. Dxejc lagajc xindxa'p Faraón bidxálni Moisés, cua'nini baslaanini si'c xi'nni. ²²Bisieed Moisés guiraa ni najn reben Egipto. Gunisa'cni diidx, bensa'cni dzuun.

²³Räjp Esteban:

—Che guyu'ni tiuu ijj, banaj lajzn resa'ni ni najc xpejñ Israel, huijni cadro rbájzreni. ²⁴Dxejc bahuiini casacsí te ben Egipto te ben sa'ni. Sas bagu'tni ben Egipto. ²⁵Bejn Moisés xhigab pet sacbee resa'ni cayacnáj Diosni te guislaani rexpejnni. Luxh di resa'ni niacbee si'c. ²⁶Che bara yääl, bahuii Moisés cadiñháj sa'reni tiop xpen Israel. Räjp Moisés lojreni: “Colcuedxi, Dad. Lagajc sa'tu cadiñhájtu. ¿Xhicuent rdiijltu?” si'c gunii Moisés, te na'cru tilnáj sa'reni. ²⁷Dxejcti nani cayunniälajzga, balanaani Moisés, räjpni loj Moisés: “¿Chu baniidx yälrnibee lojlu te jiädnbileeu nuure? ²⁸¿La rlajzlu ju'tlu narä si'c bagu'tlu ben Egipto naii?” —räjpni—. ²⁹Che biejn diaj Moisés rediidxga, baxunni, huijni zift. Huiläzsijcni guedx Madián. Ro'c bachñaani, guyu' tiop xingaanni.

³⁰Räjpza Esteban:

—Che gudejd tiuu ijj, bidzujñ te dxej cansajni nez lo reyubijdz ni naga' guideb gabi dajin ni laa Sinaí. Ro'c bahuiini te bajl nen te yaguejch. Nen bajlga baluiloj angl xten Dios lo Moisés. ³¹Bidkeloduxh Moisés che bahuiini si'c. Dxejcti gubigni te rlajzni nuhuisa'cni yajgga. Dxejc biejn diajgnii gunii Dios, räjpni lo Moisés: ³²“Narä nacä Xtios rextadgoldoolu, narä nacä Dios

xten Abram, näjza xten Isaac näjza xten Ja-coob.” Dxejcti gucsez Moisés sa'csi bidxeb-duxhni, diruni nuhuisa'c yajgga. ³³Dxejcti räjp Dios lojni: “Gulää xcura'chlu. Yuj cadro suga'lú najc dxan, sa'csi narä yu'ä ree. ³⁴Abahuiä xho cagusacsí reben Egipto rexpenä. Abiejn diagä xho roonreni. Naj abialä te guslaá rexpenä. Gudaa naj, sux-hajläu chäälü Egipto.”

³⁵Räjp Esteban:

—Dios badeed yälrnibee lo Moisés nani baze' retoxtadgolduonu che räjpreni: “¿Chu baniidx yälrnibee lojlu te jiädnbileeu nuure?” Baxhal Dios Moisés te guinibeeni xpejñ Dios, gucnäjza Dios Moisés baslääni rexpejnni nen nación Egipto si'c gunii angl xten Dios che baluilojni lo Moisés nen yaguejchga. ³⁶Gulää Moisés rebejngä. Ganiddoo bejn Moisés redzunro, yälrdxeloj neñ nación Egipto näjza ro' nisdoo ni laa nido xniaa. Tiuu ijj cuansaj retoxtadgolduonu neñ yubijdzroga, ro'c bejnza Moisés redzunro, remilagwr. ³⁷Lagajc Moisésre gunii xtidx Dios che räjpni loj rexpejñ Israel: “Sibe Dios lo rexajgtu te niguui ni najc sigac narä. Siniini xtidx Dios. Colgusoob xtiidxni.” ³⁸Lagajc Moisés guyunäj rebejñ neñ yubidzro. Xangl Dios guninäj Moisés neñ dajin xten Sinaí. Dxejcti badeed Moisés rediidx ni gunibee Dios lo retoxtadgolduonu. Laareni basa'nreni diidxga loonu.

³⁹Räjp Esteban:

—Niluxh di retoxtadgolduonu nusoob rextidx Moisés. Di rlajzreni guinibee Moisésreni. Canaduxhlajzreni nación Egipto. ⁴⁰Che sää Moisés dajin Sinaí, räjpreni loj Aarón bejtz Moisés: “Benchee banäjb gac xtiiooznu, te nidreni loonu, te chanajlnureni. Chu gan con Moisésre ni baluui nezyuq che gulääni nuure guejdx reEgipto.” ⁴¹Sas bencheereni te banäjb ni najc si'c te gonbáz. Dxejcti bagu'treni guidxaa te badeedreni rejnga lo banäjb te bazuxhijbreni lojni. Bibalazduxhreni sa'csi abencheereni banäjbga. ⁴²Dxejeti gubicaj Dios loj rexpejñ Israel sa'csi bejreni si'c. Basaan Dios gojñreni gubijdx, näjza báii, näjza rebal xhaguibaa. Gujcti si'cni caj lo guijtz ni bejn reniguii nani bacuua rextidx Dios. Räjp Dios:

La'tu ben Israel, cheni cuansajtu tiuu ijz nez lo reyubijdz,
 ¿la par narä bagu'ttu guidxaa, ä?
 ¿La loä baniidxtu xtiejnreni, ä?
⁴³ Xho gacni si'c, räjp Dios.
 Cuansanäjtu te yu' najcw guijd cadro chu te banäjb.
 Nenga guyu'banäjb ni laa Moloc, nani najtu najc xtiostu.
 Gojnzatu balbäze' xten xtiostu ni laa Rem-fán.
 Redios ni bencheetistu reni'c gojntu.
 Ni'cni sibää la'tu ree guxhalä la'tu stelaad guedx Babilonia.
⁴⁴ Guniiru Esteban, räjpni lojreni:
 —Nen reyubijdz gojp retoxtadgoldoonu te yu' najcwni guijd. Gujnci xquidooreni. Ro'c guninäjreni Dios. Benchee retoxtadgoldoonu yu' najcw guijdga si'cni gunibee Dios che baluini lo Moisés xhoni gacni.
⁴⁵ Che gujt Moisés, Josué gunibee lacuua to-Moisés, huinäni retoxtadgoldoonu nación Canaán. Batzujreni yuro ni najcw guijd te näj ni'c huinäreni Canaán. Gulää Dios rebejn ni guläjz nen reguedx Canaán. Dxejcti bia'n retoxtadgoldoonu nen reguejdxga. Bazuxhijbreni lo Dios nen yuguijd ni najc xquidooreni che gojlli xtiemp reii David. ⁴⁶ Huinälajz Dios David. Räjp David lo Dios: "Rlazä gunä te guidoo par guejblu, Dios xten nuure, rexpejñ Israel." ⁴⁷ Dxejcti di Dios nusoob xtidx David. Alga Salomón, xi'n David, ni'c benchee xquidoroo Dios.
⁴⁸ Naj di Dios guiquiin te yu' nani runchee bejñ. Scree bacuua te niguii nani gunii xtidx Dios. Räjp Dios:
⁴⁹ Si'c najc te yagxhilsa'c cadro rnibee reii, si'c najc guedxliuj nani bencheä.
 Si'c te bancw cadro rsiuj ni' reii, si'c najc guedxliuj nani bencheä.
 Dina guiquinä guncheetu te xyu'ä.
 Dina guiquinä te lajt cadro gusilzä, räjp Dios.
⁵⁰ ¿La et naädi benchee guiraa nani ruhuitu?, räjp Dios.
⁵¹ Räjp Esteban lojreni:
 —Te ben nadduxh najctu. Ditu jiu xtidx Dios. Niäu lastootu, niäuza diajgtu. Di'tu chanälajz xtzuun Sprit Dyan xten Dios, dizani cuääz nen lastootu. Si'c bejn retoxtadgoldootu, si'cza rujntu. ⁵² Basacsí retoxtadgoldootu guiralii reniguii nani gunii

xtidx Dios. Nicla tejni direni niu. Bagu'retoxtadgoldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huinätuni lo guxhtis te gunibeetu gujtni. ⁵³ La'tu biannäjtu leii nani gunii reangl xten Dios loj Moisés, luxh la'tu ditu nucuadiazg rediidxga.

Bagu'treni Esteban

⁵⁴ Che biejn diajgreni rextidx Esteban, bidxe'chduxhreni, rauya' läjreni sa'csi rdxe'chreni lo Esteban. ⁵⁵ Rbäjz Sprit Dyan xten Dios nen lastoo Esteban, ni'cni bahuitz'u'tzni xhaguibaa, ro'c bahuiini yälrdimbichasejz xten Dios. Bahuiizan suga' Jesucrist xladbee Dios. ⁵⁶ Räjp Esteban lojreni:

—Colhuila. Narä cahuiä xhaguibaa cadro yu' Dios, ruhuiäza loj Xi'n Dios nani gujc Niguii; ani suga' xladbee Dios.

⁵⁷ Guredxaduxhreni basäuzareni diajgreni. Dxejcti baxuqreni bixa'treni yejc Esteban. ⁵⁸ Dxejc gudobyujrenini, gulääreni Esteban nen guejdxga. Ro'c bacuareni guij yejc Esteban. Che cagucuaareni guij yejcni, guläyäleni xhajbreni; te niguii ni laa Saulo biannäj xhajbreni. ⁵⁹ Lal ni cagucuaareni guij yejcni, gunii Esteban loj Jesucrist räjpni:

—Guejblu, Dad Jesucrist, cua' narä.

⁶⁰ Dxejcti biajb Esteban, bazuxhijbni, guredxa ni räjpni:

—Dad Jesucrist, na'c guduublu dojlre yejc rebejpre, na'c gucuauqijlureni.

Gulujksi guniini si'c, gujtni.

8

Saulo basacsí rexpejñ Jesucrist

¹Rbaduxh lajz Saulo bagu'treni Esteban.

Lagajc dxejga gusloj gudejd rexpejñ Jesucrist trabajwduxh nen guedx Jerusalén. Dxejcti bire'ch rexpejñ Jesucrist. Biunejzreni ro'c sääreni nez guiraa reguedx Judea näjza nez guiraa reguedx Samaria. Xtebtis reapost bia'n Jerusalén, direni nire'ch.

² Reniguii nani sanälajz Dios huicua'tz Esteban. Cayonduxhreni sa'csi riareni gujt Esteban. ³ Biäädza Saulo, guixe-guixee basacsí rebejñ nani huililajz xtidx Dios. Biu'ni rolizzreni, gunaazni reniguii näjza regunaa te basäunireni nen latzguiib.

Basule' rexpejn Jesucrist xtidx Dios nez
región Samaria

⁴ Che bire'ch rebejn nani huililajz xtidx
Dios, basule'reni xtidx Dios nez cadrotis
sääreni. ⁵ Tej rebejngā laa Felipe. Siini nez
te guedx Samaria. Ro'c basule'ni xtidx Dios.
Räjpi:

—Jesús najc Crist nani cabätztu jiääd.

⁶ Ro'c bachagsa' rebejn bacuadiagreni
rextidx Felipe, bahuiżareni redzuunro,
remilagwr nani bejn Felipe. ⁷ Gai bejn
yu' bendxbab nen lastooreni. Che gunibee
Felipe guirii rebendxbab lastoo rebejngā,
guredxa' rebendxbabga, dxejcti biriireni
nen lastoo rebejngā. Yu'za xhidajl bejn
nani digacdiru guiniib, yu'za reni rajc
ni'reni, naareni. Con xcälrnibee Jesucrist
basiajc Felipe guiraa rebejngā. ⁸ Sa'csi
gujc si'c, bibalazdukh guiraa rebejn nen
guejdxgā.

⁹ Guyu' te niguii ni laa Simón nen gue-
jdxga. Bisiedni bejni xhidajl redzuun
yälbidxxa, basgueeni rebenguejdxga. Bidx-
eloduxh rebenguejdx lojni. Räjpi lo rebejn
rutru chu stec bejn ni najc maazru beñro
lojni. ¹⁰ Luxh guiraa rebejn, rebiuux, re-
bengool, rebenrajp, rebenproob bacuadia-
jgreni xtidx bidxaaga, räjpreni:

—Laani rajpni yälrnibee xten Dios.

¹¹ Xchero basgueeni rebejn, bidxelojreni
rextzunyälbidxaani. Guiraa rebejn huililajz
xtiidxi. ¹² Dxejcti baluui Felipe xcient
xcälrnibee Dios, näjza xcient Jesucrist.
Xhidajl rebenguejdxga huililajz rediidx
nani gunii Felipe. Dxejcti birobnisreni,
niguii näjza gunaa. ¹³ Nägajcza Simón
huililajz rediidxga dxejc gurobniszani.
Dxejc guyunäj Simón Felipe. Che bahuui
Simón lo redzunro, remilagwr nani cayujn
Felipe, bidxeloduxh Simón.

¹⁴ Che biejn diajg repost ni yu' guedx
Jerusalén huililajz rebejn Samaria xtidx
Dios, baxhalreni Pedr näjza Juan ro'c. ¹⁵ Che
bidzujn guiro'preni guejdxga, gunabreni lo
Dios xcient rebejn ni huililajzga te gudeed
Dios Sprit Dyan xtelli lojreni, ¹⁶ sa'csi
gajd Sprit Dyan xten Dios jiädläjz nen las-
tooreni. Che huililajzreni, gurobnisreni
te gucbee rebejn chuni'c najc rexpejn Je-
sucrist. ¹⁷ Dxejc batzuub Pedr näjza Juan
naareni yejc tejga renani ahuililajz xtidx
Dios, dxejc badeed Dios Sprit Dyan xtelli
biädläjzni nen lastooreni.

¹⁸ Che bahuui Simón biädläjz Sprit Dyan
xten Dios lastoo rebejn ni batzuub repost
ñaani yejcreni, rlajz Simón nudeedni meel
loj repost, ¹⁹ räjpi lojreni:

—Colguniidx yälrnibee loä te si'cza
gudzubä ñaä yejc rebejn, te jiu' Sprit Dyan
xten Dios nen lastooreni.

²⁰ Dxejcti räjpi Pedr lojni:

—¡Sunitloj xmeellu con lui! Xho gunlu
xhigab siilu Sprit Dyan xten Dios nani rud-
edxlia' Dios. ²¹ Digacdi gunlu dzuum ni
riennu, sa'csi xhet laadi najc lastoolu nez
loj Dios; yu' dojl nen lastoolu. ²² Basie'ch
lajzlu, badzucaj rexhigab guijdx xtenlu.
Guredx-gunab lo Dios, top susiäjz lajz Dios
xtojllu ni bejnlu nen lastoolu. ²³ Naj
narä nanä ruguilazduxhlu, luxh runduxhlu
xhigabgujdx.

²⁴ Dxejcti räjpi Simón lo guiro'preni:

—Colhab loj Dios xcuentä te na'c sacä
si'cni caniit.

²⁵ Che gulujxti bijreni diidx xcient ni
bahuijorení bejn Jesucrist, che gulujx ba-
sule'reni xtidx Jesucrist loj reben Samaria,
gubisacreni Jerusalén.

Felipe näjza te dade' ni siääd nación Etiopía

²⁶ Dxejcti biääd te xangl Dios, räjpi lo
Felipe:

—Huij lo nezyuj ni rii guedx Jerusalén,
ni rij nez guedx Gaza. Nezyujga rdejd lo
reyubijdz.

²⁷ Sä'ti Felipe. Che bidzujnni lo nezyujga,
bidxaagni te dade' ni siääd nación Etiopía.
Najcni te eunuco, najczani xcuxhtis reina
Candace. Laani rguchéeni guiraa xmeel
reinaga. Biääd dade'ga guedx Jerusalén
te sagajnni Dios. ²⁸ Siädbisacni lajdxni.
Sobga'ni nen te gare't saruduxh, cayolni
xtidx Isaías, nani bacuua xtidx Dios agujc
xchero. ²⁹ Dxejcti räjpi angl xten Dios lo
Felipe:

—Gubig cuä' gare'tga, guninäj dade'ga.

³⁰ Che gubig Felipe cuä' gare'tga, biejn
diajgni cayol dade'ga rextidx Isaías. Dxejcti
räjpi Felipe lojni:

—¿La racbeelu ni caj lo guijtz nani cay-
ollu, ä?

³¹ Dxejcti räjpi dade'ga lojni:

—¿Xho gacbeäni palga rut gusule'dini
loä?

Sas räjpi dade'ga lo Felipe chä'pni nen
gare'tga.

³² Cadro cayol dade'ga nen guijtz ni caj xtidx Dios rnii scree:
Di xiil cuedxa' che rinä bejñni cadro guetni;
dxitis raa xiil che ruhuajrenini.
Si'c te xiil najc niguire,
xhet rnidiini mase rusacsíduxhrenini.
³³ Basacsíduxhrenini.
Reguxhtis ni nuijn yälguxhtisni xhet laliidi
bejnreni.
Xhet si'cti nunyäj! gunreni.
¿Xho guiniinu yu' xpejñni?
Ni abagu'trenini. Diruni guibajñ lo
guedxliu.

³⁴ Dxejcti gunabdiidx ben Etiópia, räjpni
lo Felipe:

—Gunila loä, chuni'c ruzä't nigui nani
bacuua reguijtzre, ¿la ruzä'tni lagajc laani o
la ruzä'tni ste'ca bejn, ä?

³⁵ Gusloj basule' Felipe rediidx nani abil
dade'ga. Dxejcti basule'ni rediidx xcient
Jesucrist. ³⁶ Lal ni sääreni lo nezyuj, bidzu-
jreni te lajt cadro yu' nis. Dxejc räjp
dade'ga lo Felipe:

—¡Bahuii, ree yu' nis! ¿Xhi rudxojn
tiobnisä?

³⁷ Dxejc räjp Felipe lojni:

—Palga rililajzlu xtidx Dios nen lastoolu,
sajc tiobnisu.

Dxejc räjp dade'ga lo Felipe:

—Rililazä Jesús najc Crist Xi'n Dios.

³⁸ Dxejc gunibee dade'ga gusudxi gare't,
sas biäjt guiro'preni, biu'reni nen nis, ro'c
batiobnis Felipe dade'ga. ³⁹ Che biriireni
nen nis, huinä Sprit Dxan xten Dios Felipe
ste'ca lajt. Dxejc diru dade'ga nuhuii lo Fe-
lipe. Sä'ti dade'ga lajdxni, cabalazduxhni.
⁴⁰ Dxejcti chela gucbee Felipe abidzujnni
guedx Azoto. Baluiizani xtidx Dios nen
guiraa reguejdx che bidzujñlini guedx Ce-
sarea.

9

*Huililajz Saulo rextidx Jesucrist
(Hch. 22:6-16; 26:12-18)*

¹ Lañtis cagusacsí Saulo rexpejñ Jesucrist.
Rlajzni ju'tni guiraareni, ni'c huijni lo bix-
hojz nani rnibee, ² gunabni gac te guijtz
chanäni lo reguidoo nen guedx Damasco
te palga guidxälni reni najc xpejñ Jesu-
christ nen reguidooga, nigui sigac gunaa,
guliibnireni, jiädnänireni guedx Jerusalén
te jiäurenri. ³ Lal sasajni lo nezyuj, asiä-
dzungajxni guedx Damasco, basaniya' te

bal xhaguibaa, basanijni guideb gabi cadro
siädsaj Saulo. ⁴ Dxejc bijabni lo yuj, biejn
diajgni te xse' bejn nani canii lojni:

—Saulo, Saulo, ¿xhicuent rusacsílu narä,
näjza rexpena?

⁵ Räjp Saulo lojni:

—¿Chuluj Dad?

Räjpni lo Saulo:

—Narä nacä Jesucrist, nani cagusacsí-
duxhlu. Niluxh lagajc luj cadejdlu trabajw
si'c rajc te gon ni rucuaní' yejc caru'ch.

⁶ Bidxebduxh Saulo, racsejsni räjpni:

—Dad, ¿xhini'c rlajzlu gunä?

Dxejc räjp Jesús loj Saulo:

—Huistie, biu' guedx Damasco. Ro'c
sului te niguii xhini'c gunlu.

⁷ Rebejn ni siädhä Saulo sugadxireni,
bidxejbreni sa'csi biejn diajgreni te xse'
bejn, luxh rut lojdi bahuiireni. ⁸ Che huistie
Saulo lo yuj, baxhalni lojni, niluxh di lojni
jien. Dxejc gunaazreni naani, sanärenini
guedx Damasco. ⁹ Ro'c guyu'ni choj dxej,
natiä'p balojni, dini niä', dizani niajw.

¹⁰ Guedx Damasco rbäjz te xpejñ Jesucrist
ni laa Ananías. Baluiloj Jesucrist loj Ananías
lo te bacal, räjp Jesucrist lojni:

—Ananías.

Dxejc räjp Ananías lojni:

—Anaree Dad.

¹¹ Räjp Jesucrist lojni:

—Huistie te chäälü lo nezyuj ni laa
Ladbee cad rbäjz Judas. Ro'c guiniabdi-
idxlu con te niguii ni laa Saulo, ben Tarso.
Cabejdx, canabni loä naj. ¹² Lo bacal abahui-
ini siääd te niguii ni laa Ananías te gutzu-
ubni naani yejcni te fiini stehuält.

¹³ Dxejcti räjp Ananías lojni:

—Dad, abiejn diagä xho basacsí niguiiga
rexpejñlu nen guedx Jerusalén. ¹⁴ Luxh
rebixhojz ni rnibee abadeed guijtz lojni te
guiniaazni ree guiraa rebejn nani rbedx-
rnibni lojlu, chanänireni jiäurenri.

¹⁵ Dxejcti räjp Jesucrist lojni:

—Huij, narä aguleäni te gunni xtzunä.
Suluiini xtidxä loj rebenzijt nani digac xpen
Israel, näjza loj reni rnibee renacion, näjza
loj rexpejñ Israel. ¹⁶ Narä suluiä lo Saulo
trabajwduxh ni tedni te jiädnajlni narä.

¹⁷ Dxejcti sää Ananías, bidzujnni ro yu'
cadro rbäzlaa Saulo. Batzuubni naani yejc
Saulo. Dxejcti räjp Ananías loj Saulo:

—Betzä Saulo, Jesucrist ni rnibee, nani baluiloj lojlu lo nezyuj cheni siäädälu, lagajc laami baxhalni narä te fiilu stehuält, te jiädläjzza Sprit Dyan xten Dios nen las-toolu.

¹⁸ Lagajc dxejc bitejb si'c xmelbälj yec baloj Saulo, biacgajc balojni, bahuisa'cni stehuält. Dxejc huistieni, gurobnisgajcni.

¹⁹ Dxejc gudajwni, guc nadaanni stehuält. Xchej guyunäj Saulo rexpejn Jesucrist nen guedx Damasco.

Guslo basule' Saulo xtidx Dios nen guedx Damasco

²⁰ Dxejcti guslo basule' Saulo xtidx Dios nen reguidoo xten rexpejn Israel, räjpni:

—Jesucrist najc Xi'n Dios nani gujc Niguii.

²¹ Che biejn diajgreni xtiidxni, bidxelorenji, räjp lo sa'reni:

—*La xhet laadi niguiire ni rusäu rexpejn Jesucrist nen latzguuib guedx Jerusalén, ä?* Lagajczä dee bidzujn ree te gulibni rexpejn Jesucrist te chanänirenii guedx Jerusalén lo rebixhojz.

²² Dxejcti gusutzu'tz Saulo guniini xtidx Dios. Basacajnni rexpejn Israel nani rbäjz Damasco sa'csi basule'pacni Jesús najc Crist nani rnibee.

Baxun Saulo guedx Damasco

²³ Che gudejd xhidajl dxej, bachagsa' rexpejn Israel te nugu'treni Saulo. ²⁴ Dxejcti gucbee Saulo xhi xhigab bejnreni. Dxej, yääl cabäjzreni Saulo ro' guiraa renezyuj ni rdzujn guejdxga te ju'trenini. ²⁵ Dxejcti che gojl te yääl basä'l rexpejn Jesucrist Saulo nen te dximro, basiäjtreni dxijmga nez ro' te padeer ni dejtz padeerga, te si'c baxunni guejdxga.

Bidzujn Saulo guedx Jerusalén

²⁶ Che bidzujn Saulo guedx Jerusalén, rlajzni nuchaagni loj reni rililajz xtidx Jesucrist, niluxh guiraareni bidxejbrenini sa'csi direni gan ahuililajzni xtidx Dios. ²⁷ Dxejcti huinä Bernabéni lo reapost, bijni diidx xcuent Saulo. Räjp Bernabé lojreni:

—Baluiloj Jesucrist lo Saulo loj nezyuj. Guninäj Xtioznu Saulo loj nezyuj, ni'cni gusutzu'tz Saulo basule'ni xtidx Jesucrist guedx Damasco.

²⁸ Dxejc bia'n Saulo guedx Jerusalén, bidxaagni lo rexpejn Jesucrist. ²⁹ Dxejcti gusutzu'tz Saulo guslo bijni xtidx Jesucrist lo rebejn. Dxejcti gudiñäj Saulo rexpejn Israeli nani rnii didx griegw. Laareni rdzechduxhreni, rlajzreni nugu'treni Saulo sa'csi direni nichaglajz xtidx Jesucrist. ³⁰ Che gucbee rexpejn Jesucrist si'c, huinäreni Saulo guedx Cesarea, ro'c gulääreni Saulo, baxhalrenini guedx Tarso.

³¹ Dxejc guredxi lajz guiraa renani huililajz xtidx Dios nen reguedx Judea, nen reguedx Galilee, näjza nen reguedx Samaria, sa'csi diru Saulo nusacsí rexpejn Jesucrist, luxh guc xhidajlurenii. Basoobreni xtidx Jesucrist, biseedrurenii rextiidxni, gucnäjza Sprit Dyan xten Diosreni.

Biajc Eneas

³² Che guslo sahuii Pedr guiraa renani huililajz xtidx Dios, huihuiizani rexpejn Jesucrist nani yu' guedx Lida. ³³ Ro'c bidxälni te niguii ni laa Eneas. Agujc xhujn ijj naga' niguiiga cayacxhuuni. Abixu'n tiejxhni, digacdiru guiliimi.

³⁴ Dxejcti räjp Pedr lo Eneas:

—Eneas, cagusajc Jesucrist guejblu. Huistie, guläs xta'lú.

Lagajc dxejc biajcn, huistietini.

³⁵ Guiraa rebejn ni rbäjz guedx Sarón, bahuiireni abi-ajc niguii ni cayacxhuu. Dxejc xhidajlreni nen reguejdxga huililajz xtidx Dios.

Gubansac Dorcas

³⁶ Nen guedx Jope yu' te gunaa ni laa Tabita; rniiżarenini Dorcas con xtidx griegw. Gunaaga huililajz xtidx Dios, rudedzani xhi rquuin rebenproob, na-jezani huenduxh loj chutis bejn. ³⁷ Gucxhuu gunaaga, dxejc gujtni. Che gulujx bahuajz rebejn togoolga, huitixhrenini nen te yu' ni najc jiaa yejc sa'nii. ³⁸ Sa'csi gajxh guedx Jope tre' guedx Lida, luxh biejn diajg rexpejn Jesucrist ro'c yu' Pedr, baxhalreni tiop dade' saxii Pedr. Räjp redade'ga loj Pedr:

—Bejn huen salu chonnu Jope nanajga.

³⁹ Dxejc sanägajc Pedr redade'ga. Che bidzujnreni, huinäreni Pedr nen yu' cadreo naga' togunaaga. Ro'c cayonduxh guiraa regunabiud, baluigureni lo Pedr guiraa rexhajbreni nani benchee Dorcas, ni badeed

Dorcás lojreni che nabajnni. ⁴⁰ Dxejcti gunibee Pedr birii guirarení nen yu'. Dxejcti bazuxhijbni, guredx-gunabni loj Dios. Dx-ejc gubiréni bahuiini loj toogolga, räjpni:

—Tabita, huitistie.

Dxejcti baxhal gunaaga balojni; che bahuiini loj Pedr, gurejní. ⁴¹ Dxejc gunaaz Pedr naani, basuliinini, dxejcti gurejdx Pedr regunabiuid näjza sgaai reni najc rex-pejn Jesucrist. Baluini gunaaga lojreni te bahuilojreni agubansacni. ⁴² Gucbegajc reben guedx Jope xhini'c gujc, dxejcti xhidajl rebejnga huililajz xtidx Jesucrist. ⁴³ Xchejza guyu' Pedr ro'c, gulätzni roliz dade' ni laa Simón, nani ruscoodz guijd.

10

Pedr con Cornel

¹ Guedx Cesarea guyu' te niguii ni laa Cornel. Rnibeeni te gayuu resoldaad lo te cuua ni laa Italiano. Cornel najc benzijt, dini gac ben Israel. ² Bensacduxh najc Cornel, näjza guiraa resa'ni, sacruduxh rusobreni xtidx Dios. Rudeedni gojin lo reben proob xten Israel. Guixe-guixee rbejdx, rniabni lo Dios. ³ Te dxej, si'cti rcachon gudxej, si'c lo bacal bahuiini loj xangl Dios, räjpni loj Cornel:

—¿Conlu Cornel?

⁴ Che bahuii Cornel xangl Dios, bidxejbni, bidxeljni, räjpni lojni:

—¿Xhini'c, Dad?

Dxejcti räjp angl xten Dios lojni:

—Che rniilu lo Dios, riejn diajg Dios xtidxlú, che rudeedlu meel lo reben proob, ruhuii Dios ni rujnlu, ni'cni rnalajz Dios luj. ⁵ Naj baxhal tiop niguii chää guedx Jope te chaxiireni Simón Pedr. ⁶ Rbätzni roliz te dade' ni laa Simón nani ruscoodz guijd. Roliz Simón sojb gajxh ro' nisdoo. Simón Pedr gusule' xhini'c nanab gunlu.

⁷ Che sii angl xten Dios, gule Cornel tiop mos xtennai näjza te xsoldaadni nani sanälajz Dios. ⁸ Dxejc bij Cornel diidx lojreni xcient ni gusajcni, dxejc baxhalni redade'ga guedx Jope.

⁹ Che bara yääl, sääreni lo nezyu. Asiäd-dzungajxhreni guedx Jope, pet si'cti läidxejni. Lagajc orga huáp Pedr yecyu' te guin-inäjní Guejb Dios. ¹⁰ Calanduxh Pedr, rla-jzni gauni. Lal ni cayujnreni xhi gauxhue-jni, gusloj canixcalni. ¹¹ Bahuiini bixal xhaguibaa, bahuiizani biäft te bariadro nani

naliib guidap xi'ni. Siädjiättchäiini gajxh nez loj Pedr. ¹² Nen bariaadga yu' guiraa reman ni yu' lo guedxliuj nani rsianäj guidap ni'ni, näjza renani rxeeb si'c bäl, näjza renani rutajt. ¹³ Gunii Dios lo Pedr, räjpni lojni:

—Pedr, huisu te ju'tlu man gaulu.

¹⁴ Dxejc räjp Pedr lojni:

—Na'c Dad. Nunc gauä sa' remandxu-udxga, abia'a dina gauä reman nani rnii xleiliu najc mandxiuwdx.

¹⁵ Gunisac Dios loj Pedr, räjpni:

—Na'cru guiniilu nacdxuudx reman nani abasia.

¹⁶ Che gujc chon huält gujc si'c, huä'psac bariaadga xhaguibaa. ¹⁷ Lal ni cayujn Pedr xhigab xhichani'c sáloj nani bahuiini, bidzujn reniguii ni baxhal Cornel ro' yu'ga, sa'csi agunabdiidxreni caro rbätz Simón nani ruscoodz guijd.

¹⁸ Che bidzujnreni rolä'ga canabdiidxreni la ro'c rbätz te dade' ni laa Simón Pedr. ¹⁹ Lal ni cayujn Pedr xhigab xcuent ni bahuiini, gunii Sprit Dyan xten Dios lojni, räjpni:

—Bahuii, chon dade' caguiillu. ²⁰ Biäft yejc yu're te jinälurenri. Na'c gunlu xhi stee xhigab, sa'csi lagajc narä baxhaläreni lojlu.

²¹ Dxejcti biäft Pedr jiaaga, bidzujnni cadro suga' redade'ga, räjpni lojreni:

—Narä nacä ni caguiillu. ¿Xhi siäädtu?

²² Räjp reniguiga lo Pedr:

—Cornel, nani rnibeeti te gayuu soldaad, te bensa'c, te bejn ni rajn Dios, te bejn ni sanälajz rexpejn Israel, laani baxhal nuure lojlu, sa'csi räjp angl xten Dios lojni, jioxi-inu luj te jiejn diajgnu xtiidxlu.

²³ Dxejcti gurejdx Pedr rebejnga, biu'reni nen yu'. Ro'c bia'nreni te guxhijn. Che bara yääl, Pedr näjza sgaii ben Jope ni najc xpejn Jesucrist, sanä redade' ni baxhal Cornel.

²⁴ Che bara yääl, bidzujnreni guedx Ce-sarea. Abatojp Cornel resa'ni näjza rexam-igwni rolizni. Cabätzreni guidzujn Pedr.

²⁵ Che bidzujn Pedr ro yu', huichagloj Cornelni, bazuxhijbni lo Pedr. ²⁶ Dxejc gunaaz Pedr naani, guläsnni, räjpni lojni:

—Huisulii, sa'csi narä nacä te niguiitis sigajc najclu.

²⁷ Cayuüreni diidx, biu'reni nen yu'. Che biu'nii bahuii Pedr nadxagsa' rebejn nen yu'. ²⁸ Räjp Pedr lojreni:

—Anajntu xhi caj lo leii xten rexpejn Israel: digacdi guchaag te xpejn Israel loj benzijt nani digac xpejn Israel, digacdiza jiu'ni rolijzreni. Niluxh agunii Dios loä lo te bacal, te gacbeä digacdizir jiuä releire. Abaluii Dios narä sajc guchagsa'ä chutis bejn.²⁹ Ni'cni, che gurejdxtu narä biälgacä. Naj rniabdidxä, ¿xhicuent gurejdxtu narä?

³⁰ Dxejcti rájp Cornel loj Pedr:

—Gudajp dxej si'cti rcachon gudxej, cabedx-canabä lo Dios rolijä chela baluiloj te nigui najcw te ladnol ni rdimbicha'.³¹

³¹ Najni loä: "Cornel, che rbedx-rniablu lo Dios, riejn diajg Dios xtiidxlu, che rudeedlu meel lo reben proob, racbee Dios, di lajzni jiäl lui.³² Ni'cni naj baxhal tiop dade' chää guedx Jope te chaxireni Simón Pedr nani rbäzlaa rolijz Simón ni ruscoodz guijd. Rolijzni sojb gajxh ro' nisdoo. Che guidzujnni, laani gusule'ni xtiidx Dios lojtu."³³ Dxejc baxhalä chu biäddiilu. Xquixtiostelu biäädlu. Naj anadxagsa'nu ree nez loj Dios te jiejn diajgnu rextidx Dios ni baniidxi lojlu guiniilu loonu.

Basule' Pedr xtiidx Dios rolijz Cornel

³⁴ Dxejcti rájp Pedr lojreni:

—Naj gucbeliä tebloj rinälajz Dios guiraa bejn; rebenzijt sigajc rexpejn Israel.³⁵ Niluxh rinälajz Dios chutis ben guedxliu nani ruzuhijb lojni, nani rusooob rextiidxni, nani laaca nabajn.³⁶ Badeed Dios xtiidxni loj rexpejn Israel, basule' Dios biääd Jesucrist te gac chanälaznu Dios te cuedxilajznu, sa'csi Jesucrist rnibee guideb guedxliuij.³⁷ Che gulujx baluui Juan ni rutiobnis xcient yälrobnis, dxejc gusloj basule' Jesucrist xtiidx Dios nez reguedx Galilee. La'tu najntu xho bire'ch xtiidx Jesucrist guideb nez neñ reguedx Judea.

³⁸ Nancheetu xho badeed Dios yälrnibee loj Jesucrist, beñ Nazare't. Badeedza Dios Sprit Dyan xtenni te cuääzni neñ lastooni. Nancheetu xho bejnni redzunro, remilagwr, basiajcní rebejn nani caguteed benðxbab trabajwduxh. Redzunroga bejnni sa'csi bennäj Diosni dzuun.³⁹ Bahuiloonu guiraa redzunni bejn Jesucrist neñ reguedx Israel näjza guedx Jerusalén. Bacuaa rexpejn Israel Jesucrist lo cruij, ro'c gujtni.⁴⁰ Dxejcti che biojn dxej, guläis Dios Jesucrist lo rebengut, gubansacni, badeed Dios yälrnibee lojni te gujc biädluiloj

Jesucrist loonu.⁴¹ Di Jesucrist nulilojoj loj chutis bejn. Lojtis renani agule Dios gutie'ch diidx gubansac Jesucrist lo rebengut, loj reni'c baluilojni. Nuure nadxagnu loj reni gule Dios. Bidaunänuni, bidunnänuni che gubansacni lo rebengut.

⁴² Baxhalni nuure chatie'chnu diidx loj guiraa rebejn, chosule'pacnu Dios gule Jesucrist te gacni juejz xte rebenbjn näjza xte rebengut.⁴³ Galooli bacuaa renani gunii xtiidx Dios lo guijtz, rájpreni: "Guiraa rebejn ni chalilajz xtiidx Jesucrist sudzucaj Dios xtojreni."

Biädlajz Sprit Dyan xten Dios neñ lastoo rebenzijt

⁴⁴ Lal ni canii Pedr rediidxga, biädläjz Sprit Dyan xten Dios neñ lastoo renani huililajz xtiidxni.⁴⁵ Bidxeloj guiraa rexpejn Israel nani huinä Pedr sa'csi biädläjz Sprit Dyan xten Dios neñ lastoo renani najc beñzijt. ⁴⁶ Gucbeereni biu' Sprit Dyan xten Dios lastoo rebenzijt sa'csi bejn Sprit Dyan guinireni stee didxsaj nani gjadreneen guiseed, calä'pzareni xpala'n Dio. ⁴⁷ Dxejcti rájp Pedr lo rexamiigwni:

—Chu laa ni gudxoñ yälrobnis lo rebejnre, ni sigajc biädläjz Sprit Dyan xten Dios neñ lastoonu, abiädläjzni neñ lastoo rebejnre.

⁴⁸ Dxejcti gunibee Pedr gurobnisreni te gacbee bejn najcreni xpejn Jesucrist. Dxejcti gunabreni loj Pedr jia'nni ro'c tiopchon dxej.

11

Basule' Pedr xho biädlajz Sprit Dyan xten Dios lastoo rebenzijt lo rexpejn Jesucrist neñ guedx Jerusalén

¹ Reapost, näjza renani huililajz xtiidx Jesucrist neñ reguedx Judea, biejn diaj-greni huililajz rebenzijt ni digac xpejn Israel xtiidx Dios. ² Che bidzujn Pedr guedx Jerusalén, rexpejn Israel nani rlajz chugiraa rexpejn Jesucrist bee si'c bejn to Abram, gudilnäjreni Pedr. ³ Räjpreni lo Pedr:

—¿Xhicuent biu'lü rolijz benzijt nani xhet yu'di bee si'c nuure? ¿Xhicuent gudaunäjlurení, ä?

⁴ Dxejcti basule' Pedr diidx xho gujc huijní loj rebenzijt:

⁵ —Yu'ä guedx Jope. Cabedx-canabä lo Dios, dxejc si'c gunixcalä, bahuiä bixal xhaguibaa, siädjäjt te bariadro, naliib guidap xi'ni. Siädjäatchäiini nez loä. ⁶ Che bahuisa'cä, nenga yu' guiraloj reman ni yu' lo guedxliuj nani rsianäj guidap ni'ni, renani rbajz nen dajin, renani rxeeb si'c bäl, näjza renani rutajt. ⁷ Dxejcti biejn diagä naj Dios loä: "Pedr, huisu. Bagu't man gaulu." ⁸ Dxejcti räpä: "Digacdini Dad. Nicla tej gadna gauä te man nani rnii leii xtenlu najc mandxuudx." ⁹ Dxejc gunisac Dios loä: "Na'cru guiniilu nadcxuudx recos nani abasia Dios." ¹⁰ Che gujc chon huält gunii Dios si'c, huä'psac bariaadga xhaguibaa. ¹¹ Lagajc orga bidzujn chon dade' ro yu' cadro yu'ä. Guedx Cesarea biriireni, biädxireni narä. ¹² Dxejc gunii Sprit Dxan xten Dios loä: "Huinä reniguire. Na'c gun tiop lajzlu." Dxejcti huinää xho'p ben Jope, dade' nani rililajz xtidx Jesucrist. Che bidzujnu guedx Cesarea, biu'nus roliz Cornel. ¹³ Basule' Cornel diidx loonu xho baluiloj te angl xten Dios lojni lagajc rolijzni. Räpp angl xten Dios lojni: "Baxhal tiop dade' chää guedx Jope te chaxireni Simón ni rniireni Pedr. ¹⁴ Laani siniini xtidx Jesucrist te gacebuul con resa'lus xhini'c nanab gunlu te guslaa Dios la'tu lo rextojltu."

¹⁵ Che gusloj cagusule'ä xtidx Dios lojreni, biu' Sprit Dxan xten Dios nen lastoorení si'c biu'ni lastoonu galooli. ¹⁶ Dxejcti banaj lazä rextidx Dad Jesucrist che najni: "Juan abatiobnis con nistis, biädlar narä suxhalä Sprit Dxan xten Dios te cuääzni nen lastootu."

¹⁷ Dxejc räjpza Pedr:

—Palga badeed Dios Sprit Dxan xtennai lojreni si'c baniidxni Sprit Dxan xtennai loonu che huililajznu xtidx Jesucrist, ¿cu narä? te niäpä lo Dios: "Na'c gudeedlu Sprit Dxan xtenlu lojreni."

¹⁸ Che biejn diajg reben Jerusalén redidxga, biäuu ro'reni, dirureni nidilnäj Pedr. Alga gulä'preni xpala'n Dios, räjpreni:

—Näjza rebenzijt nani digac rexpejñ Israel abasaan Dios gusiechljazreni te guibaññäjreni Dios par tejjpas.

Rexpejñ Jesucrist ni yu' guedx Antioquia

¹⁹ Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx

Fenia, näjza lo guedx Antioquia sa'csi cadejdreni trabajwdx. Basule'reni rextidx Jesucrist lojtis rexpejñ Israel. ²⁰ Lojreni nadxaag gaii ben Chipre, näjza gaii ben Cirene. Redee bidzujn guedx Antioquia. Ro'c gusloj caniireni lo benzijt nani rnii didx griegw. Basule'reni lo rebenzijtga guiraa xcuent Jesucrist. ²¹ Gucnäj Diosreni caniireni xtiidxni. Xhidajl rebejngä huililajz xtidx Jesucrist, basoobreni xtiidxni.

²² Che biejn diajg rexpejñ Jesucrist ni yu' guedx Jerusalén rililajzreni, baxhalreni Bernabé guedx Antioquia. ²³ Che bidzujn Bernabé guedx Antioquia, bibalazduxhni che bahuiini xho cayunnäj Dios rebejngä. Dxejcti balijdx Bernabéreni: gutijp lajzreni gusoobreni xtiidxtis Jesucrist. ²⁴ Bensa'c najc Bernabé. Rililazduxhni xtidx Jesucrist. Racnäjduhx Sprit Dxan xten Diosni. Xhidajl rebejngä huililajz xtidx Jesucrist guejdxga.

²⁵ Che birii Bernabé guejdxga, huijin guedx Tarso satiilni Saulo. ²⁶ Che bidzälini Saulo, huinänini guedx Antioquia. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidalduxh bejn. Ganid benguejdxga gulälaj "Cristianos" renani rililajz xtidx Jesucrist.

²⁷ Nen redxejga birii gaii dade' nani rnii xtidx Dios. Guedx Jerusalén biriireni, bidzujnreni guedx Antioquia. ²⁸ Huisulii te dade'ga ni laa Agabo. Gucnäj Sprit Dxan xten Diosni te guniini siääd te guberni guideb guedxliuj. Luxh gujc gubijnga nen reijz ni gunibee reii Claudio ni sajcrú.

²⁹ Dxejcti rexpejñ Jesucrist ni rbajz guedx Antioquia bejn xhigab cade tejreni gudeed meel chää lo rexpejñ Jesucrist ni rbajz nen reguedx Judea. ³⁰ Batojpreni meel, baxhalrenini lo rebengool ni rnibee rexpejñ Jesucrist ro'c. Saulo näjza Bernabé huinä meelga che huijreni Judea.

12

Gujt Jacoob, biäu Pedr neñ latzguuib

¹ Nen redxejga, trabajwdx bateed reii Herodes gaii rexpejñ Jesucrist. ² Gunibeeni gujt Jacoob betz Juan, biru' guejnni. ³ Che bahuii Herodes bibalazduxh rexpejñ Israel sa'csi bagu'tni Jacoob, gunibeeni gunazgajcreni Pedr. Dee gujc nen redxe lanij

che rajwreni yätxtiil ni di saguij. ⁴ Che gunaazreni Pedr, biäuni neñ latzguiib. Gunibee Herodes biääd tajp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Bejn Herodes xhigab cuääni Pedr te guetni nez loj rexpejn Israel che ted lanij. ⁵ Yu'ti Pedr neñ latzguiib, dxejcti durtis cabejdx, canab rexpejn Jesucrist lo Dios xcuent Pedr.

Gulää Dios Pedr neñ latzguiib

⁶ Bidzujinti dxe bispr dxej ni rlajz Herodes nibää Pedr nez loj rexpejn Israel. Yäälganagayejs Pedr galää tiop soldaad. Caden naliib guiro'p naa Pedr. Stiop soldaad canäj ro' latzguiib. ⁷ Chela baluiloj te angl xten Dios, bianij te bajl nani basanij neñ latzguiib. Dxejcti gunaazni xhajcw Pedr, basniibnimi te gubajni. Räjpnii lo Pedr:

—Basquejnga, huistie.

Dxejcti bixec recaden, bitejbreni naa Pedr. ⁸ Räjpnii xangl Dios lo Pedr:

—Gojt xhajblu, baläj xcura'chlu.

Si'c bejn Pedr, dxejc räjpnii xangl Dios lo Pedr:

—Gojt xhablajzlu, gudanajl narä —räjpnii.

⁹ Biriitini latzguiib sanajlni angl xten Dios. Niluxh dini gun xhigab gulipac nani bejn xangl Dios. Bejnni xhigab pet canixcalni. ¹⁰ Gudejdreni nez loj te soldaad, gudedgajcreni nezloj steeni, dxejc bidzujreni ro' puertguiib xten latzguiib nani caj lo nezyuj ni rdejd galää guejdxga. Xtebca bixal pueretroga, biriireni gusajreni tebnezyuj. Dxejcti te squiin gunitloj xangl Dios. Xtebtis Pedr sasaj lo nezyuj. ¹¹ Dxejcti si'cni gubajni Pedr, bejnni xhigab:

—Naj sii nanä baxhal Dios te xanglni baslaa narä ladznaa Herodes te digacdii gun rexpejn Israel nani rlajzreni gunnäjreni narä.

¹² Che gucbee Pedr xhi gusajcni, huijni rolizj Marii, xnan Juan ni rniireni Marcw. Ro'c nadxagsa' xhidajl rexpejn Jesucrist, cabedx-canabreni lo Dios xcuent Pedr. ¹³ Cagusejz Pedr rolä', dxejc gubig te dxa'p ni laa Rode, bacuadiajgni ro lä'.

¹⁴ Che biembee Rode xse' Pedr, sa'csi bibalazduxhni, biallajzni nuxhalmi ro lä'. Alga baxunni biusacni neñ yu', räjpnii lojreni:

—Pedr suga' ro lä'.

¹⁵ Dxejcti räjpnii lo Rode:

—Yejclu cayajc.

Dxejcti duurtis gunii dxape'ga suga' Pedr ro lä'. Dxejcti räjpnii loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

¹⁶ Dxejcti lältis cagusejz Pedr ro lä'. Che baxhalreni ro lä' bidxeloduxhreni bahuiireni lo Pedr. ¹⁷ Dxejcti bazäab Pedr naani te na'cru jiejjyreni. Dxejc bij Pedr diidx xho baxhal Dios ro' latzguiib. Dxejc räjpnii:

—Colchaye'tz lo Jacoob näjza lo rexpejn Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

¹⁸ Che bara yääl, rsildooru, bieiduxh resoldaad sa'csi direni gan xho gujc birii Pedr neñ latzguiib. ¹⁹ Gunibee Herodes huitiilreni Pedr, gunabdiidxzani lo resoldaad xho gujc birii Pedr, dxejc gunibeeni gujt resoldaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

Gujt Herodes

²⁰ Bachechdukh reben Tiro näjza reben Sidón Herodes, ni'cni diruni gusaan guto' rebejn nez cadro rnibeeni xhi gau reben Tiro näjza reben Sidón. Ni'c biääd xhidajlreni te guiniabreni jiäjil lajzni, te na'cru guidxe'ch Herodes lojreni. Abenxgaereni xamiigwreni Blasto, mos ni yu' lo reii Herodes, mos ni sajcruso lo guiraa rexmos Herodes. Guninäj Blasto Herodes xcuentreni te na'cru guidxechnäj Herodes rebejng. ²¹ Basoobtini te dxej te guininäjneni. Dxejga gojt Herodes xhajb reiini, gurejni lo xyacxhil reiini. Dxejcti gusloj caniini didksa'c loj rebejng. ²² Guredxa' rebejn räjpnii lojni:

—Huenduxh najc diidxre. Guejblu najc te dios, xhet xtiidxi nigung najc diidxre.

²³ Lagajc dxejc biääd te angl xten Dios, bejnni gusloj cayacxhuu Herodes, gudajw rebisiuj Herodes, gujtni sa'csi basaanni gunii rebejn najcni te dios, sa'csi dini niliä'p xpala'n Dios.

²⁴ Xhidajl bejn biejn diajgnii xtiidx Dios, huililajzreni xtiidx Dios.

²⁵ Che gulujx badeed Bernabé näjza Saulo meel ni batojp reben Antioquía lo reben-gool, biriireni guedx Jerusalén. Sanäreni Juan ni rniireni Marcw lo guedx Antioquía.

13

*Gule Sprit Dzan xten Dios Bernabé näjza
Saulo*

¹ Lo rexpejn Jesucrist ni rdxaaq sa' guedx Antioquía guyu' gaii niguii ni gunii xtidx Dios, näjza gaii niguii ni rusule' xtidx Dios loj guiraa rexpejn Jesucrist. Loj redee nadxaag Bernabé, näj Simón ni rniireni Negr; näj Lucio, ben Cirene; näj Manaén ni gulanäj reii Herodes gujcni si'c bejtzni; näjza Saulo. ²Bidzujn te dxej cagucua'nreni laj ni cabedx-canabreni lo Dios, dxejc räjp Sprit Dzan xten Dios lojreni:

—Colcua Bernabé näjza Saulo te gunreni dzuuun ni rlazä gunreni.

³ Che gulujx bacua'nreni, che gulujxza guredx-gunabreni lo Dios, batzuubreni naareni yejc guiro'preni, te si'c baxhalreni Bernabé näjza Saulo te guluiireni xtidx Dios ste'ca lajt.

*Guiro'preni baluui xtidx Dios lo reben
Chipre*

“Baxhal Sprit Dzan xten Dios Saulo näjza Bernabé guedx Seleucia. Ro'c biu'reni neñ barcw, sääreni nez yuj ni tre' galäii nisdoo, ni laa Chipre. ⁵Che bidzujnreni Chipre, biu'reni guedx Salamina. Ro'c basule'reni xtidx Dios nen guiraa rexquidoo rexpejn Israel. Näj Marcw gucnäjreni. ⁶Che cuansajreni guideb yuj Chipre, bidzujnreni guedx Pafos. Ro'c bidxaagreni te niguii ni laa Barjesús. Najcni te bidxaa, najczani te xpejn Israel. Cagusgueeni rebejn guejdxga, räjpni xtidx Dios caniini, niluxh dini gac xtidx Dios. ⁷Bidxaare nu'ch lo rexpejn Sergio Paulo, nani najc gubernadoor xten Chipre. Nasinduxh Sergio Paulo. Gure-jdxni Bernabé näjza Saulo, sa'csi rlajzni jiejn diajgni xtidx Dios. ⁸Dxejti Barjesús, ni laaza Elimas, bidxagdijlni guiro'preni sa'csi di rlajzni chalilajz Sergio Paulo xtidx Dios. ⁹Saulo, nani laaza Pabl, bahuitzu'tz loj Barjesús. Batijp Sprit Dzan xten Dios lastoo Pabl, räjpni loj Barjesús:

¹⁰—Rusgueduxhlu rebejn, najclu benlat-siaj, benguidxduxhlu, najclu xi'n Satanás, bendxbab ni rnibee. Rdxechnäjzalu, guiraa recossa'c xten Dios. ¿Guc cuääz guxhiidlu xtidxlíi Jesucrist te di chalilajz bejn xtidx Jesucrist? ¹¹Naj siääd xcastiigw Dios yej-clu. Xhidajl dxej sicájy lojlu, xhetlliidi ftilu —räjp Pabl.

Gujcsi räjpni si'c, bicäigajc lojni. Dxejtiru cuansajni caguilni chu guiniaaz naani guluiini canejz chääni. ¹²Che bahuui Sergio Paulo xhi gusajcni, huililajzni xtidx Dios, sa'csi bidxeloduxhni xcient xcälru-luii Dios.

Bidzujn Pabl näjza Bernabé guedx Antioquía xten distrit Pisidia

¹³ Che baluux Pabl näjza resa'ni xtzuun-reni guedx Pafos, biu'reni neñ barcw, gude-jdreni lo nisdoo, sääreni guedx Perge neñ estad Panfilia. Che bidzujnreni guejdxga, gubisac Juan, ni rniireni Marcw, Jerusalén.

¹⁴ Dxejti birinäj Pabl resa'ni guedx Perge, sääreni guedx Antioquía neñ distrit Pisidia. Dxejc te dxe sabd, dxej ni rusilajz rexpejn Israel, biu'reni neñ xquidoo rexpejn Israel, ro'c gurejreni. ¹⁵Che gulujx bil te dade' reguijtz xten Dios ni laa leii näjza reprofe't, baxhal reguxhtis xten guidoo chu huiga-jnreni, räjpreni lo Pabl näjza Bernabé:

—La'tu sa'nu, palga rajptu te diidx ni guliwdx rebejnre, colguiniini.

¹⁶Dxejc huisulii Pabl, guläsni naani bejnni seen lo rebejn te cuadiajgreni xtiidxni. Räjp Pabl lojreni:

—Colcuadiajg, la'tu rexpejn Israel, guiraatu ni rajn Dios. ¹⁷Galooli gule Xtos rexpejn Israel retotxadgoloonu. Luxh che guläjzreni nación Egipto, bidalduxh retotxadgoloonu. Gucnäjdukh Diosreni bejnni remilagwr, te gulääniren i guedx Egipto. ¹⁸Tiuu ijz guläjzreni lo reyubijdz. Xhidajl huält direni nusoob xtidx Dios, niluxh empac gucnäjza Diosremi. ¹⁹Guyu'gajtz nación guläjz neñ reyuj ni laa Canaan. Dios bejn gunitloj reguejdxre, te gudisni reyuja loj retotxadgoloonu.

²⁰Dxejti badeed Dios reniguii ni gujc juejz, gunibeereni rebejn. Tajp gayugarol ijz gunibeereni rexpejn Israel. Samuel nani gunii xtidx Dios gujc lult juejz. ²¹Dxejti gunab rexpejn Israel te reii lo Dios te guinibee reiiga lojreni. Badeedti Dios Saúl xi'n Cis, sa' toBenjamín. Gunibeeni tiuu ijz. ²²Che badzucaj Dios Saúl, badeedni gunibeetoreii David. Räjp Dios: “Agucombeä David xi'n Isaí rujn tejsi xhigab con narä. Susoobni xtidxä sujnni guiralii ni rlazä gac.”

²³Räjpza Pabl:

—Galooli bia'n diidx lo rexagdoo David guxhal Dios te bejn ni gudzucaj xtojlnu, ni guslaa nuure lo dojl. Naj aguzojb diidxga. Jesucrist najc bejnga, ruzducajní xtojlnu, ruslaani nuure lo dojl.²⁴ Che gusloj cagulijdx Juan rebejn, baluiini nanabpac gusiechlajz rexpejn Israel, tiobniseni te jia xtojlneni.²⁵ Niluxh guxii riäadx guluux Juan dzuun ni badeed Dios gunni che rájpni lo rebejn: “¿Chu rujntu xhigab naäc narä? Dina gacä Crist nani bia'n diidx guxhal Dios. Colhuii, detzä siääd tej ni sadcuxhru loä; nicla gac surloä te cuää xcura'chni.”

²⁶ Räjzpa Pabl:

—Rniä lojtu sa'ä, rexagdoo toAbram, näjza lo chutis ni rajn Dios, loonu baxhal Dios xtiidxi ni rusule' xho ruzducaj Jesucrist xtojlnu, xho ruslaani nuunu lo dojl.²⁷ Rebejn Jerusalén, näjza renani rnibeereni, direni niembee Jesucrist nani rnibee, dizareni niacbee diidx xcient Dios nani bacuaa renigui ni gunii xtidx Dios agujc xchero, luxh rolreni xtidx Diosga gasob sabd. Niluxh che bagu'treni Jesucrist, guzjob xtidx Dios ni caj lo guijtzga.²⁸ Balidxreni Pila't ju'tni Jesucrist, luxh xhet bejndini te guetni.²⁹ Che bagujc guiraa ni caj lo guijtz xcient Jesucrist, gulätreñi Jesucrist lo cruz, bacua'tzrenini neñ baa cuä' te guilaj.³⁰ Dxejcti guläs Dios Jesucrist lo rebengut, te naj rusule'reni diidx xcient Jesucrist.

³² 'Naj siopnänu xtidx Diosre lojtu te guibalajztu. Agujc xchero bia'n Dios diidxre con retoxtadgoloonu.³³ Guläs Dios Jesucrist te huile' diidxga par nuure, rexagdooreni. Agujc xchero gunii Dios te diidx ni caj neñ Salmo ni bacuaa toDavid. Lo Salmo ni rojip rájp Dios: “Luj najclu xi'nä. Nadxej guleälu te guinibeuu.”

³⁴ Räjzpa Pabl:

—Dxejcru stee lajt caj xcient ni guläs Diosni lo rebengut te nuncru guetni. Scree bacuaa te nigui, rájp Dios: “Sunidxä recossa'c lojlu si'c ni bia'nä diidx con toDavid.”³⁵ Ni'cni bacuaaza toDavid neñ stee Salmo ni gunii Dios, guniini: “Dipaclusaan gudx tiejxh Xi'nlu nani sanälajzlu.”

³⁶ Che gulujx gunibee toDavid lo retoxtadgoloonu, si'cni badeed Dios gunni, dxejc gujtni. Biga'tznäjni retoxtadgolooni. Niluxh guyujdx tiejxh toDavid.³⁷ Niluxh guläs Dios Jesucrist lo rebengut, ni'c di tiejxhni niujdx. ³⁸ Ni'cni colyacbee, la'tu resa'ä, Jesucristre, bejn ni caniä xcuentni, laani ruzducajní rextojlnu.³⁹ Chutis ni rililajz xtidx Jesucrist ruslaa Jesucristni loj guiraa rextojlni nani digacdi guibicaj mascä rusuobni guiralii ni caj lo leii xten toMoisés.⁴⁰ Colsusin te na'c sajctu recos ni caj lo guijtz ni bacuaa te nigui nani bacuaa xtidx Dios:⁴¹ Colhuiila, la'tu ni ruxhiznäj xtidxä colguidxeloj, colnitloj, sa'csi naj ni nabajntu sunä te dzunro, te milagwr nez lojtu, niluxh dipac lajztu chalii, mascä jiääd chu gusule'pacni lojtu.

⁴² Gulujxti xtidx Pabl, biunejz rebejn. Che birinäj Pabl Bernabé biädnri rebejnre lojreni, räjpreni:

—Jiädsactu ste xmaan te gusule'runtu rediidxre loonu.

⁴³ Che care'ch rebejngá, xhidajl rexpejn Israel, näjza xhidajl rebenzijt nani rusuob xtidx Dios si'c rujn rexpejn Israel, biringajlreni Pabl näjza Bernabé. Dxejc balidxreni rebejn ni siädnajlreni, räjpreni lojreni chanuutis chalilajzreni didxlíi xcient Jesucrist.

⁴⁴ Che gojlti stee sabd, dxej ni rusilajz rexpejn Israel, xhidalduxh rebenguejdx bire' te gucuadajgreni guinii Pabl xtidx Dios.

⁴⁵ Che bahuii rexpejn Israel guiraa rebejn ni bire', bidxechlajzreni, gucnadareni. Dxejc gusloj cadxagdijl rexpejn Israel Pabl. Che rniimi te diidx, laareni rniireni “didxxhiini”. Caniyajzareni Pabl näjza Bernabé, caguereni lojreni.⁴⁶ Luxh di Pabl niclaza Bernabé nidxejb. Gusutijptisreni, räjpreni lo rebejn:

—Nungäj ganid lojtu guiniinu xtidx Dios, sa'csi la'tu najctu rexpejn Israel. Niluxh ditu chalilajz xtidx Dios, lagajc la'tu caniitu digacdi guibañäjtu Dios par tejjpas. Ni'c sibiré loonu, te guiniinu xtidx Dios lo rebenzijt ni digac xpejn Israel.⁴⁷ Sa'csi si'c agunibee Xtiosnu. Scree caj xtidx Dios lo guijtz:

Suxhalätu te guluiilu rextidxä lo rebenzijt ni digac xpejn Israel,

te chalilajz rebejnga xtidxä,
te laareni lo xtojlreni, cadrotis yu'reni lo
guedxliuj,
räjp Dios.

⁴⁸ Che biejn diajg rebenzijt rediidxre, bibalazduxhreni, gulä'preni xpala'n xtidx Dios. Renani gule Dios galooli huililajz xtidx Dios. Xhidajl najcreni. ⁴⁹ Bire'ch xtidx Dios guideb nez reguejdxga. ⁵⁰ Dxejcti rexpejn Israel balijdx regunaa ni sajcrus, näjza reniguii ni sajcrus nen guedx Antioquia, te bidxechnäjreni Pabl näjza Bernabé, barilaagwreni Pabl näjza Bernabé te biunejzreni guedx Antioquia. ⁵¹ Dxejcti Pabl näjza Bernabé gubijb guxhuj ni'reni si'c te seen te gacbee rebejñ xhet laadi bejnreni. Sät'tireni guedx Iconio. ⁵² Baspaa Dios lajz rexpejñ Jesucrist guedx Antioquia xten Pisidia. Bazutipza Sprit Dxan xten Dios lastooreni.

14

Guyu' Pabl näjza Bernabé guedx Iconio

¹ Che bidzujñ Pabl näjza Bernabé guedx Iconio, biu'reni xquidoor rexpejn Israel. Basule'reni xtidx Dios lo rexpejn Israel näjza lo rebenzijt. Xhidajl rebejnga huililajz xtidx Dios. ² Niluxh sgaii rexpejn Israel nani di chalilajz xtidx Jesucrist bali-jdx rebenzijt te bidxechnäjreni rebejñ nani huililajz xtidx Jesucrist. ³ Ni'cní bia'n Pabl näjza Bernabé lo guejdxga balti dxej. Gusutz'u'tz guiro'preni guniireni xtidx Jesucrist. Badeed Dios bejnreni redzunro, remilagwr xcient xcälrnibee Dios te bahuii bejñ cayacnäj Diosreni. ⁴ Guyu' tiop cuaa bejñ nen guejdxga. Gala' guejdxga huililajz xtidx Dios nani gunii Pabl näjza Bernabé, ⁵ dxejc sgala' guejdxga bacuadiagj xtidx rexpejn Israel. Dxejc bire' te cuaa rexpejn Israel, näjza benzijt, näjza reguxhtis, rlajzreni nidxagdijlreni reastop, rlajzzareni nucuareni guij yejc Pabl näjza Bernabé. ⁶ Dxejc gucbeereni xhi rlajzreni gunreni, ni'c baxunreni ro'c huijreni nez reguedx Licaonia, ro'c bidzujnreni guedx Listra, guedx Derbe, näjza reguejdx ni're' nejzga. ⁷ Che bidzujñreni ro'c, cadrotis huijreni basule'reni xtidx Dios.

⁸ Guedx Listra guyu' te niguii ni digacdi sa, che gojllini racxhuu ni'ni.

⁹ Cagcuadiagj niguiiga xtidx Pabl. Che

bahuii Pabl lojni, gucbee Pabl rililajz niguiiga xtidx Dios, rililajzzani sajc gusiajc Diosni. ¹⁰ Dxejcti dip gunii Pabl lojni, räjpni:
—¡Huisulii!

Dxejcti huisuyälni, gusajni. ¹¹ Che bahuii rexpejn Licaonia xhi bejn Pabl, lagajc xti-dixreni guniireni, räjpreni lo sa'reni:

—¡Redios abiädluiloj loonu si'c niguii!

¹² Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni. ¹³ Dxejcti te bixhojz xten xquidoor Júpiter cua' tiop gon najl guij guejreni. Biädnäi regonga ro' xquidoor Júpiter ni suga' ro' guejdxga. Rebejñ näjza bixhojz rlajzreni nugu'treni regon te ganreni Bernabé näjza Pabl si'c rajñreni rextiosreni. ¹⁴ Che biejn diajg rea-post xhi cayajc, batäjsreni tla' xhajbreni si'c te seen direni guichaglajz xhi cayujn rebejnga. Ruxujreni bidzujñreni lo rebejñ, räjpreni lo rebejñ:

¹⁵ —Colcuadiagj xtiidxnu. ¿Xhicient cayujn guejbtu recosre? Ni lagajc sabejntu najcnu, lagajc bejñ guedxliuj najcnu. Rusule'nu xtidx Dios lojtu te lacuua ruzuxhijbtu lo redios ni runchee bejñ, guzuxhijbtu lo Gueb Dios ni nabajñ par tejpas, ni benchee xhaguibaa näjza guedxliuj, näjza nisdoo, näjza guiraliñ ni yu' lojreni, nenreni, ¹⁶ Galoo basaan Diosga gun reben guedxliuj si'ctis ni rlajzreni. ¹⁷ Huen najc Dios, rudeddi nisguij, rudeddi rajc xhi rajw rebejñ, rdxaj xque'reni, rbaa lajzreni. Ni'cni riembeepacnu yu' Dios.

¹⁸ Xhidajl diidx guniireni te chäii bejnreni gaan guredxi rebejñ, sa'csi rlajzpac rebejñ nugu'treni regon.

¹⁹ Dxejcti bidzujñ gaii xpejn Israel siää-dreni guedx Antioquia näjza guedx Iconio. Baquilreni reben Listra te gcuuareni guij yejc Pabl. Bacuuareni guij yejc Pabl, gudobxhajxhrenini guläärenini ro' guejdxga, sa'csi naareni agujtni. ²⁰ Dxejc lañ ni suga' rexpejn Jesucrist guideb gabri cadro naga' Pabl, huistieni, biusacni guejdxga. Che bara yääl, huinäni Bernabé sääreni guedx Derbe.

²¹ Che bidzujñreni guejdxga, basule'reni rextidx Dios lo rebejnga. Xhidajlreni huililajz xtidx Dios. Dxejc gubi'reni, biu'reni guedx Listra, näjza guedx Iconio, näjza guedx Antioquia. ²² Balijdxreni

rebejn nani huililajz xtidx Dios, gucnäjreni rebejnga te batiplajz rebejnga, räjpreni lo rexpejn Jesucrist:

—Colsnaj lajztu xtidx Dios. Susacsí rebejn la'tu, sidejdtu trabajw te jiu'tu cadro rnibee Dios.

²³ Dxejcti gule reapost gaii dade' ni najc bengool te fiireni rexquidoo xpejn Jesucrist. Che gulujx bacua'nreni, lal ni guredx-gunabreni lo Dios, basadiidxreni rebejn, räjpreni: "Gacnäj Jesucrist la'tu ni huililajz xtiidxni."

Gubisac guiro'preni guedx Antioquía xten Siria

²⁴ Che gudejd Pabl näjza Bernabé distrit Pisidia, bidzujnreni estad Panfilia.

²⁵ Basule'reni xtidx Dios lo reben Perge, dxejcti biriireni ro'c sääreni guedx Atalia.

²⁶ Che bidzujnreni guejdxga, biu'reni nen barcw, gudejdreni lo nisdoo te bidzujnreni stee guejdx ni laaza Antioquia. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuentreni, gacnäj Diosreni, baxhalreni Pabl näjza Bernabé chasule'reni xtidx Dios nen guiraa reguejdx. Naj abaluux Pabl näjza Bernabé dzuunga. ²⁷ Che bidzujnreni guejdxga, bachagsa' rexpejn Jesucrist. Dxejcti bijreni diidx lo rebejnga guira'ti ni bennäj Dios laareni, näjza xho badeed Dios huililajz rebenzijt nani digac rexpen Israel.

²⁸ Xchej biannäjreni rexpejn Jesucrist ro'c.

15

Bidxagsa'zareni neñ guedx Jerusalén

¹ Neñ redxejga bidzujn gaii dade' ni siääd nez Judea, caguluiireni rexpejn Jesucrist, räjpreni lojreni:

—Palga ditu gusäl bee si'c gunibee to-Moisés, dios guslaatu lo xtojltu.

² Che biejn diajg Pabl näjza Bernabé rediidxga, bidxagdijlreni redade'ga. Dxejc gule rexpejn Jesucrist Pabl näjza Bernabé näjza sgaii rexpejn Jesucrist chääreni guedx Jerusalén te guininäjreni reapost näjza rebengool te guidon xho gac xcient beega.

³ Huisunejz rexpejn Jesucrist ni najc beñ Antioquia Pabl näjza rebejn ni sanäjreni, sääreni guedx Jerusalén. Gudejdreni reguedx Fenicia, näjza reguedx Samaria. Cadrotis gudejdreni bijreni diidx lo rexpejn

Jesucrist ahuililajz rebenzijt xtidx Dios. Bibalazduxh rexpejn Jesucrist che biejn diajgreni rediidxga.

⁴ Che bidzujnreni guedx Jerusalén, huichagloj rexpejn Jesucristreni. Dxejcti bij Pabl näjza Bernabé diidx lo reapost, lo rebengool nani rnibee rexpejn Jesucrist, näjza lo rexpejn Jesucrist, guiraa redzunro nani cayunnäj Diosreni. ⁵ Dxejc huisulii gaii refarisee ni ahuililajz xtidx Dios, räjpreni lojreni:

—Che chalilajz rebenzijt xtidx Dios, nanab churení bee, nanabza gusoobreni leii xten toMoisés.

⁶ Dxejcti bachagsa' reapost näjza rebenzool nani rnibee rexpejn Jesucrist, te don xho gunreni. ⁷ Huisulii Pedr, räjpni lojreni:

—Guejbtu, resa'á, anajntu xho bejn Dios gubalti ijz. Gule Dios narä lo guirauan te gusule'á xtidx Dios loj rebenzijt, te chalilajzreni xtidx Dios. ⁸ Luxh Dios, nani numbechee lastoo guiralii bejn, badeed seen huililajzpac rebenzijt xtiidxni. Badeed Dios Sprit Dxan xtenni lojreni si'c te seen te gacbee bejn najcreni xpejnni. Sigac baniidxni Sprit Dxan xtenni loonoo galoo, si'cza badeednini lo rebenzijt. ⁹ Sigajc rinälajz Dios nuunu, sigajcza rinälajzni rebenzijt. Che huililajz rebenzijt xtiidxni, basia Dios lastooren. ¹⁰ Naj xhicuent ruseedtu Dios, ä? Di niajcdi nisanäj retoxtadnu releiiga, digacdiza chosenäjnu releiiga naj. ¹¹ Xhicuent rlajztu chasanäj rebenzijt releiiga? ¹² Xhet si'cti gacni sa'csi Dios ruslaa nuure lo xtojlnu che rililajznu xtidx Jesucrist, luxh si'cza ruslaani rebenzijt lo dojl che rililajzreni xtidx Jesucrist —räjp Pedr.

¹² Che gulujx gunii Pedr, dxitis gurej rebejn, bacuadiajgreni xtidx Bernabé, xtidx Pabl. Guiro'preni bijreni diidx xho cayujn Dios redzunro, remilagwr nez lo rebenzijt.

¹³ Che gulujx gunii guiro'preni, xhet guniidi rebejn. Jacobtis räjp lojreni:

—Sal'á, colcuadiajg xtidxä. ¹⁴ Agunii Simón ni rnireni Pedr lojtu xho ganiddoo baxhal Dios laani lo rebenzijt te gurejdx Dios rexpejnni ni nadxaag lo rebenzijt.

¹⁵ Luxh si'cza caj lo guijtz. Agujc xheroduxh bacuaa renigui nani gunii xtidx Dios, che räjpni:

¹⁶ Sidzujn dxej ni guibisacä.

Sunä guzuxhijb guiraa rebejn nez loä si'c
bazuixhijb rexpejn Israel che gubajn
toDavid.

Si'c gunä,
¹⁷ te jiädgajn rebejn narä te gacä Xtiosreni,
näjza guiraa rebenzijt nani najc rexpenä
jiädgajn narä,
¹⁸ si'c räjp Dios nani galooli baluiloj guiraa
redzuunre.

¹⁹ Dxejcti räjp Jacoob lojreni:

—Dee najc xhigab ni runä. Na'cru
gusieednu rebenzijt ni cagusiechlajzreni,
renani salilajz xtidx Dios. ²⁰ Gucuaanu te
gуйitz, jie'tzuu lo rebenzijt: Na'c gaureni
xhi cos ni basuj bejn loj rebanäjb, sa'csi
dinu chalilajz xcient rebanäjb. Na'cza
guesnäjreni bejn ni di gac chäälni, na'cza
gaureni bää'l nani gurerejin, na'cza gaureni
rejn. ²¹ Dee gucuaanu te di guche'chreni
xpejn Israel sa'csi nen guiraa reguejdx ga-
looli yu' rexpejn Israel nani rol leii xten
toMoisés gasob sabd —räjp Jacoob.

²² Che biejn diajg reapost näjza rebengool ni
rnibee, näjza guiraa rexpejn Jesucrist
xtidx Jacoob, bichaglajzreni xtiidxnii.
Dxejcti gulereni tiop sa'reni chanä Pabl
näjza Bernabé guedx Antioquia. Gulereni
Judas ni rnireni Barsabás näjza Silas.
Guiro'preni najc bejn ni sajcru loj rex-
pejn Jesucrist. ²³ Dxejcti bejreni gijitz
huinäreni. Bacuareni rediidxre:

“Nuure reapost, näjza rebengool ni
rnibee, näjza rexpejn xquidoo Jesucrist
ruxhalnu xtixtios lojtu, resa'nu nani
rbäjz guedx Antioquia näjza estad Siria
näjza estad Cilicia. ²⁴ Rucuaanu gijitzre
sa'csi biejn diaagnu birii gaii resa'nu ree
biädsiedreni la'tu con xtiidxreni, cayu'tu
yärsia' sa'csi najreni lojtu nanab chutu
bee si'c gunibee toMoisés, guibajñzatu
si'c rnii leii xten toMoisés. Xhet nuudinu
gunibeenu jiädniirenii si'c. ²⁵ Ni'cni biennu
xhigab guxhalnu lojtu tiop dade' ni gulenu
loj resa'nu te chanäreni Bernabé näjza
Pabl, nani sanälaaznu. ²⁶ Agajc balti huält
rlajzreni nugu'treni Bernabé näjza Pabl,
luxh direni guidxejb gusule'reni xtidx
Jesucrist. ²⁷ Naj ruxhalnu Judas näjza Silas
lojtu. Laareni susule'za guiraa rediidxre
lojtu. ²⁸ Tejsi najc xhigabnu con Sprit
Dxan xten Dios. Di rlaaznu gutaalrunu
leii ni chasanäjtu. Releiitis nani nanab

rusoobnu rucuaanu lojtu. ²⁹ Na'c gautu
xhicos ni basuj bejn lo rebanäjb, sa'csi
dirunu chalilaaz xcient rebanäjb. Na'cru
gautu rejn, na'cza gautu bää'l nani gurerejin,
na'cza guesnäjtu nani digac chäältu. Palga
gusoobtu recosre, laaca cayujntu. Sacré
guibajñtu. Sujianäjtu Dios.”

³⁰ Dxejcti basadiidx rexpejn Jesucrist Ju-
das näjza Silas huinäreni Pabl näjza Bern-
abé guedx Antioquia. Che bidzujñreni
ro'c batojpreni guiraa rebejn nani huililajz
xtidx Dios te bilreni gijitzga lojreni. ³¹ Che
biejn diajg rexpenit Jesucrist diidx ni caj
lo gijitzga, bibalazduxhreni sa'csi gulecdxi
diidxga lastooreni. ³² Dxejcti basule' Judas
näjza Silas xtidx Dios lojreni, sa'csi ruded
Dios xtiidxnii loj guiro'preni. Xhidajl di-
idx gunireni te balidxreri rexpejn Jesu-
crist. Lacti gulecdxi rediidx ni gunireni
lastoo guiraa rexpejn Jesucrist. ³³ Ro'c
bia'nreni xchej, dxejcru cuäjb rexpejn Je-
sucrist gubi'reni te gudeedreni xtixtios loj
reni baxhalreni.

³⁴ Dxejc Silas bejn xhigab jia'nni ro'c.
³⁵ Luxh Pabl näjza Bernabé bia'n guedx
Antioquia. Guiro'preni baluui, basule'reni
xtidx Dios loj rebejn. Guyu'za sgaii dade' ni
gucnäjreni.

Huihuisac Pabl rexpejn Jesucrist nen
guiraa reguejdx

³⁶ Che gudejd xhidajl dxej, räjp Pabl lo
Bernabé:

—Do'o guibi' lo guiraa reguejdx cadro
basule'nu rextidx Dios te chohuiinu don
xho yu' rexpejn Jesucrist.

³⁷ Niluxh Bernabé rlajz chanäreni Juan ni
laa Marcw. ³⁸ Naaddi Pabl chääni, sa'csi birii
Marcw lojreni che guyu'reni nez Panfilia,
diruni nisianäj Pabl näjza Bernabé. ³⁹ Dxejc
gudildiidxreni. Gubicajtireni lo sa'reni.
Ni'c sanä Bernabé Marcw, biu'reni nen
barcw, sääreni Chipre ni re' galäii nisdoo.

⁴⁰ Dxejcti Pabl gule Silas te sanänini. Badeed
rexpejn Jesucrist xtixtios lojreni, räjpreni
gacnäj Diosreni. ⁴¹ Lal ni sasajreni gude-
jdreni guiraa reguedx Siria näjza guiraa
reguedx Cilicia, ro'c gucnäjreni guiraa rex-
pejn Jesucrist, basule'rurenii xtidx Jesucrist
lojreni.

¹ Bidzunsac Pabl näjza Silas reguedx Derbe näjza Listra. Ro'c bidxaagreni te xpen Jesucrist ni laa Timoteu. Xnanni najc beñ Israel ni huililajz xtidx Jesucrist. Xtadni najc ben griegw. ² Didxsa'ctis rnii rexpen Jesucrist ni yu' Listra näjza Iconio xcuent Timoteu. ³ Klajz Pabl chanäni Timoteu. Dxejcti basäl Pabl bee Timoteu te gujcni si'c xpen Israel, te xhet naadi rexpejn Israel, sa'csi guiraareni nanchee xtad Timoteu najc beñ griegw. ⁴ Che bidzujreni cade tej reguejdx, basule'reni xtidx reapost näjza rebengool nani rnibee xpen Jesucrist guedx Jeurusalén, te gusoob rexpejn Jesucrist diidx ni bacuareni lo guijtz. ⁵ Bazutijp xtidx Dios lastoo renani huililajz xtidx Jesucrist. Guixe-guixee xhidaljru beñ huililajz xtidx Dios xcuent Jesucrist.

Lo te bacål gunii te niguii lo Pabl

⁶ Che gudejdreni distrit Frigia, näjza es-tad Galacia, di Sprit Dxan xten Dios nusaan nusule'reni xtidx Jesucrist neñ reguedx Asia. ⁷ Bidzujntireni gajxh estad Misia. Dxejc rlajzreni nijreni estad Bitinia, niluxh di Sprit Dxan xten Dios nusaan nijreni ro'c. ⁸ Ni'c gudejdreni stelaad estad Misia, bidzujnreni guedx Troas. ⁹ Te yääl si'c lo te bacål bahuii Pabl suga' te beñ Macedonia. Canabdukh niguiga lo Pabl, räjpni:

—Gudaa ladxa, estad Macedonia, te gac-näjlu nuunu.

¹⁰ Che bara yääl ni gunixcal Pabl, gudilgacnu te barcw te chonnu estad Macedonia, sa'csi gucbeenu Dios najc nani caguxhal nu-ure te gulüini xtidxnii lo reben Macedonia. Narä, Lucas, ni cagucuaä rediidxre, gusanää Pabl näjza Silas.

Che guyu' Pabl con Silas guedx Filipos

¹¹ Biu'tinu neñ barcw ro' guedx Troas. Bidzunnnu Samotracia, te yuj ni re' neñ nisdoo. Che bara yääl bidzunnnu guedx Neápolis. Ro'c biriinu neñ barcw, ¹² bionnu guedx Filipos, guejdx narii sajcu lo estad Macedonia. Guedx romanni. Ro'c bia'nnu tiop chon dxej. ¹³ Che gojl sabd, dxej ni rusilajz rexpejn Israel, biriinu guejdxga bionnu ro' te gueuu, sa'csi biennu xhigab ro'c jiääd rexpejn Israel te guininäjreni Dios. Ro'c gurejnu, guniinu lo renane' nani bire' ro'c.

¹⁴ Lojreni nadxaag te name' ni laa Lidia, te benzijt ni digac xpejn Israel. Guedx Tiatira siäädni. Ruto'ni ladmuraad ni sacduxh.

Rajn gunaaga Dios si'c rajn rexpejn Israelni. Bacuadajgni xtidx Jesucrist ni cagusule' Pabl. Gucnäj Dios nane'ga te huililajzni xtiidxni. ¹⁵ Birobnisni, näjza guiraa reni rbäjz roliznzi. Dxejc guniini loonu:

—Palga ruhuiitu guliä rililazä xtidx Dios, coltaa rolizä te ro'c cuääztu.

Lacti gunab nane'ga nuunu, ni'c hui-jia'nnu roliznzi.

¹⁶ Te dxej cheni sionnu cadro rninäj beñ Dios, bidxaagnu te dxa'p nani yu' te bendxbab nen lastoomi. Rajp expaxhuaanni meldonx sa'csi rusule' dxa'pga recos ni gajd gac. ¹⁷ Birinajl dxa'pga Pabl näjza nuure. Rbedxa' dxape'ga, räjpni:

—Reniguire najc xmos Dios nani rnibee guideb guedxliuj. Ruluiireni loonu xho laanu lo xtojlnu —räjp dxape're.

¹⁸ Balti dxej birinajl dxape'ga nuure, entis caniini rediidxga lo rebejn. Lacti basieed dxape'ga Pabl, ni'c gubiréni, räjpni lo bendxbab ni yu' nen lastoo dxape'ga:

—Xcient xcälrnibee Jesucrist rniä lojlu: “Birii nen lastoo dxape'ga.”

Lagajc dxejc birii bendxbab nen lastoo dxape'ga.

¹⁹ Che bahuii expaxhuaan dxape'ga diru dxape'ga gun gaan melro, gunaa-zreni Pabl näjza Silas. Dxejcti gudobxhajxhreni guiro'preni nez roguii cadro suga' regu-xhtis. ²⁰ Che bidzunnäjreni Pabl näjza Silas lo regu-xhtis, räjp expaxhuaanni lo regu-xhtis:

—Reniguire najc xpejn Israel. Cayu-jnreni biey lo guejdxre. ²¹ Caguluiiren-i garencu leii nani digacdi gusoobnu sa'csi najcnu beñ roman.

²² Dxejcti bidxtechnäj rebejn Pabl näjza Silas. Gunibee rejuejz gulääreni xhajb Pabl, näjza xhajb Silas, te batijälreni baar guideb tiejxh guiro'preni. ²³ Che gulujx gudin-duxhreni Pabl näjza Silas, biäurení nen latzguiib. Dxejcti räjp regu-xhtis lo regu-xhajg:

—Colgapdzu'tzreni, di gusaantu guiri-reni.

²⁴ Basäl guixhajgreni nen latzguiib. Guyu' ni'reni nen te baräjd ni sojb queed te di guxunreni.

²⁵ Garolyääl guninäj Pabl näjza Silas Dios, gusloj cayolreni dij ni rliä'p xpala'n Dios. Biejin diajg guiraa rebejn ni yu' nen

latzguiib cayolreni.²⁶ Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadro naaz ni'reni.²⁷ Che gubajn guixhajg ni canäj latzguiib, bahuiini naxhal latzguiib, guläani spaad xtensi, te rlajzni nugu'tni lagajc laani, sa'csi naani abadxun reni niäu neñ latzguiib.²⁸ Dxejc guredxa' Pabl, räjpni lo guixhajgga:

—Na'c gunlu si'c. Bahuii, guiraliinu suga'nu ree.

²⁹ Dxejc gunibee guixhajg biääd te bajl te biu'nii neñ latzguiib. Racsejsni biäädni bazuxhijbni nez loj Pabl näjza nez loj Silas.³⁰ Dxejcti gulää guixhajgreni neñ latzguiib. Gunabdiidxni räjpni lojreni:

—¡Colguinii, dade'! ¡Xhini'c nanab gunä te guslaa Dios narä lo dojl?

³¹ Räjp Pabl näjza Silas lo guixhajg:

—Huililajztis xtidx Dios xcuent Jesucrist, luj näjza guiraa reni yu' rolijzlu, te guslaa Diostu lo dojl.

³² Basule' Pabl näjza Silas rextidx Dios lojni näjza loj guiraa rebejn ni yu' rolijzni.³³ Lagajc dxejc, garol yääl, huinä guixhajgreni gudiibni dejtzreni cadro batiuug baarreni. Dxejcti batiobnisreni guixhajg näjza guiraa reni yu' rolijzni.³⁴ Dxejc huinä guixhajgreni rolijzni, ro'c badeedni xhi gudajwreni. Laani näjza guiraa reni yu' rolijzni bibalazduxhreni sa'csi huililajzreni xtidx Dios.

³⁵ Che bara yääl, baxhal reguxhtis stiop guixhajg räjpni lo guixhajg nani cuanäj latzguiib:

—Baslaa reniguiiga.

³⁶ Dxejcti huiye'tz guixhajgga lo Pabl, räjpni:

—Anaj reguxhtis guslaätu. Naj colchäj, gacnäj Dios la'tu, saru chäätu.

³⁷ Niluxh räjp Pabl loj reguixhajg:

—Nuure najczanu ben roman. Batiäjlreni baar detznu nez loj guiraa rebejn. Nicla niniabiidxreni la yu' xhi dojl biennu. Basäureni nuure neñ latzguiib. Leii xten roman di gusaan gac reben roman si'c. Luxh naj rlajzreni guslaereni nuure xhiga'tz. ¡Dinu gurii si'c! Lagajc laareni sujiädslääreni nuunu.

³⁸ Che huiye'tz reguixhajg diidxga lo reguxhtis, bidxebduxhreni che biejn diajgreni ben roman najc Pabl näjza Silas.

³⁹ Dxejcti biääd reguxhtis, gulääreni Pabl näjza Silas, gunabreni jiäjllajzreni. Gunabduxhreni lo Pabl näjza Silas; räjpreni:

—Coljiunejz guejdxre.

⁴⁰ Che biriireni neñ latzguiib, huijreni rolijz Lidia. Balijdxreni rexpejn Jesucrist, gulecdixreni lajz rexpejn Jesucrist. Dxejc biunejzreni guejdxga.

17

Cadxechduxh guiraa reben Tesalónica

¹ Che gudejdreni reguedx Anfípolis, näjza guedx Apolonia, bidzujnreni guedx Tesalónica cadro yu' te xquidoo rexpejn Israel. ² Ro'c basule' Pabl xtidx Dios si'c ni rujnpacni. Chon sabd, dxej ni rusilajz rexpejn Israel, basule'ni xtidx Dios lojreni. ³ Basule' Pabl xtidx Dios ni caj lo gуйjtz ni bacuaa renigui ni gunii xtidx Dios galooli. Caj lo gуйjtzga: "Nanab ted Crist trabajwduxh, guetni, niluxh sibansacni lo rebengut."

Dxejc räjp Pabl lojreni:

—Ruiä lojitu diidx xcuent Jesú; lagajc Jesústre najc Crist —räjpni.

⁴ Yu' rexpejn Israel huililajz xtidx Dios, gusanäjreni Pabl näjza Silas. Näjza xhidalduxh ben griegw nani rajn Dios näjza xhidajl reguna griegw ni sajcru huililajz xtiidxni. ⁵ Luxh yu' rexpejn Israel ni di chalilajz, ni bidxechlajz. Batie'reni gaii benploj, benlatsiaj, bejnreni bieyj nez galäii. Biu'reni rolijz Jasón caguillreni Pabl näjza Silas te cuääreni guiro'preni nez lo rebejn. ⁶ Niluxh che direni nidxäl Pabl näjza Silas, alga Jasón gulääreni näjza gaii reneni rililajz xtidx Dios, sanääreni redeeo lo reguxhtis, cabedxa'reni:

—Reniguiire ni abejn bieiduxh guideb guedxliuj abidzujnreni laadxnu, ⁷ luxh badeed Jasón rolijzni jia'nreni. Direni gusoob leii xten César, najreni yu' stee reii ni laa Jesú.

⁸ Che biejn diajg reguxhtis näjza rebejn diidxre, guyu'reni yärsia'. ⁹ Cua' reguxhtis meel lo Jasón näjza lo rexamigwni. Räjp reguxhtis sudedsacreni meelga che jii Pabl näjza Silas, jiunejzreni lo guejdxga. Dxejcti basülaareni Jasón näjza rexamigwni.

Che guyu' Pabl con Silas guedx Berea

¹⁰ Che biu' guxhijin, baxhalgajc rexpejn Jesucrist Pabl näjza Silas ste guejdx ni laa

Berea. Che bidzujnreni guejdxga, biugajcreni xquidoor rexpejn Israel.¹¹ Hueenru najc reben Berea loj reben Tesalónica, sa'csi rbaali lajzreni bacuadiagreni xtidx Pablo ni guniini xcuent Jesucrist. Guixeguixee bilreni guijitz cadro caj xtidx Dios te gucbeereri la gulii rextidx Pablo.¹² Xhidajl rexpejn Israel näjza xhidajl ben griegw ni sajcru, gunaa sigajc niguui, huililajz xtidx Dios.¹³ Che gucbee rexpejn Israel ni rbajz guedx Tesalónica cagului Pablo xtidx Dios guedx Berea, biäädreni guedx Berea. Che bidzujnreni lo guejdxga bejnreni biey ro'.¹⁴ Dxejcti baxhal rexpejn Jesucrist Pablo, huijnni ro' nisdoo. Niluxh Silas näjza Timoteu bia'n guedx Berea.¹⁵ Dxejcti rebejn ni guzanäj Pablo huinänini guedx Atenas. Ro'c räjp Pablo lo rebejn ni biädnäni gudeedreni diidx lo Silas näjza Timoteu jiädgajcreni lojni. Dxejcti rebejn ni sanä Pablo gubisac guedx Berea.

Guyu' Pablo guedx Atenas

¹⁶ Lal ni guläjz Pablo guedx Atenas, guyuduxhni yärsia' sa'csi bahuiini rajn guiraa rebejn rebanäjb nani runchee lagajc bejn.¹⁷ Ni'c neq xquidoorenii gudildiidx Pablo rexpejn Israel näjza rebenzijt ni rajn Dios si'c rajn rexpejn Israeliini. Guixeguixee gudildiidxni chutis bejn ni re' lo guii.¹⁸ Dxejcti biääd gaii bejn lojni. Yu' reni rolduxh guijtz ni bacuua epicüreos, yu'za renani rolduxh guijtz ni bacuua estoicos, gudildiidxreni Pablo. Yu' reni räjp lo sa'reni:

—¿Xhicha guinii bejnre loonu? Entis naxhal ro'ni.

Yu'zareni räjp lo sa'reni:

—Pet calä'pni xpala'n tiop dioscoob.

Si'c guniireni sa'csi beijn diajgreni bazä't Pablo "Jesús" näjza "Resurección", ni sáloj yälgubañsac lo rebengut.¹⁹ Dxejcti gunaazreni Pablo sanärenini nez dajn ni laa Areópago. Ro'c yu' si'c te jusgaad. Räjpreni lo Pablo:

—Rlaaznu gacbeenu xhi diidx ruluiilu,²⁰ sa'csi rujylu diidx nani dinu jiacbee. Ni'cni bejn huen, basule' diidxre loonu te gacbeenu xhi sálojreni —räjpreni.

²¹ Reben Atenas näjza rebenzijt ni yu' ro'c ruteedreni redxej rniiренi didxcoob lo sa'reni, o ruuadiagreni didxcoob. Ni'cpac rchaglajzreni.

²² Galäii Areópago huisulii Pablo, räjpni lojreni:

—Colcuadiajg guejbtu, ben Atenas. Abahuiä xho randuxhtu xhidajl banäjb.

²³ Che siädsää lo guejdxre, bahuiä lo rexpanäjbtu. Bahuiäza loj te piään cadro caj rediidxre: "Dios ni dinu jiembee." Narä ranä Diosga. Rumbeä Diosga nani rajtu mase ditu gumbeeni. Susule'ä xtiidxni lojtu.

²⁴ Räjp Pablo:

—Diosre benchee guedxliuj näjza guiralii ni yu' lo guedxliuj, sa'csi rnibeeni xhaguibaan näjza guedxliuj. Di Diosre cuääz lo piään niclaza nen reguidoo ni runchee bejn.²⁵ Diza Diosre guiquiin chu gacnäjni sa'csi lagajc Diosre rudeed yälgubañsac lo guedxliuj.

²⁶ Räjp Pablo:

—Guiralii reben guedxliuj najc rexagdoo tejsi gunaa näjza tejsi niguui. Desde galooli gunibee Diosga bal ijz chu renacion, näjza cati gunibee renacionga.²⁷ Benchee Dios guiraa reben guedxliuj te quilreni Dios te chalilajzreni xtiidxni. Luxh suga' Dios gajxh cadetejnu,²⁸ sa'csi Dios rujn nabajinnu lo guedxliuj, runiidxni rsiaanu lo guedxliuj, runiidxzani rdajlru xcälnhabanu lo guedxliuj. Laaca bacuua rexpenñajntu: "Najcnu xi'n Dios, sa'csi benchee Diosnu."

²⁹ Ni'cni, sa'csi najcnu xi'n Dios, di nungäjil jieni xhigab najc Dios si'c rebanäjb ni nacchee plat', o guij, o yajg si'ctis ni runchee bejn rexpanäjbtu.³⁰ Neq redxej ni di bejn niembee Dios, diza Dios niujn castiigwreni. Niluxh naj gunibee Dios gusiechljaz guiraa rebejn,³¹ sa'csi abasoobni te dxej cheni gac Jesús juejz lo guiraa reben guedxliuj. Agule Diosni gacni juejz, sa'csi rumbechee Jesucrist chu najc benguijdx, chuza najc bensa'c. Rnilii Jesucrist rediidx ni najc guliitis. Guläs Dios Jesucrist, baspansac-nini lo rebengut, te gacbeenu rajp Jesucrist yälgubañsac lo guiraa recos.

³² Che biejn diajg rebejngä gubansac Jesucrist lo rebengut yu' reni baxhiznäj xtiidxni. Yu'za reni räjp:

—Sucuadiagrunu xcuent ni rusule'lu.

³³ Dxejcti birii Pablo lojreni.³⁴ Yu'za reni huinajlni, huililajzreni xtidx Dios. Lojreni nadxaag te dade' ni laa Dionisio ni najc

te juejz lo Areópago; näjza te nane' ni laa Dámaris. Guyu'za sgaii bejn ni huililajz.

18

Guyu' Pabl guedx Corinto

¹ Biritti Pabl guedx Atenas, huijni guedx Corinto. ² Ro'c bidxaagni te dade' ni najc ben Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee reii Claudio guirii guiraa rexpejñ Israel guedx Roma. Birinäj Aquila Priscila chäälni. Biriireni Italia, biäadreni guedx Corinto. Bihuii Pablreni, ³ sa'csi lagajc dzuu ni rujnreni rujnzani. Tejsi lajt guläjzreni te bejn jionreni tejsi dzuu. Runcheereni yugujid. ⁴ Gasob sabd, dxej ni rusilajz rexpejñ Israel, basule' Pabl xtidx Dios nen xquidoo rexpejñ Israel. Rlajzni chalilajz rexpejñ Israel näjza ben griegw ni digac xpejñ Israel diidx ni rnini xcient Jesucrist.

⁵ Dxejcti birii Silas näjza Timoteu Macedonia. Che bidzujnreni guedx Corinto, gusloj rusule'tis Pabl xtidx Dios guixe-guixee, guniliini lo rexpejñ Israel:

—Jesús najc Crist ni runloj rexpejntu guxhal Dios.

⁶ Dxejc bidxechnäj rexpejñ Israelni, guniyazareni xtiidxni. Dxejcti gubijb Pabl xhabjni si'c te seen diruni jiuren, caguro'nniren. Räjpzani lo rexpejñ Israel:

—Lagajc la'tu rajptu dojl nittu lo Dios. Xhet dojldi rapä narä. Aguniä xtidx Jesucrist lojtu. ⁷ Naj lo rebejn nani di gac ben Israel gusule'ä xtidx Jesucrist —räjpni.

⁷ Dxejcti biriini lojreni, huijni roliz Justo, te bejn ni rajñ Dios si'l c rajñ rexpejñ Israelni. Rolizni sojb cuä' xquidoo rexpejñ Israel.

⁸ Crisp, ni rnibee xquidoo Israel, huililajz xtidx Jesucrist. Huililajzza guiraa reni rbäjz rolizni. Xhidaljza ben Corinto huililajz xtidx Jesucrist, dxejcti birobnisreni. ⁹ Gojl te yääl gunii Dios lo te bacal, räjpni lo Pabl:

—Na'c guidxejblu. Guniiitis, na'c gusäulu ro'lu, ¹⁰ sa'csi narä sugaränä lu. Rut gadci gun latsiajlu. Aguleä xhidalduxh bejn lo guejdxre te gacreni xpejä —räjp Dios.

¹¹ Ni'c bia'n Pabl ro'c tebizgarol. Baluiini xtidx Dios lojreni.

¹² Che gujc Galón gubernadoor xten Acaya, tejsi xhigab bejn rexpejñ Israel bido-jpreni te gunaazreni Pabl. Sanäreni Pabl

jusgaad cadro yu' Galón. ¹³ Räjpreni lo Galón:

—Niguuire caguluii rebejn gañreni Dios garencia mood, xhet si'cti ni caj lo xleiinu —räjpreni.

¹⁴ Agojl ninii Pabl, che räjp Galón lo rexpejñ Israel:

—Palga gulanni o bagu'tni te bejn, dxejc yu' xtojlni te gucuadiagä xtiidxtu. ¹⁵ Per la'tu cadxe'chtu xcient diidx, xcient laj bejn, xcient ni caj lo leii xtentu. Gubernadoor narä, xho gucuadiagä diidxga. Lagajc la'tu colchahuii xho guntu yälguxhtis —räjp Galón.

¹⁶ Gunibee Galón barilaagw resoldaad rexpejñ Israel. ¹⁷ Dxejc gunaaz reGriegw Sóstenes nani rnibee xquidoo rexpejñ Israel. Batiäjleni baar dejtz Sóstenes nez ro' jusgaad xten Galón. Niluxh nicla niu Galónreni.

Chon huält huihuii Pabl rexpejñ Jesucrist

¹⁸ Bia'nti Pabl Corinto xchej. Dxejc badeed Pabl xtiixtios lo rebejn nani huililaz xtidx Jesucrist, biriini ro'c. Sanäni Priscila näjza Aquila, biu'reni nen barcw te siirení nez estad Siria. Dxejc ganid gudejdreni guedx Cencrea, cadro bahuaj Pabl yejcni si'c te seen yu' xhi diidx bia'nni con Dios.

¹⁹ Che bidzujnreni guedx Éfeso, basa'n Pabl Priscila näjza Aquila ro'c. Biu' Pabl xquidoo rexpejñ Israel, ro'c bachaagni diidx con rexpejñ Israel. ²⁰ Dxejcti che gunabreni jia'n Pabl ro'c xchej, naaddini jia'nni. ²¹ Badeedni xtiixtios, räjpni lojreni:

—Nungäjlpac chatedä laniro guedx Jerusalén. Siälsacä ree palga gusaan Dios jiälä.

Biusacni neñ barcw, biriini guedx Éfeso.

²² Che bidzujnri guedx Cesarea, biriini neñ barcw, huijni guedx Jerusalén. Che bidzujnri, guniini xchan lo reapost näjza lo rexpejñ Jesucrist. Dxejc huijni guedx Antioquia xten Siria. ²³ Che gudejd balti dxej, biriini guejdxga, gudejdni guideb estad Galacia näjza guideb distrit Frigia. Neñ cade tej reguejdxga, balijdxni rexpejñ Jesucrist te gutijpru lajzreni.

Baluii Apolos xtidx Dios nen guedx Éfeso

²⁴ Neñ redxejga, te dade' ni laa Apolos bidzujn guedx Éfeso. Najcni xpejñ Israel,

gojlni guedx Alejandría xten Egipto. Lacti rajc rnisa'cni, nanduxhzani xtidx Dios.
²⁵ Nanduxhni xtidx Dios xcient Jesucrist. Laaca basule'ni xtidx Dios, guideb xcäln-abajñni rinälajzni Dios. Niluxh xcient Jesucrist najtisni yärlornis xten Juan. ²⁶ Nicla nidxejb Apolos gusloj caniireni nen guidoo xten rexpejn Israel. Che biejn diajg Priscila näjza Aquila xtiidxní, huinärenini rolijzreni. Ro'c basule'rureni xtidx Dios nani gajdni gan. ²⁷ Dxejc, sa'csi abejn Apolos xhigab chääni reguejdx ni tre' nez Acaya, bacuaa rexpejn Jesucrist guijtz lo rexpejn Jesucrist ni yu' nen reguejdxga te gacnäjreni Apolos. Gucnäduxh Apolos rebejn nani badeed Dios huililajz xtidx Dios nen reguejdxga, ²⁸ sa'csi gunilii Apolos nez loj guiraa rebejn xhet laadi rnii rexpejn Israel. Di niajcdi nuzejc rexpejn Israel diidx lo Apolos sa'csi ganax con xtidx Dios ni bacuaa reniguii ni gunii xtidx Dios galoo basule'ni: "Jesús najc Crist nani cayunlojtu guxhal Dios."

19

Guyu' Pabl guedx Éfeso

¹ Lal ni guyu' Apolos guedx Corinto, huij Pabl xhidajl reguejdx neñ región Asia, dxejcti bidzujnni guedx Éfeso cadro bidxa-aagni gaij bejn nani huililajz xtidx Dios.
² Gunabdiidx Pabl lojreni:

—Che huililajztu xtidx Dios, ¿la biädlajz Sprit Dzan xten Dios neñ lastootu, ä?

Räjpreni lojni:

—Nicla gajd diajgnu jiejn la yu' te Sprit Dzan xten Dios.

³ Räjp Pabl lojreni:

—Xho birobnistu, pues?

Räjpreni lojni:

—Birobnisnu si'cni baluui Juan tiobnis bejn.

⁴ Dxejcti räjp Pabl lojreni:

—Gullica bastiobnis Juan che basiejch lajz rebejn xtojlreni. Räjpza Juan lo rebejn: "Colchalilajz xtidx bejn ni siääd detzä." Bejn ni basä'tni najc Jesucrist —räjp Pabl.

⁵ Che biejn diajgnen rextidx Pabl birobnisreni te gacbee rebejn najcreni xpejn Jesucrist. ⁶ Che batzuub Pabl yaani yejcreni, biu' Sprit Dzan xten Dios neñ lastooren. Dxejc gusloj caniireni garen-garen didxsaj.

Guslojza caniireni diidx ni badeed Dios lojreni. ⁷ Si'c tzubitio'p dade' gusajc si'c.

⁸ Si'c chon bäii, guixe-guixee gunii Pabl rextidx Dios, basule'ni xcient xcälrnibee Dios loj rebejn neñ xquidoo rexpejn Israel. Dini nidxejb guniini loj rebejn.

⁹ Dxejc guyu' reni gucnajd, dirurení nililajz xtidx Dios. Che gusloj caniayreni xtidx Dios lo rebejn, biunejz Pabl ro'c sanäni rexpejnni ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni. ¹⁰ Tiop ijz bejn Pabl si'c, ni'c guiraa rebejn ni rbäjz Asia biejn diajgreni xtidx Dios. Rexpejn Israel sigajc reben griegw biejn diajgreni xtidx Dios. ¹¹ Gucnäj Dios Pabl bejnni xhidajl dzunro, remilagwr. ¹² Ni'cni biääd bejn ca'reni baii, ca'reni tla' ladj te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh riacgajc rebejn ni racxhuuga, rigajcza rebendxbab lastoo renani yu' bendxbab.

¹³ Dxejcti guyu' gaii ben Israel nani entis rcanasaj, direni cuäáz tejsi guejdx. Najcreni bejn ni rbää bendxbab lastoo rebejn. Bejn redee xhigabcoob, naarení cuääreni bendxbab xcient laj Jesucrist, ni'cni räjpreni lo renani yu' bendxbab neñ lastooni:

—Xcient xcälrnibee Jesucrist nani ruluii Pabl rnibeenu guirilu neñ lastoo bejngä —räjpreni.

¹⁴ Guyu' gajdz xi'n Esceva, te ben Israél, nani sajcrlo rebixhojz. Rujn redee dzuu rbääreni rebendxbab neñ lastoo rebejn. ¹⁵ Che gunii rex'i'n Esceva loj bendxbabga si'c, räjp bendxbab ni yu' neñ lastoo bejngä lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbeä la'tu.

¹⁶ Dxejcti bixa't niguii nani yu' bendxbab neñ lastooni yejc rex'i'n Esceva, gudinduxhnirenisi, basä'lta'niren, batiäjsni xhajbreni. Dxejcti baxuñreni biriireni neñ yu'ga, bidxälgujdxzareni biräsyä' xhajbreni.

¹⁷ Dxejcti guiraa reben Éfeso, rexpejn Israel sigajc ben griegw, gucbee xho bennäj bendxbab reniguiiga. Bidxebdukh rebejngä, luxh huä'p xpala'n Jesucrist.

¹⁸ Xhidalduxh reni huililajz xtidx Dios biääd lo rexpejn Jesucrist. Cacäjpreni

guiraa recos xhet laadi nani rujnreni.
¹⁹ Xhidajl reni najc bidxaa biädnä reguijtz cadro caj yälhnajn xten rebidxaa. Dxejcti base'creni reguijtzga nez loj guiraa rebejn. Bejnreni cuent lacti meel sajc reguijtzga. Sajcreni tiubitzuu mil melpla't.
²⁰ Xhidalduxh rebejn huililajz xtidx Dios. Batijp Dios lastoo rexpejnni. Gulä'p guiraareni xpala'n Dios.

²¹ Che gulujx recosre, bejn Pabl xhigab chääni guedx Jerusalén, niluxh tedxgaani reguejdx ni ye' nez Macedonia näjza Acaya, bejnzani xhigab, naani:

—Che ahua'a Jerusalén, nanabza cha'a guedx Roma.

²² Ni'cni baxhal Pabl Timoteu näjza Erasto, tio'p renani racnäjni, huijreni Macedonia, luxh laani bia'hni Asia.

Bidxechduxh reben Éfeso

²³ Nen redxejga, guyuduxh rebejn yär-sia' sa'csi baluui Pabl xtidx Dios. Direni nichaglajz care'ch xtidx Dios. ²⁴ Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga. Demetrio näjza guiraa replateer ni rujn ni'ch xten Diana runduxhreni gaan meel ro'c. ²⁵ Gurejdx Demetrio guiraa replateer ni rujn reni'chga, räjpni lojreni:

—Colcuadiahjg, la'tu resa'ä: najntu rbäänu melro lo dzuuun ni riennu.
²⁶ Abahuuitu niguiire ni laa Pabl. Abiejnza diajgtu xtiidxnii. Räjpni lo rebejn: "Xhet diosdi najc reni racchee con naa bejn." Guedx Éfeso näjza guideb nación Asia cagusiechjni lajz bejn, xhidalduxh bejn salilajz xtiidxnii. ²⁷ Ni'c ries nitloj xtzununu palga diru bejn sii ni'ch ni riencheenu. Luxh riesza diru bejn jiädgajn Diana nen xquidoro Diana. Naj reben Asia, näjza guiraa reben guedxluij randuxh Diana, banäjb ni sajcrus, niluxh palga diru rebejn gan Diana, pet sinitlojni —räjpni.

²⁸ Che biejn diajg replateer xtiidxnii, bidxe'chduxhreni, guredxa'reni räjpni:

—Sacdukh Diana xtios reben Éfeso.

²⁹ Guideb guejdx guyu' biejj. Dxejcti ruxunreni bidxagsa'reni lo yuj cadro rajc rexjunreni. Gunaazreni Gayo näjza Aristarco, ben Macedonia ni rinajl Pabl.
³⁰ Rlajz Pabl niu'ni cadro bidxagsa'rebejn, niluxh di rexpejñ Jesucrist nusaanni. ³¹ Gaii

guxhtis ni rnibee Asia, sa'csi najcreni xamijgw Pabl, baxhalreni diidx lo Pabl, räjpreni:
—Na'c chäälu cadro nadxagsa'rebejn
—räjpreni.

³² Lo rebejn ni re'ga, yu' reni rbedxa' tej diidx, sgaiireni rbedxa' garencia diidx. Te bieiduxh cayajc. Xhidalduxh rebejngä nicla gan xhicuent bidxagsa'reni. ³³ Dxejcti gulää rexpejñ Israel te dade' ni laa Alejandro lo reben xhidaalga, te guiniini lo rebejn. Dxejcti basääbni naani lo rebejn te gac dxi rebejn. Rlajz Alejandro guiniini xcuent rexpejñ Israel loj guiraa rebejn, te di guidxe'chreni lo rexpejñ Israel. ³⁴ Niluxh che gucbee rebejn najc Alejandro beñ Israel, tiop or guredxaduxhreni, räjpreni:

—Sacdukh Diana xtios reben Éfeso.

³⁵ Dxejcti biääd secretaar xten guejdxga lo rebejn, gunibeeni gac dxi rebejn, te räjpni lojreni:

—Colcuadiahjg, la'tu ben Éfeso, caguidxäjl te ben guedxluij ni di gacbee reben guedx Éfeso rajnpac Diana, nani xhaguibaali bitejb lo guedxluij. ³⁶ Sa'csi rediidxre najc gulli, nungäjl cuedxitu, na'c guntu recos guijdxre. ³⁷ ¿Xhicuent gunaaazu reniguii ni siädnätu rée? Direni gac gubaan ni rbajn recos guidoo, dizareni niniyaj xtiosnu. ³⁸ Naj palga rlajz Demetrio näjza rebejn ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni. ³⁹ Niluxh palga yu' xhi stee, nanab gac te junt xte rebenguejdx si'c ni caj lo xleiinu. ⁴⁰ Ries jii xquejnu lo gubier, naareni bidojpnu te guidxagdilnu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti räjpni:

—Agoj, coljiunejz.

⁴¹ Che gunii secretaar si'c, bire'ch rebejn, biunejzreni ro'c.

20

Huihuisac Pabl rexpejñ Jesucrist ni yu' Macedonia näjza Grecia

¹ Che bire'ch rebejn, gurejdx Pabl rexpejñ Jesucrist biääd lojni, te balijdxniren. Badeedni xtixtios lojreni. Sä'tini nez reguedx Macedonia. ² Guiraa reguejdxga cadro gudejdni, balijdxni rexpejñ Jesucrist, basule'ruri xtidx Dios lojreni. Dxejc sääni reguedx Grecia. ³ Che bidzujnni Grecia,

bia'nni ro'c chon bääi. Dxejcti niu' Pabl neñ barcw te nijni reguejdx Siria. Niluxh che biejn diajgni cabáz-xhiga'tz rexpejñ Israeli te guiniaazrenini, gunaažni nezyuj, gubi'ni nez Macedonia. ⁴ Huinäni Só-pater, xi'n Pirios, te ben guedx Berea; näj Aristarco näjza Secundo, ben guedx Tesalónica; näj Gayo, ben guedx Derbe; näj Timoteu; näj Tíquico näjza Trófimo, ben Asia. ⁵ Guiraa redee guniđd loonu, huiläjzenri nuure guedx Troas. ⁶ Guedx Filipos bidxaag Pabl narä, Lucas, Ro'c gude-jdnu lanij xten rexpejñ Israel che rajwreni yättxiil ni di saguij. Biriitnu guejdxga, biu'nu neñ barcw te sonnu nez guedx Troas. Gaii dxej gusaanu neñ barcw, dxejc bidzuñnu guedx Troas. Ro'c bia'nnu gajdz dxej.

Baluui Pabl xhidalduxh xtidx Dios lo rexpejñ Jesucrist guedx Troas

⁷ Che gojl dumingw, primer dxej xman, bidxagsa'nu te bidaunu yättxiil si'c gudaunäj Jesucrist rexpejnpacni galoo che gajdni guet. Abejn Pabl xhigab guira yääl guiriini guejdxga. Che biu' guxhijn, gusloj cagusuleduxh Pabl xtidx Dios, huinuuni si'cti garolyälli. ⁸ Yu' cadro bidxagsa'nu najc jiaa yejc stiop yu'. Xhidalduxh bal-gandeel cagusanij ro'c. ⁹ Sobga' te bi'n ni laa Eutico ro' te bentaan. Lañ ni cagusule-duxh Pabl xtidx Dios lo rebejn, gunaaž bacal bi'nga, gudiejsni, bitejbni lo yuj desde yu' ni riojn pis. Che huiläsenini, agu-jtni. ¹⁰ Dxejcti biäjt Pabl lo yuj cadro bitejb bi'nga. Bazuhijb Pabl cadro naga' bi'nga, gudääznini. Dxejcti rájp Pabl lojreni:

—Na'c chutu yärsia'. Agubansacni. Bas-pajñ Diosni.

¹¹ Dxejcti huäpsac Pabl lo yujaaga. Ro'c bidaunu yättxiil si'c gudaunäj Jesucrist rex-pejnpacni galoo che gajdni guet. Gunii Pabl lojreni xchejru, che bianijli lo guedxliuj. Dxejc biunejzni. ¹² Xhetliidiru rajcdi bi'nga nani gubañsac, nani guläs Pabl. Bibalaz-duxhreni, huisa'nrenini rolizjni.

Biu'nu neñ barcw, bionnu guedx Miletó

¹³ Gunijdnu lo Pabl. Biu'nu neñ barcw, sonnu guedx Asón, te ro'c guidxaagnu Pabl, sa'csi abejn Pabl xhigab ni'ni jiimi gue-jdxga, ro'cli jiu'ni neñ barcw. ¹⁴ Che bidx-aag Pabl nuunu guedx Asón, biu'ni neñ

barcw, sonnu lo nisdoo te bidzuñnu guedx Mitilene. ¹⁵ Neñ barcw biriinu ro'c. Che bara yääl, gudejdnu yuj ni re' lo nisdoo ni laa Quío. Che bara stee yääl, bidzuñnu guedx Samos. Guedx Trogilio basilaaznu. Che bara stee yääl, bidzuñnu guedx Mileto. ¹⁶ Di rlajz Pabl jiu'nu guedx Éfeso, diza rla-jzni chunu Ásia xchej, sa'csi riojb lajzni guidzunnu guedx Jerusalén te ro'c tedni redxe lanij ni laa Pentecostés.

Guedx Mileto guninäj Pabl reni rnibee xpejñ Jesucrist ni yu' guedx Éfeso

¹⁷ Che guyu'nu guedx Mileto, baxhal Pabl diidx lo rexpejñ Jesucrist ni yu' guedx Éfeso, gurejdxni reni rnibee. ¹⁸ Che bidzu-jnreni lo guejdxga, rájp Pabl lojreni:

—Lagajc la'tu najntu xho nabanä nez lojtu, dxejli ni bidzuñä, nabannäá Dios.

¹⁹ La'tu najntu xho runä xtuun Jesucrist guixe-guixee, guideb xcälnadipä. Dina niliä'p ä xpala'nä. Najntu xho ronä che di bejn chalilajz xtidx Jesucrist. Che rlajz rexpejñ Israel nugü't narä, gudedä traba-jwdxh. ²⁰ La'tu najntu xho baluiä lojtu guiralii rextidx Dios ni najc huen par la'tu. Che nadxagsa'tu baluiä xtidx Dios lojtu, näjza rolijz cade tejtu huiluiä xtidx Dios lojtu. ²¹ Basule'ä xtidx Dios lo rexpejñ Israel näjza lo rebenzijt ni di gac xpejñ Israel. Räpä lojreni nanab gusiechläjzreni, gusa'nreni xtojleni, nanab chalilajzreni xtidx Jesucrist te gudzucaj Dios xtojleni.

²² Naj cadedä te laad guejdx xtentu, sia'ä guedx Jerusalén, sa'csi caguxhal Sprit Dxan xten Dios narä cha'ä guedx Jerusalén. Dina ganä xhi sacä ro'c. ²³ Niluxh nanä cade tej reguejdx cadro rdedä rnii Sprit Dxan xten Dios loä sidedä trabajwdxh, siäuä neñ latzguuib guedx Jerusalén. ²⁴ Niluxh dina guidxebä, dizana chanälazduxh xcälñ-abägätiis, te guluxä dzuuñ nani baniidx Jesucrist gunä. Lo dzuuñ ni baniidx Jesucrist nanab chaye'tzä lo guiraa rebejn sibi-caj xtojleni palga chalilajzreni xtidx Dios xcuent Jesucrist —räjp Pabl.

²⁵ Räjpzani:

—Naj agucbeä dirutu fisac loä, la'tu nani basule'ä xcälñibee Dios lojtu. ²⁶ Rniliápac lojtu, xhet dojldi rapä palga yu' te bejn ni di chalilajz xtidx Dios, ni di Dios gudzucaj xtojlni. ²⁷ Xhetliidi biäädxdì loj rextidx Dios

ni basule'ä lojtu. Dina nucua'tzä nicla tej xtiidxni xcient xho rlajz Dios guibannu. ²⁸ Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx Dios sa'csi Sprit Dxan xten Dios abaniidx dzuunga guntu, ni'cni abixe'xtiejin Jesucrist lo cruz te gac gudzucaj Dios xtoljreni. ²⁹ Anancheä che rutdiru narä, siääd bejn nani rlajz chalilajztu ste'ca diidx, na'c chalilajztu niclaza jiutu rebejnga. Russueetisreni la'tu. Sutie'chreni la'tu lo sa'tu si'c rutie'ch cuyo't rexii. ³⁰ Su'za lagajc sa'tu ni guinii didx-xhii lojtu te gunreni gusaan rexpejn Jesucrist xtidx Dios, te chanajleni redee ni rusguee. ³¹ Colhuii te di gusgueereni la'tu. Di jiäl-lajztu chon ijj, dxej yääl basule'ä xtidx Dios, ronäli balidxätu, sa'csi sanälazätu.

³² Räjpta Pabl:

—Asia'are, rusa'nätu ladznaa Dios, gac-näj Dios la'tu. Sutijp xtidx Dios lastootu, te xca'tu guiraa ni bia'n diidx guniidx Dios lojtu, näjza loj guiraa ni abejn Dios beñsa'c, nani najc xpejnni. ³³ Dina niniabä meel, niclaza xhabä che baluüä xtidx Jesucrist lojtu. ³⁴ Anajntu lagajc narä benä dzuun con næä te bio' xhi gudaunää rexamigwä. ³⁵ Si'c benä te filojo xho guntu dzuun te gacnäjtu sa'tu ni xhet rajpdi, te guinaj lajztu xtidx Jesucrist che najni: "Huenru guideednu lo bejn quela xcaxlia'n u xhi cos" —räjpnii.

³⁶ Che gulujx gunii Pabl rediidxga, bazuxhibnäjni rebejnga, guredx-gunabni lo Dios. ³⁷ Dxejcti ronduxh guiraareni gudäazreni guejin Pabl, bachagro'renini.

³⁸ Guc-huinduxh lajzreni dxej sc'ci räjp Pabl dirureni fisac lojni. Dxejcti huisa'nrenini lo barcw.

21

Huij Pabl guedx Jerusalén

¹ Che basa'ntinu rexpejn Jesucrist ro'c, biu'nunen barcw, sionnu te lii nejz lo yuj ni laa Cos, ni tre' lo nisdoo. Che bara yääl, bidzunnu lo xyuj Rodas ni tre'za lo nisdoo. Ro'c biriinu sionnu neñ barcw nez guedx Pátara. ² Che bidzunnu ro' guejdxga, bidxälnu te barcw ni sää nez reguedx Fenicia. Dxej sc'ci räjp Pabl gusiechlajzni, xhetru guniidiu lojni. Räjptisnu lojni:

barcwga. ⁴ Ro'c bidxälnu rexpejn Jesucrist. Biannätureni gajdz dxej. Baluii Sprit Dxan xten Diosreni te guniireni lo Pabl, räjpreni:

—Na'c chäalu guedx Jerusalén.

⁵ Che baza' gajdz dxej, biunejznu guejdxga. Dxej guzaj reniguii, regunaa, näjza rexinreni biriinu guejdxga. Ro' nisdoo bazuxhjbnu te guredx-gunabnu lo Dios.

⁶ Che abazadiidxnu sa'nu, nuure biu'nunen barcw, biädla laareni gubisacreni rolijzreni.

⁷ Biriitinu guedx Tiro. Che bidzunnu ro' guedx Tolemaida, gulujx xpiajnu biäjtnu nen barcw. Dxej biohuiinu rexpejn Jesucrist ni yu' guejdxga, biannätureni tejtis yääl. ⁸ Che bara yääl, biriinu guejdxga, sonnu guedx Cesarea. Che bidzunnu guejdxga, bionnu rolijz Felipe, te dade' ni rusule' xtidx Dios lo bejn. Felipe gujc tej lo gajdz niguii nani gudis xhi gudajw rexpen Jesucrist nani xhet rajpdi guedx Jerusalén. Rolijzni huijia'nmu. ⁹ Yu' tajp xindapxteb Felipe. Bios badeed diidx guiniirenlo bejn. ¹⁰ Xhidajl dxej guläjznu rolijz Felipe. La'l ni dxunnu ro'c, bidzujn te niguii ni laa Agabo, biriini nez Judea. Ruzanij Dios xcäriejnni te guiniini xtidx Dios.

¹¹ Che bidzujnloonu, cua' Agabo xsindoor Pabl, baliibni lagajc reni'ni näjza renaani, najni loonu:

—Anaj Sprit Dxan xten Dios: "Scree suliib rexpejn Israel ni yu' guedx Jerusalén niguii ni najc xtemni sindoorre te guteedrenini ladznaa rebenzijt."

¹² Che biejn diaagnu rediidxga, nuure näjza reben ro'c, gunabduhnlo Pabl na'c chääni guedx Jerusalén. ¹³ Dxejc naj Pabl loonu:

—¿Xhicuent roontu? ¿Xhicuent runhui-intu lazä? Xhet najcdi jiäüä nen latzguiib, xhet najcdi palga nungälä guetä guedx Jerusalén xcient Jesucrist —räjp Pabl.

¹⁴ Che naaddi Pabl gusiechlajzni, xhetru guniidiu lojni. Räjptisnu lojni:

—Sugac nani rlajtzis Dios.

¹⁵ Che gudejd redxejga, bilucheenu rexhixtenu, biriinu guejdxga, sontinu guedx Jerusalén. ¹⁶ Gaii rexpejn Jesucrist ni najc ben Cesarea huisa'n nuure guedx Jerusalén. Ro'c huinäreni nuure rolijz te dade' ni laa Mnasón, ben Chipre, yuj ni tre' lo nisdoo.

Laani galooli huililajzni xtidx Dios. Hui-jia'nnu rolijzni, ro'c guläääznu.

Huihuii Pabl Jacoob

¹⁷ Che bidzuñnu guedx Jerusalén, bibal-azduxh rexpejñ Jesucrist sa'csi siopnu ro'c.

¹⁸ Che bara yääl huinänu Pabl lo Jacob näjza lo renani rnibee guidoo xten rexpejñ Jesucrist. ¹⁹ Dxejc gudääz Pablreni, bijni di-idk xcient tebgaj redzuun nani badeed Dios bejnni che guyunäjni rebenzijt nani di gac xpejñ Israel, te biejn diajgreni xtidx Dios. ²⁰ Che biejn diajgreni xtidx Pabl, gulä'preni xpala'n Dios, räjpzareni lo Pabl:

—Guejblu, sa'nu, anajnlu lacti xhidal-duxh xpejñ Israel yu' nani rililajz xtidx Jesucrist luxh rapdaduxhreni leii xten to-Moisés. ²¹ Abiejn diaj rebejare xcientlu. Abiejn diajgreni garenca ruluilu guiraa rexpejñ Israel nani rbäjz neñ reguejdx xten rebenzijt, rulijdxlureni na'c gusälreni bee rexi'nreni, na'cza chazanäjtureni rexcostumbrnu. ²² ¿Xhini'c jiennu? Siejn diajgreni abidzujnlu ree, dxejc suchagsa'reni te jiää-dreni lojlu. ²³ Naj gunlu nani guiniinu lojlu. Yu' tajp resa'nu ree nani basa'hreni diidx lo Dios. ²⁴ Huinäreni, näjza luj bejn si'ctis gunreni si'c ni caj lo leii xten toMoisés, te gaclu naya nez lo Dios. Luj quiixlu guiraa ni banijtreni, te che abasa'tu guiraa ni nanab gac sajc guigaj yejctu si'c te seen te gacbee guiraa rebejn abasoobtu leii. Dxejcti gan guiraa rebejn didx-xhii najc rediidx ni biejn diajgreni xcientlu. Te gacbeereri laaca rusooobl xleii toMoisés. ²⁵ Biädlä rebenzijt nani huililajz xtidx Jesucrist, xhet najcdi, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banäjb, na'c gautu rejn, niclaza bää'l nani gurerejn, na'c guesnäjtu nani di gac chäältu.

Gunaaz rexpejñ Israel Pabl

²⁶ Che bara yääl, huinä Pabl guidap nigu-iiga, bejnreni si'c caj lo xleii toMoisés, biu'reni neñ xquidoo rexpejñ Israel te huiye'tzreni lo bixhojz neñ guidoo xhi dxej jiädnä tejgareni te man te ju't rebixhojz remanga lo Dios.

²⁷ Si'c nanab gunreni gajdz dxej. Che ameer guiza' redxejga, bahuui rexpejñ Is-rael ni siääd Asia lo Pabl neñ guidoroga.

Gunaazreni Pabl, dxejcti gusloj cayujnreni biejy, ²⁸ guredxa'reni räjpreni:

—¡Coltaa xpejñ Israel! ¡Coltaa te gac-näjtu nuure! ¡Bahuilaare! Niguiire najc nani rniyaj rexpejñ Israel cadrotis rijni. Rulijdxni bejn te di chazanäjtureni xleii toMoisés, rie'y'tzni lo bejn xhet sajcdi xquidoronure. Colhuilaa xho siädnäni ree ben griegw, benzijt ni di gac xpejñ Israel, te gundxuudxni xquidoronu —räjpreni.

²⁹ Si'c caniirenri sa'csi te huält bahuiirenri sanä Pabl Trófimos lo nezyuj. Trófimos najc te benzijt ni siääd guedz Éfeso. Naj cayujnreni xhigab laa niguiiga ni siädnä Pabl neñ xquidoro rexpejñ Israel.

³⁰ Guideb guejdxga guyu' yärsia', bire' benguixhuj, bixa'treni yejc Pabl, gunaaazrenini, gudobxhajxhreni Pabl, gulägajcrenini neñ guidoroga. Biäugajc repueretro xten guidoro. ³¹ Lal ni cayujnreni xhigab ju'trenini, yu' chu huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh neñ guejdxre.

³² Guredxgajc comandant resoldaad näjza gaii capitán, ruxunreni bidzujnreni cadre tre' rebejn. Che bahuui rebejn lo comandan-t näjza resoldaad, guläjz caguijñreni Pabl. ³³ Dxejcti gubig comandant lo Pabl, gunibeeni baliib resoldaad naa Pabl con tiop cadenguiib. Dxejcti gunabdiidxni lo Pabl, räjpni:

—¿Chu luj? ¿Xhini'c bejnlu?

³⁴ Lo reben xhidaalga yu' rexpejñ Israel ni guredxa' tej diidx, yu'za reni guredxa' ste'ca diidx. Di comandant niujn gan niacbeenii xhiciuent cayajc biejy sa'csi cabedxa' guiraa rebejn. Dxejc gunibeeni chanä resoldaad Pabl cadro rbäjzreni. ³⁵ Che bidzuñnäj resoldaad Pabl ro' scaleer ni caj ro'c, biireni Pabl te bejnreni gan bi-unäjreni Pabl, sa'csi nialazduxh rebejn rla-jzreni nugu'treni Pabl.

³⁶ Siädnajl guiraa rebejn Pabl, rbedxa'reni:

—Colgugu'tni.

³⁷ Che agojl jiu' Pabl neñ yuro xten resoldaad, räjpni lo comandant con diidx griegw:

—Razä guiniä tiop diidx lo guejblu.

Räjp comandant lo Pabl:

—jAn rnii lu xtidxsaä! ³⁸An dilu gac niguui ni siääd nación Egipto, nani gudilnäj guvier, nani huinä lo reyubijdz tajp mil niguui nani rugu't bejn.

³⁹Dxejc räjp Pablo lojni:

—Narä nacä te ben Israel, te ben Tarso xten Cilicia. Sacdukh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejnre.

⁴⁰Dxejc cuäjb comandant guinii Pablo lo rebejn. Lal ni suga'ni lo scaleer basääb Pablo naani lo rebejn te gucdxireni. Che aguredxi rebejn, gusloj Pablo canii lojreni didxsaj hebreo, räjpi:

22

¹—Guejbtu bengool, guejbtu resa'ä, näjza la'tu dade'. Gucuadiagtu rextidxä —räjpi.

²Che biejn diajgreni caniini didx hebreo, dxdijuru guzuj rebejn. Räjp Pablo lojreni:

³—Narä nacä te xpejn Israel. Guedx Tarso xten Cilicia golä. Reepac gulaä. Lo Gamaliel bisidä guijtz. Baluisa'cni narä guiragajc releii xten retoxtadgoloonu. Guideb xtipä basobä ni gunibee Dios. Gucä si'cpac ni najctu naj. ⁴Dxejcti bidxechduxhä loj renani huililajz xtidx Jesucrist, bagu'tázareni. Balibä xhidajl bejn, niguui näjza gunaa, con cadenguiib. Basäuäreni neñ latzguiib. ⁵Bixhojz ni sajcru näjza guiraa rebengool ni sajcru neñ xquidootu, sajc guinii xhini'c benä. Laareni baniidxreni guijtz loä. Ni'c huinää lo rexpejn Israel ni yu' guedx Damasco, cadre hua'a te niniazä rebejn nani huililajz xtidx Jesucrist. Benä xhigab jiädnääreni guedx Jerusalén te jiäureni neñ latzguiib, te gusacsíreni rebejnga.

*Gunii Pablo xho huililajzni xtidx Jesucrist
(Hch. 9:1-19; 26:12-18)*

⁶Räjzpani:

—Dxejc hua'a guedx Damasco. Läidxejti ameer guidzunä guejdxga, chela bazanij te balro guideb gabi narä. Xhaguibaali siääd bajlga. ⁷Biabroä lo yuj, dxejc biejn diavä te se' ni canii loä, najni: “Saulo, Saulo, jXhicuent rusacsílu narä näjza rexpenä?” najni. ⁸Dxejcti räpä lojni: “jChuluj, Dad?” Najni loä: “Narä nacä Jesucrist ni siääd Nasare't, nani cagusacsíduxhlu.”

⁹Rebejn ni sanäää bahuiloj bajlga, bidxejbreni, miluxh di diajgreni niejn xse' nani gunii loä. ¹⁰Räpä lojni: “Dad, jXhini'c gunä?” Dxejcti najni loä: “Huistie, huij guedx Damasco. Ro'c sinii te dade' lojlu guiraa ni guinibeä gunlu.” ¹¹Bastujxh bajlga loä, diru loä nieñ, ni'cni gunaaz resa'ä naä, sontinu guedx Damasco.

¹²Räjp Pablo:

—Guejdxga gulajz te niguui ni laa Ananías. Rusoobni guiraa releii xten toMoisés. Guiraa rexpejn Israel rnii nadalajz lo dade'ga. Biääd Ananías loä. ¹³Cuä'ä guzujni najni loä: “jSaulo, betzä, bahuisac!” Lagajc dxejc biajc loä, bahuiä lojni. ¹⁴Naj Ananías loä: “Xtios retoxtadgoloonu agulelu. Gule Dios luj te jiejn diajglu rediidx ni rlajzni gunlu, te filoju Jesucrist, Xindxan Dios, te jiejnza diajglu rextiidxpac Jesucrist. ¹⁵Loj guiraa bejn susule'lü guiraa ni bahuiilu näjza nani biejn diajglu. ¹⁶jXhicuent sojbtislru ro'c? Basquejn, huistie te tiobnislu. Huililajz xtidx Jesucrist, gurejdx lo Dios te gudzucajni rextojllu.”

Gunii Pablo xhicuent baluiini xtidx Dios lo rebenzijt

¹⁷Che gubiää guedx Jerusalén, biu'ä nen guidoro xten rexpejn Israel te guredx-gunabä lo Dios. Lal ni cabedx-canabä lo Dios, astoo gunixcalä, ¹⁸dxejc bahuiä lo Jesucrist. Najni loä: “Basquejn, birii guedx Jerusalén sa'csi di rebejn chalilajz xtidxä ni gusule'lü lojreni.” ¹⁹Narä räpäza lojni: “Dad, anajnreni xho biu'ä guiraa reguidoo, gunazä guiraa rebejn nani huililajz xtiidxlu, gudinduxhäreni, basäuäreni neñ latzguiib. ²⁰Che bacuaareni guij yejc Esteban nani gunii xtiidxlu, ro'c guzuä, cuäbä bejnreni si'c. Go'pä xhajb xten renani bagu't Esteban lal ni bacuaareni guij.” ²¹Dxejcti naj Jesucrist loä: “Huij. Suxhalä luj zitduxh. Chäalu lo guiraa rebenzijt ni di gac xpejn Israel.”

Bia'n Pablo neñ rolizro xten resoldaad

²²Bacuadiag guiraa rebejn lal ni gunii Pablo rediidxga, dxejcti guredxa'reni, räjpreni:

—Colgu't niguiiga. Di nunyäjl guiba-jnruni.

²³Sanuutis cabedxa'reni. Gulääreni xcamangwreni, cacuazareni yuyol jiaa.

²⁴ Dxejcti gunibee comandant lo resoldaat, räjpni:

—Colchanä Pabl neñ yuro xtenu. Ro'c colquiin Pabl te guiniini didxgulii, te gacbeenu xhicuent rbedxaduxh rebejn lojni.

²⁵ Sanätireni Pabl. Entis baliibreni ni', naa Pabl con duguijd te niguijnenini che gunabdiidx Pabl lo capitán, räjpni:

—La rajc rguijntu te ben roman che gajdту gacbee xhi dojl bejnni, ä? Et si'cti caj lo xleiliu.

²⁶ Che biejn diajg capitán xtiidxnii, bidxejbni, hujinii lo comandant, räjpni lojni:

—Colnati xhi gunnäjlu dade're, sa'csi najcni ben roman.

²⁷ Biägdgxun comandant lo Pabl, räjpni:

—La gulii najclu ben roman, ä?

Räjp Pabl lojni:

—Guliini.

²⁸ Dxejcti räjp comandant:

—Narä badedä xhiroob meel te nacä ben roman.

Dxejcti räjp Pabl lojni:

—Narä che goläli nacä ben roman.

²⁹ Che biejn diajg resoldaad nani niguijn Pabl si'c, baslagajcreni reduguijd ni naliib ni', naani. Che biejnza diajg comandant najc Pabl ben roman, bidxejbni sa'csi gunibeeni bilib Pabl.

Basule' Pabl diidx xcentni lo rebixhojz nani rnibee rexpejñ Israel

³⁰ Che bara yääl, rlajz comandant gacbeeni xhicuent rlajz rexpejñ Israel ju't Pabl. Ni'c gunibeeni jiääd rebixhojz ni sajcrü näjza reguxhtis xten guidoro. Dxejcti biädnäni Pabl, bazujnini nez loj guiraa rebejn ni bire' ro'c.

23

¹ Rdxelodzu'tz Pabl lo rebejn ni tre' ro'c laj ni räjpni lojreni:

—Narä gusule'ä tiop diidx lo guejbtu, ben Israel, sa'ä. Guideb ni nabanañ ruzobä xtidx Dios. Di lastoä guidxejb nez lo Dios —räjp Pabl.

² Che biejn diajg Ananías, bixhojz ni sajcrü, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

³ Räjp Pabl lo Ananías:

—Sigajcza ca'p Dios ro'l, benguijdx. Ro'c sobga'l te gunlu yälguhxtis si'cni caj

lo leii. Xhicuent rujnlu nani rnii leiiga di nungäjl gun bejn? Xhicuent gunibeeu guda'preni ro'ä? —räjp Pabl.

⁴ Reni suga' cuä' Pabl räjp lo Pabl:

—La dilu gacbee laa bixhojz ni sajcrü xten Dios? Na'c guiniyajluni.

⁵ Dxejcti räjp Pabl lojreni:

—Rexamigwä, dina niacbeä caniä lo bixhojz ni sajcrü, sa'csi nanä agunii Dios: “Na'c guiniyajlu reni rnibee xpejñlu.” Si'c caj lo guijtz ni bacuaa reni gunii xtidx Dios.

“Gucbee Pabl tiop cuaa najc reni tre' ro'c. Yu' reni najc ben saducee, yu'za reni najc ben farisee. Dxejc guredxa' Pabl räjpni lojreni:

—Sa'ä, narä nacä te ben farisee, xi'nza te ben farisee narä. Rililazä sibansac bejn lo rebengut, ni'c cabe'creni xquejä ree.

⁷ Entis guniini si'c lojreni, chela gusloj caniireni lo sa'reni. Tiop cuaa gujcreni, gala' refarisee, sgala' resaducee. ⁸ Di lajz resaducee chalii sibansac rebengut, dizareni chalilajz yu' rexangl Dios, dizareni chalilajz yu' aim xten bejn. Niluxh refarisee rililajz guiraa rediidxga. ⁹ Guyu' te bieiro. Dxejcti huisulii gaii farisee nani najn leii, gusloj caniduxhreni, räjpreni:

—Di niguiire gac benguijdx. Palga gunii te angl xten Dios o te togool lojni, alga Dios tilnäjnu, dxejc sidxechnäj Diosnu.

¹⁰ Che gusloj cabedxaduxhreni lo sa'reni, bidxejb comandant, andi ju'treni Pabl, caxha'treni yejcni. Dxejcti gunibeeni biäjt resoldaad cadre suga' Pabl. Guideb xtipreni gulääreni Pabl galäii rebejngä huinäsacrenini neñ yuro xtenreni.

¹¹ Che biu' guxhijn, baluiloj Jesucrist lo Pabl, guzujni cuä'ni, räjpni lojni:

—Batiip lajzlu, na'c guidxejblu, Pabl. Si'cni basule'l u xtidxä guedx Jerusalén, sigajcza nanab gusule'l u xtidxä guedx Roma.

Repejñ Israel bejn xhigab nugu'treni Pabl

¹² Che bara yääl, bachagsa' gaii xpejñ Israel, bejnenri xhigab nugu'treni Pabl. Räjpreni lo sa'reni:

—Na'c guidaunu, na'cza guiduñnu nis che guigu'tlinu Pabl —räjpreni.

¹³ Si'cti tiuu nigui bia'n diidxga.

¹⁴ Bidzujnreni lo rebixhojz näjza rebengool, räjpreni lojreni:

—Abia'nnu diidx, xhet guidaudinu, xhetza guidundinu palga dinu guigutxgaa Pabl —räjpreni—. ¹⁵ Naj la'tu näjza guiraa rebengool ni rnibee rexpejn Israel, colguxhal diidx lo comandant te guixee jiädnäni Pabl lojtu. Colyejn si'c ni rlajztu jiejrnu diajtu diidx xcuent Pabl. Che jiädnä comandant Pabl ree, nuure sugu'tnuni lo nezyuj che gajdni guidzujn ree —räjpreni.

¹⁶ Niluxh biejn diajg xi'n bisiajn Pabl cabäzxhiga'tz reniguiga te ju'treni Pabl, huijni royuro xten resoldaad. Che bidzunjni, biu'nii räjpnii lo Pabl rediidx ni biejn diajgni. ¹⁷ Dxejcti gurejdx Pabl te capitán, räjpnii lojni:

—Huinalaa bi'nre lo comandant te gäbni te diidx lojni.

¹⁸ Huinälaa capitán bi'nga lo comandant, räjpnii lo comandant:

—Pabl, nani niäu nen yuro xten resoldaad, gunab loä jiädnälaä bi'nre lo guejblu te guiniini te diidx lo guejblu —räjpnii.

¹⁹ Dxejc gunaaz comandant naa bi'nre, huinänini te laad cadro rut jiejndi diajgni xtiidxreni, dxejc räjpnii lojni:

—Xhini'c rlajzlu guiniilu loä?

²⁰ Dxejc bazejcni diidx, räjpnii loj comandant:

—Abia'n te cuaa xpejn Israel diidx siniabreni lo guejblu jiädnä guejblu Pabl ro jusgaad guixee. Sujnsireni si'c ni rlajz jiejrnu diajgreni diidx xcuent Pabl. ²¹ Na'c chalilajz guejblu xtiidxreni. Tiu niguui sibäzxhiga'tz cuä' nezyuj te ju'treni Pabl. Abia'nreni diidx direni gau, dizarenii yä palga direni jutxgaa Pabl. Naj cabäjtsireni guxhal guejblu diidx sinä guejblu Pabl ro jusgaad.

²² Che biejn diajg comandant diidxgaa, basaanni sii bi'nga rolizjni, räpxgaani lojni:

—Rut lojdipac gäbli guniilu diidxre loä.

Huij Pabl lo Pels ni najc gubernadoor

²³ Dxejcti gurejdx comandant tiop capitán, räjpnii lojreni:

—Colgutojp tiop gayuu soldaad, chää guedx Cesarea näjza gayonbitzuu soldaad ni bijb cabaii, näjza tiop gayuu soldaad ni ca' spaad. Rcabaa guxhijñ guiriireni ree.

²⁴ Colquill tiop cabaii ciub Pabl te xhet gadci Pabl cheni chanätuni lo gubernador Pels —räjpnii.

²⁵ Dxejcti bejn comandant te guijtz chanäreni lo gubernadoor.

²⁶ Loj guijtzga rnii scree: “Gubernador Pels, nani sacduxh. Narä, Claudio Lisias, ruxhalä xtixtios lo guejblu. ²⁷ Rediidxre rucuaå lo guejblu. Gunaaz rexpejn Israel niguiire, luxh paru dina nidzunga'cä con resoldaad, nugu'trenini. Che gucbeä na-jcni ben roman, guläänuni ro'c. ²⁸ Rlazä niacbeä xhi quej rbe'creni, ni'c huanäáni lo junt xten rexpejn Israel ni rnibee guidoro.

²⁹ Dxejc gucbeä requej ni rbe'creni najc ganax xcuent leii xtenreni, niluxh xhet bejndini te nungäj guetni, niclazä nanab jiäuni nen latzguuib. ³⁰ Che baxhalreni diidx loä cabäzxhiga'tz rexpejn Israelti te ju'treni dade're, baxhalga'cäni lo guejblu. Agunibeäza jiädle'c rexpejn Israelre xque-jreni lo guejblu. Ni'ctis rniä lo guejblu”, si'c caj lo guijtz ni bejn comandant.

³¹ Che biu' guxhijñ, huixii resoldaad Pabl sanäreni guedx Antípatris si'cni gunibee comandant gunreni. ³² Che bara yääl, gubi' resoldaad nani guzaj ni'reni. Resoldaad ni bijb cabaii guzanäj Pabl guedx Cesarea. ³³ Che bidzujñ redee Cesarea, badeedreni xquijtz comandant lo gubernadoor, huinäzreni Pabl lojni te biem-beenini. ³⁴ Che gulujx bilñi guijtzga, gunab-diidxni lo Pabl:

—Caro siäadlu?

Che gucbeeni siäad Pabl Cilicia, ³⁵ räjpnii lo Pabl:

—Guidzujnsi rexpejn Israel ni cadzech-näj luj, sucuadiaggacä xtiidxlu —räjpreni gubernadoor.

Gunibeeni ga'p resoldaadni nen yuro xten Herodes.

24

Gunii Pabl xtiidxni lo Pels

¹ Gudejdti gaii dxej, dxejc bidzujn Ananías, bixhojz ni sajcru, näjza gaii rebengool xten guidoro, näjza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor. ² Che biädnäreni Pabl, gusloj Tértulo cabe'c xquej Pabl lo gubernadoor. Räjpnii lo gubernadoor:

—Xquixtioste guejblu dxiduxh nabannu. Cayacnäduxh guejblu laadxnu con redzun-sacduxh ni cayujn guejblu. ³ Xquixtiosduxh

guejblu, gubernadoor Pels, xcuent guiraa redzunsa'c ni rujn guejblu guira nejz. ⁴Luxh na'cru gusieednu guejblu, gucuadiaglaa guejblu tiop diidx. ⁵Aguçbeenu xho najc niguire. Benguidxduxhni. Cadrotis rijni rujnni biejy lo rexpejn Israel. Laani rnibee te cuaa ni laa nasaren, nalajznu rebejn nani rililajz xtidx Jesucrist ni biääd guedx Nasare't. ⁶Rlajzlini nuxhiñni xquidorunu, ni'c gunaaznuni. Niennu te junt te lagajc nuure niennu yälguxhtismi si'cni caj lo xquijtznu. ⁷Niluxh bidzujn comandant Lisias näjza resoldaad. Diptis badzucajreni niguiga ladznaanu. ⁸Laani gunibeeni lo guejblu jiääd reni rbe'c xquejni. Naj lagajc guejblu sajc guiniabdiidx lojni te gacbee guejblu gulii guiraa requej nani rbe'cnu xcuentni —räjp Tértulo.

⁹Dxejcti guiraa rexpejn Israel ni suga' ro'c räjp guliica xtidx Tértulo. ¹⁰Dxejcti bejn gubernadoor seen lo Pabl te guiniini. Baze'c Pabl diidx, räjpni lojni:

—Rbaaliza lazä guze'cä diidx lo guejblu, sa'csi anana agujc xchero lacti huen rujn guejblu yälguxhtis nación Israelre —räjp Pabl—. ¹¹Gutzbitio'p dxejtit bidzunä guedx Jerusalén te saganä Dios. Naju rebejn xhi dxej biu'ä Jerusalén, guyasi guniidxreni diidx. ¹²Nicla tej dina nichagdilä bejn nen guidoro. Nicla tej dina niunä biejy nen reguidobáz, nicla ro nezyuj. ¹³Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu, gulii najc xtiidxreni. ¹⁴Rniliapac lo guejblu: Ranä Xtios retoxtad-goldoonu. Jesucrist baluui xho gansa'cnu Dios. Rililazä rextiidxni. Xhidalduxh rexpejn Israel rnyaj xho basule' Jesucrist gan bejn Dios. Ruzobä guiraa releii xten to-Moisés. Rililazä guiraa rextidx Dios ni bacuaa reni gunii xtidx Dios. ¹⁵Rililazä xtidx Dios si'c rililajzza rebejnre xtidx Dios. Si'c ni najnreni, si'cza nanä sidzujuñ te dxej che guibañsac rebengut, rebenguijdx sigajc rebeñsa'c. ¹⁶Ni'cni racbeä laaca nabanä guiraa dxej, di lastoä guidxejb, nicla nez loj bejn niclaza nez loj Dios, sa'csi rut rajcdi guiliás dixhii xcuentä.

¹⁷Räjp Pabl:

—Agujc xchej yu'ä zift, lajdx garenca bejn, naj gubinää meel ni baxhal reben

nejzga te gudedäni lo rebejn ni xhet rajpdi. Biädnääza gojn xtenä gudedäni lo Dios. ¹⁸Ni'c sanää guidoro. Ro'c bidxäjl rexpejn Israel ni siääd Asia narä. Agucnayää si'c ni rnibee xleiinu. Xhet benxhidajldi sugaränä, xhetza bieydyi cayunä. ¹⁹¿Con rebejnga naj? Te cue'creni quej lo guejblu palga yu' xhini'c rdexchnäjreni narä. ²⁰O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebengool lo guedx Jerusalén —räjp Pabl—. ²¹Tejtit diidx guniä che suga'ä galäiireni, guredxa'a räpä lojreni: sa'csi rililazä sibansac guiraa rebejn lo rebengut, ni'c biädnätu narä lo rebejne —si'c guniä lojreni.

²²Che biejn diajg Pels xtidx Pabl näjza sa'csi najne'ni xcuent diidx nani baluui Jesucrist, basoobni stee dxej guidxagsac sa'reni räjpni lojreni:

—Che jiäädli comandant Lisias dxejc gunä yälguxhtis —räjp Pels.

²³Dxejcti gule Pels te capitán ni rnibee te gayuu resoldaad ga'p Pabl. Niluxh räjpni lojni guusaanni gun Pabl nani rla-jztsiñ gunni. Na'cza gudxoñni jiääd rex-amigwni te fiireni lojni.

²⁴Che gudejd balti dxej, gubi' Pels, biädnäni chäálni Drusila. Drusila najc ben Israel. Dxejc gurejdx Pels Pabl te gusule'r u Pabl xtidx Jesucrist. ²⁵Gunii Pabl xho nanab guibañsa'c bejn nez loj Dios si'c ni gunibe Dios guibajn bejn. Nanabza gacbee bejn na'c gun bejn cos guijdx, sa'csi sidzujuñ dxej gac Dios juejz loj guiraa rebejn te fiini xhi bejnreni. Racsesli Pels tant bidxejbní biejn diajgni diidxga. Räjpni lo Pabl:

—Huij naj. Sibedxsacälu che latä stee —räjp Pels.

²⁶Naa Pels sudeed Pabl meel lojni te guslaanini, ni'c masru guet-guejt gurejdxnini te guninäjnini. ²⁷Si'c gudejd tiop ijj. Dxejc birii Pels gubernadoor. Dxejti biu' Porcio Festo, gujcní gubernadorcoob. Niluxh Pels rlajz chanälajz rexpejn Israeli, ni'c basa'nni niäusijc Pabl.

25

Gunii Pabl xtiidxni lo Festo

¹Che biu' Festo gujcní gubernadorcoob xten reguejdxga, bia'nni guedx Cesarea choñ dxej. Dxejc biriini ro'c sääni guedx

Jerusalén.² Che bidzujnni guejdxga, rebix-hojz nani rnibee näjza reniguii ni sajcr lo rexpejñ Israel biääd lo Festo. Gusloj cabe'creni xquej Pabl lojni. Gunabduxhreni lo Festo³ sa'csi rlajzreni gunni te huen laareni, guinibeeni jiädnäreni Pabl guedx Jerusalén. Si'c gunabreni, sa'csi abenxaareni xhigab cuázxhiga'tzreni te ju'treni Pabl lo nezyuj.

⁴Dxejcti rájp Festo lojreni:

—Suniäu Pabl guedx Cesarea. Di gaclaa guibi'ä guedx Cesarea.⁵ Suchää reniguii ni sajcr lo sa'tu guedx Cesarea, te ro'c cue'creni xquej Pabl loä, don la yu' xhi dzunguwdx bejnni —räjpni.

⁶Che gudejd si'cti tzuu dxej, gubi' Festo guedx Cesarea. Che bara yääl, gurejni lo yagxhil xten gubernadoor, gunibeeni biääd Pabl lojni.⁷ Che bidzujn Pabl lojni, biääd rexpejñ Israel nani biääd guedx Jerusalén ro'c. Guzujreni guideb gabí Pabl. Gule'creni xhidalduxh xquej Pabl, luxh di niajcdi nuluiireni guliiipac xtiidxreni.

⁸Dxejcti rájp Pabl lojreni:

—Nicla tej latsiaj dina niunä, dina niunä latsiaj loj leii xtemnu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubir César.

⁹Dxejcti Festo, sa'csi rlajzni guilänsni xpala'nni loj rexpejñ Israel, rájpni lo Pabl:

—¿La sisiajlu guedx Jerusalén te cue'c rexpejñ Israel xquejlu ro'c nezloä, ä?

¹⁰Dxejcti rájp Pabl lojni:

—Naj suga'a loj guejblu, ni gule reii César. Guejblu rnibee guiraa reguejdxre. Ree nungäj! cue'creni xquejä lo guejblu, xhet guedx Jerusaléndi. Ananchisee guejblu xhet latsiajdi benä lo rexpejñ Israel.¹¹ Palga nacä te benguidx, o palga yu' xhi latsiaj benä te nungäj! guetä, xho dina xcäbä guetä. Palga xhet latsiajdi benä nani canii rexpejñ Israel benä, dxejc rutliidi sajc guteed narä ladznaareni. Suchale'creni xquejä lo César nani najc reii xten reben roman —räjp Pabl.

¹²Che guninäj Festo reguxhtis xten xquidoro rexpejñ Israel, rájpni lo Pabl:

—Luj gunablu chääu loj reii César. Mbaj. Sijlu lo reii César —räjp Festo.

Huixiirení Pabl huinärenini lo reii Agripa

¹³Che gudejd balti dxej, bidzujn reii Agripa näjza chäálni Berenice guedx Cesarea. Biädhuiireni gubernadoor Festo.

¹⁴Che guyu'reni ro'c xchej, bij Festo diidx lo Agripa xcient Pabl. Räjp Festo lojni:

—Ree niäusijc te niguii ni laa Pabl ni basa'n Pels.¹⁵ Che guyu'ä guedx Jerusalén, rebixhojz ni rnibee näjza rebengool xten rexpejñ Israel gule'c xquejni loä. Rlajzreni guinibä güetni.¹⁶ Räpä lojreni: “Di leii xten nación roman gusaan guet te bejn palga di bejn jiädxgaa te guiniireni nez lojpacni xhi bejn nigliiga, te guzejca nigliiga diidx xcient requej, te guiniini la guliireni.”¹⁷ Ni'cni che biääd rexpejñ Israelga lo guejdxre, che bara yääl guregacä lo yagxhil xten gubernadoor. Dxejc gunibä huixiirení Pabl guzuj nez loä.

¹⁸Benä xhigab pet yu' xhi cosro bejnni. Luxh che gusloj cabe'creni xquejni, gucbegacä xhet latsiarodi bejn Pabl.¹⁹ Alga cadilnäjrenini xcient xleiireni, xcostumbrreni. Gunizarení xcient te nigui ni laa Jesucrist. Agujtni, niluxh canii Pabl gubansacni lo rebengut.²⁰ Guxii nanä xcient sa' diidxre, ni'cni gunabdidxä lo Pabl top sicäjbní chanäáni guedx Jerusalén te ro'c cue'c rexpejñ Israel xquejni.²¹ Dxejc che gunii Pabl lojpac reii César chale'c rexpejñ Israel xquejni, ni'c gunibä jiäusijcni lal ni gac guxhaläni lo César —räjp Festo.

²²Dxejcti rájp Agripa lo Festo:

—Narä rlazáza jiejn diagä xtidx nigliiga —räjp Agripa.

Dxejcti rájp Festo lojni:

—Guixee gucuadajglu xtiidxni —räjpni.

²³Che bara yääl, biääd Agripa näjza Berenice, luxh sucheduxhreni. Näjza recapitán ni sajcrü näjza rebejn ni sajcrü lo guejdxga biu'reni nen yuro xten Festo. Dxejc gunibee Festo biääd Pabl.²⁴ Dxejcti rájp Festo lo guiraa reni re' nen yuro:

—Reii Agripa näjza guiraa rebejn ni tre' ree, colcuadajg. Colhuii lo nigliire. Reni rnibee xpejñ Israel guedx Jerusalén näjza guejdxre agule'c xquejni loä, canabduxhreni güetni.²⁵ Niluxh narä rchaloä xhet bejndini te nungäj! guinibä güetni. Luxh lagajc laani gunabni chäáni te gac César juejz lojni, ni'c runä xhigab guxhaläni lojni.²⁶Naj dina ganä xhini'c gucuaä lo guijtz te guxhaläni lo César ni rnibee

narä. Ni'c biädnää niguire nez lo guiraatu, ganid nez loj guejblu, reii Agripa, filaa guejblu te gaxäjsi che aguiniini xtiidxni lo guiraanu, sidxälä xhi diidx gucuaä lo guijtz ni chää lo César.²⁷ Narä runä xhigab di nungäjl guxhalä niguire ni niäu latzguiib lo César palga di gacdi gusule'ä xhi quej xcuentni cabe'c rexpejn Israel loä.

26

Gunii Pabl rextiidxní lo reii Agripa

¹Dxejcti räjp Agripa lo Pabl:

—Gumilaa xtiidxlu loonu.

Dxejcti guläs Pabl ɳaani, gusloj ca-gusule'ni diidx lojreni. Räjpni:

²—Reii Agripa, rbalazduxhå sa'csi sajc gusule'ä diidx lo guejblu, sa'csi naj suze'ä diidx xcient guiraa requej ni gule'c rexpejn Israel.³ Sa'csi guejblu nanduxh xcient guiraa releii xten rexpejn Israel. Najnza guejblu xhicuert rdxagdijl sa'reni. Ni'c rnialduxhå na'c jieed guejblu gicutadiaglaa guejblu guiraa rextidxä.

⁴Räjpza Pabl:

—Guiraa rexpejn Israel nanchee xho nacä che gucäli biuux guedx Jerusalén. Galooli najc guedx Jerusalén ladxä.⁵ Galooliza numbeereni narä, malaii guicäjpreni gucä te farisee nani bazobduxhru xleiiunu si'cni rililajznu.⁶ Naj suga'a ree, rlajzreni jiäüä sa'csi rililazä diidx nani bia'n Dios con re-toxtadgoldoonu.⁷ Guitzubitop cuaa rexpejn Israel huililajz siliäs Dios guiraa rebengut te guibansacreni. Ni'cni bazuh-hibreni lo Dios dxej-yääl. Naj rniliä lo guejblu reii Agripa, sa'csi rililazä siliäs Dios guiraa rebengut te guibansacreni, ni'cni rlajzreni gusäurenri narä.⁸ Palga abejn Dios xhigab guiliänsi guiraa rebengut te guibansacreni, ¿xhicuert di lajztu chalil xtidx Dios?

⁹Räjpza Pabl:

—Narä benäza xhigab galoo nanabpac guidxe'chä loj rexpejn Jesucrist ni siääd Nazare't, ni'c batedäreni trabajwdxh basäüäreni neñ latzguiib.¹⁰ Guiraa recosre benäza guedx Jerusalén. Baniidx rebixhojz ni rnibee guijtz loä te basäüä rexpejn Jesucrist neñ latzguiib. Che biäurenri neñ latzguiib, narä gule'ä xquejreni te gujtreni.¹¹ Balti huält basacsiduxhäreni lagajc neñ reguidobätz te niniyajreni

Jesucrist. Luxh basacsiduxhäreni, hua'a guideb nez reguedxzijt te ro'c huisacsfä rexpejn Jesucrist.

(*Hch. 9:1-19; 22:6-16*)

¹²Räjpza Pabl:

—Ni'c sa'a nez guedx Damasco, ca'a guijtz ni baniidx rebixhojz ni rnibee.¹³ Rniliä lo guejblu, reii, si'cti läidxej, bahuiä te bajl ni siääd xhaguibaali. Rsanijruni loj gubijdx. Basanijni guideb gabí cadro suga'a näjza reni sanää.¹⁴ Che biabrloonu lo yuj, biejn diagä xse' te ni canii loä con didx hebreo: “Saulo, Saulo, ¿xhicuert rusacsílu narä näjza rexpenä? Che rusacsílu narä, lagajc luj rdejdlu trabajw, si'c te gon ni rucuani' yejc garu'ch.”¹⁵ Dxejcti räpä lojni: “¿Chu luj Dad?” Dxejc najni loä: “Narä nacä Jesucrist nani cagusacsíduxhlu.”¹⁶ Huistie, gusulii. Narä baluiloä lojlu sa'csi rlazä gaclu te xpenä. Aguleäu te gusule'lú lo rebejn guiraa ni bahuiulu nadzej, näjza guiraa recos ni churu fuluiä lojlu.¹⁷ Naj suxhalälu loj rexpejn Israel näjza lo rebenzijt nani di gac xpejn Israel. Che gusacsí rexpejn Israel näjza rebenzijt luj, sacnäduxhålú, te di ju'treni luj.¹⁸ Gacnää lastoorení te che jiejn diajgreni xtidxä, chalilajzrenini, diru xcäriéjnreni gac nayääl, sianij xcäriéjnreni. Dxejc dirurení gusoob xtidx Bençdxab ni rnibee rebendxb, sa'csi susoobreni xtidx Dios. Che chalilajzreni rextidxä, sudzucaj Dios xtojleni. Dxejcti suchaa Diosreni loj renani anajc benneya sa'csi basoobreni xtidx Dios, huililajzreni xtidxä.”

¹⁹Räjpza Pabl:

—Ni'cni rniliä lo guejblu, reii Agripa, cayunä si'cni naj Jesucrist loä gunä che baluilojni loä.²⁰ Gunixgaä xtiidxni lo reben Damasco. Räpä lojreni: “Colgusiechlajz, colgusoob xtidx Dios. Colyujin dzunsa'c te gacbee rebejn abasiechlajzu, arusoobtu xtidx Dios.” Si'cza guniä lo reben Jerusalén, näjza lo rebejn ni yu' reguedx Judea, näjza lo rebenzijt ni di gac xpejn Israel.²¹ Sa'csi benä si'c, gunaa rexpejn Israel narä neñ guidoro, rlajzreni nugu'treni narä.²² Naj racnäj Dios narä, naj sanuutis cagusule'ä rediidxga lo guiraatis bejn. Loj rebejn ni xhet rajpdi sigajc loj rebejn ni rapduxh. Rusule'ätiis nani caj lo guijtz nani bacuua toMoisés näjza guiraa reniguii nani gunii xtidx Dios. Laareni galooli guniireni xcient

jhini'c gac naj.²³ Najreni sidejd Crist traba-jwdxh, sugu'trenini. Niluxh sa'csi ganid-doo laani guibansacni lo rebengut, ganid-dooza laani suluiini loj rexpejn Israel näjza loj guiraa rebeñijzt guliipac xtidx Dios, sibañsac bejn lo rebengut, si'c ni guniini galooli.

Di Agripa nililajz xtidx Jesucrist

²⁴ Lal ni canii Pabl rediidxga lojreni, dip gunii Festo, räjpni lo Pabl:

—Pabl, yejclu cayajc. Pet sa'csi nan-duxhlu guijtz ni'c cayajc yejclu.

²⁵ Dxejcti räjp Pabl lojni:

—Rniliaj lo guejblu dad gubernador Festo, xhet rajcdi yecä. Ganax didxlili caniä.²⁶ Ree suga' reii Agripa. Laami nancheeni guiraa rediidxre, ni'c guyasi caniä rediidxre lojni, dizana guidxebä sa'csi anajnni gulii guiraa ni gujc, sa'csi xhet xhiga'tzdi gujcreni.²⁷ Guejblu reii Agripa, *¿la rililajz guejblu xtidx renigui nani bacuaa xtidx Dios, ä?* Nancheä rililajz guejblu diidxga —räjp Pabl.

²⁸ Dxejcti räjp Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpen Dios.

²⁹ Räjp Pabl lojni:

—Xhet najcdi palga guxii o xhidajl cayäadx, narä canabä guniidx Dios chalilajz guejblu xtiidxni si'c rililazä xtiidxni, nägajcza guiraa reni cacuadiag xtidxä te gactu si'c nacä, niluxh xhet näjdi resa' cadenre —räjp Pabl.

³⁰ Dxejcti huisu Agripa, Festo, Berenice, näjza rebejn ni sobganäjreni.³¹ Che gubigreni stelaad, räjpreni lo sa'reni:

—Niguire xhet bejndini te guetni, xhetza bejndini te jiäuni.

³² Dxejcti räjp Agripa lo Festo:

—Paru dini niniaj chääni lo César, sajc nuslaanuni.

27

Birii Pabl sää nez quedx Roma

¹ Basoobtireni dxej ni niu'nun nen barcw te chonnu Italia. Dxejc bateedreni Pabl näjza sgaai bejn nani niäuzu lo capitán ni laa Julio. Rnibee Julio te gayuu soldaad, najcreni te cuaa ni laa Augusto.² Näjza te dade' ni laa Aristarco guzaj, siäädni quedx Tesalónica xten Macedonia. Biu'nun nen barcw ro' quedx Cesarea. Barcwga siääd-

guedx Adramitio. Biriititu, najc xhigab teednu nez reguejdx nani yu' ro' nisdoo lo reyuj xten Asia.³ Che bara yääl guläjz barcw ro' quedx Sidón. Huenduxh gujc Julio con Pabl, basaanni bihuii Pabl rexamigwni ni yu' quejdxga te bahuiireni Pabl, badeedreni xhi rquiinni.⁴ Che sásac barcw lo nisdoo, bideednu stelaad Chipre, yuj ni tre' lo nisdoo, sa'csi sääb te beduxh, ni'c naga' Chipre xladbäjgwnu, te guxiuru rda' bej loonu.

⁵ Che sonnu nen barcw, bideednu xnisdoo reguedx Cilicia näjza xnisdoo reguedx Pan-filia, te bidzuñnu ro' quedx Mira xten Licia.

⁶ Ro'c bidxäjl capitán xten resoldaad stee barcw ni siääd quedx Alejandría. Agojl chää barcwga Italia. Bateedtini guiraanu lo bar-cwga.⁷ Balti dxej chäigaj sonnu lo nisdoo. Trabajwdxh bidzunnu lo nisdoo ro' quedx Gnido, sa'csi entis cabi' beduxh nez cadre sonnu. Ni'c trabajwdxh bideednu xlad-bäjgw yuj Creta ni tre' lo nisdoo xladbeenu. Gudejdnu quedx Salmón.⁸ Dxejcti chäiduxh sonnu nen barcw lo nisdoo nez cuä' yu Creta; si'ctis gujc bidzuñnu te lajt ro' nisdoo ni laa Buenos Puertos cadre guxii sääb bej. Gajxh ro'c tre' quedx Lasea.⁹ Agujc balti dxej cayaclaanu, luxh agudejza dxej ni rucua'n rexpejn Israel, guxii riäädx chaa ijj. Rebäire di bejn chää nen barcw sa'csi yuduxh riesgw lo nisdoo, ni'c balijdx Pabl rebejn,¹⁰ räjpni lojreni:

—Rexamigwä, runxgaä bis guejbtu, palga chonnu nen barcw chanuunu xnejznu, sajc te liädxduxh. Sinitloj cargw, sibijxh barcw, luxh silo' xhidajl bejn,¹¹ —räjpni.

¹¹ Niluxh di capitán xten resoldaad niu xtidx Pabl. Biuruni xtidx nani rusaj barcw näjza xtidx baxhuuan xten barcw.¹² Luxh sa'csi lajtgä dini gajc huen tedreni rebäii nalduxh, bejnreni xhigab hueenru guiriinu ro'c te chonnu quedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajl, rajpreni.

¹³ Ni'c che gusloj cabi' te bebäz nez lad sur, naarení pet xhet najcdi guiriinu lo nisdoo con barcw. Dxejc baslaareni barcw, sointinu ro' nisdoo gajxh cuä' Creta.

¹⁴ Niluxh di niaclaa gusloj te nisguipeduxh birii nez redajn xten Creta.¹⁵ Gunaaž bejga barcw, diru gacdi gusajrenini. Basa'ntireni sanä bejga barcw cadrotis

rlajzni. ¹⁶ Siädgobiuj barcw te canuu. Che bidzuñnu stelaad te yu'e' ni tre' lo nisdoo ni laa Clauda, guxiiru cabi' beduxhga. Dxejcli bejnreni gaan gulärseni canuu nen barcw. ¹⁷ Che basälnu canuu nen barcw, cua'reni gaii duro te baliibre ni barcwo, bateedreni gaii duu xque' barcw te na'c guibilni. Cadxejbreni te di chachu' barcw lo yujxh ni laa Sirte ni yu' nen nisdoo. Ni'c guläjtreni ladro ni rrniaaz bej te rusajni barcw, gudixhreni lajdga nen barcw. Sanäti beduxhga barcw cadrotis rlajzni. ¹⁸ Che bara yääl caguscuä' beduxh barcw lo nisdoo. Sas basälreni che'n cargw lo nisdoo te bicharu barcw. ¹⁹ Ni riojñ dxej, lagajc laareni basälreni lo nisdoo guiraa xtrast barcw. ²⁰ Che agujc balti dxej niäu lo gubijdx, diza rebale' nien xhaguiba sa'csi lalts cayajb nisguipeduxhga, biennu xhigab guiraanu sejtnu. ²¹ Xchero rut rlajzdi gau. Dxejc gusuj Pabl galäii rebejn räjpni lojreni:

—Rexamigwä, paru nucuadiajg guejbtu xtidxä, na'c niriitu xyuj Creta, di liäädixre niajc, dizanu nidejd trabawduxhre. ²² Niluxh colcuedxi lastootu. Niclatej bejn ni siääd lo barcw di guet. Barcwtis sinitloj. ²³ Nacä te xpejn Dios, runä xhitis ni rnibeeni gunä. Nayääl biädsuj te xangl Dios cuää, ²⁴ najni loä: "Na'c guidxejblu Pabl. Nanabpac chääu lo reii César. ¡Bahuilaa! Abasalajz Dioslu reni siädnälu; nicla tej reni yu' nen barcwre di guet", najni loä. ²⁵ Ni'cni caniä lo guejbtu, na'c guidxejbtu. Narä rililazä xtidx Dios. Rililazä sisiojb xtidx Dios si'c ni naj xangl Dios loä. ²⁶ Niluxh yu' cadre chalaj barcw lo yujxh nen nisdoo gajxh lo te yu'e' ni tre' nen nisdoo —räjp Pabl.

²⁷ Si'cti tiop xman balanaa beduxhga barcw nezre, nezrec lo nisdoo ni laa Adria. Pet garol yääl ni bejn renigui ni ruzaj barcw xhigab abidzujn barcw gajxh lo yuj, ²⁸ ni'c bastejbreni te guijl lo duu xhajn nisdoo, te barexhreni ro'c, dxejc gucbeereri najc nisdoo jiät si'cti galbitzibxho'p metr. Che guzaj barcw stelabäze', bastebsacreni guib con duu xajn nisdoo, dxejc gucbeereri ro'c najc nisdoo jiät si'cti galbigajdz metr. ²⁹ Dxejc bidxejbreni te di chalaj barcw yejc reguij. Bacuaatireni tajp guibro si'c guench ni naliib te cadeñ te ru'reni nen yujxh te ruscuäärreni barcw, te jia'nni tejsi lajt. Dxejc rlajzreni malaii

janiija lo guedxliuj. ³⁰ Dxejcti gulät remos canuu lo nisdoo cayujnsireni si'cni chastejbreni stee guench guib lo nisdoo, niluxh rlajzreni guxuñreni guidon la sajç guidzujnreni ro' nisdoo. ³¹ Dxejcti räjp Pabl lo capitán näjza lo resoldaad:

—Palga di redee jia'n nen barcw, di gadci guslaatu xcälnabajntu —räjpni.

³² Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuuga. ³³ Che gusloj cayanij, gunibee Pabl, räjpni lojreni:

—Nadxej rajc tiop xman gajdtu gues, gajdzatu gau. ³⁴ Naj coltajw te gac guixoobtu lo nisdoo. Na'c guntu xhigab guettu, nicla tej xquidxejctu di nitloj.

³⁵ Che gulujx gunii Pabl si'c, cua'ni yätx-tiil, badeedni xquixtios lo Dios nez loj guiraareni. Dxejc gula'nini, gusloj caya-jwnini. ³⁶ Dxejc bibaa-lajzreni, näjza laareni gusloj cayajwreni. ³⁷ Nuunu najcnu tiop gayuu gayonbitzubixho'p bejn ni yu' nen barcwga. ³⁸ Che agujc gudajwreni, basälreni triuu lo nisdoo te bicharu barcw.

³⁹ Che bianisac, direni niembee yuuga, niluxh bahuiireni cadro rdzujn te guebabä ro' nisdoo cadro yu' xhiroob yujxh ro' nisdoo. Rlajzreni nusiu'reni barcw ro'c.

⁴⁰ Dxejcti baslaareni guidap guench guib ni naaz barcw, bia'nreni guideb cadeñ nen nisdoo, baxheczareni yajg ni ruzaj barcw, guläszareni ladro nez delant barcw te bal-anaa bej barcw. Badzuréreni barcw sääreni nez ro' nisdoo. ⁴¹ Sas biu'reni te lajt cadre rdxagsa' tiop cuaa nis. Ro'c huilaj yejc barcw nen yujxh nen nisdoo, digacdiru guiniibni. Dxejcti gusloj cabijl dejtz barcw sa'csi sanuutis caguijn nisdoo detz barcw.

⁴² Dxejcti rlajz resoldaad nugu't repres te di guixoobreni lo nis guxuñreni. ⁴³ Niluxh di rlajz capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujnreni lo yujxh. ⁴⁴ Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujn guiragajc rebejn lo yujxh ro' nisdoo. Nadaanreni bidzujnreni lo yujxhga.

28

Bidzujn Pabl lo yuj ni laa Malta ni *re'* lo nisdoo

¹ Che bidzujnu lo yuj ni *tre'* lo nisdoo, biembeenu yujga najc ni laa Malta. ²Gucnäj rebejn ro'c nuure, gule'creni guiboo bahuireni nuure sa'csi cayacnalduxh, cayajbza nisguij. ³Ca' Pabl te dääz yajg, sale'cnini lo guiboo, chela biriyäl te bäl nialajz nen yajgga. Saa gudauya'nii naa Pabl. ⁴Che bahuui reben Malta li najl bäl nialajzga cayauya' naa Pabl, gusloj cayäjbreni lo sa'reni:

—Pet rugu'tni bejn ni'c mase bejnni gaan lo nisdoo siguijxni xtojlni, sejtni naj.

⁵Gubijb Pabl naani dxejcti bitejb bälga lo guiboo. Xhet gujcdi naa Pabl. ⁶Dxejc reben ro'c cabätz fiireni la sisiägijj naa Pabl o laa sejtni. Xchero bidxelojreni. Che bahuuireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

⁷Gajxh ro'c naga' xyuj te dade' ni laa Publio ni najc xcubernadoor Malta. Biojia'hnu rolizjni chon dxej. Huenduxh gujc dade'ga, baniidxnii guiraa ni biquiinu. ⁸Naga' xtdad Publio cayacxhuuni, yu'ni xliaa, cayaczani yobrejn. Huihuii Pabl. Guredxgunab Pabl lo Dios, dxejc batzuub Pabl naani yejcn, basiagajcnini. ⁹Che gucbee rebenguejdxga abasiacjci ben racxhuuga, bidzunnäjreni ben racxhuu lo Pabl, basiag Pabl guiraareni. ¹⁰Ni'c banidx-xliaareni xhidalduxh xhicos, luxh che biriinu ro'c, baniidxreni guiralii recos ni biquiinu nen barcw.

Bidzujn Pabl guedx Roma

¹¹Agujc chon báii yu'nu ro'c che biu'nu nen te barcw ni siääd Alejandría. Lagajc ro'c bateed barcwga rebäinajl che rsiäb beduxh. Yejc barcwga caj tiop figuur xten tiop biuux ni laa Cástor näjza Pólux, rexingancua'ch dios ni laa Zeus. ¹²Biriinu Malta sonnu neñ barcw nez guedx Siracusa. Ro'c bia'nnu chon dxej. ¹³Dxejcti biusacnu neñ barcw, sonnu lo nisdoo cheni bidzunlinu guejdx ni laa Regio. Che bara yääl, gubi' te bej birii lad sur. Biusacnu neñ barcw. Bara yääl bidzujnu guedx Puteoli. ¹⁴Ro'c bidxaagnu gaii xpejn Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma. ¹⁵Che gucbee rexpejn Jesucrist ni yu' guedx Roma siopsaanu nez Roma, biäädreni guedx Foro de Apio näjza stee guejdx ni laa Tres Tabernas, ro'c bidxaagreni nuure. Che bahuui Pabl lojreni, guzutipj lastooni, badeedni xquixtios lo Dios. ¹⁶Che biu'nu guedx Roma, bateed capitán repres ladznaa comandant, niluxh basaanni cualaa Pabl te yu' cadre cuääzni. Tejtis soldaad biannäj Pabl.

Baluii Pabl xtidx Dios lo rebej Roma

¹⁷Che gudejd chon dxej, gurejdx Pabl reni rnibee lo rexpejn Israel. Che bidxaag sa'reni cadre yu' Pabl, räjpni lojreni:

—Guejbtu rexamigwä, resa'ä, xhetliidi nani xhet laadi benä lo rexpejn Israel, dizana nibälazä xleii toMoisés. Niluxh basäureni narä neñ latzguuib guedx Jerusalén, dxejcti bateedreni narä ladznaa reroman. ¹⁸Che biejn diajgreni xtidxä, rlajz reguxhtis roman nuslaa narä sa'csi xhet benädi te nugu'treni narä. ¹⁹Niluxh naaddi rexpejn Israel guslaareni narä, gunabätiis lojpac reii César jiädle'creni quej ni cabe'creni xcientä. Niluxh narä xhet xquejdi rexpejn Israel cue'cä. ²⁰Ni'cni guredxä la'tu te fiä lojtu, te guininää la'tu, sa'csi rililazä lagajc si'c rililajz xpejn Israel sibansac rebengut, ni'c nalibä cadenre.

²¹Dxejcti räjpreni lojni:

—Nicla tej guijtz gajd reguxhtis xten reguedx Judea guxhal loonu xcientlu, gajdfa rexpejnu ni bidzujn ree jiädsä'n diidx xhet laadi bejnlu. ²²Rlajznu jiejn diajgnu xtiidxlu, don xhi naalu, sa'csi racbeenu xhidajl lajt rnijayjreni redidxcoob xten Jesucrist —räjpreni.

²³Gulejtireni te dxej guidxagsa'reni. Che bidzujn dxejga, bidxagsa' xhidalduxh bejn neñ yu' cadre rbäjz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con rediidx ni caj lo xleii toMoisés näjza diidx ni bacuua renigui nani gunii xtidx Dios basule'ni Jesúus najc Crist nani galooli cabätz reben Israel jiääd. ²⁴Yu' reni huililajz xtiidxni. ²⁵Sa'csi di niajcdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj tolsaías che badeed Sprit
Dxan xten Dios rediidxre guniini, räjpní lo
rextadgoldoonu:

²⁶Huij, gunii lo rebejnre, scree gojz lojreni:
Siejn diajgtu xtidxä, niluxh ditu gacbeeni.
Suhuiitu nani runä luxh ditu gumbee
xhini'c ruhuiitu.

²⁷Agucnajd lastoo rebejnre sa'csi di rla-
jzreni chalilajzreni xtidxä.

Direni cuadiajg xtidxä sa'csi di rlajzreni
jiejn diajgreni diidx ni gulipac.

Rusäuzareni balojreni te di fiireni, te di
lajzreni chalii.

Ni'cni direni gusiechlajzreni te gusaan gun-
reni dojl te gudzucaj Dios xtojreni.

²⁸Räjp Pabl lojreni:

—Colgacbee. Najli sisiule' xtidx Dios lo
rebenzijt ni di gac xpejn Israel te gusiejch
lajzreni, te gudzucaj Dios xtojreni. Rniliá-
pac lojtu, sililajzreni rextidx Dios.

²⁹Che gulujx gunii Pabl rediidxga lojreni,
ensilaareni gusloj cadxagdijl sa'reni lal ni
sääreni.

³⁰Tiop ijj guläjz Pabl guejdxga nen yu'
ni cualaani. Biuni guirali rebejn ni biääd
rolijzni. ³¹Lo guiraa rebejnga basule'ni xho
rnibee Dios lojreni. Bijzani dñidx xcuent
redzuun nani bejn Jesucrist. Di lastooni
nidxejb, rutza badxojndi guniini.

Guijtz Nani Bacuua Pabl Lo Rebeñ Roman

Rucuua Pabl lo reben guidoo nen guedx Roma

¹Narä, Pabl, nacä te xmos Jesucrist, laani gule narä te gusule'ä xtidx Dios loj rebejn.

²Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guijtz xten re-profe'tga. ³Rediidx ni rusule'ä nadj xcient Jesucrist, Xi'n Dios, ni nadj xagdoo toreií David xcient tiejxhni. ⁴Xcuent Xsprit Dxan Dad Jesucrist, najcni Xi'npac Dios. Badeed Dios yälrnibee lojni, ni'cni gubañsacni lo rebengut. ⁵Laani gucnäjni narä, guleni narä te gusule'ä xtiidxni te guzobdiajgtu, te chalilajz rebejn ni rej guideb guedxliuj xtiidxni. ⁶Luxh nadxaagtlu loj rebejn ni guleni te chalilajzreni xtiidxni.

⁷Ruxhalä guijtzre lojtu ni yu' guedx Roma, guiraatu ni sanälajz Dios ni bibeetu gactu benðxan. Gacnäj Dios ni nadj Xtadnu näjza Dad Jesucrist la'tu, guscuedxirenai lajztu.

Rlajz Pabl chää guedx Roma

⁸Ganidtoo rudedä xquixtios loj Dios con laj Jesucrist xcient guiraatu, sa'csi guideb guedxliuj ruju bejn diidx xcient xcälrlilajztu. ⁹Lagajc Dios anajn xho rnibä guet-guejt xcient la'tu lojni. Narä runä xtzuuun Dios guideb lastoä, rusule'ä diidx xcient Xi'nni Jesucrist. ¹⁰Sanuutis canabä lojni, top sajc jiädhuiä lojtu si'cni rlazä gunä agujc xchejli. ¹¹Sa'csi rlazduxhä fiä lojtu, te gacnäätu, te gulidxä la'tu xhi te xtidx Dios te sudzu'tzruty lo xtiidxni. ¹²Nalajznu, te gustioobnu lajz sa'nu xcälrlilajz xtidx Dios xten sa'nun.

¹³Rebetzä rlazä gacbeetu balti huält benä xhigab jiädhuiä lojtu, luxh gajd gacdi jiälä. Rlazä jiädhuiä lojtu te chalilajz xhidajlru bejn xtidx Dios sigajcni salilajzreni guiralajt cadro hua'a loj rebejn ni di gac xpen Israel. ¹⁴Nungäjlpac gusule'ä xtidx Dios loj rebejn nani rnii garen-garen didxsaj, sigajc loj reben griegw, loj renani nayaäl, sigajc loj reben najn. ¹⁵Rbaali lazä suga'a naj, te gusule' xtidx Dios näjza lojtu ni yu' guedx Roma.

Xcälrnibee xtidx Dios

¹⁶Sa'csi dina guituä xcient xtidx Dios, sa'csi najcni yälrnibee xten Dios te guslaani lo dojl chutis bejn nani rlajz chalilajz xti-idxni, ganidtoo reni nadj rexpejn Israel, dxejcti näjza rebejn ni di gac xpen Israel. ¹⁷Sa'csi xtidx Dios rusule' xho nanab chalilajz te bejn te gacni te bensa'c nez lo Dios sa'csi huililajzni xtiidxni. Lo xtidx Dios caj scree: "Palga rililajz te bejn xtidx Dios, najcni te bennaya nez lo Dios, nabannäjni Dios xcient xcälrlilajzni."

Rextojl bejn

¹⁸Xcälrdxe'ch Dios nani yu' xhaguibaa siajbni yejc rebejn nani gun dojl, nani rlajz gun cosgijdx, nani di gusaan guisieed sabejnreni didxgulii. ¹⁹Sa'csi anancheereni nani sajc gan bejn xcient Dios, ni'cni najn-reni rajpreni dojl, sa'csi ruluipac Dios na'c gunreni dojl. ²⁰Cheni birixtiejli guedxliuj, recos nani di gacdi fii bejn xcient Dios, si'c xcälrnibeeni ni nadj par tejpas, si'c xtuixh xtelli, huenuisi ruzenreni sa'csi ruluilojreni recos ni ruzeñ nani benchee Dios. Guiraa reni'c ruluiloj najcni Gueb Dios ni rajo yälrnibee par tejpas, ni'c di gacdi guinireni loj Dios direni niembee xhini'c rlajz Dios gunreni. ²¹Ni'cni, mase biem-beereni Dios, direni nilia'p xpala'nni te gañreni Gueb Dios, dizareni nuudeed xquixtios lojni. Alga guyalajz gujcreni, bicäjy xcärijeñreni, naareni hueen nadj gunreni si'ctis ni jiajb yejcreni, si'cni rsia' lajzreni nen lastooren. ²²Caniireni nanduxhreni, per direni gan, nayaälreni. ²³Gulälazreni xcälrdimbicha' Dios ni nadj tejsi par tejpas, te bazuhijbreni nez loj rebanäjb ni benchee ñaareni, ni nadj guiraa ni rujn lojni si'c rujn lo te niguii ni rnitloj, näjza guiraa ni nadj si'c reman ni rutajt, näjza guiraa ni nadj si'c reman ni yu' tajp ni'ni, näjza ni nadj si'c rebäj.

²⁴Ni'cni gulälaz Diosreni, basaanni gun-reni si'ctis ni rlajzreni. Bejnreni dojl con resa'reni. ²⁵Sa'csi ahuililajzreni didx-xhii lacuua nililajzreni xtidxlü Dios, ruzuhijbzareni nez loj recos ni benchee Dios, lacuua guzuxhijbreni loj Dios nani benchee guiraa rexhicos, Dios nacle' par tejpas. Sug-acni si'c.

²⁶Ni'cni gulälaz Diosreni, subia'nreni lo xcällatsajreni, lo yälxtuju xtenreni. Diru

regunaa guesnäj niguii, lagajc sagunaareni resnäjreni.²⁷ Sigajcza reniguii gulälaz regunaa, rujnreni dojl con lagajc saniguiireni. Luxh lagajc laareni siguijxreni latsiaj ni rujnreni.

²⁸ Luxh sa'csi di rlajzreni jiurení Dios, basaanti Dios suyu' cosgуйdxtis xcäriejnreni, te chanuutisreni lo xcällatsijareni, rujnreni recos ni xhet laadi. ²⁹ Guidxareni dojl, näjza cosgүjdx, näj yärlruguilajz xhixten sa'reni; rugu'treni bejn, rujnreni yärlsiäblajz, rucuanäjreni resa'reni, rusgueereni sa'reni, rdxechnäjreni sa'reni, rniiżareni didxxhii. ³⁰ Rniyaj sa'reni, rdxe'chreni lo Dios, guyalajzreni, dipacreni guituujy, rliä'preni lagajc xpala'nreni, entis latsiacoop rbäxtiejeni, guyalajzreni lo xcużajnreni, ³¹ nadduxhreni, xheti xcäriejnreni, xhet sajcdi xtiidxreni ni ria'nreni lo sabejnreni, direni chanälajz sa'reni si'cni nungäjł gacni, dizareni gulaslajz sa'reni. ³² Luxh mase agucbeereni gun Dios yälguxhtis lojreni, najnzareni nungäjł guetpac renani rujn recosre, nicla jiurení, rujnreni guiraa recosgүjdxre, luxh rbaali lajzreni richunäjreni rebejn ni rujnza recosgүjdxga.

2

Dios rujn yälguxhtis con didxguliipac

¹ Ni'cni, ¿canejz chäätu, la'tu benguedxluij? Chutis luj ni rgubeelu sabejnlu, lagajc si'c cubeezareni luj, lagajc xcient ni'c sajclu yälguxhtis, sa'csi luj rgubeelu sabejnlu, lagajcza luj rujnlu lagajc dojlga. ² Nancheenu sujn Dios yälguxhtissa'c loj renani rujn sa' dojlga.

³ Ben guedxluij ni rgubee loj renani rujn dojl, luxh sigajcza rujnlu, ¿la rujrulu xhigab sidedcaj gun Dios yälguxhtis lojlu xcient xtojllu, ä? ⁴ O ¿la rbälazlu ni rujn Dios, najcni huenduxh, lacti guroob najc xcärlulaslajzni, rapduxhzani pasens? ¿La dilu gan dee najc ni gacnäjlu gusiechlajzlu te guibicajlu lo dojl, ä? ⁵ Luxh sa'csi nadduxhlu, di lastoolu guigoodz te gusiechlajzlu, cagutajllu yälguxhtis ni gaclu che guidzujn dxej ni gun Dios yälguxhtis loj rebejn guedxluij, ⁶ siguijx Dios loj tejgatu xcient dzuun nani bejn tejgatu. ⁷ Loj rebejn nani rlajztsireni guibañsa'c, ni gusoob xtiidxni, sudeed

Dios yälnabajn par tejpas sa'csi gudiilreni xhaniduj näjza go'preni xpala'nreni loj Dios, rlajzreni guibajnreni loj Dios par tejpas. ⁸ Luxh sidxe'ch Dios, sidxe'chduxhni loj renani sanälajz lagajc laareni, nani di jiu xtidxguliini, alga rusooobreni reyällatsaj, redidxgijdx. ⁹ Guiraa reben guedxluij ni rujn dojl sidejd trabajwduxh näjza sac-huin lastooreni; ganid rexpen Israel, dxejcti näjza reben griegw. ¹⁰ Loj guiraa rebejn nani rujn cos-hueen, sudeed Dios xhaniduj, näjza bala'ñ, näjza yärlbecdxsi lastooreni, ganid rexpen Israel, dxejcti näjza reben griegw.

¹¹ Sa'csi tebloj najc guiraasi rebejn nez loj Dios. ¹² Guiraa rebejn nani bejn dojl, luxh direni niembee xleii Dios, sinítlojreni sin leiiga; guiraa reni biembee xleii Dios, lagajc con leiiga sujn Dios yälguxhtisreni xcient xtojłreni. ¹³ Xhet ganaxdi renani rucuadajtis xleii Moisés najc beñnaya nez loj Dios; rebejn ni rusoobpac rexleii to-Moisés, reni'c najc beñnaya loj Dios. ¹⁴ Yu' xhidal bejn ni di gumbee xleii to-Moisés, dizareni gac rexpen Israel, rujnreni recos ni caj lo leii. Najnreni xhini'c najc cos sa'c. Ni'cni lagajc xcäriejnreni najc si'c leii par laareni. ¹⁵ Recossa'c ni rujnreni rululoi nezyusa'c ni yu' lastooreni. Xcäriejnreni rululoi xhini'c loj guiraa nani rujnreni najc cos sa'c, xhini'c najc dojl. ¹⁶ Guiraa recosre sajç che guidzujn dxej ni gun Dios yälguxhtis guiraa rexhigabxhiga'tz ni yu' lastoo rebejn. Jesucrist gac juejz lojreni, dxejcti sisiojb guiraa redidiñ ni cagusule'ä lojtu.

Rexpen Israel näj xleii to-Moisés

¹⁷ Luj ni laalu xpen Israel, ni rniilu sanä-paclu xleii to-Moisés, rniduxhlu najc xpen Dios, ¹⁸ rniilu nancheezalu xhini'c rlajz Dios gunlu, anajnzalu xhini'c najc hueenru sa'csi bisiedsa'cpaclu leii. ¹⁹ Rchalolu sajç guluiilu nezyusa'c lo rebejn nani najc si'c lotiä'p, sajç guzanijlu xcäriejn reni nacäjy xcäriejnreni. ²⁰ Rchalolu najclu mastr lo renani nayääl, najczalu mastr lo rebuuux, sa'csi nansa'clu leii, luxh lojni caj guiraa yälnajn näjza guiraa didxguliipac. ²¹ Ni'cni rniä lojlu, luj ni caguseed xtee bejn, ¿xhicuent dilu guseed lagajc luj? Luj ni rusule'lù diidx na'c cuan bejn, ¿xhicuent rbajnlu? ²² Luj nani rniilu na'c guesnäjni

te ni di gac chäälni, *gla* resnäjlu nani di gac chäällu, ä? Rdxe'chlū xcuent rebanäjb, *żxhicuent* rbäälū xhicos neñ xquidoo rebanäjb, ä? ²³ Luj rlajzlu chä'p xpala'nlu sa'csi najnlu leii, *gla* rusanxtujyu Dios sa'csi dilu gusoob xtidx leiiga, ä? ²⁴ Bahuii xho rebejn nani di gac xpen Israel rniyajreni Dios sa'csi la'tu ditu gusoob xtidxni, rujntu dojl, sigajc ni caj lo xtidx Dios.

²⁵ Palga la'tu chutu bee si'cni caj lo leiga, palga gusoobtu guiraa diidx ni caj lo leii, laaca. Luxh palga ditu gusoob guiralipac xtidx leiiga, xlia'si guyu'tu bee, sa'csi rujntu dojl. ²⁶ Ni'l cni palga te bejn ni di chu beega, luxh rusoobnm guirliipac xtidx leiiga, *gla* di gacd guchaagni cuent najcni si'c te nani yu' beega, ä? ²⁷ Bejn nani di chu beega, luxh rililajzni guirliipac xtidx leiiga, sujnni yälguxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl. ²⁸ Sa'csi xhet guiraadi rebejn ni yu' beega najc rexpejn Israel, luxh di beega ni ru' bejn gun gusoobpac bejn xtidx leiiga. ²⁹ Najcpac te xpen Israel nani najcni nen lastooni, nani yu' bee lastooni, rusoobpacni xtidx Dios xcuent Sprit xtelli, dini gunni sa'csi na-jctisni costumbr. Dios ni siliä'p xpala'nni, xhet bejnđi.

3

¹ *żXhini'*c sacnäj te bejn najcni te rexpen Israel, ä? O *żxhi* sajc chuni beega? ² Empac sacduxhni! Ganidtoo, sa'csi loj rexpen Israel badeed Dios xtidxni. ³ Mase yu' renani di nililajz diidxga, *gla* ni'l cni xhet sajcdi diidx ni bia'n Dios loj rexpejnni, ä? ⁴ *żXho* gacni si'c! Diostis najc gulipiipac, guiralii bejn rusguee. Scree caj lo xtidx Dios: Lagajc xtiidxlul suluii laaca rujnlu, te che gaclu yälguxhtis, nicla tej xtojllu di guidxäjl.

⁵ Palga xcällatsajnu ruluiru najc Dios huenduxh, *żxhini'*c guiniinu dxejc? Palga gun Dios yälguxhtis nurnu, dxejc tednu trabajwduxh, *żla* rujnni latsaj loonu, ä? (Caniä si'c te ben güedxliuj najc.) ⁶ *żXho* gacni si'c! Paru najcni si'c, *żxho* mood gun Dios yälguxhtis loj rebejn güedxliuj?

⁷ Paru redidx-xhii ni rniä riliä'pru xpala'n Dios näja xtidxiini, *żxhicuent* gunni yälguxhtis narä si'c te bendojl? ⁸ Yu'za

bejn ni canii didx-xhii, najreni cayäjpnu lo rebejn: "Colyejn cosgijdx te guiluilojni recoshuen." Per rebejn ni canii si'c sidzujn dxej gacreni yälguxhtis.

Guiraanu najcnu bendojl

⁹ *żDxejca?* *żLa* najcnu benhuenduxhru lojreni, ä? Dini gac; tebloj abile'cnu yälpuij xten rexpen Israel con rebejn ni di gac xpen Israel, sa'csi guiraareni yu'reni lo dojl.

¹⁰ Si'l cni caj lo gjijt:

Ruti te bensa'c, nicla tejni.

¹¹ Ruti te bejn ni racbee, rutu chu tej nani rguil Dios.

¹² Guiragajcreni abirii lo xnejz Dios, teblojsi xhet sajcdireni.

Ruti chu tej ni rujn cossa'c, nicla tejni.

¹³ Ro'reni rii ganax didxgijdx, najcni si'c te baa ni naxal, rusgueereni con lujdxreni, didxlatssaj rii ro'reni najcni si'c beneñ ni yu' ro' te bälñialajz.

¹⁴ Ro'reni entis cague,

entis canii didxrdxe'ch lo sa'reni.

¹⁵ Ni'reni ruxuñli saxhe' xtiejn sa'reni.

¹⁶ Cadrotis rijreni rujnreni latsaj, ruteedreni sa'reni trabajw.

¹⁷ Direnij gumbee nezyuj ni ruscuecdxilajz.

¹⁸ Niclaza guidxelojreni Dios.

¹⁹ Racbeenu najc rediidx nani caj lo xleii Dios par rebejn ni rnibee leii lojreni, te jiäuu ro' guiralii rebejn, te guiraa reben güedxliuj gacbeereni yu' xtojleni nez loj Dios. ²⁰ Sa'csi mase gusoob bejn guira'ti diidx ni caj lo leii, di leiga gudzucaj xtoj bejnäga, sa'csi leiga najc nani guluii dojl ni yu' nen lastooni.

Ruslaa Dios lo dojl xcuent yälrililajz xtiidxn

²¹ *Naj* ruluii Dios stee mood guibicaj xtojlnu, nani di gac mood ni caj lo xleii to-Moisés. Luxh galooli gusloj canii Dios xcuent nezyujre, cajni lo reguijtz xten leii näjza lo reguijtz ni bejn rebejn nani gunni xtidx Dios galoo. ²² Stee mood najc scree: Chutis ni chalilajz xtidx Jesucrist, sajc naya lastooni nez loj Dios; si'c sajc garaliiza nani salilajz, sa'csi tebloj najcnu nez lojni. ²³ Sa'csi guiralii rebejn güedxliuj abanijt lo Dios, direni guiga' guidzujnreni lo xnezyuj Dios. ²⁴ Niluxh balaslajz Dios nuunu, banidxxlia'ni loonu yälnabannaya nez

loj Dios sa'csi Jesucristis gudijx yälguxhtis xten dojl che baxhe'ni xtiejnni lo crujz te badzucajni xtojlnu.²⁵ Baxhal Dios xi'nni, Jesucrist, te cuajni lo crujz nez loj rebejn te si'c gudijxnii guiraa rextojl chutis bejn ni rililajz xtidx Dios xcient xtiejn Jesucrist. Si'c bejn Dios te guluiini xho guibannaya bejn lojni. Galoo gojptis Dios pasens rebejn, dini niujn yälguxhtis rextojlreni,²⁶ sa'csi acanajn Dios guc gunni yälguxhtis redojlga, te si'c guiluuiini xcälnayani nez loj guiraa rebejn, te Diospac gunnaya nez lojni chutis ni rililajz xtidx Jesucrist.

²⁷ Ni'cni ¿con yälnaro? ¿Con yälbindaan? ¡Xhet sajcdini! ¿Xhi leii ruzducaj xtojlnu? ¿La leii nadj ni rnii jiennu dzunsa'c, ä? ¡Dini gac si'c! Yu' tejtis leii ni ruzducaj dojl, nani rnii chalilajztis bejn xtidx Jesucrist.²⁸ Dxejc sajc guiniä lojtu chutis bejn sajc gac naya nez loj Dios sa'csi rililajzni xtidx Jesucrist, xhet sa'csi rujnni redzunsa'c ni caj lo leii.

²⁹ ¿La nadj Dios Xtiocoottis rexpen Israel, ä? ¿La dini gac näjza Dios xten rebejn ni di gac xpen Israel? ¡Xho dini gac! Najcni Dios xten gurop cuaa bejn.³⁰ Ruti chu stee Dios, tejtis Dios yu'. Ruslaani lo dojl rebejn ni guyu' bee sa'csi huililajzreni xtiidxni, sigajcza ruslaani lo dojl rebejn ni xhet beedi guyu' sa'csi huililajzareni xtiidxni.³¹ ¿La ruzducajnu leii sa'csi rililajznu, ä? Ajndi. ¡Xho gacni si'c! Alga basoobnu xtidx leiiga che huililajznu xtidx Jesucrist.

4

Xcälrililajz toAbram

¹ ¿Xhini'i'c sajc guiniinu xcient toxtad-goldooni, Abram? ² Paru nadjc toAbram benñaya nez loj Dios por redzuun ni bejnni, pet sajc guibalazduxhni, per xhet nez lojdi Dios. ³ ¿Xhini'i'c caj lo xtidx Dios? Caj rediidxre:

Huililajz toAbram xtidx Dios, ni'c bachaag Dios cuent najcni te benñaya nez lojni.

⁴ Meel nani rca' te bejn ni rujn te dzuun, meelga nadjc ni riäjl xca'ni, xhet rcaxlia'dinini. ⁵ Luxh nani rililajzts xtidx Dios ni ruslaa bejn lo dojl, lacuua naani yu' xhi dzuun sajc gunni te guibicaj xtojlni, bejngä nadjc te benñaya nez loj Dios, sa'csi huililajzni xtiidxni. ⁶ Sigajcza najc toDavid,

chicbaa bejn nani ruchaag Dios cuent na-jcni te benñaya luxh di niuiin niujnni redzuun ni caj lo leii. Räjpni:

⁷ Chicbaa renani abaslaa Dios lo xtojlreni, renani abiäuu loj xtojlreni.

⁸ Chicbaa bejn nani diru Dios gun cuent xtojlni.

⁹ ¿La sajc guiniini chicbaa rebejntis nani guyu' bee, ä? ¿La et näjdiza renani di niu' bee, ä? Sa'csi rniinu: "ToAbram gujc te benñaya nez loj Dios sa'csi huililajzni xtidx Dios." ¹⁰ Guc bidxaag cuent najcni te benñaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcientni che gajdni chu bee. ¹¹ Dxejcti guyu'ni bee si'c te seen xten yälnaya sa'csi huililajzni xtidx Dios che gajdlini chu bee te gacni xtag guiraa renani rililajz lał ni xhet beedi yu'reni, te näjza laareni guidx-aag cuent najcreni benñaya nez loj Dios,¹² te gacanzi xtag guiraa renani yu' bee ni huililajza xtidx Dios si'c huililajz toAbram cheni gajdni chu bee.

Diidx ni bia'n Dios rsiojb xcient yälrililajz

¹³ Bia'n Dios diidx loj toAbram näjza loj rexagdooni, xca'ni quedxliytre si'c yälnasa'c xtenni. Xhet sa'csi gusoobni xtidx leii xca'nini, sica'nini sa'csi nadjc toAbram te benñaya nez loj Dios sa'csi huililajzni xtidx Dios. ¹⁴ Sa'csi paru renani rusooob xtidx leiiga nadjc nani xca' yälnasa'cga, xlia'si chalilajz bejn xtidx Jesucrist, luxh xhetza sajcdi diidx nani bia'n Dios loj toAbram.

¹⁵ Che yu' te leii, luxh yu' chu di gusoobni, dxejc rdxe'ch Dios loj bejn. Cadro xheti leii, xhetiza xtojlni.

¹⁶ Ni'cni balaslajz Dios nuunu, te sudzu'tz diidx ni bia'nni loj toAbram, te guiraa rexagdooni ni rililajz sica' yälnasa'c, xhet xtebtis renani sasanäj xleii toMoisés, näjacza renani rililajz xtidx Dios si'c huililajz toAbram, nani nadjc xtag guiraanu nani chalilajz xtidx Dios. ¹⁷ Si'cza caj lo xtidx Dios, caj rediidxre: "Abenä gaclu xtag xhidal renación." Si'c bia'n Dios diidx loj toAbram, Gueb Dios nani gudeed yälnabajn loj rebengut, nani rnii xcient recos nani gajd gac ascanu ala najcni.

¹⁸ Anajc toAbram naganduxh soob diidx ni bia'n Dios con laani, luxh laani empac huililajzni, ni'c gujcni xtag xhidal nación, te gusoob xtidx Dios ni guniini

che räjpní: "Scree gac xhidajl rexagdoolu."

¹⁹ Di toAbram nunijt xcälrililajzni, mase ayu'ni tegayuu ijz, najnni anajcni bengool, luxh sigajcza Sara abengool diru xi'hreni chu. ²⁰ Dini niun-tio'p lajzni xcient rediidx nani bia'n Dios con laani, alga gusutijpruni huililajzni xtiidxni, gulá'pni xpala'n Dios, badeedni xquixtios lojni. ²¹ Anajnni rajp Dios yälrnibee te gunni guirali nani bia'n diidx gunni. ²² Ni'c bachaag Dios cuent najcni te benñaya nez lojni sa'csi huililajzni xtidx Dios.

²³ Xhet xtebtisdi xcient toAbram cuaj rediidxre: "Bídxaaq cuent najcni te benñaya nez loj Dios sa'csi huililajzni xtidx Dios", ²⁴ näjza xcientnu cuajni, sa'csi che chalilaaznu xtiidx nani baspansac Xtad Jesucrist loj rebengut, sidxaag cuent najcnu benñaya nez loj Dios. ²⁵ Bacuaareni Jesucrist lo crujz te gudixni rextojlunu nez loj Dios, luxh gubansacni lo rebengut, te gac gacnu benñaya nez loj Dios.

5

Xhi rsiajc bejn che najcreni benñaya nez loj Dios

¹ Ni'cni che rililajznu xtidx Dios rudzucaj Jesucrist xtojlunu rajcnu benñaya nez loj Dios, ni'cni ruscuecdxini lajznu.

² Sa'csi gujt Jesucrist, sa'csi gubansacni lo rebengut xcient nuurnu, che rililajznu xtidx Dios xcient Jesucrist, rulaslajz Dios nuurnu, ni'cni rbalajznu, rajpnu yälnbajn, su'pacnu lo xcälrldimbicha' Dios.

³ Luxh xhet ni'ctis, sajczu guibalaznu che tednu trabajw, sa'csi najnnu trabajwga sujn jia'pnu pasens. ⁴ Luxh che rajpnu pasens rajcnu te benguyajlru; che anajczanu benguyajl, rililazsa'crunu. ⁵ Luxh yälrililazsa'cnu dimi gusanxtuji, sa'csi yälsanälajz ni rajp Dios ruchaj lastoonu sa'csi neñ lastoonu rbäjz Xsprit Dxan xten Dios ni baniidxni loonu.

⁶ Lañ ni xhetliidi sajcdi jiennu lagajc xcientnu te guibicaj xtojlunu, che basa' dxej biääd Jesucrist te gujtni lo crujz xcient rebendojl. ⁷ Guliipacni, naganduxh guidxälni te bejn ni xcäjb guet lacuua te bejn ni laaca rujnni. Per sidxäjl te bejn ni xcäjb guet lacuua te bensa'. ⁸ Luxh Dios baluiloj xcälrinälajzni xcient nuurnu sa'csi lañ ni yugajcnu lo dojl, gujt Jesucrist lo crujz

xcuentnu. ⁹ Aticaxh naj ni najcnu benñaya nez loj Dios sa'csi baxhe'ni xtiejnni te gubicaj xtojlunu, naj sidedcaj gacnu xcälguxhtis Dios. ¹⁰ Palga lañ ni rdxe'chnu lo Dios, basiäjlni lajzni xcientnu sa'csi gujt Xi'nni lo crujz, naj ni abiäjl lajzni, suslaani nuure lo dojl sa'csi gubansac Xi'nni loj rebengut. ¹¹ Luxh xhet ni'ctis, sibalaznjnu Dios xcient Dad Jesucrist, sa'csi xcientni ara'pnu yälrbedxi lajzni nez loj Dios.

Adán con Dad Jesucrist

¹² Ni'cni, xcient tejtis nigui biu' dojl lo quedxliuj, luxh xcient dojl biäädza yälgujt, gudejdti yälgujt loj guiraa rebejn, sa'csi guiraa rebejn bejnreni dojl. ¹³ Cheni gajd xleii toMoisés chu lo quedxliujre, alabejn rebejn dojl, per di niajcdi nucuaquijni rebejn sa'csi xheti lei. ¹⁴ Luxh empac gujt rebejn neñ redxej ni gubajn toAdán hasta redxej ni gubajn toMoisés, mase direni niujn lagajc dojl nani bejn toAdán; luxh rululiloj yu' ch stee bejn nungäjli jiääd.

¹⁵ Luxh nani runidx-xlia' Dios dini gac si'c najc xtojl toAdán. Dini gac si'c sa'csi palga xcient dojl ni bejn toAdán, gujt xhidaldukh bejn, cuantimaaz naj sunidx-xlia' Dios yälnbajn par tejpas loonu por xcälrulaslajz Dios, nägajc por xcälrulaslajz Dad nani laa Jesucrist. ¹⁶ Luxh nani runidx-xlia' Dios loonu dini gac si'c yälrunijt ni biääd loonu xcient dojl ni bejn toAdán; sa'csi xcient tejtis dojlga biääd yälguxhtis xten Dios, sa'csi guiraliiza rebejn quedxliujre yu' lo dojl, per xcient nani banidx-xlia' Dios, nalajznu, gujt Xi'nni Jesucrist lo crujz, ni'c gujc sa'csi yuduxhaje dojl, te xcient ni bejn Jesucrist sajc gac bejn benñaya nez loj Dios. ¹⁷ Palga xcient dojl ni bejn tejsi bejngä gunibee yälgujt lo guiraa bejn, cuantimaaz lo yälnbajn par tejpas sinibee guiraa reni rca' xcälrulaslajz Jesucrist näjza renani rcaxlia' lojni yälracnaya nez loj Dios.

¹⁸ Ni'cni sigajc ni biääd yälguxhtis lo guiraa reben quedxliuj xcient dojl ni bejn tejsi nigui, sigajcza sa'csi basoob stee nigui xtidx Dios, xhidal bejn gujc benñaya nez loj Dios, cua'reni yälnbajn par tejpas. ¹⁹ Nalajznu sigajc ni banijt xhidaldukh bejn nez loj Dios xcient tej nigui ni di nusoob xtidx Dios, sigajcza xhidaldukh bejn sajc benñaya nez loj Dios xcient tej nigui ni basoob xtiidx Dios. ²⁰ Ni'cni

badeed Dios xleii toMoisés, te guzenru dojl. Niluxh cadro guyuduxh dojl, ro'c nan-abza chuduxhru xcārlulaslazduxh Dios, ²¹ te sigajc ni gunibee dojl guyu' yālgujt, sigajcza guinibeeru xcārlulaslazj Dio te jia'cnu bennaya nez loj Dios, te xca'nū yālnabajn par tejpas xcient Xi'nni, Dad Jesucrist.

6

Agujtnu lo dojl per nabannäjnu Jesucrist

¹ *¿Xhini'c guiniinu, naj?* ² *¿La sajc guidx-unrunu lo dojl te tioobru xcārlulaslazj Dio, ä?* ³ *¿Gurnälojtu gacni si'c!* Nuurnu najcnu si'c te bengut lo dojl sa'csi rililajznu xtidx Dio; ⁴ *xhoxh gac guibajnrunu lo dojl?* ⁵ *¿La ditu gan, che gurobnisnu con laj Jesucrist, najcni si'c ni näjza nuurnu gujtnu si'c ni gujt Jesucrist?* ⁶ *Sa'csi che gurobnisnu bigatznäjnuni si'c lo yālgujt, te sigajcni huäjs Jesucrist lo yālgujt xcient xcālrnabee Dio, sigajcza näj nuurnu sajc guidxunnu lo te yālnabancoob.*

⁵ *Sa'csi palga gujctu tejsi con laani lo xcālgujtni che birobnisnu, sigajcza sajcnu tejsi con laani lo yālnabansac lo rebengut.* ⁶ *Ni'cni xcārrienbiejwnu cuaj lo cruzj con laani, te badzucajni rextojlnu, te di gacdiru guinibee dojl loonu.* ⁷ *Sa'csi nani agujt, di gacdiru guinibee dojl lojni.* ⁸ *Palga nuurnu agujtnu con Jesucrist, rililaaznu sibānsaczau con laani.* ⁹ *Sa'csi nadon-pacnu gubānsac Jesucrist loj rebengut, ni'c diruni guet, diru yālgujt ga'p yālrnabee lojni.* ¹⁰ *Che gujt Jesucrist, gujtni xcient dojl, luxh diru gacdi guinibee dojl laani par tejpas; naj ni gubānsacni, nabajnni nez loj Dio.* ¹¹ *Ni'cni la'tu colguchaag cuent najctu si'c te bengut lo dojl, luxh nez loj Dio, colguchaag cuent nabañnjtu Jesucrist.*

¹² *Ni'cni na'c gusaantu guinibee dojl tiejxhtu te guntu si'ctis ni rlajz tiejxhtu.* ¹³ *Na'cruza gusaantu jiajb guideb lagaa tiejxhtu lo dojl te guntu cosguijdx.* Maazru hueen colgudeed tiejxhtu lo Dio si'c te bejn nani gubānsac lo rebengut, näjza colgudeed guideb lagaa tiejxhtu te guntu recoshueen si'c ni rlajz Dio guntu.

¹⁴ *Sa'csi diru dojl guinibee lojtu, sa'csi dirutu chu loj xleii toMoisés, sa'csi yu'tu lo xcārlulaslazj Dio.*

La'tu najc si'c remos

¹⁵ *¿Xho gacni naj?* ¹⁶ *¿La sajc jienrunu dojl naj ni dirunu chu lo leii sa'csi yu'nū lo xcārlulaslazj Dio, ä?* ¹⁷ *¿Xho gacni si'c!* ¹⁸ *La'tu nansa'ctu palga yu'tu si'c te mos loj te lam te gusobdiajgtu xtiidxni, najcpactu xmos bejn nani rusooobtu xtiidxni.* Ni'cni, palga gusooobtu xtidx dojl, ni'c najc xlamtu, ni'c siädnä yālgujt lojtu. Palga gusooobtu xtidx Dio, ni'c najc xlamtu. Dxejc sajctu bennaya nez loj Dio. ¹⁹ *Xquixtios lo Dio, galoo gujctu xmos dojl, per naj guideb las-tootu basobdiajgtu xtidxcoob Dio, huililajztu xtiidxni ni basule'nu lojtu.* ²⁰ *Luxh agulaatu lo dojl, biädjiajctu xmos Dio lo dzunsa'c.* ²¹ *Narä cagusule'ä didix con sa' didix guyasire sa'csi gajdtu gacbesa'c xho najc xnezyuj Dio.* Che gujctu xmos dojl, guideb lagaatu bejntu dojl, bejntu latsiaj, luxh ni'c satajltis latsiaj ni bejntu. *Naj ni najctu xmos Dio lo dzunsa'c, guideb lagaatu colyejirnu dzunsa'c, te si'c sidajlru dzunsa'c ni guntu sa'csi najctu bennaya nez loj Dio.*

²² *Sa'csi che gujctu xmos dojl, di rextidx Dio guinibee la'tu.* ²³ *Naja', ¿xhini'c bejntu gaan che gujctu xmos dojl, bejntu recos ni rtuinäjtu naj?* Ni xnezyuj recosga rdzujn loj yālgujittis. ²⁴ *Per naj, sa'csi agulaatu lo dojl, abiu'tu najctu xmos Dio, sujntu sajctu bennaya nez loj Dio, luxh xnezyuj recoscoobre rdzujn lo yālnabannäj Dio par tejpas.* ²⁵ *Xcālrajax xten dojl najc yālgujt, per nani runidx-xlia' Dio najc xcālnabannäj Dio par tejpas xcient ni bejin Jesucrist xtdadnu.*

7

Yālruluii ni rudeed yālguchnaa

¹ *Caniä lojtu ni najn xleii toMoisés.* ² *¿La ditu gan, resa'ä, xleii toMoisés rnibee loj te bejn guideb nabajnni lo guedxlijre?* ³ *Najcni si'c te gunaa nani bachnaa te niguui.* Nan-abpac cuäznäjni chäälni guideb nabajnni. Si'c rnibee leiiga. Palga guet chäälni, diru gacdi guinibee leiiga lojni xcient chäälni. ⁴ *Ni'cni, laj ni nabajn chäälni gunaaga, palga cuäznäj gunaaga ste'ca niguui, cayujnni dojl sirilajni gunaguijdx.* Palga agujt chäälni gunaaga, agulaani lo leiiga, sajc guchnaani stee niguui, xhet dojldi cayujnni, dizani guirilaj gunaguijdx.

⁴Ni'cni la'tu, rebetzä, sigajcza agulaatu lo leiiga, sa'csi najcni si'cni gujctu si'c bengut lo leii che gujt Jesucrist lo crujz, te naj sajc jiu'tu lo ste'ca bejn, loj lagajc Jesucrist nani guba_nsac loj rebengut te sajc jiennu redzunsa'c ni rlazj Dios jiennu. ⁵Sa'csi la_l ni gubajnu lo yälhabnabieywga, lagajc rediidx nani rnii leiiga di gacdi gun bejn, lagajc recosga rlazj gun tiejxhnu, luxh si'c sozaatistu lo xnezyuj yälgujt. ⁶Naj abiri-inu lo leiiga, sa'csi agujtnu lo leiiga nani gunibee loonu galoo. ⁷Naj con xpritcoob ni yu' neñ lastoonu yu'nú lo Dios, xhet con xcärienbiejwdi ni gojpnu che nanab gusoobpacnu leii.

Redojl nani yu' tiekhä

⁷¿Xhixhni'c guiniinu naj? ¿La dojl najc leii, ä? ¡Xho gacni si'c! Palga dina niembeä xhi caj lo leiiga, dizana niacbeä cayunä dojl. Dina niacbeä cayunä dojl che rlazä xca'a xhixten ste'ca bejn palga dina niolä lo leii rediidxre: "Na'c chuguij lajzlu rexhixten bejn." ⁸Ni'cni lagajc diidx ni caj lo leiiga bejn guyuguij lazä rexhixten bejn sa'csi nancheä najcni dojl. Paru xheti leii, xhetiza dojl, agujtni. ⁹Galoo guba_nä xhet leiidi nanä, luxh che biääd diidx ni rnibee leii, gucbeä xhini'c najc dojl, dxejc banitä lo Dios, si'c ni gutä. ¹⁰Luxh baxhal Dios leiiga loonu te jiuäni, te xca'ä yälhabajn, luxh alga bazenni benä dojl, banitä nez loj Dios, gutäti dxejc. ¹¹Con leiiga, basguee dojl narä, bejnni narä si'c te bengut nez loj Dios.

¹²Ni'cni, leii najc dxan, näjza rediidx ni caj lo leiiga najc dxan; hueen najcni, didxgulii najcni. ¹³¿Dxejca'? ¿La nani najc te coshueen huinä narä lo yälgujt. Te si'c xcuent leiiga ni nasa'c, jienlojni dojl pac najc dojl sa'csi bagu'tni narä con te coshueen, te lagajc rediidx ni caj lo leiiga jienloj lacti latsiaj najc dojl.

¹⁴Sa'csi nadonnu leiiga najc xtidx Dios, luxh narä nacä te ben güedxliujre, nacä xmospac dojl. ¹⁵Sa'csi dina gacbeä xhini'c runä. Dina gunä recos nani rlazä gunä, alga cayunä latsiaj nani dipacna rlazä gunä. ¹⁶Naj palga narä runä latsiaj nani dipacna rlazä gunä, lagajcza ni'c ruluihueenca najc leii. ¹⁷Naj, diruni gac narä ni cayujn latsiaj, sa'csi yu' dojl neñ lastoä, ni'c ni cayujn

runä latsiaj. ¹⁸Sa'csi narä nanä neñ lastoä, nalajznu lo tiekhä, xhetliidi cossa'cdi yu'; sa'csi rlazä gunä cossa'c, per dina gacdpä te gunäpac recossa'cga. ¹⁹Sa'csi dina gunä redzunsa'c nani rlazä gunä, alga latsiaj nani diru rlazä gunä, ni'c runä. ²⁰Ni'cni palga runä latsiaj nani diru rlazä gunä, xhet narädi runäni, dojl ni yu' tiekhä, ni'c ni cayujn runä latsiaj.

²¹Ni'cni narä, nani rlazä gunä redzunsa'c, rdxäla leire: yu'pa dojl tiekhä. ²²Sa'csi neñ lastoä, rlazäpac gusobä diidx xten xleii Dios. ²³Luxh ruhuiä garenca leii yu' guideb lagaa tiekhä, ruchagdijlini leii ni yu' xcäriena, ruteedzani narä ladz_naa xleii dojl nani yu' guideb lagaa tiekhä.

²⁴¡Prooba narä! ¿Chuni'c guslaa tiekhä ni nungä! guet xcuent dojl? ²⁵¡Xquixtios loj Dios sa'csi Dad Jesucrist sajc guslaa nuurnu lo dojl! Ni'cni con xcäriena rusobä xtiidx Dios, yu'ä lo xleii Dios, niluxh tiekhä rlazj gusoob xtiidx dojl, chuni lo xleii dojl.

8

Yälhabajn ni najc xcuent Sprit Dxan xten Dios

¹Ni'cni naj rut rajcdi rbe'c xcälpuij renani ahuililajz xtidx Jesucrist, renani diru jiu gunreni latsiaj ni rlazj gun tiejxhreni, alga riurureni rujnreni ni rnibee Sprit Dxan xten Dios ni rbäjz neñ lastooreni. ²Sa'csi leii xten Sprit Dxan xten Dios ni rudeed yälhabajn xcuent Jesucrist, abaslaani narä lo yälribnee xten xleii dojl näjza yälgujt. ³Sa'csi nani di niajcdi niujn leibiejw, sa'csi dini niajcdi nadip lo rebenguedxliuj te gacreni bejnaya nez loj Dios, ni'c bejn Dios che baxhalni Xi'nni Jesucrist, si'c te ben güedxliujre xcuent dojl, te bejnni yälguxtis lo dojl ni rnibee tiejxh bejn. ⁴Te si'c gac xcälguxhtis xten leibiejw lo tiejxh nuurnu, renani dirunu gusoob nani rlazj gun tiejxhnu, sa'csi najrbajnu si'c ni rnibee Sprit Dxan xten Dios ni yu' neñ lastoonu.

⁵Sa'csi renani rusooibtis nani rlazj gun tiejxhreni, rujntisreni xhigab xcuent redojlga, luxh renani rusooob xtidx Sprit Dxan xten Dios rujntisreni xhigab xcuent nani rlazj Dios gunreni. ⁶Sa'csi renani yu'tis yejcreni nani rlazj gun tiejxhreni, sejtreni, sinijtreni; luxh renani yu'tis yejcreni nani

rnii Sprit Dxan Dios, reni'c sibecdxia lajzreni, sica'reni yälhabajn lo Dios par tejpas. ⁷ Te xcäriejn nani riutis ni rlajz gun tiejxh bejn rdxe'ch Dios lojni sa'csi dini gusoob xleii Dios, luxh nicla gac gunnini. ⁸ Renani nabajntis te gunreni latsiaj ni rlajz gun tiejxhreni di Dios guibalaznäjreni.

⁹ Luxh la'tu dirutu gun si'ctis ni rlajz gun tiejxhtu, ni'cni rujntu si'c ni rlajz Sprit Dxan xten Dios guntu, palga rbäjzni nen lastootu. Palga yu' chu tejtu ni di Sprit Dxan cuääz nen lastooni, di ni'c gac xpejnni. ¹⁰ Palga rbäjz Jesucrist nen lastootu, agujt tiejxhtu xcient dojl, xprittu nabajn sa'csi anajctu bennaya nez loj Dios. ¹¹ Luxh palga nen lastootu rbäjz Sprit xten nani baspansac Jesucrist loj rebengut, lagajc nani baspansac Jesucrist lo rebengut suspansac tiekhnu ni nabajn lo guedxliujre xcient Xpritni nani yu' nen lastoonu.

¹² Ni'cni rebetzä, najcnu bejn ni cuaj di'n, xhet lojdi tiekhnu te jienni si'c ni rlajz gun tiekhnu. ¹³ Sa'csi palga cayujntu si'c ni rlajztis gun tiejxhtu, sejtpactu. Palga nabajntu xcient Sprit Dxan xten Dios ni rbäjz nen lastootu, sibälaztu latsiaj ni rlajz gun tiejxhtu, sibänäjtu Dios par tejpas.

¹⁴ Sa'csi guiraa renani ruluii Sprit Dxan xten Dios guiraa reni'c najc rexi'n Dios.

¹⁵ Naj ditu nica' te sprit xten te mos te chusactu lo yälrdxejb, alga cu'a'tu sprit xten ni najc si'c te bisiäjb ni cu'a' bejn si'c xi'npacni, naj najcnu xi'nni, ni'cni sajc gäbnu lojni: "Guejblu, Xtadä." ¹⁶ Sa'csi lagajc Sprit Dxan xten Dios ruluii loj xpritnu, najcpacnu xi'n Dios. ¹⁷ Luxh palga najcnu rexi'nni, sica'zanu yälnsa'c lo Dios, tejsi yälnsa'c con Dad Jesucrist, palga guliini tednu lagajc trabajw ni gudejdni xcient xtiidxni, te tejsiza siliä'p xpala'nnu con laani.

¹⁸ Sa'csi narä runä xhigab retrabajw ni cadejhnu nen redxejre, digacdi gun tebloonuren i con yälrdimbicha' nani churu guihuiinu. ¹⁹ Sa'csi guiraa recos nani benchee Dios lo guedxliujre, cabäjzreni, yuduxhreni gaan fiireni dxej che gululoj Dios chuni'c najc rexi'nni. ²⁰ Guiraa recos ni gulecxtiey Dios lo guedxliujre, xlia'si gujcreni, xhet sa'csi si'c rlajzdi recosga, per sa'csi si'c bejn Dios, ni cabäjztis ²¹ guslaapacni guiraa recos ni

bencheeni lo guedxliujre lo xcälribee yälgujt, yälrlitloj, te dxejc sajc jiu'ni lo yälrlbedxi xten xcärldimbicha' xten rexi'n Dios. ²² Guiraa recos ni gulecxtiey Dios lo guedxliujre entis roonreni, guira dxej rdejdreni trabajw, si'c rdejd te gunaa trabajw che rajl xi'nni. ²³ Luxh xhet nani tre'tis lo guedxliujdi, näjza nuunu ni yu' Sprit Dxan xten Dios neq lastoonu, roonzanu cabääznu dxej cheni xca' Dios nuure si'c rexi'nni, cheni guscoobzani tiekhnu. ²⁴ Sa'csi xcärlililaaznu ni rbääznu, ni'c bejn gulaanu luxh yälrbäjz ni guyasi rien, di ni'c gac yälrbäjz, sa'csi jchu laa ni cuääz xcient te cos ni ala bahuiini? ²⁵ Palga cabääznu xcient te cos ni gajdnu guihuii, rbaali laaznu, rsiudzu'tznu rbäjznu guihuiinu gacni.

²⁶ Sigajcza racnäj Sprit Dxan xten Dios nuure cadro xheti yälrtijp laaznu sa'csi nicla guidonnu xho mood riäj guiniab bejn lo Dios. Luxh lagajc Sprit Dxan ni yu' lastoonu rniabni lo Dios xcient nuure con yälrlbedxneq nani nicla gajd bejn gäb con diidx xho najcni. ²⁷ Dios, nani rula'tz lastoonu, manchee xhini'c rniab Sprit Dxan xtemni xcient nuurnu, sa'csi rniabni si'cpac ni rlajz Dios guiniabnu xcient rexpejnpac Dios.

Siennu gaanpac loj guira'ti

²⁸ Nadoncheenu guira'ti ni rsiajc rebejn ni sanälajz Dios, reni agule Dios te gunreni xtuunni rsiajcreni te gun Dios gac recosga par xcälnasa'creni. ²⁹ Sa'csi renani biembee Dios galooli, reni'c gule Dios cheni gajdli guirixtiey guedxliujre, te gacreni si'c ni najc Xi'nni; te gacza Xi'nni ganid loj guiraa ni najc famil xten Dios. ³⁰ Renani gulenli galooli, reni'c gurejdxni; renani gurejdxni, bejnzani najcreni bennaya nez loj Dios; renani bejnni najcreni bennaya nez loj Dios, gulä'pzani xpala'nreni.

³¹ ¿Xhixhni'c guiniinu xcient dee? Palga yu' Dios xlaadnu, ¿chuxh ni'c najc ni gun gaan loonu? ³² Dios nani di nudxoyn Xi'nni, nani cuäjb cuaj Xi'nni lo crujz te gujtni, te gudijxni xcient xtojlnu, ¿xho dini guniidx loonu xcient Xi'nni guira'ti nani rquiinnu, ä? ³³ ¿Chuni'c sajc cue'c xhi xcälpuij reni agule Dios nez lo Dios, ä? Ni lagajc Dios najc nani rnii najcnu bennaya nez lojni. ³⁴ ¿Chuni'c najc nani cue'c xhi xcälpuijnu

nez lo Dios? Jesucrist najc nani gujt por nure, luxh et ni'ctis. Laani gubanjsaczani loj rebengujt, luxh naj sobga'ni xladbee Dios cadro rnibeeni; laazani cabejdx canabni lo Dios xcientnu. ³⁵ ¿Chuni'c sajc gudzucaj nuurnu lo yälsänälajz xten Jesucrist: trabajw, o yälxliajs, o yälrusacsí, o yärlriaan, o yälxhabää'l, o yäldrxejb, o te spaad, ä? Nicla tejni. ³⁶ Si'c ni caj lo guijtz ni caj xtidx Dios: Xcientlu, sa'csi najcnu xpejñlu caye'tnu guixe-guixee.

Ruchaagreni cument najcnu si'c xiiil ni aguro' te ju't bejnñni.

³⁷ Luxh loj guiraa recosre, sujnpacnu gaan xcient nani sanälajz nuure, sa'csi sacnäjpacni nuure. ³⁸ Sa'csi anancheä nicla yälgujt, nicla yälnabajn, nicla rexangl Dios, nicla renani rnibee, nicla recos ni yu' naj, nicla recos nani churu gac, nicla yälmilaagwr, ³⁹ nicla jiaroduxh, nicla jäätpac, nicla xhitis cos ni guchhee, nicla tej redee di gacdi gudzucaj nuurnu lo xcälsänälajz Dios, yälsänälajz ni rajpza Dad, Jesucrist.

9

Dios agule rebeñ Israel

¹ Caniä didxguliipac lojtu sa'csi rililazä xtidx Jesucrist. Dina guiniä didx-xhii. Sprit Dxan xten Dios caguluii xcäriena laaca rniä; ² cayac-huinduxh lastoä, sanuutis yälxliajsga. ³ Sa'csi narä rlazä malaii sajc lagajc narä nitloä lo Dios te sajc gacnää resa'ä lo quedxliuijre, rexpejn Israel. ⁴ Sa'csi laareni najc xagdoo tolsrael, luxh laareni nungäjl gacreni si'c xi'npac Dios. Gubanñäj Diosreni. Bia'n Dios didx con laareni. Basa'n Dios xleii Moisés lojreni. Bazuxhi-jbreni nez lo Dios neñ guidoo. Sica'reni reyälnasa'c xten Dios palga jiuren xti-idxi. ⁵ Laareni najc rexagdoo xten toxtad-goldooni nu gubajn agujc xhero. Jesucrist gujcz xagdoo xten tolsrael che gojlini si'c te beñ quedxliui. Laani najczani Dios loj guiraanu. Suchä'p xpala'nni par tejpas. Sugacni si'c.

⁶ Luxh dini gac si'cni abanijt xtidx Dios nani bia'nni loj tolsrael. Sa'csi xhet guiraadi rebeñni ni najc xagdoo tolsrael najc xpejñpac Israel. ⁷ Diza guiraa remi najc rexagdoo toAbram gac xi'nguliipacni sa'csi räjp Dios lo toAbram: "Rexagdodoolu

nani guigab najc reni gac xagdoo Isaac." ⁸ Ni'cni xhet guiraadi rexagdoo toAbram najc rex'i'n Dios, xtebtis renani chalilajz xtidxni, reni'c najc xi'nni. ⁹ Sa'csi bia'n Dios diidx loj toAbram: "Stebijz, lagajc bääire guibisacä, te dxejc chu te xi'n Sara."

¹⁰ Xhet diidxtisga gunii Dios. Gunii zani lo toRebeca, che nuxi'nni cua'ch, xi'n chäälni, toxtadgoolnu Isaac. ¹¹ Ni'cni ansde gaal rex'i'nni, ansde niujnreni te dzunsa'c o te dzunguijdx, te soobpac xtidx Dios xcient chuni'c cueni lo guiro'p rebázre, xhet sa'csi bejndireni dzunsa'c, per sa'csi agule Diosni, ¹² ni'c räjp Dios lo toRebeca: "Xingangaloolu gac xmos xinhuinlu." ¹³ Si'cza caj lo guijtz rediidxre: "Sanälazä Jacoob, niluxh bidx-echnaä Esaú."

¹⁴ ¿Xhini'c guiniinu naj? ¿Xhet laadi rujn Dios, ä? ¹⁵ Xho gacni si'c! ¹⁶ Sa'csi räjp Dios loj toMoisés: "Sulaslazä chutis bejn nani rlazä gulaslazä, sacnää chutis bejn nani rlazä gacnää." ¹⁷ Ni'cni dini gac xcient ni rlazj rebeñ gac, dizani gac xcient nani rujn rebeñ. Rajctisni si'c rlazj Dios nani rulaslazj bejn. ¹⁸ Ni'cni caj lo guijtz xten Dios che gunii Dios xcient Faraón: "Narä benä gujclu reii xten Egipto te gululiloj xcälrnibeä, te guiliä'p bejn xpala'nä guideb quedxluijre." ¹⁹ Rulaslazni rebeñ nani rlajtisni, runnadipzani lastoo bejn nani rlajtisni.

²⁰ Naj la'tu siniitu loä: "¿Xhicuent ruquaqujní bejn? ¿Chuni'c sajc sudzu'tz nez loj nani rlajzni gac, ä?" ²¹ ¿Chuxh luj, ben quedxliui, te jieinäjlu Dios? Xhixh säjb te gues loj nani bencheeni: "¿Xhicuent bejnlu narä scree?" ²² Gurniäloju. Bejn nani runchee guejs, ²³ la di gacdi gunni si'ctisni rlajzni con bajnga, ä? ²⁴ La di gacdi guncheeni te guesa'c nägajcza te guesyuj ni xhet sirbdi con lagajc bajnga?

²⁵ ¿Xhiru najc, palga Dios rlajzni gululilojni xho rujnni yälguxhtis, näjza rlajzni gululilojni xcälrnibeeni, gopnäjni pasens renani nungäjl gac yälguxhtis, te nitlojzareni, ä? ²⁶ Bejnñni si'c te gululilojni lacti sajc xcälrdimbicha'ni loj renani galooli guleni chû lojni lo xcälrdimbicha'ni. ²⁷ Lagajc nuurnu najcnu reni agulen; xhet xtebtis loj rexpen Israel guleni nuurnu, näjza loj rebeñ ni di gac rexpen Israel guleni nuurnu. ²⁸ Cajza lo guijtz ni bacuua Oseas:

Renani di gac xpenä, reni'c cuälää "xpenä". Luxh nani dina ninälazä, sinälazäni.
²⁶Dxejcti lagajc cadro räjpreni lojreni:
 "Ditu gac rexpenä",
 lagajc ro'c säjpreni lojreni:
 "La'tu najctu xi'n Dios ni nabajn par tej-pas."
²⁷Cajza lo guijtz ni bacuaan Isaías: "Mase najc xhidajl rexpen Israel si'c najc yujxh ni tre' ro' nisdoo, guxii gac reni laa lo dojl.
²⁸Sa'csi susoobpac Dad, Dios xtiidxni xcuent xcälguxhitis reben guedxliuj, luxh siojbza gunnini." ²⁹Guniiza Isaías, xcuent nani churu gac, bacuaani:
 Palga di Dios ni yu' xhaguibaa nusa'n gaii xagdoo reben tiemp,
 niajcnu si'c gujc Sodoma näjza Gomorra, reguejdx ni gunitloj.

Xtidx Dios näj rexpen Israel

³⁰ ¿Xhini'c sajc guiniinu naj? Rebejn nani di gac xpen Israel, direni niguil xho gacreni bennaya nez loj Dios, niluxh agujcreni bennaya nez loj Dios sa'csi huililajzreni xtidx Jesucrist. ³¹Luxh rexpen Israel, mase sanuutisreni lo xleii Moisés ni ruluii xho gac bejn bennaya nez loj Dios, banijtreni, direni niujn gaan nusoobreni guideb leiiga. ³²¿Xhicunt gujcní si'c? Sa'csi direni nililajz xtidx Dios, alga rlajzreni guntisreni dzuun xten leii, naareni si'c gacreni bennaya nez lo Dios. Ni'cni gulaj ni'reni lo guij ni rutienta' bejn, nalajznu direni nililajz xtidx Dios xcuent Jesucrist. ³³Si'cza bacuaan Isaías, räjpní:

Aguleä te bejn lo guedx Sión ni gac si'c te guij cadro rtiäjl ni' bejn, te guij ni rusälta' bejn.
 Chutis tej nani chalilajz xtiidxni, dini jianxtuji.

10

¹Rebetzä, rlazduxhä chalilajz rexpenä xtidx Dios. Rniabduxhä lo Dios te guslaanireni lo xtojreni. ²Narä rniäpac nancheä ruzuxhijb rexpen Israel lo Dios, niluxh direni gumbesa'c xhini'c rlajz Dios gunreni. ³Sa'csi direni niabee xcuent xho rajc te bejn te bennaya nez loj Dios, ni'c rlajzreni gunreni dzuun si'c ni caj lo leii te gacreni bennaya nez loj Dios, ni'cza direni nusoob xtidx Dios te gacreni bennaya nez lojni. ⁴Abasoob Jesucrist xtidx Leii, ni'cni

che chalilajz bejn xtidx Jesucrist, anajcreni bennaya nez loj Dios.

⁵ToMoisés bacuaa rediidxre: "Chutis ni rlajz gac bennaya nez loj Dios sa'csi ru-soobni xtidx leii, nanab gusobsa'cpacni diidxga guideb nabajnni lo guedxliujre."

⁶Xcälnayareni nez loj Dios sa'csi rililajzreni xtidx Jesucrist, rnii scree: "Na'c guiniitu neñ lastootu, ¿chuni'c chä'p xhaguibaa?" nalajznu, te jiädnäsaci Jesucrist loj guedxliuj. ⁷Na'cza gäbni: "¿Chuni'c jiäjt gabijl?" (nalajznu te chaxiini Jesucrist loj rebengut). ⁸¿Xhini'c rnini naj? Rniini: "Diiidxga suga' gajxh ro'tu, neñ lastootu." Nalajznu, diidx xcuent yärlilaaz nani cagusule'nu lojtu. ⁹Rniinu lojtu, palga guiniitu con ro'tu, Jesucrist najc Dad loonu, palga chalilajztu baspanzac Dios Jesucrist loj rebengut, suslaani la'tu lo dojl. ¹⁰Sa'csi con lastooni rililajz biniet xtiidxni, ni'c rajcni bennaya nez loj Dios; luxh che rcäjpza biniet con ro'ni, Jesucrist rnibee loonu, rusläa Diosni lo dojl.

¹¹Sa'csi rnii xtidx Dios scree: "Chutis ni rililajz xtidx Dad Jesucrist, dini jianxtuji." ¹²Sa'csi guiraa rebejn najc tebloj nez lojni, rexpejn Israel sigajc rebenzijt, sa'csi lagajc laani najcni Dad lo guiraareni, rulaslazduxhni guiraa renani rbedx-rniab lojni. ¹³Lo xtidx Dios caj rediidxre: "Chutis ni rbedx-rniab lo Dad, siliaani lo xtojlni palga rililajzni xtidx Dios." ¹⁴¿Xho gac guiniabreni lo Dad, palga direni chalilajz xtiidxni? ¿Xho gacza chalilajzreni xtiidxni, palga gajd diajgreni jiejn xtiidxni? ¿Luxh xho jiejn diajgreni xtiidxni palga rut rusule'di diidxga lojreni, ä? ¹⁵Luxh ¿xhoza gusule'reni diidxga palga rut guxhaldireni? Si'cni caj lo guijtz: "Chipza saru najc ni' renani riädnä diidx xcuent cossa'c, yärlbecdzi lajz rebejn."

¹⁶Xhet guiraadireni rusooob xtiidxni, sa'csi guniiza toIsaías: "Dad, ¿chuni'c chalilajz xtiidxni?" ¹⁷Rililajz bejn xtidx Dios che rucuadijgreni diidxga; rucuadijgreni che yu' chu rusule' xtidx Jesucrist.

¹⁸Naj arniä: Gajdpac diajgreni jiejn xtiidxni, o ¿la babiejn diajgreni, ä? Pues abiejin diajgreni, sa'csi lo xtidx Dios caj scree: Abire'ch xse'reni guideb guedxliuj,

abidzujnza rextiidxreni lo guiraa reguejdx
ni tre' lo guedxliuje.

¹⁹ Rniäza: Dipac rexpen Israel niacbee, o
żla guceereni, ä? Galooli gunii toMoisés
rediidxre:

Sunä gudxojntu xcuent rebejn ni di gac te
guejdx,
con te guejdx nani di gacbee suche'chä
la'tu.

²⁰ Diza tolsaás nidxejb guniini rediidxre:
Renani di niguil narä, bidxäjl narä,
baluiloäza loj renani di niniabdiidx narä.

²¹ Guniiza tolsaás xcuent rexpen Israel:
Desde galooli, dxej-yääl basgaä nää lo rebe
jnga te niureni xtidxä,
luxh najcreni bejn ni di gusoob diidx,
rutzu'reni didxnaj.

11

Rexpen Israel nani gułaa lo dojl

¹ Arniä: *¿La agulälaz Dios rexpen Is-
rael, ä? ¡Xho gacni si'c! Ni lagajc narä
nacä te xpen Israel, te xagdoo toAbram,
nadxağä lo resa' toBenjamín.* ² Di Dios
nibälaz rexpejnni, xpen Israel nani guleni
galooli che gajdli guirixtiej guedxliuj. O
żla dilu gacbee xhi caj lo xtidx Dios cadro
rnii xcuent Elías, xho gunabduxh Elías
didxnaj lo Dios xcuent rexpen Israel, ä?
Räjpni scree: ³ “Dad, abagu'treni guiraa
reniguii nani gunii xtiidxlu, abatzujlreni
rexquidoolu, xtebtis narä bia'nä, luxh naj
rlajzreni ju'treni narä.” ⁴ Luxh, *¿xhini'c
räjp Dios lojni?* Räjpni: *“Abalucheä gajdz
mil bejn nani gajd guzuxhjb nez loj Baal.”*

⁵ Si'cza naj, abia'n te chinae' rexpen Is-
rael nani agule Dios xcuent xcälrulasla-
jzni. ⁶ Dxejc palga ruslaani nuure lo dojl
xcuent xcälrulaslajzni diruni gac sa'csi yu'
xhi dzuun biennu te nuslaani nuure lo dojl.
Paru si'c najcni diru xcälrulaslajz Dios gac
yälrulaslajz.

⁷ *¿Dxejc'?* Di rexpen Israel nidxäl nani
caguilreni, luxh rebejn nani agule Dios,
ni'c bidxälni, luxh ste cuaareni, aguyala-
jzreni. ⁸ Gujcni si'c caj lo xtidx Dios:

Bascäjy Dios xcäriejjreni, näjza balojni di
jieñ,

lo dxe najli di diajgreni jieñ.

⁹ Guniiza toDavid, scree caj lo xtidx Dios:
Sugun xmex lanijreni jiajbreni,
te gac guiga'reni,

sugacni si'c guij ni rulani' bejn, te gacreni
yälguxhtis.

¹⁰ Suguscäjy Dios balojreni te na'c fisa'creni,
sujie't dejtzreni, sutedreni trabajwdxh
par tejpas.

*Yälruslaa lo dojl xten bejn ni di gac
xpen Israel*

¹¹ *Naj rniabdidxä: ¿La biajb rexpen Israel
te gunijtreni par tejpas, ä? ¡Xho gacni
si'c! Sa'csi biajb rexpejn Israel, ni'cni gojł
biääd yälruslaa lo dojl lo bejn ni di gac xpen
Israel, te si'c guisiäblajz lajz rexpen Israel
laareni lo dojl.* ¹² Palga xcuent dojl ni bejn
xpen Israel gojp reben guedxliuj xcälnasa'c
Dios, palga xcuent yälruntijt xten rexpen
Israel guyu' xcälnasa'c Dios par rebejn ni di
gac xpen Israel, aticaxh chu xcälnasa'creni
che gusoob xpen Israel xtidx Dios.

¹³ *Naj caniä lojtu ni najc bejn ni di gac
xpejn Israel.* Gule Dios narä te gusule'ä
xtiidxni lojtu, ni'cni caläpä xpala'n xtzunä,
¹⁴ te don xho gunä te guisiäblajz reben ladxä
ni najc xpen Israel, te si'c chalilajzreni xtidx
Jesucrist. ¹⁵ Palga gulecdxirení lajz reben
guedxliuj con Dios sa'csi gulälaz rexpen
Israel xtidx Jesucrist, aticaxh che chalilajz
rexpen Israel rextidx Jesucrist, sibansac re-
nani najc si'c bengut. ¹⁶ Palga tla' cojb najc
hueen, guideb cojbga najc hueen. Sigajcza
najc te yajg; palga xlobaaní najc hueen,
guidebni najc hueen.

¹⁷ *Rexpen Israel najcreni si'c te yajg oliib;*
palga gutiuugreni te naa yajgga, dxejc ro'c
guquidreni naa ste'ca yajg te guibajnni con
xtieñ yajg oliibga. ¹⁸ Ni'cni, na'c gactu
guyalajz lo renaapac yajgga. Colgusnaj
lajztu, xhet la'ditu ni rudeed yälnabajn lo
xlobaa yajgga, lobaaga ni runiidx yälnabajn
lojtu.

¹⁹ *Dxejc colguinii:* “Batiugreni naa-
pac yajgre, te gujc biguidä cuä' yajgga.”
²⁰ Guliipacni, biru' naapac yajgga sa'csi di-
reni nililajz xtidx Dios luxh la'tu biguidtu
cuä' yajgga sa'csi huililajztu xtidxní. Na'c
gactu guyalajz, colguidxejb, ²¹ sa'csi palga di
Dios nutedbia renaa yajgga, diza Dios gut-
edbia la'tu. ²² Bahuij jlacti hueen najc Dios!
Luxh lacti niälajzzani; con renani ban-
ijt najcni niälajz, luxh lacti rulaslajz Dios
la'tu palga chanuu jiutu xtiidxni. Palga
ditu jiu xtiidxni, näjza la'tu sudzucaj Dios.
²³ Luxh sigajcza reni bidin, palga di chanuu

cuälazreni xtiidxni sajc suquidsac Diosreni lo yajgga. ²⁴Luxh la'tu najctu benzijt, najctu si'c naa te yagoliib ni xtebca gulejn nen dajn. Luxh batiuugni la'tu te baquidni la'tu lo te yagoliib ni najc yagsa'c ni rcaduxh oliib lojni, mase xhet si'cti najc olibguijx-hga, jaticaxh rexpen Israel ni banijt najc si'c naapac xten yagolibsa'cga ni bidin, palga chalilajzpacreni xtidx Dios, suquidsac Diosreni loj yajg ni najc xtenpacreni!

Che laapac rexpen Israel lo dojl

²⁵Rebetzä, rlazä gacbeetu xcuent te diidx nagajn, te di naatu nanduxhtu. Dee najc didx nagajnga: *yu' rexpejn Israel ni guc najd lastooren te direni nililajz xtidx Dios, hasta guisa' redxej ni chalilajz rebenzijt xtidx Dios.* ²⁶Dxejcti siliaapac guiraa rexpen Israel lo dojl che chalilajzreni xtidx Dios, sa'csi si'c caj lo xtidx Dios, cadre caj redidxre:

Nani rusläa sajc ben guedx Sión, luxh sudzucajni xtojl renani najc xagdoo tojacoob.

²⁷Dee najc diidx ni bia'nä con laareni, che gudzucaa xtojlreni.

²⁸Naj, najcreni xcontraar Dios sa'csi rdxe'chreni xcuent xtidx Jesucrist, te chalilajztu; niluxh Dios sanälajzreni sa'csi si'c abia'nni diidx con retoxtadgoldoreni.

²⁹Sa'csi rut rajcdi rudzucaj nicla yälñasa'c ni rudeed Dios, niclaza yälrbejdx xten Dios.

³⁰La'tu galoo ditu nusoob xtidx Dios. Naj rulaslajz Dios la'tu sa'csi gulälaz rexpen Israel xtiidxni. ³¹Sigajcza naj direni gusoob xtidx Dios, niluxh si'c najcni te gulaslajz Diosreni sa'csi balaslaizzani la'tu. ³²Dios basaan biajb guiraanu lo dojl, te si'c sajc gulaslajz Dios guiraanu.

³³„Lacti guroob najc yälñasa'c xten xcälnajn, xcälracbee xten Dios! Nicla tej bejn guedxliuj di gacbee guiraa rexçälguxhtisni, rudiilidiza najn rexnezyujni. ³⁴Si'c caj lo guijtz: „*¿Chuni'c gubee xäriejn Dios? ¿Chuni'cza abaluiini?* Rutliidi. ³⁵O *¿chuni'c badedxgaa te xhi cos lojni, te quixsacnini lojni, ä?* Rutliidi.” ³⁶Sa'csi loj Dios siäääd guira'ti, luxh laani bencheeni guira'ti par lagajcza laani. Suguliä'pnu xpala'nni par tejpas. Sugaci si'c.

¹Ni'cni rulidxä la'tu rebetzä, sa'csi rulaslajz Dios nuure, colgudeed xcälnabajntu lo Dios te gac guibaŋsa'ctu si'cni rlajz Dios. Dee najc yälrajnpac Dios si'c ni nungäjä! gantu Dios. ²Na'c rujuntu lagajc xhigab ni rujn reben guedxliuj, colguscoob rexhigabtu te guidxaapac xmoodtu te si'c gullui Dios xhini'c rlajzni guntu, nalajznu xhini'c najc hueen, xhini'c rdxaglajz Dios, xhini'cza najc laapac.

³Sa'csi balaslajz Dios narä, ni'c rusuleä xtiidxni loj tejgatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Colyejn xhigabsa'c, te laaca gac xhigabtu, si'cni baniidx Dios lo tejgatu xho chalilajztu xtiidxni. ⁴Sa'csi sigajc najc tiejxhnu, *yu' xhidal la'ni, luxh tejgareni rujn xtzun-xtzuunreni,* ⁵sigajcza nuure nani rililajz xtidx Jesucrist, najcnu xhidajl, najcnu si'c tejsi tiejxh lo Jesucrist, mase tejganu rujn xtzun-xtzuunnu, tejsi najcnu.

⁶Luxh sa'csi tejganu rajpnu garen-garen dzuun xcuent yälrlaslaajz ni baniidx Dios loonu, sujiennu rextzuunnu screeza: nani rajc rnii xtidx Jesucrist, suguiniinini, si'c ni najc xcärlilajzni; ⁷nani rajc racnäj sa'ni, sugacnäjni; nani rajc ruluii xtidx Dios, suguluuni; ⁸nani rajc gulijdx resa'ni, sugulijdxnireni, nani rajc rudedxlia' xhixtenni lo sa'ni, saru sugudeedni xhixtenni; nani rajc rnibee lo sa'ni, suguinibeeri con yäl-nadolajz; nani rajc rulaslajz resa'ni, sugulaslajzni con yälrbalajz.

Xho nanab guibaŋnu lo xnezyuj Dios

⁹Colchanälajzpac resa'tu, na'c gunsitu si'cni rinälajztureni. Colcuälaz redzunguijdx, colyejntis redzunsa'c. ¹⁰Colchanälajz resa'tu si'c rinälajz bejn rebejtni. Colguiliä'p xpala'nremi.

¹¹Colyejn dzunsa'c, na'c cuedxitu. Colyejn xtzun Jesucrist con guideb xtijptu, guideb xcäriejntu.

¹²Colguibalajz sa'csi ahuililajztu xtiidxni. Colcuedxi lajztu che tedtu trabajw. Colcuedx-colnabtis lo Dios guideb naba-jyntu.

¹³Colgacnäj rebejn nani rililajz xtidx Dios; sacru colnii loj ni riädhuiitu.

¹⁴Colguinii didksa'c xcuent renani rusacsí la'tu, na'c gudzubdetureni.

¹⁵Colguibalaznäj renani rbalajz, colyon-näj renani roon.

¹⁶ Colyejn tejtis xhigab con resa'tu, na'c gactu guyalajz, colguchaag loj reben nadolajz. Na'c guchalotu najctu bennanduxh.

¹⁷ Na'c gudzu'tu dzunguijdx loj renani rujn dzunguijdx lojtu. Colyejin recossa'c nez loj guirasi bejn. ¹⁸ Cadrotis sajcni, dxitis colguibannäj guiraa rebejn. ¹⁹ Rebetzä, na'c guntu xhigab lagajc la'tu gudeedtu xten renani rujn dojl lojtu, sa'csi lagajc Dios gun yälguxhtis lojreni, ni'cni caj lo xquijtzni scree: "Narä gunä yälguxhtis, narä quixä lojreni si'c naj Dad, Dios." ²⁰ Näjza: "Palga calaan nani rdxe'ch lojtu, colgudeed xhi gauni, palga cayojni, colgudeedza xhi yäni, te si'c jianxtiujni." ²¹ Na'c gusaantu gun redzunguijdx gaan lojtu, colyejn gaan lo dzunguijdx con recossa'c ni rujntu.

13

¹ Guiraatu nanab jiutu xtidx renani rnibee lojtu. Sa'csi xheti te yälrnibee nani di Dios nudeed, luxh guiraa reyälrnibee ni yu' lo guedxiujre, lagajc Dios gule'creni.

² Ni'cni renani di gusoob xtidx renani rnibee, xtidx Dios cabälazni. Luxh renani rujn si', lagajc laareni xcaquijreni dojl, sujn Dios yälguxhtis lojreni. ³ Renani rnibee di guchejb renani riu xtiidxreni, ruchejbreni renani najc ben guijdx ni di jiu xtiidxreni. Palga di rlajztu guidxejb tu reguxhtis, bejntis dzunsa'c, dxejcti guiliä'preni xpala'ntu sa'csi rujntu dzunsa'c. ⁴ Reguxhtis rujnreni lojtu xtuun Dios te guibansa'ctu. Palga guntu dzunguijdx, colguidxejb, xhet xlia'di ca'ni spaad, sa'csi najcreni nani rujn xtuun Dios te gunreni yälguxhtis, te quixpac renani rujn dojl. ⁵ Ni'cni nanab jiutu rextiidxreni, xhet ganaxtis sa'csi rujnreni yälguxhtis lojtu, näjza te ga'ptu te xcärijejnsa'c, te xcäriennaya. ⁶ Ni'cni colquijx lojreni nani riäj xca'reni sa'csi renani rnibee najc xmos Dios, luxh ni'cpac najc xtuunreni.

⁷ Colgudeed lo guiraa bejn nani riäj xca'reni. Colquiix loj renani nazääbtu; colquiix impuest loj ni riäj xca'ni; colchanälajz renani riäj chanälajztu; colguiliä'p xpala'n renani riäj chä'p xpala'reni. ⁸ Na'c xcajlu di'n loj nicla tej bejn, di'ntis xten yälrinälajz sa'ni, sa'csi nani rinälajz xpisinni, bejngab abasoob xleii Dios. ⁹ Sa'csi lo xleii Dios caj scree: "Na'c

guesnäjlu bejn ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhixten resa'lu." Luxh palga yu' xhi stee leii rsa'ni con leii ni rnii: "Chanälajzlu resa'lu si'c sanälajzlu lagajc luj." ¹⁰ Nani rajp yälsänälajz, dini gun latsiaj lo resa'ni. Ni'cni yälsänälajz rusooab releii ni caj lo xtidx Dios.

¹¹ Colyejn guiraa redee, sa'csi anajntu xho najc redxej ni nabajnnu naj, anajntu alagojl or guibajnnu lo bacal sa'csi abidzungajxhru dxej che laanu neñ dojl lo dxej che huililajznu. ¹² Aguxhinduxh, asiädgajxh bianij. Ni'cni cuäáz jiennu redzun redzun gun guijdx ni rajc lo xcäjy, te jientisnu redzunsa'c ni rajc rdxeet, lo bianij. ¹³ Guibansa'cnu si'c riäj guibajn rebejn rdxee, na'c guibaqnu lo yälrä', nicla lo yälbieej, na'c guidiesnäjnu bejn ni di gac chäälnu, na'c ga'pnu rebis, na'c guidxagdilnu resa'nu, na'c chuguij lajznu xhixten resa'nu. ¹⁴ Ni'cni colca' xcärlnibee Jesucrist te na'c guntu redojl ni rlajz gun tiejxhtu.

14

Na'c guiniyajtu rebejztu

¹ Colnii didxdo lo rebejn nani di gumbesa'c xtidx Dios, na'c tilnäjtureni. ² Sa'csi yu' reni rililajz nani sajc gaurenii guira'ti xhi cos, niluxh nani gjad sutijp lo yälrililajz, ganaxtis berduur rajwni. ³ Nani rajw guira'ti, na'c guidxechnäjni nani di gau guira'ti; luxh nani di gau guira'ti, na'cza guiniyajni nani rajw sa'csi Dios aguleza bejnga. ⁴ Chuxh luj te guiniyajlu lo xmos te bejn, ä? Sugäb lagajc xlamni lojni la laaca rujnni o la xhet laadi rujnni. Luxh sujnni laaca sa'csi Dad Jesucrist sujn sutip lastooni.

⁵ Tej bejn naa sajcru tej dxej lo stee dxej, dxejc ste'ca bejn rchalo guiraa redxej najc tebloj. Xhet najcdi, tejga bejn suggumpac lagajc xhigabni. ⁶ Nani rapda te dxej, rujnnini te guiliä'pni xpala'n Dios, luxh nani di gunni, rliä'pzani xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rudeedzani xquixtios lo Dios; nani di gau guira'ti, nez lo Dios dini gau, rliä'pzani xpala'n Dios, rudeedzani xquixtios lo Dios.

⁷ Sa'csi nicla tejnu dinu guibajn xcentcanu, nicla tejzanu dinu guet xcentcanu.

⁸Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, lałtis najcnu rexpen̄ Dad, Jesucrist. ⁹Ni'cni gujt Jesucrist, ni'cni gubansaczani, te sajc gacni Dad xten rebengut, näjza Dad xten rebejñ nani nabajñ.

¹⁰Dxejc luj, ḫxhicut cubeelu bejtzlu, ä? O ḫxhicut rdxe'chlū rhuiili lojni, ä? Ni guiragajcnu tednu nez loj Jesucrist cadro cueni te gunni yälguxhtis loonu. ¹¹Sa'csi scree caj lo xtidx Dios:

Si'ctis ni nabanä, rmiliápac lojtu, räjp Dad Dios,
guiraa reben guedxliuj suzuhijbreni loä,
luxh guiragajc ro'reni sicäjp narä nacä Dad
Dios.

¹²Ni'cni guiraanu, tejganu sudeednu cuent loj Dios xcuent nani biennu.

Na'c guzällu bejtzlu

¹³Ni'cni na'cru cubeenu sa'nū. Maazru hueen jienmu xhigab nej lastoonu xhetliidi jienmu ni gun jiajb resa'nu lo doj. ¹⁴Narä nanä, racbeápac guira'ti nacj hueen. Jesucrist Xtdadnu baluui narä si'c. Luxh palga yu' chu tej ni rchalo dini gac hueen, par laatisni dini gac hueen. ¹⁵Palga la'tu guntu gac-huin lajz te sa'tu sa'csi yu' xhi rajwtu, dirutu chasanäj xnezyuj yälsanälajz. Na'c gunlu gunijt te sa'lū xcuent nani rajwlu, sa'csi agujt Jesucrist xcuentni. ¹⁶Ni'cni na'c gusaanlu guiniyajreni nani nacj te cos hueen par luj. ¹⁷Sa'csi xcälrnibee Dios dini gac xcuent yälrjaw, niclaza xcuent yälrä'; xcälrnibee Dios nacj xcuent te yälnabannya nez loj Dios, näjza yälrbedxilajz con yälbalajz xcuent Sprit Dyan xten Dios. ¹⁸Sa'csi nani rujn si'c lo xtzun Jesucrist, bejngä rchaglajz Dios, luxh reben guedxliuj rniiza didksa'c xcuent sa'bejngä.

¹⁹Ni'cni chanuutis guidilnu recos nani rujn chu yälrbedxilajz, näjza nani rujn rac-najnu resa'nu te tiooburenii loj xnezyuj Dios. ²⁰Na'c guntu nit xtzun Dios xcuent ni rajwtu. Guliicanu guira'ti ni rajw bejñ nacj naya, niluxh palga gautu te cos nani gun jiajb bejtzlu nej doj, ni'c nacj xhetlaadi. ²¹Hueen nacj na'c gautu bääl, na'cza yätu bin, na'cza guntu jiajb sa'lū nej doj. ²²Nani rililajztu, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni.

²³Luxh palga guntio'p lajz te bejñ xcuent nani rajwni, sigubeeni lagajc laani, sa'csi dini gau xcuent yälrililajz, sa'csi xhitis ni di gac xcuent yälrililajz, lagajc ni'c najc doj.

15

Huinälajz sa'lū

¹Nuurnu ni agusutijpnu lo yälrililajz nanab gacnajnu resa'nu nani gajd chalilazsa'c. Di gacdi guibañtisnu xcuentcanu. ²Tejganu nanab chonälaznu resa'nu lo xcälnabansa'cni te gacnajnu chalilajztureni. ³Sa'csi nicla Jesucrist dini nibajñ xcuentcani, luxh si'cni caj loj xtidx Dios: "Redidxyaj ni guniyajreni lojlu biajreni yecä." ⁴Guiraa rediidix ni cuaj lo guijtz galooli, cuajreni te guluiirenii nuurnute ga'pnu yälsutipj näjza yälrustioblajz te gacza guibääznu lo xtidx Dios. ⁵Dios rusutipj lajznu, Dios rutioob lastoonu. Rniabä loj Diosga gacnajni guntu tejtis xhigab xten Jesucrist con resa'tu. ⁶Te dxejcti tejtis gac xse'tu guiliä'ptu xpala'n Dios, Xtdad Jesucrist.

Gusule' xtidx Dios loj rebenzijt

⁷Ni'cni colça' resa'tu, renani ahuililajz xtidx Dios sigajc cua' Jesucrist nuure te guiliä'pnu xpala'n Dios. ⁸Sa'csi narä rniä lojtu, biääd Jesucrist te gujcnii si'c te mos loj rexpen̄ Israel te baluiini xcuent didxgulii xten Dios te gusojb rediidix nani bia'n Dios loj retoxtadgoloonu, ⁹näjza par rebenzijt, te guliä'preni xpala'n Dios sa'csi baluilojni xcälrulaslajz Dios lojreni, si'c ni caj lo xtidx Dios:

Ni'cni siliä'pä xpala'nlu nez loj rebenzijt, soläza dij lojlu.

¹⁰Dxejcti stee lajt rniini:
La'tu benzijt, colgubalaznäj rexpen̄ä rex-pejn Israel.

¹¹Stee lajt cajza:
Guiraatu, rebenzijt, colgubalaznäj rexpen̄ä rex-pejn Israel.
¹²Stee huält guniiza Isaías scree:
Siricaj te xagdoo tolsai,
näjza te ni chäs te guinibeeni loj rebenzijt,
laani cabätz rebenzijt.

¹³Naj rniabä lo Dios ni rudeey yälräbzajz, te laani gacnaj guibalajztu, cuecdxilajztu, sa'csi salilajztu, te tioobru yälräbzajz ni rajptu sa'csi Sprit Dyan xten Dios yu' nen lastootu, luxh laani rajpni yälrnibee.

¹⁴ Luxh xcient la'tu rebetzä, anancheä nabansa'ctu nasinduxtu, arajcza rulijdx tu sa'tu, ¹⁵ luxh loj guijtzre bacuaä gaii didxnaj xcient tiop-chon cos, te gusnaä lajztu. Runä si'c xcient yälrlulaslajz ni baniidx Dios loä ¹⁶ te gacä xpen Jesucrist ni rusule' diidx loj rebenzijt. Ni'cni cagusulesa'cä xtidx Dios lojreni, te xca' Dios rebenzijt si'c te gojn ni rudedä, sa'csi agujcreni benñaya sa'csi rbäjz Sprit Dyan nen lastoereni.

¹⁷ Ni'cni xcient Jesucrist abidxälä xhicient guiniduxhä didxro xcient recos ni najc xten Dios. ¹⁸ Sa'csi dina guiniä diidx xcient xhi stee cos, ganaxtis xcient xho gucnäj Jesucrist narä, luxh xcient ni'c basoob rebenzijt diidx, huililazreni xtiidxni sa'csi beijn diajgreni xtiidxni, bahuiizareni rextzuunni, ¹⁹ con yälmlaagwr xten redzunro, resenro, ni gujc con xcälrnibee Sprit Dyan xten Dios. Ni'cni lo guedx Jerusalénli, näjza guideb gabi ro'c, lo guedx Ilírico, guiraa nejzga abasule'ä xtidx Jesucrist. ²⁰ Si'cza guyu'ä ganduxh gusule'ä xtidx Dios xhet cadro ahuisile'direni xtidx Jesucrist, alga ganax cadre gadreni gumbee Jesucrist, te na'c gunä dzuuñ cadro gusloj cayujn ste'ca bejn dzuuñ. ²¹ Te gacni si'cni caj lo guijtz: Renani rutliidi bij diidx xcientni, suhui-ipacreni lojni, luxh renani gadpac diajgreni jiejn xtiidxni, sacbecheereni xtiidxni.

Rujn Pabl xhigab chääni guedx Roma

²² Ni'cni balti huält badxojn Dios narä jiädhuiä lojtu. ²³ Luxh naj sa'csi abaluxä xtzunä guideb nezree, näjza sa'csi agujc balti ijjz rlazduxhä jiädhuiä lojtu, ²⁴ naj che cha'a Espanä siädhuiäpac lojtu. Che tedä, jiädhuiäpac contu te ganid guibalaznää la'tu, dxejcti gacnäjtu narä te cha'a Espanä. ²⁵ Naj sia'a guedx Jerusalén te chanää xcoobr rexpejñ Dios ni yu' ree loj rebejn ro'c. ²⁶ Sa'csi rebejn Macedonia näjza rebejn Acaya rlajzpacreni guxhalreni te coobr loj rebenproob ni yu' lo reni huililajz xtidx Dios nen guedx Jerusalén. ²⁷ Bejhreni xhigab hueen gunreni si'c, luxh guli'careni, sa'csi yu' xhi nazääbreni lojreni sa'csi rebejn Jerusalén najc reni baxhal xtidx Jesucrist lojreni, naj laaca rujnreni cayacnäjreni rebejn Jerusalén con xhixtenreni. ²⁸ Ni'cni che chasa'nä meel lojreni

dxejc tedä lajdxtu, jiädhuiä contu, dxejc cha'ä Espanä. ²⁹ Luxh ananä che jiäla lojtu, li guidxa lastoä xcälnasa'c xtidx Jesucrist guidzunä lojtu.

³⁰ Rebetzä, rniabduxhä lojtu xcient xtidx Dad Jesucrist näjza xcient xcälrinälajz Sprit Dyan xten Dios, colguidxagsa'tu, te colgacnäj colcuedx-guiniabtu lo Dios xcientä. ³¹ Colnab lo Dios te guslaani narä loj rebejn Judea nani di gusooob xtiidxni te saru gun rebendxan ni yu' Jerusalén te xca'reni ni chanää lojreni. ³² Te cabaa lazä guidzunä lojtu, sa'csi rlajzpac Dios jiäla lojtu, te lajní yu'ä lojtu siälyuä, susilazäza con la'tu. ³³ Dios ni rbecdxilajz bejn gacnäj guiraatu. Sugacni si'c.

16

Ruxhalä xtixtios lojreni

¹ Colgacnäj bisajnnu Febe. Nane're bejn dzunduxh nen guidoo ni tre' Cencrea. ² Colca'nii xcient Dad, Jesucrist, si'cni riäjl gun bejn gacnäj renani rililajzpac xtidx Dios. Colyacnäjni lo xhitis nani guiquinni, sa'csi laani gucnäduxhni xhidal rebejn, nägajcza narä gucnäjni.

³ Ruxhalä xtixtios lo Priscila näjza lo Aquila, ni racnäj narä lo xtuun Jesucrist.

⁴ Laareni nicäjpreni niejtreni xcientä, ni'c rudedä xquixtios lojreni, luxh xhet narätis, näjza guiraa rebejn ni yu' lo rexquidoo rebenzijt. ⁵ Ruxhalä xtixtios loj resa'ä ni rdxagsa'reni rolizj Priscila näjza Aquila.

Ruxhalä xtixtios loj Epeneto, ni sanälazduxhä, ni gujc benganid ni huililajz xtidx Jesucrist nen guedx Acaya. ⁶ Ruxhalä xtixtios lo Marii nani benduxh dzuuñ lojtu.

⁷ Ruxhalä xtixtios loj reben ladxä ni laa Andrónicä näjza Junias; laareni guyunäj narä nen latzguib, najcreni benro loj reast-post. Ganid laareni huililajz xtidx Jesucrist, dxejcti huililazä.

⁸ Ruxhalä xtixtios loj Amplias, ni sanälazä xcient Jesucrist. ⁹ Ruxhalä xtixtios loj Urbano, ni runnäj nuurnu xtuun Jesucrist. Ruxhaläza xtixtios loj Estaquis, ni sanälazä. ¹⁰ Ruxhaläza xtixtios loj Apeles, ni abadeed balti seen rililajzpacni xtidx Jesucrist. Ruxhaläza xtixtios loj guiraa ni tre' rolizj Aristóbulo. ¹¹ Ruxhaläza xtixtios lo Herodión ben ladxä, näjza loj resa' Narciso nani ahuililajz xtidx Jesucrist.

¹² Ruxhaläza xtixtios loj nan Trifena näjza nan Trifosa, guiro'preni cayujn xtzuun Jesucrist. Ruxhaläza xtixtios loj nan Pér-sida, sanälazäni, abenduxhni xtzun Jesucrist. ¹³ Ruxhaläza xtixtios lo Rufo nani agule Dios, näjza lo xnanni, sa'csi guijmi si'c xnanäza. ¹⁴ Ruxhaläza xtixtios loj Asín-crito, näjza lo Flegonte, näjza lo Hermas, näjza lo Patrobas, näjza lo Hermes, näjza lo rebetzä ni yunäjreni. ¹⁵ Ruxhaläza xtixtios loj Filólogo, näjza lo Julia, näjza lo Nero con bisajinni, näjza lo Olimpas näjza guiraa rexpen Dios nani yunäjreni ro'c.

¹⁶ Colye'tz xchan loj resa'tu. Guiraa rexquidoor Jesucrist ruxhal xtixtios lojtu.

¹⁷ Rebetzä, rniabdukhä lojtu ga'ptu cuidaad xcuent renani rujn biey te guilia' sa' bejn, nani rlajz guntu guiraloj nani najc garenca loj yälruluii ni bisieedtu, colguibicaj lojreni, ¹⁸ sa'csi sa' rebejngä direni gun xtzuun Jesucrist. Laareni rlajztsireni gunreni si'c rlajz tiejxhreni; rniiriendi didxdo, didx ni rgudxguel diajg bejn te rusgueereni lastoo rebejn nani di susin. ¹⁹ Guiranejz abire'ch didx xcuent xho rusobsacpactu xtidx Jesucrist, ni'cni rbaa lazä, ni'cni rlazä gactu nasinduxh xcuent recoshueen, luxh si'c báz xhet ganditu xcuent recosguijdx. ²⁰ Luxh Dios nani ruscuecdxilajz bejn siojb guta'cwni bendxbab xhan ni'tu. Gacnäj Dad Jesucrist la'tu.

²¹ Timoteu nani racnäj narä lo dzuun, ruxhal xtixtios lojtu. Lucio, Jasón, näjza Sosípater, ben ladxä, ruxhalza xtixtios lojtu.

²² Najrä Tercio, ni cagucuaä guijtzre xcuent Pabl, ruxhaläza xtixtios lojtu xcuent Jesucrist.

²³ Ruxhalza Gayo xtixtios lojtu. Rbääznu rolizni, luxh rudedzani rolizni guidx-agsa' reben guidoo. Ruxhalza Erasto, ni najc tesoreer xten guejdxre, xtixtios lojtu, sigajcza bejtznu ni laa Cuarto.

²⁴ Gacnäj Dad Jesucrist la'tu. Sugacni si'c.

Rediidx lult xten Pabl

²⁵ Colguiliä'p xpala'n nani sajc gusudzu'tz la'tu loj xtiidxni nani basule'ä, näjza loj xtidx Jesucrist xcuent rexhigab ni naga'tz galooli, ²⁶naj abaluiloj rediidxga lojtu; näjza xcuent ni bacuua reprofe't galooli; si'c najc diidx ni bia'n Gueb Dios ni nabajn par tejpas loj rexpejnni, agusule'ni loj guiraa

reben guedxliuj, te gusoobreni diidx sa'csi rililajzreni xtiidxni, ²⁷ colguiliä'p xpala'n ni najc tejtis Dios ni nanduxh. Suguiliä'pnu xpala'n Dios xcuent Jesucrist. Guiliä'pnu xpala'n Dios par tejpas. Sugacni si'c.

Guijtz Ganid Ni Bacuua Pabl Lo Guidoo Xten Guedx Corinto

*Bacuua Pabl te guijtz lo guidoo xten guedx
Corinto*

¹ Narä Pabl nacä apost xten Jesucrist sa'csi agule Dios narä te gusule'ä xtiidxni. Narä näjza Sóstenes ni najc bejtnu lo xtidx Dios rucuaanu guijtzre lojtu ² ni ahuililajz xtidx Dios, ni yu' nen guidoo xten guedx Corinto. La'tu agule Jesucrist, abasiani lastootu sa'csi ahuililajzu xtiidxni. La'tu näjza guiraa rebejn ni ahuililajz rextidx Jesucrist loj guideb guedxliuj, najctu xpejn Dios, ni najc Dad xten guiraanu. ³ Rniabnu lo Dios ni najc xtadnu näjza lo Dad Jesucrist, gacnäjreni la'tu, guscuedxireni lajtu.

Abaniidx Dios xhidajl dzunsa'c xcuent Jesu-crist

⁴ Rudedäatis xquixtios lo Dios xcuentu, xcuent yälrulaslajz xten Dios ni cu'a tu xcuent Jesucrist, ⁵ te xcuentni acua'zatu guiraa dzunsa'c, te gusule'tu xtiidxni, näjza te gacbesa'ctu xtiidxni; ⁶ sigajcza con xcälnabansa'ctu baluiitu huililajzpactu xtidx Dios xcuent Crist. ⁷ Ni'cni xhetliidi cayäädxditu loj redzunsa'c ni runiidx Dios, la'l ni ganduxh yu'tu cabäjzu guibisac Jesucrist lo guedxliuj. ⁸ Laani susutijpni lajtu dxejli ni guibisac Dad Jesucrist loj guedxliuj, te rutliidi gac cue'c xhi te quej xcuenttu. ⁹ Rusoobpac Dios xtiidxni. Laani gurejdxni la'tu te jiu'tu lo xnejz Xi'nni Jesucrist ni najc Dad xtenuu, te sanäjtuni.

Rlia' sa'reni nen guidoo

¹⁰ Rulidxä la'tu, rebetzä, xcuent Xtad Je-sucristnu, colyejn tejsi xhigab te na'c la' sa'tu, saru guibannäjtu sa'tu, colyejn tejsi xhigab, colga'p tejsi xcäriejn. ¹¹ Sa'csi agucbeä xcuentu, betzä ni huililajz xtidx Dios. Tej resa' Cloé biäds'a diidx loä xcuenttu, yu' yälrdijl lojtu. ¹² Rlazä guini-scree lojtu sa'csi yu'reni rnii: "Narä nacä te rexpejn Pabl", näjza: "Narä nacä te rexpejn Apolos"; näjza: "Narä nacä te rexpejn Pedr", yu'zareni rnii: "Narä nacä xpejn Crist." ¹³ ¿La rujntu xhigab nala' sa' Crist, ä? ¿La cuaj Pabl lo cruzj xcuent xtojltu, ä? o ¿La gurobnistu con laj Pabl, ä?

¹⁴ Rudedä xquixtios lo Dios dina nutiobnisä nicla teju, xtebtis Crispo näjza Gayo, ¹⁵ te rut naadi con laä batiobnisäreni. ¹⁶ Abanaj lazä batiobnisä resa' Estéfanias. Di lazä guinaj la yu' chu stee bationnisä. ¹⁷ Di Crist nuxhal narä te gutiobnisä. Baxhalni narä te gusule'ä rextiidxni xcuent xho gun bejn te laareni lo dojl, xhet con didxnanduxhdì, te di guducaä loj dzunroduxh ni bejn Jesucrist che gujtni lo cruzj.

Crist najc xcälmilaagwr näjza xcälnajn Diois

¹⁸ Rediidx ni rniuu xcuent Jesucrist xcuent xho gujtni lo cruzj te guislaani re-bejn lo dojl najcni te diidx ni xhet sajcdi lo rebejn ni canijt sa'csi direni chalilajz xtiidxni. Luxh loj rebejn ni ruslaa Dios lo dojl najc rediidxga xcälmilaagwr Dios.

¹⁹ Scree caj loj rexquijtz Dios:
Narä sutzulä yälناسin xten rebennajn, sudzucaäza xcälnadxaallajz, xhigab rebejn ni nadxällazduxh.

²⁰ ¿Con bejn ni nanduxh? ¿Con bejn ni rucuua, ni najc mastr? ¿Con bejn ni ruchagdukh diidx xcuent recos guedxli-jre, ä? ¿La et abejndi Dios najc guiraa yälناسin xten guedxliuj si'c nayällajz nez loj Dios, ä? ²¹ Ni'cni loj xcälnasìn Dios, di rebejn guedxliuj niembee Dios con xcälnasìn guedxliujre, ni'c bichaglajz Dios con yälrusule' diidx ni rniireni nayällajz, con ni'c baslaani lo dojl rebejn ni huililajz xtiidxni xcuent Crist.

²² Rexpejn Israel rlajzpacreni fiireni remi-laagwr; rebejn griegw rguil yälhanduxh.

²³ Niluxh nuurnu rusule'nu diidx xcuent xho cuaj Jesucrist lo cruzj, niluxh loj rex-pejn Israel najc diidxre si'c te guiro ni chalani' bejn, luxh loj rebenzijt xhet sajcdi rediidxre. ²⁴ Niluxh loj rebejn ni gule Dios chalilajz rediidxre, rexpejn Israel sigajc loj rebenzijt, rediidxre najczani yälmilaagwr najczani yälناسin xten Dios. ²⁵ Sa'csi xcälnayääl xten Dios si'c rchalo rebejn ni'c najc nasinduxhru loj xcälnasìn xten reben guedxliuj; luxh xcälnaj xten Dios sacduxhruni loj guiraa xcälnadaan reben guedxliuj. ²⁶ Colhuii la'tu, betzä ni ahuililajz xtidx Dios, xho gule Dios la'tu, colyejn xhigab guxiitu najctu ben nasin loj reben guedxliuj, guxiiza rajptu yälrnibee, guxi-izatu najctu bejn ni agojl guiga'tu beñsa'c.

²⁷ Niluxh agule Dios rebejn ni xhet nanduxhdi te gusanxtujyni rebejn ni nanduxh, aguleza Dios rebejn ni guxii rnibee te gusanxtujyni rebejn ni rnibeduxh. ²⁸ Agule Dios rebejn ni di guiga' bejn, näjza rebejn ni rut riudi, reni rut najcdi, te gusanxtujyni rebejn nani najc guiraa reni'. ²⁹ Te nicla tej bejn digacdii guiliä'p lagajc xpala'nninez loj Dios. ³⁰ Lagajc Dios abachaag la'tu loj Dad Jesucrist; baxhalzani Jesucrist loonu te basanijni xcäriejnnu te ga'pnu yälnasin xten Dios, te guibansa'cnu nez loj Dios, te gacnaya lastoonu, näjza te quiixni rextojlnu. ³¹ Si'c bejn Dios te soob xtidxnii cadro caj scree:

Ni rlajz guinii didxro, suguiä'pni xpala'n dzuun ni bejn Jesucrist.

2

Rediidx xcient Crist ni cuaj lo crujz

¹ Ni'cni cheni biädsule'ä xtidxlil Dios lojtu, rebetzä, dina niädniä didxnajn lojtu, niclaza didxnagajn, xhet si'cti basule'ä xtidx Dios xcient Crist. ²Cheni guyu'ä lojtu, benä xhigab dina niädnäa xhi stee diidx lojtu, biädsule'ätiä diidx xcient Dad Jesucrist, ni cuaj lo crujz. ³Bidzuñä lojtu guideb rdxagä, guideb racditä sa'csi cadxebduxhä. ⁴ Cheni basule'ä diidx lojtu, dina niniä didxro xten yälnasin xten quedxliuj, alga guniä xtiidx yälnasin xten Sprit Dyan xten Dios näjza xcälrnibee Dios, ⁵ te di gac xcälrililajztu xcient yälnasin xten quedxliujre, te gac xcälrililajztu xcient yälrnibee xten Dios.

Rumbee bejn Dios xcient ni ruluii Sprit Dyan xten Dios

⁶ Rniizanu lo sa'nu ni aguyajl lo xtidx Dios rediidx xten yälnasin xten Dios, per te yälnasin ni di gac xcälnasindi quedxliuj, niclaza xten reni rnibee lo quedxliujre, sa'csi sidzuñ dxej sinitlojreni. ⁷Niluxh che rniinu yälnasin xten Dios, rniinu diidx ni rut racbextebdi, xcient xho gac guidzuñnu cadro yu' Dios xhaguibaa. Cheni gajdli gac quedxliuj, rapcheeni yälnasin xhiga'tz xtelli. Baluiinini loonu te guibañnaänuni lo xcälrimbicha' xtelli. ⁸ Nicla tej reni rnibee lo quedxliujre gajd gacbee recosre niluxh paru niacbeerenini, direni nucuua

lo crujz Dad Jesucrist nani rajp xcälrdim-bichaduxh. ⁹Najcni si'cni caj lo rextidx Dios cadro rnii:

Recos ni gjdpac baloj bejn fi, nani gjdpacza diajg bejn jiejn; nani gjdpacza jiu' lo xhigab bejn, guiraa recosga abaluchee Dios par rebejn ni chanälajzni.

¹⁰ Niluxh abaluii Diosreni loonu con Sprit Dyan xten Dios, sa'csi laani basule'nireni loonu. Sprit Dyan xten Dios racbesa'c guiraa rexhigab, näjza recos xhiga'tz xten Dios.

¹¹ Loj reben guedxliuj ¿chuni'c racbee rexhigab ni rujn bejn? Lagajc sprit xten bejn ni yu' neñni racbee xhi xhigab cayu-jnni. Sigajcza rut racbeedi rexhigab xten Dios; Sprit Dxantis xten Dios racbeeni.

¹² Luxh nuurnu dinu nica' yälnajni xten quedxliuj, alga cu'a'nu Sprit Dyan ni siääd lo Dios te gacbeenu rexhicos ni abasalajz Dios loonu. ¹³ Nuurnu rniizanu xcient recosga, xhet diidxdi ni ruluii xcälnajn guedxliujre, diidxtis ni baluuii Sprit Dyan xten Dios loonu. Si'c ruluiinu rediidxga loj rebejn ni rbäjz Sprit Dyan xten Dios nen lastooren.

¹⁴ Niluxh reni di chalilajz xtidx Dios, di-reni gacbee rexhigab xten Sprit Dyan xten Dios, sa'csi laareni xhigabyäältis rchalorenii xcälnasin Dios. Di gacdzia gabeereni rex-higabga, sa'csi Sprit Dyan xten Diostis rajc ruluii lo bejn rexhigab xtelli. ¹⁵ Rebejn ni ahuililajz xtidx Dios, rula'tzreni guira'ti ni ruluii Sprit Dyan xten Dios lojreni. Luxh rebejn ni ahuililajz rutliidi rula'tzdireni.

¹⁶ Sa'csi scree caj lo xtidx Dios: "¿Chuni'c agucbee xho najc xhigab xten Dios te gac guluiini Gueb Dios, ä?" Nicla tej bejn. Niluxh nuurnu rajpnu lo xcäriejnnu xhigab xten Crist, nalajznu racbeenu rextidxni.

3

Reni rujn dzuun lo Dios

¹ Rebetzä, di niajcdi niniä rediidxnagajn lojtu si'c ni rniä loj rebejn ni rajp yälnasin xten Sprit Dyan xten Dios, basule'ä ganaxtis diidx guyasi lojtu, sa'csi najctu ben quedxliuj o biuxbäz ni guxii racbeeni xcient Crist. ² Basule'ä ganax didxguyasi lojtu si'c rudeed bejn le'ch lo te biuxbäz lacuua gaumi bääl. Dina niniä lojtu guiraa rextidx Dios ni nanab gacbeetu, sa'csi gajd gacdi gacbeetuni, niclaza naj gajd gacdi

gacbeetuni, ³sa'csi nabansijctu si'c nabajn reben guedxliuji lałtis runembiidtu, rdxeclajztu lo sa'tu, ¿la ditu gacbee nacsijctu si'c ben guedxliuj, ä? ⁴La lałtis nabajntu si'c nabajn reben guedxliuji ni di gumbee xtidx Dios, ä? ⁵Sa'csi cheni rnii tejni: "Narä nacä te xpejn Pabl", dxejci steeni rnii: "Narä nacä te xpejn Apolos", ¿la xhet cayujnditu sigajtis ni rujin rebejn guedxliuj, ä?

⁶¿Chuni'c najc Pabl? ¿Chuni'c najc Apolos? Nuurnu najctisnu xmos Dios ni basule' xtidx Dios lojtu te huililajztu, luxh cade tejnu riennu dzuuñ ni runiidx Dios jieniu. ⁷Ganid basule'ä xtidx Dios lojtu, dxejci biääd Apolos te gucnäjzani gucebeerutu xtidx Dios, niluxh lagajc Dios najc ni cagusanij xcäriejntu te gacbesa'ctu xtiidxni. ⁸Ni'cni nicla ni rusulegxaa diidu, niclaza nani racnäj racbeeru bejn rediidxga xhet sajcdireni; Diostis sajc nani rusanij xcäriejnt rebejn. ⁹Nuurnu najcnu si'c rexmos ni rujin dzuuñ lo yuj. Tejsi najc nani rbe'c binij näjza nani rga'nis, niluxh Dios rguijx teganu dzuuñ nani riennu. ¹⁰Nuurnu najcnu si'c rexmos ni runnäj Dios dzuuñ. La'tu najctu si'c yuj cadro cayajc xtzun Dios, si'c te yu' ni cayunchee Dios. ¹¹Narä nacä si'c te mastr albañil. Baniidx Dios dzuuñ loä, gucnäjni narä te casuä reguji lo yujre, te naj ste'ca bejn quixh basuu yejcni. Niluxh tejga ni chanuu gun dzuuñ lojga, sugapni cuidaad xho guiliänsi padeerga. ¹²Sa'csi di gadci gusujreni garenca cimient loj nani najc-xgaa, ni najc Jesucrist. ¹³Naj palga guiliäbs bejn te padeer yejc cimientga con oor, con pla't, con guij ni sacduxh, o con baräjd, guixhtriu, o balag biquii, sidzujn dxej sien xho najc dzuuñ ni bejn tejga bejn. Sa'csi siääd fis guiboo ni gululoj dzuuñga, sa'csi lagajc guibooga gululoj dzuuñga, xho najcni. ¹⁴Palga yu' reni bejn te yusa'c yejc cimientga, luxh dini chec lo guibooga, sudeed Dios lo bejngä ni riäjlxca'ni sa'csi bejnni yusa'c. ¹⁵Niluxh palga chec ni bejnni yejc cimientga xhet xca'dini, xcälnabäjntisi di nit, luxh xtzuunni sejc.

¹⁶¿La ditu gan la'tu najctu xquidoo Dios, luxh nen lastootu rbäjz Sprit Dxan xten Dios, ä? ¹⁷Palga yu' chu gutiexhät xquidoo Dios, sunitloj Diosni par tejpas, sa'csi xquidoo Dios najc dxan, luxh la'tu najctu guidooga.

¹⁸Nicla tejtu na'c gusgueetu lagajc la'tu. Palga yu' chu rujin xhigab nanduxhni xcient yälناسىن xten guedxliujre, nanabpac gacni si'c te bejn ni xhet najndi te xca'ni yälناسىن xten Dios te guliipac gacni te bejn, te ben nasin. ¹⁹Sa'csi yälناسىن xten guedxliuj xhet sajcdi nez loj Dios. Lo rexquijtz Dios caj scree: "Dios rujin rga' reni rajp yälناسىن xten guedxliuj lagajc xcient xcälrusgueereni ni rujin lagajc xcälnadxällajzreni." ²⁰Ste'ca lajt caj scree: "Nanchee Dios xho najc xhigab ni rujin rebejn ni rajp xcälnasın guedxliujre, luxh xhetliidi sajcnii nez loj Dios." ²¹Ni'cni na'c guiliä'p bejn xpala'n te bejn guedxliuj. Sa'csi loj tejgatu abaniidx Dios guira'ti rexhicos najc xtengatu, ²²palga najcni Pabl, o Apolos, o Pedr, o guedxliuj, o yäl nabajn, o yälgijt, o recos ni yu' naj, o recos ni churugac, guiraareni najc xtentu. ²³La'tu najctu xten Crist, luxh Crist najc Xi'n Dios.

4

Xtzuun repost

¹Ni'cni la'tu nanab fiitu loonu si'c rexmos Dad Jesucrist ni rajp rexhigabxhiga'tz xten Dios te gusule'nureni lojtu. ²Maj pues, te bejn ni cahuii te dzuuñ nanab gusoobreni diidu, gunreni te dzunsa'c. ³Niluxh guxii runä xhigab gula'tzu narä, o gula'tz chutis guxhtis lo guedxliujre narä; nicla lagajc narä dina gunduxhä xhigab xho nacä nez loj Dios. ⁴Entis rbedxi xcäriena, per xhet xcient ni'cdi sajc guiniä xheti xtolä, Dad Jesucrist najc nani rula'tz narä, rhuioljni xho nacä. ⁵Ni'cni la'tu na'c gucuaquijtu bejn che gajd guidzujn dxej; colcuajz jiääd Jesucrist dxej laani sibääni lo bianij guiralii ni naga'tz lo nacäjy, luxh sululojzani xhi xhigab yu' nen lastoo tejga rebejn, dxejci tejganu sudeed Dios ni nungäjl xca'nu.

⁶Rebetzä, xcälnasa'ctu caniä rediidxre lojtu. Caniä xcient Apolos näjza narä, si'c te yälrlului te fiitu xho riennu te na'cza guntu recos ni xhet caj di lo rexquijtz Dios, te na'cza guiliä'ptu xpala'n tejtu lo resa'tu, laj ni cabälaztu steeni. ⁷Sa'csi ¿chuni'c rnii najclu benşa'cru lo ste'ca bejn?, o ¿xhini'c rajplu ni di Dios numiidx lojlu? Luxh palga cuaxlia'luni, ¿xhiciuent lagajc luj rliä'plu xpala'ntu, lascanu rut baniidxdi lojlu recos ni rajplu?

⁸Rujntu xhigab rajptu xhidajl cos, naatu najctu ricwduxh, rchalotu najctu reii, dirutu guiquiin nuurnu. Malaii gulii najcpactu reii te näjzanu guinibenäjnu la'tu. ⁹Niluxh runä xhigab gule Dios reapost si'c rebejn ni xhet sajcdi. Najcnu si'c rebejn ni gunibeereni guet. Nez loj rebejn güedxliuj näjza nez loj rexangl Dios najcnu si'c rebejn ni rdedlojtit bejn lojreni. ¹⁰Nuurnu najcnu bennayäl xcent Crist, niluxh la'tu rchalotu racbeduxhtu rextidx Crist. Nuurnu najcnu bejn ni xhet nadipdi, niluxh la'tu nacj bendanduxh. Rliä'p rebejn xpala'ntu, ni'c rbälazreni nuurnu. ¹¹Cadeednu trabawdugh nay, rliaannu, riojlnu, xho rnijah xhabjnu, rdilnäj rebejn nuurnu, luxh xheti rolijznu. ¹²Rdxaagnu riennu dzuun lagajc naanu te guidxälnu xhi guidaunu. Che rguereni loonu, rniabnu lo Dios xcentreni. Che rusacsí rebejn nuurnu, rientisnu huant. ¹³Che rnijahreni nuurnu, rulidxnäänurenin didxdo. Rujnreni xhigab najcnu si'c guijxh xten güedxliujre, ruhuiireni loonu si'cni xhet sajcdinu.

¹⁴Dina gucuaä rediidxre te gusanxtuyätu. Rucuaä rediidxre te gulidxtu si'c rex'iä ni sanälazä. ¹⁵Palga ga'ptu tzuu mil bejn ni guluiit rediidx xten Crist, ruti stee xtadtu; narä gucä xtadtu, ganid narä basule'ä rextidx Dios lojtu. ¹⁶Ni'cni rulidxtä la'tu, colyejn si'cni ruhuiit runä.

¹⁷Ni'cni baxhä Timoteo lojtu, najcni si'c xi'nä ni sanälazä, ni rusob diidx xcent Crist. Laani susnajni lajtu xho mood nabanä lo yälnabajn xten Jesucrist, sigajcni ruluiä neen reguidoo guiraasi lajt. ¹⁸Yu'tu ni acayajc guyalajz, naatu pet dina guibisäcä lojtu. ¹⁹Cabäzä jiädhuiätu, palga si'c rlajz Dios, dxejc sacbeä chuni'c nacj rebejn ni cayajc guyalajz, fiä xhipacni rujnreni, xhet xtiidxtisreni gacbeä. ²⁰Sa'csi xcälrnibee Dios xhet ganaxtis xcent diidx najcni, näjza dzuun ni rujnreni ruluiloj xcälrnibee Sprit Dxan xten Dios ni rajpreni. ²¹Xho rlajzzatu guidzuñä lojtu, ä? ²²La sidzuñä si'c te dad ni ca' te baar te quinätu o la guidzuñä yälrinälajz näjza yälnadolajz te guidxätu, ä?

sa'ní

¹Agucbeä yu' tejtu ni ahuililajz xtidx Dios, cua'ni si'c chäälni te gunaa ni gujc chäälni xtadni. Dee najc te dolduxh nani nicla reni di chalilajz xtidx Dios direni gun.

²Luxh la'tu gujctu guyalajz lacuua niac-huin lastootu; te bejn nani bejn dojlga, riäj nibäätuni nez lojtu. ³Mase ruti narä ro'c, lastoä sugaräj la'tu. Alabenä xhigab xhini'c jiennäjnu bejngä ni bejn dołduxhga, sigajc ni niunä paru suga'ä ro'c. ⁴Con laj Dad Jesucrist, che abidxagsa'tu, luxh alastoä sugaräj la'tu, con xcälrnibee Dad Jesucrist, ⁵abenä xhigab guteednu bejngä ladznaa benðxbab te ted tiejxhni trabajw, niluxh sprit xtenni laani nen dxej ni jiädsac Dad Jesucrist lo güedxliujre.

⁶Di guchaag guiliä'ptu xpala'ntu xcent dzuun ni rujntu. ⁷La ditu gan te dojl najc si'c tudxe'n cojb ni ruslaj, rusagui-jni cojb cadro ru'chni, ä? ⁷Colgudzucaj cobyujxhga, te guibajntu te yälnabannaya-coob si'c te cobya, sa'ni racchee yätxtil ni xheti levaduur yejcni par lanij xten pascw. Arajptu yälnabannaya sa'csi agujt Jesucrist sigajc gujt te xile' lo lanij pascw te badzucanji rextojlnu. ⁸Si'c nanab jiennu lanij xten pascw con yätxtil ni xheti levaduur yejcni, nalajznu con yälguliipac neen lastoonu, xhet yätxtildi ni yu' cobyujxhga yejcni, nala-jznu na'c gunlu latsiaj.

⁹Lo stee guijtz abacuaä lojtu, na'c guchaagtü rebejn ni runnäj cosgуйdx bejn ni di gac chäälneni. ¹⁰Niluxh xhet caniädi xcent reben güedxliuj ni rujn cosgуйdx con bejn ni di gac chäälneni, nicla xcentdi rebejn ni rchaglaztej meel, nicla rebejn ni nacj gubaan, nicla rebejn ni riu rebanäjb. Paru si'c gacni, nanab jiunejztu güedxliujre. ¹¹Niluxh narä bacuaä guijtzga lojtu te na'c guchagsa'tu te bejn nani rniit ahuililajzni xtidx Dios, luxh rujnruni cosgуйdx con bejn ni di gac chäälni, o rchaglaztej meel, o riuni rebanäjb, o rnijah sa'ni, o rsiojzni, o rusqueeni bejn te rca'ni xhi xtenni. Rniäza lojtu, nicla gaunäjtu sa' bejngä. ¹²⁻¹³Sa'csi narä di gadci gunä yälguxhtis loj rebejn ni gajd chalilajz xtidx Dios. Gunti Dios yälguxhtis lojreni. La'tu nungäjl guntu yälguxhtis loj rebejn ni ahuililajz xtidx Dios. Ni'cni colgudzucaj benðooglja lojtu.

6

Na'c chäätu loj rebendojl te gunreni yälguxhtis lojtu

¹ Palga tejtu ni ahuililajz xtidx Dios rlajz cue'c xquej stee sa'tu, *żxicuent chale'ctu xquejni loj rebendojl te gunreni yälguxhtis lojtu?* *żxicuent ditu guiniab yälguxhtis loj rebejn ni ahuililajz xtidx Dios, ä?* ² *La ditu gan, rebejn ni ahuililajz xtidx Dios sujn yälguxhtis lo reben quedxliuj, ä?* Palga la'tu sujntu yälguxhtis lo reben quedxliuj, *żla di gacdi guntu yälguxhtis lo sa'tu lo recosbäz lacuua chäätu loj rebendojl te gunreni xcälguxhtisreni lojtu, ä?* ³ *La ditu gan sienzanu yälguxhtis lo rexangl Dios, ä?* *żAticaxh jiennu yälguxhtis loj recos bäge' xten sa'nu lo yälnabajnre!* ⁴ Palga la'tu cadilnäj sa'tu xcuent recos xten quedxliujre, *żxo mood chäälu loj rebendojl ni rut najcdi loj xquidootu, te naareni lojtu xhini'c guntu, ä?* ⁵ Rniä rediiidxga lojtu te gutiuytu. *żLa ruti nicla tej bennasin loj guiraatu ni sajc gun yälguxhtis lo resa'tu, ä?* ⁶ *żxicuent rile'c te bejn ni rililajz xtidx Dios xquej bejtni ni rililajzza, luxh rijreni nez loj reguxhtis ni di chalilajz xtidx Dios?*

⁷ Mbaj naj, guliipacni alabanijttu sa'csi yu' yärlidlnäj sa'tu; colgutijp lajztu rebejn ni rujn dojl lojtu. Maazru huen colgusaan sucua'reni xhixtentu. ⁸ Per dee, alga lagajc la'tu runnijttu loj lagajc resa'tu, luxh rca'tu xhixten lagajc resa'tu.

⁹ *O żla ditu gan reben dojl dipacreni jiu' lo xcälrnibee Dios, ä?* Na'c gusaantu gusgueereni la'tu; nicla te resa' dee di jiu' lo xcälrnibee Dios: guiraa reni richagtoo regunaa; guiraa reni rajñ rebanäjb; reni resnäj bejn ni di gac chäälni; reniguii ni runguraa; reni najc birääx; ¹⁰ reni najc gubaan; reni rsiäblajz xhixten bejn; reni rsiojz; reni rniyaj; reni rusghee bejn te rca'reni xmeel bejn. Nicla tej sa' redee di jiu' lo xcälrnibee Dios. ¹¹ Yu'zatu ni gujc si'c galoo, niluxh naj abasia Dios lastootu, naj anajctu bejnaya nez loj Dios sa'csi abiällajz Dios xtojltu xcuent Jesucrist, näjza xcuent Sprit Dyan xtensi. La'tu anajctu rexpejnni.

Tiejkhuu najc xquidoo Dios

¹² Guliini sajc gunä xhitis ni rlazä gunä, niluxh xhet guiraadini najc hueen par narä. Narä sajc gunä si'ctis ni rlazä, niluxh dina

gusanä guinibee nicla tej xhi cos narä.

¹³ Guliini najc yälrjaw par xque'ni, luxh xque'ni najc par yälrjaw, niluxh sidzujn dxej sunitloj Dios guiro'preni. Per tiejxhnu di gac par jiennu cosgijidx con bejn ni di gac chäälnu. Tiejxhnu najc par Dios, luxh Dios najcza par tiejxhnu. ¹⁴ Luxh naj lagajc Dios guläs Dad Jesucrist lo rebengut, siliäszani nuurnu con xcälrnibeduxhni.

¹⁵ *żLa ditu gan tejgatu najc si'c te la' tiejxh Crist sa'csi ahuililajztu rextiidxni, ä?* Palga tiejxhnu najc xten Crist, *żla sajc gudeed-nuni loj te gunadxab, ä?* *żGurniälojujiennu si'c!* ¹⁶ *żLa ditu gan cheni guchaagni te gunadxab rajcni tejtis tiejxh con laani, ä?* Loj rexquijtz Dios caj: "Guiro'preni sajc si'c tejtis bejn." ¹⁷ Niluxh nani ruded lastooni lo Dios anajczani tejtis con laani sa'csi rbäjz Sprit Dyan xten Dios neñ lastooni.

¹⁸ Colguibicaj lo dojl ni rujn bejn con nani di gac chäälni. Xhitis stee dojl ni rujn bejn najcni lo jiaa tiejxhni, niluxh dojl ni runnäjni bejn ni di gac chäälni najc dojl lagajc neñ tiejxhni. ¹⁹ O żla ditu gacbee tiejxhnu najc xquidoo Sprit Dyan ni abaniidx Dios te cuäätzni neñ lastoonu, ä? Ni'cni di gacdi guinibeetu lagajc la'tu. ²⁰ Agudijx Jesucrist xtojlnu con xtiejnni lo crujz, ni'cni nanab jiennu dzunsa'c nani guiliä'p xpala'n Dios con tiejxhnu näjza Xpritnu.

7

Yälrulijdx xcuent yälruchñaa

¹ *Naj gudzu'ä diidx lojtu xcuent ni gunabdiidxtu cheni bacuaatu guijtz loä. Guliini hueen najcni na'c guchaagni te niguii.* ² *Niluxh sa'csi yu' xhidajl reni richunäj chutis gunaa, suga'p tejga reniguii chäälpacni; sigajcza suga'p tejga regunaa chäälpacni.* ³ *Nanab niguii guchaagni chäälni che rlajz chäälni, sigajcza gunaa nanab guchaagni chäälni che ni si'c rlajz chäälni.* ⁴ *Di gunaa guinibee lagajc tiejxhni, sa'csi chäälni rnibee tiejxhni.* Sigajcza di niguii guinibee lagajc tiejxhni, sa'csi chäälni rnibee tiejxhni. ⁵ *Na'c gusuni' tejtu lo chäälni.* Maazru hueen coljia'n diidx na'c guchagsa'tu te xcheje' te cuedx-guiniabtu lo Dios. Che luux cuedx-guiniabtu lo Dios, guchagsacs'a'tu te na'c guquil bendxbabtu chunäjtu ste'ca bejn.

⁶ Rniä rediidxre lojtu te ni rlajz guchnaa sajc guchnaani, niluxh dina guiniä lojtu, nanabpac guchnaatu. ⁷ Narä rlazä maläii sajc gac guiraa bejn si'c ni nacä. Dios abadeed loj tejga bejn xho mood guibajnni. Yu'reni sajc guibajn tej mood, yu'zareni sajc guibajn garencu mood.

⁸ Loj rebejn xteb näjza loj regunabiuud rniä, hueen najc na'c guchnaareni, gacreni si'c narä. ⁹ Niluxh palga di gacdi cue'cdxi lajzreni, suguchnaareni. Maazru huen guchnaareni te na'c guntisreni xhigab rla-jzreni guchaagreni te niguui o te gunaa.

¹⁰ Loj rebejn ni abachgaa, rniä rediidx ni basa'n Dad Jesucrist loonu: "Na'c guro'n gunaa chäälni." ¹¹ Niluxh palga guro'n te gunaa chäälni, na'c guchnasacni, o maazru hueen gusiäjlni diidx guibisacni lo chäälni. Sigajcza te niguui na'c guro'nni chäälni.

¹² Naj rediidx ni guiniä najc xhigab xtenä, xhet diidxdì ni basa'n Jesucrist loonu. Scree rulidxä la'tu. Palga yu' te niguui ni rililajz xtidx Dios, luxh chäälni di chalilajz xtidx Dios, luxh rlajz gunaaga cuäznäjni niguiga, na'c guro'n niguigani. ¹³ Palga yu' te gunaa ni rililajz xtidx Dios, luxh di chäälni chalilajz xtidx Dios, niluxh rlajzni cuäznäjni gunaaga, na'c guro'n gunaaga chäälni. ¹⁴ Palga yu' te niguui ni di chalilajz xtidx Dios, luxh chäälni rililajz xtiidxni, palga hueen nabannäj sa'reni, hueen najc yälruchnaaga nez loj Dios. Sigajcza palga yu' te gunaa ni di chalilajz xtidx Dios luxh chäälni rililajz xtiidxni, palga hueen nabannäjsa'reni, hueen najc yälruchnaaga nez loj Dios. Palga dini gac si'c, di Dios gunle' rex'i'nreni, per naj abenle' Dios rex'i'nreni. ¹⁵ Palga chää'l te gunaa o chää'l te niguui ni di chalilajz xtidx Dios luxh rlajzni guilia' sa'ni con chäälni ni ahuililajz xtidx Dios, sujiizani. Nani rililajz xtidx Dios diruni ga'p por cuäznäjni chäälni ni di chalilajz xtidx Dios, niluxh gurejdx Dios nuurnu te cuecdxinai lajznu. ¹⁶ Sa'csi ḥxho najnlu, gunaa, la suslää Dios chäällu lo dojl xcuentlu, ä? O ḥxho najnlu, niguui, la suslää Dios chäällu lo dojl xcuentlu, ä?

¹⁷ Si'ctis ni baniidx Jesucrist lo tejganu, si'ctis ni gule Dios tejganu, si'c suguibajnnu. Si'cza rulidxä gunrenini nen guiraa reguidoo. ¹⁸ Palga tej niguui rililajz xtidx Dios, luxh yu'ni bee tiejxhni, xhet najcdini.

Palga stee niguui chalilajz xtidx Dios, luxh xheti bee tiejxhni, xhet najcdizani. Su-jia'nni si'cni najcni. ¹⁹ Xhet najcdi la yu'ni bee o xhet beedi yu'ni. Tejtis ni nanab gunni, gusoobni rediidx ni gunibee Dios. ²⁰ Tejgani jia'n si'cni najcni cheni gurejdx Diosni. ²¹ Palga najclu te mos ni guziireni te gunlu dzuun, dxejc huililajzlu xtidx Dios, na'c chulu yärsia' xcient ni'c. Palga sajc gudzu'lu meel lo xlamlu, badzu'zani te gaclu te bejn ni rut rnibeedi. ²² Sa'csi nani najc te mos ni guziireni te gunni dzuun che huililajzni xtidx Dios, diruni gac te mos ni bio' nez loj Jesucrist, niluxh te bejn ni rut rnibeedi che rililajzni xtidx Dios, anajcni mos ni guzii Dios, najcni xmos Dios. ²³ Guzii Cristtu con xtiejnni, ni'c na'c gusaantu guinibee bejn la'tu te gac guntu xtzun Dios. ²⁴ Rebetzä, colchanuu gactu si'ctis ni najctu che gurejdx Dios la'tu, palga najctu mos ni guziireni, o te bejn ni rut rnibeedi.

²⁵ Redxa'p ni gajd guchnaa, di Jesucrist ninibee xhini'c nanab gunreni. Gule Dios narä te gusule'ä xtidxni. Naj gulidzäreni sa'csi nanä xtidx Dios, luxh racnäjzani narä. ²⁶ Runä xhigab hueen najc palga di renigui guchnaa sa'csi siääd yäl naganduxh lo guedxliujre. ²⁷ ḥLa alabachnaalu, ä? Na'c guro'nlu chäällu. ḥLa alabar'o'nlu chäällu, ä? Na'c chaxiilu chäällu. ²⁸ Palga guchnaalu, xhet dojldi rujnlu. Palga guchnaa te dx'a'p, dizani gun dojl. Niluxh reni ruchnaa side-jdreni trabajw lo yäl nabajnre. Ni'cni rniä na'c guchnaatu sa'csi di rlazä teditu trabajw.

²⁹ Rebetzä, rlazä guiniä lojtu rediidxre: Guxiiru dxej guibajnnu lo guedxliujre, ni'cni reni abachnaa na'c gunreni xhigab xtensis yäl ruchnaa, te gac gunreni xtzun Dios. ³⁰ Luxh remi cayoon, nanab gunreni si'cni xhet cayoondireni; reni rbalajzreni, nanab gunreni si'cni xhet cabaadi lajzreni; reni rzii xhicos, nanab gunreni si'cni xhet rajpdireni; ³¹ näjza reni rujn recos lo guedxliujre, nanab gunreni si'cni dini gunni, sa'csi recos ni rhuiinu lo guedxliujre, alacanitlojreni.

³² Narä rlazä na'c chutu yärsia'. Rebejn ni gajd guchnaa, riurenri rextzuun Dios, näjza xho gupsaareni lajz Dios. ³³ Renani abachnaa riurenri recos guedxliujre te gupsaani lajz chäälni, ³⁴ tiop najc xhigabni xcient recos nani gunni. Sigajcza najc

gunaa ni abachñaa con tejni gajd guchñaa. Sa'csi te gunaa ni gajd guchñaa riuni rextzuun Dios te gacreni gunadxan nez loj Dios con tiejxhreni näjza con lastooreni. Niluxh regunaa ni abachñaa riurenri recos guedxliujre, näjza xho gupsaani lajz chäälreni.

³⁵ Rniä rediidxre par xcälnasa'ctu, xhet gudxonädi la'tu, te gunruntu redzunsa'c, te chanälazsa'ctu Dios.

³⁶ Palga yu' chu te niguij lojtu ni rujn xhigab, maazru hueen guchñaa xindxa'pni sa'csi acayajcni gunagool, dini gun dojl, sajc gudeednini guchñani. ³⁷ Palga steeni dini gun xhigab si'c nanab gunni, sajc gunni si'ctis ni rlajzni palga abejnpacni xhigab nen lastooni di xindxa'pni guchñaa, hueenza najc si'c. ³⁸ Ni'cni nani rudeed xinda'pni guchñaa, hueen rujnni, sigajcza nani dini gudeed xindxa'pni guchñaa, laaca rujnni.

³⁹ Te gunaa ni abachñaa, rajpni por guibaññajni chäälni guideeb nabajñ chäälni. Palga guet chäälni, jianxtebni stehuält, dx-ejc sajc guchñani chutis niguij ni rlajzni, palga najcni tej ni ahuililajz xtidx Dios. ⁴⁰ Narä rchaloä maazru guibaa lajzni palga dini guchñaa. Si'c najc xhigab ni runä, luxh riliipac lazä cayacnäj Sprit Dyan xten Dios narä.

8

Yärlajw ni ruzujreni lo rebanäjb

¹ Rniä lojtu xcient reyärlajw ni ruzujreni lo rebanäjb. Gulini guiraanu rajpnu yälnajn xcient recosga. Niluxh yälnajn rujn rajc bejn guyalajz. Luxh yärlinälajz sa'ni, ni'c rujn racnäjnu resa'nu. ² Palga yu' chuni'c rujn xhigab nanduxhni, rusgueeni lastooni sa'csi cayäädxru gacbeeni si'c ni nanab gacbeeni. ³ Palga yu' chu sanälajz Dios, Dios anumbee bejngä.

⁴ Ni'cni, xcient reyärlajw ni risujreni loj rebanäjb, anancheenu xhet sajcdi rebanäjb ni yu' lo guedxliuj, ruti stee Dios; tejtis ni najc Gueb Dios. ⁵ Masque yu' reni rniireni najc "dios" xhaguibaa o loj guedxliuj, luxh yu'za xhidajl "dios" näjza xhidajl lam ni rnibee, ⁶ per nuurnu nadonnu yu' tejtis Gueb Dios, Dad nani benchee guiraa recos, luxh lojtsni nabajnnu. Rajpnu tejtis Dad ni rnibee loonu, ni'c najc Jesucrist.

Xcient xcälrnibeeni guc-chee guiraa recos loj guedxliuj, luxh nuurnu nabajñnu xcient Jesucrist.

⁷ Niluxh xhet guira'ti bejn najn yu' tejtis Dios. Yu' rebejn ni ahuililajz xtidx Dios abia'reni rajgreni rebanäjb, luxh rajwzareni reyärlajw lascanu guzujni loj banäjb sa'csi nacäjyru xcäriejnreni, ni'cni et laadi ria'n lastooreni, rxhinza xcäriejnreni. ⁸ Xhet xcient xhi rdaudinu sajc guibansa'crunu lo xnejz Dios. Xhet najcdi palga guidaunu o palga dinu guidau. ⁹ Colnatiro xhi rujntu te na'c guntu jiajb te bejn lo dojl nani gajd chalilazsa'c xtidx Dios. ¹⁰ Palga te bejn ni gajd chalilazsa'c xtidx Dios fiini cayajwlu reyärlajw ni guzuj lo rebanäjb, luxh luj najclu te bennajn, sa'csi dee gajd gacbesa'c rextidx Dios, ¹¹ gla di lajzni gac nadip te näjza laani chatajwni yärlajw ni guzuj lo rebanäjb? ¹² Niluxh luj, xhet dojlidi cayujnlu, per bejtzlu ni gajd chalilazsa'c xtidx Dios, sixijnni, luxh najcni bejtzlu sa'csi näjza par laani gujt Dad Jesucrist lo crujz. ¹³ Si'cza che rujnlu dojl lo bejtzlu, runnajlu lajzreni sa'csi gajd xcäriejnreni jiansa'c, luxh si'c cayujnzu dojl lagajc lo Crist. ¹⁴ Ni'cni, palga narä runä riabsac betzä lo dojl xcient ni rauä, hueenru dirunä gauä yärlajw ni gun jiajb betzä lo dojl stehuält.

9

Xhi sajc gun te apost

¹ ¿La dina gacä te bejn ni rut lojdi yu'ä? ¿La xhet apostdi narä? Ni abahuiä lo Dad Jesucrist, abasule'ä rextidxni lojtu, ni'c huililajz xtiidxni. La'tu najctu xtzunä ni runä lo Dios. ² Yu' reni di gumbeeni narä si'c te apost, niluxh la'tu abiembesa'ctu narä sa'csi ahuililajz xtidx Jesucrist ni abasule'ä lojtu. Ni'c rululioj guliipac nacäte apost.

³ Diiidx ni rniä scree loj reni di chalilajz nacä apost najc scree: ⁴ ¿La di riäjl xca'ä guiraa ni runiidxtu gauä näjza ni runiidxtu yä'ä? ⁵ ¿La digacdiza gapä te chälä ni ahuililajz xtidx Dios dx-ejc chanäázani sigajc rujn guiraa reapost, näjza rebetzhuin xten Dad Jesucrist näjza Pedr? ⁶ O ⁷ gla xtebtis Bernabé näjza narä di gacdi cuääz jiennu dzuun te guidaunu lal rusule'nun xtidx Dios? ⁷ ¿Chuni'c rajc soldaad luxh

lagajc laani siini xhi gauni? O ḡchuni'c rusuj yaguub luxh dini gau ninejxh ni rcaj lojga, ä? O ḡchuni'c rajp gaii dxib, luxh dini yä le'ch ni rudedreni, ä? ⁸Na'c guntu xhigab lagajc xcuentä caniä rediidxre lojtu, sa'csi näj loj xleii toMoisés caj diidx xcent recosre. ⁹Loj reguítz xten xleii toMoisés caj rediidxre: "Na'c gusällu guijxh ro' gon che cayo'tni yejc triuu." ¹⁰La guniitis Dios rediidxre sa'csi riuni regon, ä? ¹⁰Dini gac! Xcälناس'a'cnu guniini rediidxga, sa'csi bejn ni rujn dzuun lo niaa näjza nani rusia triuu riäjl gunlojni xca'ni te yälnasa'c ni rajc lo xniaani. ¹¹La'tu najctu si'c te yuj cadro gule'cnu binij sa'csi basule'nu rextidx Dios lojtu, ḡla rujntu xhigab dzunro najc gac-näjtu nuurnu tudxene', ä? ¹²Palga racnäjtu ste'ca bejn ni ruluiitu, nungäjru gacnäjtu nuurnu.

Niluxh gajdnu guniini si'c lojtu sa'csi di rlajzdinu guidxoonnun chalilazsa'ctu rextidx Dios, ni'c chotipnu lajznu guiraar retrabajw ni cadeednu. ¹³La'tu najntu remi rujn dzuun nen guidoro rajwreni rebääl ni risa'nreni lo Dios, sigajcza remi rujn dzuun lo dxan cadro risa'nreni xpääl reguidxaa lo Dios, näjza laareni rajwreni rebäälga. ¹⁴Si'cza gunibee Dad Jesucrist loj remi gusule' xtidx Dios, xca'reni xhi gaurenai lagajc loj remi rililajz xtiidxnii. ¹⁵Niluxh gajdpacna gunä si'c, xhetza caca'adi. Dizana gucuaä rediidxre lojtu naj te guniidxtu xhi xca'a. Hueenru guetä te na'c gudzucaj te bejn yärlbalajz ni rapä xcuent dzuun ni runä lo Dios.

¹⁶Narä dina gapä xhicuent guiliä'pä xpala'nä che rusule'ä xtidx Dios. Sa'csi si'c nanabpac gunä, sa'csi probe'za narä palga dina gusule'ä xtidx Dios. ¹⁷Palga gunä dzuunre sa'csi rdxaglazäpac gunäni yu' xhi guniidxtu xhi xca'a, ä? Che gusule'ä xtidx Dios lo chutis bejn, ligaj gusule'äni, te di gusule'ä xtiidxnii te guniidxtu rebejn xhi guniidxreni xcuent xtzunä, mase si'c riäjl gunreni.

¹⁹Rut xmosdi nacä, luxh lagajc narä benä xhigab gacä si'c te mos te gunä gaan chalilajz xhidajl bejn xtidx Dios. ²⁰Cheni yu'ä loj rexpejn Israel, runä si'cni rujnreni te gunä gaan chalilazreni rextidx

Dios. Che rlazäza guiniä loj reni nabajn loj xleii toMoisés, dxejc runä si'c rujnreni te gunä gaan chalilazreni rextidx Dios, niluxh diruna guibañä lo leiiga. ²¹Stee lajt cadre rlazä gunä gaan remi di guibajn lo xleii toMoisés, runä si'c rujnreni, mase empac nabanä lo xleii Dios sa'csi rusobä diidxni basa'n Crist. ²²Cheni yu'ä loj remi guxii rililajz xtidx Dios, racäza si'c ni najcreni te gunä gaan chalilazsa'creni. Narä runä sigajc rujnreni, te si'c gunä gaan chalilajz xhidajlreni xtidx Dios. ²³Runä guira'ti xcuent xtidx Dios ni ruslaa bejn lo dojl, te xca'zunu, narä näjza rebejn ni ahuililajz xtidxä, yälnabajn par tejjas.

²⁴Anajntu che ru' te lanij, che ruxun renigui, guiraareni ruxun, niluxh tejtis ni rca'ni ruzalajzreni. Colguxunza nez lo Dios te gunzatu gaan. ²⁵Guiraa remi rlajz guxun rapdareni tiejxhreni te ga'p tiejxhreni yälnadip, yälnadaan. Luxh laareni ruxunreni si'c te gunreni gaan te cos ni di gaclaa agunitlojni. Niluxh nuurnu ruxunnu te guniidxtu xhi loonu nani dipac nitloj. ²⁶Narä dina guxunä si'cni dina ganä caro cha'ä, dizana gucuaä si'c te bejn ni rucuanäj te balaa, o cayäaztisni lo bej. ²⁷Niluxh narä runä rajc tiekhä si'c xmosä te na'c gunni si'ctis ni rlajzni, te gunni nani rlajz Dios te di cheni abasule'ä xtidx Dios loj xhidajl bejn, gusanxtuju tiekhä narä.

10

Yärlulijdx lo xcuent rebanäjb

¹Rebetzä, di rlazä jiällajztu ni gusajc retoxtadgoldoonu. Gusajreni xpalaar te za gudejdareni galäii nisdoo ni laa Nisdo Xnias. ²Gudejdreni xpalaar te za näjza gudejdreni galäii nisdoo; ni'c najc si'c te yärlbnis sa'csi sanajlreni toMoisés. ³Sigajcza guiraareni gudajw tejtis yärlrajw ni baxhal Dios xhaguibaali. ⁴Guiraazareni gu' nis ni badeed Dios, Dios bejn birii nisga cuä' te guilaj. Luxh Xprit Crist gusanäjreni cadrotis sääreni nez lo reyubidzroga. Luxh con xcälärneebeni birii nis loj guilajga, Crist najc si'c guilaj ni huinäreni. ⁵Dios bidxech-näj xhidajlreni, ni'c xhidajlreni gujt nez lo reyubijdzga.

⁶Guiraa rediidxga najc te yärlulijdx loonu, te na'c guichaglajznu jiennu lagajc redojl ni bejn retoxtadgoldoonu. ⁷Na'cza

gantu rebanäjb si'c ni bejn baltireni; acaj lo rexquijtz Dios xcuentreni: "Rebejn ni guyaa lajz gurejreni te gu'reni, gudajwreni, dxejctiru huisurenri te gusloj caguijtreni." ⁸ Na'c chunäjnu stee bejn di gac chäältu si'c bejnreni, ni'cni gujt galbichoŋ milreni tejtis dxej. ⁹ Na'cza guche'chnu Dios con rextojlju si'c bejn balti rebejnga, ni'cni gujtreni sa'csi gudauya' bälreni. ¹⁰ Na'cza chamojntu xcient ni rujn Dios si'c ni bejn rebejnga xcient ni bejn Dios, ni'cni baxhal Dios angl xten yälgujt bagu't xhidajlreni.

¹¹ Guiraa redee gusaſc retoxtagdgoldoonu te rulijdxni nuurnu, cuajzareni lo guijtz te gului rediidxga nuurnu xho riäjl jienmu, nuurnu ni nabajnunen redxej naj. ¹² Ni'cni chutis ni rujn xhigab nabansa'cni nez loj Dios, sudzu'tzni te di jiabsaci. ¹³ Xheti te trabajw ni cadejdtu nani gajd ted chutis bejn. Niluxh di Dios cuälaztu, dini gusaan tredruti dzunduxh nani digacdi guntu huant, suniidx Dios yälnadip yälnadaan lojtu te che tedtu trabajw sidxältu xho guibicajtu lo dzunduxhga, te gutiplajztu.

¹⁴ Ni'cni rniä lojtu, rebetzä nani sanälazä, colbicaj lo yälrain xten rebanäjb. ¹⁵ Rniä lojtu si'c lo te ben nasin, te beñnajn: colgulatzsa'c rextidxä don la laaca najcreni. ¹⁶ Che rdaunu xchej xten Dad Jesucrist na-jcni te seen nabañänänu Jesucrist. Che rdunnu nen co'p, rnaalajznu gudijx Dad Jesucrist xtiejnni xcient xtojlu lo crujz. Che rdaunu yätxtiil, sälöjni anajcnu tejtis xcient tiejxhni ni badeedni cuaj lo crujz xcientnu. ¹⁷ Sa'csi yu' tejtis yätxtiil, mase najcnu xhidajl, najcnu si'c tejsi tiejxh sa'csi tejsi yätxtiil rdaunu che rauxchejnu xchej xten Dad Jesucrist.

¹⁸ ¡Bahuui xho rujn rexpejñ Israel! Rjawreni xpääl reguidxa ni rile'creni lo Dios lo dxan nen guidoo, ni'c najcreni tejsi con guiraa rebejn nani rujn sigajc rujnreni. ¹⁹ ¿Xhixhni'c rlazaä guiniä, naj? ¿La caniä yu' xhi sajc gojn nani gule'c bejn lo banäjb, ä? O jla yu' xhi sajc banäjbga, ä? ²⁰ Xhet sajcdireni. Narä caniä lojtu dee: Recos nani rbe'c rebenzijt lo rebanäjb, lo rebendxbab cabe'crenini, et lodji Dios. Luxh narä dina rlazaä gactu tejsi con rebejn nani rbe'c lo rebendxbab, te di chachunäjzatu rebendxbab.

²¹ Sa'csi digacdi yätu co'p ni rusnaj laaznu

ni bejn Dad Jesucrist lo crujz nägajcza co'p nani rudedreni lo rebendxbab. Digacdzida guidaunu xchej xten Dad Jesucrist nägajcza xchej ni rudedreni lo rebendxbab. ²² O jla rlajznu guche'chnu Dad Jesucrist, ä? ¿Xhixh maaazu nadipnu lojnu, ä? ¡Gurniä lojtu!

Colyejn guira'ti te chä'p xpala'n Dios

²³ Gulicani, sajc jiennu xhitis ni rlajznu jiennu, niluxh xhet guira'ti ni rlajznu jiennu najc hueen par nuurnu. Guira'ti najc laaca, niluxh yu' reni di gacnäj gustioobnu lo xcärlilajz Dios. ²⁴ Na'c guntu xhigab quiiltistu lagajc xcälnasa'ctu; maaazu hueen quilzatu xcälnasa'c xpisintu. ²⁵ Coltajw xhitis bääl ni rdo' lo guii, na'c guiniabdi-idxtu caro siäändni te di gacnaj xcäriejntu. ²⁶ Lo xtidx Dios caj rediidxre: "Sa'csi guideb guedxliuj näjza guiraa ni tre' lo guedxliuj najc xten Dios."

²⁷ Palga jiädgajñ te bejn ni di chalilajz xtidx Dios luj jiätaunäjluni luxh acuäjblu chäälu, huijza, gudaw xhitis ni cue'cni nez lojlu, na'c guiniabdiidxlu te di gacnaj xcäriejnlu. ²⁸ Palga yu' chu naa lojlu: "Dee najc bääl ni bile'cnu lo rebanäjb", na'c gauluni, didi gunni gunijt dade'ga ni gunii si'c lojlu te di gacnajza xcäriejntu chutis. ²⁹ Dina guiniä xcäriejnlu, didi gunnajni xcäriejntu stee dade'ga; mbaj naj, ¿xhiciunt riäjl gula'tzreni narä sa'csi rajc runä guira'ti porsi racnaj xcäriejntu ste'ca bejn, ä? ³⁰ Palga rudedä xquixtios lo Dios nani runiidx xhi rauä, ¿xhiciunt rniyajreni narä ni rauä, luxh abadedä xquixtios lo Dios? ³¹ Ni'cni palga gautu, o palga yätu o xhitis ni rujntu, colyujn guira'ti te chä'p xpala'n Dios. ³² Na'c guche'chtu nicla rex-pejñ Israel niclaza rebenzijt, niclaza rex-pejñ xquidoo Dios. ³³ Sigajcza runä narä, runä guira'ti ni ruspaa lajz rebejn, dina quilä xcälnasa'catis, alga rguilä xcälnasa'c xhidalduxh bejn, te laareni lo dojl sa'csi ahuililajzreni xtidx Dios.

11

¹ Colyejn si'cni runä narä, sigajcza narä runä si'cni rujn Jesucrist.

Xho riäjl gun regunaa nen xquidoo Dios

² Rliä'pä xpala'ntu sa'csi lo guira'ti rnajlajztu narä, rnajza lajztu rediidx nani baluiä lojtu, sudzu'tztu rusooobtu rediidx sigajcni

baluiäreni lojtu. ³ Narä rlazä gacbeepactu Jesucrist najc nani rnibee lo nigui, dxe-jctiru niguii rnibee gunaa si'c rnibee Dios Jesucrist. ⁴ Chutis te nigui ni yu' xhum-breel yejcnii lajni cabedx-canabni lo Dios o lajni caguluiini xtidx Dios, laani rusanxtujnyi yejcnii. ⁵ Palga yu' te gunaa ni dini gusäu xpäiini yejcnii che cabedx-canabni loj Dios o che caniini xtidx Dios, rusanxtujnyi yejcnii sa'csi najcni sigajc najc te gunaa ni abigaj yejcnii. ⁶ Palga di te gunaa gusäu xpäiini yejcnii suguigaj yejcnii. Palga najcni te xtuyj guigaj yejcnii, sugusäuni xpäiini yejcnii. ⁷ Di guchaag gusäu te niguii yejcnii sa'csi najcreni si'c xtuxh Dios, näjza xcälrdimbicha' Dios. Niluxh regunaa najc si'c xcälrdimbicha' niguii. ⁸ Sa'csi di niguii nirixtiej cuä' gunaa; gunaa najc ni birixtiej cuä' niguii. ⁹ Xhetza xcient gunaadi guc-chee niguii; gunaa najc ni guc-chee xcient niguii. ¹⁰ Ni'cni nanab jiäu yejc gunaa nen guidoo si'c te seen lo rexangl Dios yu' chu rnibeereni. ¹¹ Niluxh nez lo Dios nicla niguii nclaza gunaa digacdi guiban xtebreni. ¹² Sigajc galoo birixtiej gunaa cuä' niguii, sigajcza naj gunaa najc nani ruu báz; luxh Diostis najc nani runchee guira ti rebejn.

¹³ Colyejn lagajc xhigabtu naj, žla laaca najcni cuedx-guiniab te gunaa lo Dios lal ni xhet niäudi yejcnii, ä? ¹⁴ "Loj reben quedxliuj guiraa reniguüi rgaj yejcreni, sa'csi najcni te xtuyj guigaduxh xquidxejcreni. ¹⁵ Niluxh regunaa huegan najc rga' xquidxejcreni te rusäuni yejcnii. ¹⁶ Palga yu' chu tildidx xcient rediidx nani caniä lojtu, nanab gacbeeni si'ctis riennu, si'ctisza rujnreni nen guiraa rexquidoo Dios.

Xho ruxhiñreni xchej Dad Jesucrist

¹⁷ Rediidxre ni cagucuaä lojtu, direni guiliä'p xpala'ntu, sa'csi che rdxagsa'tu nen xquidoo Dios, lacuua laaca cuetu, xhet laadi rujntu. ¹⁸ Rnixgaä dee: Abiejn di-agä che re'tu lo xquidoo Dios, rlia'tu lo sa'tu rajctu tiop cuua; luxh riliica lazä rediidxre. ¹⁹ Pet naatu nanab guntu si'c te gacbeetu churenii'c sanälajzpac Dios, churenii'c sajcru lo xtzun Dios. ²⁰ Ni'cni che rdxagsa'tu, dini gac te cuetu lo xmex xchej Dad Jesucrist, ²¹ sa'csi che agule'creni xchej lo mex, tejga bejn rlajz xcaxgaa xhi gauni,

dxejc yu' reni agudxadoo xque'reni, agusojjzzareni, lalni yu' stee cuaa bejn calaan, gajdreni gau. ²² ¿Xho mood? ¡La xheti rolijztu cadro gac gautu, yätu, ä? O ¡la rbälazlu xquidoo Dios, ni'c rusanxtujyu rebejn ni xhet räjpdi, ä? ¡Xhini'c guiniä lojtu naj? ¡La naatu guiliä'p xpala'ntu xcient nani rujntu, ä? ¡Gurniälojtu guiliä'p xpala'ntu!

Xchej Dad Jesucrist

(Mt. 26:26-29; Mr. 14:22-25; Lc. 22:14-20)

²³ Baluiloj Dad Jesucrist loä lagajc nani baluiä lojtu xcient xho bejnni guxhijñ che gudaunäjni rexpejnni te xchej xten pascw, guxhijñ ni gudo'ni. Cua'ni yätxtiil, ²⁴ dxejc che abadeedni xquixtios lo Dios, gula'ni yätxtiilga, räjpni lojreni: "Colgajw, dee najc tiehä ni gudedä guet xcienttu. Scree guntu te guinalajztu narä." ²⁵ Si'cza ben-näjni co'p che gulujx gudajwreni, räjpni lojreni: "Ni yu' neq co'pre najc si'c xtienä; che ju'treni narä, sixe' xtienä xcienttu, si'c te seen xten didxcoob ni gusa'n Dios loj rebejn ni aguleni. Scree guntu te guinalajztu narä." ²⁶ Che gautu yätxtiilga, che yätu nen co'pga, ruluiosactu xhi bejn Jesucrist che gudijxni xcient rextojlnu lo crujz; si'cza colyujn dxejli ni guibisacni lo quedxiujre.

Xho räjyl gac xchej Dad Jesucrist

²⁷ Ni'cni rniä lojtu, chutis tejt tu ni rajw yätxtiil, ni rä'za co'p xten xchej Dad Jesucrist, palga dini gusoob xtidx Dios, rujnni dojl, najcni si'cni lagajc laani bagu't Jesucrist, baxhe'zani xtiejnni. ²⁸ Niluxh sugula'tz tejgatu lagajc lastooni don la yu' xhi dojl bejnni, dxejcti sajc gauni yätxtiil, yäni co'p xten xchej Dad Jesucrist, sa'csi abaxhobdojlni. ²⁹ Chutis bejn ni gau, ni yä xchej Dad Jesucrist, luxh dini gula'tz lagajc lastooni xhicuent gauni, yäni xchej Dad Jesucrist, lagajc laani rujnni jiajb xcälnaj Dios yejcnii. ³⁰ Ni'cni lacti resa'tu racxhuu, xhet nadaanreni, luxh yu'zareni aguj. ³¹ Ni'cni nanab finu xho najcnu, guiniabnu lo Dios gudzucajni rextojlnu te didi tednu trabajw. ³² Niluxh che rdejdnu trabajw, rdejdnu ni te na'c tednu trabajwduxh si'c ted reben quedxiuj che gacreni yälguxhtis xten Dios.

³³ Ni'cni rniä lojtu, rebetzä, che guire'tu te gautu xchej, colcuüjz resa'tu. ³⁴ Palga yu' chu tejt tu ni calaan, sugauni lagajc rolijzni, te di gun Dios yälguxhtis lojtu. Guiraa

rexhistee cos, che jiälä ro'c fiä don xho gacsa'cni.

12

Dzuun ni rudedd Sprit Dzan xten Dios lo tejga ni rililajz

¹Rebetzä, rlazä gacbeetu xcuent dzuun ni rudedd Sprit Dzan xten Dios lo tejganu.

²La'tu najntu che gajdtu chalilajz xtidx Dios, rajntu chutis banäjb ni di gacbee, ni naatis bejn gantu. ³Ni'cni rlazä gacbeetu naj, nicla tejtu ni yu' Xsprit Dzan Dios nen lastooni sajc guinii: "Xhet sajcdi Jesucrist." Luxh rut rajcdi rnii: "Jesucrist najc Dadbid baxhuaannu", palga di Xprit Dzan Dios cuääz nen lastooni.

⁴Mbjaj naj. Yu' xhidajl dzuun ni rudedd Dios loj rebejn ni huililajz xtiidxní, niluxh teysi najc Xsprit Dzan Dios ni rujn dzunga nen lastoo guiragajcnu. ⁵Yu'za balti cuaa dzuun nani riennu, niluxh teysi najc Xtadbíd baxhuaannu. ⁶Yu' xhidajl mood rajc dzuun, niluxh teysi Dios rujn dzunga lastoo guiralii bejn. ⁷Tejga bejn ruliloj garen-garen xtzuun Sprit Dzan xten Dios, niluxh guira'ti redzuunga najc te gac-näjreni guiraanu. ⁸Lo tej bejn rudedd Sprit Dzan yälñasin, lo steeni rudedd lagajc Sprit Dxanga yälñajn. ⁹Lagajcza Sprit Dxanga rudeddzani yälrlilajzro lo tejni, dx-ejc lo steeni rudeddza lagajc Sprit Dxanga yälñibee te rusiacni yälracxhuu. ¹⁰Loj stee bejn rudeddzani yälñibee te gunni milaagwr, loj stee bejn rudeddní yälriem-bee te sajc guinixgaani xcuent recos ni churu gac; lo steeni rudeddní yälñasin te gumbeeni chu najc Sprit gulipac, näjza chu najc sprit ni rusguee. Lo stee bejn rudeddzani guiniini garen-garen redidxsaj; loj stee bejn rudeddzani yälracbee te rajc rnii loonu xhini'c gunii bejn ni rnii garen-garen redidxsaj. ¹¹Niluxh teysi najc Sprit nani rujn guiraa redzuunre, racnäjni rujn tejganu xtzuunni si'ctis ni rlajzni.

Guiraanu najcnu te la' teysi tiejxh

¹²Sigajc ni najc tiejxhnu teysi, mase yu' xhidajl la' xtelli, tejgareni te la' teysi tiejxh, sigajcza najc rebejn nani huililajz xtidx Jesucrist. ¹³Guiraanu, mase najcnu rexpejn Israel o ben griegw, mase najcnu mos o mastr, gurobnisnu con laj Sprit Dzan che huililajznu xtidx Dios, te gujcnu si'c

teysi tiejxh, luxh teysi Sprit Dzan xten Dios biädläjz nen lastoonu.

¹⁴Sa'csi tiejxhnu dini gac teysi la', na-jcni balti la'. ¹⁵Paru naa ni'nü: "Sa'csi dina gacä te naa, ni'cni dina gacä te la' tiejxhre." ¹⁶Xhixh porsi ni'c dini gac tla' tiejxhga, ä? ¹⁷Gurniälojlu! ¹⁸Palga diajgnu naa: "Dina gacä te baloj, ni'cni dina gacä te la' tiejxhre." ¹⁹Xhixh porsi ni'c dini gac tla' tiejxhga, ä? ²⁰Gurniälojlu! ²¹Palga guideb tiejxhni niajc te baloj, xhi cojn niejn diajgn? Palga guideb tiejxhni niajc te diajgn, xhi cojn chuxhi'ni? ²²Mbjaj naj, ni'c basoob Dios guiraa rela' te guc-chee tiejxhnu si'ctis ni rlajzni gacni. ²³Paru niajc guidebni si'c tejtis la'ni, xho niajcpcamni te tiejxhni dxejc? ²⁴Niluxh naj ensilaani yu' xhidalj la' te najcni teysi tiejxhni.

²¹Te balojnu di gac gäbni lo naanu: "Dina guiquinälu", niclaza bitiuyejcni di gac gäbni lo ni'ni: "Dina guiquinälu."

²²Chucala lapacreni rquiuiru nani ruzeñ lascanu xhet sajcdireni. ²³Luxh retla'ga nani rchalonu guxii sajcreni, rem'i cmaazru sajc. Luxh remi rtuinäänu, niguui sigajc gunaa, rem'i c riapdarunu. ²⁴Biältla sgaii la' tiejxhnu nani rlui saruru, rem'i c di guiquiin gapdanuni. Niluxh abenchee Dios tiejxhnu si'c, te gapdaru bejn retla' nani lascanu guxiiru sajc. ²⁵Bejnni si'c te di chu yälrdijl lo retla' tiejxhnu, te guiraa retla'ga gacnäj sa'reni. ²⁶Ni'cni che et laadi yu' te la' tiejxhnu guidebni ru' et laadi. Sigajcza che guiliä'pnu xpala'n te la' tiejxhnu, guideb tiejxhnu rbalajz.

²⁷Ni'cni guiraanu najcnu si'c tiejxh Jesucrist. Tejganu najc te la' tiejxhni.

²⁸Luxh abadeed Dios yälñibee lo tejganu lo xquidooni te gunnu xtzuun-xtzuunni.

Ganidtoo guleni repeat; ni rojpga gu-leni rebejn ni rnii xtidx Dios; ni riojnga, guleni rebejn ni ruseed; dxejeti guleni remi lagwr, remi rusiacj beñracxhuu, remi racnäj, remi rnii garen-garen redidxsaj. ²⁹Et guiraadi rexpejn Jesucrist najc apost. Et guiraadizareni rnii ireni xtidx Dios. Et guiraadireni rajc ruseed. Et guiraadizareni rajc rujn remi lagwr. ³⁰Et guiraadireni rajc rusiacj beñracxhuu. Etza guiraadireni rajc rnii garen-garen didxsaj, et guiraadireni rajc rnii xhi sáloj redidxsajga. ³¹Nanab guideb

lastootu rlajztu guniidx Dios reyälrnibee ni najc maazru hueen lojtu. Niluxh narä guluiä lojtu te nezyuj ni najc hueenru loj guiraareni.

13

Yälisanälajz

¹ Palga guiniä guiraloj xtidxsaj rebejn, o xtidx rexangl Dios, luxh dina chanälazä rebejn, rubejtis xtidxä si'c te tamboor o te platii. ² Palga sajc guiniä xtidx Dios xcuent recos ni churu gac, luxh racbesa'cä guiraa recos xhiga'tz xten Dios, näjza guiralii yälناسىن xten quedxliujre, palga rapä yälrlilazduxh te gacgapä lo redajnre, "colguibacj", luxh rbicajreni, niluxh xhet sanälazädi rebejn, rut naçadi. ³ Palga gudedä guiraa rexhixtenä nani rapä te gau rebejn ni xhet rajpdi; palga gudedä tiexhä te checni, luxh xhet sanälazädi rebejn, xlia'si gunä guiraa redzuuniga.

⁴ Rebejn ni rajp yälisanälajz cabäjzreni, najczareni bensa'c, direni säblajz xhi xten sa'reni, direni guschä'p lagajc xpala'nreni, direni gac guyalajz. ⁵ Direni gun recos ni di guchaag, dini quill xcälñasa'ctisni, dini guidxe'ch, dini jiu redojl ni rujn bejn lojni. ⁶ Nani rajp yälisanälajz dini guibalajz che rujn stee bejn dojl, alga rbaa lajzni che laaca rujn bejn. ⁷ Nani rajp yälisanälajz rujn huant xhitis cos, rililajzni hueen xcuent xhitis cos, sanuutis cabäjzni, rajc rdejdni xhitis trabajw.

⁸ Yälisanälajz dipacni nitloj. *„La rnireni xtidx Dios xcuent recos ni churu gac, ä? Sidzijn dxej sibäjz rediidxga. „La rajc rnii bejn garen-garen redidxsaj, ä? Sidzijn dxej siacdxi redidxsajga. „La yu' yälñajin? Sidzijn dxej sinitlojpacni. „Sa'csi naj guxiliä racebeenu, guxiliä xtidx Dios xcuent recos ni churu gac rajc rnii, ¹⁰ niluxh che jiädsac Jesucrist ni rajp guirali yälñajin, sinitloj xcälñandxucnu.*

¹¹ Che guçä biuux, guniä si'c biuux, benäza xhigab si'c biuux, niluxh che bidzunä lo yälbengol, gunitloj rexhigab biuux ni benä galoo. ¹² Sa'csi naj rhuijin si'c loj te guihuajn ni nacäjy, luxh che guibaññänü Dios xhaguiba, suhuisa'cnu si'cni ruhuij bejn che suga'ni loj sa'ni cahuiini. Naj racebeenu re'cti rec, niluxh dxejc sacbesa'cnu si'cpacni numbee Dios

nuure. ¹³ Niluxh naj ria'n yälrlilajz näjza yärbäzlajz, näjza yälisanälajz. Lo guidxon redee, sajcru yälrinälajz.

14

Renani rnii rediidx

¹ Ganiddoo colquwil yälrinälajz, colnabza lo Dios te guniidxrundi xhi stee dzuun, niluxh colyejnrü te xca'tu yälrnibesa'c te gusule'tu xtidx Dios. ² Che rnii te bejn garenca diidx ni di rebejn gacbee, rnini lo Diostis, et lojdi rebejn, sa'csi rut racbeedi xtiidxni, mase caniini cosro, cosxhiga'tz nani ruluii Sprit Dxan xten Dios guiniini. ³ Niluxh bejn ni rusule' xtidx Dios, rustioobni xcärlilajz bejn ni rulidxn, ruspanni lajz nani rac-huin lajzni. ⁴ Che rnii te bejn garenca didxsaj ni rut racbeedi, lastootisni rustioobni, niluxh bejn nani rusule' xtidx Dios xcuent recos ni churu gac, laani rustiobruni lastoo guiraa rebenguidoo.

⁵ Narä rlazä maläii rajc rnii guiraatu garen-garen diidx, niluxh hueenru gac gusule'tu xtidx Dios. Maazru sajc nani rajc rusule' xtidx Dios loj nani rnii garenca diidx palga di gacdi gusule'ni lo rebejn xhini'c caniini. ⁶ Mbaj naj betzä, che jiälä lojtu, palga guiniä garenca diidx lojtu, xhi gac-näjni la'tu? Hueenru guiniili xcuent te cos ni abaluiloj Dios loä, o xcuent te yälñajin, o xcuent te xtidx Dios, o xcuent te yälrluluii.

⁷ Ni ruhuijin xho najcza reinstrument ni rol bejn si'c te bizej, o te harp; palga di bejn golsa'creni, xho jiennu gacbeenu xhi dij cayolreni, ä? ⁸ Sigajcza lo guerr, palga direni goł cornet dippac, xho gacbeereni agojl chatijreni, ä? ⁹ Sigajcza la'tu, palga ditu guimisa'c didxsaj nani racbee bejn, xho gunreni gacbeereni xhini'c caniili, ä? Xlia'si guiniili, lo bejtis sää xtiidxlu. ¹⁰ Yu' xhidalduxh didxsaj lo quedxliuj, luxh xheti tejini nani xheti xnejzni. ¹¹ Niluxh palga dina gacheä didxsaj ni rnireni loä, næä si'c te benzijt loj nani canii loä, sigajcza sajc nani caninäj narä. ¹² Ni'cni la'tu ni rlajztu xca'tu yälrnibee xten Sprit Dxan te guntu xhi redzuun, colguejs, colnab lojni xhidajl dzuun te gacnäjtu tioobru xcärlilajz rex-pen guidoo.

¹³ Ni'cni palga yu' te bejn ni rnii garenca didxsaj, suguiniabni loj Dios yälrnibee te

gac gusule'ni diidx ni rniini lo rebejn.

¹⁴ Palga cuedx-guiniabä lo Dios con te didxsaj ni dina gacbeä, lastoäitis ni calä'p xpala'n Dios, niluxh xcäriena xhet cay-acbeedini. ¹⁵ ¿Xho ricajni dxejc? Siniab xspritä näjza xcäriena lo Dios; sol xspritä näjza xcäriena dij. ¹⁶ Palga dini gac si'c, xsprittislü calä'p xpala'n Dios con ste'ca didxsaj, niluxh bejn nani cacuadiag di gacdi gacnäjnilu guiliä'pni xpala'n Dios, sa'csi dini gacbee xhini'c rniilu.

¹⁷ Hueencaza calä'plu xpala'n Dios, per stee bejnga dini tioob loj yälrlilajz. ¹⁸ Rudedä xquixtios lo Dios maaazru rajc rniä garen-garen diidx loj guiragajtu. ¹⁹ Niluxh nen guidoo maaazru rlazä guiniä con xcäriena gaiitis diidx nani gaceetu, nani gului la'tu, loj tzuu mil diidx nani guiniä con xspritä ni ditu gacbee.

²⁰ Rebetzä, na'c rujntu xhigab si'cni rujn rebiuux, xcuentis cosgуйdx nanab gac-nayatu si'c biuxbäz, per colyejn xhigab si'c te bengool. ²¹ Scree caj lo xleii toMoisés: "Mase guiniä lo rebejn con garencu diidx näjza xtidx benzijt, nicla si'c direni gucuadajg xtidxä", naj Dad baxhuaannu. ²² Ni'cni regaren-garen didxsaj najc si'c te seen lo renani gajd chalilajz xtidx Dios, et lojdi rebejn ni arililajz xtidx Dios. Niluxh yälrusule'xtidx Dios xcuent recos ni churu gac, ni'c najc te seen loj renani ahuililajz xtidx Dios, xhet lojdi renani gajd chalilajz xtidx Dios. ²³ Palga re'tu nen guidoo dxejcti caniitu garen-garen diidx ni rut racbeedi, dxejc guiduzjuñ tej ni di gan xtidx Dios, siniini guiraatu rajc yejctu. ²⁴ Palga re'tu neñ guidoo, dxejcti guiraatu cagusule'tu xtidx ni baniidx Dios lojtu, che jiu' tej ni di gan xtidx Dios, sacbeeni xhini'c caniitu, sacbeeni yu' xtojlni, ²⁵ sienloj rexhigab xhiga'tz ni yu' nen lastooni, dxejcti siabrojlni suzuhijbni lo Dios, siniabni lo Dios, siniizani guliipacni suga' Dios galäiit.

Colyejn guira'ti xnez-xnejzni

²⁶ ¿Xho ricajni naj, betzä? Che guire'tu neñ guidoo suxca' tejgatu tebgaj te salm, te xtidx Dios ni guluiini, te diidx ni baluiloj Dios lojni, te diidx con garencu diidx, näjacza te ni gusule' xhi sáloj diidxga. Colyejn guiraai ni rujntu te tioob xcärlilajz renani ahuililajz xtidx Dios. ²⁷ Palga yu' re-nani rniin con garencu diidx, suguinii tio'p-

chon bejn, niluxh tebgajreni, dxejcti su-gusule' steeni xhi sáloj ni rniin tejgareni.

²⁸ Palga rut rajcdi gusule' rediidxga, na'c guiniireni con garencu diidx neñ guidoo, suguinixtebreni lo Dios. ²⁹ Si'cza renani rusule' diidx ni ruded Dios lojreni, suguinii tio'p-chon bejn, niluxh tebgajreni, te cuadiajg stiop xchoñreni donnu la laaca caniireni. ³⁰ Palga gululoj Dios te cos loj te bejn ni sobga' cacuadijg, succuedxisi-jcni, dxejcru suguinii. ³¹ Sa'csi guiraatu sajc gusule'tu tebgajtu diidx ni baniidx Dios lojtu te gac guisieedtu, te tioob lastoo guiraatu lo yälrlilajz. ³² Ruded Sprit Dhan xten Dios yälhnaj loj reni rusule' diidx ni ruded Dios lojreni te acanajnreni che riäjl guiniireni o che riäjl cuedxiren, ³³ sa'csi Dios najc te Dios ni rujn guira'ti xnejz-xnejzni, dini gun biey, niluxh rbecdxini lastoo bejn neñ guiraa reguidoo xten rebejn ni ahuililajzpac xtiidxni. ³⁴ Sucuedxi regunaa neñ reguidoo, sa'csi di gacdi gusule' te gunaa xtidx Dios. Nanab gun-reni si'c caj lo leii gunreni, gucuadaj-greni xtidx Dios ni rusule' renigui lojreni. ³⁵ Palga rlajzreni gacbeerureni, suguinibadi-dixreni loj chäälni che guibi'reni rolijzreni, sa'csi sianxtuyu gunaaga palga guiniini neñ guidoo.

³⁶ Colgabee et la'ditu guläxtiejdito rex-tidx Dios, luxh etza xtebtis lojtu biäädni.

³⁷ Palga yu' tejtu ni rchalo rajc rniini diidx ni ruded Dios lojni, o palga rchaloni abadeed Xprit Dhan xten Dios te dzunro lojnu, sugacbeepacni dee: guiraa rediidx ni cagucuaña lojtu, rucuaäni sa'csi si'c gunibee Jesucrist gucuaäni. ³⁸ Palga yu' chu tejtu ni di chalilajz rapä xcälrnibee Jesucrist, rutza jiidu xtiidxni.

³⁹ Ni'cni, rebetzä, colyejnru te gusule'tu diidx ni runiidx Dios lojtu, na'c gudxo-juntu renani rniiza garencu didxsaj. ⁴⁰ Luxh guira'ti nani rujntu, colyensa'cni, xnejz-xnejzni.

huililajztu, palga sanuu sutijptu lojni, te di
xlia'si huililajztu diidxga.

³ Lojtu ganiddoo basule'ä rediidx ni
sajcru ni bisiedä, basule'ä xho gujt Jesucrist
lo crujz, bixe' xtiejnni te badzucajni
rextojlnu, sigajc ni caj lo xtidx Dios gac.

⁴ Basule'äza xho biga'tzni, dxejc ni rion
dxej guläs Diosni, gubansaci si'cni caj
lo xtidx Dios gacni. ⁵ Cheni gubansaci,
baluilojni lo Pedr, dxejctiru loj guitzubito'p
rexpejnpacni, ⁶ dxejcti baluilojni lo gabixh
gaii gayuu bejn ni tre' tejsi lajt. Xhidajlreni
nabansicj, niluxh yu'za reni agujt. ⁷ Dxejcti
baluilojni lo Jacoob, dxejctiru loj guiraa
reapost.

⁸ Dxejcti lultpac baluilojzani loä, luxh
alagudejd ruluilojni lo rexpejnni dxejc.

⁹ Narä guxiiru sacä loj guiraa reapost,
niclaza nungäjil cuälajreni narä apost
sa'csi basacsä rexpejñ xquido Dios.

¹⁰ Balasladuxh Dios narä, ni'c narä nacä
si'c ni nacä naj. Luxh et xlia'di balasladjzni
narä. Narä benäru dzuun loj guiraareni,

niluxh xhet narädi ni benä dzuun, sa'csi
xcälrulaslajz Dios cayacnäj narä. ¹¹ ¿Xhiru
najcni palga naräni o palga laareni? Empac
cagusule'nu xtidx Dios, luxh la'tu salilajztu
xtidxn.

Xho guibansac rebengut

¹² Mbaj naj, palga nuurnu cagusule'nu
diidx xcient ni gubansac Crist loj rebengut,
¿xhicuent yu'tu ni rnii, xheti yärlbansac
loj rebengut? ¹³ Palga xheti yärlbansac lo
rebengut, dxejc nicla Crist di nibansac lo
rebengut. ¹⁴ Luxh palga di Crist nibansac loj
rebengut, pxlia'si najc diidx nani basule'nu!
¡Xlia'siza najc xcälrililajztu! ¹⁵ Luxh et
ni'ctis. Abiga'nu sa'csi rusgueenu rni-
inu baspansac Dios Jesucrist loj rebengut,
luxh dini nuspansaci loj rebengut, palga
gulinii di bejn guibansac loj rebengut.
¹⁶ Niluxh palga di rebengut chäs, niclaza

Crist di nibansa'c lo rebengut. ¹⁷ Luxh palga
di Jesucrist nibansac loj rebengut, xhet
sajcdi xcälrililajztu, sanuutistu loj xtojltu.

¹⁸ Sigajcza agunijt rebengut nani huililajz
xtidx Jesucrist. ¹⁹ Palga naj ni nabajntisnu
loj quedxliujre cabääznu Jesucrist, lo guiraa
reben quedxliuj nuurnu najcnu rebejn ni
riäjl jiaduxtej guiraa reni ruhui loonu.

²⁰ ¡Per dini gac si'c! Guliipacni gubansac
Jesucrist loj rebengut. Laani guc ganid-
doo loj guiraa rebengut ni gubañsac, luxh
laani dini niejt par tejpas. ²¹ Sigajcni biääd
yälgujt loonu xcient tejtis niguui, sigajcza
biääd yärlbansac lo rebengut loonu xcient
tejtis niguui. ²² Sigajc xcient te niguui ni
laa Adán biääd yälgujt, sigajcza xcient
Jesucrist biääd yärlbansac loj rebengut.

²³ Tejganu xcient-xcientnu; Jesucrist gujc
ganiddoo, dxejcti guiraa reni najc rexpe-
jnni che jiädsacni lo quedxliujre, guiraareni
susponsacni. ²⁴ Che agujc ni'c, dxejcti siääd
dxe lult che gudedsacni yärlnibe lo Dios
Xtadni, che abadzujlni guiraa reyärlnibe,
guiraa reyälguxhtis, guiraa reyälmilagwr.
²⁵ Nungälpac guinibee Jesucrist cheni gunli
Dios gaan loj guiraa reni rdxe'ch lojni,
quixhnireni detz ni'ni. ²⁶ Lult ni rdxe'ch
lojni ni gunitlojni najc yälgujt. ²⁷ Lo
xquijtz Dios caj: "Agudixhni guira'ti detz
ni'ni te guinibeenireni." Che rniini si'c
huenliisi gacbee bejn di gadci guinibee
Jesucrist Dios, sa'csi Dios badeed lojni
xhini'c guinibeeni. ²⁸ Che acanibee Jesu-
christ guirali recos, dxejcti sudeedni guideb
yärlnibe loj Xtadni Dios, te xtebtis Dios
guinibee guira'tipac.

²⁹ Palga rujntu xhigab di bejn guibansac
loj rebengut, ¿xhi gun rebejn nani robnis
xcuent rebengut? Palga di bejn guibansac
lo rebengut, ¿xhicuent rutiobnisreni la'tu
xcuent rebengut?

³⁰ ¿Xhicuenta rdxunnu lo casionduxh
guira'ti or? ³¹ Rniliápac lojtu, rebetzä,
caläpä xpala'ntu xcient Jesucrist Xtadnu
ni cayun xtuunni lojtu. Ni'cni guniä lo-
jtu, guira dxej rguiilreni narä te ju'treni
narä. ³² Palga benä xhigab si'c te niguui
quedxliuj che bacuanää reniguii ni najc si'c
man nialajz lo quedx Éfeso, ¿xhi gaan benä?
Palga di bejn guibansac loj rebengut, do'o
jien si'c ni caj lo guijtz: "Do'o guidau, do'o
guidun, sa'csi guixee empac sejtnu."

³³ Na'c gusaantu gusgueereni la'tu, palga
sachaaglu lo benguijdx näjza luj sajclu
benguijdx. ³⁴ Basanij xcäriejnlu si'cni nanab
gunlu. Bascuäaz dojl ni rujnlu sa'csi yu'
balti bejn ni dipac gumbee Dios. Te guitu-
jytu ni'c rniä diidxre lojtu.

Xho guibansac rebengut

³⁵ Naj yu' reni rniabdiidx: "¿Xho rbansac bejn loj rebengut? ¿Xhoza gac tiejxhreni?" ³⁶ ¡Chip nayäällu! Che rbe'clu te binij, di gäjl guiliejn palga di xhobga guet, nalajznu, palga dini guechduu. ³⁷ Luxh che rbe'clu, dilu cue'c gäjlga si'cni rlajzlu gacni, alga rbe'clu xhob o triuu o ste'ca binij, ³⁸ niluxh Dios rujn rliejnni, rustioobni gäjlga, lo tejga gäjl rudeedni xpalaqjni o tiejxhni, si'ctis ni rlajzni. ³⁹ Xhet guiraadi retiejxhreni najc tebloj. Yu' bää'l xten bejn, yu'za bää'l xten reguidxxaa, yu'za bää'l xten reman xhaguibaa, yu'za bää'l xten rebäjl. ⁴⁰ Sigajcza yu' tiejxh rebajl xhaguibaa, tiejxh rexten quedxliujre. Niluxh yälrdimbicha' xten rebajl xhaguibaa najc tej, dxejc yälrdimbicha' quedxliuj najc ste'ca. ⁴¹ Bicha' xte gubijdx najc garen lo xten bää'i, sigajcza xpicha' rebal xhaguibaa najc garen-garena lo sa'reni. ⁴² Sigajcza yälrbansac loj rebengut; che guet bejn rga'tz tiejxhni luxh rujdixni, rnitlojni. Luxh che guibansacni loj rebengut, garencia gac tiejxhni, diruni gudx, anabajnni par tejpas. ⁴³ Che rga'tzni, rujn bejn xhigab xhetru gacnäjdi tiejxhga, niluxh che guibansacni, lacti sacru, lacti sajc tiejxhga. Che rga'tzni, xhetru sajcdi gunni, luxh che guibansacni, anadip-duxhni. ⁴⁴ Che rga'tz tiejxhnu, najcni xten quedxliujre, luxh che chänsi najcni te tiehxcoob ni runiidx Dios. Ni'cni yu' te tiejxhni ni siääd lo quedxliuj, yu'za te tiejxhni ni siääd xhaguibaa.

⁴⁵ Si'cza caj lo xtidx Dios: "Nigui galoooga ni laa Adán, bejn Dios gujcni te ben nabajn." Niluxh Adán ni biääd lult, Jesucrist najc Sprit ni runiidx yälhaban-coob loonu. ⁴⁶ Ganid najc yälhabajn xten quedxliujre, dxejtiru yu' te yälhaban-coob xhaguibaali. ⁴⁷ Sigajcza nigui galoooga najc ben quedxliujre, niluxh ni roj nigui ni biääd najc ben xhaguibaali. ⁴⁸ Benchee Dios Adán con yuj, najcni ben quedxliuj. Xhaguibaali biääd Jesucrist, najcni ben xhaguibaa. ⁴⁹ Sigajcni najcnu si'c ben quedxliujre, sigajcza sajcnu sigajc najc bejn ni yu' xhaguibaa.

⁵⁰ Naj guiniä rediidxre lojtu betzä, di gac ted tiejxhnu ni najc bää'l näjza rejn xhaguibaa cadro yu' Dios. Tiejxhnure nani sinitloj di gadiza xca'ni stee tiejxh ni najc par tejpas. ⁵¹ ¡Colhuii! Rlazäza

gacbeetu te didx-xhiga'tz; xhet guiraad-inu guet, niluxh sidxxaa guiraa retiejxhnu ⁵² tera't bätzule', si'c cheni rdinya' guzii, che jiel lult trompe't, dxejc sibañsac rebengut, säjsreni guideb tiehxcoobreni ni najc par tejpas. Luxh näjza tiejxhnu sidxxaa. ⁵³ Sa'csi tiejxhnu ni najc xten quedxliuj nanab guidxaani te ga'pnu tiejxhnu ni najc xten xhaguibaa, sa'csi tiejxhnu ni najc xten quedxliuj rejtni, niluxh tiejxhnu ni najc xten xhaguibaa di gacdi guetni, najcni par tejpas. ⁵⁴ Niluxh che tiejxhnu ni najc xten quedxliuj abidxaa te ga'pnu tiejxhnu ni najc xten xhaguibaa, näjza che tiejxhnu ni sajc guet abidxaa te ga'pnu tiejxhnu ni di gacdi guet, ni najc par tejpas, dxejc sisiojb xtidx Dios ni caj scree: "Yälgujt agunitloj sa'csi bejn Jesucrist gaan lojni. ⁵⁵ Yälgujt, ¿xho gac gunlu gaan naj, ä? Yälgujt, ¿Con xcälñayanlu naj, ä?" ⁵⁶ Xcälñayan xten yälgujt najc dojl. Xcälñabee dojl najc leii. ⁵⁷ Niluxh rdeednu xquixtios lo Dios, nani runiidx te yälrnibee loonu te jiennu gaan lo yälgujt xcient Dad Jesucrist.

⁵⁸ Ni'cni rebetzä ni sanälazduxhä, colchanuutis, colsudzu'tz lo xtidx Dios, na'c guidxajgtu guntu xtzuunni, sa'csi anancheetu xhet xlia'di najc dzuun ni runiidx Dios riennu.

16

Meel ni guire' par rexpejñ Dios

¹ Xcient meel nani guire' par rebe-jtznu, colyejnni sigajcni räpä gun reben rexquidoo Galacia. ² Casob dumingw, nala-jznu ganid dxej xmaan, tejgatu colcuää te meel yejc nani rujntu gaan neñ te xmaan, colcucheeni, te na'c gutie'tu meel che jiälä. ³ Te che guidzunä, guxhalä meelega, näjza tiop-chon guijtz chanä chutis bejn ni cuetu chasa'nni guedx Jerusalén. ⁴ Palga laaca cha'aza, sajcza chänäreni narä.

Xhigab ni bejn Pabl chääni bijaq

⁵ Guidzunä lojtu che agudedä reguedx Macedonia, sa'csi sidedä nejzga galoo ni jiälä ro'c. ⁶ Dxejcti pet siannää la'tu, pet saclaä, sidedä guiraa rebäi najl ro'c, te gac-näjtu narä che cha'a cadrotis cha'a. ⁷ Sa'csi di rlazä jiädhuiätu te ladejtzsi, rlazä jiannää la'tu xchejpac, palga gusaan Dad Jesucrist gunä si'c. ⁸ Niluxh sia'nä guedx Éfeso, te ro'c tedä lanij ni rusnaj lajz che biääd

Sprit Dyan xten Dios. ⁹Sa'csi ro'c yu' xhidajl
bejn nani rlajz guisieed xtidx Dios, niluxh
ro'c yu'za xhidajl reni rdxe'ch loä.

¹⁰ Palga guidzujn Timoteu lojtu, saru
colhuiini, te na'c chuni yärsia' laj ni
yunäjni la'tu, sa'csi cayujnni xtzun Dios
sigajc runä narä. ¹¹Na'c gusaantu chu tej
ni cuälazni, colcuecdxi lajzni, dxejc col-
gusunejzni, te jiädhuiini narä ree, sa'csi ree
cabäaznu laani con rebejtnu.

¹² Niluxh xcuent bejtnu Apolos, räpäza
lojni niäädpacni lojtu con rebejtnu, niluxh
di rlajzpacni niäädni naj. Per siäädcani
dxejtis ni gac jiäädni.

Rextixtios lult ni ruxhalni

¹³ Colsusin, colsudzu'tz lo yälrililajz xten
Dios, colyejin dzuun si'c niguii, colyajc ben-
daan. ¹⁴Xhitis ni rujntu colyejnni con
yälrinälajz.

¹⁵ La'tu rebetzä, anajntu xcuent rex-
famil Estéfanas, nani ganid huililajz xtidx
Dios nez reguedx Acaya, najntu xho rac-
näduxhreni rebejtnu nani huililajz xtidx
Dios ro'c. Naj rniabdukhä lojtu, ¹⁶colguoob
xtidx rebejngä, näjza xtidx guiraa rebejn
ni racnäj rexpejn Dios, ni rujnza xtzun
Dios. ¹⁷Rbalazä bidzujn Estéfanas, näjza
Fortunato, näjza Acaico, sa'csi laareni bejn-
reni par narä nani di niajcdi niujntu sa'csi
rutitu. ¹⁸Gulecdxireni lazä näjza lajztu,
ni'cni, jcoljiu sa' rebejngä!

¹⁹ Reben xquidoo Dios nez reguedx Asia
ruxhal xtixtios lojtu. Aquila näjza chäälni
Priscila näjza rebejn ni re' rolizzreni rux-
halzreni xtixtios lojtu. ²⁰Guiraa rebejtnu
ruxhal xtixtios lojtu. Colguinii tejgatu lo
sa'tu: "Xchan, gacnäj Dios la'tu."

²¹ Narä Pabl, ruxhalä xtixtios lojtu, lagajc
narä beräa reletrre.

²² Palga yu' chu teju ni di chanälajz Dad
Jesucrist, sunitlojni. ¡Dad Jesucrist, gudaa!

²³ Gacnäj xcälrlulaslajz Jesucrist guiraatu.

²⁴ Yälrinälajz ni rapä xcuent Jesucrist
suchunäjni la'tu. Sugacni si'c.

Stee Guijtz Ni Bacuua Pabl Lo Guidoo Xten Guedx Corinto

*Ni rojp guijtz ni bacuua Pabl lo guidoo xten
guedx Corinto*

¹ Narä Pabl nacä apost xten Jesucrist sa'csi si'c rlajz Dios te gusule'ä xtiidxni. Narä näjza Timoteu, ni najc bejtznu lo xtidx Dios, rucuaanu guijtzre lojtu rexpejn xquidoo Dios ni yu' guedx Corinto, näjza loj guiraa rexpejn Dios ni rbäjz nez guiraa reguedx Acaya. ² Rniabnu lo Dios ni najc Xtadnu näjza lo Dad Jesucrist, gacnäjreni la'tu, guscuecdxireni lajztu.

Trabajw ni gudejd Pabl

³ Guilia'pnu xpala'n Dios Xtag Jesucrist, nani rulaslajz nuurnu, nani rustoolajz nuunu. ⁴ Che rdejdnu trabajw, rbecdixini laaznu te rajcza rbecdixinu lajz renani cadejd trabajw con lagajc yärlbecdxilajz ni baniidx Dios loonu. ⁵ Sigajc ni rdedduxhnu trabajwdxh ni gudejd Jesucrist sa'csi rusule'nu xtiidxni, sigajcza rbecdixiduxh Jesucrist laaznu. ⁶ Palga rdeednu trabajw, najcni te gustolajz la'tu, te laatu lo dojl. Palga ruscuecdxi Dios lajznu, si'c rujnni te cuedxilajztu te guntu huant che teditu lagajc trabajw ni cadejdzanu. ⁷ Rinudzu'tz yärlrunloj ni rajpnu xcuent la'tu, sa'csi nadonnu palga rdejdnu lagajc trabajw ni cadejdnu, suscuedxi Dios lajznu sigajcni ruscuedxini laaznu.

⁸ Rebetzä, rlazä gacbeepactu lacti trabajwdxh bideednu nez reguedx Asia, tudxe'nsi dinu nien huant, sa'csi gudedcraj trabajwga, acasislinu. Trabawduxtejni, benä xhigab sujnni gaan, sugu'tni nuurnu. ⁹ Gulicanu, alabiennu xhigab sejtpacnu. Niluxh dee gusajcnu te bisieednu na'c chaliilajznu lagajc nuurnu, alga chaliilajznu Dios nani ruspansac rebengut. ¹⁰ Sa'csi Dios baslaa nuure lo yälgujtga, luxh sinuutis guslaani nuurnu lo yälgujt. Salilazduxhnu Diosre suslaaruni nuurnu, ¹¹ sa'csi cayacnäjtu nuurnu, cabedx-canabtu lo Dios xcuentnu. Dxejcti palga xhidajl bejn cabedx-canab lo Dios xcuentnu, xhidajlareni sudeed xquixtios lo Dios

xcuentnu xcuent xcälrulaslajz Dios ni baniidxni loonu.

Xhicuent di Pabl nj guedx Corinto

¹² Dee najc nani ruspaa laaznu: rbedxi xcäriejnnu, ni'c rului loonu laaca nabajjnu, con yälnadolajz riennu si'cni rniibee Dios; xhet sa'csi rajpnu xcälnajn reben guedxliujdi, alga sa'csi racnäj Dios nuure. Si'cpac nabajnu lo guedxliujre, luxh maazru che yu'nu lojtu. ¹³ Cacuaanu lojtu rediidx ni sajc gołtu, ni sajc gacbeetu, luxh cabäzä sacbesa'ctu guiragajc rediidx ni gucuää, ¹⁴ lagajc si'cni agucbeetu mase gaii xtiidxnu, cabäzä guibaa lajztu xcuent nuurnu, sigajcni guibaa lajznu xcuent la'tu nen dxej ni jiääd Dad Jesucrist.

¹⁵ Ni'cni ganiddoo benä xhigab niädhuiä la'tu te nibalajztu tio'p huält. ¹⁶ Nalajznu, benä xhigab nidedä ro'c che sa'a reguedx Macedonia, dxejcti stehuält cheni guibi'ä Macedonia, niädhuisacä la'tu ro'c te niacnäjtu narä te nia'a Judea. ¹⁷ ¿Xhaa dina niunsa'cä xhigab che benä xhigabre? ¿La rchalotu runä xhigabä si'c te ben guedxliuj nani runtiop lajzni, nani tejsi diidx rniini "sia'ä" nägajcza "dina cha'a", ä? ¹⁸ Dios guluii lojtu gulica rniä lojtu, dinu guinii tejsi diidx "sia'ä" nägajc "dina cha'a". ¹⁹ Xi'n Dios, Jesucrist nani bisule'nu lojtu narä näjza Silvan, näjza Timoteu dini guntio'p lajzni, dini guinii tejsi diidx "sunäni" näj "dina gunäni", niluxh laani guiraa xtiidxni najc "sunäpacni". ²⁰ Si'cza guiraa rediidx ni bia'n Dios loonu xcuent Jesucrist najcreni "sunäpacni"; näjza xcuent laani najcreni "sugacni si'c" par nuurnu, te chä'p xpala'n Dios xcuent nuurnu. ²¹ Dios cagusudzu'tzza nuure näjza la'tu lo xtidx Jesucrist, agulezani nuurnu te jienuu xtzuunni. ²² Abacuaazani xseenni loonu, ni'cni baniidxni Sprit Dxan xtenni te cuääzni nen lastoonu.

²³ Rbedxä loj Dios gacbeeni xhi yu' lastoä, guliipacni te diruna gutalä xcälnajtu, ni'c dina niälsacä guedx Corinto. ²⁴ Di rlajznu guinibeenu xho chalilajztu, alga rlajznu gacnäänutu lo dzuun te guibaa lajztu; guliipac agusudzu'tztu lo xcälrililajztu.

2

¹ Niluxh lagajc xcuent xcälnasa'cä benä xhigab dina jiädhuisacä la'tu che cayac-

huin lazä. ² Sa'csi palga narä siädyenä gac-huin lajztu, *č*chuni'c gun guibaa lazä? La'tistu, nani benä guc-huin lajzni. ³ Ni'cni lagajc xcient ni'c bacuaä lojtu, te che jiälä lojtu, di rebejn gunhuin lazä nani riäjl guspaä lazä. Luxh nancheä palga narä guibaa lazä, nägajc la'tu sibaaza lajztu. ⁴ Che bacuaä guijtzga lojtu, lacti xhigabduxh benä, binduxhä; xhet te gac-huindi lajztu, alga te gacbeetu yälsanälazduxh ni sanälazä la'tu.

Yälrusiäjl lajz ni yu' par nani bejn falt

⁵ Palga yu' chu tej ni cayujn cayac-huin lazä, xhet xtebtis lazä cayunhuinni näjza lajztu cayunhuinni guxii diidx guiniä sa'csi di rlazä guntu xhigabduxh. ⁶ Alabasacsiduxh xhidajl bejn dade'ga, na'cru gusacsituni naj. ⁷ Naj colsiäjl lajztu xcient xtojlni, colcuedxi lajzni didi gac-huinduxhtej lajzni. ⁸ Ni'cni rniabä lojtu, colchanälajz bejnre si'c ni huinälajztuni galoo. ⁹ Bacuaxgääza lojtu te gacbeä laa susoobtu xtidxä. ¹⁰ Naj renani jiäjl lajztu xtojlni, näj narä siäjl lazäni. Sigajcza narä, nani basiäjl lazä, palga yu' xhi basiäjl lazä, benäni xcient xcälnasa'ctu, nez loj Jesucrist, ¹¹ te di gun bëndxbag aan nuure, sa'csi anajnnu xho najc latsiaj ni rujn bëndxbag.

Guyu' Pabl yärsia' che bidzujnni guedx Troas

¹² Che bidzunä guedx Troas, te gusule'ä xtidx Jesucrist, bejn Dad Jesucrist rutliidi badxojndi narä, ¹³ niluxh guyuduxhä yärsia' sa'csi dina nidxälä Tito, bejtnu. Ni'cni basadidxgacäreni, sa'äti nez reguedx Macedonia.

Jesucrist rujn riennu gaan

¹⁴ Xquixtios lo Dios nani con Jesucrist racnäj nuurnu te dipacnu gunijt, empac ru-jintisnu gaan, luxh con nuurnu guiraa nejz rululojni xhi saru najc gumbeepac bejn xtidx Dios. ¹⁵ Sa'csi najczanu si'c te guxh xten yalnejxh xten Jesucrist lo Dios nez loj renani chalilajz xtidx Dios näjza nez loj rebejn nani canijt sa'csi naadireni chalilajzreni xtiidxni. ¹⁶ Loj reni di chalilajz xtiidxni, najcnu si'c te guxh ni rugu't, loj renani rililajz xtiidxni, najcnu si'c guxh xten yalnejxh ni rudeed yälnabancoob. *č*Chu laa ni racbee sa' recosga? ¹⁷ Sa'csi dinu gac

si'c najc xhidajl bejn nani rusule' xtidx Dios te gunreni gaan meel. Nuure rusulesa'cnu xtidx Dios sa'csi rinälaazpacnu Jesucrist luxh si'c ni gunibee Dios, si'c rusule'nu, rusule'nu diidx con xcälracnäj Jesucrist nez loj Dios ni cahuii xhini'c riennu.

3

Diidx nacoob ni basa'n Dios loonu

¹ Che rniinu rediidxga, *č*la rchalotu can-isacnu didksa'c lagajc xcientnu, ä? Yu'reni ca' guijtz ni rnii najcreni bejsa'c. *č*La rla-jzzatu guiluiin lojtu sa' guijtzga, o guini-abnu guntu sa' guijtzga xca'nu, ä? ² La'tu najc si'c xquijtznu ni rnii xho najcnu. Las-toopacnu acuajtu. Guiraa rebejn rajc rhuui xho huilajztu xtidx Dios sa'csi basule'nu xtiidxni lojtu. ³ Huenliisi rluiloj najctu si'c xquijtz Jesucrist, luxh nuurnu bizule'nu xtiidxni lojtu. Xhet con tintdi cuaj rediidxga, xhet lojdiza guij cuaj diidxga, Sprit Dyan xten Dios ni nabajn bacuaa rextidx Diosga, bacuaanireni lastootu.

⁴ Nadoncheenu redee, ni'cni xcient Crist dinu guidxejb nez loj Dios. ⁵ Di gaci jien xtebnu xhitis dzuun ni riennu, riennu sa'csi laa Dios ni racnäj nuurnu. ⁶ Laani runiidx yälnadaan loonu. Nuurnu najcnu mos xten xtidxcoobni ni bia'nni con nuurnu. Luxh didxcoobga dini gac si'c xlei toMoisés ni bacuaareni lo guij, sa'csi xleiini biädnä dojl, dxejc gujtnu. Niluxh didx-coobga ni rusule'nu biädnä Sprit Dyan xten Diosni, luxh runiidxni yälnabancoob loonu. ⁷ Leii baluui yu' xtoj_ bejn, riäjl guetreni. Xhidajl seen guyu' che bacuaa Dios rediidxga lo guij. Luxh di niajcdi nuuhii rexpejn Israel loj Moisés, bidxejbreni sa'csi rdimbicha' lojni, luxh sanuu cayuii yäldimbicha'ga. ⁸ Palga si'c gujc che biääd leii, aticaxh naj su'r u xcälrdimbicha' xleii Sprit Dyan xten Dios, ni najc rediidxcoob nani abasule'nu. ⁹ Palga xleii toMoisés ni baluiloj yälgujt xcient dojl biädnä yäldimbicha', aticaxh naj yu' xcälrdimbicha' xtidxcoob Dios ni rudzucaj dojl. ¹⁰ Naj dirunu fii xcälrdimbicha' xleii toMoisés sa'csi xtidxcoob Dios rdimbicha'ru par tejas. ¹¹ Palga yäldimbicha' nani biuui bianisesduxhni tera't, stee yäldimbicha're ne najc par tej-pas sidimbichasesduxhni.

¹² Luxh ni'c runiidx yälrbecdxlajznu, dipacnu guidxejb che rusule'nu xtidxcoob Dios. ¹³ Dinu gac si'c toMoisés, ni basäu tla' lajd lojni te di fii rexpejñ Israel cayui yälrdimbicha' ni guyu' lojni. ¹⁴ Niluxh bícájy xcáriejnreni; lo dxej najli che riel xleii toMoisés, najcni si'cni yu' xhi lajd rusäuu lastooren, rudxojn gacbeereni, te di chalilajzreni, xtidx Jesucristtis rajc rudzucaj lajdga. ¹⁵ Lo dxej najli che rolreni xleii toMoisés, najcni si'cni ruscájy te lajd xcáriejnreni. ¹⁶ Lo xtidx Dios rnii scree: "Niluxh che gusiechajz te bejn, gudzuréni nez loj Dad, sibicaj lajdga", nalajznu sacbeeni xtidx Dios. ¹⁷ Dad Jesucrist najc Sprit luxh cadro yu' Sprit xten Dios badzucaj Diosni lo xleii toMoisés. ¹⁸ Niluxh nuure dinu gusäu lajd lojnu, didi guscájyni xcáriejnnu. Nuure najcnu si'c te guihuajn cadro rdimbicha' xtuxh Dad Jesucrist, luxh chäi-chäi cadxaanu cayaçnu si'c najcni näjza caca'nu xcäldimbicha' Jesucrist, sa'csi si'c cayujn Sprit Dxan xtenni.

4

¹ Ni'cni sa'csi agule Dios nuure te gusule'nu xtiidxni, sa'csi balaslajzzani nuure, dipacnu jiäxhan. ² Ni'cni rbälaaznu recos ni rajc xhiga'tz, sa'csi rusanxtuyjereni. Dizanu gusguee, dizanu guchaa xtidx Dios, niluxh rniinuni si'cpaci najcni, te si'c rhuiji guiraa bejn rsiaapacnu lo xnezyuj Dios. ³ Niluxh palga yu' chu dipac gacbee rextidx Dios nani rusule'nu, najtisreni rebejñ nani ala canitloj par tejpas, ⁴ sa'csi abascájy bendxbab ni rnibee guedxliujre xcáriejnreni, si'cni rujnni lo rebejñ nani di chalilajz xtidx Jesucrist, te na'c fiireni xcäldimbicha' xtidx Dios ni rnii xcient xhanij xten Jesucrist, ni najc xtujxh Dios. ⁵ Che rusule'nu xtidx Jesucrist, dinu guiliä'p lagajc xpala'nnu, rliä'pnu ganaxtis xpala'n Dad Jesucrist. Nuure najcnu xmostu xcient Jesucrist. ⁶ Che benchee Dios guedxliuj, guniini: "Lo xcäjy suguirii te bajl ni gusanij." Lagajc Diosga abasanij lastoonu te baniidxni bajl ni najc yälriembee xcäldimbicha' Dios nez loj Jesucrist.

Xho guibañnu con yälrlilajz

⁷ Nuurnu najcnu si'c te guesyuj, xhet sajcdinu, niluxh guidxanu te yälناسادخ, ni najc xtidx Dios xcient Jesucrist, te guiluiloj xcälnasa'c xten xcälrnibee Dios lacuaa xhisi te yälnadipbáz xtenu. ⁸ Rdeednu trabajw guira nejz, niluxh dinu gunijt yälrunloj. Mase di jien xho jennu, dinu chu yärsia'. ⁹ Rusacsíreni nuure, niluxh di Dios cuälaznu, rguijnreni nuure, dizareni ju't nuure. ¹⁰ Cadrotis rionnu rusacsíreni nuure si'c basacsíreni Jesucrist, te si'c nej tiejxhnu gululojzani yälhabaçsac loj rebengut xten Jesucrist. ¹¹ Cadrotis rionnu rlajzreni ju'treni nuure sa'csi rusule'nu xtidx Jesucrist te si'cza nej tiejxhnu gululojzani xcälnabajn Jesucrist loj reben guedxliujre. ¹² Ni'cni rujn yälgijt dzuun loonu, per yälhabajn cayujn dzuun lojtu.

¹³ Sa'csi rajpnu lagajc xsprit xten yälrlilajzga, sigajc ni caj lo xtidx Dios: "Huililazä ni'cni basule'ä diidx." Sigajcza nuure, huililaaznu xtidx Dios, ni'cni rusule'nuni.

¹⁴ Sa'csi nadonnu lagajc nani baspañsac Jesucrist loj rebengut, lagajcza laani gun guibansacnu con Jesucrist te gunni sunäjnu la'tu nez lojni. ¹⁵ Rsiacnu guiraa ni rsiacjnu te xcientsi la'tu gudeedru bejn xquixtios lo Dios, te guiliä'pruzareni xpala'hni xcient yälrlaslaçz ni sanuutis care'ch lo xhidajl bejn.

¹⁶ Ni'cni dinu gunijt yälrunloj, per mase tiejxhre acayujxh, guixe-guixee cagustioob Dios spritnu. ¹⁷ Retrabaduw ni cadeednu lo yälhabajnre rdedgajcreni, niluxh rujnreni ga'pnu te yälrdimbichaduxh ni gajdnu guidon, ni najc par tejpas. ¹⁸ Dinu fittis renani ruzen lo guedxliujre sa'csi sinítloj reni'c, alga cayenloonu renani di guzen, sa'csi renani di guzen najcreni par tejpas.

5

¹ Arabeeenu tiejxhnu najc si'c te yu' xten xaimnu lo guedxliujre, sidzijn dxej sinítloj, nalajznu sejt tiejxhnu, suniidx Dios te tiejxhnu xten xhaguibaa nani di nitloj, nalajznu dini guet par tejpas. ² Gulicani, lajli dxunnu nen tiejxhre, rbedxnennu rdeednu trabajw, ni'cni rlajznu maläii agojl guidxaa tiejxh guedxliujre te xca'nu te tiexhcoob ni siääd xhaguibaa. ³ Te si'c che acua'nuni, diruni gac si'cni suxhabääl xaimnu, sa'csi abicoob

tiehxnu. ⁴ Lalni dxunnu neñ tiejxhre rbedxnernu, rdeednu trabajw, sa'csi di rlaaznu suxhabääl xaimnu, rlajznu gacwnu tiehxcoobnu, te tiejxhre nani cayejt, sidebnäjni tiehxcoob ni siääd xhaguibaa. ⁵Nani benchee nuure parpac dee najc Dios, lagajc nani runiidx Sprit Dyan xtelli loonu si'c te seen sujnpcamini.

⁶ Ni'cni dinu guidxeeb, sa'csi nadonnu lañni nabajñnu lo guedxliujre, di gacdi guibajñmu xhaguibaa loj Dadga. ⁷ Sa'csi nabajñnu xcuent nani rililajznu, xhet xcuentdi nani rajc rhuiuin. ⁸ Ni'cni rniä nabajñnu dinu guidxeeb, rchaloonu hueenru guisa'nnu tiejxhnu lo guedxliujnre, te choläznäänu Jesucrist xhaguibaa. ⁹ Ni'cni tejtis najc xhigabnu, palga lo guedxliujre o xhaguibaa, rlajztsnu jiennu renani gun guibaalajzni. ¹⁰ Sa'csi guiraanu riäjl suunu nez loj yagxhiil cadro gun Jesucrist yälguxhtis, te tejanu guica'nu xcuent nani biennu lo guedxliuj, palga dzunsa'cni, o palga dzunguijdxni.

Diidx xcuent yälrbecwdx lajzni

¹¹ Luxh sa'csi rdxejbnu (nalajznu rucuadiaagnu xtidx) Dad Jesucrist, ruliidxnu rebejn te chalilajzreni xtiidxn. Luxh Dios najn xho nabajñnu; maläii näjza lo xcäriejntu guluiloj xho nabajñnu. ¹² Dinu guiliä'p lagajc xpala'nnu lojtu stehuält, rni-inu rediidxga lojtu te guibalajztu xcuentnu, te ga'ptu xhi diidx gusejctu lo rebejn ni rchaglajtis ruhuii xho rien bejn, direni gacbee xhi yu' neñ lastooren. ¹³ Palga najcnu si'c bejn ni rajc yejcreni, si'c najcnu par Dios, palga najcnu si'c bejn ni nasa'c xcäriejnnu, najcnu par la'tu. ¹⁴ Sa'csi sanälazdugh Jesucrist nuure, ni'c rusooibtisnu xtiidxn, sa'csi nancheenu gujt tejtis par guiraanu, ni'c najcnu si'cni agujt guiraanu nez loj Dios. ¹⁵ Luxh Jesucrist gujt xcuent guiraa rebejn, te renani rililajz xtiidxn, na'cru guibajñreni xcuenttis laareni, alga guibajñpacreni xcuenttis Jesucrist nani gujt, nani gubaysac xcuent laareni. ¹⁶ Ni'cni nuure dinu fii lo bejn si'cni najcreni lo guedxliujre. Galoo biem-beenu Jesucrist si'cni gujcni che gubajñni lo guedxliuj, niluxh naj et si'cti riembee-nuni. ¹⁷ Ni'cni chutis bejn, palga rililajzni xtidx Jesucrist, sujnnini te bencoob, diruni

guichaglajz gunruni nani rajc lo guedxliuj, alga guichaglajzni gunni xtzun Dios.

¹⁸ Guiraa dee siääd lo Dios, nani basiäjl lajzni xcuent Jesucrist, dxejcti baniidxni loonu rediidx xcuent xcälrusiäjl lajzni te gusule'nu rediidxga, ¹⁹ nalajznu, nanab gusule'nu diidxre: Dios guyunäj Jesucrist, cagusiäjllajzni con reben guedxliuj, te xca'nireni, sa'csi diruni gudzuub xtojl reni ahuililajz xtiidxn lo xcuentreni. Dxejc gule Dios nuure te gusule'nu rediidxpacre lo rebejn. ²⁰ Ni'cni sio'pnu te guiniinu xtidx Jesucrist, najcni ascanu lagajc Dios can-abduxh lojtu che rniabduxhnu lojtu, col-gusiäjl lajztu, colyajc tejsi con Dios. ²¹ Di Jesucrist niujn nicla tej dojl, niluxh sa'csi sanälajz Dios nuunu, xcuentnu bejn Dios gujc Jesucrist si'c te bendojl che gule'cni guiraa rextojl guedxliuj yejc Jesucrist che cuajni lo cruz. Si'c gujcni te sajc ga'pnu xcälnaya, xcälnasa'c Dios xcuent Jesucrist.

6

¹ Ni'cni rniabnu lojtu, jia'cnu tejsi lo xtzun Dios, na'c cuälaatzu xcälracnäj Dios; palga guntu si'c, xlia'si cua'tuni. ² Sa'csi loj xtidx Dios caj scree:

Dxej nani riäjl gunäni, bacuadiagä xtiidxtu, dxej che gubicaj xtojltu gucnää la'tu.

Coljiejn! Naj najc te tiempsa', coljiejnza, naj najc dxej ni guibicaj xtojltu.

³ Na'c jiennu nicla tej ni gun guidxe'ch lajz bejn, didi guiniireni xhet laadi najc xcälrusule'nu. ⁴ Niluxh lo guira'ti dzuu ni riennu, guluilojnu lo rebejn najcnu xmos Dios; gacnu nadolajz; jiennu huant che rusacsireni nuure; che rdejdnu trabajw; che di jien xho jiennu; ⁵ che rguijreni nuure; che rusäurenri nuure neñ latzguuib; che rdejdnu lo bieiduxh; che rdajl xtuunnu; che re'ch bacal yääl; che rucua'nmu; ⁶ guluilojza najcnu xmos Dios xcuent xcälnabansa'cnu lo Dios; näjza xcälnansa'c xtidx Diosnu; näjza yälradjc nadolajz; sa'csi laaca riennu lo sa'nmu; näjza sa'csi rbäjz Sprit Dyan xten Dios neñ lastoonu; näjza xcuent yälrinälajzpabejn; ⁷ näjza xcuent didgxulipac; näjza lo xcälrnibeduxh Dios; ca'zanu si'c te madxed xcälnaya Dios, ca'nuni guropnaanu, lad-bee, näjza ladbjägw. ⁸ Ruluilojzanu najcnu

xmos Dios palga chä'p xpala'nnu, o palgaza jianxtujynu; palga guiniireni didxsa'c xcuentnu, o palgaza guiniyajreni nuunu; palga naareni najcnu beñrusguee, mase najcnu bejn ni rnii didxl. ⁹ Palga rut rla-jzdi gumbee nuunu, o palga guira'ti bejn numbee nuunu; acayejtnu, niluxh bahuii, anu anabajn; rusaan Dios rguijnreni nuure, niluxh dinu guet; ¹⁰ najcnu si'c bejn ni yu' xlajs, niluxh rbalaaznu; najcnu si'c bejn ni xhet rajpdi, luxh riennu gapduxh bejn; najcnu si'c bejn ni xhet rajpdi, niluxh rajpnu guiraloj.

¹¹ Lojtu, ben Corinto, aguniliinu lojtu guiragajc rediidx ni yu' nen lastoonu. ¹² Xhetliidi diidxdi bacua'tznu lojtu, niluxh pet cacuatz lajztu diidx ni nanab guiniitnu loonu. ¹³ Naj narä rulidxä la'tu si'c rulidx te Dad rex'i'nni: ¡Colguinii loonu rediidx ni yu' nen lastootu!

Najcnu si'c xquidoo Dios ni nabajn

¹⁴ Na'c guchaagtü lo rebejn nani di chalilajz xtidx Dios, sa'csi di gacdi gunteblejtu dzuun sa'csi tejni rlajz gun dzunsa'c, steeni rlajz gunni dzunguijdx, xho gac sanäj bajl xcäjy, ä? ¹⁵ O xho gac sanäj Jesucrist bendxbab ni laa Satanás, ä? O xho gac sanäj te bejn nani rililajz xtidx Dios te bejn ni di chalilajz xtidx Dios, ä? ¹⁶ ¿Xhixh tebloj najc xquidoo Dios con rebanäjb, ä? Ni nuunu najcnu xquidoo Dios ni nabajn, lagajc si'cni gunii Dios galoo: Cuäzä nen lastooreni, sisianäázareni. Narä sacä Xtiosreni, laareni sajcreni rex-peñä.

¹⁷ Ni'cni colrii galäiireni, colguibicaj lojreni, te laad colcuäz, si'c naj Dios: Te gac xca'lätu, na'c faltu recosdxuudx. ¹⁸ Dxejc la'tu sajctu rexinganä, rexindxa'pä, luxh narä gacä xtadtu, si'c naj Gueb Dios ni rajp guiralii yälrnibee.

7

¹ Ni'cni, la'tu ni sanälazä, sa'csi abia'n Dios diidxre loonu, do'o guisia xcäriejnnu, lastoonu näjza tiejxhnu, do'o cuäcraj guiraa rexhigabguijdx, guiraa redojl, te gac sanu lo rexnezyudxan Dios con xcälrdejx Dios.

Xho basiech lajz rebejn Corinto

² ¡Colchanäälajz nuunu nen lastootu! Xhet latsiajdi biennu lojtu. Rut baxhindinu. Rutza basgueedinu. ³ Dina guiniä rediidxre

te cue'cä xquejtu; ni aguniä lojtu galooli, la'tu yu'tu nen lastoonu palga tejsi guetnu, o palga tejsi guibajnrunu. ⁴ La'tu nadip lazä, rniduxhä didxsa'c xcuenttu lo bejn, rbedxi lastoä, rbalazduxhä loj guiraa retrabajw ni cadeednu.

⁵ Ni'cni che guyu'nu reguedx Macedonia, di niajcdi nusilajznu sa'csi guiralajt cadejdnu trabajw, xcent yälrdijl ni guyu' guideb gabinu, xcentza yälrdxejb ni guyu' lastoonu. ⁶ Niluxh Dios ni racnäj rebejn ni rac-huin lajzreni, gucnäj nuure, sa'csi che bidzujn Tito guredxi lastoä. ⁷ Luxh xhet sa'csi bidzujntis Tito, näjza sa'csi gulecdx-itu lastoo Tito, näjza sa'csi biädnäni diidx xho yu'tu, xho rlajztu fiitu narä, xho yu' xlajs lastootu xcent xtojltu, xho rlazduxhtu guntu si'cni guniä lojtu, ni'cni bibalasdux-häru.

⁸ Acananä guc-huin lajztu che biłtu guijtz ni bacuaä lojtu, niluxh di lazä niac-huin mase che baxhaläni guc-huin lazä, sa'csi naj nanä mase bejn guijtzga guc-huin lajztu, xhet xchejdj guc-huin lajztu. ⁹ Niluxh naj rbalazä, et sa'csi guc-huindi lajztu, alga sa'csi guc-huin lajztu te basiech lajztu xcent xtojltu, sa'csi guc-huin lajztu si'cni rlajz Dios, te di yu' xhi gunijttu xcent nuunu. ¹⁰ Sa'csi yälrac-huin ni ruxhal Dios loonu rujn rusiech lajznu, te ruslaa Dios nuurnu lo dojl ni'cni rbaalazä che bejnni si'c. Niluxh yälrac-huin xten guedxliu dini gun gusiech lajz rebejn rextojlreni, alga rujnni nitloj bejn tejpas. ¹¹ La'tu bejntu huant xlajzs ni baxhal Dios si'cni rchaglajz Dios gac. ¹² Naj ¡colhuii gan! ¡Lacti xhi cossa'c bejnni par la'tu! Bejnni bahuisa'cpactu xhini'c gujc, te gac gusulegajctu xcentuni; dxejc bejnni bidxe'caktu, näjza bejnni bidxejbtu, ni'cni basaantu dojlga, dxejceti bejnni rlajzpactu nuhuiitu loä, bejnzani guyu'tu yärsia' xcentä, bejnzani rlajztu guntu yälguxhtis bejn nani bejn dojlga. Guiraa redee baluiloj et la'ditu bejn dojl. ¹² Ni'cni, che bacuaä guijtzga, dina nucuaäni loj bejn ni bejn dojlga, niluxh bacuaä guijtzga lojtu te guiluiloj xcälrssia'tu ni rajptu xcent narä nez loj Dios. ¹³ Ni'cni aguredxi xcäriejnnu.

Naj aguredxi xcärienä, bibalazduxhäru xcent xcälrbalajz Tito, sa'csi bicoob, bisilajz xpritni xcent guirau. ¹⁴ Sa'csi palga yu' xhi didxsa'c ni räpä lojni xcenttu, ditu

nusanxtujy narä nez lojni. Niluxh sigajcni guniuu ganax didxgulii, sigajcza najc guiraa redidxs'a'c xcienttu ni guniä loj Tito, guliipacni. ¹⁵ Ni'cni maaazru sanälajzni la'tu, che rnaj lajzni xho basoobtu diidx, xho bejntu cu'a'tuni che bidzujnunu, racsejslitu cadxejbtu. ¹⁶ Naj rbaalazä sa'csi loj guira'ti la'tu nadip lazä.

8

Saru rudedreni meel

¹ Naj bejtznu, rlajznu guiniuu lojtu xho badeed Dios xcälrulaslajzni lo reben Macedonia ni huililajz xtidx Dios. ² Mase gudedduxhreni trabajw, bibalajzreni, mase xhetliidi gojpreni, badeedreni meel si'c te ben ni rajp. ³ Narä caniliä lojtu, badeedreni xmeelreni si'cni gojpreni, luxh badeedreni loj ni naa bejn sajc gudeedreni. ⁴ Gunabduxhareni loonu guisaannu gudeedreni xmeelreni te gacnäjreni rexpen Dios. ⁵ Niluxh direni niujn si'cni biennu xhigab gunreni. Ganiddoo badeedreni lagajc laereni loj Dad Jesucrist, näjza loonu si'cni rnibee Dios gac. ⁶ Sa'csi batie' rexpen Macedonia meel, ni'c naj räpä loj Tito chanuupacni gutie'ni meel lojtu si'cni gunii Tito lojtu galoo. ⁷ Rujntu xhidajl dzunsa'c. Rililazsa'ctu xtidx Dios; rnisa'ctu xtidx Dios; rajptu yälnajn; rchaglajzpactu guntu dzuun; rinälajztu nuunu, ni'cni na'c gusaantu tedcaj gunzatu dzunsa'cre, nala-jznu, gudeedtu meel.

⁸ Dina guiniä lojtu colyujnpacni; narä rlazäti gaceetu xho rbaalajz reni ruded meel te guluijloj don la gulii sanälajzpaczatu rexpejn Dios. ⁹ Sa'csi la'tu anumbecheetu rulaslajz Dad Jesucrist, te mase najcni ri'cw, rajpni guiraa xhixten Dios, xcientu gujcmi si'c te bejn ni xhet rajpdi, te xcientu ga'ptu guiraa rexhixten Dios xhaguibaa.

¹⁰ Narä siniä lojtu xhi xhigab runä, par lagajc xcälñasa'ctu. Gudebijzli ganiid la'tu guslojtu bejntu dzunsa'cre, luxh rbaali la-jztu rlajzpactu guntuni. ¹¹ Naj colchanuu, colguluu xzuunga si'cni guslojtu cayujntuni. Naj te luux dzuunga colgudeed si'cni rajptu. ¹² Sa'csi palga rlajzdukh te bejn gudeed lo Dios, laaca najc gudeedni si'ctis ni rajppacni. Di Dios guiniab gudeed bejn nani dini ga'p. ¹³ Dina guiniä gudeedtejtu te teditu trabajw te gapdukh stee bejn, alga

te gacteblojtistu. ¹⁴ Nani rajprulu naj ni'c colgudeed te gusalojtu ni cayäädxreni, te stee dxej nani rajpreni laareni sajc sunidxzareni te gusalojreni nani cayäädxtu te si'c gacni tebloj. ¹⁵ Sa'csi lo xtidx Dios caj scree: "Te bejn nani batopdukh yälnasa'c, xhet bia'ndiru, dxejcti nani guxii batoj p yälnasa'c, xhet biäädxdi."

Tito näjza rexcompanieerni

¹⁶ Xquixtios lo Dios nani ruded lo Tito lagajc yärsia'ni rapä narä par la'tu. ¹⁷ Sa'csi cuäjbni gunni nani gunabä lojni gunni. Luxh sa'csi rlazduxhpacni gunni xtuun Dios, naj lagajc laani bejnni xhigab jiädhui-ni lojtu te luux dzuunre.

¹⁸ Caguxhalnu xtee bejtznu chanä Tito. Guiraa rebejn guidoo rnii didxs'a'c hueen xcient bejntre sa'csi laaca rusule'ni xtidx Dios. ¹⁹ Ni'ctis aguleza reben guidooni te chunäjni narä te gacnäjni narä lo xtuun Dios nani cayennu te guiliä'pni xpala'n Gueb Dad Jesucrist, te guluijlojza lacti rlajzpacni jiennu xtuunni. ²⁰ Ni'cni rlazä jiapdaduxhnu te di chu tej ni guiniyaj nuure xcient melrore ni chosa'nmu lo rexpejn Dios. ²¹ Sa'csi narä riuduxhå runä nani najc laaca, et ganax nez lojdi Jesucrist, näjza lo rebejn.

²² Con guiro'p redee, caguxhalzanu stee bejtznu, nani agujc balti huält bilihuiu xho rujnni, te bahuiipacnu rlajzpacni guns'a'cni xhidajl dzuun, luxh naj rlajzruni guns'a'cni redzuunga sa'csi nadip lajzni la'tu. ²³ Palga yu' chu guiniabdiidx xcient Tito, colyejtz lojtu laani najc nani cayunnäj narä dzuun lojtu. Dxejcti xcient stio'p bejtznu, laareni najcreni xquixhajg reguidoo, rliä'pzareni xpala'n Jesucrist. ²⁴ Ni'c na'c guidxejbtu che yu'tu lo rebejn reguidoo guluiipactu loj rebejngä xho sanälajztu, näjza redzuun ni rujntu ni'c rniiu ganax didxs'a'c xcienttu.

9

Meel par rebejtnu

¹ Ni'cni dina gucuaäru lojtu xcient dzuunre, nalajznu, yälracnäj rexpejn Dios, ² sa'csi anancheä rlajzpactu guntuni, luxh xcientpac ni'c agulä'pä xpala'ntu loj reben Macedonia, räpä lojreni la'tu, reben Acaya, gudebijzli batie'tu meel, luxh sa'csi bejntu si'c, xhidajlza reben Macedonia biniib te

badeedzareni meel. ³Ni'cni abaxhalä rebejtzu lojtu, te di xlia'si gulä'pä xpala'ntu xcient dzuunre, te acabäjzlitu gudeedtu xmeeltu, sigajc ni agunixgaä lojtu. ⁴Didi che jiädnaää rebej Macedonia jiophuiinu la'tu, xhet rajpeditu, dxejc jianxtuyä narä, näjza la'tu. ⁵Ni'cni benä xhigab, nanabpac jiädxdgaa rebejtzu, jiädhuiireni la'tu, te fiireni don xho gac xcient meelro ni galooli bia'n didx gudeedtu, te abatixgaatu nani gusalajtu sa'csi rlajzpactu gudeedtuni, xhet sa'csi rniinu riäjlpac gudeedtuni.

⁶Rniliä lojtu, nani guxii rbe'c, guxiiza yäl-nasa'c guiliänsni, niluxh nani rbe'c xhidajl binij, xhidajlza yäl-nasa'c guiliänsni. ⁷Tejgatu colhuii don lacti sajc gudeedni, dxejc si'c sugudeedni si'cti ni rlajzni, na'c gun tiopdi lajzni, etza sa'csi riäjlpac gudeednini, sa'csi Dios sanälajz bejn ni rbaali lajzni rudeedni meel lojni. ⁸Luxh Dios sajc guniidrxu xcälracnäjni lojlu, te si'c guixe-guixee saj-plu xhidajl guiraloj rexhixtenlu, te ga'plu xhitis ni rquiinlu loj guira'ti xtzunsa'clu. ⁹Sa'csi lo xtidx Dios caj scree:

Abadeduxhni loj reben ni xhet rajpdi luxh redzunsa'c ni rujnni, najcreni par tejpas.

¹⁰Dios nani rudeed binij ni rbe'c nani rujn dzuun loniaa, laani suniidxzani yätxtiil te guidaunu, lagajc Diosga suniidx, sutajlza binij cue'ctu, lagajc laani sustioobnini te gaduxh yäl-nasa'c xten xtzunsa'ctu.

¹¹Te si'c ga'ptu lacti yäl-nasa'c te gac gudeedzatu xhiroob. Luxh xcient xtzunnu, meel ni ruxhaltu loj rexpejn Dios sujn gudedduxhreni xquixtios lo Dios. ¹²Sa'csi che racnäjtu rebejtzu, dinu guideed ganaxtis ni rquiinreni, rujnzau rudeedrureni xquixtios lo Dios.

¹³Che racnäjtu sa'tu si'c, rululojtu lacti rusooftu xtidx Dios si'cni ahuililajztuni, ni'cni siliä'preni xpala'n Dios xcient xcälracnäjtu, nalajznu xcient meel ni badeedtu lojreni, näjza loj guiraareni.

¹⁴Dxejcti laareni sibedx-siniabzareni lo Dios xcienttu, sinälazduxhreni la'tu sa'csi runidxduxh Dios xcälracnäjni lojtu. ¹⁵Xquixtiosti Dios sa'csi baniidxni yäl-nasa'cduxhje loonu!

¹Lagajc narä, Pabl, rniabdukhä lojtu, con guiraa didxdoo, guiraa didxs'a'c xten Crist, (narä ni nac benñadolajz che biälä lojtu, niluxh che suga'a zift lojtu, dxejc nacä benñalajz). ²Narä canabä lojtu, colguibañsa'c te che jiädhuiä lojtu, dina gacä nialajz dizana guiniä redidxnaj ni abenä xhigab guiniä loj gaii bejn nani rniil nabañä si'c te benguedxliuj. ³Guliican najcnu benguedxliuj, niluxh dinu gucuanäj sa'nu guilb nani rca' ben guedxliuj che rcuaareni. ⁴Sa'csi reguiib ni rca'nu te guidilsa'nu direni gac sa' guiib ni rca' ben guedxliuj. Nuunu rucuaanu con xcälrnibee Dios te riennu gaan loj guiraa rexçälrnibee guedxliujre. ⁵Ni'cni cagutzuljnu guiraa rexhigabgujdxreni, näjza nani rchalorenijc xhigabro nani rlajzreni guiniyajreni yälrumbee Dios, luxh caca'nu guirali rex-higabnu cagutednureni ladznaa Jesucrist te gusoobnu rextidx Jesucrist. ⁶Cabääztisnu te gunnu yälguhtis loj chutis bejn ni dini gusoob xtidx Dios, che abasoob guiragajctu xtidx Dios.

⁷La'tu cahuiitu redzuun ni rien. Palga yu' chu tejtu ni rchaloni najcni xpejn Crist, sugunsa'cni xhigab, fiini xho najc lastooni, dxejcti sugacbeepacni sigajcni ahuililajzni xtidx Jesucrist, sigajcza nuure ahuililajzzanuni. ⁸Sa'csi mase guiliä'päru xpala'nä xcient yälrnibee ni rapä, ni baniidx Dios te gustiobä xcälrililajztu, et te gux-higädi la'tu, nicla si'c dina gutiüä. ⁹Dina rlazä guchalotu rlazä guchebä la'tu con rexquitzá. ¹⁰Sa'csi rniireni: "Lo rexquitzni caj didxnagajin, didxnialajz, niluxh che suga'nii laapacni, xheti xcälsiuudzu'tzni, luxh xho rniaj diidx ni rniini." ¹¹Luxh ni rii si'c, sugacbeepacni dee: si'cni najcnu con rextiidxnu che rucuaanu lojtu che yu'nu zift, sigajcza najcnu che sugarajpacnu la'tu.

¹²Dinu gun xhigab najcnu tebloj loj rebejn ni runnaro lagajc laareni. Niluxh reni'c rchalorenii si'c sa'csi ruhuiireni xho najcreni si'c, nayääl xcäriejnreni, ¹³Nuure dinu gunnarotej lagajc nuurnu, niluxh riennu si'cni nungäjli jienヌ, xcient yälrnibee ni baniidx Dios loonu te jienヌ dzuun cadro yu'litu. ¹⁴Ni'cni dinu nidedcaj xcälrnibee che bio'pnu lojtu, sa'csi baniidx Dios yälrnibee loonu ganiddoo nuunu

gusule'nu xtidx Jesucrist lojtu. ¹⁵ Dinu niennaro lagajc nuurnu xcient xtzuuu ste'ca bejn, ascanu lagajc nuunu biennuni. Cabääznu tioobru xcälrililajztu, te gac jien-runu dzuun lojtu, si'ctis gal jiennuni. ¹⁶ Te gacza gusule'nu xtidx Jesucrist ste'ca lajt ni ria'n zижту lo guejdx cadre yu'tu, na'cza gunnaroru lagajc nuunu xcient dzuun ni bejn ste'ca bejn.

¹⁷ Sa'csi nani rlajz gacnaro, suguiliä'pni xpala'n Dad Jesucrist. ¹⁸ Sa'csi et nani rliä'p lagajc xpala'ndini ni ria'n hueen nez loj Dios, niluxh bejn ni rliä'p Jesucrist xpala'nni, ni'cni rbalaznäj Dios.

11

Pabl näjza rebejn ni rniisi najcreni apost

¹ Maläii chanunäsjctu narä laj ni guiniä gaii didxnayäle', niluxh asanunäjtu narä. ² Randzu'ä la'tu con yälrandzu' ni baniidx Dios, sa'csi abia'n diidx gutedä la'tu ladznaa Jesucrist te xca'ni la'tu. Rlazä gactu bennaya chäätu lojni, si'c te dxa'p che ruchnaani te bi'n, rut bahualdini. ³ Niluxh rdxebä didi gusguee bendxbab la'tu si'c ni basguee bäl Eva con xcälnadxxällajzni. Didi gunni guichaa xhigabtu, guibicajtu lo xtidx Jesucrist luxh naj laaca rajnpactu Jesucrist, guideb lastootu. ⁴ Sa'csi la'tu cagutipduxh lajztu che riädnni ste'ca bejn lojtu xtidx stee Jesús nani digac nani bisule'nu lojtu; o che naareni xca'tu stee sprit ni digac nani acua'tu; o che naareni chalilajztu ste'ca diidx nani najc garenclo lo xtidx Dios ni ahuililajztu. ⁵ Narä runä xhigab dina gacä bejn ni guxiiru sajc loj guiraa reapost.

⁶ Mase di gacdi guinisa'cä, xhet yäl-najndiza cayädxä; niluxh ni'c huenliisi rluiloj guiraa rediidx ni abaluiä lojtu, guiraa redzuu ni abenä ro'c.

⁷ O jla benä te dojl guyu'ä lojtu si'c te ben nadolajz, te gactu benrroru, sa'csi xhetliidi cua'ädi xcient ni basule'ä xtidx Dios lojtu. ⁸ Cua'ä meel ni baniidx garenclo guidoo loä che guyu'ä lojtu, te benä xtzun Dios lojtu. ⁹ Che guyu'ä lojtu guyu' xhi biquinä, niluxh xhet cua'ädi lojtu, dina nutalä xtzuntu. Sa'csi che biääd rebejtnu ni siääd Macedonia, baniidxreni guiraa ni biquinä. Loj guiraa redee dina nutalä xtzuntu, luxh si'c sinuu gunä. ¹⁰ Guideb didxlii xten Jesucrist ni yu' neñ lastoä, rniliä rut

sajcdi gudzucaj xcient xho yuä lojtu, ni'cni care'ch didxroga lo guiraa reguedx Acaya. ¹¹ ¿Xhicuent rniä si'c? ¿Laa sa'csi dina chanälazä la'tu, ä? ¡Xho gacni si'c! ¡Dios anajn lacti sanälazä la'tu! ¹² Niluxh nani rungacä, lagajc ni'c sinuu gunä, te gudxonä renani rlajz gacnaro, renani rlajz naa rebejn najcreni si'cpac najcnu, niluxh direni gac. ¹³ Direni gac apost, laareni rusgueereni, rujnsireni si'c ni najcreni apost xten Jesucrist, luxh rut najcdireni. ¹⁴ Luxh xho dini gac si'c, ni lagajc bendxbab ni laa Satanás rluiloj si'c te xangl Dios ni rdimbicha' te rusgueeni bejn. ¹⁵ Ni'cni na'c guidxelojtu palga näjza rexmos bendxbab riääd, rujnsireni si'c bejn ni rujn dzunsa'c, niluxh sinitlojreni par tejpas xcient ni rujnreni.

Rdejd Pabl trabajw sa'csi najcni te apost

¹⁶ Rnisacä lojtu, na'c guntu xhigab yecä cayajc, niluxh palga si'c rujntu xhigab, col-gusaanza guiniä si'c te ni rajc yejcni te guiniäza didxro lagajc xcientä. ¹⁷ Didx ni rniä dina guiniäni xcient xcälrnibee Dios, alga rniäni si'c te ni rajc yejcni, lala redidxro ni rniä xcient lagajc narä. ¹⁸ Sa'csi lacti bejn yu' ni mrii didxro xcient redzuun ni rujnreni lo guedxliujre, sigajcza sinä didxro xcient lagajc narä. ¹⁹ Ni la'tu, sa'csi nasin-duxhtu, sanunäjtu rebejn ni rajc yejcreni. ²⁰ La'tu sanunäjtu chutis ni rnibee lojtu si'c te lam, o rusguee la'tu te rbajnreni xhi xtentu, o rujnni runxlia'tu xtzunni o rliä'preni lagajc xpala'reni, o rga'preni lojtu. ²¹ Mase rtuiyä guniäni, dipac niajcdi niniä diidx lojtu te niacä si'c najc rebejngä. Niluxh loj xhitis nani runnaroren, (caniscä si'c te bennayääl) narä sajcru gunnaroä.

²² ¿La najcreni xpejn hebreos? Sigajcza narä. ¿La najcreni xpejn Israel? Sigajcza narä. ¿La najcreni xajg toAbram? Sigajcza narä. ²³ ¿La najcreni xmos Jesucrist? Narä nacäruri lojreni. Najrniä si'c te bejn ni rajc yejcni. Abenäru dzuun lojreni, agudijnrurenii narä loj ni gudijnrurenii laareni, abasäururenii narä neñ latzguuib, nicla gac guigab bal huält gudijnrurenii narä; baltiza huält ameer nietä. ²⁴ Gaii huält gudijnrurenii Israel narä, tejga huält batijärlreni duguijd detzä galbitzubigaa huält. ²⁵ Chon huält bahuajcwreni narä garo't; stee huält bacuaareni guij

yečä; choṇ huält biääz barcw cadro sa'ä loj nisdoo; teb dxej, teb yääl guyu'ä lo nisdoo.²⁶ Huaduxhä biaj, lacti bixun riesgw xcientä lo gueuu, xcient regubaan, xcient rebenladxä, xcientza rebenzijt. Bixunza riesgw neŋ reguedxro, näjza nez lo reyubidz, näjza lo nisdoo, näjza xcient rebejn ni rusguee, rniisireni najcreni bejtzu lo xtidx Jesucrist.²⁷ Abenduxhä dzuun, agudedduxhä trabajw, balti yääl dina niesä, balti huält gulaniä, biolä, balti huält xheti xhi niauä; agudedäza yälナルdukh; guyu' huält xhetiza xhabä.

²⁸ Luxh xhet loj redeetis rdedä trabajw; guixe-guixee di lastoä cuedxi xcient yärssia' ni ru'ä xcient reben guidoo ni huililajz xtidx Dios.²⁹ Che rdxajg tejtu, näjza narä rdxagä. Palga tejtu riajb lo dojl, narä ruduxhä yärsia' xcientni.³⁰ Palga nanab gunnaroä lagajc narä, sunäni xcient redidx nani ruluiloj xcälrdxagä.³¹ Dios ni najc Xtad Jesucrist, nani riäj guiliä'p xpala'nni par tejpas, ananchee dina gusgueä la'tu.³² Che guyu'ä guedx Damasco, gubernador nani guyu' ro'c, najcni xpejn reii Are-tas, gunibee gojp rexduxhtismi guejdxga te niniaazreni narä te nišäureni narä nen latzguib.³³ Niluxh basiäjtreni narä nen te dximro nez ro' te padeer ni rdejd gabí guejdxga, te si'c gulaä ladzqaareni.

12

Dios baluiiloj lo bacal

¹ Mase riäj guiniäni, xhet gunädi gaan guiniä didxro lagajc xcientä ni'cni rlazä chanuu diidx, guiniä xcient rebacäl näjza xcient nani baluiiloj Dios loä.² Numbeä te nigui ni ahuililajz xtidx Jesucrist. Gutzudaj ijj hujini guibaa ni rioxinga, dina ganä laa guideb tiejhni hujini, o la ganax xspritni huj, Diostis najn.³ Diostis najn la guideb tiejhni, o ganax xpritni, niluxh nanä xho huj niguiga,⁴ guläs Diosni cadro yu'pac Dios, luxh ro'c biejn diajgni didx-xhiga'tz, didxroduxtej, nani di gacdi guiniä ben quedxliu.⁵ Xcient sa' niguiga sajc guiniä didxro, didxsa'c, niluxh xcient lagajc narä, di gacdi guiniäni; siniätiä diidx ni ruluiloj xcälrdxagä.⁶ Mase rlazä guiniä didxro, didxsa'c xcient lagajc narä, dini gac didx-nayääl, sa'csi guliçazani. Niluxh dina

guiniäni te di guntu xhigab nacä benroru loj ni rhuiito runä o nani riejn diajgtu rniä.

⁷ Baluiiloj Dios xhidalduxh cosroduxh loä, niluxh te na'c gacä bennarо, basaan Dios gusloj guyuguijdx tiehxä, si'c te guejch huääz tiehxä, ni baxhal bendxab xten Satanás te gusacsíni narä te di gacä te bennarо.⁸ Choṇ huält agunabä lo Jesucrist xcient ni'c, te guibicajni.⁹ Niluxh laani najni loä: "Yälracnäj ni gunidxä salduxh luj, sa'csi ruzeensa'cru xcälrmilagwrä che xheti yälrutiplajz te bejn." Ni'cni hueenru guiniä didxro sa'csi xhet yälrutiplazädi rapä, te guzen xcälrnibee Jesucrist lastoä.¹⁰ Ni'cni rbedxilazä xheti xcälrtiplazä, rbedxizalazä rniyajreni narä, näjza che caquinä guiraloj, näjza che rdedä trabajw xcient Jesucrist, sa'csi che xheti xcälrtiplazä, dxejc runiidx Dios yälnadip, yälnadaan loä.

You' Pabl yärsia' xcient guidoo ni yu' Corinto

¹¹ Agucä si'c te benñayääl, lagajc la'tu bejntu nacä si'c. La'tu riäjlniitü didxro, didxsa'c xcientä, sa'csi gjadpac biäxdädi, nadxagä loj reapt ni sajcrumase rut nacädi.¹² Redzuun ni benä laj ni guyu'ä lojtu, benäni si'c te ni najcpac apost, huin-uutis benäni guideb nadolajz näjza reseen, näjza remilagwr.¹³ ¿Xhi benä lojtu te naatu runä xhigab guxiiru sajctu loj guiraa reguidoo? Nani benätiä najc dee: dina nutalä xtzuumtu, nalajznu dina niniabä ni-acnäjtu narä si'c gucnäj narä reguidoo ni yu' garencia lajt. ¡Colsäj! lajztu narä dojlre!

¹⁴ Najcayunä xhigab jiädhuiätu, najgacni choṇ huält siäla. Di quilä xhixtentu, alga lagajc la'tu rgiilä. Di rlazä gutalä xtzumtu. Di riäj cuchee rebiuux meel par xcuzañreni. Reguzajn ni riäj cuchee meel par rex'i'hreni.¹⁵ Xhet najcdi gunitä guiraa nani rapä, näjza lagajc narä sujuvä, te laa xaimtu lo dojl. Palga chanälazäru la'tu, ¡la guxiiru chanälajztu narä, ä?

¹⁶ Niluxh mase si'c najcni, di narä nutalä xtzuumtu. Empac yu'reni canii basgueä la'tu sa'csi nadxällazä.¹⁷ ¿Xhixh naatu cua'ä xhi xtentu sa'csi baxhalä rebejtznu lojtu, ä?¹⁸ Che baxhalä Tito, räpä lojni chanäani stee bejtznu te jiädhuiireni la'tu. ¿Xhixh cua'ni xhi xtentu, ä? Xhixh et tejsi xhigab biennu, tebloj biennu dzuun guiro'pnu che guyu'nu lojtu.

¹⁹ Lalni cayoltu guiraa rediidxre, cayujtu xhigab canabnu jiäjl lajztu, niluxh xhet si'cdini. Caniinu rediidxre nez loj Dios, caniizanu con xcälracnäj Jesucrist te si'c tioobruto lo xtidx Dios, rebetzä nani rinälazä. ²⁰ Sa'csi rdxebä andi che jiädhuiätu fiä ditu gac si'cni rlazä gactu, dxejectiru la'tu suhuizatu dizana gacä si'cni rlajztu gacä. Rdxebä andi yu'tu ni cadijl, ni ruguj lajzni xhixten sa'nii, ni cadxe'ch lo sa'nii, ni cala' lo sa'nii, ni caniyaj sa'nii, ni cagutajl diidx lo sa'nii; ni cayunnaro lagajc laani, ni cayujnza beijy. ²¹ Rdxebä andi che jiädhuiätu stehuält, gusanxtuyj Dios narä xcienttu. Rdxebäza sonduxhä xcient xhidaljtu nani abanijt, bejntu dojl galoo, luxh gajdту gusiechlajztu xcient xtojltu. Yu'tu ni di guibannaya, resnäjtu bejn ni di gac chäältu, yu'za balti dojl rujntu.

13

Lult yälrluljdx xten Pabl

¹ Naj gac chon huält siädhuiä la'tu. Guira'ti quej nanab cue'creni con xtidx tio'p o chon bejn ni najnpac xhi dojl bejn tejgani. ² Mase ruti narä ro'c, arinxgaä lojtu lagajc diidx ni guniä che guyu'ä lojtu ni barojp biäla lojtu, luxh rniä loj renani abejn dojl, näjza loj guiraatu, palga jiälsacä, diruna gulasläzätu nicla tejtu, ³sa'csi rlajztu fiipactu la gulii runiidx Jesucrist yälrnibee loä te guiniä xtiidxni. Luxh Jesucrist dini guisisni xcienttu, niluxh laani rustioobruni xtiidxni neñ lastootu. ⁴ Guliicani che cuajni lo crujz, gucni si'c te bejñ nani casis, niluxh naj nabajnni sa'csi rapduxhni xcälrnibee Dios. Näjza nuure rsia'cnu si'c te bejñ nani casisnäj laani niluxh nabannäjnu laani xcient xcälrnibee Dios ni baniidxza Dios xcienttu.

⁵ Colnínaj lastootu lagajc la'tu, colhuii la guliipac ahuililajztu xtidx Dios; colhuisa'c xho najc lastootu. ⁶ La ditu gacbee rbäjz Jesucrist neñ lastootu, ä? Palga rutini, rusqueetu lastootu, ditu nililajztu xtidx Dios. ⁷ Narä rlazä gacbeetu, dinu nusguee lastoonu, ahuililajzpacnu xtidx Dios. ⁸ Rniabä loj Dios na'c guntu cosgujidx, xhet te guiniidi bejñ didxs'a'c xcientnu, alga te la'tu guntu recossa'c, mase guiniireni et laadi cayunä narä. ⁹ Sa'csi xhetliidi rajcdi riennu te nitloj didxgulii, xcälrnibeenu najc

te gusule'nu didxlji. ¹⁰ Ni'cni rbaa lajznu che casisnu, niluxh la'tu nadip, nadaantu; rbejdx-rniabzanu lo Dios guiza' xcälrililajztu lo xtidx Dios. ¹¹ Rucuaä reguijtzre lojtu che gajdna jiälä, te che jiälä na'c tilnäätu si'cpacni nungäjl tilnäätu xcient yälrnibee ni baniidx Dad Jesucrist loä, te gac tioobruto lo xtidx Dios, xhet te nitditu.

¹¹ Ni'cni rbejtznu, colguibalajz, colhuii guisa' xcälrililajztu, colcuecdxi lajztu, colyennäj sa'tu tejsi xhigab, dxitis gubajn. Dios xten yälrinäljaz näjza yälrbecdxlajz chunäj la'tu. ¹² Colnii: "Xchan" lo resa'tu. ¹³ Guiraa rebejtznu nani ahuililajz ruxhal xtixtios lojtu.

¹⁴ Yälracnäj xten Dad Jesucrist, näjza yälrinäljaz xten Dios, näjza yälracnäj xten Sprit Dxan chu neñ lastootu. Sugacni si'c.

Te Guijtz Lo Reben Gálatas

*Pabl rucuaa guijtz loj reben guidoo nez
región Galacia*

¹Narä, Pabl, nacä apost xten Jesucrist. Xhet rebejndi baxhal narä, xhetza bejndi gule narä. Lagajc Jesucrist näjza Xtradni Dios ni yu' xhaguibaa, nani gulás Jesucrist loj rebengut, laareni agulereni narä. ²Narä, näjza guiraa resa'nu nani yunäj narä, rucuaanu guijtzre lo reben guidoo ni yu' nez reguedx Galacia. ³Xca' guejbtu xcälracnäj Dios con xcärlbedxilajz xten Dios xtradnu näjza xten Dad Jesucrist. ⁴Lagajc laani cuäjbni gujtni te guslaani nuure lo dojl xten guedxliuj guijdxre, si'cni gunibee Xtradnu, Gueb-Dios. ⁵Chä'p xpala'n Dios par tejpas. Sugacni si'c.

*Xhetdi xhi stee didxcoob ni sajc guslaa
nuure*

⁶Rdexeloduxhä lacti riojb cabälaztu Dios ni gurejdx la'tu con xcälrinälajz Crist, luxh naj cagusooftu ste'ca diidx. ⁷Xhetdi stee diidx ni sajc guslaa nuure lo dojl. Yu'reni rlajz gusiechreni lajzta con stel'ca diidx, rlajzreni guchaareni xtidx Jesucrist. ⁸Niluxh palga jiääd chu jiädlui lojtu ste'ca diidx ni ruslaa bejn lo dojl, niluxh di diidxga gac si'c najc diidx nani abaluiinu lojtu, bejngä agubibdeni, chutis najcnu, mase naräni, mase te xangl Dios ni jiääd xhaguibaa. ⁹Si'c ni guniä lojtu, si'c rniscä lojtu naj: Pal yu' chu jiädlui lojtu ste'ca diidx ni ruslaa bejn lo dojl, luxh di diidxga gac si'c najc diidx nani abaluiinu lojtu, bejngä agubibdeni.

¹⁰¿Xhi naatu? ¿La rlazä guinisa'c bejn xcientä o la rlazä guinisa'c Dios xcientä, ä? ¿La rlazä guspää lajz bejn, ä? Paru rlazä guspää lajz bejn, digacdi gacä xmos Jesucrist.

Xtzun Pabl

¹¹Colyacbee sa'ä, diidx ni ruslaa bejn lo dojl nani abasule'ä lojtu di diidxga gac xhigab ben guedxliuj. ¹²Xhet lojdi ben guedxliujdi cua'äni, rutza baluividini loä, niluxh lagajc Jesucrist baniidx xtiidxnloä.

¹³Anajntu xho gucä, xho gubanä galoo che rusobäts rexleii toMoisés. Dxejc basacsíduxhä reben guidoo ni huililajz

xtidx Jesucrist, si'c benä te rlazä nitlojreni.

¹⁴Loj reni rusooob xleii toMoisés narä cagusbäru xtiidxnii, nanduxhäru loj guiraareni. Loj rebejñ nani sadxagä ladxä, maaazru sanälazä xcostumbr retroxtadgoldeoä. ¹⁵Dios gule narä, guleni narä cheni nuuli xnanä narä, gurejdxi narä sa'csi sanälajzni narä.

¹⁶Dxejc bíbalajz Dios baluilojni Xi'nni Jesucrist loä te guiniä xtiidxnii xcient xho rusaani bejn lo dojl loj reni di gac xpejn Israel. Che gujc si'c rut lojdi huiye'tzä.

¹⁷Niclaza nia'ä guedx Jerusalén loj reni ganid gujc apost loä. Alga hua'a nez reguedx Arabia, dxejcti gubisacä guedx Damasco.

¹⁸Che agudejd si'cti chon ijz, dxejcru hua'a guedx Jerusalén te biembeä Pedr, dxejc biannäani tzun-gubijdx. ¹⁹Niluxh dina nuuhüä loj chu stee apost ro'c. Lojtiis Jacoob, betzhuin Jesucrist bahuiä. ²⁰Rnilüä nez lo Dios, dina guiniä didx-xhii, rediidx ni cacuaä najc guliipac.

²¹Dxejcti hua'a reguejdx xten Siria näjza Cilicia. ²²Resa'nu ni yu' neñ xquidoo Crist guideb nez reguedx Judea, direni gumbee narä. ²³Riejntis diajgreni: "Bejn nani basacsíduxh nuure agujc xchej, abejngä caguluiini xcient lagajc xcärlilajz nani galoo rla-jzni nunitlojni." ²⁴Dxejc rliä'preni xpala'n Dios sa'csi huililazä xtiidxnii.

2

Bidxaag Pabl loj repost

¹Che agudejd tzudaj ijz, dxejcru hua'a guedx Jerusalén con Bernabé, näjza Tito huinänu. ²Gunii Dios loä, gunibeeni cha'a ro'c te gusule'ä xho huililajz rebejñ ni di gac xpejn Israel xtidx xcient Jesucrist ni ruslaa lo dojl. Niluxh lojtiis reni rnibee guidoo basule'ä diidx, te di xlia'si benä dzuun, o te di xlia'si gunäru dzuun. ³Sanää Tito, te ben griegw ni di gac xpejn Israel. Nicla lojni direni niäjb chuni bee si'c caj lo leii xten Moisés. ⁴Niluxh gaii bejn ni rujnsi si'cni najcreni sa'nu, bidxaagreni loonu te gula'tzreni xho rajñnu Dios. Rdxe'chreni sa'csi nuunu, rexpejn Jesucrist, dinu jienru si'c ni bejn retroxtadgoloonu. Laareni rlajzreni guxhiidreni nurnu, rlajzreni gusoobnu rextiidxreni.

⁵Dipacnu nicäjb nucuadiajgnu xtiidxnreni,

sa'csi rlaaznu chanuu chalilajztu xtidx Je-sucrist nani ruslaa bejn lo dojl.

⁶ Niluxh reni sajc, nalajznu reni rnibee reben guidoo ro'c, xhet te didxcoobdi guni-ireni loä. (Luxh par narä xhet najcdi mase bensajcreni, sa'csi Dios runtebloj guiraa bejn.) ⁷Luxh bahuiireni abaniidx Dios xtidx Jesucrist loä, luxh rusule'äni loj rebenzijt te guibicaj xtojreni, sigajcni rusule' Pedr xtidx Jesucrist loj rexpeñ Israel nani rujn-pac si'c ni caj lo leii. ⁸Lagajc Dios nani badeed bejn Pedr duzuun xte apost loj rex-peñ Israel, lagajcza Diosre baniidx gunä duzuun, te gacä apost loj rebenzijt nani di gac xpeñ Israel.

⁹ Ni'cni Jacoob, Pedr, näjza Juan nani najc benroru nen guidoo xten Jesucrist, gucbeereni laa Dios ni cayacnäj narä. Dx-ejc baniidxreni naareni loä näj lo Bernabé si'c te seen rbalajzreni, te chonnu guiro'pnu loj rebenzijt. Niluxh laareni chanuureni gusule'reni loj rexpeñ Israel.

¹⁰ Gunabtisreni loonu gacnäjnu rebejn ni xhet rajpdi, luxh ni'cza rlazä gunä.

Pabl gudilnäj Pedr lo guedx Antioquía

¹¹ Che biääd Pedr lo guedx Antioquía, gudilnäáni, sa'csi abejnni dojl xhet laadi cayujnni. ¹² Galoo gudaunäjni rebenzijt, luxh che bidzujn gaii xpeñ Israel ni bax-hal Jacoob, dxejcti gubicajni lo rebenzijt, diruni niaunäjreni sa'csi bidxejbni rexpeñ Israel ni ru' bee ni bidzujn ro'c. ¹³ Dxejcti sigajcza bejn guiraa rexpeñ Israel ni nad-xaag Pedr, gujcreni sigajc Pedr, runtip'p la-jzreni, naareni gusgueereni. Näjli Bernabé bejn si'c. ¹⁴ Luxh che bahuiä direni gun si'cpacni najc xtidx Jesucrist, dxejc räpä loj Pedr nez loj guiraa reben guidoo: "Palga luj najclu te xpeñ Israel, luxh nabajñlu si'c rebenzijt ni digac xpeñ Israel, xhet si'cdi ni caj loj leii, xhicuent rlajzlu guinibeelu guibajn rebenzijt si'c rexpeñ Israel nani rusooob xleii toMoisés?"

Nungäj chalilajz rexpeñ Israel, sigajc guiraa bejn, te guibicaj xtojreni

¹⁵ Nuure najcnu rexpeñ Israel cheni go-jllinu; dinu gac bendojl si'c najc rebenzijt.

¹⁶ Anadonnu rut chu tejti bejn sajc guibicaj xtojlni che gunni si'cni caj lo leii, sa'csi nanab chalilajznu xtidx Jesucrist. Ni'cni bi-olilaaznu xtidx Jesucrist te jia xtojlnu sa'csi

rililajznu, xhet sa'csi riennu si'cni caj loj leii. Di gacdi jia xtojl bejn xcient yälrusoob xleii toMoisés.

¹⁷ Palga laj ni rlajznu jia xtojlnu xcient xcärlilajz xtidx Jesucrist, ruhuiinu cayen-runu dojl, la sajc guiniinu: Jesucrist ruluijrienrunu dojl, ä? xho gacni si'c! ¹⁸ Palga rlazä gunsacä redzuun nani abaro'nä, lagajc narä rapä dojl nacä bej dojl. ¹⁹ Niluxh xcient leii, anaacä si'c bengut: digacdiru guinibee leii narä sa'csi naj nabanä lo xnejz Dios. Luxh lagajc leii bejn nacä si'c bengut che guceä di gacdi gusobä guiraa ni caj lo leiga. ²⁰ Najcni si'cni gutnäá Crist lo cruzj. Naj xhet narädi ni nabanä, laa Crist ni nabajn nen lastoä. Yälnabajn ni nabanä naj lo quedxliujre nabanä sa'csi rlilazä xtidx Xi'n Dios nani rinäljaz narä luxh guijtni te gudijxn i xtolä. ²¹ Dina cuälazä xcärlulaslajz Dios. Paru sajc gudzucaj leii xtojl bejn te gacreni bejnaya nez loj Dios, dxejc xlia'si gujt Jesucrist.

3

Yälrlilajz rusia dojl

¹ ¡Chipsa nayältu bej Galacia! ¿Chu bascäjytu te di cuadijgtu xtidx Jesucrist?

Ni nez lojpactu bisule'nu diidx xho cuaj Jesucrist lo cruzj. ² Tejtit diidx rlazä guini-itu loä. ³ La cua'tu Sprit Dxan xten Dios

sa'csi bejntu si'cni caj lo leii, ä? o ⁴ La sa'csi huililajztu diidx ni biejn diajgtu?

⁵ Chipsa nayältu. Acua'tu Sprit Dxan xten Dios dxejcti naj rlajztu guntu ni rijabtis yejctu guntu. ⁶ La xlia'si gudejdtu trabajw? Chugan la gulii xlia'sini. ⁷ Che runiidx Dios Sprit Dxan xtenni lojtu, che rujnni milaagwr nez lojtu, xho rujnnini? Dini gunni sa'csi rujntu si'cni caj lo leii, rujnnini sa'csi rililajztu xtiidxni ni riejn diajgtu.

⁸ Huililajz toxtagdgoldoonu Abram xtidx Dios, ni'cni cua' Diosni si'c te bejn nani naya lastooni. ⁹ Ni'cni colyacbee dee: re-nani rililajz xtiidx Dios najc xi'n toAbram.

¹⁰ Galooli najn Dios xcient yälrlilajz susia Dios lastoo rebenzijt, ni'c rájpni lo Abram: "Guiralii reben guedxliuj sacle' xcientlu."

Diidxre cuaj lo guijtz ni gujc galooli, cadre caj xtidx Dios. ¹¹ Ni'cni reni rililajz naj agucnäj Diosreni sigajc gucnäjni toAbram nani huililajz.

¹⁰ Guiraa reni rlajz guibajnreni gunreni si'cni caj lo leii, agubibdereni sa'csi scree caj lo leii: "Guiraa reni digunpac si'cni caj lo reguijtz xten leii, sucuibdereni." ¹¹ Niluxh huenliisi rieñ rut nayadi nez loj Dios xcient leii, sa'csi dee najc xtidx Dios: palga rililajz te bejn xtidx Dios, najcni te bennaya nez lo Dios, nabaññjni Dios xcient xcálrililajzni. ¹² Leii dini naa chalilajz bejn te xca'ni yälñabajn. Scree caj lo leii: "Nani gumpac si'cni caj loj reguijtz xten leii, ni'c nanab guibajn lojpac leiiiga."

¹³ Jesucrist badzucaj nuure loj yälrbibde xten leii. Laani gubibderi xcientru sa'csi xtidx Dios naj: "Anabibde te bejn ni najl loj te yajg." ¹⁴ Scree gusajc Jesucrist te gusojb diidx ni räjp Dios loj toAbram, sac-näjni guiraa rebenzijt; näjza te guiraanu ni chalilajznu xtidx Jesucrist xca'nu Sprit Dyan xten Dios.

Leii näj diidx ni bia'n Dios loj toAbram

¹⁵ Betzä, naj gusa'tä te diidx xcient ben quedxliuj. Cheni rujin bejn te guijtz te jia'n diidx lo stee bejn, mase bejntis najcreni, che abacuaani lajni lo guijtzga, rut sajcdi gudzucaj guijtzga. Rutza sajcdi gucuaaru diidx lojni che anajcni. ¹⁶ Luxh anajnnu badeed Dios xtiidxni loj toAbram näjza loj xagdooni. Dini ninii "rexagdooni" si'c loj xhidajlreni, guniini lo tejtis xagdooni, luxh laani najc Jesucrist. ¹⁷ Diidx ni rlazä guiniä najc scree: Diidx nani bia'n pac Dios loj toAbram gunii Diosni che cayäadx tajp gayuu galbitzuu ijjz gudeedni leii lo Moisés te laani gudeednini loj rexpejn Israel. Niluxh di leiiga nuchaa diidx ni bia'n Dios loj toAbram, laltis sajcn. ¹⁸ Paru naquuin leii te xca' bejn erens, dxejc xhet erensdi cua' Abram lo Dios. Niluxh basa'n Dios erens lojpac Abram sa'csi bia'nni diidx lojni galooli.

¹⁹ *¿Xhicient badeed Dios leii loj Moisés?* Badeed Dios leii sa'csi benduxh rexpejn Israel dojl, te gacbeereri xho najc xtojleni, lañ ni jiääd nani najc xagdoo toAbram. Sa'csi bia'n Dios diidx con laani sigajc con toAbram. Rexangl Dios badeed leii loj to-Moisés, te laani gujc si'c te bejn ni rusiäjl diidx. ²⁰ Te ni rusiäjl diidx xhet par tejtis bejndi najcni, niluxh Dios tejtis najc.

Xcient leii

²¹ *¿La garenca najc xleii Moisés lo diidx ni basa'n Dios loj toAbram, ä? ¡Xho gacni si'c!* Paru nica'nú te leii ni rajc rudeed yälñabajn, dxejc sii xcient leiiga nica' bejn yälñabañnya. ²² Niluxh loj reguijtz xten Dios caj diidx ni rnii: Guiraa bejn niäuu nen dojl, te reni chalilajz xtidx Dios si'c huililajz toAbram, reni'c xca' xcálrililajz diidx xcient Jesucrist si'cni bia'n Dios diidx loj toAbram.

²³ Che gajd xcálrililajz xcient Jesucrist jiääd, dxejc basäuu leii nuure nen dojl, cabäjtzisnu guiricaj xcálrililajz xcient xtidx Dios. ²⁴ Ni'l cni anajc leii si'c xmastrnu te guluiini nuure nezyuj nez lo Dad Jesucrist te gusiani xtojlnu con yälrlilajz xtiidxni. ²⁵ Niluxh naj sa'csi arajpnu yälrlilajz xcient xtiidxni, dirunu guiquin te mastr, nalajznu leii.

²⁶ Guiratu najctu xi'n Dios xcient yälrlilajz xtidx Jesucrist, ²⁷ sa'csi guiratu ni gurobnistu loj xtidx Jesucrist, najctu rexpejn Jesucrist. ²⁸ *Naj rutiru rexpen* Israel niclaza rebenzijt, niclaza mos, niclaza bejntis, niclaza niguii, niclaza gunaa, sa'csi guiraanu najcnu tebloj nez lo Jesucrist. ²⁹ Palga najcnu xpejn Jesucrist, dxejc gulipac najcnu xi'n toAbram, dxejc sica'nú yälñasa'c ni abia'n diidx gudeed Dios loj Abram.

4

¹ Mbaj naj. Nani xca' yälñasa'c, che najcni biuux, najcni sigajc te mos, mase xtemni gac guiraa xhixten xtadni. ² Yu' chu te bejn ruhuiini, yu'za chu rnibee xhixteni cheni agurooblini, cheni guidzujn dxejc xca'ni ni gudeed xtadni. ³ Sigajcza nuure che gucnu si'c biuux guyu'nucn mos loj releii, rnibeeni xhini'c digacdi jiennu lo quedxliuj. ⁴ Niluxh che bisa' dxejc ni basoob Dios, baxhal Dios Xi'n pacni. Xi'n te gunaa gojlni, loj rexpejn Israelza biädjäjlni, basoobni leii xten toMoisés. ⁵ Si'c gujc te xcasacni reni rusooxpac leii, te xca'ni nuure gacnu si'c te xpisiäjlni.

⁶ Luxh sa'csi anajctu xi'nni, ni'c baxhal Dios Sprit xten Xi'n ni te cuäazni nen las-toonu. Laani rniini lo Dios xcientnu: "Guejblu, Xtradnu." ⁷ Ni'c dirunu gac mos, sa'csi anajcnu xi'nni. Luxh palga najcnu xi'nni, suniidxza Dios yälñasa'c loonu xcient Dad Jesucrist.

Rulijdxni na'c gacsac bejn mos

⁸ Che gajdту gumbee Dios najctu mos xten rebanjб ni rajntu si'c Dios luxh dipacreni gac Dios. ⁹ Luxh naj anumbeetu Dios o naj anumbee Dios la'tu, xho chachus-actu loj redzuun ni guyu'tu galoo che gujtu mos xten rebanjб. ¹⁰ Cayutistu redxej, rebäii, retiemp, rejz. ¹¹ Naj rdxebä andi xlia'si gudedä trabajw baluiätu.

¹² Rniabduxhä lojtu betzä, colyajc si'c narä, sa'csi narä ahuililazä xtidx Jesucrist sigajc la'tu. Xhetza xhi dzunguijdxdi bejntu loä che guyu'lo lojtu. ¹³ La'tu anajntu galoo che basule'ä diidx xcuent Jesucrist lojtu, benäni sa'csi racxhuu tiekhä. ¹⁴ Dizatu nuze' niclaza nibälajztu narä xcuent yälracxhuu ni rajc tiekhä, alga si'c te xangl Dios, si'c lagajc Jesucrist cua'tu narä. ¹⁵ Con yälrbalajz xtentu ni gojptu dxejc? Niluxh rniä lojtu, paru niajc nibäätu baloju, nuniidxtuni loä dxejc, si'c niujntu. ¹⁶ Naj lä rdxe'chtu loä sa'csi caniä didxlII lojtu, ä?

¹⁷ Naj yu' gaii bejn nani rujnsi si'cni sanäreni leii rujnsireni si'cni rinälajzreni la'tu. Niluxh rlajzreni gudzucajreni la'tu te gusaantu xtidxä, te chanajltu laareni, te jiutu xtiidxreni. ¹⁸ Laaca chanälajz bejn sa'ni, niluxh na'c gusgueeni, na'cza che sugaränäsi la'tu chanälajztu narä. ¹⁹ Rexi'nä, xcuent la'tu cadedä trabajwduxh si'c te gunaa ni rajl xpäzni, luxh sinuu sidedä trabajw cheni arbäjzpacli Jesucrist nen las-tootu. ²⁰ Maläii gac jiälä lojtu lagajc naj te gac guiniä xhi stee diidx. Niluxh naj zift yu', dina gacbeä xhi xhigab gunä xcuenttu.

Diidx xcuent Agar näj Sara

²¹ Colguinii loä, la'tu ni rlajz gun si'cni caj lo leii, lä ditu gacbee, la di diajgtu jiejn xhini'c caj lo leii, ä? ²² jColjiejn! Scree caj loj leii: guyu' tio'p xi'n toAbram. Tejni najc xi'n gunaa ni najc xmos Sara. Steeni najc xi'n chäälpacni. ²³ Niluxh xi'n xmosni gojl sa'csi lagajc laani bejnni xhigab si'c chu xi'nni. Luxh xi'n chäälpacni gojl sa'csi si'c bia'n Dios diidx loj Abram. ²⁴ Diidx xcuent regunaare najc si'c diidx ni rulului. Regunaare najc si'c tio'p diidx ni bia'n Dios. Agar najc mos, mosga najc si'c diidx ni bia'n Dios con Moisés lo dan Sinaí. Rexi'n mosga guyu' te gacreni mos lo leii. ²⁵ Agar najc si'c

dan Sinaí nez lo reguejdx xten Arabia. Luxh guedx Jerusalén najc si'c dan Sinaí, sa'csi naj ro'c najc cadro re' rexpen Israel con rexil'ren, sanäreni leii. ²⁶ Niluxh di guedx Jerusalén ni yu' guibaa gac si'c mos, luxh nuurnu najcnu xi'nni. ²⁷ Scree caj loj xtidx Dios:

Bibalajz, luj gunaa ni gajd xi'nlu chu, guredxa', bibalajz, luj ni gajdlu ted trabajw ni rdejd gunaa che rajl xi'nni.

Sa'csi su'ru xi'n gunaa nani gulälajz chäälni quela xi'n gunaa ni gudiesnäj chääl stee gunaga.

²⁸ Mbaj naj, rebetzä, nuure, sigajc Isaac, najcnu xi'n toAbram nani chu si'cni bia'n Dios diidx loj toAbram. ²⁹ Che gojl xi'n gunaa ni najc mos, ni gojl sa'csi lagajc laani bejn xhigabga, bidxagdijlni xi'n chäälpac Abram nani gojl xcuent diidx ni bia'n Dios loj Abram. Sigajcza najcni naj. ³⁰ Xhi caj lo reguijt? "Barilaagw gunamos näj xi'nni, te di xca'xi'n gunamos yälhasa'c xtenlu si'c ni xca'xi'n gunaa nani najc chäälpacu." ³¹ Naj nuure, betzä, dinu gac si'c xi'n gunamos te chunu lo leii. Nuurnu najcnu si'c xi'n gunaa nani najc chäälpac toAbram.

5

Colguzutijp lajztu lo yälrlilajz xtidx Dios

¹ Colgusutijp lajztu lo xtidx Dios nani baniidix Jesucrist loonu sa'csi guliipac gulää Jesucrist nuure ladznaa leii, badzucajni xtojlnu che huililajznu xtiidxni, ni'cni na'cru gusiech lajztu te gacsactu mos ladznaa leii.

² Narä Pabl rniä lojtu, palga la'tu chutu bee si'cni caj lo leii, dxejc xlia'si chalilajztu xtidx Jesucrist. ³ Rniäza stehuält, guiraa bejn nani rlajzpac chu bee, nanab gunni si'cpac ni caj lo leii. ⁴ Palga rlajztu guntu redzuun ni caj lo leii te guibicaj xtojltu, dxejc agubicajtu lo Jesucrist, agubicajzutu lo xcälracnäj Dios. ⁵ Niluxh nuure xcuentpac Sprit Dxan xten Dios rililajznu gudijx Jesucrist xtojlnu lo crujz, cayenloonu jiädsacni te guniidxni yälbansa'c par tejpas loonu. ⁶ Sa'csi loj reni rililajz xtidx Jesucrist xhet sajcdi chu bejn bee, xhetza sajcdi na'c chu bejn bee, nani sajc najc chalilajz bejn xtidx

Dios. Yälrlilajzga rujn guibansa'cnu te chonälajznu resa'nu.

⁷ La'tu laaca sasajtu. ¿Chu badxojn gu-soobtu xtidxlí Dios? ⁸Xhet Diosdi ni guletu badxojnditu. ⁹Anajtu tudxe'nsi cobgulaj rusaguijní yätxtil; si'c te cobgulajga najc te nigui ni caguluiit xtidx leii. ¹⁰Rialilazä xtidx Dad Jesucrist, ni'c nadiplazä la'tu; ananä ditu chalilajz stee diidx. Niluxh bejn ni cagusgueetu susacsí Diosni, chutis najcni.

¹¹Narä rebetzä, paru narä caguluiä chutu bee, si'c ruluii rexpejñ Israel, ¿xhi xcuent rusacsí rexpejñ Israel narä? Paru si'c caguluiä, dirutu chalilajz gudijx Jesucrist xtojlnu lo crujz. Luxh si'cpaczra rlajzreni. ¹²Rebejn nani cagusgueetu caniireni chutu bee, jmalaiiza gutiugreni tejpas lagajc tiejxhreni!

¹³La'tu rebetzä, agurejdx Diostu loj xtidxní te chalilajtu Jesucrist ni ruslaa bejn lo dojl. Colhuixgaa na'c xca'tistu redididxga dxejcti guntu si'ctis ni rlajz tiejxhtu, si'ctis ni riajbza yejctu. Colgacnäj sa'tu con yälrinälajz, tejni sigajc steeni. ¹⁴Sa'csi guiraa diidx ni caj lo leii con tejtis diidxre rsiojbni: "Chanälajtu sa'tu sigajc rinälajtu lagajc la'tu." ¹⁵Palga rdijltru, rauya'tu sa'tu, rajwtu sa'tu, ¡colnatiro! Andi lagajc la'tu gunijttu sa'tu.

Nani rchaglajz rebejn näj yäl nabajñ ni rudedd xtidx Dios

¹⁶Rniä lojtu, colguibajñ si'c ruluii xtidx Dios näjza Sprit Dian xtenni, te si'c na'c guibajñtu si'ctis ni rlajz tiejxhtu, si'c ni na-jctis xhigabtu. ¹⁷Sa'csi ni najc xhigab xten bejn rdx'e'ch loj xhigab Sprit Dian xten Dios. Sigajcza xhigab xten Dios dini gac teblloj con xhigab xte bejn. Rudxojntu loj sa'tu, ni'cni digacdi guntu dzuuñ ni rlajztu guntu. ¹⁸Luxh palga cagulijdx Sprit Dian la'tu, dxejc dirutu quiqiuñ guntu si'c ni caj lo leii.

¹⁹Guyasi jiembee bejn xhireni'c najc redzuun ni rujn rebejn nani di gumbee xtidx Dios. Dee najc redzuunga: yälrus-guee chää'l bejn, yälrusguee chää'l sa'reni, yälrusguee sa'ní che ruchaag sa' te dxap' con te bi'n loj redolgijdx, guiraa redolgijdx ni rujn niguii con gunaa, ²⁰yälrajn re-banäjb, yälbidxañ ni rujn daan bejn, yälrdx-echlajz loj sa'ní, yälrchagdijl sa'ní, yäl-

nayedx lo sa'ní, yälrdxecha', yälriu lagajc-tis laani, yälrlia' lo sa'ní, yälrlchaag lo te cuua bejn. Najza sa' dzunguijdxre rujnreni: ²¹yälrdxe'ch lajz, yälrugu't sa'ní, yälrsiojz, yälrauxha't, näjza guiraa dojl sa' redee. Sigajc ni balidxä la'tu xhi dxejga rulidxä la'tu naj. Nani rujn sa' redojl're direni jiu' loj xcälmibee Dios xhaguibaa.

²²Niluxh xtzuuñ Sprit Dian xten Dios najc yälrinälajz sa'ní, yälrbalajz lastooni, yälrbexdi lajzní, yälrbecdxí lajz sa'ní, yäl-najc bensa'c lo chutis bejn, yältagodzlajz, yälrlilajz, ²³yälnadolajz, yälrbneeb lastooni lo ni rlajz gun tiejxhni. Xheti te leii ni rudx-ojin gun bejn sa' redzuunre. ²⁴Niluxh ren-nani ahuilajz xtidx Jesucrist, abatio'ñreni guiraa redolgijdx ni rlajz gun tiejxhreni. ²⁵Palga rbajz Sprit Dian neñ lastoonu, do'o guibajñ si'c rnibee Sprit Dian guibajñnu.

²⁶Na'c guiliä'pnu lagajc xpala'nnu, na'c guidxech lajzní lo sa'nú, na'c gunembiidnu sa'nú.

6

Colgacnäj sa'tu

¹Sa'ä, palga chu tejtu ni abiajb nen dojl, lagajc la'tu nani aracbeetu xtidx Dios colgulijdx bejngä, colgacnäjni te guiriini nen dojl. Colnii lojni nadolajz, nasiñlajztu lagajc la'tu didi che guidon nägajcza la'tu jiajbtu nen dojl. ²Colhuii xhi rquiin resa'tu, colgacnäjreni te si'c gusoobtu guiraa redidix ni najc leii xten Jesucrist.

³Sa'csi nani rujn xhigab sacduxhni, yu'za chu najcni, niluxh rut najcdini, rusgueeni lagajcza laani. ⁴Tejgatu colcubeey xho najc xtzuuñ te fiitu la laaca najcni, dxejcti sajc guiliä'ptu lagajc xpala'ntu. Dxejc ditu guiquiin chu stee bejn guiliä'p xpala'ntu. ⁵Sa'csi tejga bejn susule'ni diidx lo Dios xhini'c bejnni.

⁶Nani casieed xtidx Dios nanab gacnäj bejn nani ruluiini, gudeedni tudxe'n xhix-tenni loj nani ruluiini.

⁷Na'c gusgueelu lagajc luj. Dios di-gacdi guigueeni, ni'c guira'ti dzuuñ ni rujn bejn lagajcza ni'c xca' bejn. ⁸Paru te bejn gun dzuuñ xcuentis tiejxhni, dxejc che guidzujn dxej xca'ni yälnsa'c, sin-it-loj tiejxhni, dizani jiu' loj xcälmibee Dios. Palga te bejn gun dzuuñ xcuent Sprit ni badeed Dios lojni, che gal yälnsa'c, sica'ní

yälnabajñ par tejpas. ⁹Ni'cni na'c guidxa-jgnu jiennu dzunsa'c te che guidzujñ dxej ni xca'ni yälnasa'c, xca'zanu te yälnasa'cro. ¹⁰Ni'cni nanab lał ni sajcni, gacnäjnu chutis bejn, ganiddoo resa'nu ni ahuililajz.

Yälrulijdx näjza xtixtios

¹¹Colhuilaa lacti reletredukh cacuaä lojtu con naápac. ¹²Guiraa reni rdxaglajz gun ni rlajztis tiejxhni, laa reni'c ni rlajz chutu bee, tedi tedreni trabajw xcient ni cuaj Jesucrist lo crujz. ¹³Lagajc reni ru' bee direni gun si'cni caj lo leii, niluxh rlajzreni chutu bee te guibaa lajzreni sa'csi bejn-reni gaan guyu' beega tiejxhtu. ¹⁴Luxh narä dilazä guibaa lo sa' recosga; rbaatis lazä sa'csi gujt Jesucrist, cuajni lo crujz, te gudijxni rextojlnu. Ni'cni par narä xhetru xhi cos-guijwdxdi yu' lo quedxliujre, diruna guichaglazä gunä redolguijdx xten quedxliujre. ¹⁵Che ahuililajz te bejn xtidx Jesucrist, xhetru sajcdi chu bejn bee, xhetza sajcdi na'c chu bejn bee. Nani sajctis najc gacni si'c te beñcoob lo xtidx Jesucrist. ¹⁶Guiraa renani nabajñ si'cni ruluii xtidx Jesucrist sibedxi lajzreni xcient xcälrulaslajz Dios. Näjza rexpeq Israel nani ahuililajz xtidx Jesucrist sibedxi lajzreni.

¹⁷Na'cru guche'chta narä sa'csi redib ni yu' tiehxä najc si'c te seen narä anacä te xmos Jesucrist.

¹⁸Rebetzä, gacnäj Dad Jesucrist guiraga-jctu con Sprit Dyan xtelli. Sugacni si'c.

Te Guijtz Lo Reben Efesios

Bacuaa Pabl lo reben guidoo nen guedx
Efeso

¹ Narä, Pabl, nacä apost xten Jesucrist sa'csi si'c rlajz Dios. Cacuaä guijtzre loj rebejn nani huililajz xtiidxni, loj reni rujn si'cpac rniini nen guedx Efeso. ² Xca'tu yälracnäj, yälrlbedxi lajz xten Xtadnu Dios, näjza xten Dad Jesucrist.

Rusule' Pabl xtidz Jesucrist

³ Rliä'pnu xpala'n Dios, Dad näj Xtad Jesucrist. Dios racnäj nuure, xcient Crist runiidxni guiraa reyälracnäj xca' lastoonu, astoo yu'lalu xhaguibaa. ⁴ Laani gule nuure, che gajdli guirixtje guedxliujre, te gacnu xpejnni, te guibañnayanu nez lojni con yälrinälajz. ⁵ Sigajcza anungäj xca'ni nuure te gacnu si'c xi'npacni sa'csi abiääd Jesucrist te guslaani nuure nen dojl, si'c ni gunibee Dios sa'csi baslajzni nuure. ⁶ Gucnäj Dios nuure te guiliä'pnu xpala'n Dios, sa'csi lagajc laani acua'ni nuure, abejnni nuure tejsi con xi'nni ni sanälajzni. ⁷ Laani baslaani nuure nen dojl xcient xtiejnni, laani badzucajni xtojlnu xcient xcärlruslaslajzni ⁸nani banidxduxhni loonu. Guideb yälñajn, guideb xcäriejn ⁹basule'ni loonu xhigab xhiga'tzni xcient redzuun ni rlajzni gunni, xhigabza ni bejnni galooli. ¹⁰ Luxh sidzijn dxej sisiojbpac xhigab ni bejn Dios. Che guidzijn dxejga sutojp Dios guiraali, sudeedni guinibee Jesucrist guira'ti ni yu' xhaguibaa, sigajc recos ni yu' lo guedxliuj.

¹¹ Arajpnu te xcälnasa'c Jesucrist, sa'csi galooli bejn Dios xhigab guniidxni yälñasa'cga. Lagajc Dios benchee guira'ti ni yu', luxh rujnpacni nani abejnni xhigab najc laaca gunni ¹²te guiliä'p bejn xpala'n xcälrnibeeni xcientnu, nani ganiddoo biloilaaznu xtidz Jesucrist. ¹³ Näjza la'tu, che bejin diajgtu redidx gulii, rediidx ni ruslaa bejin lo dojl, dxejc huililajztu xtidz Jesucrist, dxejc gujczatu tejsi con laani. Dxejc cu'a'tu Sprit Dyan xten Dios, ni'c najc si'c seen ahuililajztu, si'cni bia'n Dios diidx. ¹⁴ Baniidx Dios Sprit Dyan xtenni te cuääzni nen lastoonu, te ni'c najc seen xca'nu yälñasa'c nani guniidx Dios che abaluuxni xtzuunni, nalajznu guslaani

guiraa rexpejnni te guiliä'preni xpala'nni lo xcälrnibeeni.

Rniab Pabl gudeed Dios yälñajn loj renani ahuililajz

¹⁵ Ni'cni näjza narä, sa'csi abiejn diagä xho rililajztu xtidz Dad Jesucrist näjza xho sanälajztu guiraa rexpejñ Jesucrist, ¹⁶dina gusanä gudedä xquixtios lo Dios xcient la'tu. Rnaduxh lazä la'tu che rniabä lo Dios. ¹⁷ Rniabä lo Xtios Dad Jesucrist, xtagdi ni rniibee xhaguibaa, guniidxni lojtu te yälñanduxh, te yälrluliloj recos xhiga'tz te gacbeduxhrutu xcient Gueb Dios. ¹⁸ Rniabäza lo Dios jianij xcäriejntu te gacbeetu xhini'c najc speranz xten yälracrejdxtu lo xtiidxni, te gacbeetu lacti saru, lacti sajc yälñasa'c ni gudeed Dios lo Jesucrist näjza loj rexpejnni, ¹⁹te gacbeeza lacti gurobduxh najc yälrnibeer nani rajpni nez loonu nani ahuililajz xtiidxni. Guiraa redee ruluii lacti nadip najc yälrnibeer xten Dios. ²⁰ Lagajc yälrnibeere bejn dzuu par Jesucrist. Con yälrnibeere baspajn Dios Jesucrist lo rebengut, te gurejni xladbee Dios cadro rnibeeni xhaguibaa. ²¹ Maazru sajcnii lo chutis gubier, lo chutis yälrnibeer, lo xhitis yälñadip, lo chutis ni rnibeer; maazru sajcnii lo chutis nani abibee te guinibee, sigajc najc, sigajc neq redxej ni churu jiääd. ²² Niluxh badeed Dios guira'tini ladznaa Jesucrist, laazani bejn bibeer Jesucrist gunibeeni lo guiraa xhixten xquidooni. ²³ Reben guidore najc si'c tiejxh xten Jesucrist, luxh sigajc rudeed Dios guiralii loj Jesucrist, sigajcza rudeed Jesucrist guiralii loj rebejn ni najc xquidooni.

2

Ruslaa Dios nurnu sa'csi rinälajzni nurnu

¹ Laani baniidxni yälñabajn lojtu che najectu si'c Bengut nez loj Dios sa'csi ru-juntu dojl. ² Galoo gubajtu lo dojl, entis lo xnez guedxliujre guzajtu, biutu xtidz bendxbab nani rnibeeri guedxliujre. Sprit xtenni rujn dzuu nen lastoo rexi'nni nani di gucuadiazg xtidz Dios. ³ Luxh galoo, näj nuure nadxaagnu lojreni, biennu si'c ni rlajz tiejxhnu. Dxejc biennu si'ctisni rlajz tiejxhnu, si'ctisni biajb xhigabnu. Nungäj guidxe'ch Dios loonu, sigajc bidxe'chni

loj guiraa reben guedxliuj. ⁴ Niluxh balaslajz Dios nuure. Con xcälsanälažduxhni huinälajzni nuure. ⁵ Mase anajcnu bengut lo dojl, laani baniidxni yälnabajn loonu. Rajpnu yälnabajnre con Jesucrist. Sa'csi balaslajzni nuure baslaani nuure neñ dojl. ⁶ Baspanasacni nuure con Jesucrist; sigajcza bejnni cuenäjnu Jesucrist xhaguibaa, ⁷ te nen redxej ni churu jiääd, guluilojni lacti sajc xcälnasa'c xten yärlulaslajzni, ni'l sanälažjini nuure, najcni huenduxh loonu por Jesucrist. ⁸ Sa'csi rulaslajz Dios nuure, ni'l baslaani nuure neñ dojl che huililajznu xtiidxn. Luxh et sa'csi yu' xhi biennu; dee nadj nani banidx-xlia' Dios loonu. ⁹ Xhet xcient xhi dzunsa'cdi ni biennu, te di chu tejtu gac nayedxlajzdi. ¹⁰ Dios nadj ni benchee nuure. Sigajcza con Jesucrist bejnni gacnu bejn ni rujn dzunsa'c nani galooli agunibee Dios jienpacnu.

Yälrbedxilajz ni rajpnu por Jesucrist

¹¹ Ni'l colsnaj lajztu xho guijctu galoo. Ditu niajc rexpejn Israel. Rniireni la'tu 'benzijt' sa'csi ditu chu bee si'c ru' rexpejn Israel. Sa'csi lagajc con naareni rusäleni bee. ¹² Dxejc suga'tu ditu gumbee Jesucrist. Zijt yu'tu loj rexpejn Israel, najctu benzijt. Nicla gumbeetu rediidx ni bia'n Dios loj rexpejn Israel. Ditu niunloj guslaa Dios la'tu lo dojl, dizatu niembee Gueb Dios lo guedxliujre. ¹³ Niluxh naj ayu'tu lo Jesucrist, la'tu ni guyu' zift lo Dios galoo. Naj agubigtu lo Dios sa'csi abia xtojltu con xtejnj Jesucrist. ¹⁴ Jesucrist nadj ni rbecdxi lajznu. Laani bejn gujc rexpejn Israel tejsi con rebenzijt. Laani badzucajni redzuun xten leii te gujc rexpejn Israel tejsi con rebenzijt. ¹⁵ Lagajc con tiejxh Jesucrist ni gojl lo crujz banijtji redzuun xten leii nani bejn bidxe'ch rexpejn Israel lo rebenzijt. Lagajc laani bejnni bidxagsa'reni te gujcreni tejsi che huililajzreni xtiidxn, gujcreni te bencooob. Dxejc gulecdxini lajznireni. ¹⁶ Con yälgujt ni gujtni lo crujz badzu'ni guiro'preni lo Dios te gujcreni tejsi. Si'c guläjz rdxechnäj sa'reni.

¹⁷ Cajza lo guijtz rediidxre:

Biäädni te basule'ni xho ga'p rebejn yälrbedxi lajz rebejn ni suga' zift lo Dios näjza reni suga' gajxh lo Dios.

¹⁸ Laani bejn sajc jiu' guiro'p cuaa bejn lo Dios con tejsi xhigab, näjza tejsi Sprit.

¹⁹ Ni'cni dirutu gac benzijt, bejn ni rut numbeedi. Anajctu tejsi con rexpejnni, najczatu sa' rexpejn Dios. ²⁰ La'tu najctu si'c te yuro. La'tu najctu si'c padeer xten yu'ga. Reapost näjza reprofe't nadj si'c cheni birixtiey yu'ga. Jesucrist nadj si'c guiro ni gusuj squin yu'ga, guij ni sajcrus, sa'csi Jesucrist rnibee. ²¹ Cayunsa'c Dios yu'ga, cayajc yu'ga con la'tu, caroobni te gacni xquidodxan Jesucrist. ²² Sigajcza la'tu näjza rexpejn Israel ni huililajz najctu tejsi con Jesucrist. Cagustioobtu guidooga te neñni cuääz Sprit Dyan xten Dios.

3

Pabl nungäj chanä xtidx Dios lo rebenzijt

¹ Ni'cni yu'ä neñ latzguiib, narä, Pabl sa'csi cagusule'ä Jesucrist, te jiädnää xtiidxn lojtu, najctu benzijt. ² Pet abiejin diajgtu lacti hueen nadj Dios baniidxni dzuunre loä, jiädnää xtiidxn lojtu. ³ Dios baluini xhigab-xhiga'tzni loä (si'cni bacuaä lojtu galoo). ⁴ Che goltu guijtzga, sacbeetu cati ananä rexhigabxhiga'tz xten Jesucrist. ⁵ Xhigab-xhiga'tzre di bejn niembee galoo, niluxh naj Sprit Dyan xten Dios abaluinni loj reapost näjza loj reprofe't. ⁶ Dee nadj xhigab-xhiga'tzga: por rediidx xcient Jesucrist ni ruslaja bejn neñ dojl rujn Dios gacreni nadj benzijt tejsi con reni nadj xpen Israel, guidxaag sa'reni, gacreni tejsi bejn. Guiro'preni xca' yälnasa'c si'c bia'n Dios diidx.

⁷ Narä nacä te apost xten dzuun ni baniidxni, por xcälrulaslajz Dios ni cuaxlia'ä. Dios baniidx dzuunre loä con xcälrnibeduxhni. ⁸ Luxh masä guxiuru sacä lo guiraa rexpejnni, loä baniidxni xcälracnäjni te lo rebenzijt gusule'ä xtiidxn, nalajznu rediidxcoob xcient xcälnasa'c Jesucrist, te gusule'ä lo guiraa bejn rexhigabxhiga'tz nani bacua'tz Dios lojnu galooli. Dios benchee guiralii ni yu'. ¹⁰ Si'c gujc te naj jien guiralii yälnanduxh xten Dios. Reni nadj xpejnpacni neñ xquidooni guluii yälnajnre lo rexangl Dios, loj reni rnibee xhaguibaa. ¹¹ Galooli bejn Dios xhigabre par tejpas, ni'cni biääd xtdadu Jesucrist te guzobj xhigab ni bejn Dios. ¹² Con Jesucrist dinu guidxejb guibignu, guiniabnu lo Dios sa'csi ahuililajznu xtiidxn. ¹³ Na'c gac-huin

lajztu sa'csi cadedä trabajw xcienttu.
Colguibalajz; dee najc xcälnasa'ctu.

Xcälsanälajz Jesucrist

¹⁴ Ni'cni ruzuxhibä nez loj Xtd Dad Jesucrist ¹⁵ nani badeed lajni lo guiraa reni yu' xhaguibaa näjza reni yu' lo guedxliuj, ¹⁶ rniabä loj Dad xhaguibaa gutijpni lastootu con yälrnibee xcient Sprit Dxn xtenni, sa'csi yuduxh xcälnasa'cni lo xcäldimbicha'nii xhaguibaa. ¹⁷ Rniabäza lo Dios te jiädläjz Jesucrist neñ lastootu sa'csi ahuililajztu. Te che agusudzu'tztu, agusutijptu lo yälrinälajz ¹⁸ dxejc sajc gacbeetu sigajc guiraa rexpejnpacni lacti gulajg, lactiza siool, lacti jiät, lactiza jiaa najc yälsanälajz xten Jesucrist. ¹⁹ Te gumbee zatu xcälsanälajz Jesucrist ni najc gurobduxtej, digacdi guichalonuni. Te chaza lastootu, näjza xcäriejntu con guiraa rexçälnasa'c Dios.

²⁰ Dias rnibeduxh. Sajc gunidxduxhruni loj xhitis ni rniabnu lojnti, loj recos ni riennu xhigab. Con Sprit Dxn ni rujn dzuuñ neñ lastoonu suniidxni reyälnasa'c. ²¹ Loj Diosre coldeed xquixtios. Colguliaj'p xpala'nni nen guidoo xcient Dad Jesucrist guira dxej, par tejpas. Sugacni si'c.

4

Por Sprit Dxn nadxaag sa'nu

¹ Narä yu'ä lojtiis Jesucrist te rsule'ätis xtiidxni. Ni'cni rniabä lojtu, guibajntu si'cni nungäj, si'cni bejnztatu xhigab cheni gurejdixni la'tu. ² Colguibajn con yälnalaslaajz, näjza yälnadolajz, colcuedcxj lajztu. Colyujn huant resa'tu con yälrinälajz sa'ni. ³ Colhuii te guidxaag sa'tu gactu tejsi con Sprit Dxn ni ruscuedxilajztu. ⁴ Si'c tejsi tiejxh najcnu loj Jesucrist, tejsiza najc xhigabnu con laani, tejsiza najc yälrulnloj ni rajptu xcient diidx nani gurejdxtu. ⁵ Rajptu tejsi Dad, tejsi yälrililajz, tejsi yälröbnis, ⁶ tejsi Dios, tejsi Xtd guiraanu nani rnibee guira'ti lo guiraanu.

⁷ Lo tejganu abaniidxni dzuuñ si'ctis bejn Jesucrist xhigab guniidxni lo tejganu.

⁸ Ni'cni caj lo reguijtz:

Che huä'pni xhaguibaa, cadre rnibeeni, abejnni gaan loj guiraa yälrnibee, dxejcti badeedni dzuuñ lo rexpejnni lo guedxliuj.

⁹ Xhi säloj cadro caj, "huä'pni"? Dee säloj ganid biäjtji maazru jiät lo guedxliuj.

¹⁰ Lagajc nani biäjtga, lagajc laani huä'pni jiaaru lo guiraa rexhaguibaa te sajc guinibeeni guibaa näjza guedxliuj. ¹¹ Lagajc laani badeedni xtzuuñ tejgareni. Yu'reni badeedni gac apost, yu'reni badeedni gusule' xho ruslaa xtiidxni bejn lo dojl, sgaiireni badeedni gac si'c ni ga'p reben guidoo, sgaiireni badeedni guluii rexpejnni.

¹² Guiraa redee badeedni te guluiireni rexpejñ Jesucrist, te gunreni dzuuñ te gustajlreni rebejñ ni gac xquidoo Jesucrist.

¹³ Nungäj gac dzuuñ che guidzujñli dxej ni nadxaag-sa'nu guiraanu loj yälrililajz, che guidzujñli dxej riembesa'cnu Xi'n Dios, dxej anajcnu benguyajl lo xtiidxni, si'c te ni aguroob loj xcälrnibee Jesucrist.

¹⁴ Dirunu gac si'c rebiuñ ni tera'tsi rusiech lajzni, rucuadijgreni xtidx chutis bejn, mase xhitis diidx ruluiini. Dxejc riajbreni lo redidx-xhii xten bejn nani rusguee, nani cabäjtzis gusguee bejn. ¹⁵ Maazru hueen chonuunu loj redidxlii xten Jesucrist con yälrinälajz te tioobnu lo guiraa recos xten nani rnibee, lagajc Jesucrist. ¹⁶ Loj Jesucrist nazdu'tz guiraa rexpejnni, te si'cni nazdu'tsa'reni sääreni, najcreni tejsi loj tiejxh Jesucrist, racnäj sa'reni segun xhi dzuuñ rujn tejgareni, casiedrurení te cayajc xhidajlru rebejngä con yälsanälajz.

Te yälnabançoob con Jesucrist

¹⁷ Laa ni'cni rniä rniabäza con laj Dad Jesucrist na'cru guibajntu si'c nabajñ rebejñ nani di gumbee Dios. Laareni rujn si'ctis ni riajb yejcreni. ¹⁸ Nayääl xcäriejnreni, direni ga'p xcälnabajn Dios sa'csi nadduxh las-toorení. ¹⁹ Redee che gucnajd xcäriejnreni gusloj bejnreni guiraloj yärltujy, guiraa redojl ni di nungäj gunreni. ²⁰ Niluxh la'tu xhet si'cdi biseedtu loj Jesucrist. ²¹ Palga abiejn diajgtu xtiidxni, niluxh abaluuiini lo-jtu didxlíi ni siädnä Jesucrist, ²² colgusaan yälnabanyujxh ni gojptu: Lo yälnabanyujxh rujn bejn si'ctis ni rlajzni. Dxejcti si'c runijtni la'tu lo Dios. ²³ Colgusiech lajzti, colgusia xcäriejntu, ²⁴ te gactu bençoob nani bejn Dios, colchanuu te yälnabansa'c, te yälnabanya xten xtidxlíi.

²⁵ Colguro'n diidx-xhii, colnii didxlíi lo resa'tu sa'csi tejsi najcnu guiraanu.

²⁶ Che guidxe'ctu, na'c guntu dojl. Na'c gusaantu chu xcälrdxe'ctu guideb dxej che chääzli gubijdx. ²⁷ Na'c gusaantu jiu' bendxbab nen lastootu.

²⁸ Nani rilajn, na'cru cuanni. Laaca gunni dzuun con naani te gunni te dzunsa'c nani gudeed meeł lojni te gac gacnäjzani rebejn nani xhet rajpdi.

²⁹ Na'c gusaantu guirii nicla tej didxgijdx ro'tu. Colnii ganax didksa'c te gacnäjni guisieed reni rucuadiagj xtiidxtu. ³⁰ Na'c guntu gac-huin lajz Sprit Dyan xten Dios. Laani najc te seen xten Dios nactu xpejñ Dios, ni'c rbäjzni nen lastootu che guidzujnli dxej ni chäätu lo Dios.

³¹ Colguro'n yälhabandxuudx xtentu, näj yälrdxe'ch, näj yälrdxagdijl sa'ni, näj yälbedxa', näj yälrgue. Colguibicaj lo guiraa redojlga, na'c gactu benguijdx. ³² Nungäjl gactu huen loj resa'tu, colglaslajz resa'tu, colsiäjl lajztu con resa'tu ni rujn dojl lojtu si'c rsiäjl Dios lajzni rextoljtu xcuent Dad Jesucrist.

5

Xho nanab guibajn rex'i'n Dios

¹ Colguibajn si'c nabajn Dios, sa'csi na-jctu xi'nni nani sanälajzni. ² Colchasanäj yälsanälajz sigajcni huinälajz Jesucrist nu-ure chemi badeedni lagajc laani lo Dios, cuajni lo crujz, gujtne. Laani gujcni si'c gojn, gujczani yälrbibyaal ni bidxaglajz Dios.

³ Nicla gusä'ttu yälrusguee chääl bejn, nicla redoł dzuudx, niclaza yälsanälaztej xhixtentisni. Nicla gusä'ttuni lo sa'tu, sa'csi xhet si'cdi nungäjl gun bejn ni nabay-naya. ⁴ Sigajcza colcuälaz diidx ni rujn xtuuy, näjza didxnajd, näjza didxnaj nani digac laaca. Colgudeedtis xquixtios lo Dios. ⁵ La'tu anajntu nicla tej ni rusguee chälbejn, nicla tej bendxbuudx, nicla tej ni sanälaztej xhixtentisni, nicla renani rajañ rebanäjb, nicla tej reni'c di xca' yälrasa'c loj Jesucrist, dizareni jiu' lo xcälrnibee Jesucrist, xcälrnibee Dios. ⁶ Na'c gusaantu gusguee bejn la'tu con diidx ni xhet sajcdi sa'csi xcuent redzuunga riäad xcälrdxe'ch Dios loj rebejn ni di gusoob xtiidxni. ⁷ Na'c guntu sigajc rujnreni.

⁸ Galoo nacäjyts xcäriejntu gubajntu, luxh naj abasanij Jesucrist xcäriejntu. Colguibajn si'c nungäjl guibajn nani

abianij xcäriejnni. ⁹ Sa'csi nani abianij xcäriejnni rujn dzunsa'c, rniini didxgulii.

¹⁰ Colguisieed xhini'c rchaglajz Dios.

¹¹ Na'c guntu redzundxuudx nani rujn reni nacäjy xcäriejnreni, coltilnäj reni rujn sa' dzunguwdx. ¹² Sa'csi te xtujyli najc jieinu diidx xcuent xtzunreni ni runxhiga'tzreni. ¹³ Niluxh guiraa sa' redzuunre ni rdilnäjnu, huenlis i sien xhi najcreni, suzenni lo xpianij Jesucrist. Sa'csi guira'ti ni ruzen najc nianij. ¹⁴ Ni'cni caj loj reguijtz, räjp Dios:

Gubajn, huistie luj ni rejslu.

:Huistie lo dojl, luj ni naga'lü lo dojl si'c bengut,

te gusanij Jesucrist xcäriejnl!

¹⁵ Colhuii, colsin, na'c guibajntu si'c te bejn nani di gacbee, colguibajn si'c bejn nani yu' xcäriejnni. ¹⁶ Coltedsa'c redxej sa'csi neñ redxejre ganax cosgujidx rujn bejn.

¹⁷ Ni'cni na'c guibajntu si'c rebejn nani di gacbee, colyacnasin, te gacbeetu xhini'c najc ni rlajz Dad xhaguibaal guntu.

¹⁸ Lacuua yätu nejp nani runijt bejn, colgapchee Sprit Dyan xten Dios nen lastootu.

¹⁹ Colnii loj resa'tu rediidx nani gunii rebejn tiemp gulä'preni xpala'n Dios, colyelza redij xten Dios, con reyärliel colguiliä'p xpala'n Dios neñ lastootu. ²⁰ Di jiäl lajztu gudeedtu xquixtios lo Dios xtadnu con laj Dad Jesucrist.

Xho guibañnjäj sa' rexpejñ Jesucrist

²¹ Sa'csi rajntu Jesucrist, colguosoob xtidx sa'tu.

²² Lojtu, regunaa ni abachñaa, rniä scree: Colguosoob xtidx chäältu si'c rusoobzatu xtidx Dad Jesucrist. ²³ Sa'csi niguii rnibee gunaa si'cni rnibee Jesucrist xquidooni, niluxh laazani ruslaani rexpejñ guidooni lo redojl, najcreni si'c tiejxhni. ²⁴ Ni'cni, sigajc rusooob rebejñ guidooga nani rnibee Jesucrist gunreni, sigajcza nungäjl gusoob reguña ni abachñaa nani guinibeetis chäälenri gunreni.

²⁵ Lojtu, reniguii ni abachñaa rniä scree: Colchanälajz chäältu sigajc ni huinälajz Jesucrist rexpen guidooni, badeedni lagajc tiejxhni loj Dios cheni cuajni lo crujz por laareni ²⁶ te basiani xtojl rexpen guidooni, te gujcreni te beñcoob, abidiib lastooreni con xtiidxi si'c rdiib te cos con nis ²⁷ te che xca'ni rexpen guidooni, najcreni te

guidoo ni sajcrū, te guidoo nani xheti xtojlñi, te guidoo nani sugadzu'tz, te guidoo xhet xhi riäädxdi, najcni te guidoya, xheti xhi xtojlñini. ²⁸ Sigajcza, te niguui nani abachnaa nungäjl chanälajz chäälni sigajc sanälajzni lagajc tiejxhni. Nani sanälajz chäälni sanälajz lagajc laani. ²⁹ Ruti chu te bejn ni rbälaz tiejxhni; alga rajpni tiejxhni ruyaanni tiejxhni sigajc rajp Jesucrist rex-pen guidooni. ³⁰ Najczanu tejsi loj tiejxh Jesucrist, loj xpäälni, loj rextuzjtni. ³¹ "Ni'cni che guchnaa te niguui rusa'nni xtadni, xnanni, te xca'n gunaa, te gac guiro'preni si'c tejsi bääl, si'c tejsi bejn." ³² Dee najc te diidx xhiga'tzduxh; li te "żchuj?" najcni. Niluxh narä rniä xcuent Jesucrist con rex-penguidooni. ³³ Niluxh nanabpac chanälajz tejgatu chäältu sigajc sanälajztu tiejxhtu. Dxejcti gunaa ga'pzani xpala'n chäälni.

6

¹ Lojtu biuux, rniä scree: Colgucuadi-ajg xtidx Jesucrist, colgusoob xtidx xtadtu sa'csi ni'c sajc nez loj Dios. ² Colga'p xpala'n xtadtu, xnantu, sa'csi ni'c najc didx galoo xten leii nani runiidx xhi xca'tu palga gu-soobtu diidxga; ³ "Te saruduxh guibajntu xchero lo guedxliujre."

⁴ La'tu, Dad ni najc guzajn, na'c guntu guidxe'ch rexi'ntu lojtu. Colguslaareni con yälnaj, colgilijdxreni con xtidx Jesucrist.

⁵ La'tu ni najc mos, colgusoob xtidx xlamtu lo guedxliujre, colcuadajg xti-idxn, xhet xhi steedi xhigabdi guntu neñ lastootu. Colyejn xtzunni si'cni najc xtzunni Jesucrist. ⁶ Colyejn xtzunni, niluxh xhet che suga'tisreni, cahuiireni, parsi jiansa'ctu lojreni. Maazru hueen guntu dzunu si'c xmos Jesucrist; colyejn guira'ti si'cni rujntu xtzunpactu; si'cni rlajz Dios. ⁷ Colyujn xtzunni guideb las-tootu si'c xmos Jesucrist, et si'cdi xmos ben guedxliuj. ⁸ Anajntu dzunsa'cni gun tejgatu, lagajcza xcuent ni'c xca'tu loj Dad Jesucrist, mase najctu mos o mase rutlojdi yu'tu.

⁹ Lojtu, relam, rniä scree: Sigajcza colyujn lojreni. Colgusaan yälrusacsí, sa'csi anajntu yu' xlamtu xhaguibaa, luxh tebloj najc guiraa rebejn nez lojni.

Nani gacw rexpejñ Jesucrist lo guerr

¹⁰ Didx lult ni rniä, sa'ä, najc scree: Col-sutijp lo xcälracnäj Jesucrist, colsduzu'tz lo xcälnadip xcälrnibeeni. ¹¹ Colgajcw xhabguuib xten Dios te gac sudzu'tztu lo reyälrusguee xten bendxbab. ¹² Sa'csi xhet ben guedxliujtis cadilnäjnu. Cadilnäjzanu reguxhtis xte yälcäjy, näja reyälrnibee, rebejn nani rnibee loj reyälcäjyre, näja rexangl bendxbab nani rnibee bej xten guedxliujre. ¹³ Ni'cni colca' guideb lad-guiib xten Dios nani runiidxni loonu te gac sudzu'tznu neñ dxej ni guideednu tra-bajwduxh, te che agudejdni, lałtis sis-udzu'tznu. ¹⁴ Colsduzu'tz pues. Xque'tu colguliib sindoor-guiib ni najc xtidx Jesucrist, colgajcw gamangw-guiib ni najc rextzunsa'c xten Dios ni rujntu. ¹⁵ Colcuaa gurach-guiib ni'tu (ni'c najc xtidx Jesucrist ni ruscuedxi lajztu). ¹⁶ Colca' escud-guiib ni najc yärlilajz te con yärlilajz xtidx Dios di bendxbab gun gaan gusguee la'tu con rextidx-xhiini. ¹⁷ Colca' yälruslaa xten Dios lo dojl si'c te xhumbrel-guiib chu yejctu; colca'za lans xten Sprit Dxan xten Dios ni najc xtidx Dios. ¹⁸ Colnab lo Dios guiraa dxej; colnab lojni con Sprit Dxan xtelli; colsusintis; na'c jieedtu guiniabtu lo Dios xcuent guiraa xpejnni. ¹⁹ Colnabza lo Dios por narä te guniidx Dios diidx cheni gal guiniä, te na'c guidxebä guiniä che gulüä didx-xhiga'tz xten yälruslaa bejn lo dojl. ²⁰ Xcuent rediidxga ni yu'ä neñ latzguiib, caduä con cadeñ. Ni'cni colnab lo Dios te na'c guidxebä guiniä rediidxga si'cpacni säbyäjl guiniäni.

Lult xtixtios

²¹ Niluxh te gacbeetu xho sasaj rextzunä, nägajcza xho yu'ä narä, Tíquico, sa'nu ni sanälajznu, ni runsa'cza xtzun Dad Jesucrist, siääd lojtu te gusule'ni diidx. ²² Laapacni ruxhalä lojtu, te gacbeetu xho yu'nu, te si'c guscuedxini lajztu.

²³ Rniabä yälrbedxilajz par resa'nú, näja yärlilajz con yälsänälajz xten Dios Xtadnu näja xten Dad Jesucrist. ²⁴ Gacnäj Dios guiraa reni di gusguee, reni sanälajzpac Dad Jesucrist. Sugacni si'c.

Te Guijtz Lo Rebeñ Filipos

Latzguiib yu' Pabl bacuaani loj rebenguidoo xten guedx Filipos

¹ Pabl näjza Timoteu, nani najc rexmos Jesucrist, rucuaanu guijtzre lo guiraa rex-peñ Jesucrist nani rbäjz guedx Filipos, loj rebeñ nani ruluij xtidx Dios neñ reguidoo näjza loj rediaconos. ²Gacnäj Dios la'tu con yälribedxi-lajz xten Xatdnu näjza xten Dad Jesucrist.

Rniab Pabl lo Dios xcuent rebeñ nani rililajz

³Che rnaj lazä la'tu, rudedä xquixtios lo Dios. ⁴Che rniabä lo Dios, rbaa lazä rniabä lo Dios xcuent la'tu, ⁵sa'csi abidx-aag sa'nu lo xtidx Jesucrist che guslojli huililajzu hasta näjli. ⁶Ananchéä Dios nani gusloj cayunsa'c dzuun nen lastootu, lagajc laani suluxsa'c dzuunga dxejli ni jiääd Jesucrist. ⁷¿Xhiru xhigab nungäj gunä? Ni rapä la'tu neñ lastoä sa'csi cayacnäjtu narä nen latzguiib luxh rsiudzu'tzu riye'tzu lo bejn, gulii najc rediidx nani rusule'ä xcuent Jesucrist näjza la'tu rusule'tu rediidxga. ⁸Dios nanchee xho rbannäåtu, xho sanälazä guiraatu lo xcälsanälajz Jesucrist. ⁹Rniabä lo Dios te tioobru xcälrinälajzu näj xcälnajntu nägajc churu xcäriejn guiraatu, ¹⁰te cuetu nani najc dzunsa'c te si'c guiban nay-atu, te na'c ga'ptu nicla tej dojl cheni jiääd Jesucrist. ¹¹Te guidxa lastootu yälناسا'c xten te yälنابا'c ni runiidx Jesucrist, te guspaa lajztu Dios, guiliä'ptu xpala'nni.

Jesucrist najc xcälnabanä

¹²Rlazä gacbeetu betzä: guiraa nani gusacä ni'c cayacnäj guire'chru xtidx Jesucrist. ¹³Ni'c guiraa rebeñ, renani yu' jusgaad sigajc renani yu' garencalajt, anajnreni niäüä latzguiib xcuent Crist. ¹⁴Xhidajlru resa'nu cheni gubceereni yu'ä latzguiib, gusudzu'tzru lajzreni, direni nidxejb, guniirurenii xtidx Dios.

¹⁵Gulica yu' reni rusule' xtidx Jesucrist sa'csi rdxe'ch lajzreni, rdxe'chzareni loä. Yu'za reni rusule' xtidx Jesucrist sa'csi laaca najc xhigabreni. ¹⁶Yu'reni rusule' xtidx Jesucrist sa'csi rdxe'chreni, xhet sa'csi laaca najc xhigabreni, alga rujnreni xhigab gustiooburenii trabajw nani

tedä nen latzguiib. ¹⁷Niluxh yu' reni rusule' rediidxga sa'csi sanälajzreni Jesucrist. Anajnreni yu'ä latzguiibre te gusule'äru guli-ipac najc xtidx Jesucrist. ¹⁸Niluxh ¿xhiru najcni? Palga rujnsireni laaca o palga guli-ipac laaca najc xhigabreni rusule'reni xtidx Crist; rbaa lazä sa'csi care'ch xtidxni niluxh sibaaru lazä. ¹⁹Ananä laaca guiriä loj guiraa recosre sa'csi canabtu lo Dios xcuentä. Luxh xcälracnäj Sprit xten Jesucrist ²⁰rujn runloä, rbäzäza dina jianxtuiä. Ni'cni dina guidxebä guiniä, si'cni runäpac, sigajcza runä naj te gac guiliä'pä xpala'n Jesucrist con tiexhä palga guibanä o palga guetä. ²¹Sa'csi palga guibanä, su'ä lo Jesucrist; luxh palga guetä sunäru gaan. ²²Palga guibanäru lo guedxliujre, sajcru gunä xtzuun Dad Jesucrist, ni'cni dina gacbeä xhinic cueä xca'ä. ²³Nagajn najcni par narä cueä lo guiro'preni. Te lajt runä xhigab: malaii guetä te cha'a cadro yu' Jesucrist sa'csi ni'c najc hueenru par narä. ²⁴Niluxh stee lajt nancheä nungäj guibanäru lo guedxliujre xcuent la'tu. ²⁵Niluxh narä racbeäpac sianniääru la'tu, su'äru lojtu te chanuurutu lo xtidx Jesucrist, te guibalajztu lo yälrililajz, ²⁶te guibalajzruntu xcuentä loj Jesucrist che guibisacä lojtu stehuält.

²⁷Colhuiitis guibajntu si'cpac ni rnii xtidx Jesucrist, te palga jiädhuiätu o palga rutu narä, jiejn diagä sugadzu'tzu, ru-jntu tejsi xhigab, nadxaag sa'tu rujntu tejsi dzuun con yälrililajz xten xtidx Jesucrist. ²⁸Na'c guidxejbäditu renani rdxe'ch lojtu. Laarenri huelnisi ruseñ agunijtreni ni'c rdxe'chreni, ni'cni la'tu huelnisi ruseñ agulaatu neñ dojl si'c baniidx Dios, ni'cni ditu guidxe'ch. ²⁹Sa'csi lojtu abaniidx Jesucrist chalilajzu xtiidxn. Niluxh xhet ni'ctis; nägajcza teditu trabajw xcuent laani. ³⁰Cadejdutu lagajc trabajw ni cahuitu gud-edä luxh naj riejn diajgtu cadedsicä trabajwga.

2

Xcälnalaslaajz näjza xcälgurobdouxh Jesucrist

¹¿La ruspaa Jesucrist lajztu? ¿La racnäj xcälrinälajztu la'tu? ¿La yu' Sprit Dhan xtenni con la'tu? ¿La yu' xcälsanälajzni näj

xcälrlulaslajzni lastootu? ² Palga yu'ni, colguspaa lazä, colyejn tejsi xhigab con narä, colga'p lagajc yälsanälajzga, colguidxaag sa'tu, colyejn tejsi xhigab. ³ Na'c guntu nicla tej dzuun sa'csi cayutu lagajc la'tu, na'cza guntu dzuun te chä'p xpala'ntu. Colyejn xtzuuntu con yälnalaslajz, colhuij loj sa'tu si'c beproru lojtu. ⁴ Na'c jiu chu tejtü lagajctis xhixtenni, coljiu tejgatu xhixten sa'ni.

⁵ Colga'p lagajc sa' xhigab nani gojpza Jesucrist ⁶ nani mase najcni sigajc Dios, dini niniazzdu'tz xcälrnibee Dios, ⁷ alga basa'nni te laad yälrnibee nani rajpni con Xtradni Dios te gujcní mos cheni gojlni lo quedxliujre. Gujcní si'ctis te bejn. ⁸ Che gujcní si'ctis ben quedxliuj, gujcní ben nadolajz, ben nasobdiidx. Basoobni xtidx Dios, gujtni lo crujz, luxh yälejt lo crujz najc te yältuiduxh. ⁹ Ni'cni baspansac Diosni, gule'cni Crist te lajt ni najc jiaaru, badeedza Dios sajcru lajni lo laj guiraa relaj ni rusä't bejn. ¹⁰ Luxh che jiejn diajgreni laj Jesucrist, suzuxhijb guiraa reni yu' xhagubaa, guiraa reni yu' lo quedxliuj, näjza guiraa reni yu' nez nen yuj. ¹¹ Te guiraareni gacbeepac, guiniizareni: "Jesucrist najc Dad", te si'c chä'pduxh xpala'n Xtradnu Dios.

Rexpejn Jesucrist najc si'c bajl ni rusanij lo quedxliuj

¹² Ni'cni, resa'ä ni sanälazä, sigajcni rusoobtu xtidxä cheni sugaränä la'tu, sigajcza colgusoob xtidxä naj ni yu'ä zift, colhuij tejgatu xho gac laatu neñ dojl, colyajc bejn ni rusooob diidx con yäldxejb. ¹³ Sa'csi Dios najc ni rujn dzuun neñ lastootu te rajc rujntu xhigabsa'c, dxejc racnäjzani la'tu te rajc rujntu si'cni rlajzni.

¹⁴ Loj guira'ti ni rujntu, na'c gusmojmtu, na'cza gun tiop lajzti, ¹⁵ te rut gucuaquijditu, te gactu bejn ni ruchaag chutis bejn, gactu xi'n Dios, bejn nani xhet xtojldini yu' laj ni tre'tu loj rebenguijdx ni rujn redzunduxuud. Nez lojreni gactu si'c te bajl ni rdimbicha' si'c rebalxhaguiba che nacäjy, ¹⁶ sa'csi arapdzu'tzti xtidx yälnabajn ni runiidx Crist neñ lastootu te guspaatu lazä dxej cheni jääd Jesucrist, sa'csi xhet xlia'di gujc xtzunä, xhetza xlia'di cayunä dzuun naj. ¹⁷ Mase lagajc xtienä guixe' te guiza' te gojn ni xca' Dios xcient xcälrililajzti, rbaa lazä, sibalaznääza la'tu.

¹⁸ Sigajcza colguibaa lajzti, colguibalaznäj narä.

Timoteu con Epafrido

¹⁹ Nez loj Dad Jesucrist cayunloä guxhal-gacä Timoteu lojtu te näjza narä guibaa lazä che agucbeä xho yu'tu nejzga. ²⁰ Sa'csi rutru rapädi nani rujn tejsi xhigab, tej ni gulipac gun dzuun, jiupacni la'tu. ²¹ Guiraa rebejnjre rujntis xtzuuncareni, direni jiu gunreni xtzuuun Jesucrist. ²² Niluxh la'tu anajntu xho rujn Timoteu; si'c racnäj te bi'n xtadni, si'cza racnäjni narä lo xtidx Jesucrist. ²³ Ni'cni rlazä guxhaljäni te jiädhuiini la'tu, fixgaäsi don xho sasaj xcientä ree. ²⁴ Cabázaza nez lo Dad Jesucrist don la näjza narä sajล jiädhuiigacätu.

²⁵ Niluxh rchaloä nanabpac guxhaljä be-jtznu Epafrido ni najc sa'ä loj dzuun, loj retrabajw ni cadejdnu. Lagajc la'tu bax-haltuni te jiuni narä, fiini xhini'c rquinä. ²⁶ Laani rlazdukhni fiini lojtu, lacticayu'ni yärsia' si'c gucbeetu gucxhuuni. ²⁷ Gulica gucxhuuni cuentro, ameer niejtni, niluxh Dios balaslajzni laani, luxh xhet laatisni, balaslajzani narä te di nidedäru loj yälnahuinlajz ni yu'ä ree. ²⁸ Ni'cni rlazä gux-haljäni te guibalajzti che fisactu lojni, näjza te na'cru gac-huinlazä xcient la'tu. ²⁹ Colca'ni con yälbabalajz si'c bejztu lo xtidx Dios, sigajcza colyejn reni najc sigajc laani. ³⁰ Xcient xtzuuun Jesucrist ameer niejtni, dini niu xcälnabajntisni te bejnni redzuun nani de niajcdi niujntu lagajc la'tu xcientä.

3

Te yälnabansa'cpac

¹ Naj rebetzä, colguibalajz nez lo Dad Jesucrist. Xhet najcdi gucuasacä lagajc redi-idix nani abacuaä lojtu, sa'csi sacnäjni la'tu.

² Colnatzi renani najc si'c bä'cw. Colnatiza rebejnjri nani rujn dzun gujidx. Colnatiza reni ru' bee tiejxhtisreni luxh xlia'si rujnreni si'c. ³ Renani gulipac yu' bee najc nuure nani ahuililajz xtidx Dios, rienzanu xtzuunni si'cni rlajzni sa'csi ayu' Sprit Dxan xtenni neñ lastoonu. Rbalaznu sa'csi na-jcnu xpejn Dad Jesucrist, xhet xcientdi redzuun ni rujn tiejxhnu. ⁴ Narä sajcta guibalazä xcient ni rujn tiekhä. Palga yu' chu tej ni rbalajz, narä rbalazäru ⁵ sa'csi guyu'ä bee che guyu'ä xhujin gubijdx; narä naçä te rexpejn Israel; narä naçä tej rexpejn

toBenjamín, nacä te hebreo, luxh xtradä najc te ben hebreo; xcient leii nacä te farisee. ⁶Basobduxhä guiralii rextidx Dios ni caj lo leii ni'cni basacsiduxhä rexpen Jesucrist; xcient yälhabansa'c xten leii, xhetliidi xtolä yu'; basobdzu'tzä xtidx leii. ⁷Niluxh naj rediidx nani galoo benä xhigab sacduxh, naj xhet sajcdini sa'csi sanälazä Jesucrist. ⁸Niluxh maazru runä: runä xhigab xhet sajcdi guiraa nani rapä, sa'csi maazru sacduxh yälriembee Jesucrist ni najc Dad xtenä. Xcient Jesucrist gulälazä guira'ti, guira'ti najc si'c guixbiuyj nez loä te gunä gaan Jesucrist, ⁹te ch'u'ä lojni, xhet xcientdi xcälhabansa'cä ni najc xcient leii, alga xcient yälhabansa'c ni najc xcient xcälrlilajz Jesucrist, yälhabansa'c ni najc xten Dios xcient yälrlilajz. ¹⁰Ni'cni rlažä gumbeäru Jesucrist loj yälribee ni rajpni sa'csi huistie gubansa'cni sacni loj rebengut, te gumbeäru retrabajwdxh ni gudejdni, te ganä xho gunä ni rlajz Dios si'c gucbee Jesucrist, bejnzani ni rlajz Dios che gujtni. ¹¹Te gac guidzuñä lo yälguibansaç loj rebengut te xca'ä yälhabajn par tejpas lo Dios.

¹²Dizana guiniä "abenä gaan" o "anacä bensa'c", alga sanuäti te gunä gaan yälhabajn nani cu'a lo Jesucrist. ¹³La'tu rebetzä, dipacna gunä cuent alabenä gaan, niluxh tejtis nani runä, riallazä nani agudejd, rusgaä naä si'cni guiniazä nani churu gac. ¹⁴Si'cni sanuutis ruxun bejn te gunni gaan xhi guzalajzni, si'cza sanuutis cayunä dzuun nani baniidx Jesucrist loä, te che abenä gaan dzuunga sica'ä ni guzalajzni, nalajznu sibejdx Dios narä cha'a loj Jesucrist.

¹⁵Guiraanu nani ahuililajznu, nanab ji-ennu lagajc xhigabga, niluxh palga la'tu guntu ste'ca xhigab, rchaloä lagajc Dios suluilojni lojtu xcient ni et laadi cayujntu.

¹⁶Naj, cadrotis abidzunnu lo nani abiembeneu, sigajcza nanab guibañsijcnu, chanuutis gusoobnu rediidxga; nungäj guibajjnu loj rediidxre, jiennu tejsi xhigab.

¹⁷Rebetzä, coltanajl narä, colyejn si'c runä narä, colhuiiza rebejñ nani nabajñ si'c nabanä. ¹⁸Xhidajl huält aguniä lojtu, naj ronäli rniscä lojtu, yu' xhidajl reni rdxe'ch lojtu, rniyajreni nani bejn Jesucrist che gudijxni xtojlnu lo crujz. ¹⁹Redee che luux

xnezyujreni sinitlojreni, sa'csi xtioozreni najc yälrausa'c; luxh rbaali lajzreni rujnreni dzun xtujy; luxh riutisreni xcälhabansa'c quedxliujre. ²⁰Niluxh nuure, xhaguibaali najc laadxnu, luxh ro'cli cabääznu jiääd nani ruslaanu neq dojl, nalaaznu lagajc Dad Jesucrist. ²¹Laani suchaani tiehxnu ni rajpnu lo quedxliujre, te gac tiehxnu sigajc najc tiejhni lo xcälrbneebeni. Sujnni dee con yälribeduxh ni rajpni te rnibeeni loj gurali'ti, guiraa nejz.

4

Colguibalajzts xcient Dad Jesucrist

¹Ni'cni rniä lojtu, rebetzä nani sanälazä, lojtu ni rlažä fisacä, lojtu ni ruspaaz lazä, lojtu ni najc yälhabansa'c xtenä, colsudz'u tz loj xtidx Jesucrist.

²Rniabduxhä lo Evodia näjza lo Síntique, rulidxäreni gunreni tejsi xhigab xcient Dad Jesucrist. ³Sigajcza rniabä lojlu betzä, ni runnäj narä dzuun, gucnäj regunaare ni bennäj narä dzuun, bideednu trabajw xcient xtidx Jesucrist. Gucnäjza Clemente näjza guiraa reni bennäj narä dzuun; alajreni caj nen reguijtz xten yälhabajn par tejpas.

⁴Colguibalaznjäjtis Dad Jesucrist; stehuält rniä: colguibalajz. ⁵Sugabee guiraa rebejñ xho najc xcälhabajntu lo xtidx Dios. Asiäd-dzungajxh dxej xten Dad Jesucrist.

⁶Na'c guidxejbtu, colnabtis lo Dad guira'ti, colgudeedza xquixtios lojni lal ni cabedx-canabtu lojni. ⁷Dios guniidx xcälrbedixlazduhxni, nicla guntu xhigab lacti najc yälrbedixlajzga. Yälrbedixlajzga ga'p lastootu näjza xcäriejntu loj Dad Jesucrist.

Colyejn xhigabsa'c

⁸Mbjaj naj, deetis guiniä lojtu rebetzä, sa'tis rediidxre gusaantu chu loj rexhiga-btu: guiraa ni najc gulipac; guiraa rediidx ni nanab guiliälpni xpala'nni, guira'ti nani nacsä'c; guira'ti nani naya; guira'ti nani najc saru; guira'ti nani rapsa'c xpala'n la-jni; näj palga yu' xhi dzuun ni nacsä'cpac, o palga yu' xhi te diidx ni sajc guilia'p xpala'nni, xcient guiraa reni'c colyejn xhigab. ⁹Nani biseedtu, nani cu'a tu, nani biejn diajgtu, nani bahuiitu benä, ni'c guntu te Dios ni rbecdxilajz, laani jiannäjni la'tu.

Gojn xten refilipenses ni xca' Pabl

¹⁰Rbaduxh lazä nez loj Dad Jesucrist sa'csi banasac lajztu gacnäjtu narä. Guliini; ga-looli rlajztu niacnäjtu narä, luxh di nia-jcdini. ¹¹Dinä guiniä si'c sa'csi yu' xhi cayädxä, sa'csi abisiedä guibaali lazä loj xhitis ni rapä. ¹²Sajc guibanä che guxii rapä; sajc guibanä che xhidal rapä; abisiedä guibanä xhotis: sajc gauduxhä, sajcza guil-ianä; sajc gapä xhidajl xhixtenä, sajcza tedä trabajw. ¹³Guira'tini sajc gunä sa'csi Je-sucrist racnäj narä. ¹⁴Niluxh xhet najcdi; laaca dzuun bejntu che bejntu xhigab gac-näjtu narä lal ni cadedä trabajw.

¹⁵Gacbee guejbtu, dad filipenses, che gus-loj caguluiä xtidx Jesucrist lojtu, cheni biriä reguedx Macedonia, nicla tej guidoo di ni-acnäj narä, la'tistu gucnäj narä. ¹⁶Cheni yu'äli guedx Tesalónica, baxhältru meel loä tej-tio'p huält. ¹⁷Niluxh narä di rlazä xca'ätis xhixtentu ni guniidxtu, nani rlazä najc tioobru xcälnasa'ctu nez lo Dios xcient dzuun ni rujntu ruxhältru meel loä. ¹⁸Naj acua'ä guiraa ni baxhältru, arapä xhidajl, arapduxhä sa'csi acua'ä nani biädnä Epafradito baxhältru loä, te gojn ni rlianejxh si'c guxhyaal, te dzunsa'c ni rchaglajz Dios. ¹⁹Dios xtenä guniidx lojtu guiraa nani riäädx xca'tu, si'ctisni rajpnri reyälnasa'cduxh xhaguibaa con Dad Jesu-crist. ²⁰Colguiliä'p xpala'n Dios xtadnu guixe-guixee par tejpas. Si'c gacni.

Lult xtixtios

²¹Coldeed xtixtios lo guiraa rebejn ni abia lastooni nez loj Dad Jesucrist. Rebejtnu ni yu' ree näj narä ruxhalnu xtixtios lojtu.

²²Guiraa rebejnree ni abia lastooni nez loj Dad Jesucrist ruxhal xtixtios, niluxh rux-halru resa' César xtixtios lojtu.

²³Suga'p xcälracnäj Dad Jesucrist las-tootu. Sugacni si'c.

Te Guijtz Lo Reben Colosas

Bacuua Pabl loj reben guidoo ni yu'
guedx Colosas

¹ Narä, Pabl nacä te apost xten Jesucrist. Dios gule narä. Narä näjza bejtznu Timoteu ²cagucuaanu reguijtzre loj reben Colosas nani nabañnaya rujnreni si'cpaci rlajz Dios, näjza reni najc bejtznu lo xtidx Jesucrist. Xca'tu yälracnäj näjza yälrbexdilajz xten Dios xtradnu.

Rniab Pabl gudeed Dios yälnajn xtenni

³ Rdeednu xquixtios lo Dios xtag Dad Jesucrist rniabnu lojni xcuenty guixeguixee. ⁴Abiejn diajgnu xho lilajztu xtidx Dad Jesucrist, näjza xho sanälajztu rebejn ni ahuililajz xtidx Jesucrist, ⁵sa'csi cabäjztu xca'tu reyälnsa'c ni yuchee xhaguibaa par la'tu. Laa xcuenty reni'c ni biejn diajgtu cheni bacuadajgtu xtidxlji Jesucrist xcuenty yärluslaa lo dojl. ⁶Laa rediidxga ni abiääd lojtu sigajc ni bire'chni guideb lo guedxliuij, luxh cayac xhidajlre rebejn ni cayacbee diidxre, asalilajzreni diidxga, sigajc guazajctu la'tu. Cheni biejn diajgtu xtidx Jesucrist, dxejc biembeezat gulipac najc xcälrulaslajz Dios. ⁷Sigajcza biseedtuni lo Epafras, ni sanuutis cayacnäjni nuure lo dzuun. Laani najc te bensa'c, yu'ni lojtu cayujnpaci xtzuun Jesucrist lacuua nuure. ⁸Laani abasule'ni diidx loonu xho sanälajz sa'tu sa'csi nabajn Sprit Dyan xten Dios nen lastootu.

⁹ Laa ni'cni dxejli nani biejn diajgnu diidxre xcuenty, di cuäaz cabedx-canabnu lo Dios, canabnu gacbeduxtu xho rlajz Dios guntu, guniidxni guiraa yälnajn näjza gusanijni xcäriejntu ¹⁰ te guibajntu si'cni nungäj guibajn bejn ni sanajl Dad Jesucrist, te guspaatu lajzni lo guiraa redzuun. Chanuuuzatu gunruttu guiraa redzunsa'c näjza jianijru xcäriejntu xcuenty yälriembee Dios. ¹¹Tioobruto loj xcälnadip, xcälrabee Dios te guibaa lajztu gusutiplajztu, cue'cdxilajztu loj xhitis ni sajctu. ¹²Guibalajznu guideednu xquixtios loj xtradnu Dios nani basudu'tz nuure te xca'nu yäl nabajn par tejpas sigajc guiraa rebejn nani ahuililajz xtiidxni yu'reni lo xpianijni. ¹³Laani abaslaani nuure loj

xcälrnibee yälncäjjy, abateedni nuure lo xcälrnibee xi'nni ni sanälajzni. ¹⁴Laa xi'nni ni baslaa nuure nen dojl cheni baxhe'ni xtiejnni, gujtni lo crujz, dxejc gudijxn rextojlnu.

Gubisacnu loj Dios xcuenty xcälgujt Jesucrist

¹⁵ Rut rajcdi ruhui lo Gueb-Dios, niluxh xi'nni najc si'cpac najc Dios; si'cpac rujin lojni. Laani guyu'ni galodoo luxh rnibeeni lo guiralii ni yu' lo guedxliuij. ¹⁶Por laani benchee Dios guiralii ni yu' xhaguibaa ni yu'za lo guedxliuij, renani ruzen sigajc renani di guzen: rereii, näjza reni rnibee loj rexangl Dios, näjza reni rnibee loj rexangl bendxbab, nägajcza reyälrnibee xten reguix-hajg, sigajczani loj regubier, lo reguxhtis ni rajp yälrnibee, guiraani guc-chee por laani, näjza par laani. ¹⁷Alanabajn Jesucrist galooli, che gjadli guirixtiej guedxliuij. Por laani yu' guira'ti ni yu'. ¹⁸Laani najc nani rnibee guidoo, nalajznu rebejn nani ahuililajz xtiidxni. Laani najc ni guläxtiej guira'ti. Ganiddoo laani huäjs lo rebengut te rnibeeni. Loj guira'ti ni yu' latisni najc nani sajc guinibee. ¹⁹Sa'csi bidxaglajz Dad Dios ga'p Jesucrist guiralii yälrnibee nani najc xten Dios, ²⁰por lagajcza Jesucrist badzu' Dios guira'ti ni yu', guibi'reni lojni, reni yu' lo guedxliuij sigajc reni yu' xhaguibaa, sa'csi abiäj-lajzni, aguredxi lajzni sa'csi bixe' xtiejn Jesucrist lo crujz.

²¹ Luxh la'tu gujctu si'c benzijt lo Dios sa'csi galoo rdxe'chtu lo Dios neñ lastootu xcuenty redzunguijdx nani bejntu. ²²Niluxh naj abiäj-lajz Dios abadzu' Jesucrist la'tu, agucnayatu gubi'tu lo Dios xcuenty xtiejn Jesucrist ni baxhe'ni lo crujz cheni gujtni. Ni'c bejnni te che suutu nez lojni, xhetiru xtojltu, xhet xhi guiniidi Dios lojtu sa'csi anayapactu. ²³Niluxh riäj chanuu sudzu'tztu, cuedxitu lo yälrlilajz. Na'c gusaantu chu gusiech-lajztu te cuälatzu xtidx Jesucrist nani abiejn diajgtu. Rediidxga abasule'zanu loj guiraa rebejn ni re' lo guedxliuijre. Luxh lagajc narä, Pabl rusule'ä diidxga sa'csi parpac ni'c gule Dios narä.

Dzuun guidoo najc xcuenty Pabl

²⁴ Naj rbalazä cadedä trabajw xcuentyt sa'csi retrabajw ni cadedä lagajc narä cagusa' nani cayäadx lo retrabajw xten

Crist xcuent guidoo, nalajznu rebejn ni ahuililajz xtiidxnii, ni najc si'c tiejxh Jesucrist. ²⁵ Ni'c nacä te bejn ni rusule' diidx neñ guidooga. Dzuunga baniidx Dios gunä par xcälñasa'ctu te gusule'äpac guiragajc xtiidx Dios, ²⁶ te gacbeenu rexhigabxhiga'tz nani najc xhiga'tz galododuxh niluxh naj abaluiini redidx-xhiga'tzre loj rexpejnni. ²⁷ Lojreni bejn Dios xhigab guluiini reyälnasa'c xten yäldimibicha' xten redidx-xhiga'tz ni cagusule'ni loj rebenzijt. Yälxhiga'tzre sälöj Jesucrist rbäjz nen lastootu ni'c runlojtu chaläjztu lo yäldimibicha' xten Dios.

²⁸ Rusule'nun diidx xcuent Jesucrist, rulidxxnu guiraa rebejn, guideb yälnajn ruluinu te guisa' yälnajn xten guiraa rebejn xcuent Jesucrist che guidzujnreni nez loj Jesucrist. ²⁹ Xcient dzuunre guideb xtipä runä dzuun con guiraa yälnibee nani runidx Jesucrist narä.

2

¹ Rlazä gacbeetu lacti cadedä trabajw xcuento, näjza xcuent reni yu' guedx Laodicea, näjza xcuent guiraa reni gajd gumbee narä. ² Te tioob lastoo guiraa tu sa'csi abidxagsa' lastootu lo yälsanälajz, näjza te ga'ptu guiraa reyälnasa'c ni rajp bejn che racbesa'creni xtiidx Dios. Te gumbeezatu guiraa redidx-xhiga'tz xten Dios xtadnu näjza Dad Jesucrist. ³ Neñ lastoo Dios näjza lastoo Jesucrist naga'tz guiraa reyälnasa'c xten guiraa reyälnajn, guiraa yälnumbee. ⁴ Dee rniä lojtu te di gusguee chuu gusgueetu con redidx-xhii. ⁵ Te palga ruti narä ro'c, canaj lazä la'tu, cabaa lazä cahuiä laaca cayujntu, sugatzu'tztu loj yärlililajz xten Jesucrist.

⁶ Ni'cni sigajc ni huililajztu xtiidx Jesucrist, sigajcza colchasanäj Jesucrist.

⁷ Colsudzu'tz lo Jesucrist si'c rsiobdz'u'tz xlobaa te yajg. Colsudzu'tz lo yärlililajz xten Jesucrist si'c ni abisieedtu. Colgudedduxhru xquixtios lo Dios.

Yälnabancoob ni ruded Jesucrist

⁸ Colhuii, na'c gusaantu guxhiid bejn xcärlililajztu con xtiidxtisreni näjza rediidx nani xhet sajcdi, si'c najc xtiidx reben galoo, näjza si'c najc diidx xcuent xhigab xten reben guedxliuj, di rediidxga gac si'cni rlajz Jesucrist.

⁹ Sa'csi guiralii ni najc Dios, lagajc ni'c najc Jesucrist, niluxh yu' tiejxh Jesucrist.

¹⁰ Xhet cayäädxdì lo yälnabajn xten Dios ni rajptu sa'csi najctu tejsi con Jesucrist. Laani rnibee guiraa reyälguxhtis, guiraa reyälnibee ni yu' guira lajt. ¹¹ Sa'csi huililajztu Jesucrist aguyu'tu bee, niluxh xhet beedi nani rusäl bejn con naareni, alga xpee Jesucrist, ni najc yälrusia xtojl bejn sa'csi rusaan bejn redzunguidx, rujnreni tejsi xhigab con Jesucrist. Si'c najc xpee Jesucrist. ¹² Cheni gurobnistu najcni si'cni agujtu ni'c biga'tztu con Jesucrist, najczani si'cni gubansactu con laani sa'csi huililajztu rajp Dios yälrnibee nani gulässac Jesucrist lo rebengut. ¹³ Che najctu si'cngut lo dojl, näjza sa'csi di bee niu' tiejxhtu, dxejcli baniidx Dios yälnabajn par tejpas lojtu con Jesucrist, badzucajni guiraa rextojlnu. ¹⁴ Dios badzucaj guiraa releii nani basäuu nuure neñ dojl, badzucajnini lojjni, sa'csi bacuaanini lo crujz, cadre gudijx Jesucrist guiralii rextojlnu. ¹⁵ Cheni guijt Jesucrist lo crujz bejnni gaan loj reyälguxhtis näjza guiraa reyälnibee xten bendxbab näjza rexspritni. Basanxtujnirenne nez loj guiraa rebejn. Laani bejnni gaanreni cheni cuajni lo crujz.

Colquil recos ni najc xten xhaguiba

¹⁶ Nicla tejtu na'c cubeet sa'ni xcuent reyälrjaw näjza reyälrä', niclaza xcuent redxe lanij näjza rexchej rebäicoo, näjza redxej ni rusilajzni. ¹⁷ Guiraa redee najc si'csi te balaa xten nani churu jääd, te guluiireni ni rujn balaaga, nalajznu ni'c najc Jesucrist. ¹⁸ Na'c gusaantu gudzucaj bejn xcälñasa'ctu te gunreni gactu nadolajz, te gantru reengl. Sa' bejngä richu' loj nani gajdreni fii; rchalorenii najcreni benro xcuent lagajc xhigabreni. ¹⁹ Laareni direni chanajl Jesucrist nani rnibee, nani rujn roobru tiejxhni, nalajznu rexpejnni, sa'csi lojni rca'reni ni rquiu lastoreni, te ruchaagni sa' tejgareni si'c nadxaquid bäl cuä' dzujt lo tiejxh bejn, te gacreni tejsi con Dios.

²⁰ La'tu agujtu con Jesucrist, abiiriito lo rexhigab xten guedxliujre. Naj xhicut guibajntu sigajctis nabajn rebejn nani di gumbée xtiidx Jesucrist, ä? xhicut ru-soobtu rediidx ni caj lo releii? Loj releii caj sa' diidxre: ²¹ "Di chahuallu dee, di

gaulu ni'c, di canlu dec." ²² Luxh guiraa redee rnitloj che runnäjnini dzuun. Luxh guiraa sa' leiiga najc diidxtis nani rului bejn. ²³ Guluiicani sa' releiigarien as-doo ruluiireni yälnduxh, luxh che ru-soob bejn releiiga rchaloren rajreni Dios, rchaloren rac nadolajzreni, rusacsíreni la-gajc tiejxhreni. Niluxh xlai'si rujnreni guiraa redzuunga, sa'csi sanuutis rujnreni si'ctisni rlajz tiejxhreni.

3

¹ Palga anabansactu con Jesucrist, colquii reyälnasa'c ni yu' xhaguibaa cadro sobga' Jesucrist xladbee Dios. ² Colyejn xhigab xcuentis reyälnasa'c ni yu' xhaguibaa, na'c guntu xhigabtis xcuent reni yu' lo guedxliuj. ³ La'tu anajctu si'c bengut loj reyälnasa'c ni yu' lo guedxliuj, luxh yälhabajn ni rajptu naj, yälhabajng naga'tz con Dios xcuent Jesucrist. ⁴ Che guluiilosac Jesucrist ni najc xcälnabajntu, dxejc näjza la'tu suluiiloftu con laani lo xcäldimbicha'n.

Yälhabanjieyw con yälhabançoob

⁵ Colcuálaz redzunguwdx xten guedxliuj nani rujntu, yälrusguee gunaxteb, yälrujn recosdxuudx, recos ni rdxaglajz tiejxhtu, rexhigab-guijdx, yälrsiäb-lajz xhi xten bejn, guiraa redee rujn runijt bejn lo Dios sigajc rujn bejn che rajn bejn rebanäjb. ⁶ Guiraa redzuunga rujn riääd xcäldrdxe'ch Dios yejc renani rujn sa' redzuunga. ⁷ Näjza la'tu bejntu sa' redzunguwdx galoo cheni guyu'tu lo sa' yälhabajng. ⁸ Niluxh naj näjza la'tu colgusaan recosre; nalajznu yälrdxe'ch, yälruche'ch sa'ni, yälrujn latzsiaj sa'ni, yälriyaj sa'ni, näjza rediidx-dxuudx ni rniit. ⁹ Na'c gusgueetu resa'tu, sa'csi nanab gusaantu nani bejntu cheni guyu'tu loj redzunguwdx. ¹⁰ Colyejt te bencoop, ni guixe-guixee cayaniju xcäriejnni, te gumbesa'ctu Dios, te gactu sigajc najc Dios ni benchee benguedxliuj. ¹¹ Lo yälhabançoobre rutiru benzijt, niclaza xpen Israel, rutiza rebejn ni ru'bee, niclaza bejn ni di chu bee; rutiza benzijt, niclaza bejn ni siääd zitduxh; rutiza mos, niclaza bejn nani di chu lo bejn, sa'csi che rililajz te bejn xtidx Jesucrist najcni teblaj con guiraa reni rililajz xtidx Jesucrist; guiraareni najc xpejn Jesucrist.

¹² Naj agule Dios la'tu te gactu xpejnni nani gac naya, nani sanälajzni, colguibajn con yälrlulaslajz, na'c guidxe'ctu, colyac-nadoo con yälndolajz, colniiiza nadolajz.

¹³ Colyujn huant, na'c guidxe'ctu loj sa'tu, palga yu' chu sa'tu rdxe'ch loj sa'ni, colgusiäj-lajztu sigajcni basiäj-lajz Dad Jesucrist lojnu xcuent rextojlnu.

¹⁴ Che abejntu guiraa recosre, colguilru yälsanäjz nani rusa' loj guiraa recosre.

¹⁵ Xcälrbedxilajz Dios guinibee nen lastootu, sa'csi parpac ni'c gurejdxni la'tu, te gacatzu tejsi con xpejnn Jesucrist. Colgudeed xquixtios loj Dios.

¹⁶ Xtidx Jesucrist chuduxh neñ lastootu con guiraa yälhnajn, te guliuittu, te gulijdxtu tejga resa'tu con redij nani gulä'p toDavid xpala'n Dios, näjza redij nani roltu, näjza redij nani rliä'p xpala'n Dios. Redija gołnu te guideednu xquixtios lo Dios neñ lastoonu. ¹⁷ Guira'ti nani guntu, sigajc rediidx ni rniit, sigajcza redzuun ni ru-jntu, colyejn guiraani con laj Dad Jesucrist, coldeed xquixtios lo Dios xtadnu con laj Jesucrist.

Xho nanab guibajn te famil ni najc xpejn Jesucrist

¹⁸ Regunaa nani abachnaa, colgusoob xtidx chäältu sa'csi si'c rlajz Dad Jesucrist.

¹⁹ Renigui nani abachnaa, colchanälajz chäältu, na'c guidxechnäjtureni. ²⁰ Reni najc biuux, colgusoob xtidx xtadtu loj guira'ti, sa'csi si'c rchaglajz Dad Jesucrist.

²¹ Reni najc Dad, na'c guche'ctu rexintu, didi gac-huin lajzreni. ²² Reni najc mos, colgucuadijg xtidx xlamtu lo guedxliujre loj guira'ti xtzuunni. Na'c gunsac tu dzuun che cahuiitsreni si'c rujn renani ruspaaj lajz bejntis. Con yälndolajz colyejn dzuun sa'csi sanälajztu Dios. ²³ Guira'ti nani guntu, colyejnni guideb lastootu si'c xtzuun Dios, et si'c xtzuundi rebejntis.

²⁴ Anajntu lo Dad Jesucrist sica'tu yälnsa'c ni najc yälhabajn par tejpas, sa'csi loj Dad Jesucrist rujntu dzuun. ²⁵ Niluxh nani rujn recosgуйdx, lagajc xcuent recosgуйdx gudeed Dios lojni, sa'csi teblaj rujn Dios guiraa rebenguijdx.

4

¹ Renani najc lam, coldeed loj rexmostu nani riäj xca'reni sa'csi anantu näjza la'tu

rajptu xlamtu xhaguibaa.

² Colchanuu colnab lo Dios, colsusin che rniabtu lo Dios. Colgudeed xquixtios lo Dios. ³ Colnabza lo Dios con nuure te gacnäj Dios narä gusule'ä xtidx Jesucrist, te gusule'ä redidx-xhiga'tz xten Crist. Xcient ni'cza yu'ä neñ latzguiib. ⁴ Colnab lo Dios te guyasi gusule'ä redididxga si'cni riäjl guiniä.

⁵ Colguibansin loj rebejn nani di gumbee xtidx Jesucrist, colgusule' diidx cheni riäjl guiniitu lojreni. ⁶ Rextiidxtu nanab gacni si'c rchaglajz Dios, saruduxhza gac xtiidxtu te gacbeetu xho riäjl gudzu'tu diidx loj tejgareni.

Lult xtixtios

⁷ Tíquico, bejtznu ni sanälajznu, ni runsa'c dzuun, ni najc xmos Dad Jesucrist, laani gusule'ni diidx lojtu xcient guiraa rextzunä. ⁸ Ruxhaläni lojtu te gacbeepactu xho yu'ä, te guspaani lajztu. ⁹ Laani jiädnänzani Onésimo nani najc te betznu ni sanälajznu. Laani najc tej resa'tu. Laareni gusule'zareni guira'ti nani cadeednu ree.

¹⁰ Aristarco, nani yunäj narä neñ latzguiib, ruxhalni xtixtios lojtu näjza Marcw, betz prim xten Bernabé (abacuaä lojtu xcientni, xho guntu, palga jiädhuiini la'tu, sacru colhuiini). ¹¹ Näjza Jesús nani laaza Justo, ruxhal xtixtios lojtu. Laatisreni najc rexpejn Israel nani cayacnäj loj dzuun xten xcälrnibee Dios. Laareni ruspaa lazä. ¹² Epafras, ni najc te sa'tu, ruxhal xtixtios lojtu, luxh rniabduxhni xcienttu lo Dios te sudzu'tztu guntu guiragajc ni rlajz Dios guntu. ¹³ Narä rniliä xho rdzuun Epafras xcient la'tu, näjza xcient rebejn ni yu' guedx Laodicea, näjza guedx Hierápolis.

¹⁴ Lucas, doctoor ni sanälajznu, näjza Demas ruxhalzareni xtixtios lojtu.

¹⁵ Coldeed xtixtios loj rebejtznu nani yu' guedx Laodicea, näjza loj Ninfas, näjza lo rebejn nani re' rolizjni. ¹⁶ Cheni agulujx biltu guijtzre, colguxhalni te jielni neñ guidoo xten guedx Laodicea, dxejcti colyelza guijtz nani baxhalä lo reben guedx Laodicea. ¹⁷ Colye'tz loj Arquipo: "Bahuisa'c xtzuun Dad Jesucrist nani cua'l u lojni. Bensa'c dzuunga."

¹⁸ Lagajc narä Pabl rucuaä xtixtiosre con lagajc naä, con lagajc xleträ. Colgusnaj-lajztu narä yu'ä latzguiib. Gacnäj Dios la'tu. Sugacni si'c.

Guijtz Ganid Lo Rebeₙ

Tesalónica

Bacuaa Pabl con rexamigwni lo guidoo guedx Tesalónica

^¹ Narä, Pabl, näjza Silvan, näjza Timoteu cacuaanu guijtzre lojtu, resa'nu ni yu' guidoo lo guedx Tesalónica, reni yu' lo Dios Xtradnu näjza lo Dad Jesucrist. Guspaas Dios näjza Jesucrist lajztu, guscuecdxizareni lajztu.

Xho huililajz beₙ Tesalónica xtidx Dios

^² Guet-guejt rdeednu xquixtios lo Dios xcient guiraatu, rraduxhza laaznu la'tu cheni rbejdx rniabnu lo Dios. ^³Ruzä'tnu lo Dios xtadnu xho rujntu dzuun sa'csi rililajztu xtidx Dios; näjza xho runduxhtu dzuun te racnäjtu sa'tu ni xhet rajpdi sa'csi rinäla-jztu Dios; näjza xho rutip lajztu cabäjztu guibi! Dad Jesucrist lo guedxliuj. ^⁴Bejtznu, racbeenu sanälajz Dios la'tu, laani agulen la'tu. ^⁵Sa'csi che basule'nu xtidx Dios lojtu, et ganax diidxtis gujcn, niluxh xcälrnibee Sprit Dxan xten Dios neŋ lastootu bejn gucbeepactu diidx ni najc didxl. Nanchesa'ctu xho gujcnu che guyu'nu lojtu. Si'c baluiinu la'tu te guibansa'ctu.

^⁶Sigajcni nabannäjnu Dad Jesucrist sigajcza gusloj cua'tu xmoodnu, basoobzatu diidx guideb xcälrbalajz Sprit Dxan xten Dios ni baniidxni lojtu, mase gudejdnu tra-bajw. ^⁷Si'c gujc te baluiitu loj guiraa reni rililajz nez Macedonia näjza nez Acaya xho nungäj gac. ^⁸Ni'c abire'ch xtidx Dios, xhet nejzdi Macedonia näjza Acayatis, bire'chza diidx guira nejz. Ro'c najnreni xho sanäla-jztu Dios, ni'c xhetru nanabti guiniinu lo-jreni. ^⁹Alga lagajc laareni ruyjreni diidx xho guyu'nu lojtu; nägajcza xho basaantu gojntu rebanäjb te rajntu Dios ni nabajnpac ni najc gulipac. ^{¹⁰}Ruyjyzateni diidx xho cabäjzzatu guibisac Jesucrist lo guedxliuj. Laazani najc Xi'n Dios ni guläs Dios lo rebengut, Jesucrist ni ruslaa nuurnu lo xcälrde'ch Dios ni churu siääd.

2

Xhi bejn Pabl nen guedx Tesalónica

^{¹¹}Naj lagajc la'tu najntu, bejtznu, et xlia'di bio'pnu lojtu. ^{¹²}Et najntu xho gudéreni

loonu, basacsíreni nuurnu guedx Filipos. Niluxh mase gudejdnu trabajw, gusutijpnu lo Dios, xhet bidxejbtinu basule'nu xtidx Dios lojtu, mase gudejdnu trabajwduxh. ^{¹³}Sa'csi dinu nulijdx la'tu con didx-xhii, niclaza didx-dxuudx, niclaza diidx ni rus-guee. ^{¹⁴}Sa'csi rsoobnu xtidx Dios basan-näjni nuurnu xtiidxni, ni'c rusule'nu xtidx Dios. Dinu guinii diidx te jiansa'cnu lo bejn, rniinu diidx te jiansa'cnu lo Dios ni ruhui lastoonu. ^{¹⁵}Anajntu xho basule'nu xtidx Dios. Nicla tej dinu ninii xhi stee diidx ni xhet sajcdi lojtu. Dizanu nusule' xtidx Dios te xhiga'tz niennu gaan xhi nica'nu. Dios nanchee xcient ni riennu. ^{¹⁶}Dizanu nidiil guiliä'p bejn xpala'nnu, niclaza la'tu, niclaza chu stee bejn, mase nungäj niennu niacbeetu rajpnu yälrnibee sa'csi baxhal Jesucrist nuurnu. ^{¹⁷}Niluxh guc nadolajznu che guyu'nu lojtu, cuanäjnu la'tu si'c rcanäj te nan rexpäzni. ^{¹⁸}Sa'csi huinälazduxhnu la'tu, biennu xhigab xhet ganaxdi xtidx Dios guiniidxnu lojtu, näjza lagajc xaimnu guniidxnu te guseednu la'tu xtidx Dios sa'csi sanälazduxhnu la'tu. ^{¹⁹}Bejtznu, la'tu rnalajztu xho biennu dzuun te biennu gaan xcälnabaannu. Biennu dzuun dxej-yääl, te di niednäjtu nuurnu la] ni basule'nu xtidx Dios lojtu.

^{¹⁰}Lagajc la'tu nancheetu, sigajc nanchee Dios, laaca biennu che guyu'nu lojtu: gujcnu bejn ni ränduxh Dios, gujcnu beñdx-ojñ, gujcnu bensa'c. ^{¹¹}Anajntu xho bali-idxn u la'tu, xho bascuedxinu lajztu si'c runnäj te dad rexingaanni. ^{¹²}Guiraa dee biennu, te guibañsa'ctu si'c nungäj gun reni najc xi'n Dios, lagajc Dios ni gurejdx la'tu te chunäjtuni lo xcälrnibeeni näjza lo xcälrdimbicha'ni.

^{¹³}Ni'cni rdedduxhnu xquixtios lo Dios sa'csi che biejn diajgtu xtidx Dios ni ba-sule'nu lojtu, cua'tuni si'c xtidx Dios xhet si'c xtiidxdi ben guedxliuj. Niluxh gulii xtidx Diosni, sa'csi rusiani lastoo renani rililajz. ^{¹⁴}Bejtznu, dxejcti bejntu lagajc si'c rujn rebejn xquidoo Dios neŋ reguedx Judea reni najc xpen Jesucrist; luxh gusajctu lagajc ni gusajcreni, basacsí reben lajdxtu la'tu. Sigajcza birinajl rex-pen Israelreni. ^{¹⁵}Rexpen Israel bagu't Dad Jesucrist, si'cza bagu'treni lagajc rex-profe'treni, renani bacuaa xtidx Dios, bari-laagzwzareni nuurnu. Diren chanälajz Dios,

dizareni gusaan chanajl rebejn Jesucrist.
¹⁶ Che rlajznu gulijdxnu reni digac rexpen Israel, te näjza laareni laareni lo dojl, di-reni gusaan, si'ctis cagutajlreni xtojreni. Niluxh naj abiäädpac yälrdxe'ch xten Dios yejcreni.

Rlajz Pabl nihuisacni ro'c

¹⁷ Bejtznu, mase biriinu ro'c, naj dirunu guihuui lojtu, rnalazduxhnu la'tu, batijp lajznu jio'pnu ro'c, rlazduxhnu fisacnu lojtu. ¹⁸ Rlajznu nio'pnu, narä, Pabl xhidal huält rlazlä niälä, niluxh bendxbab di nusaan. ¹⁹ ¿Xhini'c najc xcärlbäaznu, xcärlbalajznu, xcälracnaronu? Lagajc la'tu gactuni che suunu nez loj Jesucrist che jiädsac Dad Jesucrist. ²⁰ La'tu najc ni ruspaa lajznu ni rliä' pza xpala'nnu nez lo Dios.

3

¹ Dxejc, che dirunu nutijp lajznu, biennu xhigab bianxtebä guedx Atenas. ² Dxejc baxhalä Timoteu, bejtznu nez loj Jesucrist, te biädhuiini la'tu, sa'csi laani najcni te xpen Dios ni runnäj nuurnu dzuun, rni-ini xtidx Jesucrist, te guscuedxini lajztu, guzudzu'tzni xcärlilajztu. ³ Te nicla tejtu di guidxejb che jiääd reyäluin sa'csi la'tu anajntu agule Dios nuurnu ni'c sidejdnu trabajw. ⁴ Cheni yusijcnu lojtu, rnixgaanu lojtu sidejdnu trabajw; niluxh si'cni agusojb diidxga naj. ⁵ Ni'cni diruna nutiplazä, baxhalä chujäädna diidx xho najc xcärlilajztu, sa'csi cadxebä andi abasguee bendxbab la'tu, luxh xlia'si biennu dzuun guyu'nu lojtu.

⁶ Naj agubi' Timoteu, biädhuiini la'tu. Biadnäni ganax didxlí xho sanuu rilila-jztu xtidx Jesucrist, xho rinälažtuni, näjza sanuutis rnalajztu nuurnu, rlajzzatu fiftu loonu, sigajcza nuurnu rlajznu fiinu lojtu. ⁷ Ni'cni, betznu, masä riäädz xhixtenuu, masä rdeednu trabajw, rbalajznu sa'csi la'tu sanuutis rililajztu xtidx Dios. ⁸ Naj laaca rdxunnu sa'csi racbeenu sudzu'tznu nez loj xtidx Dad Jesucrist. ⁹ Xhocha gac guideednu xquixtios lo Dios xcuent guiraatu näj xcuent yälrbalajz ni yu' lastoontu xcuent la'tu nez lo Dios. ¹⁰ Dxej-yääl rniabnu lo Dios gusaanni jiophuiiu la'tu te gusa'nu guiraa rediidx ni cayäädpx gacbeetu xcuent xcärlilajztu.

¹¹ Rniabnu lo Xtadnu Dios, näjza lo Dad Jesucrist, gacnäjreni nuurnu te gac jiophui-inu la'tu. ¹² Rniabzanu lo Dad Jesucrist, gunni gustiobruni lastootu te ga'prutu yälrinälažj loj resa'tu näjza loj guiraa rebejn, si'cni rinälažznu la'tu, ¹³ te gunni sudzu'tz lastootu, na'c ga'ptu dojl nez lo Xtadnu Dios, che jiääd Jesucrist näjza guiraa rexpejnni xhaguibaali.

4

Guibajnnu si'c rchaglajz Dios

¹ Naj, rebejtznu, rniabduxhnu lojtu, rulididxnu la'tu con laj Dad Jesucrist, guiba-jntu si'cni baluiinu la'tu nungäjil guibajntu te guspaa tu lajz Dios, te si'c chanuutis guibansa'ctu nez lo Dios.

² La'tu, anajntu rediidx ni baluiinu lojtu con xcälrnibee Dad Jesucrist. ³ Lagajc Dios rlajz nayatis guibansa'ctu, na'c gun niguui dojl guesnäj gunaa ni di gac chäälhi, sigajcza na'c guesnäj gunaa niguui ni di gac chäälhi. ⁴ Tejgatu gantu xho guibannäjtu chäälku nayatis näjza xpala'nni. ⁵ Xhet si'c ni rujndi regunadxab näjza reniguii, nicla si'c ni rujn rebejn ni di gumbee Dios. ⁶ Rut chutejditu gusguee bejtznlo redzunguididxre, sa'csi Dios susacsí guiraa rebejn ni rujnza redojlre, ni'cni abiniinu lojtu, agu-nixgaanu diidxre lojtu. ⁷ Sa'csi Dios gure-jdxni nuurnu te guibajnnu lo yälñabanya xtensi, xhet lo yälñabanya diidxre. ⁸ Ni'cni bejn ni di gucuadiajg rediidxre, dini gac xtiidx te bejn ni dini cuadiajg, xtiidxpac Dios ni dini cuadiajg, Dios nani abaniidx Sprit Dhan xtensi loonu.

⁹ Ditu guiquiin gucuaäru diidx xho chanälažjtu resa'tu, sa'csi lagajc Dios abaluiitu xho chanälažjtu resa'tu. ¹⁰ Luxh rinälažjtu guiraa reni rililajz, guiraa reni siääd guideb nez Macedonia. Ni'cni rniabnu lojtu bejtznu, chä'pru xcärlinälažjtu. ¹¹ Colgutijp lajztu, dxitis colguibajn, coljiu xtzuncatu, lagajc naatu colyejn dzuun si'cni agunibeenu guntu. ¹² Te fii rebejn ni di chalilajz laaca nabansa'ctu, nägajcza te xhet jiäädxdì xhi rquiintu.

Xho gac che jiädsac Jesucrist lo guedxliu

¹³ Bejtznu, rlajznu gacbeetu xcuent rebengut te di gac-huin lajztu si'c rujn rebejn ni di chalilajz xtidx Dios. ¹⁴ Si'c ni rililajznu gujt Jesucrist, dxejc gubansacni,

sigajcza rililajznu suspansac Dios guiraa
reni nagayejs nen baa, renani huililajz xtidx
Jesucrist. Luxh che guibi' Jesucrist, siäd-
nänireni.

¹⁵ Xcient xcälrnibee Jesucrist rniä lo-
jtu, nuurnu ni nabajnu che jiädsac Je-
sucrist, dinu nid loj reni nagayejs nen
baa. ¹⁶ Sa'csi lagajc Dad Jesucrist siäjt lo
guedxliujre, sibedxa'ni, siejnz xse' guix-
hajz ni rnibee, sibedxa'ni, trumpet xten
Dios. Dxejc sibangxgaa reni nagayejs nen
baa, reni huililajz xtidx Crist. ¹⁷ Dxejc nu-
ure ni nabansijcnu sidxaagnureni nen rebäj-
te lo bej chachagloonu Dad. Si'c chonnu
cholaznäjnuni par tejas. ¹⁸ Ni'cni rniä lo-
jtu, colcuedxilajz sa'tu con rediidxre.

5

¹ Niluxh xcient redxejga, reijzga, xhet
riquiinditu gucuäni lojtu, ² sa'csi la'tu
anansa'ctu sidzujn dxej ni jiääd Jesucrist
cheni rut cayunlojdini, sigajc che riääd
te gubaan yääl. ³ Che canii bejn: "laaca
dxunnu, dxunsa'cnu", chela gacbeereni
acadejdreni trabajw si'c che rdzujn yäl-
nayan te gunaa che rajl xi'nni, luxh di-
gacdi guxunreni lojini. ⁴ Niluxh bejtznu, di
gac nayaälut te di che xhet cayunlojditu
dxej xten Jesucrist, guidzunxhiga'tz dxej-
ga si'c gubaan. ⁵ Sa'csi guiraatu najtutu
bensa'c nabajntu lo bianij, lo rdxee, dinu
gac benguijdx, dinu guibajn lo yääl, lo
yälcäjy. ⁶ Ni'cni di nungäj guidiesnu si'c
rejs stecuaa bejn, ni'cni nungäj sunasijnu
na'cza jiennu redojl ni rlajz tiejxhnu. ⁷ Reni
rejs, rejsreni yääl, reni rsiojz, rsiojzreni
yääl. ⁸ Niluxh nuure nabajnnu lo rdxee,
ni'cni nanab na'c jiennu si'c, riäjlx xca'nus
yärlilajz näjza yärlinäljaz si'c rca' sol-
daad gamangw guuib ni rajcwni, ni rusäuu
lastooni. Riäjlx guiläzdu'tznu sa'csi
yärluslaa lo dojl naje si'c xhumbrel-guiib ni
ru' yejc soldaad ni rusäuu yejcn. ⁹ Sa'csi
di Dios nibe nuurnu te chonnu gabijl,
alga guleni nuurnu te xca'nus yälnabajn
ni rudeed xi'nni, Jesucrist. ¹⁰ Sa'csi gujt Jesu-
christ lacuua nuurnu, te guibannäjnuni masä
nabajnnu lo guedxliujre o nagayejsnu nen
baa che guibi'ni. ¹¹ Ni'cni, colguspaa lajz
sa'tu, tejtu sigajcza steetu, sigajcni cayu-
jntu naj.

Rulijdx Pabl resa'ni

¹² Bejtznu, rniabduxhnu lojtu,
colhuiduxh reni ruluij xtidx Dios lojtu,
sa'csi agule'c Dadreni te guinibeereni, te
gulijdxreni la'tu. ¹³ Riäjlx chanälazduxh-
tureni xcient dzuun ni rujnreni. Colcuedxi
con resa'tu.

¹⁴ Rulijdxnu la'tu, bejtznu, colgulijdx
reni najc benätsiaj; colsudzu'tz lajz reni
guxii rbalajz lo xnez Dios; colgacnäj reni
di gumbesa'c xtidx Dios, colcuedxi lajz
guiraasi bejn.

¹⁵ Colhuii di chu tejtu gunza dolgijidx
lo rebejn ni rujn dolgijidx. Laaca guntu
ganax dzunsa'c lo sa'tu, sigajcza lo chutis
bejn.

¹⁶ Colguibalajztis guideb nabajntu. ¹⁷ Na'c
cuääz guiniitu lo Dios. ¹⁸ Mase xhitis rsi-
ajctu, coldeed xquixtios lo Dios, sa'csi si'c
rlajz Dios gun reni rililajz Jesucrist.

¹⁹ Di cuälaztu xtidx Sprit Dxan xten Dios
ni rniini nen lastootu. ²⁰ Na'c cuälaztu xtidx
reni rnii xtidx Dios xcient nani churu gac.

²¹ Colquil guiraa rediidx, coljiannäjtis redi-
idx ni najc didksa'c. ²² Colbicaj lo guiralii
dolgijidx.

²³ Lagajc Dios, Dios ni rbecdx lajztu, gu-
siapac lastootu, te cucheeni xaimtu, näj-
lastootu, näjza tiejxhtu, te na'c guntu dojl
ni di riäjlx guntu te cuääztu dxej ni guibisac
Dad Jesucrist. ²⁴ Dad ni gurejdx la'tu rujnza
guiraa ni rniini, ni'c sujnzani guiraa redzu-
unre.

Ruzadiidxniren

²⁵ Bejtznu, colnab lo Dios xcient nuurnu.

²⁶ Colgudeed xtixtios lo rebejtznu ni yu'
ro'c.

²⁷ Con laj Dad Jesucrist rnibeä, gołtu gui-
jtzre loj guiraa rebejtznu.

²⁸ Gacnäj Dad Jesucrist la'tu. Sugacni si'c.

Guijtz Ni Rojp Lo Rebe_n

Tesalónica

Rucuaanu guijtzre lojtu, rexpen Jesucrist ni rbäjz guedx Tesalónica

¹ Narä Pabl, näjza Silvan näjza Timoteu, cacuaanu guijtzre lojtu, rebejtznu ni yu' guidoo lo guedx Tesalónica, reni yu' lo Dios Xtradu näjza lo Dad Jesucrist. ² Gacnäj Dios Xtradu näj Dad Jesucrist la'tu, gus-cuecdxzareni lajztu.

Gun Dios yälguxhtis loj rebendojl che guibi' Jesucrist lo guedxliuij

³ Bejtznu, rudeddu xquixtios lo Dios xcienttu, si'c riäj_l jiennumi, sa'csi xcärlilajztu siädroobru, näjza yälrinälajz ni rajp tejgatu näjza sa'tu siädroobruni. ⁴ Ni'cni rliä'pnu xpala'ntu nen reguidoo xten Dios. Rbaa lajznu sa'csi rsiudzu'tztu sanuutis rililajztu xtidx Dios mase rdejdту trabajw, rusacsí bejntu. ⁵ Dee ruluiipac xcälguxhtis Dios najc laaca, ni'c rnii Dios riäj_l jiu'tu lo xcälrnibeeni sa'csi cadejtu trabajw xcient yälrnibeega.

⁶ Sa'csi rujn Dios xhigab riäjlza quiix reni bateedtu trabajw xtoj_lreni, ni'c suteedzani reni'c trabajw. ⁷ Niluxh la'tu ni cadejtu trabajw, sujn Dios gusilaznäjtu nuure che guluiloj Jesucrist, siriini xhaguibaa siädnäjni rexanglni ni sajc, ni rnibeduxh. ⁸ Lo te balduxh siäadni, dxejc guisloj susac-siduxhni reni di gan Dios, dizareni gu-soob xtidx Dad Jesucrist nani rudzucaj dojl. ⁹ Guiraareni sidejdreni trabajw, par tejpas agunijtre ni, zit churenlo Dios, lo yäldimbicha' xten xcälrnibeeni. ¹⁰ Che jiääd Dad guirii xhaguibaa, dxejga siliä'p rexpejnni xpala'nni, sidxelozja renani huililajz laani näjza la'tu, sa'csi huililajztu diidx ni basule'nu che guyu'nu lojtu.

¹¹ Ni'c rniabtisnu lo Dios por la'tu, rni-abnu lo Dios guinaj lajzni nabajztu si'c riäj_l guibaj_l reni guleni. Rniabzanu gu-niidx Dios lojtu guntu guiraa redzunsa'c ni rchaglajz Dios guntu, gacnäjzani la'tu con xcälrnibeeni te guntu redzuun ni ru-juntu sa'csi rililajztu. ¹² Te chä'p xpala'n laj Dad Jesucrist si'cni nabajntu, te laani

guiliä'pzani xpala'ntu, xcient yälrinälajz xten Dios näjza Dad Jesucrist.

2

Bendolduxh

¹ Naj, rniabduxhnu lojtu bejtznu, xcient dxej ni jiääd Jesucrist, dxej ni guidoj-pzanu lojni, ² na'c chugajtu yarsia'. Na'cza gusaantu guchebreni la'tu con diidx ni ruluii te bejñ ni najc profet', nicla con diidx ni rnii stee bejñ lojtu, niclaza con diidx ni naareni lojtu caj loj te guijtz ni naareni baxhalnu lojtu, cadro caj "dxej ni guibi' Jesucrist abidzujñ". ³ Na'c gusaantu gus-guee bejñ la'tu xcient redidxre. Che gajd dxejga guidzujñ, su' bejñ ni sibälaz xtidx Dios, dxejc suluiloj benlatxiaduxh, xi'n nani sinistloj par tejpas. ⁴ Bejne siliä'p lagajc xpala'nni, sidxe'chni lo guiraa ni sanä laj Dios, näjza xhitis ni rajn bejñ, te cueni nen xquidoo Dios, guluilojni si'c lagajc Gueb Dios.

⁵ ¿La di lajztu guisaj cheni guyusicä lojtu, rniä redidxre lojtu, ä? ⁶ Naj la'tu anajntu xhini'c ruscuäätzni, te na'c guir-icajni ansde guisa' redxej xtenni. ⁷ Te yälxhiga'tz najc dzunlatxiaduxh ni alacayajc lo guedxliuij, cayäädxtis guibicaj nani cagus-cuäätzni galäiini. ⁸ Dxejc suluiloj benlatxiaduxhre. Niluxh Dad Jesucrist, sugu'tnini con bero'ni, che guibi' Jesucrist lo guedxliuij xpianijni sujn nitlojni. ⁹ Benlatxiaduxhre najc si'cpac najc bendxbab. Che guidzujñni, guidzujñni si'c te bejñ nani rnibee, sujnni seen, sujnzani milagrw ni rusguee.

¹⁰ Con xcällatsaj bejne susgueeni guiraa renani alagunijt lo Dios sa'csi direni nicäjb ninälajzreni didxlii ni nuslaareni nen dojl. ¹¹ Ni'cni susaan Dios jiääd te yälrusgeduxh te chalilajzreni didx-xhii. ¹² Te gabijl jii guiraa renani di nicäjb nililajz didxlii, alga bidxaglajzreni yällatsaj.

Ren i gule Dios guirii nen dojl

¹³ Niluxh nuurnu riäjl gudeedtisnu xquixtios lo Dios por la'tu, bejtznu, ni sanäläjz Dad Jesucrist. Rudeddu xquixtios sa'csi galooli gule Dios la'tu te guslaani la'tu lo dojl, xcient Xsprit Dxanni ni rusia lastootu, näjza redidxlii ni huililajztu. ¹⁴ Ni'cni che biejn diajtu diidx ni basule'nu lojtu, gure-jdx Dios la'tu, te xca'zatu xcäldimbicha' Jesucrist.

¹⁵ Naj bejtznu, colchanuu, colsudzu'tz, na'cza jiällajtu rediidx ni balidxnu la'tu che guyu'nro'c, näjza rediidx ni bacuaanu lo guijtz ni baxhalnu lojtu. ¹⁶ Lagajc Dad Jesucrist, näj Dios Xtradnu, ni sanälajz nuurnu, ni ruscäjn lajznu par tejpas, ni baniidx xcälbääznu racnäjni nuunu, ¹⁷ guspani lajztu, gusudu'tzni la'tu lo guiraa redidxsac ni guiniitu näjza redzuunsa'c ni guntu.

3

Colnab lo Dios xcient nuurnu

¹ Bejtznu, colnab lo Dios xcient nuurnu te chanuu guire'ch xtidx Dad Jesucrist, te che gusoob bejn diidxga chä'p xpala'n diidxga, sigajcni gujcni con la'tu. ² Colnabza lo Dios xcanäjni nuurnu te di tednu ladzqaa rebenlatstaj, rebenguijdx, sa'csi xhet guiraadi bejn rajp yärlililajz. ³ Dios rusoo xtiidxni, susudu'tzni la'tu, sacnäjzani la'tu te di sactu dolguijdx. ⁴ Abascuedxi Dios lastoonu xcienttu sa'csi anancheenu cayujntu guira'ti nani gunibeenu guntu, luxh si'cza sinuu gusoobtu xtiidxnu. ⁵ Canabä lo Dad Jesucrist guniidxnii gacbeerutu xcälsanälajz Dios, canabäza colcuecdxi lajztu si'cni bejn Crist che gudejdni trabajw.

Nanab jiennu dzuun

⁶ Bejtznu, con laj Xtrad Jesucristnu, rnibeenu guibicajtu lo chutis te sa'nu ni ricanzajtis, ni di rlajz gunni dzuun. Guibicajzatu loj reni di guibajn si'cni baluiinu riäjl guibajntu. ⁷ La'tu anajntu xho riäjl guibajntu, chanuutu guntu si'cni riennu nuure. Najntu nuurnu dinu nicanzaj che guyu'nru lojtu sa'csi biennu dzuun. ⁸ Dizanu nidauxlia' xcu'n chu tejtu; guiraani bidiixnu, biennu dzuun dxej-yääl, te di nutaalnu xtzuun chu tejtu. ⁹ Masä nungäjl niniabnu niacnäjtu nuurnu, dinu niniabni; alga biennu dzuun te baluiinu xho chanuutu. ¹⁰ Cheni guyu'nru lojtu, gunibeenu scree guntu: Chutis ni di rlajz gun dzuun di riäjl xca'ni xhi gauni. ¹¹ Aguniireni loonu baltitu rcanzajtis, direni gun dzuun, alga rihuiireni xhi cayujn rebejn. ¹² Rulijdxnu rebejnre, rnibeenureni con laj Xtrad Jesucristnu: colcuedxi, colyejn dzuun te gautu.

¹³ Bejtznu, na'c guidxajgtu guntu dzunsa'c. ¹⁴ Palga yu' chu tejtu di gucuaadijg xtiidxnu ni caj lo guijtzre, colhuii chuni'cni te na'c guchaagtuni, te guitujyni. ¹⁵ Niluxh na'c ga'ptuni si'c ni rdxe'ch lojtu, colguliidxni si'c bejtztu.

Rusadiidxniren

¹⁶ Gueb Dios xten yälrbedxi, guscuedxi lajztu guixe-guixee, masä xhitis sajctu. Jiannäj Dad Jesucrist guiraatu.

¹⁷ Narä, Pabl cacuaä xtixtiosre con naäpac si'c runä lo guiraa rexquitä, scree rucuaä.

¹⁸ Gacnäj Xtrad Jesucrist guiragajctu. Sug-acni si'c.

Guijtz Ganid Lo Timoteu

Pabl rucuaa te guijtz lo Timoteu

¹ Narä Pabl, nacä te apost xten Jesucrist, rucuaä guijtzre lojlu. Nacä apost sa'csi si'c gunibee Dios ni ruslaa nuurnu lo dojl näjza Dad Jesucrist nani cholääznu. ² Timoteu, luij najclu si'cpac xinganä lo yälrililajz. Xtradnu Dios näjza Xtrad Jesucristnu gacnäjlu, guaslajzreni luij, guscuecdixireni lastoolu.

Pabl rulidx xcient reni rului diidx-xhii

³ Che sia'ä reguedx Macedonia, gunibeä jia'nlu guedx Éfeso te gulijdxlu gaii bejn te na'c guluiireni garenca diidx, ⁴ te na'c jiutejreni rexuenta rebentiemp, te na'cza jiuduxhreni chu gujc rexpengoldoereni, sa'csi di rediidxre gacnäj guiroobru lastoereni si'c rustioob yälrililajz lastoonu. ⁵ Naj rnibeä si'c chanuu gulijdxlu rebejn.

⁶ Rulidxnru bejn te ga'preni yälrlinälajz sa'reni. Ganid nanab gacnaya lastoereni, nanab ga'preni xhigabsa'c, nanabza chalilajzpacreni. ⁷ Yu'reni abaro'n rediidxre, riejytiis ro'reni saniduxhreni diidx ni xhet sajcdi. ⁸ Rlajzreni gacreni bejn ni najn leii, niluxh niclaza laareni direni gacbee xhi sáloj ni rmiireni, niclaza xhi sáloj rediidx ni ruluiireni, räjpreni, 'didxliipac dee'.

⁹ Anajnnu leii xten Dios najc sacdughxni, palga jiennu si'cni rniipacni. ¹⁰ Najnnu di leii gac par benja'c, najcni par reni najc benlatsiaj ni di jiu leii xten Dios, näjza reni di gusoob diidx; par reben guijdx, näjza rebendoj; par reni di jiu Dios, näjza reni rusguee; par reni rugu't xtradni, xnanni, näjza guiraa reni rugu't bejn; ¹¹ par reni resnäj te gunaa ni digac chäälenri, näjza reni resnäj lagajc saniguireni; par reni rbajn bejn; reni rnii didx-xhii; reni rnii didx-xhii si'c didxle' parsii rusguee sa'reni; näjza bejn ni rujn xhitis xhi xtee dzuun ni digac dzunsa'c, ¹² nalajznu sa' redzunsa'c ni rulidx xtidx Dios-le', diidx ni ruslaa lo dojl. Narä biannää diidxre.

Rudeedni xquixtios lo Dios sa'csi rulasla-jznini

¹² Rdedä xquixtios lo Dad Jesucrist ni runiidx yälrnibee narä sa'csi najnni nasob-didxä, ni'cni guleni narä gunä xtuunni.

¹³ Luxh galoo guniyaäni, birinalä xpejnni, basacsäfreni. Niluxh Dios balaslajz narä, sa'csi dina niacbeä xhini'c cayunä, sa'csi gjadna chalilazä. ¹⁴ Niluxh lacti guroob gujc yälracnäj xte Xtradnu, guideb yälrililajz, näj yälsanälajz ni rajp Jesucrist.

¹⁵ Diidxre najc guliduxh, nanab chalila-jzpactuni: Jesucrist biääd lo guedxliujre te guslaani reben dojl; lo reben dojl narä nacäru bendolduxh. ¹⁶ Ni'cni balaslajz Dios narä, mase nacä bendolduxh lo guiraereni, te ganid con narä guluiini xho rbäjz Jesucrist te chalilajz bejn xtiidxni, te filoj reni churu chalilajz xtiidxni te ga'preni yälnabajn par tejpas. ¹⁷ Dios najc reii, reii ni di guet, reii ni di guzen, laatsiñi najc Gueb Dios ni nanduxh, ni'cni colgualiä'p xpala'nni, colgajnni guideb guibajntu näjza par tejpas. Si'c gacni.

¹⁸ Xi'nä, Timoteu, dee najc yälrlujdx ni runidxä lojlu te gucuasa'clu si'c te sol-daad ni abisieed, sigajc ni gunii reprofe't xcientlu galoo. ¹⁹ Di gunijtlu yälrlilajz, bejnza xhigabsa'c, sa'csi yu'reni abaro'n xtidx Dios, ni'c abanijtreni yälrlilajz. ²⁰ Si'c gusajc Himeneo näj Alejandro, luxh abat-edäreni ladznaa bendxab te guiseedreni na'c guiniya'reni Dios.

2

Ruluini xho guiniabreni lo Dios

¹ Rulidxälu ganiddoo cueedxlu, guiniablu lo Dios, gudeedlu xquixtios lo Dios xcient guiraa rebejn. ² Guiniabzalu xcient rejeii näj guiraa reni rnibee lo guedxliujre, te gac guibandxinu, te gac chanuunu xnez Dios, te saru guibajnnu. ³ Sa' yälrnabagä najc laaca, luxh si'c rdxaglajz Dios ni ruslaa nurnu lo dojl guiniabnu lojni. ⁴ Dios rlajz laa guiraa bejn lo dojl, rlajzzani gacebeepacreni xtidxliini. ⁵ Yu' tejtiis Dios, näjza tejtisana rusiäj diidx lo Dios näjza loj reben guedxliuj. Laani najc Jesucrist ni gujza niguui. ⁶ Jesucrist gujt lo crujz te gudijxi redojl xten guiraanu ni tre' lo guedxliuj. Dee gujc che gojl dxej ni gule Dios. ⁷ Dios gule narä te gacä apost te gusule'ä xtiidxni, yälrililajz näjza didxlii lo reni di gac xpejn

Israel. Si'c ni rlajz Jesucrist rniä didxlui, dina guiniä diidx ni rusguee.

⁸Ni'cni rlazä guiraatis lajt guiniab rebejn lo Dios, saru guiliäś naareni, gusaanreni yärlwdx'eħ, na'c gunreni biejy. ⁹Si'cza regu-naa, saru gacwreni xhabreni, na'c gacreni gunaroxhi, cuedxireni. Xhet si'cdi regu-naa ni entis rsiucheduxh con oor o perl o ladsajc, rajc guichnil yejcnii te guidxeloi bejñreni. ¹⁰Masru ruchaag gunreni si'cni rchalglaž Dios, si'c riäjl gun guiraa regunaa ni yu' lo Dios. ¹¹Riäjl dxitis gucuadajg regunaa xtidx Dios ni rusule' reniguii. ¹²Dina xcäbä́ gunuse' te gunaa diidx lo guiraa rebejn, niclaza guinibeeni lo reniguii, dxitis cueni lo rebejn ni cagucuadajg diidx nani cagusule'ni. ¹³Sa'csi ganid benchee Dios Adán, dxejtiru bencheeni Eva. ¹⁴Luxh et Adandi basguee bendxbab, bendxbab basguee gunaaga, dxejc bijbni neñ dojl. ¹⁵Niluxh siliaa regunaa, palga jiuren xtzuumreni si'c nan, palga chanuu chalilajzreni xtidx Dios, palga chanälajzreni sa'reni, palga chutis-reni lo Dios, gaczareni gunasa'c cuedxireni.

3

Xho riäjl gac reni rnibee

¹Dee najc didx gulii: palga rlajz te niguui ga'p dzuun xten Dios, gusule'ni xtidx Dios, guinibeeni rebejn, te dzunsa'c najc ni rlajzni gunni. ²Ni'cni, ni rlajz gac nani rnibee, riäjl guibansa'cni te na'c chu xhicuent guiniyaj rebejnni. Riäjl gacni chääl tejtis gunaa, riäjl susinni, gacni te bensa'c, cuedxini, te guibansa'cni. Riäjlza di gudxojnni rolijzni guidzujn bejn, nägajc riäjl gacni te bejn ni nansa'c te guluiini.

³Na'c gacni te beng, nicla te ni rdxa-gdijl bejn, na'cza gacni te nani rsia' lajzni ga'pni xhidajl meel, riäjl cuedxi lajzni, na'c chanälajzni meel. ⁴Riäjl guinibesa'cni rolijzni, saru gunni te gusoob rex'i nni xtiidxni.

⁵Sa'csi palga di te bejn gan xho guinibeeni lagajc rolijzni, aticaxh gac ga'pni guidoo xten Dios. ⁶Di riäjl guinibee te ben-coob nani entis huililajz, te di guschä'pni xpala'nni sas jiajbni lo lagajc xcälnaj Dios ni biajb bendxbab. ⁷Luxh riäjlza guinii reni di chalilajz xtidx Dios laaca najcni, te na'c jianxtujni, te na'cza jiajbni ladzñaab bendxbab.

Xho riäjl gac reni rcanäj neñ guidoo

⁸Si'cza rediaconos riäjl gacreni bejn ni yu' xcäriejnreni, nanab gunreni si'cpac ni rniiren, na'cza soozreni, na'c xca'reni meel ni direni niunsa'c gaan. ⁹Riäjl gapdzut'zni rediidx nagajt xten yärlililajz, ni'c nanab gac naya lastooreni. ¹⁰Riäjl fixgaatu xho nabajñreni. Palga nabansa'creni, rutza gacdi gucuaquijdireni, sajc gacreni dia-cono. ¹¹Regunaa ni rlajz gac diaconas riäjlza chu xcäriejnreni, na'c güireni diidx ni di guchaag, na'c soozreni, gacreni gunasa'c, cuedxireni, gunreni si'cpac ni rniiren lo guira'ti dzuun. ¹²Riäjl gac rediacono chääl tejtis gunaa. Riäjl guinibesa'cni rex'i nni näj guiraa reni yu' rolizjni. ¹³Sa'csi rediaconos ni runsa'c xtzuumni, sanälajz be-jñreni, dizareni guidxejb rsiudzu'tz lastooreni lo xcärlililajz xtidz Jesucrist.

Gurobduxh najc yälxhiga'tz xten Jesucrist

¹⁴Caculaä diidxre lojlu, niluxh rlazä jiädhuiigaä la'tu. ¹⁵Luxh palga gaclaä, anajnlu xho riäjl guibajn bejn rolizj Dios, nalajznu xquidoo Gueb Dios ni nabajn par tejpas. Guidoore rniasdzu'tz näjza ruluiuru didxlui xten Dios. ¹⁶Rdxeloyaduxh guiralii bejn yälxhiga'tz xten xcälnajn Dios:
Dios biääd lo guedxliuj si'c te benguedxliuj, Sprit Dxan xten Dios gunii bendxanni; bahuii rexangl Dios lojni; basule'reni xtiidxni lo rebejn ni di gac xpejn Israel;
guira lajt huililajz bejn xtiidxni; huäjsni lo xcäldimbicha' Dios xhaguibaa.

4

Reni rbicaj lo xnezyuj Dios

¹Aguniipac Sprit Dxan siääd redxej che chu reni guro'n yärlililajz, sucuadajgreni xtidx rebejn ni rusguee näj xtidx rebendxbab, 'nicla jiuren rniiren diidx-xhii ni rusguee, sa'csi xhetiru xcäriejnreni, anajcni si'c najc cadro rudxuij te guiblaa: xhetru racbeedini. ²Suluii rebejnre na'c guchñaab bejn, suluiizareni na'c gau bejn guiraloj, niluxh Dios bejnpac redee te xca' rebejn ni rilajz, ni racbeeza didxlui, te gudeedreni xquixtios lo Dios. ⁴Guiralii reni benchee Dios najc laaca, di riäjl cuälaznu xhi rca'nu che rudednu xquixtios loj Dios. ⁵Sa'csi xtidx Dios näj yärlbedx-rniab lo Dios runsa'c guira'ti.

Te ni runsa'c xtzuun Jesucrist

⁶ Palga susnajlu lajz rebejtzuu rediidxre, sajclu te moss'a'c xten Jesucrist, luxh si'c sisieedruzalu diidx xten yälrililajz, näj yälrluisa'c ni sanuulu. ⁷ Na'c jiulu ni rnii regunaroysi ni xheti xtzuunni. Bisieed sudzu'tz lastoolu lo xtidx Dios. ⁸ Guxii sajc guinibduxh bejn te gusutipni tiejxhni. Niluxh sacduxhru cucheenii xtidx Dios nen lastoomi, sa'csi racnäjny bejn lo yänabajnre näjza lo yänabajn ni najc par tejpas. ⁹ Dee najc didxlII, riäjl chalilajz guiraatuni. ¹⁰ Ni'c riennu dzuun, rdeednu trabajw, sa'csi cabäjznu Gueb Dios ni nabajn, ni ruslaa bejn lo dojl, ganiddoo renani rililajz xtidxni.

¹¹ Sajplu guinibeelu soob rediidxre, näjza guluiilu rediidxre. ¹² Di gusaanlu cuälazreni luij sa'csi najclu bi'n; riäjl gacu te ni suu te fii guiraa reni rililazsa'cpac xho rniiilu, xho nabajnlu, xho sanälajzlu sa'l, xho rililajzlu, näjza xho rajplu xhigabsa'c. ¹³ Lal ni guidzunä ro'c, bil xtidx Dios lo rebejn, balijdxreni, baluiiza xtidx Dios lojreni. ¹⁴ Di gusaanlu reyälnajn ni baniidx Dios lojlu cheni basuj rebengool naarenii yejclu por xtidx Dios, guniireni diidx xcuent nani churu gac.

¹⁵ Guet-guejt basnaj lajzlu rediidxre, biusa'c rediidxre, te gac fii guiraarenii xho sanuulu lo xtidx Dios. ¹⁶ Gopdu'tz lagajc luij näjza rediidx ni ruluiilu; guzudzu'tz lo guiraa rediidxre, te si'c laalu lo dojl, te laazu reni rucuadiag xtidxlu.

5

Xho guibaññajnu reni rlilajz

¹ Na'c quidxa'l lu loj te bengool; guninäjny si'c xtradlu, balijdx rebi'n si'c bejtzlu, ² balijdx renanbengool si'c xnanlu, balijdx redxap steeb si'c rebisajnlu con rexhigabsa'c.

³ Gucnäj rebiuuud ni guliipac rquiin chu gacnäjreni te chu xhi gaureni. ⁴ Niluxh palga yu' chu biuud yu' xi'nni o xajgni, suguisiedxgaereni guibaññayareni lo xnez Dios, te quiixreni di'n ni nasääbreni lo xta-dreni, näj xnanreni ni basläreni, sa'csi ni'c najc laaca, rdxaglajzza Diosni. ⁵ Gunaa ni najcpac biuud, abia'n xtebni, ni'c rbäjztisni lo Dios, dxej-yääl rbejdx-rniabni lo Dios. ⁶ Niluxh biuud ni nabajn cadedgustisni najc si'c te ni agujt nen dojl. ⁷ Basule' rediidxre

lojreni te rut gucuauquijdireni. ⁸ Palga yu' chutej ni di gacnäj resa'ni, lagajc reni rbäjz rolijzni, ni'c agulälaz xtidx Dios, bengui-jdxru najcni lo rebejn nani di chalilajz xtidx Dios.

⁹ Di gucuauu laj rebiuuud lo guijtz te gacnäjtuni palga gajdni chu gayojn ijj. Riäjlza gac biuudga te gunaa ni gubañnäsa'c chäälmi. ¹⁰ Riäjlza gumbee bejnri xcuent redzunsa'c ni rujnni; palga baslaani rexii'nni, palga badedaani rolijzni gues ben zift, palga gudiibni ni' rexpejn Dios te si'c guzeñ xcälnadolazjni, palga racnäjny reni rdejd trabajw, palgaza riuni rujnni guira'ti redzunsa'c.

¹¹ Niluxh na'c gucuauu laj biuud ni yu' guxiiru ijj sa'csi che guichaglajzreni te niguui, siällajzreni diidx ni bia'nreni lo Jesucrist, te rlajzni guchñasacreni. ¹² Dxejc siu'reni neñ dojl sa'csi rbälazreni rediidx ni bia'nreni che galoo bejnreni xhigab niuureni lo xtzuun Dios. ¹³ Dxejc sia'lojreni xhet gundireni, rijreni rolijz bejn ricuereni. Luxh malaii ni'ctis gunreni. Niluxh rliäszareni didxxhii, richu'reni lo xhitis, rniizareni diidx ni di guchaag guiniireni. ¹⁴ Ni'cni rlazä rebiuuud ni najc dxa'pru guchñaareni stehuält, chu xi'nreni, fis'a'creni rolijzreni te na'c guiniyajreni rebejn ni rdxch'lojnu.

¹⁵ Sa'csi yu' gaii biuud ni alagubicaj lo xnez Dios sanajlreni benðxab.

¹⁶ Pal yu' tej resa'nu ni najc sa'n te biuud, riäjl gacnäjnini, na'c gusaanni gutajlni xtzuun guidoo, te si'c guidoo sajc gacnäj rebiuuud ni rquiinpac chu gacnäjreni.

¹⁷ Rebengool ni rnibesa'c guidoo, riäjl chanälajztureni näj gudeedruth guiraa nani rquiinreni, si'c najc reni rusulesa'c xtidx Dios, rulidxsalcreni la'tu con xtidx Dios. ¹⁸ Sa'csi lo xtidx Dios caj scree: "Na'c gusällu guijxh ro' gon che rusiani triuu"; si'cza caj stee diidx: "Riäjl gax bejn ni rujn dzuuun."

¹⁹ Na'c cucuadiaglu xtidx tej ni rucuauj te bengool palga ruti tio'p, choñ testiigw.

²⁰ Niluxh reni sanuu rujntis dojl, riäjl guli-jdxlurenri nez loj reben guidoo, te näjza laarenii guidxejbreni. ²¹ Nez loj Dios, nez loj Dad Jesucrist, nez lojza reangl ni gule Dios, rulidxdhxhalu chanuulu lo rediidxre, na'c jirululu tej bejn lo sa'n. Bejn tebloj loj

guiraa rebejn.²² Na'c gusiojb lajzlu gusujlu naalu yejc te bejn, te gacni ben guidoo palga gajdни guisieed guibans'a'cni lo xnez Dios sa'csi lagajc yejclu jiajb rextojlni. Gubicaj lo guiraa dolgуйdx.

²³ Na'cru yälu ganax nis. Gu'za tudxe'n bin sa'csi racxhuu xque'lü, näjza sa'csi yu'ru rexälracxhuu.

²⁴ Yu' bejn ruzengajc rextojlni ni'c rjacni castiigw, niluxh yu' bejn ni di xtojlni guzengajc. ²⁵ Sigajcsa redzunsa'c ni rujn bejn; yu'reni ruzengajc, niluxh mase dini guzengajc, digacdi jianxhiga'tzni, sidzujn dxej suzeñni.

6

¹ Reni najc mos riäjl cuadijgreni xtidx xlamreni, te na'c guiniyaj rebejn laj Dios niclaza xtidx Dios ni rusule'nu. ² Palga yu' remos ni najc xlamni te nani rilajz, na'c cuälazreni rextiidxni sa'csi najcni bejtzni lo xcälrililajz Jesucrist. Riäjl gunsa'curenri xtzuunni, sa'csi najcreni sa'nii loj yälrililajz xten Dios, luxh sanälajzzarenini. Rediidxre baluui, basule'.

Yälnabansa'c näjza te lastoo ni rbedxi

³ Palga yu' chu ruluii garenci diidx, diidx ni digac didxsa'c, si'c najc xtidx Jesucrist, näjza xhet si'c diidxdi ni ruluii xho guibans'a'c bejn, ⁴ bejngä rlajz guiliä'p lagajc xpala'nni, niluxh xhet najndini. Si'c te yälguijdx yu'tis yejcni yälguiinabi diidx, yärlidilididx. Luxh redee rujn rdxe'ch lajzreni, rujnni rdxe'ch bejn lo sa'ni, rujnni rniyaj bejn, rujnzani di bejn guinisa'c lo sa'ni. ⁵ Rujnzani rdilnäj bejn sa'ni. Guiraa redee gun bejn ni aguxhijñ xcäriejnni, bejn ni diru ga'p didxlü. Rchalorenri sujnreni ganduxh xcient rediidx ni ruluiireni. Gubicaj lo sa' bejnre. ⁶ Niluxh yälnabansa'c näjza te lastoo ni rbedxi, redee sa'cduxh. ⁷ Sa'csi xhet biopnäidinu lo quedxliujre, luxh sigajcsa xhet sajcdi chonänu che guetnu. ⁸ Niluxh palga rajpnu xhi gaunu, xhi gajcwnu, con ni'c riäjl guibalaaaznu. ⁹ Niluxh reni rlajz ga'p xhidalduxh meel, riajbreni lo xhigab guijdx, rujnareni xhidajl dzuun ni xhet sajcdi, ni rujn daan, ni rusiäaz bejn lo yälruxhin, lo yälrnitloj. ¹⁰ Sa'csi yälrinälajzni meel najc xlobaa guiraa redzunguijdx. Yu'za bejn ni rlazduxh ga'pni meel, rusaanreni

xcälrililajz Dios, dxejc lagajc laareni rujn rdedduxhreni trabajw.

Dzun-huen xten yälrililajz

¹¹ Niluxh luj, bejn xten Dios, baxu'n lo guiraa dee, te chanuulu lo xcälxhigbsa'clu näjza yälnabansa'clu; te chanajllu yälrililajz näjza yälsanälajz; te chanuulu lo yälrbecwdx lajz näjza yälnadolajz.

¹² Benduxh dzuun xcient yälrililajz Jesucrist, gunazdu'tz yälnabajn ni najc par tejpas. Ni'cni gurejdx Dioslu, luxh aguniilu rililajzlu xtidx Dios nez loj xhidajl bejn, te anancheereni. ¹³ Naj rulidxälu nez loj Dios ni rudeed yälnabajn lo guiraa ni yu' lo quedxliujre, näjza nez loj Jesucrist, ni basule' xtiidxni nez lo Poncio Pilat', ¹⁴ rniibeä guzobsa'clu guiraa rediidx ni rniä lojlu, na'c guchaaluni, te na'c guiniyajreni luj naj niclaza cheni jiääd Xtad Jesucristnu.

¹⁵ Sidzujn dxejga nani agunii Dios guidzujnni. Dios ni najc le' sujn scree sa'csi laatisni najc Dios, najcni reii xten rereii, rniabeezani reni rniabee. ¹⁶ Laatisni dini guet, nabajnni lo bianij cadro rut rajcdi rbig. Nicla te bejn gajd fii lojni, niclaza gac fi ireni lojni. Xtebtis laani riäjl ga'p rebejn xpala'nni. Laani rajp yälrnabee par tejpas. Sugacni si'c.

¹⁷ Balijdx reni rajp xhidajl xhixtelli lo quedxliujre, na'c guschä'preni xpala'nreni, niclaza chanälajzreni xhixtentisreni. Huenru chanälajzreni Dios ni nabajn, ni runiidx loonu guiralii xhixtenu ni rquiuu te guibalajznu. ¹⁸ Balijdxreni gunreni dzunsa'c, gundajreni dzunsa'c, gacnäjreni reni xhet rajpdi, cuenäsa'creni sa'reni. ¹⁹ Si'c ga'preni yälnasa'c ni guzudzu'tzreni che jiääd Jesucrist, te guiniaztu'tzreni yälnabajn par tejpas.

Rulidxni Timoteu

²⁰ Timoteu, cuanäj ni rniä lojlu. Na'c jiulu didxgуйdx ni yu' lo quedxliujre, niclaza didx-xhii, niclaza rediidx ni rusguee, ni rbälajreni yälnajn'. ²¹ Sa'csi yu' reni sanuu yälnajnre ni'c banijreni lo Dios xcient yälrililajz. Gacnäj Dios luj. Sugacni si'c.

Guijtz Ni Rojp Lo Timoteu

Stee guijtz ni baxhal Pabl loj Timoteu

¹ Narä Pabl, nacä apost xten Jesucrist. Dios gule narä, xcient yälhabajñ ni gudeed Dios loj reni yunäj Jesucrist, si'c ni bia'n diidx. ²Caculaä guijtzre lojlu, Timoteu, xi'nä lo yälrililajz. Rinälazä luj. Rniabä lo Xtradnu Dios näj lo Dad Jesucrist gacnäj luj, gulasla-jzreni luj, guscuecdxireni lajzlu.

Rusule'ni xcient Jesucrist

³Rnaj lazälu che rniabä lo Dios dxej-yääl. Dxejc rdedä xquixtios por luj lo Dios. Naya xcäriénä yu'ä lo Dios, runä xtzuunni si'c bejnza rextadgoldoa. ⁴Rnaj lazä xho biinlu, naj rlazä fiä lojlu te guibalazä. ⁵Rnaj lazäza yu'pac yälrililajz lastoolu si'cni guyu'ni galoo lastoo xmamälu Loida dxejcru lastoo xnanlu Eunice si'cza yu' yälrililajzga lastoolu naj.

⁶Ni'cni rniä lojlu naj, si'cni rcanäj bejn rodäj te di juiini, si'cza cuanäduxh reyäl-najn ni baniidx Dios lojlu cheni basuä naä yejclu. ⁷Sa'csi di Dios nuniidx te lastoo ni rdxejb loonu, baniidxni te lastoo ni rsiutijp, baniidxni te lastoo ni rinälajz, baniidxzani yuduxh xcäriéjnnu. ⁸Na'c guituyjlu guini-ilu rediidx xten Xtrad Jesucristnu, na'cza guituinäjlu narä sa'csi yu'ä nen latzguiib xcient Jesucrist. Näj luj gudejd trabajw ni siääd xcient yälrusule' xtidx Dios si'ctis gacnäj Dios luj. ⁹Dios ni gulää nurnu neñ dojl, gurejdx nurnu te guibañsa'cnu lo-jtisni. Gurejdxni nuurnu xhet sa'csi biennu dzunsa'c, alga sa'csi si'c rlajzni laani, sa'csi balaslajzni nuurnu xcient Jesucrist galooli che gajdi guncheeni guedxluij. ¹⁰Niluxh cheni biääd Jesucrist ni badzucaj rextoljnu lo quedxluijre, baluiloj yälrulaslajzga. Jesucrist banitloj yälrnibee xten yälgujt. Xtiidxni, ni rusule' xho rbicaj dojl, baluü yälhabajñ, näjza yälhabajñ par tejpas.

¹¹Dios gule narä te gacä te ni rusule' xtiidxni, te gacäza te apost, näjza te bejn ni ruluij loj reni di gac xpejñ Israel. ¹²Ni'cni rdedä trabajw xcient guiraa rediidxre. Niluxh dina guituiyä, sa'csi narä nanä chu xtiidx huililazä, nancheä laani sajc gapdzu'tzni dzuuñ ni baniidxni loä dx-ejli cheni guibi'ni.

¹³Chanuu guluiilu redidksa'c ni baniidxä lojlu. Gubajñza lo yälrililajz näj lo yälsanälajz ni rajpnu sa'csi yu'nu lo Jesucrist. ¹⁴Cuanädzu'tz reyälnajn ni baniidx Dios lojlu näj Sprit Dxan xtenni ni rbäjz nen lastoonu.

¹⁵Anajnlu guiraa reni siääd reguedx Asia gulälaz narä; lo redee nadxaag Figelo näj Hermógenes. ¹⁶Dad Jesucrist gacnäj reni yu' rolizj Onesiforo sa'csi balti huält biädspaanı lazä, dini nitujy sa'csi yu'ä nen latzguiib. ¹⁷Che bidzujni guedx Roma, gudiilpacni narä te bidxälni narä. ¹⁸Dad Jesucrist gulaslajz laani che guidzujn dxej ni guibi' Jesucrist. Luj anajnlu balti dzunsa'c bejnni che guyu'ni guedx Éfeso.

2

Te ni runsa'c xtzuun Jesucrist

¹Ni'cni xi'nä, guzutijp sa'csi rulaslajz Jesucrist luj, racnäjnilu. ²Rediidx ni abiejin diajglu guniä nez loj xhidal bejn lagajc rediidxga guniini lo rebejn ni rililajzpac, loj rebejn ni sajc guluiiza diidxga lo stecuaa bejn.

³Batijp lajzlu tednäjlu narä trabajw si'c te soldadsa'c xten Jesucrist. ⁴Di te soldaad gun dzuuñ ni bejnni che gajdni gac soldaad. Rujnni xtzuun bejn ni guleni gacni soldaad, te si'c guspaani lajz bejngä. ⁵Sigajcza, ni rguijt digacdi xca'ni yälñasa'c palga dini quitsa'c si'c riäj quitni. ⁶Bejn ni rujn dzuuñ loniaa nanab xca'ni xcälnasa'cni ganidoo. ⁷Bejn xhigab xcient ni rniä lojlu, dxejc sujn Dios gacheelu guiraani.

⁸Basnaj lajzlu Jesucrist, te xagdoo to-David ni huäjz lo rebengut. Dee najc xtidx Dios ni ruzucaj dojl, si'c ni rusule'ä lojlu. ⁹Ni'cni cagutipä lazä cadedä trabajw, caduä caden si'c te bejn ni bagu't sabejnni. Niluxh digacdi xcaduu xtidx Dios. ¹⁰Ni'cni cadedä trabajwre te gacnää reni agule Dios te näjza reni'c chalilajz xtiidxni te guibajñreni lo bianij xten Jesucrist par tejpas.

¹¹Guliidxuh najc diidxre; palga agujtnu con laani, sibannäjzanu laani.

¹²Palga rdejdnu trabajw, sinibenäjzanu laani. Palga dinu guicä'p numbeenuni, dizani guicäjp numbeeni nuurnu loj Xtradni Dios.

¹³ Mase dinu chanuu lo xtiidxni, laani su-soobni xtiidxni sa'csi digacdi cuat-zlajzni diidx lagajc laani.

Te bejn nani abia xtzunni

¹⁴ Basnaj lajz rebejn xcient rediidxre, gunibee lojreni nez lo Dad Jesucrist na'c tildiidxreni sa'csi sa' diidxga xhet sajdini, ruxhıntısnı reni riendiajgni. ¹⁵ Batijp lajzlu te guidzujnlı lo Dios si'c te bejn ni runsa'c dzuun, xheti xhicutent guitu-julu, sa'csi ruluisa'cpaclu xtidxlitis Dios.

¹⁶ Gulälaz yälrniyaj näjza xhidalduxh diidx ni xhet sajcdi, sa'csi renani rucuadiag rediidxga riajburenı lo redolguijdx. ¹⁷ Luxh diidx ni ruluiireni sushingajcni lastoo bejn si'c rxhinlaž tiejxh bejn. Ni'c casiajc Hime-neo näj Fileto. ¹⁸ Abanijtreni lo didxlii. Caniireni ala huajs bejn lo rebengut. Si'c cagusiechreni lajz gaii rebejn ni rlajz. ¹⁹ Niluxh xtidx Dios rsiudzu'tzni si'c te guij nani nadipduxh, luxh rajpnu diidxre si'c te seen: "Dad guibaanumbee guiraa reni najc xpejnni"; näjza "Nanab guibicajreni lo redolguijdx, guiraa reni ahuililajz xtidx Jesucrist."

²⁰ Nen te yero, xhet ganaxdi cos or näjza cos plat yu'. Yu'za cos yajg näj cos bajn; yu'reni najc parsi te laniro, yu'za reni rquiin guixe-guixee. ²¹ Sigajcza te bejn ni rlajz gun dzuunro xten Dios, riäjl guibicajni loj redolguijdx ni xhet sajcdi. Dxejcti Dad Jesucrist sacnäjni te gunni redzunro xtenni.

²² Gubicaj lo redzunguijdx ni rujn rebejn, huinuu yälnabansa'c, yärlilajz, yälsanälaž, gulecdxiza lajzlu näj reni rujn xtuun Dios, naya lastooreni rbedxnriabreni lo Dios. ²³ Na'c jiulu rediidx ni ruluii rebejn guedxliu. Anajnlı rediidxga rujn rdilnäj rebejn sa'nı. ²⁴ Niluxh te xmos Dad guibaa di riäjl guchaagni reni rdijl; riäjl gacni bensa'c loj guiraatis bejn. Riäjlza guluisa'cni; riäjlza gutip lajzni che xhet laadi rujn bejn lojni. ²⁵ Guideb yälnadolajz guluiilu reni rdxe'ch loj rediidx ni ruluiilu. Cuääzlü gaxäjsi gusiech lajzreni gun Dios gacbeereni didxgulii, ²⁶ te jianji xcäriejnreni te guiriireni ladznaa bendxbab, te gunreni ni rlajzts Dios.

3

Xho gac rebejn nen redxelult

¹ Nanab gacbeelu nen redxelult sidzujn dxej tedtu trabajw. ² Sa'csi su' bejn ni chanälajz lagajctis laani, ni rinälajz xmeeltisni, bejn ni rniyaduxhtis, bejn ni rchaglajz chä'p xpala'ntisni, bejn ni rniyaj Dios; su' bejn ni di guseob xtidx xtadreni, su' bejn ni di gudeed xquixtios lo Dios, su' bejn ni najc benguijdx. ³ Nen redxelultga su'za bejn ni di chanälajz sa'ni, bejn ni di lajzni jiäjl, bejn ni rusgueedu; bejn ni digacdi guscuaäz dolguijdx ni rujnreni; bejn ni guyalazduxh; bejn nani ruro'n guira'ti dzunsa'c. ⁴ Nen redxelultga su' bejn ni ruto' sa'reni; bejn ni di guidxej gunreni ni riajbitis yejcreni, bejn ni rchalosi na-jcreni bensacduxh; bejn ni rchaglajzru gun nani rchaglajz tiejxhreni lacuua chanälajzreni Dios. ⁵ Nen redxelult su' bejn ni najc si'c benguidoo, ascanu rusooobreni xtidx Dios, niluxh naadireni xca'reni yälnadip näj yälrnibee xten Jesucrist ni ruchaa lastoo bejn.

Na'c guchaaglu rebejngä, ⁶ sa'csi loj sa' bejnre yu' reni richu' rolijz bejn, sas-gueereni regunanayääl ni rujn dojl. Regunaare rinuu rujreni ni rlajzts tiejxhreni, rujnreni guiraloj. ⁷ Rebejnre rsiedduxh didxcoob, niluxh di didxlii xten Jesucrist jiu' yejcreni. ⁸ Sigajcni gujc Janes näjza Jam-bres ni bidxe'ch loj Moisés, sigajcza najc rebejnre, cadxechnäjreni didxlii xten Jesucrist, najcreni bejn ni aguxhijz xcäriejn-reni, luxh direni gacbee xtidx Dios, direni ga'p yärlilajz. ⁹ Niluxh direni chanuu xchej, sa'csi huelnliisi suhuii guiraa rebejn najcreni benguijdx. Si'cza gusajc guiro'p reni bidxe'ch loj Moisés.

Pabl rnibee sudzu'tz Timoteu

¹⁰ Luj sanuutislu lo nani rusule'ä, näj xho nabanjä, näj xhicutent runä dzuunre, lo xcärlilazä, lo xcälnadolazä, lo xcälsanälaž, näjza xho batip lazä.

¹¹ Najnlı xho basacsfreni narä gudedäza trabajw ladznaa rebejn nen reguejdx xten Antioquía, guedx Iconio, näjza guedx Listra. Gudedä trabajw niluxh Dios baslaa narä loj guiraa retrabajwga.

¹² Guliduxh guiraa reni rlajz chutis loj Jesucrist sidejdpacreni trabajw. ¹³ Niluxh rebenguijdx näj reni rusguee, sinuutisreni redolguijdx, sinuuru gusgueereni bejn, luxh susgueea bejn laareni.

¹⁴Luj huinuu guzudzu'tz loj ni abisieedlu, nani ahuilajzzalu, luj anajnlu chuni'c baluiini lojlu. ¹⁵Cheni biuuxlilu racbeelu xtidx Dios, ni ruluiilu xho guirilu neñ dojl te xca'l u yälnabajn par tejpas sa'csi rililajzlu xtidx Jesucrist.

¹⁶Guiraa rediidx xten Dios ni caj lo guijtz, lagajc Dios baniidxni te xcajni lo guijtz.

Guiralii xtidx Dios najc laaca te guluii nuurnu xhini'c najc didxlili, te gacbeeenu xhi najc didx-xhii, te gacbeezanu xho riäjl guibansa'cnu.

¹⁷Te susin niguui ni najc xpejn Dios, te gac gunni guiraa redzunsa'c ni riäjl gunni.

4

¹Rulidxälu nez lo Dios näjza nez lo Dad Jesucrist ni jiääd si'c reii te gunni yälguxhtis loj reni nabajn näjza loj reni agujt; rniäza dee lojlu: ²basule' xtidx Dios, gususin lo Dios mase xhitis or. Baluui reben dojl, gudilnäj reni di rlajz guzobdiidx xtidx Dios, balidxnäj resa'tu xtidx Dios. ³Sa'csi sidzujn dxej di rebejn guidxaglajz gucuadiahg xärluisa'c; alga diidx ni najc lagajc si'c najc xhigabreni rlajzreni jiendiajgreni, ni'cni siguiilreni xhidajl bejn ni ruluii te guisieddre ni ganax ni rlajzreni gucuadiagreni. ⁴Susäureni diajgreni te di jiendiagreni xtidxlili Dios; alga xhitis diidx gucuadiagreni. ⁵Niluxh luj huinuutis lo xtidx Dios, batiplajz yälhuiin, guniitis xho ruduzcaj Dios rextojlreni, bensa'c xtuunlu.

⁶Sal'csi narä suga'a ree te ju'treni narä, asiäddzungajxh dxej ni guetä. ⁷Akulujx bacuaä si'c te soldaad ni huicuasa'c lo guer, agulujx xnezyüä, gopdzutzä yälrililajz. ⁸Naj cabäzä xca'a yälnasa'c ni guniidx Dad xhaguibaa, suniidxni yälnabansa'c. Dad najc juejz ni runsa'c yälguxhtis. Niluxh xhet loäatis guniidxni yälnabansa'c. Sudeednini loj guiraa rebejn ni catiplajz cabäjzreni dxej cheni guibisac Jesucrist.

Rediidx ni rájpni lojties Timoteu

⁹Basaaga lajzlu jiädhuiigajlu narä; ¹⁰sa'csi abasa'n Demas narä. Sanälajzruni redzuun xten quedxliujre, naj sääni quedx Tesalónica. Baxhalä Cresent sää lo reguejdx ni re' nez Galacia. Baxhalä Tito sää quedx Dalmacia. ¹¹Xtebtis Lucas sugaränj narä.

Gudiil Marcw te jiädnäluni sa'csi sajgac nænjni narä lo xtuzun Dios. ¹²Tíquico baxhalä sää quedx Éfeso. ¹³Cheni jiäädlu, jiädnälu ca'p ni basa'nä quedx Troas roliz Carpo, näj rexlibrä; di jiälza lajzlu rexquitzä. ¹⁴Alejandro, ni najc gubetzguiib, basacsíduxhni narä. Dios quiixni sigajcni bejnni. ¹⁵Luj bahuui te di gunni xhi gunni luj sa'csi rdxechduxhni lo xtidx Dios ni rusule'nu.

¹⁶Galoo che bazecä diidx lo reguxhtis, rut gucnäjdi narä; guiraareni gulälazreni narä. Rniäba lo Dios na'c guchagcuentni nani bejnreni. ¹⁷Niluxh Dad ni yu' xhaguibaa gucnäj narä, baniidxni yälnadip te gujc guniä guiraa xtidx Dios te biejn diajg reni digac xpen Israel xtidx Dios. Luxh gucnäj Dios narä guläani narä ladznaareni, si'c ro' te beedz. ¹⁸Suslaani narä loj guiraa redolgujidx, saptz'u tzni narä, sigucheezani narä te chunäáni lo xcälrnibeeni xhaguibaa. Lojni coldeed xquixtios, colganduxhni par tejpas. Sugacni si'c.

Rudeedni xtixtios lo rexamigwni

¹⁹Badeed xtixtios lo Prisca näjza lo Aquila näjza loj resa' Onesíforo. ²⁰Erasto bia'n quedx Corinto, niluxh basa'nä Trófimo quedx Mileto sa'csi cayacxhuuni.

²¹Jiädgajlu ansde guisloj rebäinajl. Eubulo, Pudente, Lino, Claudia, näjza guiraa rebejtnu ni yu' lo Jesucrist ree, ruxhalreni xtixtios lojlu.

²²Dad Jesucrist chunäj xaimlu. Dios gacnäj guiraatu. Sugacni si'c.

Te Guijtz Lo Tito

Bacuaa Pabl lo Tito

¹ Narä Pabl, nacä xmos Dios, apost xten Jesucrist, te gacnäää guiroobru xcälrililajz reni agule Dios, te gacbeezareni didxlII ni rusia xcälnabajnnu. ² Cayunlojanu yäl-nabajz par tejpas nani Dios, ni digacdi guinii didx-xhii, bia'nni diidx guniidxnI cheni gajdli guedxliuj guirixtieJ. ³ Niluxh che bidzujn dxeJ ni agulegaa Dios, laani balui-ni xtiidxnI. Si'cza baniidxnI xtiidxnI loä te gusule'äni si'c gunibee Xtirosnu ni ruslaa nurnu nen dojl. ⁴ Cacuaä guijtzre lojlu, Tito, xi'nä lo yälrililajz ni ria'pnü xcient Jesucrist. Rniabä lo Dios Xtaadnu näj lo Dad Jesucrist ni rbää nuurnu nen dojl, gacnäjreni luj, gulaslajzreni luj, guscuecdxizareni laj-zlu.

Dzuun ni rujn Tito guedx Creta

⁵ Che basa'nälu lo yuj ni tre' lo nisdoo, ni laa Creta, basa'nälu te guluuxlu dzuun ni di niajldi nuluxä ro'c, näjza te cuelu reben-gool loj reguidoo nen tejga reguejdx si'cni gunibeä gunlu. ⁶ Gule bengool ni nabansa'c, te na'c guiniyaj bejnreni, nanab gacni chäääl tejtis gunaa, riäjlza chalilajz rex'inni, na'c guibajnreni si'ctisni rlajz tiejxhreni, jiurenI xtidx xtadreni. ⁷ Niguii ni rnibee guidoo rcanäj rehxixten Dios, ni'cni riäjl ga'pni te yäl nabanya. Na'c gacni te bejnadjd, na'c gacni te bejnadxche'a, na'c gacni bengu, na'c gacni te bejn ni rdxagdijl bejn, na'cza xca'ni meel ni dini niunsa'c gaan. ⁸ Nanab gacni te bejn ni rudedlaa rolizjzni jia'n ben biooz, riäjlza chanälajzni dzunsal'c, gac nasiinni, chu xcäriejnni; guibansa'cni nez lo Dios, sigajcza nez lo rebejn, guibannayani nez lo Dios, na'c gunni nani rlajztis tiejxhni. ⁹ Riäjl chanuutisni lo didxlII ni bisieedni te gac gulidxnäjzani bejn xtidx Dios, te guzejcni diidx lo rebejn ni rniyaj xtidx Dios.

¹⁰ Yu' xhidajl benguijdx, bejn ni rnii diidx ni xhet sajcdi, näjza xhidajl bejn ni rnii diidx-xhii ni rusguee. Näjza lo rexpen Israel ni riuduxh leii yu' sa' bejnre. ¹¹ Sa' redee ni nanab jiäu ro'ni, sa'csi rusgueeremi xhidalro sa'reni, ruluiireni ni di riäjl gului-ireni te gunreni gaan meel.

¹² Te niguii ni siäääd lagajc lajdxreni gu-niini xcient lagajc reben lajdxni: "Rebejn ni najc cretenses rriduxhreni didx-xhii, niälajzzareni. Rlajzreni gausa'creni niluxh di rlajzreni gunreni dzuun." ¹³ Niluxh guli-ini, ni'cni gudiñäjreni, te chalilazsa'creni xtidx Jesucrist, ¹⁴ te na'crua gucuadijgreni rediidx ni rdxällajz rexpen Israel, niclaza rediidx ni rnibee bejn ni gulälaz didxlII.

¹⁵ Loj renani rujn xhigabya, guira'ti najc naya, niluxh loj reni di chalilajz, ni xhet nayadi najc xhigabreni, guira'ti nacdxu-udx, xcäriejnlireni nacdxuudx. ¹⁶ Naj ru-jnsireni si'cni numbeereni Dios, niluxh ni rujnreni hueniliis ruzeñ direni nililajz, na-jcreni benguijdx, direni jiu xtidx Dios, di-gacdi gunreni nicla tej dzunsa'c.

2

Rulijdx Pabl Tito guluisa'cni rebejn

¹ Niluxh luj guniitis rediidx ni ruluisa'c. ² Baluui rebengool gac benya, bejn ni yu' xcäriejnni, bejn ni rumbee xhini'c najc dzunsa'c, xhini'c najc dzunguijdx, bejn ni rajpza yälrililajz, yälisanälajz, näjza ni rbecdxi lajzni. ³ Sigajcza, regunagool, nanab guibajnreni si'c te ni yusa'c lo Dios, na'c guiniireni diidx ni di riäjl guini-ireni, na'cza soozreni. Riäjl guluiireni re-didxs'a'c te guluiireni reguuaa dxap'chu xcäriejnreni, chanälajzreni chääälreni näj rex'i'nreni. ⁵ Gacreni nasin, guibannayareni, xcanäsa'creni rolizjreni, gacreni bensa'c gusoobreni xtidx chääälreni, te rut guiniya-jdi xtidx Dios.

⁶ Sigajcza gojz lo rebi'n riäjl chu xcäriejn-reni. ⁷ Luj guzuj te fiirenI xho riäjl gun bejn dzunsa'c. Che guluiilurenI, saru baluui guiraa reni riäjl guluiilu. ⁸ Didxs'a'c gunii te rut gacdi guiniyaj diidxga, te si'c guityuj chutis ni rlajz guidxe'ch lojtu te xhet xhi didxguijwdxdi gac guiniireni xcientlu.

⁹ Balijdx remos te gusoobreni xtidx xlamreni, te gunsu'creni dzuun, na'c guzejcreni diidx lo rexlamreni. ¹⁰ Na'c cuanreni alga guibansa'creni te guluii xcälnabajnreni lacti sacduxh xtidx Dios ni baslaa nuurnu nen dojl.

¹¹ Sa'csi abiääd xcälracnäj Dios, abiädnäni yälruslaa nen dojl lo guiraa rebejn. ¹² La xcälracnäj Dios ni ruluii nuurnu gusa'nnu

redzunguijdx, näjza duun xten guedxliujre te guibansa'cnu, te chonälajznu Dios lo guedxliujre. ¹³ Ruluiizani nuurnu cuääznu guidzujn dxej ni soob xtiidxni ni basa'nni loonu xcuent dxej che jiääd Gueb Dios näj Xtad Jesucristnu ni rusłaa nuurnu lo dojl. ¹⁴ Laani gütjni te guslaani nuurnu lo guiraa redolguijdx, te basiani nuurnu te gacnu xpejnni, gaczaru te bejn ni rdxaglajz rujn dzunsa'c.

¹⁵ Diiidxre gunii, balijdx, basule' si'c te bennajn. Di gusaanlu cuälazreni luj.

3

Ni riäj gun reni rrlilajz

¹ Basnaj lajz rebejn gusoobreni xtiidx rebejn ni rnibee näjza reguxhtis, gusoobreni xtiidxreni, xcäjbareni gunreni xhitis dzunsa'c. ² Na'c guiniyajreni bejn, cuedxiren, gaczareni bensa'c, saru gac nadolajzreni loj chutis bejn.

³ Sa'csi galoo sigajcza xheti xcäriejmu, dizanu gusoob xtidx Dios; basguee bejn nuurnu, yu'tisnu lo guiraasi dolguijdx näjza lo ni rchaglajztis rujn tiejxhnu, nabajntisnu lo dolguijdx, rudxonlajznu, rdxe'ch bejn loonu, rdxe'chzanu lo sa'nu. ⁴ Niluxh che baluiloj xcälrulaslajz näjza xcälrinälajz Dios ni rusłaa nuurnu näjza reben guedxliuj lo dojl, ⁵ dxejc basłaa Dios nuurnu lo dojl, xhet sa'csi yu'di xhi dzunsa'c biennu, alga sa'csi balaslajzni nuurnu. Basłaa Dios nuurnu lo dojl sa'csi bidiib lastoonu, te biäjt xtojlnu te najcnu beñcoob, sa'csi bascoobza Xsprit Dxan xten Dios xcäriejnnu. ⁶ Baniidx Dios cuääzpac Xsprit Dxanni neñ lastoonu xcuent ni bejn Jesucrist ni basłaa nuurnu, ⁷ te sa'csi rujn Dios cuent najcnu bensa'c sa'csi abadzucajni xtojlnu, naj sica'nu xcälnasa'cnu ni cabääznu, nalaaznu yälnabajn par tejpas.

⁸ Dee ni najc gulipac, ni'cni rlazä chanuutislu guiniilu rediidxre loj rebejn, te rebejn ni rrilajz xtidx Dios gunduxhreni ganax dzunsa'c. Rediidxre najc laaca, sacduxhreni loonu. ⁹ Naj basaan rediidx ni najc xlia'si, rediidx ni gunii reben galoo, yäldildiidix xcuent xleii toMoisés sa'csi guiraa rebiejgya xhet sajcdini, xhetza huendi rujnreni.

¹⁰ Palga yu' te bejn ni gun la' sa' reben guidoo, gunii lojni tej o tio'p huält. Palga

dini jiejn, colcuääni lojtu. ¹¹ Sa'csi anajntu sa' bejngä abaro'nni, agulälazni didxlili, lagajc xtojlni sujn nitni.

Diiidx ni bacuaani lojtit Tito

¹² Che guxhalä Artemas o Tíquico lojlu, gudahuipac narä lo guedx Nicópolis. Ro'c abenä xhigab tedä rebäinajl. ¹³ Gucnädukh licenciaad Zenas näjza Apolos, badeed guiraa ni rquiinreni te chanureni xpiajreni, te xhet jiääxdxdireni. ¹⁴ Suguisieedza resa'nu gunreni dzunsa'c te gacnäjreni che quiuiinnuren, te na'c guibajnreni xlia'si.

Ruxhalni xtixtios

¹⁵ Guiraa reni yunäj narä ruxhal xtixtios lojlu. Badeedza xtixtios loj resa'nu lo yälrililajz. Dios gacnäj guiraatu. Sugacni si'c.

Te Guijtz Lo Filemón

Rucuaa Pabl guijtz lo Filemón

¹ Narä, Pabl, yu'ä neñ latzguiib sa'csi rniä xtidx Dad Jesucrist. Narä näjza bejtznu Timoteu cagucuaanu guijtzre lojlu, Filemón, ni sanälazduxhnu sa'csi najclu sa'nú lo xtzun Dios. ² Rucuaazanu guijtzre lo Apia, bisajnnu lo yälrlilajz, näj lo Arquipo ni racnäj nuurnu lo dzuunre, näjza loj rebenguidoo ni rchagsa' rolizluz. ³ Dios Xtdadu näj Dad Jesucrist gacnäj la'tu, guscuedxireni lajztu.

Xcälsanälajz näj xcälrililajz Filemón

⁴ Rudedä xquixtios lo Dios xcient luj che rniä lo Dios. ⁵ Abiejn diagä xcient yälrinälajz näj yälrlilajz ni rajplu lo Dad Jesucrist, näjza reni yu' lo Dios. ⁶ Rniabä lo Dios tioobru xcälrililajzlu lał ni rusule'luni, te gacbesa'creni xcient guiraa reyälnasa'c ni rajplu, ni runiidx Dad Jesucrist lojlu. ⁷ Lacti rbalazduxhä, rbedxi lazä sa'csi sanälajzlu resa'nú näjza sa'csi luj, betzä, agulecdxilu lastoo reni rililajz.

Pabl rniabni lo Filemón xcasacni Onésimo

⁸ Mase rapä xcälrnibee Jesucrist sajc guiniä gunlu xhitis ni riäjl gunlu, ⁹ rniabä lojlu gunlu te dzunsa'c sa'csi narä nacä Pabl ni rinälajzlu, nacä bengool, yu'ä latzguiib xcient Dad Jesucrist. ¹⁰ Canabä xcient Onésimo ni nadjc si'c xi'nä, sa'csi huililajzni xtidx Dios ni basule'ä lojni ñaj ni yu'ä latzguiib.

¹¹ Galoo, dini nadjc beñsa'c lojlu, niluxh naj sacnäduxhni guiro'pnu. ¹² Ruxhal sacäni lojlu, te xcasacluni stehuält si'c ni näjräni xca'lü, sa'csi siädnäni lojlu ascanu lagajc lastoä. ¹³ Narä rlazä niarnäjni narä xcientlu, te niacnäjni narä naj ni yu'ä latzguiib sa'csi basule'ä xtidx Dios. ¹⁴ Niluxh di rlazä niunä si'c palga luj dilu xcäjb gacni si'c. Dina guinia gacnäjpaclu narä si'c gojn. Narä rlazä gunluni sa'csi rlajzpaclu gacni si'c. ¹⁵ Pet gubicaj Onésimo lojlu tio'p-chon dxejsi. Niluxh naj xca'luni te chuni lojlu par tejpas. ¹⁶ Naj xhetru si'cdi te mos chuni lojlu. Naj sajcruni loj te mos. Naj najcni si'c te betzbiidlu ni sanälajzlu. Narä sanälazduxhäni, niluxh luj riäjl chanälajzruluni,

xhet si'c chutis te bejn, alga si'c te bejtzlu lo Dad Jesucrist.

¹⁷ Näj palga rumbeelu narä si'c te sa'lü, cua'ni sigajc narä. ¹⁸ Palga yu' xhi bejnni lojlu o palga yu' xhi nazääbni lojlu, basa'nni lo xcientä. ¹⁹ Lagajc narä, Pabl abacuaä guijtzre con nää con xleträ, narä siguixäni. (Te na'c guiniä nazääbzalu lagajc luj loä.)

²⁰ Betzä, benlaa hueenre narä si'c te ni sanälajz Dios te guspaaalu lazä nez loj Dad Jesucrist.

²¹ Bacuää guijtzre lojlu sa'csi nancheä su-sooblu xtidxä, sujnzalu maazdi loj ni rniabä lojlu. ²² Sigajcza basuchee te lajt cadre jia'nä, sa'csi cabätzä gudzu' Dios ni gunabtu lojni, gusaan Dios jiädhuiä la'tu.

Ruxhalni xtixtios lojni

²³ Epafras ruxhal xtixtios lojlu. Laani yunäjni narä latzguiib, sa'csi guniizani xtidx Jesucrist. ²⁴ Marcw, Aristarco, Demas, näj Lucas, ni racnäj narä lo dzuunre, ruxhalzarení xtixtios lojlu.

²⁵ Dad Jesucrist gacnäj la'tu. Sugaci si'c.

Te Guijtz Nani Biääd Loj Rebeñ Hebree

Agunii Xi'n Dios xtidx Xtadni

¹ Neq redxe galoo garen-garen mood guninäj Dios retoxtadgoloonu. Xhidajlza huält guniini por renigui ni bacuaa xtiidxni. ² Nen redxejre aguniini loonu por Xi'nni, lojzani badeed Dios yälrnibee guncheeni guedxliujre, badeedzani guira'ti lojni. ³ Laani najc xtuxh xten xcäldimbicha' Dios, laani najczani sigajc najc Dios, laazani rapchee guira'ti con xtiidxni ni rnibee. Cheni gulujx basiani xtojlnu, gurejni xladbee Gueb Dios xhaguibaa te canibeeni.

Sacduxhru Xi'n Dios loj rexangl Dios

⁴ Ro'c gurej Xi'n Dios sa'csi sajcruni loj reangl xten Dios, sa'csi acua'ni yälrnibee si'c te bejn ni riannäj xhixten Xtadni. Lajzani sajcru lo relaj rexangl Dios. ⁵ Sa'csi Dios di niäjb loj nicla tej rexanglni:
Luj najclu Xi'nä. Narä guleälu te guinibelu.

Dizani niäjb xcuent nicla tej rexanglni:
Narä gacä xtradni, laani gacni xi'nä.

⁶ Niluxh che biädnäni Xi'n xtebni lo guedxliuj, guniini:
Guiraa rexangl xten Dios, *Colgan Xi'nä!*
⁷ Che guniili Dios xcuent rexanglni räjpni:
Rujnni ruxhun rexanglni si'c bej, rujnni rbebjal rexmosni.

⁸ Niluxh xcuent Xi'nni guniini:
Luj najc Dios.

Nabajnlu par tejpas;
xcälrnibelu par tejpas najc te yälrnibesa'c.
⁹ Ahuinälajzlu xhigabsa'c, dipaclu nichaglajz xhigabguijdx,
ni'cni Dios ni najc Xtioslu, baniidxru yälrbalajz lojlu quela loj resa'l lu.

¹⁰ Rniizan:i:
Luj, Dad, che guslojli bencheelu guira'ti, bencheelu cad soob guedxliuj, naazalu bencheelu reguibaa.

¹¹ Laareni sinitoljreni, niluxh luj nabajnlu par tejpas.

Guiraareni siujx si'c riujx te lajd.

¹² Suse'tluren i si'c rie't te la' lajd, sidxaareni si'c rdxaa te lajd.

Niluxh luj dilu guidxaa.

Lalgajctis nabajnlu, di rexijzlu ted.

¹³ *Gucxha räjp Dios lo te xanghni scree, ä? Räjpni:*

Gurej xladbeä te guinibelu dxejli cheni gudzugä guiraa ni rdxe'ch lojlu ladz ni'l'u.

¹⁴ Guiraa rexangl Dios nadj sprit, ruxhal Diosreni te chayacnäjreni rebejn ni xca' yälnbajn par tejpas.

2

Na'c gusaanni diidx ni ruslaani lo dojl

¹ Ni'cni nanab jiunu xtidx Dios ni abiejn diajnu, te na'c guibicajnu lo xnezyujni.

² Anajntu aguzojb diidx ni gunii rexangl Dios nen redxe galoo. Luxh reni di nusoob diidxga bejnreni dojl, dxejc bateed Diosreni trabajw. ³ *Xho gac guibicaj xcälnaj Dios yejcnu palga dinu jiu rextidx Dios xcuent yälruslaa lo dojl, ä?* Ni Dad, Jesucrist basa'n diidxga lo rexpejnpacni, dxejc laareni basule'reni rediidxre loonu. ⁴ Niluxh Dios baluui najc diidxga guliipac sa'csi bejnni reseen, näjza yälrdxeloduxh, näjza xhidajl remilagrw. Badeedzani Sprit Dyan xtenni loj renani ahuililajz xtiidxni te gun tegareni garen-garen xtuunreni si'ctis ni rlajz Dios gunreni.

Nani guläxtiey yälruslaa bejn lo dojl

⁵ Di Dios gudeed yälrnibee lo rexanglni te guinibeereni guedxliucoob ni cagusä'tnu naj. ⁶ Guyu' tej ni bacuaa xtidx Dios lo guijtz, räjpni:

¿Chu najc niguui, te guinalajz Dios laani?

¿Chu najc xi'n niguui te jiädhuiizaluni?

⁷ Nagabsi dxej guxiiru sajcn lo reangl xhaguibaa, dxejcti badedsacu xcälnasa'cni, badedsacu xpala'nni, badeedzalu yälrnibee lojni te guinibeeni guira'ti ni bencheelu.

⁸ Badeedzalu guinibeeni guiralii ni yu' lo guedxliuj. Cheni badeed Dios guira'ti te guinibeeni, xhetliidi basa'n Dios ni digacdi guinibeeni, niluxh najruhuiiu gajdni guinibee guiralii ni'c. ⁹ Alga rhuiiu Jesucrist, ni bejn Dios guxiiru sajcn lo reangl xten Dios che guyu'ni lo guedxliuj balsi dxej. Che baluux Jesucrist xtuunni lo guedxliuj, badeed Dios yälrdimbicha' näjza xpala'nni lojni. Sa'csi sanälajz Dios nuurnu basaanni

gudejd Xi'nni trabajwduxh, gujtni lacuua niejtnu.

¹⁰ Dios benchee guiralii ni yu' lo guedxliujre, najli rnibeeza Dios guira'ti. Luxh Diosre rlajz chanäni xhidajl xi'nni xhaguibaa, ni'cni baxhal Dios xi'npacni Jesucrist te guläxtiejeni yärlusułla bejn lo dojl che gudejdni trabajwduxh lo crujz. ¹¹ Sa'csi Jesucrist, ni rujn chasanäj bejn te yälnabanya, näjza reni risanäj yälnabanya, tejtis najc xta-dreni. Ni'cni di Xi'n Dios guitujy guiniini lojreni: "betzä". ¹² Scree caj lo xtidx Dios: Chasule'ä lo rebetzä xho najclu, siliä'päza xpala'nlu lojreni.

¹³ Räjzpani:

Sibäzä gacnäj Dios narä.

Ste lajt guniini:

Bahui loä näjza rex'i'nä ni baniidx Dios loä.

¹⁴ Te famil najc tejsi bääl, tejsiza rejn; ni'cni che biääd Jesucrist lo guedxliuj guyu' tiejxhni näj xtiejnni si'c benguedxliuj, gujtzani te gujc bejnni gunijt nani rnibee yälgujt, nalajznu, bendxbab. ¹⁵ Te si'c baslaani guiraa reni rdxejb yälgujt, najcreni si'c reni yu'tis loj xlamni guideb nabajnreni, lacti rdxejbreni yälgujt. ¹⁶ Guliini dini niääd te gacnäjni reangl xten Dios, biäädni te gacnäjni guiralii rexajg toAbram.

¹⁷ Ni'cni gujnci si'cpac te bejtnu, te gac gacni te bixhojz xten Dios ni rulaslajz, te bixhozs'a'cza xten Dios, si'cni rlajz Dios gacni te guslaani rebejn lo dojl. ¹⁸ Sa'csi lagajc laani gudejdni trabajw, luxh baquibilza bendxbabni niujnni dojl, ni'c naj sajc gacnäjni renani ruquuil bendxbab gun dojl.

3

Jesucrist sajcru loj Moisés

¹ Ni'cni bejtnu, reni anabansa'c, sa'csi najctu reni gurejdx Dios gac xi'nni, colyem-bee Jesucrist ni baxhal Dios loonu. Laani najc bixhojz ni sajcru, rusule'zani xtidx Dios xcient nani ahuililajznu. ² Laani huin-uutis guyu'nlo Dios ni guleni te gunni dzuunre. Sigajc ni bensa'c toMoisés xtuun Dios che guyu'nlo rexpeln Israel, sigajcza bensa'c Jesucrist dzuun che biäädni lo guedxliuj. ³ Sigajc ni yu'ru xpala'n dad lo xpala'n rex'inni, sigajcza yu'ru xpala'n Jesucrist lo xpala'n toMoisés. ⁴ Yu' xtad guiraa refamil lo guedxliuj, niluxh gule'c Dios guiralii bejn, bencheezani guedxliuj.

⁵ Basoob Moisés diidx si'c te mos, cuanäjni rexpen Dios si'cni gunibee Dios gunni, te baluiini xho gac redzuun ni gajd gac dx-ejc, luxh naj agujc redzuunga. ⁶ Niluxh Jesucrist basoob diidx si'c xi'npac Dios, Cuanäjni xfamil Dios. Nurnu najcnu xfamil Dios palga chanuutis sudzu'tznu lo xti-dixni, palga guibalajztisnu, palga gutipla-jznu dxejli ni guibi' Jesucrist.

Yärlusilajz xten rexpejn Dios

⁷ Ni'cni, si'cpac rnii Sprit Dhan xten Dios:

Naj, palga jiendiajgtu xse'ní,

⁸ na'c gun-najdту lastootu si'c bejn rebejn ni bidxechnäj Dios che cuansajreni lo reyubijdz.

⁹ Ro'c bidxechnäj retoxtadgoldootu Dios sa'csi direni nililajz Dios siädnäreni, niluxh bahuiireni redzunduxh ni bejn Dios nez lojreni tiuu ijjz.

¹⁰ Ni'cni laj ni cadxe'ch Dios loj rebejngä, bejn Dios xhigab:

Sujiannäjreni xhigabgujidxreni,

dina gusanä jiu'reni xcärlusilazä.

¹¹ Ni'cni bidxe'ch Dios lojreni,

bejn Dios te xhigabduxh,

di rebejngä jiu' te gusilaznäjni.

¹² Bejtnu, colnatiro andi chu tejtjrujin xhigabgujidx, rlajz guibicaj lo Dios, ni nabajn par tejpas, sa'csi dini chalilajz xti-dixni. ¹³ Ni'cni colgulijdx resa'tu guixer-guixee, laga najcni nadxej; te di chu tejtjrujin gacnajd lastooni xcient reyärlusghee xten redojl. ¹⁴ Sa'csi palga chanuunu sudzu'tznu lo xtidx Dios ni huiilajznu che biembee-nuni, dxejc yu' xhi rajpnu con Jesucrist.

¹⁵ Si'c caj lo guijtz:

Nadxej, palga jiendiajgtu xse' Dios, na'c gunnajdту lastootu si'c bejn rebejn ni bidxechnäj Dios lo reyubijdz.

¹⁶ ¿Chu reni'cni bidxechnäj Dios che biendiajgreni xtiidxni? ¿La et laadi guiraa rebejn ni guläa Moisés guedx Egipto, ä? ¹⁷ ¿Chuxh loj bidxe'ch Dios tiuu ijjz lo reyubijdz, ä? ¿La et laadi reni baijb lo dojl, dxejc gujtreni, huijajbreni nez loj reyubijdz, ä? ¹⁸ ¿Chu loj räjpnipacreni jiu' lo xcärlusilajzni? Loj reni di nusoob xtiidxni. ¹⁹ Ni'c ruhuuiu di niajcdi niu'reni lo yärlusilajz sa'csi direni nililajz xtidx Dios.

4

¹ Ni'cni palga bia'n diidx siu'pacnu lo yälrusilajz con Dios, nanab jia'pnu lagajc nuure didi yu' chu tejnu di gun gaan jiu' lo yälrusilajzga. ² Sa'csi nuure abiejn diaagzanu diidx ni rusia dojl, sigajc biejn diajg rebejnga; niluxh xlia'si biejn diajgreni diidxga sa'csi bacuadiahgrenini niluxh dreni nililajzni. ³ Luxh nuure ni ahuililaaznu siu'nu lo yälrusilajzga; caj lo gujitz gunii Dios rediidxre:

Ni'cni bidxe'chä lojreni, benä te xhigab-duxh, di rebejnga jiu' te gusilaznäjreni narä. Mase abaluuxni xtzuunni cheni birixtiejli quedxliuj. ⁴ Sa'csi loj stee gujitz caj diidx ni guniini xcient dxej ni ruislajz bejn: Xho'p dxej bejn Dios xtzuunni, dxejcti basi-lajzni tebdxje.

Xhet bejndini dxejga.

⁵ Stehuält guniini:

Di rebejnga jiu' te gusilaznäjreni narä.

⁶ Niluxh yu' reni gajd jiu' loj yälrusilajzga, luxh reni biejn diajgni diidx ni rusia dojl di niu' sa'csi direni nusoob xtiidxni. ⁷ Ni'cni basoob Dios ste dxej gac "nadxej". Gudejd xhidajl ijz che gunisac Dios xcient yälrusilajz. Badeed Dios gunii toDavid rediidxre: Nadxej, palga jiendiajgtu xse'nii, na'c gun-najdtu lastootu.

⁸ Paru nudeed Josué yälrusilajzga loj rexpen Israel, diru Dios ninisac xcient stee dxe-jre. ⁹ Naj ria'nza te yälrusilajz par rexpejin Dios, ¹⁰ sa'csi nani riu' lo xcälrusilaznäj Dios, ruislajzzani lo xtzuunni sigajc basilajz Dios lo xtzuunni. ¹¹ Nanab chanuu gusoobnu xtiidxni te jiu'nu lo yälrusilajzga, te di chu tejnu ni gacnajd lajzni si'c ni gucnajd lajz renani di nililajz.

¹² Sa'csi nasesduxh xtidx Dios, yuduxhza xcälrnibee xtidx Dios. Najcni si'c te guchiil ni caduxh ro'ni, rääzni nez neñ redzuut näj yojb. Sigajcza xtidx Dios rääz nez cadre rlia' sa' xsprit näjza xaim bejn. Ruluiiza xtidx Dios rexhigab ni yu' lastoo bejn, näjza redzuun ni rlajz lastoo bejn gun. ¹³ Xheti xhi bencheedi Dios ni naga'tz nez lojni. Guiralii guyasi ruhuii Dios. Sajpnu gudeednu cuent lo Dios.

Bixhojz ni sajcrus najc Jesucrist

¹⁴ Jesucrist, Xi'n Dios, najc xpixhojzpacnu ni sajcrus, nani abiu' loj Dios. Ni'cni nanab

chanuu sudzu'tznu chalilaaznu xtidx Dios.

¹⁵ Xpixhojznu ni sajcrus sajc gulaslajzni nuure te di jiajbnu lo dojl, sa'csi laani sigajcza gudejdni trabajw, baquill bëndxb-abni te niujn ni dojl, niluxh dini niujn dojl. ¹⁶ Riäjlpac na'c guidxeebnu cuedx-guiniabnu lo Xtiosnu ni sanälajz nuure. Na'cza guitujynu, te gulaslajzni nuure, guideb xcälracnäjni gacnäjzani nuure.

5

¹ Galooli guiraa rebixhojz ni sajcrus nabee lo rebejñ. Bixhojz ni sajcrus rniab lo Dios xcient rebejñ. Luxh lojni rudeed rebejñ regon näjza reguidxaa ni gudeedni lo Dios te jiäu lo xtojreni nez lo Dios. ² Rdejdza bixhojz trabajw sigajc benguedxliuj, ni'c sajc ga'pni yälnadolajz loj rebejñ nani nayääl näjza reni abanijt lo Dios. ³ Niluxh sa'csi näjza laani rujnni dojl, nanab gudeedni guidxaa lo Dios te jiäu lo rextøjlni sigajc rudeedni guidxaa lo Dios te riäu lo xtoj rebejñ.

⁴ Rut sajcdi gac bixhojz xcientcani. Dios najc ni rbejdxni te gacni bixhojz, dxejci rudeedni xpala'nni lojni si'c badeednini lo Aarón. ⁵ Si'cza di Jesucrist niajc bixhojz ni sajcrus xcientcani. Dios najc nani gulälajni gacni bixhojz ni sajcrus, räjpni lojni: Luj najclu Xi'nä, narä guleälu nadxej te guinibeelu.

⁶ Scree cajza lo xtidx Dios stee lajt: Luj najclu bixhojz par tejpas sigajc gujc te niguui ni laa Melquisedec.

⁷ Cheni gubajn Jesucrist lo quedxliujre, gurejdx-gunabzani lo Dios, guredxa'ni biinzani lo Dios nani sajc nudzucajni lo yälgujt; Dios bacuadiahg xtiidxni sa'csi huinälajz Jesucrist Dios. ⁸ Ni'cni Jesucrist mase najcni Xi'n Dios biseedni basoobni diidx luxh näj ni'c gudejdni trabajw. ⁹ Che bidzujn dxej baluuxni guiraa redzuun ni rlajz Dios gunni, laani gujci nani rudeed laa bejn nani rusooob xtiidxni lo dojl par tejpas ¹⁰ sa'csi Dios gulälajni bixhojz ni sajcrus, gujci bixhojz sigajc gujc Melquisedec.

Rxhunriezgw gusa'nni xcälrililajzni

¹¹ Rlajznu guiniinu xhidalduxhru diidx xcient Melquisedec, niluxh naganduxh gusule'nuni lojtu sa'csi nadyejectu, ditu gacbee. ¹² Agujc xchej huililajztu rediidx xcient Jesucrist. Ariäjł gusule'tu rediidxre

naj, niluxh alga rquiinruntu chu gusule' rediidxre lojtu stehuält, luxh rediidxre najc rediidx guyasi xten Dios. Agucsactu si'c báz. Rlajztu yäsactu le'ch lacuaa gautu yäjt, bäß; nalajznu, redidxnagajn xten Dios.¹³ Reni najc si'c báz, rá' le'chtis, direni gumbesa'c redidxsac xten Dios.¹⁴ Niluxh reben guyajl rajw yäjt. Sigajcza redidxnagajn xten Dios najc par rebejn ni aguyajl lo xtidx Dios, renani ayu' xcäriejnni, arum-beereni nani najc dzunsa'c, nani najcza dzunguijdx.

6

¹Nanab guisieedrunu xtidx Dios te churu xcäriejnnu. Na'c guisieedtisnu didx-guyasi xcient Jesucrist. Na'c guluiitisnu diidx xcient yälrusiechljaz, xcient redzuu ni rujn rejt bejn, näj yälrlililajz xtidx Dios.² Na'c guluiitisnu xcient yälrobnis, näj yälrudzubnaa yejc bejn, näj xcient yälrbajnsac rebengut, näj xcient yälgxuhtis par tejpas.³ Alga do'o guisieedru xtidx Dios te churu xcäriejnnu, palga si'c guniidx Dios jiennu.

⁴ Yu' bejn ni abianij xcäriejnni, ni acua' reyälnasa'c ni ruded Dios, ni rbäjz Sprit Dxan xten Dios neñ lastooreni,⁵ luxh bidxaglajzreni xtidx Dios näj yälrnibee xten Dios ni churu jiääd.⁶ Palga laareni guibisacreni lo sa' yälhabajn ni gojpreni galoo, diru gacdi guidxaa xmodreni stehuält, sa'csi dxejc sajnci si'c ni lagajc laareni gucuasacreni Xi'n Dios lo crujz, nalajznu su-sanxtujyreni Jesucrist nez loj rebejn.⁷ Ben guedxliju ni biejn diajgni najc si'c najc yuj ni rá' nis che riajbtsis nisgуй. Palga yujga gudeed yälnsa'c loj reni rujn dzuun lojni, sunle' Dios yujga.⁸ Niluxh palga gudeed yujga ganax yaguejch näjza cuaan ni xhet sajcdi, xlia'sini, sujn rebejn gac nadeni te checni.

Diidx ni rusudzu'tz lastoonu

⁹Mase rniinu scree lojtu, anajnuu huililajztu xtidx Jesucrist näjza xtiidxni ni ruslaa lo dojl.¹⁰ Sa'csi Dios najc ni rujn yälgxuhtissa'c, diza lajzni jiäl ni rujntu la'tu näj yälsanälajz ni rajptu par laani che racnäjtu rebejtznu lo yälrlililajz, luxh guixe-guixee si'c rujntu.¹¹ Naj rlajznu tejgatu chanuu ga'p lagajc yälrbalajzre dxe lultli, te gac guiraa ni cabäjztu.¹²Rlajznu na'c gactu bejn

ni rbedxitis, alga guntu sigajc bejn reben galoo, gopdu'tzreni yälrlililajz ni batip-duxh lajzreni, guläjzreni te cu'a'reni reyälnasa'c ni bia'n diidx gudeed Dios lojreni.

¹³ Luxh che bia'n Dios diidx loj toxtad-goldoonu Abram, guniini por lagajc laani sa'csi ruti stee ni sajcrlojni.¹⁴ Scree gunii Dios: "Guliä sacnäá luj, sunidväxa xhidajl xi'nlu."

¹⁵ Cheni aguläjz Abram xchej, gusojb diidx, cua'ni nani gunii Dios lojni.¹⁶ Sa'csi cheni rniliipac bejn te diidx, rnireni diidxga por laj ste'ca bejn ni sajcrlojreni, sas che rusä'treni laj bejngä xhetru yu'di xhi gunreni bieejy.¹⁷ Rlajz Dios gaceepac rexagdoo to Abram sisiojbpac diidx ni bia'nni che guniini loj Abram galooli.

Sisiojbpac xtiidxni, sa'csi guniini diidx con lagajc lajni che bia'nni diidxga.¹⁸ Ni'cni naj yu' tiop diidx ni digacdi guichaa sa'csi digacdi guinii Dios diidx-xhii, rusooxpacni xtiidxni, rudedzani yälrbedxilajz loj renani gubig-guxuñ lojni, loj reni sanuu loj yälrlililajz xtiidxni nani abaniidxni loonu por lagajc lajni.¹⁹ Laa ni'cni cabäaznu ni rusudzu'tz lajznu si'c duu-guiib con and ni rniiazdu'tz te barcw. Si'c rusudzu'tzni lastoonu te jionnu cadre yu'ni detz ladró.

²⁰Lagajc ro'c biu' Jesucrist xcient nuure, te galooli baxhalni xnez Dios loonu, te gujcn bixhojzro par tejpas si'c gujcz bixhojz nani laa Melquisedec.

7

Jesucrist najc bixhojzro si'c najc Melquisedec

¹ Galoo che gujc Melquisedec reii xten guedx Salem, gujcn bixhojzro xten Gueb Dios. Che gubi' Abram che gulujx guer cadre bagu'tni rereii ni bidxe'ch lojni, huichagloj Melquisedecni, sas gunabni lo Dios te gacnäjru Dios Abram. Dxejeti bejn Abram tzuu cuaa guiraa ni bejrnini gaan, te badeedni tej cuaani loj Melquisedec. Laj Melquisedec sälöj "reii ni runsa'c yälgxuhtiss", dxejctiru reii xten guedx Salem sälöjzani "reii xten yälrbedxilajz".³ Baluuijlojni lojreni, niluxh dinu gan chu najc xtdadni, niclaza chu najc xnanni, niclaza chu najc resa'ni. Dizanu gan gac gojlni niclaza gac gujtni. Gujcn si'c najc Xi'n Dios. Najc-tiszani bixhojzro par tejpas.

⁴ Naj colhuii, lacti te bensa'c, te benro nadj Melquisedec. Lojni badeed toxtagoldoonu Abram tejga ni sajcru lo tejga tzuu ni bejnni gaan. Luxh Abram nadj bejn ni sajcru lo rexpejnni. ⁵ Leii xten Moisés, rnibee xca' rebixhojz ni nadj xfamil Levi te cuua lo sa'reni si'c ni badeed toAbram loj Melquisedec, mase najcreni rexagdoo Abram. ⁶ Niluxh di Melquisedec gac xfamil Levi. Niluxh badeed Abram te cuua xhix-tenni loj Melquisedec. Dxejcti benle'nii Abram ni biannäj xtidx Dios. ⁷ Naj rut sajcdi guinii garenci, sa'csi nani sajcru runle' yejc nani guxiiru sajc. ⁸ Naj rebixhojz ni rca' tejga lo tzuu ni rajpreni, nadj bejn ni rejt. Niluxh rnii xtidx Dios xcient Melquisedec ni cua' te cuaani galooli: nadjci si'c te bixhojz nani nabajn par tejpas. ⁹ Ni'cni sajc guiniu xcient Levi nani rca' te cuua, lagajc laani agudijx te cuaaga che badeed Abram tejga yejc tzuuga lo Melquisedec.

¹⁰ Sa'csi mase gajd xi'n toAbram chu che huichagloj Melquisedecni, batijpnii lastooni sa'csi abia'n diidx sudeed Dios xajgni. Ni'cni che agudijxnii te cuaaga nadjci si'cni sugaränjii rexajgni.

¹¹ Rexpejñ Israel cua' leii che gujc bixhojz relevitas, reni nadj rexi'n toAarón. Paru nadjc niujnreni nibansa'c rebejn ni huisanäj leiiga, diruren niquin niääd stee bixhojz ni di gac si'c Aarón, alga si'c nadj bixhojz Melquisedec nadjci. ¹² Sa'csi cheni rdxaa te cuua bixhojz nanab näjza leiga guidxaaa. ¹³ Niluxh rnii xtidx Dios, Dad Jesucrist nadj bejn xten garenci famil. Luxh nicla tej bixhojz gajd gac bejn xten familga. ¹⁴ Huenliisi nadjnii nadjc Dad Jesucrist te bejn xten xfamil tojudá, niluxh di Moisés ninii gac te rexpejñ Judá bixhojz.

¹⁵ Luxh huenliisi nadjc ni rniiu, sa'csi abiricaj ste bixhojz ni nadjc sigajc gujc Melquisedec. ¹⁶ Luxh dini nadjc bixhojz si'c rnii releii ni guyu' dxejc. Laani gujcmi bixhojz xcient yälribee ni nadjc par tejpas, ni rut gadci gutzujl. ¹⁷ Scree nadjc diidx ni gunii Dios xcientni:

Luj nadjclu bixhojz par tejpas si'c gujc te niguii ni laa Melquisedec.

¹⁸ Dxejcti gunijt leii sa'csi xlia'si gujcmi, di nadjcdi niujn bejn si'cni rnii. ¹⁹ Di xleii toMoisés niujn gaan nibansa'c bejn. Naj lacuua leiiga rajpnu te xcälrililazsa'c; ni'c

rujn rbignu lo Dios.

²⁰ Dios bejn gacni bixhojz con xtidxliini, ni guniini con lagajc lajni. ²¹ Stecuua rebixhojz gujcreni bixhojz niluxh et con didxli-idire, con laj te benro, niluxh bixhojzre guc bixhojz con didxlii, con laj nani räjp: Agunilii Dios diidx con lagajc lajni, niluxh dini gusiech lajzni, räjpni: "Luj nadjclu te bixhojzro par tejpas, lagajc si'c gujc Melquisedec."

²² Ni'cni, Jesucrist nadjc ni rujn rile' rediidxre, luxh diidxre sajcruni loj xleii Moisés.

²³ Guyu' xhidalduxh stecuua rebixhojz, sa'csi rejtreni, digaci chanureni gacreni bixhojz. ²⁴ Niluxh Jesucrist rajpni yälhabajn par tejpas, nadj najczani bixhojz par tejpas.

²⁵ Ni'c rajcza ruslaani bejn lo dojl par tejpas. Ruslaani guiraa renani rbig lo Dios por laani, sa'csi anabajnni par tejpas te canabni lo Dios xcient laareni.

²⁶ Jesucrist nadjc bixhojzro nani rquiinnu. Laani nadjc dxan, dini niujn dojl, agubicajni lo reben-dojl, huäjszani jiaaru xhaguiba.

²⁷ Dini gac si'c stecuua rebixhojz ni nanab ju't man guixe-guixee te guze'c bixhojzroni lo Dios te ganid jiaa lagajc xtojlni. Dxejcti sajc guibi'ni guze'cnini lo Dios xcient xtojlni rebejn. Niluxh Jesucrist tejtis huält gudejdni trabajw, bejnnini cheni cuajni lo crujz, baxhe'ni xtejnni xcient nuure, gujtni. Si'c gudijxnii xtojlnu par tejpas. ²⁸ Leii xten Moisés rusaan gac bixhojzro te bejn nani rejt, niluxh didxlii ni gunii Dios con lagajc lajni guleni tejni gac bixhojzro lagajc Xi'nni nani naya, nani nabansa'c par tejpas.

8

Jesucrist nadjc nani rusiäj diidx

¹ Diidx ni sajcru loj rediidx ni caniinu nadjc scree: bixhojz ni nadjc xpixhojzronu agurej xladbee Dios lo xcäldrildibicha'ni xhaguiba. ² Nen yu' ni nadjc dxan, nen guidoo ni benchee Dios yu' bixhojzre, xhet nendi guidoo ni runchee reben lo quedxliuj.

³ Guiraa rebixhojz rajc rudeedreni gojn lo Dios, rajcza ju'treni guidxaaa te gusejcreni lo Dios xcient xtojlni, ni'cni nanab ga'p Jesucrist xhi gudeedni lo Dios. ⁴ Paru suga'ni lo quedxliujre, nicla bixhojz dini nadjc, sa'csi yu' bixhojz ni rudeed regojn si'c ni rnibee xleii Moisés. ⁵ Niluxh redzuu ni rujn rebixhojzga nadjc si'c te balaa xten

guira'ti ni yu' xhaguibaa. Najnnu na-jcreni balaa sa'csi balijdx Dios Moisés cheni agojl gunni xquidoo Dios, räjp Dios lojni: "Bahuui te gunlu guira'ti si'cpac ni baluiä lojlu lo dan Sinaí." Niluxh xpixhojznu Jesucrist rujn dzuun ni sajcrú, sa'csi na-jcni nani suga' galäii xnezyuj Dios loj reben quedxliuj, gusule'ní diidx ni gunii Dios cheni bejnni xhigabcoob, basa'nni didxcoob loj reben quedxliuj. Luxh didxcoobre sachduxhruni.

⁷ Paru niajc nusiech leii ni badeed Dios galooli lo Moisés lajz rebejn, di niquuin niujn Dios ste xhigabcoob. ⁸ Niluxh bahuui Dios xhet cayunsa'cdi reben quedxliuj, dx-ejc räjpni:

Naj rniliä sidzujn redxej che gunä stee xhigab,
jia'n stee diidx loj rexpejn Israel näjza loj rexpejn Judá te xca'reni didxcoob.

⁹ Xhet si'cdi xhigab ni benä che bia'nä diidx loj retoxtadgoldoroeni nen redxej ni gunazä naarení te gulääreni lajdx reben Egipto.

Laarení direni nusoob xtidxä ni'c basa'näreni, diruna niuäreni.

Si'c gunii Dad, Gueb Dios.

¹⁰ Niluxh diidx nani runä xhigab rlazä jia'n diidx loj rexpejn Israel neñ redxejre gac scree, räjp Dad:

Sunä chu rexleiä lo xcäriejnreni, sucuaäza xtidxä nen lastooreni.

Dxejcti narä gacä Xtiosreni, laarení gac rexperiä.

¹¹ Rut chu tejdi guluii sa'ní, nicla bejtzní, nicla chu stee bejn gäbreni, "colyembee Dad", sa'csi alanumbee guiraarení narä, rebäz sigajc rebengool.

¹² Narä sulasläzäreni susiaä redzundxuudx ni bejnreni, diru lazä guizaj rextöjjreni, nicla latzsiaj ni bejnreni.

¹³ Che bia'n Dios didxcoob, diidx nani bia'nni galoo agujcni didx-biejw, luxh nani anajc didx-biejw, xhetru sajcdini.

Xquidoo quedxliujre näjza guidoo xhaguibaa

¹ Laaca najc. Diidx ni bia'n galoo badeed leii xho gunreni che rajnreni Dios, näjza xho gac guidoo lo quedxliujre. ² Guc-chee

guidoo dxejcti gojl te ladro galäini te gujcni tio'p yu'. Yu' ni najc ganid laani yudxan. Ro'c suga' candilieer, näjza mex cadro naga' yätxtiil ni aguc le' ³ Ni rojp yu'ga najc dejtz ladro, ro'c najc yudxanduxh. ⁴ Ro'c suga' te guib cadro ru' yaal. Najcni ganax oor. Ro'c yu'za te guijn ni laa "arco de pacto", najcwni ganax oor, sigajc dejtzni, sigajcza nenñni. Nenga yu' te bo't ganax oor. Nen bo'tga, yu' yätxtiil ni laa mana. Lagajcza nen guijnga yu' bar xten toAarón nani biga', guyu' bid lojni, näjza guij cadro bacuua Dios xleii toMoisés. ⁵ Yejc guijnga caj tio'p figur oor ni najc si'c xangl Dios. Laareni rujn racbee bejn suga' Dios ro'c. Lagajc redee rusäuu con rexhigareni cadro ruxhe' bixhojzro xtiejn guidxaa xcuent xtojl rebejn. Ro'cti di gacdiru guiniirunu xcuentreni naj.

⁶ Che gulujx gusucheereni, riu' rebixhojz si'csi si'c nen guidoo, nen yudxan te rajnreni Dios si'c gunibee Dios. ⁷ Niluxh neñ stee yu'ga ni laa yudxanduxh, ro'c rajc riu' bixhojzrotis. Xtebtisni riu'ni, luxh tejtis huält neñ teb ijj, te chanäni xtiejn reguidxaa ni gudeedni te jia xtojlini näjza te jia xtojl rebejn ni najc xpejn Israel. ⁸ Luxh guiraa reni'c ruluii Sprit Dyan xten Dios loonu, gajd yudxanduxh guxal che sugasijc yu' ganid, yu' ni laa dxan, cadro sanuu rajnreni Dios. ⁹ Guiraa ni gujc galoo najc si'c te balaa, baluiini xho gacni najc. Regon näjza reman ni rudedreni lo Dios direni nusansa'c xcäriejn reni ruded gojn lo Dios, sa'csi xtiejn reman rusäutisni lo xtojl rebejn. ¹⁰ Dee najc ganaxtis xhi rajwni, ni rá'ni, con yälrobnis, o xhi stee dzuun ni rujn bejn te ria ganaxtis tiejhreni che guidzujnli dxej cheni guchaa Dios guira'ti.

¹¹ Niluxh abiääd Jesucrist, naj laani najc bixhojzro xcuent redidxcoob ni sajcrú najc. Nacoob guidoro cadro biu' bixhojzre, nasa'cruni najc. Xhet con naadi bejn guccheeni. Dizani gac guidoo quedxliujre.

¹² Abiu' Jesucrist cadro najcpac yu' ni laa dxanduxh, niluxh xhet xtiejndi redxib, regon; ganax lagajc xtiejnni ca'ní biu'ni yudxanduxh tejtis huält, te si'c baslaani nuure lo dojl par tejpas. ¹³ Reni basia xtojl bejn galoo najc redee: xtiejn regon näjza redxib, näj cobdäj xten reguidxaa ni rejc neñ guidodxanga; bastiojbní guiro'preni

yejc reni yu' xtojlni. ¹⁴ Palga basia redee xtojl bejn, aticaxh xtiejn Jesucrist sajc gusia dojl, sa'csi rajpni yälnabajn par tejpas. Lagajc laani badeedni xtiejnni lo Dios. Niluxh najcni renya sa'csi dini niujn dojl, rusiazani xcäriejnnu xcient retzuu ni xhet sajcdi, te chunu loj Dios ni nabajn par tejpas.

¹⁵ Ni'cni Jesucrist najc nani suga' galäi: nez lo Dios näja nez loj reben guedxliuj xcient didxcoob. Yälgijt xten Jesucrist najc te gudzucajni xtojl reben näjza xtojl renani bejn si'cni caj lo leii, te xca' guiraa reni agurejdx Dios yälnabajn par tejpas, si'c bia'n diidx galooli. ¹⁶ Didxcoobre najc si'c che rlajz tej bejn guinibee xho guidis xhixtanni che agojl guetni, nanab gucuaa bejnga lo te guijtz xho guidisni, dxejcti gucuaani lajni. Niluxh xhet sajcdi guijtzga che gajd bejnga guet. ¹⁷ Xhet sajcdi guijtzga che nabansijc nani bejnni. Sajcni che agujt bejnga. ¹⁸ Ni'cni che bia'n Dios diidx loj rexpejn Israel galoo, gujt te man te bixe' rejn. ¹⁹ Che gulujx gunii Moisés rediidx si'c ni caj lo leii loj guiraa rexpejn Israel, bagu'tni rebiser, redxib, cua'ni rejngä näjza nis, bahuajdxni guid-xiil xniaa näjza te la' yajg balagbäz, hysopo, dxejcti bastiojbni rejn yejc guijtz cadro caj leii, näjza yejc rebejn. ²⁰ Dxejc guniini lojreni: "Rejnre najc seen sile'pac diidx ni abaxhal Dios lojtu."

²¹ Sigajcza bastiojb Moisés rejn guidoo näj guiraa renani rquiin rebixhojz che rajreni Dios. ²² Leii xten Moisés rnibee jia guraiili con rejn, palga di rejn guixe', di xtojl bejn jia.

Xtiejn Jesucrist rudzucaj dojl

²³ Ni'cni biquiinpac gujt remanre, bixe' xtiejnni te basiani reni najc xpalaar eni yu' xhaguibaa, niluxh reni yu' xhaguibaa rquiin guixe' xtiejn te ni sajcru. ²⁴ Di Jesucrist niu' nen guidoo ni benchee rebejn, ni najc xpalaar guidoopac xten Dios xhaguibaa. Laani biu'ni lagajc xhaguibaa, te laani suga'ni nez lojpac Dios te caniini xcient nuure loj Dios. ²⁵ Bixhojzro xten xpen Israel biu' nen yu' ni laa dxanduxh tejtis huält nen teb ijd, ca'n'i xtiejn reguidxaa. Niluxh Crist biu' xquidoopac Dios xhaguibaa tejtis huält par tejpas, luxh ca'n'i lagajc xtiejnni. Di guiquiin jiu'rungi balti huält. ²⁶ Palga nanab gunni si'cni rujn rebixhojz, sajpnii

por niejtni te chinaduxh huält cheli birixtiej guedxliuj. Luxh naj, cheni bidzujn dxej, baluiloj Jesucrist tejtis huält, lagajc laani badeedzani xtiejnni lo Dios cheni gujtni, cuajni lo crujz te si'c badzucajni par tejpas xtojl rebejn. ²⁷ Guiraa bejn nanabpac guetreni tejtis huält, dxejctiru sidejdreni yälguxhtis xten Dios. ²⁸ Sigajcza tejtis huält badeed Jesucrist xtiejnni ni bixe' lo crujz te badzucajni xtojl xhidalduxh bejn. Luxh loj renani cabätzni suluijlojni stehuält, xhet te gudzucajdiruni dojl, alga te gusa'ni xcälruslaa renani cabätzni.

10

¹ Sa'csi leii xten toMoisés najctis si'c te balaa xten nani siääd naj. Niluxh dini gac si'cpac redidxcoobga. Ni'cni leii, con xtiejn reguidxaa ni rxe' cazob ijd digacdi gunsa'cni rebejn nani guibig lo Dios, sa'csi di xtiejn man gudzucajpac rextojlreni. ² Paru niajc nibicajpac xtojl reni rudeed xtiejn guidxaa, aguläjz rudeedreni xtiejn guidxaa, sa'csi che gubicaj xtojlreni, diru xcäriejnrreni gumbee dojl. ³ Niluxh yälrejt man näj yälrudeedreni rejn casob ijd rusnajtisreni lajzreni xcient dojl. ⁴ Sa'csi digacdi gudzucajpac regon näjza xtiejn redxib xtojl bejn.

⁵ Ni'cni che biääd Jesucrist lo guedxliuj räjpnii lo Dios:

Di rlajzlu xtiejn guidxaa niclaza regon niluxh abejnlu gacä nigu-guedxliuj.

⁶ Dilu nichaglajz yälrejc xten guidxaa niclaza yälrudeed rejn, niclaza gojn ni rudeed rebejn te gusiani xtojlreni.

⁷ Dxejc räpä: "Narä basiälä te gunä si'cni rlajzlu Dad, Dios, (si'cni caj nen reguijtz xcient ni sacä)."

⁸ Che gulujx gunii Jesucrist diidxga: "Di rlajzlu, dilazu guidxaglajz xcälejt guidxaa näjza regon niclaza xcälejt guidxaa, niclaza yälrudeed rejn xcient xtojl bejn si'cni caj lo leii gun bejn." ⁹ Dxejcti räjpnii: "Narä siälä, te gunä si'cpac ni rlajzlu, Dad Dios." Dxejc badzucaj Jesucrist nani gujgaloo, te guläxtiejni didxcoob ni bia'n Dios loonu naj. ¹⁰ Abasia Dios lastoomu sa'csi bejn Jesucrist si'c rlajz Dios cheni baxhe'ni xtiejnni lo crujz tejtis huält par tejpas.

¹¹ Guiraa rexpixhojz Israel rujnreni dzuun guixe-guixee te rudedreni lagajctis guidxaa, näjza xtiejn reman, guiraa si'ctis ni caj lo leii, niluxh reni'c digacdi gudzucaj dojl. ¹² Niluxh Jesucrist tejtis huält baxhe' xtiejnni lo crujz te badzucajni xtojl rebejn par tejpas. ¹³ Naj agurejni xladbee Dios cadro rnibeeni. ¹⁴ Ro'c cabázjni guiraa ni rdxe'ch lojni te cuereni ladzni'ni. ¹⁵ Ni'cni tejtis huält cuajni lo crujz te basianini par tejpas guiraa renani ahuililajz xtiidxnii. ¹⁶ Sigajcza rnii Sprit Dyan xten Dios loonu; najni:

¹⁶ Didx nani jiannäáreni neq redxejre gac scree,
naj Dad Dios: sucuaä rextidxä lo xcäriejn-reni,
susäläza xtidxä neq lastooreni.
Dxejci rájpni:

¹⁷ Diru lažä guizaj rextojlreni nicla rex-tolguijdxreni.

¹⁸ Ni'cni, cheni abia xtojl bejn, diru quiuiin gudeedreni guidxaa te jia rextojlreni.

Nanab guibignu lo Dios

¹⁹ Ni'cni resa'nu, na'c guidxejbtu, sajc jiu'nu yudxanduxh cadro bixe' xtiejn Dad Jesucrist nani abadeedni lo Dios. ²⁰ Naj yu' te nezyuj, nezsiucoob, nezyuj xten xcäln-abancoobnu ni baxhalni che badzucajni ladroga. Ni'c sälöj cheni biu'ni neq yudxanduxh, badeedni lagajc xtiejnni lo Dios. ²¹ Jesucrist najc xpixhojzronu nani rnibeey rexpejn Dios. ²² Ni'cni do'o guibigrunu lo Dios guideeb lastosa'cnu, na'c guidxejbdu, na'cza guituyjedinu. Con yärlililajz-pac abia lastoonu xcient rexhigabgijdx, abidiibza tiejhnu lo nis-ya. ²³ Do'o chanuu sudzu'tznu lo xtiidxnii nani huililajznu, na'c guchaanu xhigabnu sa'csi susoob Dios diidx ni bia'nni loonu. ²⁴ Naj do'o guihuii xho jiennu te gacnäj sa'nu te si'c chonälajznu sa'nu nägajcza te jiennu ganax dzuns'a'c.

²⁵ Na'cjiennu si'c rujn rebejn nani diru jiääd che rdxagsa'nu. Nanab guiliidxnu resa'nu sa'csi naj asiäddzungajxh dxej ni guibi' Dad Jesucrist.

²⁶ Palga chanuu jienrunu dojl, niluxh abiejn diajgnu xtidx Jesucrist, diru gadci guibicaj xtojlnu dxejc. ²⁷ Dxejcsii guidxeebtisnu guiläaznu yälguxhtisduxh xten Dios näj guiboo ni guze'c renani rdxe'ch loj Dios. ²⁸ Cheni guyu' chu tej ni di niujn si'c caj lo xleii Moisés, niluxh bidxaag xtidx

tio'p o chon ni nancheepac, räjpreni dini nusoob leii, gujt bejnga, rut balaslajzdini.

²⁹ Maazru yälrusacsíduxh nanab ted renani ruläj yejc Xi'n Dios cheni direni gusobdi-ajg xtiidxnii. Alga rujo'nreni xtiejnni ni baxhe'ni lo crujz te basianini. Rusanxtu-jyzani Sprit Dyan xten Dios nani badeed didxcoob lojni. ³⁰ Anancheenu gunii Dios: "Narä susquixä bejn; loä siguijx bejn", rájp Dios. Stehuält guniini: "Dad sujn yälguxhtis rexpejnni." ³¹ ¡Cosduxh gac bejn ni jiajladznaa Dios nani nabajn par tejpas!

³² Niluxh colsnaj lajztu xho gujctu galoo; cheni entis cua'tu xtidx Dios, xho batip lajztu, gudejdutu trabajw sa'csi cua'tu xtidx Dios. ³³ Guyu' resa'tu gudéreni lojini, yu' reni basacsí la'tu nez loj rebejn. Guyu'za huält astoo gudejdutzat trabajw sa'csi cahuiitu rebejn nani basacsíreni, cadejdzareni trabajw. ³⁴ La'tu banaj lajztu renani yu' latzguiib, guideeb yärlbalajz batip lajztu che cua'reni guiraa xhixtentu, sa'csi gucbeetu xhaguibaaj rajptu reyälnasa'c ni sajcrui, niluxh yu'ni par tejpas. ³⁵ Na'c gunijttu xcärlililajz xtidx Jesucrist, sa'csi yärlililajzga gun xca'tu yälnabajn par tejpas. ³⁶ La'tu nanab cuedxitu te che abejntu ni rlajz Dios, dxejc xca'tu nani aguniini guniidxnii. ³⁷ Sa'csi xtidx Dios ni bia'n rnii: Asiäddzungajxhpac dxej ni jiäädni, asiäddzungajxhpac dxej ni jiääd nani siääd, dipacni gaclaa.

³⁸ Renani nabansa'c sibannäj yärlililajz, niluxh palga yu' chutej ni guidxejb chalilajz, dini'c gun guibaa lazä.

³⁹ Niluxh nuure dinu gac si'c reni rusaan yärlililajz te nitreni loj dojl. Nuure najcnu renani rililajz xtidx Jesucrist te laa xaimnu par tejpas.

11

Yärlililajz

¹ ¿Xhini'c najc yärlililajz? Yärlililajz sälöj cabäaznu sajcpac tejni gjad gac, yu'pacza ni mase dinu fiini, najcni si'cni abahui-inuni. ² Dios huinälajz retoxtadgolsoonu sa'csi huililajzreni xtiidxnii.

³ Sa'csi rililajznu, najnnu benchee Dios reguedxliuj, bencheeni guibaa, bencheezani guiraa nani rhuiinu. Con xtiidxtisni bencheeni nani dinu guihuii.

⁴ Gojpza toAbel yälrililajz badzubaalni rexquidaani lo Dios. Yälbijbyaal xtenni sajcru loj yälbibyaal xten toCaín. Ni'cni gunii Dios najc toAbel beñsa'c. Naj mase agujt Abel, sanuutis racbeenu xcuent yälrililajz ni gojpn.

⁵ Sigajcza gojp Enoc yälrililajz, ni'c sinä Dios Enoc xhaguibaa, guideb nabajnni, te na'c niejtni. Diru rebejn̄ nidxálni sa'csi asinä Diosni xhaguibaa. Luxh räjp Dios xcuentni che gajd Dios jinäni, gubansa'cni, baspaani lajz Dios. ⁶ Rut chu tejdi sajc guspaa lajz Dios palga dini chalilajz, sa'csi che guibogni lojni, nanab chalilajzni yu' Dios, chalilazzani sudeed Dios xcälnasa'cni loj renani rguilni, nalajznu renani rlajz gumbeepac Dios.

⁷ Gojpza toNoé yälrililajz. Che räjp Dios lojni siajbpac nisgуй ni gajdreni fii, huililajzni. Bejnni si'c ni räjp Dios. Bidxejbní sa'csi najni rusooob Dios xtiidxni, ni'c bencheeni te canuduxh te di niejt rexii'nni. Sa'csi gojpni yälrililajzga, bejnni gubibde rebejn̄ gudedxiuij, gunijtreni sa'csi direni nililajz xtiidxni. Dxejcti cu'a'ni yälñabansa'c ni siääd xcuent yälrililajz.

⁸ Sa'csi gojp toAbram yälrililajz, basoobni xtidx Dios che gurejdx Diosni, biriini lajdxni te huijni cadro gudeed Dios yuj lojni te cuääzni ro'c. Biriini lajdxni, mase dini gan caro chääni. ⁹ Gojp toAbram yälrililajz, ni'c huilätzni si'c benzijt loj reyuj ni räjp Dios gudeedni lojreni. Ro'c gulätzreni si'c lajdx benzijt. Gulätzni nen reyuguijd, sigajcza bejn̄ toIsaac näjza toJacob, sa'csi näjza lojreni räjp Dios gudeedni yuuga. ¹⁰ Niluxh toAbram cayunloj te guejdx nani sudzu'tz, te guejdx nani cuäxtiej Dios, nani gunchee lagajc Dios.

¹¹ Sigajcza gojp toSara yälrililajz te mase anajcni bengool niluxh agudejd chu xi'nni, cu'a'ni yälrnibee xten Dios te gujcní nan, guyu' te xi'nni, sa'csi huililajzni susooob Dios xtiidxni. ¹² Ni'cni mase siäddzungajxh dxej ni guet toAbram, guyu' xhidualduxh xajgni. Si'c rebalxhaguibaa näj si'c reguibäzlule' xten yujxh ni tre' ro' nisdoo, si'c najcreni xhidualduxh, nicla gac guigabreni.

¹³ Guiraa rebejnre gujt, direni nica' yuj nani räjp Dios gudeedni lojreni; niluxh sa'csi rajpreni yälrililajz, bahuiireni lo yu' jga zitro, ni'c bibalajzreni, sa'csi anajreni

najcreni benzijt, cansajsireni lo guedxliu.

¹⁴ Reni rnii si'c, rmiliireni caguisijcreni cadro gac lajdxreni. ¹⁵ Paru niujnreni xhigab lajdxreni najc guejdx cadro biriireni, pet niajc nibisacreni ro'c. ¹⁶ Niluxh laareni rlajzreni te lajdxreni ni sajcru, nala-jznu lajdx Dios xhaguibaa, ni'c rguilreni. Ni'cni di Dios guitujy gäbreni najcni Dios xtenreni, luxh alabencheeni guejdx cadro cuääzreni xhaguibaa.

¹⁷ Gojpza toAbram yälrililajz ni'cni cheni bateed Diosni preeb, räjpni loj Abram gudeedni Isaac lojni lacuua gudeedni xhiil, cuäjbni gugu'tni xi'nni lacuua xhiil, luxh Dios ni najc tejtis aräjp lojni galooli: ¹⁸ "Isaac guniidx chu xhidajl xajglu, xag-doolu." ¹⁹ Sa'csi nanchee toAbram räjp Dios yälrnibee te guspajjni rebengut. Luxh si'cza cuasacni xi'nni, ascanu loj rebengut cuasacni xi'nni.

²⁰ Näjza toIsaac gojp yälrililajz benle'ni toJacob näjza toEsaú, räjpni xhini'c gun tejgareni. ²¹ Gojpza toJacob yälrililajz, che agojl guetni, benle'ni guiro'p rexii'n to-José. Dxejcti huistieni guzucajni yejc bas-ton xtenni te si'c gojnni Dios. ²² ToJosé gojp yälrililajz. Che agojl guetni, räjpni siri rex-pejñ Israel lajdx Egipio, gunibeezani xho gunnäjreni xtzujtni.

²³ Gojp rexuczajn Moisés yälrililajz, ni'c cheni gojl Moisés, bacua'tzrenini chon bääi, sa'csi bahuiireni bázdaanni. Direni niu xtidx reii ni gunibeeni, räjpni ju'treni báz niguui. ²⁴ ToMoisés gojp yälrililajz, ni'cni che aguroobni di rlajzni nirilajni xi'n xindxa'p reii xten Egipio. ²⁵ Bejnni xhigab tednäjni trabajw rexpejñ Dios lacuua niujnji redzuun ni rchaglajz rujn reben Egipio, sa'csi najc reni'c dojl, luxh tera'tsi rus-paareni lajz bejn̄. ²⁶ Par laani maaazru sajc tedni lagajc trabajw ni gudejd Je-sucrist lacuua niajpni reyälnasa'c xten Egipio sa'csi laani cabäjztisni reyälnasa'c nani churu gudeed Dios lojni. ²⁷ Gojp toMoisés yälrililajz biriini lajdx reEgipio, dini nidxejb yälrdxe'ch xten reii, huinuutis gusudzu'tzni si'cni najc xhigabni, ruhuuiit loj nani di guzeñ, nalajznu Dios.

²⁸ Gojp Moisés yälrililajz bejnni lanij xten pascw. Gunibeeni baroobreni rejn ro' xpuerit rexpejñ Israel te che ted angl xten

yälgujt nicla te xingan galoo xten rexpejn Israel di guet.²⁹ Gojp rexpejn Israel yälrililajz gudejdreni galäii nisdoo ni laa nisdoxniaa luxh asdoo loj yubijdz rsiajreni si'c gudejdreni. Niluxh che rlajz rebejn Egipto nidejd, gubi'nis, dxejc gulo'reni nen nis.

³⁰ Xcient yälrililajz gurebä'n paderguj xten guedx Jericó, cheni basa' gjadz dxej caded huält rexpejn Israel guejdxga.³¹ ToRahab, te gunaguijdx, gojpzani yälrililajz ni'c dini niejt che gujt renani di nuzobdidx, sa'csi laani bacua'tzni gaii bejn nani sagula'tz xho najc guejdxga.

³² ¿Xhiruxh guiniä? Di galdi guiniä xcient toGedeón, xcient toBarac, xcient toSansón, xcient toJefté, xcient toDavid, xcient toSamuel, näjza xcient retoprofe't.

³³ Guiraareni gojp yälrililajz ni'c bejnreni gaan xhidajl reguejdx, bensa'creni yälgxhtis, cua'reni xcälracnäj Dios ni bia'n diidx xca'reni, basäurenri ro' rebeedz.³⁴ Guyu'reni nen te balduxh luxh xhet gujcdireni, goj! baxuurenri te di niejtreni con espaad. Reni gujc benrdxajg, guzutzu'tzreni gujcreni nadipduxh, gujcreni benduxh lo quer, barilaaggwreni resoldaad xten reni rdxe'ch lo jreni.³⁵ Guyu'reguna ni cuasac rextogoolreni, gubansacreni lo rebengut.

Sgaiireni gujt xcient yälrusacsí lacuua nicäjbreni nusiech lajzreni te nuslaa bejnreni sa'csi rlajzreni xca'reni stee yälñabajn ni sajcru.³⁶ Sgaiireni gudejd trabajw guniyaj bejnreni, gudinnäj bejnreni chir, cuaduuuzareni caden, guyu'zareni latzguiib.

³⁷ Guyu'za reni gujt che bacuua bejn guij yejcreni o che gujcreni tio'p la' con sier. Guyu'za reni basacsí bejn te guro'hreni yälrililajz. Guyu'za reni gujt con spaad. Guyu'reni cuanzaj nezree nezrec, gojtreni guid-xil näjza guid-dxib, sa'csi xhet rajpdi-reni luxh entis rdejdreni trabajw rusacsí bejnreni.³⁸ Sa' rebejngä di nungäjl reben quedlxiju niääd rebejngä lojreni. Cuanzaj rebejngä nez lo reyubijdz cad xhet yu'di xhi gaurení nicla nis te yäreni; cuanzajreni nez nen redajn, nez nen rebiliää näj nez nen quedduxh ni yu' nen yuj.³⁹ Guiraa rebejngä gojp yälrililajz, luxh ni'cni huáp xpala'nreni, niluxh direni nica' ni bia'n diidx gudeed Dios lojreni,⁴⁰ sa'csi bejn Dios xhigab gunni te dzunsa'c lojreni. Bejn

Dios xhigab guniidxni yälnsa'c loonu, naj tejsi guica'nu con laareni nani bia'n diidx guniidx Dios.

12

Guhiititsu lo Jesucrist

¹ Ni'c najcni si'cni suga'nu galäii guiraa rebejnre luxh cahuiireni xcälrlilaaznu. Ni'c do'o guisa'n te laad guiraa reni rusäü lo xnejznu, näjza redojl ni ruxhiid nuure lo xcälñabajnu, te di jieednu chosaanu nez lo nezyuj ni sasanäänu nez cadre chonnu.² Do'o guihuidzu'tz nez loj Dad Jesucrist nani guläxtiej, nani guluuxza xcälrlilajznu. Jesucrist gudejd trabajw lo crujz, dini nituuy gujtni lo sa' yälgujtga, sa'csi najnni cheni agudejdni trabajw, sica'ni yälrbalajz; naj agurejni xladbee Dios cadre rnibeeni.

³ Coluyjn xhigab la'tu xho gudejd Jesucrist ladznaa reben dojl, te na'c guidxajgtu, na'cza jieedtu la'l ni cabäjztuni.⁴ La'tu gajd xtiejtu guixe' lo yälrucuanäj dojl.⁵ ¿La abiäl lajztu xho balijdx Dios la'tu si'c xi'nni, ä? Scree caj xtiidxni lo reguijtz; räjpní: Xinä, na'c cuälazlu xcälñaj Dad niclaza jieedlu che tilhäjní luj.

⁶ Sa'csi si'c runnaj Dad renani sanälajzni, rujnni riaa guiraa renani rca'ni si'c xi'nni.

⁷ Palga gatijp lajzlu lo xcälñaj Dios, sica'ni luj si'c xi'nni, sa'csi zchu dad di gunnaj xi'nni?⁸ Niluxh palga di Dios gunnaj la'tu si'cni runnajni guiraa rex'inni, ditu gac xi'npacni, najctu xi'n redolgujdx.⁹ Anajntu cheni guncu biuux lo quedlxiju, bennaj xtadnu nuure te rsoobnu xtiidxni, te runsa'czanu si'cni rlajzni. ¿Xhicuent dinu cuadiajg xtidx xtadnu ni yu' xhaguiba te si'c jia'pnu yälñabajn, ä?¹⁰ Xtagdu lo quedlxiju re bennajreni nuure tio'p-chon dxej, te gac gusoobnu xtiidxni. Niluxh si'c runnaj Dios nuure te jia'pnu te yälñabanya, te gac nayazanu sigajc najcni laani.¹¹ Guliini xhet xhi yälñajdi ni rchalonus najc laaca che rsiajcnuni, racnaj tiejxhnu niluxh ria'nnu et laadi. Niluxh guiraa renani agudejd loj yälñajga rusooob xtiidxni, rca'reni te yälñabanya ni rbecdixilajzreni.

Riez guze'ni xtidx Dios

¹² Ni'cni colsudzu'tz renaatu ni abadxajg, colsudzu'tz yecxhijbtu ni abadxajg,

¹³ te colquiił nezyuj xten xtidx Jesucrist te sudzu'tz ni'tu. Na'c guibicajtu lo xnezyujni.

¹⁴ Colquiił xho cuedxinäjtu guiraa rebejn. Colchanä te yälhabanya, sa'csi renani di guibanyadi, digacdi fiireni loj Dad Jesucrist. ¹⁵ Colhuisa'c te di gunijt chutejtu lo xcälracnäj Dios, colnatiro gac chu tejtus'i'c te cuanlaa ni rujn daan, sa'csi sa' bejngä suxhinni guiraa renani ahuililajz. ¹⁶ Nicla tejtus'i'c ga'p stee gunaa te laad, nungäj cuäznäjni chäältisni. Na'cza gactu bejn ni di jiu xtidx Dios, si'c gujc toEsaú cheni bato'ni xcäl-nasa'cni ni najc xtenni sa'csi najcni xingan galoo xtdadni. Bato'nini te cu'a'ni yälrajwtis.

¹⁷ Anajntu, cheni rlajzni niunle' xtdadnini te nica'ni ni najc xten xingangalooni, dini nica'ni mase guc-huin lajzni, binduxhni. Dxejcti diru niajcdi nica'nini.

¹⁸ Colnatiro, sa'csi la'tu di'tu nibig lo te dajn cadre rajc rsiaj bejn, te dajn ni galoo cayecduxh guiboo, cadre nacäjy, nacäiboo, cayajcza bedonduxh. ¹⁹ Diza diajgtu niejn xse' trumpet, xse' Dios si'c biendiajg rex-pejñ Israel agujc xchero. Luxh che biejn diajgreni rediidxga, direni nutiplajz, gun-abduxhreni na'cru guiniini lojreni. ²⁰(Sa'csi direni nutiplajz diidx ni caniini, räjpní: "Palga ted te mantis guläj xhuj dajnga, colju'tni con guij.") ²¹ Te yälnadxebeduxh najc nani guzen ro'c, lagajc toMoisés räjjp: "Cayacditä yälrdxejb."

²² Niluxh la'tu agubigtu lo dajn xten Sión, cad najc lajdx Dios ni nabajnpac, nalajznu guedx Jerusalén ni yu' xhaguibaa cadre yu' xhidalduxh xangl Dios, ²³ cadre re' reni calä'p xpala'n Dios. Ro'c re'za reni najc xi'n Dios, renani acaj lajni xhaguibaa. Agubigzatu lo Diospac, ni najc Juejz xten guiraanu, näjza loj resprit xten rebejn nani abasia Dios te anajcreni bennasa'c. ²⁴ Agubigzanu loj Jesucrist nani suga' galäii nez loj Dios näj benguedxliu xcient didx-coob ni bia'n Dios, näjza lo xtiejn Jesucrist ni badeedni lo Dios xcient nuure. Jesucrist rniab jiäj! lajz Dios, luxh ni'c sajcrloj nani rniab xtiejn toAbel. Xtiejn toAbel rniab quiix nani bagu'tni.

²⁵ Ni'c colnatiro te di cuälaztu nani canii lojtu rextiidxni. Palga di rebejn nid-edbia sa'csi guläaz nani baluui bejn ni siääd guedxliu xrej, xho jiennu tedibianu

palga guilälaznu nani ruluii nani siääd xh-aguibaali? ²⁶ Xse' Dios basniib guedxliu galooli, niluxh naj rniscacni: "Ste huält susnibä xhet ganaxdi guedxliu, susnibä näjza xhaguibaa." ²⁷ Che gunii "ste huält", ni'c sáloj guibicaj renani benchee Dios ni rac rniib, te jia'n renani digacdi guiniib. ²⁸ Luxh sa'csi lajdxnu ni gumiidx Dios digacdi guiniibni, do'o guideed xquixtios lo Dios xcientni, te si'c chunu loj Dios, chonälaaz-nuni guideb yälrdxejb näjza yälnadolajz, ²⁹ sa'csi Xtiosnu najc si'c te balduxh ni ruse'c, ni runitlojza.

13

Xho guspaa bejn lajz Dios

¹ Colchanuu lo yälrinälaajz sa'ni. ² Di gusaantu gudeedtu rolijztu guidzujn biooz, sa'csi loj reni bejn si'c, yu'reni badeed rolijzreni bidzujn xangl Dios rolijzreni, niluxh direni niacbee chu najcreni.

³ Colsnaj lajztu reni yu' nen latzguiib, ascanu la la'tu ni yunäreni latzguiib. Colsnajza lajztu renani basacsí bejn, ascanu la la'tu ni cagusacsíreni sa'csi näjza la'tu najctu benguedxliu si'c najcreni.

⁴ Colga'p xpala'n yälguchnaa te guibanayatu con chäältu sa'csi sujn Dios yälguxhtis rebejn ni resnäj chääl bejn näjza reni rusguee rebenxteb.

⁵ Na'c chanälajztu meel, colguibalaznäj ni rajptu, sa'csi Dios agunii: "Dipacna gu-sanälu, dizana cuälazälu." ⁶Ni'c dinu guidxeeb guiniinu:

Dad ni yu' xhaguibaa najc ni rcanäj narä; dina guidxebä xhitis ni gunnäj bejn narä.

⁷ Colsnaj lajztu renani baluui guibansa'ctu, ni basule'za xtidx Dios lojtu; colhuii xho nabajnreni te sigajcza colchanä xcälrililajzreni.

⁸ Sigajc gujc Jesucrist naii, sigajcza najcni nadxej, sigajcza sajcní par tejjas. ⁹Na'c gusaantu gusiejchreni lajztu xcient ste'ca yälrlului ni digac si'c najc xtidx Jesucrist. Sacduxh sudzu'tz lastoonu lo yälracnäj ni ruluii xtidx Dios, xhet lojdi yälrajwtis. Xhet sajcdi rebejn nani rujntis xhigab xcient yälrajw.

¹⁰ Nuurnu rajpnu garencia piään, ro'c di-gacdi xca' rebixhojz xhi gaureni si'c ni cua'reni nen guidoguijd galoo. ¹¹ Sa'csi xpixhojzro xpejñ Israel rinä xtiejn reman

nenyu' ni laa dxanduxh te biäu lo dojl xten rebejn, niluxh rize'creni xpääl remanga te laad, dejtz guejdxga.¹² Si'cza gujt Jesucrist te laad, dejtz guejdx, te basiani xtojl rebejn xcient lagajc xtiejnni.¹³ Naj colcho' chonnu loj Jesucrist te laad dejtz guejdx te guideednu trabajw näjza yälxtuuy si'cni gudejd Jesucrist.¹⁴ Sa'csi lo quedxliujre dxunlaasinu, niluxh caguilnu laadxnu ni chu jiäädrü, te ro'c guidxunnu par tejpas.¹⁵ Guideb xcälracnäj Jesucrist do'o guideeditisnu xquixtios lo Dios si'c te gojn ni gudeednu lojni, guiliä'pnu xpala'nni näj jielnu redij.¹⁶ Na'cza jiällajztu guntu huen, gacnäj sa'tu, sa'csi reni'cni najc redzuun ni rdxaglajz Dios.

¹⁷ Colcuadiajg xtidx reni rnibee la'tu, sa'csi laareni rcanäjreni lastoonu, si'cza laareni sudeedreni cuent lo Dios. Colyujn guibalajzreni gunreni xtzuunreni, na'c gac-huin lajzreni sa'csi palga gac-huin lajzreni, xhet sajcdini par la'tu.

¹⁸ Colnab lo Dios xcient nuunu, sa'csi racbeenu naya xcäriejnnu, rlaaznu laaca jiennu guira'ti dzuun.¹⁹ Rniä lojtu, guiniabrutu loj Dios, te gun Dios jiojb guibi'ä jiälä lojtu.

Te didxle' näj lult xtixtios

²⁰ Dios xten yälrbedxilajz ni baspajn Dad Jesucrist lo rebengut, Jesucrist najc baxtor-duxh xten rexiil xcient rejn ni bejn gusojb didxcoob xtenni ni najc par tejpas.²¹ Dios gun gactu bensa'c, benxojn loj xhitis te guntu ni rlajzni, näj gunni loj guiraa nuure si'c ni rlajzni xcient Jesucrist. ¡Colspaa lajz Jesucrist par tejpas! ¡Sugacni si'c!

²² Resa'nu, rniabä lojtu, colcuecdxi lajztu, colcuadiajg rediidx ni rulijdxre, sa'csi riojbgä cacuaä te labäz guijtzre lojtu.²³ Colyacbee abirii bejtznu Timoteu latzguiib. Palga guidzungajni ree, siädnää'ni jiädhuiä la'tu.

²⁴ Colguideed xtixtios loj guiraa renani ruluii la'tu näj loj guiraa rebejtznu ni rililajz. Reben Italia ruxhal xtixtios lojtu.

²⁵ Gacnäj Dios guiraatu. Sugacni si'c.

Guijtz Nani Bacuaa Santiaag

Santiaag rucuaa guijtz loj renani nare'ch lo guedxliuj

¹Narä Santiaag, xmos Dios näjza xten Dad Jesucrist, ruxhalä xtixtios loj guitzubitio'p cuua rexpejñ Israel ni nare'ch lo guedxliuje.

Yälhnajn nani runiidx Dios loonu

²Rebetzä lo xtidx Dios, colguibalaz-duxhtis che rsiajctu recos nani ruquiltu cuälaztu xnezyuj Dios, ³sa'csi che rsiajctu reni'c, rsiajctureni te don la gulipac ahuililajtu xtidx Dios, dxejc rsieedruntu yärlbecdxi lajz. ⁴Dxejcti yärlbecdxi lajz sajc gunni xtuunni neñ lastootu, te gactu bensa'c, bejn ni aguyajl lo xtidx Dios, nani xhet cayäädxdi xcälnajnni.

⁵Palga yu' tejtu ni cayäädx xcälnajnni, suguiniabnini lo Dios, sa'csi Dios rudeed-duxhni yälhnajn loj guira'ti bejn, luxh dini guinii didxlaa lojni. Palga guiniab bejnni, sudeedza Diosni. ⁶Niluxh che guiniabni, suchalilajzpacni, na'c guntio'p lajzni, sa'csi bejn ni runtio'p lajzni najc si'c bäß ni sanä bej, nezree-nezre'c sääbni. ⁷Nani najc si'c, na'c gunni xhigab yu' xhi xca'ni lo Dad Jesucrist. ⁸Sa'csi nani runtio'p lajzni, lo guiraa ni rujnni nadxej rujnni tej xhigab, guixee rujnni xte'ca xhigab, di gacdi chanuuni tejsi xhigab.

⁹Te sa'nu ni najc nadolajz, suguibalajzni sa'csi najcni benro sa'csi guläs Diosni, ¹⁰sigajcza bejtzuu ni yu' xhixtenni, suguibalajzni sa'csi abaluui Dios lojni najcni bejn ni xhet sajcdini, sa'csi nägajc laami sinitlojni si'c rnitloj reguui ni yu' lo cuaan ni yu' loniaa. ¹¹Sa'csi che rliejn gubijdz näjza te belaa, li rgol recuaanga, li riuii reguui ni caj lojni, dxejc rtejbreni, dxejcti agunijt xcälsacrungi. Si'cza sinitloj te bejn ni yuduxh xhixtenni läl ni yu'ni lo xnezyujni.

Xhi xca'ni che tedni trabajw

¹²Chicbaa niguui ni rsiudzu'tz läl ni cadejdni trabajw, sa'csi che agunii Dios didxsa'c xcuent nani bejnni sica'ni coron xten yälhabajn par tejpas ni bia'n Dios diidx gudeedni loj rebejn ni sanälajz Dios. ¹³Che gunijt tejtu, rujntu dojl, na'c gäbtu: "Dios

bejn banitä", sa'csi di gacdi quiqiiil Dios te gunni cosgijdx, digacdi gunijt Dios, luxh sigajcza di gacdi gun Dios gunijt te bejn, gunni dojl. ¹⁴Niluxh tejgatu runijt che rcäjy xcäriejntu sa'csi riajb yejctu guntu cosgijdx, runijtta rujntu dojl, luxh dojl che abejntuni, riädnäni yälgujt.

¹⁵Sa'ä ni sanälazä, na'c gusaantu gusgueereni la'tu. ¹⁶Guiraa recoshueen, guiraa recossa'c xhaguibaali siäädreni loonu; Dios ruxhalreni, lagajc Dios ni benchee rebajl xhaguibaa, Dios nani di guchaa, sigajctis najcni. ¹⁸Lagajc xcientni bejn Dios gacnu xpejñni sa'csi huililajznu xtidxiipacni, te gacnu reben galoo loj rexpejnni.

Xho nanab jiennu

¹⁹Acanajtu recosre, sa'ä ni sanälazä. Niluxh tejgatu nanab gusquejnni te gucuadajgni, per gaclaani te guiniini, gaclaazani te guidxe'chni, ²⁰sa'csi xcälrde'ch bejn dini gun xcälnasa'c Dios. ²¹Ni'cni coçüälaz guiraa recosgijdx, guiraa recoslatstaj ni ria'n. Guideb yälnadolajz colchailajz xtidx Dios ni basule'nu, ni yu'pac lastootu, sa'csi ni'c najc ni sajc guslaa xaimtu lo dojl.

²²Niluxh balui lo guira'ti bejn najcni bejn ni rusooxpactu xtidx Dios, xhet bejndi ni rucuadiajgtis xtiidxni, ni rusgueeni lagajc laani. ²³Sa'csi palga najc te bejn te nani rucuadiajgtis xtidx Dios, niluxh dini gusoob diidxga, najcni si'c te bejn ni ruhuii lojni loj te guihuajn. ²⁴Sa'csi che ruhuiini xho najcni, sägajcni, riallazgajcni xho najcni. ²⁵Niluxh nani ruhuidzu'tz lo leisa'c, nala-jznu leii nani ruslaa bejn, luxh rusopacni leiiga, nani lacuua jiallajzni nani riejn diajgni, rujnpacni ni caj lo leiiga, bejngajc najcni sajp yärlbalajzpac lo xhitnis ni rujnni.

²⁶Palga yu' tejtu ni rujn xhigab najcni te bejn ni randuxh Dios, niluxh di gacdi gusäuni ro'ni, guiraloj rniini, bejngajc rusguee lagajc laani, luxh xhet sajci yärlrajn Dios xtemni. ²⁷Yärlrajñ Dios ni najc gulipac, ni xhet nu'chdi lojni najc scree: chahuini rebisiäjb, näjza regunaa ni agujt chäälni che yu' xhi rquiimreni, näjza na'c säbla-jztu guntu nani rujn reben guedxliuj ni di chalilajz xtidx Dios.

¹ Resa'ä, la'tu ahuililajtu xtidx Dad Jescrist ni rajp guiraa yälrdimbicha', ni'c di gacdi guntu xhigab sajcru tej bejn lo sabejnni. ² Palga guidzujn te bejn xquidootu yu' niloor ḥaani, najcwni ladsa'c, dxejcti jiu'za te bejn nani xhet rajpdi, najcwni ladyujxh, ladbeed, ³ dxejcti la'tu jiurutu nani najcw ladsa'cga, naatu: "Ree gurej lo yagxhilsa'cre", dxejcti gäblu lo bejn ni xhet rajpdi: "Rec gusulii o gurej lo yujre", ⁴ ḥla xhet rujnditu xhigab garenca najc tej bejn lo sa'ni, ä? Luxh dxejc acayajctu si'c juejz ni rujn xhigab guijdx.

⁵ Colgucuadiajg, betzä ni sanälazä! Agule Dios bejn nani xhet rajpdi lo quedxliujre te ga'preni yälrlilazduxh, te lo xcälrnibee Dios xca'reni xcälnasa'c ni bia'n diidx gudeed Dios loj renani sanälajzni. ⁶ Niluxh la'tu agulälaztu rebejn nani xhet rajpdi. ḥXixh xhet laadi rebejn ni rajp ni rusacsitu, li rgobxhajxhreni la'tu, rinäreni la'tu loj reguxhtis, ä? ⁷ ḥLa xhet laadi rebejn ni rajp ni rnyaj loj Dios ni sadduxh? La'tu abirilajtu rex'i'n Dios.

⁸ Palga guliiitu cagusoobtu leii xten xrei-inu Dios, si'cni caj lo xquijtz Dios scree: "Colchanälajz sa'tu sigajc rinälajztu lagajc la'tu", laaca rujntu. ⁹ Niluxh palga rinälajzruntu tej cuaa bejn lo stee cuaa bejn, cayujntu dojl, luxh xleii Dios rnii najctu bejn dojl, bejn ni rbälaz leii. ¹⁰ Palga yu' te bejn ni rusooob guiraa ni caj lo xleii Moisés, niluxh runijtni lo tejtis diidx ni caj lo leii, abanijtpacni, najcni si'cni dini nusoob nicla tej diidx lo guideb leiiga. ¹¹ Sa'csi lagajc Dios ni gunii: "Na'c gues-näjlu bejn ni di gac chäällu", lagajc laami guniizani: "Na'c ju'tlu." Palga dilu guesnäj bejn ni di gac chäällu, niluxh rugu'tlu te bejn, abanijtlu xcuent guirallii releii. ¹² La'tu colguinii, colguibajn si'c rebejn ni gun Dios yälgxuhtis con xtiidxnii ni ruslää bejn lo dojl. ¹³ Sa'csi renani di gulaslajz bejn, che gun Dios yälgxuhtisreni, dizani gulaslajz laareni. Sajcru yälrlulaslajz lo yälgxuhtis.

Yälrlilajz näj dzuun ni rujn bejn

¹⁴ Resa'ä, ḥxhi sajc palga gunii te bejn: "Ahuililazä xtidx Dios", niluxh dini gun dzuun ni riäjl gunni, ä? Sa' yälrlilajzre, ḥla suslaanini lo dojl, ä? ¹⁵ Palga yu' te bejtznu o te bisiajnnu ni dini ga'p xhajbni,

luxh xhetiza xhi gauni, xhi yäni, ¹⁶ luxh gäb tejtū lojni: "Sucuedxi lajzlu jiilu, suguidxa' lajzlu, suguidxaj xque'lu", niluxh dini gudeed nani caquiinni, ḥxhi sajc rediidx ni räjpni lojni, ä? ¹⁷ Sigajcza yälrlilajz nani di guquil bejn gunreni xtzuu Dios najc si'c te ni agujt, sa'csi dini guquil bejn gunreni dzuun.

¹⁸ Yu'za reni naa: "Luj rajplu yälrlilajz, narä runä xtzuu Dios; baluui narä xcälrilajzlu xhet näjdi xtzuu Dios, dxejcti narä suluiä xcälrililazä xcient rextzuun Dios ni runä." ¹⁹ La'tu rililajztu yu' tejtis Dios. Laaca rujnlu, niluxh näjza rebendxbab rililajz yu' tejtis Dios, racdijtlireni, rdxebduxhrenini. ²⁰ ḥLa di rlajztu gacbeetu, beñnayääl? ḥLa ditu gan, yälrlilajz ni di guichagnäj xtzuu Dios najc te yälrlilazgut? ²¹ Dios badzucaj xtojlx toxtadgoldoonu Abram sa'csi bejnni si'c gunibee Dios gunni, che badzuubni xingaanni Isa'c lo piäään, nugu'tnini nez lo Dios. ²² Colhuii xho tejsi junt sadxaag xcälrililajz toAbram dzuun ni bejnni, dxejcti sa'csi bejnni nani gunibee Dios gunni, bejn Dios gujc xcälrililajzni sa' yälrlilajz nani rlajz Dios ga'p rexpejnni.

²³ Dxejcti huile' xtidx Dios cadro caj scree: "Abram huililajz ni räjp Dios lojni, ni'cni badzucaj Dios xtojlni, cua' Dios Abram si'c te beñnaya." Birilajzani "xamiigw Dios."

²⁴ Ni'cni ruhuiitu rca' Dios te bejn si'c beñnaya nez lojni xcient xtzuu Dios ni rujnzani, xhet ganaxtis xcient xcälrililajz bejngä. ²⁵ Sigajcza gusajc toRahab, ni gujc te gunadxab. Dios badzucajza xtojlni, bejn Dios xhigab najcni te beñnaya sa'csi bejnni xtzuu Dios che badeedni rolijzni bacua'tzloj tio'p xpejnj Israel ni gujc guixhajg ni sagula'tz guejdxga, dxejc guc-näjnireni te siireni ste'ca nez yuj. ²⁶ Sigajc ni di gacdi guibajn tiejxh bejn palga xheti sprit, sigajcza di gacdi guibajn yälrlilajz palga dini gun dzuun ni rnibee Dios gunni.

yu' te bejn ni di gunijt lo diidx ni rniini, laani najcni te bensa'c, rajcza rnibeeni guideb tiejxhni. ³ Palga rusälnu guuib ni ru' ro' cabaii te chääni cadro rlajznu jiimi, rnibeezanu guideb xtiejxhni. ⁴ Colhuii rebarcwro, mase siolduxhreni, luxh rebeduxh rulanaareni, niluxh capitán ni rusaj barcw lo nisdoo, te guibbäz ni caj xhajn barw neñ nis, con ni'ctis rinänini cadrotis rlajzni. ⁵ Sigajcza najc luudxnu, najcni te labätz tiejxhnu, luxh colhuii lacti didxro rniini. Najcni si'c te balbätz ni rajc ruze'c guiragajc reyajg ni yu' dajn. ⁶ Luxh luudxnu najc si'c te bajl. Rnii luudxnu guiraa redidxdxuudx ni rnii reben guedxliujre nani rdxe'ch lo Dios. Lo guiraa rela' ni najc tiejxhnu, laa luuxdnu ni rundxuudx guideb tiejxhnu. Luudxnu ralguj con xquiboo gabijl. ⁷ Rebejn sajc gusiacdooreni guiraloj guidxaa, guiraa mane', guiraa bäl, guiraa man lo nisdoo, abasiacdoo bejnreni, ⁸ per nicla tej bejn di gacdi gusiacdoo lujdxni. Dini cuedxni, guidxani cosguijdx, najcni si'c te bäl ni rauya'ni rugu'tni te bejn. ⁹ Lagajc luudxnu rliä'pnu xpala'n Dios Xtdadnu, lagajc laani rniyajnu sabejnnu ni benchee Dios sigajc najcni. ¹⁰ Tejsi ro'nu rnile' lo Dios nägajcza rgue lo bejn. Rebetzä, xhet si'cdi nungäjldi gacni! ¹¹ ¹² La rbää bejn nisnejxh näjza nisrop lo tejsi bisie, ä? Betzä, ¹³la caxajsi sajc xcaj aceitun loj te yagiigw, ä? ¹⁴ O la sajc xcaj iigw lo te yaguub, ä? Sigajcza digacdi guirii nisnejxh näjza nisrop lo tejsi bisie.

Yäljnajn ni siääd xhaguibaas

¹³ Chuni'c lo guiraatu yu' xcäriejnni, nanduxhni, ä? Suguluiini xho najcni xcient xcälnabansa'cni, sugunni xtzuunni guideb yälnadolaz ni rudedd xcäriejnni. ¹⁴ Niluxh palga yu' yälrdxe'ch lo sa'lu ni runnanlaa lastoolu, näjza rujnlu guira'ti parsi xcälnasa'c lagajc luj, na'c galu guyalajz, sa'csi ni'c najc si'c ni caniilu didxrusguee xcient xtidxlili Dios. ¹⁵ Sa'csi sa' yäljnare, xhet xhaguibaadi siäädni, alga najcni yäljnajn xten guedxliujre, xten reben guedxliuj, xtenza rebendxab. ¹⁶ Sa'csi cadro yu' yälrdxe'ch lo sa'ni, näj cadro rujn bejn guira'ti parsi xcälnasa'c lagajc laani, ro'c yu' biey, yu' guiraloj latsiaj. ¹⁷ Niluxh yäljnajn ni ruxhal Dios, ganid-doo najcni naya, dxejcti rulecdxini xcäriejn

bejn, dxejc rujnni rajc bejn nadolajz lo sa'reni, rujnzani saru runnäj bejn sa'reni, rulazlajz bejn sa'reni, rujnzareni guiraloj dzunsa'c, runle'pacreni xtiidxreni, direni guinii tej diidx laaga cayujnreni garencda dzuun. ¹⁸ Renani rguil yälrbedxi, yälrbedxi rbe'creni te xca'reni te yälñabanya nez loj Dios si'c xcälnasa'creni.

4

Ni nabannäj guedxliuj

¹ Casiääd rebiejy, reyälrdxe'ch lo sa'ni ni casiajtu? ² La direni jiääd xcient lagajc xhigab ni yu' lastootu, ä? Lagajc rexhigabga rujn biey nen lastootu, rusçäjreni xcäriejntu. ³ La'tu rlajztu ga'ptu nani ditu ga'p, dxejcti rugu'ttu sa'tu. Rsiäblajztu xhixten sa'tu, luxh sa'csi digacdi xca'tuni, dxejc rucuanäjtu sa'tu, rdilnäjtu sa'tu. Ditu ga'p nani rlajztu sa'csi ditu guiniabni loj Dios. ⁴ Rniabtuni, niluxh dini guniidxnini sa'csi xhet laadi najc xhigabtu gunabtuni, alga gunabtuni sa'csi rlajztu gunijttuni si'cni rlajztu. ⁵ Ai! Bejn ni di gandzu' Diostis. ⁶ La ditu gan bejn nani rlajz gun redzuun ni rujn reben guedxliuj, bejnga rdxe'chreni lo Dios, ä? Ni'cni palga yu' chu tejtu ni rlajz chanuu lo ni rajc lo guedxliujre, bejnga rdxe'ch lo Dios. ⁷ O ⁸ la rchalotu xlia'si caj lo xtidx Dios redidxre: "Sprit ni baxhal Dios te cuääzni nen lastoonu, randzu'nii nuurnu sa'csi rlajzni guinibeeni nuurnu"? ⁹ Niluxh runiidxru Dios xcälracnäjni loonu. Ni'cni rnii xtidxnii scree: "Dios rdxechnäj renani runnaro lagajc laareni, niluxh rudeddruni xcälracnäjni lo rebennadolajz." ¹⁰ Coljiu'pac lo xnezyuj Dios. Coljieu'tzpac te di guntu ni rlajz bendxab, te guxuuni lojtu. ¹¹ Colguibigr lo Dios te guibizgani lojtu. Bendojl, colquibl naatu, nalajznu na'cru guntu latsiaj; colgusia lastootu, la'tu ni runtio'p lajztu. ¹² Sugacnaj lajztu, suchuti xliajs, colyonduxh. Colguchaa xcälruxi-jstu, colca' yälhuin, colguchaa xcälrabalajztu, colca' yälroon. ¹³ Colyajc si'c bejn ni xhetliidi sajc nez loj Dad Jesucrist, te laani guiliänsi la'tu gunni la'tu beñro.

Na'c guiniyajtu sa'tu

¹¹ Rebetzä, na'c guiniyajtu resa'tu. Sa'csi renani rniyaj sa'ni o rujnni yälguxhtis sa'ni, reni'c rniyaj xleii Dios, rujnreni yälguxhtis

xleii Dios luxh palga guntu si'c, dirutu gac renani rusooob xtidx Dios, alga najctu juejz xten leii. ¹² Tejtis najc nani runiidx leii loonu, tejtis najc juejz; najcni nani rajc ruslaa bejn lo dojl, nani sajcza gunitloj bejn. La'tu, *¿chuxh* najctu te guntu yälguxhtis lo sa'tu, ä?

Dinu gan xhi gac guixee

¹³ Naj colcuadiajg dee, la'tu ni rniitu, nadxej o guixee chonnu te guejdx nezrec. Ro'c guideednu tebijz te guizinu, guito'nu te jiennu gaan meel. ¹⁴ Luxh nicla gantu xho gac xcälnabajtu guixee. Xcälnabajtu najc si'csi te za nani rienloj terä'tbäz, dxejcti rnitlojni. ¹⁵ Hueenru guiniitu scree: "Palga rlajz Dios sibaannu, te jiennu dee o dec." ¹⁶ Niluxh si'c ni rujntu najc, rajc guyalajtu rniitu didxro; luxh guiraa redidxroga najc dojl. ¹⁷ Ni'cni ni nahn xho riäjil gunni, palga dini gun si'c, rujnni dojl.

5

Rulidxni rebejn ni yu' xhidajl xhixtelli

¹ Colgucuadiajg xtidxä, bejn ni yu' xhidajl xhixtentu. Colyoon, colcuedxa' xcient recasiondukh ni sactu. ² Guiraa rexhixtentu nani rajptu aguxhijñ, luxh rexha-jbta agudajw rebaguidni. ³ Oor näjza pla't xtentu agubibtiejnni, aguxhijñni. Lagajc dee gun gacbee Dios ditu niujn ni rlajz Dios guntu, lagajc ni'c gun chectu, nitlojtu. *¡Xlia'si* batiedajtu xhixtentu nen redxej lultga! ⁴ ¡Colhuii! Ditu niguixa'sc loj reni bejn xtuuntu, ni'cni laareni cayujreni yälquij lo Dios xcienttu. Luxh xhadajgли Dios xten reangl ni yu' xhaguibaa abidzuijn yälquij xtentu ni cabe'c renani batie' xcälnasa'ctu. ⁵ Agubansa'cpactu lo guedxliuje, bejntu lanij si'ctis ni rlajztu, abastio'tu lastootu nen redxej xten yälrugut. ⁶ Gudiiltu xho bagu'ttu rebeensa'c luxh laareni dxi-itis gusujreni, xhet bejndireni te na'c nugu'ttureni.

Colcuääz jiädhixh Diostu

⁷ Resa'ä, dxitis colcuääz guidzujn dxej cheni jiääd Dad Jesucrist. Colhuii xho rujn bejn ni rbe'c binij, dxitis rbäjzni gac xcäjlni lal ni rijb nisguigaloo näjza nisguij ni rijb lult. ⁸ Si'cza la'tu colcuäzdx, colgustioob lastootu sa'csi asiäddzungajxh dxej ni jiääd Dad Jesucrist. ⁹ Resa'ä, na'c chale'ctu xquej

sa'tu, didi gun Dios yälguxhtis la'tu, sa'csi asiäddzungajxh dxej che guidzujn Dios ni najc Juejz. ¹⁰ Rebetzbidä, colhuii xho gudejd reniguii nani bacuaa xtidx Dios trabajw galoo, xho guläjzzareni. ¹¹ Colhuii xho rniinu chicbaa renani guläzdx lo trabajw ni gudejdreni. Abiejn diajzatu xho bejn Job che gudejdni trabajw, anajnzatu xho guzajcni xcient redzunsa'c ni bennäasac Diosni, ni rululiloj xho riaduxh Dios bejn, rapduxhni yälrulaslajz.

¹² Rebetzä, che ria'ntu diidx lo te bejn, gunatiro palga gusä'ttu xhaguibaa, o guedxliu, o xhi steeni. Che naatu: "Mbj", ni'ctisza colguinii. Che naatu: "Na'c", ni'ctisza colguinii te na'c gun Dios yälguxhtis la'tu.

¹³ *¿La yu'* tejtu ni cadejd trabajw, ä? Suguniabi lo Dios. *¿La yu'* chu tejtu ni cabalajz, ä? Sugolni dij te guiliä'pni xpala'n Dios. ¹⁴ *¿La yu'* chu tejtu ni cayacxhuu, ä? Sucueedxni rebengool ni rniabee nen guidoo, te guiniabreni lo Dios xcientni lal ni cagusälzareni se't lo cuajni con ladj Jesucrist. ¹⁵ Luxh palga rililajzpacreni che canabreni, siajc benracxhuuga, siliäs Jesucrist bejnga. Luxh palga bejnni dojl, sibicaj xtojlni. ¹⁶ Ni'cni colguxhobdojl lo sa'tu, colnab lo Dios xcient sa'tu te jiajctu. Che rniabdukh te bejn naya lo Dios, dzunroza rujn Dios. ¹⁷ Eläas, te bejn ni gunii xtidx Dios agujc xchero, gujcza te bejn sigajc najcnu. Gunabdipni loj Dios te na'c jaib nisguij, luxh di nisguij niajb lo guedxliuj chon ijj garol. ¹⁸ Dxejc gunabsacni lo Dios, dxejc bixal xhaguibaa, biabsac nisguij, dxejcru gujc reyälNASA'c xtenreni lo guedxliu.

¹⁹ Rebetzä, palga yu' chu tejtu ni guibicaj lo xtidx Dios, luxh yu' chu gacnäj guibisacni lo xtidx Dios, ²⁰ sugacbee bejn nani racnäj guirii bendojl lo xnezyuguidxni te guibisacni lo Dios, bejnga agucnäjni te gulaa xaimni lo yälgujt, te guibicajza guiraa xtojlni, mase xhidaldukh najc xtojlni.

Guijtz Ganid Nani Bacuaa Pedr

Pedr cacuaa guijtz loj reni rililajz ni nare'ch

¹ Narä Pedr, te apost xten Jesucrist, cacuaä guijtzre loj renani agule Dios gac rexpejmi nani rbäjz si'c benzijt lo reguedx Ponto, Galacia, Capadocia, Asia, näjza Bitinia. ² Xtradnu Dios gule la'tu galooli bencheeni niguui, aguleni la'tu par lagajc laani te gun Sprit Dyan xtenni xtzunni neñ lastootu te gusoobtu xtidx Jesucrist te jia lastootu con xtiejn Jesucrist. Rniabä lo Dios gacnäduxhruni la'tu, guscuecdxi lastootu lo guiraliti.

Te yälnabajn ni cabääznu

³ Colguiliä'p xpala'n Dios ni nadjc Xtrad Jesucrist, Dios nani xcient xcärluraslaz-duxhni bejnni gojpnu te yälnabancoob sa'csi baspanasacni Jesucrist loj rebengut. Sa'csi rajpnu yälnabancoob, ni'c nadippac lajznu. ⁴Ni'cni laani suniidxnite yärlusalajz ni di nitloj, ni di xhin, ni di juuji si'c riuii reballajg. Yärlusalajzga aguluchedzu'tzni xhaguibaa par la'tu, ⁵nani cayapdz'u tz xcälmilaagwr xten Dios sa'csi rililajztu xtidxi, te guluii Dios guira'ti ni rajpni par la'tu, ni arapcheeni te guluiinireni lojtu che luux quedxiujre.

⁶Ni'cni rbalazduxhtu, mase nanab teditu balti trabajw gaie'si dxej lo quedxiujre, ⁷te guzen xho rililajztu. Xcärlilajztu sajcrlo oor nani rnitloj, niluxh xcärlilajztu di nitloj, mase tediñ lo guiboo, ni'cni sinii Dios didksa'c, didxro, siliä'pni xpala'ntu che guibisac Jesucrist lo quedxiujre guideb xcälmilaagwrni, näjza xcärlidimbicha'ni.

⁸Mase gjajdu fii lojni, sanälajztuni. Mase ditu fii lojni naj, ahuililajztu xtiidxni, rbalazduxhtu guideb yärlalajz ni rut rajcdi rusule', sa'n ni yu' xhaguibaatis, ⁹sa'csi xcärlilajztu suslaa xaimtu lo dojl, sica'tu yälnabajn par tejpas.

¹⁰Luxh xcient yärluslaa dojlre, rebejñ nani gunii xtidx Dios agujc xchero, laareni abasulexaareni xcient xcälracnäj Diores nani siääd lojtu. Luxh biseddduxhreni, gun-abdiidxzareni, ¹¹te rlajzreni gacbeereni chu bejñ o gucpac gac nani cagusä't Sprit xten

Crist ni yu' neñ lastooreni che gunixgaani xho nungäj ted Jesucrist trabajw, dxejcru xcasacni yälrnibee. ¹²Baluii Dios lojreni, di rediidxga soob neñ redxej ni nabajnreni, alga par la'tu nadjc rediidxga. Naj agunii rebejñ ni rusule' xtidx Dios rediidxga lojtu. Abasule'reni xtidx Jesucrist sa'csi xhaguibaali baxhal Dios Sprit Dyan xtenni te cuääzni neñ lastooreni. Näjza rexangl Dios ni rbäjz xhaguibaa rlajz gacbeerereni rediidxga.

Xcälnabannayanu nez loj Dios

¹³ Ni'cni, colsanij xcariejntu, colgusudzu'tz lastootu, guideb lastootu colyenloj yärlracnäj xten Dios ni abia'n diidx xca'nu che guibisac Jesucrist lo quedxiuj. ¹⁴Gactu si'c biuux nani rusoo xtidx xtradni. Na'cru xcäjbnu guntu redzunguijdx ni bejntu galoo che gjajdu gumbee Dios. ¹⁵Dios ni gule la'tu nadjc dxan. Sigajcza la'tu, loj guiralii ni rujntu colyajc bendxan. ¹⁶Sa'csi lo xtidx Dios caj scree: "Sajctu bendxan sa'csi narä nacä dxan."

¹⁷ Palga la'tu rniitu "Dad" lo Dios nani tebloj rujn yälguxhtis loj guiraa bejñ xcient dzuuñ ni bejnni, la'tu riäj guidxejtuni guiraa dxej ni nabansijctu lo quedxiujre. ¹⁸Anajntu di Dios nudeed yälnasa'c ni rnitlojdi, si'c oor näjza pla't, te baslaani la'tu lo recostumbr ni cua'tu lo retoxtadgoldootu. Recostumbrga xhet sa'cdireni. Di Dios nudeed oor nicla pla't te baslaani la'tu, ¹⁹badeedni rejn ni sacdush te baslaani la'tu loj xtojltu. Rejn si'c xtiejn te xiil ni naya, xhetpac najcdini, xtiejn lagajc Jesucrist. ²⁰Guliipacni che gjajdi guirixtiej quedxiujre, gule Dios Jesucrist, niluxh najru, neñ redxelult che gjajd quedxiujre nitloj, biädluilojni par xcälnasa'ctu, ²¹la'tu nani rililajz xtidx Dios xcient Jesucrist. Luxh Dios baspanasac Jesucrist loj rebengut, badeedni yälrnibee lojni, ni'cni ahuililajztu xtidx Dios, luxh Diostis cayenlojtu naj.

²² Naj sa'csi abasoobtu xtidxiini, te si'c abasiatu lastootu te gac chanälajztu sa'tu, naj guideb lastootu colchanälajzpac sa'tu.

²³ Sa'csi acua'tu xcälnabancoobtu xcient xtidx Dios ni nadjc par tejpas, et xcientdi xtidx ben quedxiuj ni rnitloj. La'tu najctu si'c cuaan ni rliejn lo bejdz ni siääd xhaguibaa, xhet lo bejdzdi ni rnitloj. ²⁴Galooli gunii Dios scree:

Guiraa reben guedxliuj najc si'c recuaan, guiraa xcālnasa'creni najc si'c reguui ni rcaj lo cuaan,
recuaan rgoł, lirtejbza reguui xtensi,
²⁵ niluxh xtidx xtdas Jesucristnu rsiudzu'tzni tejpas.

Luxh diidxre najc diidx ni basule'reni lojtu.

2

¹Ni'cni colgusaan guiraa redzunguijdx ni yu'lo guedxliuj, na'c gusgueetu sa'tu, na'c guntiop lajztu, na'c chuguij lajztu xhixten sa'tu, na'c guiniyaj sa'tu. ²Si'c riojl rebäznite' le'ch, si'cza colquiil xtidx Dios par spritu. Colgiojl xtidx Dios te gustioobruni la'tu lo yālruslaa lo dojl, ³palga agucbeetu lacti hueen najc xcālracnāj Jesucrist.

Crist najc si'c te guij ni nabajn

⁴Colguibig loj Jesucrist ni najc si'c te guij ni nabajn. Laani suniidx yālnabajn par tejpas loonu. Rebejn badzucaj guijga, niluxh Dios gulenini sa'csi sacdughxni. ⁵Sigajcza tejgatu najctu si'c guij ni nabajn, ni'c colgusaan xca' Dios la'tu, reguibajn, te con la'tu gunchee Dios te yu' cadro cuāáz Sprit xtensi, te gactu rexpixhojz Dios, nani nayapac lastooreni. Ni'cni sa'csi najctu tejtis con Dad Jesucrist sudeedut lo Dios guiraa xcālnasa'ctu con xprit xtentu. Dee najc nani rchaglajz Dios. ⁶Sa'csi galooli gunii Dios scree:

Agule'cā te bejn nen guedx Sión, nalajznu Jerusalén,
ni gac si'c te guisa'c, te guiro ni rsiuj squiinteyuro.

Chutis bejn ni chalilajz xtiidxni, dini jianxtuji.

⁷Lojtu ni ahuililajz xtiidxni najcni si'c te guisacdukh, niluxh loj renani gajd chalilajz xtiidxni, najcni:

Guij ni gulālaz renani cayunchee yu', lagajc guijga gujc guipac ni baliib squiinten yu'ga

⁸näjza:

Te guij ni rliaj ni' bejn, ni ruzälta'reni, laareni riajbreni sa'csi direni gusoob xtidx Dios,
luxh agunibexgaa Dios nitlojreni.

Renani gule Dios

⁹La'tu najctu te cuua bejn ni agule Dios, tejgatu najctu rebixhojz ni najc si'c reii xten Dios. La'tu najctu te bennaya, te bensa'c, rexpejnpacni. Aguleni la'tu te

gusule'tu reyālnasacduhx ni bejn Dios ni gurejdxtu che guyu'tu lo nezyunacajy xten guedxliujre te biu'tu lo nezyuj ni rdimbichasejz xten Dios. ¹⁰La'tu galoo rut na-jcditu, niluxh naj najctu rexpejnpac Dios. Galoo gajd Dios gulaslajztu, luxh naj abalaslajz Dios la'tu.

Colguibajn lo xnezyuj Dios

¹¹Rebetzä ni sanälazä, nabajntu lo guedxliujre si'c benzijt, ni rbäjz te laad, ni'c rnabdukhä lojtu, na'c guntu recosgуйjdx xten guedxliujre, ni rutijl neñ lastoo bejn te cuälazreni xnezyuj Dios. ¹²Colguibansa'c lał ni yu'tu loj rebenzijt ni di gac xpejn Israel te palga guiniyajreni la'tu gäbreni najctu benlatsiaj, che fiireni redzunsa'c ni rujntu, siliä'ppacreni xpala'n Dios che jiädsac Jesucrist te gunni yālguxhtis.

¹³Ni'cni, sa'csi huililajztu xtidx Jesucrist, colgusoob xtidx guiraa reni rnibeetu lo guedxliujre, si'c najc presidente, ¹⁴regubernadoor nani ruxhalni te rujnreni yālguxhtis rebendojl näjza te guiliä'pni xpala'n reben nani laaca rujnreni. ¹⁵Sa'csi Dios rlajz guntu recossa'c te cuecdxitu rextidxnayääl ni rniij reni di rlajz gumbee didxl xcent Jesucrist.

¹⁶Colguibajn si'c bejn ni rut rnibeedi, na'cza guntu latsiaj sa'csi rut rnibeeditu, colguibajn si'c guinibee Dios. ¹⁷Ga'ptu yālnadolajz loj guiraasi bejn. Colchanälajz sa'tu ni rililajz. Colguidxejb Dios, colguiliä'p xpala'n presidente.

Gudejd Jesucrist trabajw te baluiini xho jiennu

¹⁸La'tu ni najc mos, guideb yālnadolajz colgusobdiajg guiraa xtidx rexlamtu, xhet ganaxdi relamsa'c ni najc nadolajz, näjza relam ni najc benguijdx. ¹⁹Sa'csi rchaglajz ruhuii Dios te bejn palga sa'csi rililajz te bejn xtidx Dios rujn bejn huant che rdejdni trabajw luxh xhet bejdini. ²⁰Palga la'tu rujntu latsiaj ni'cni rusacsini la'tu, xhi guntu gaan palga rujntu huant rdejdutu trabajw? Niluxh palga la'tu rdejdutu trabajw sa'csi rujntu redzunsa'c, luxh rujntu huant, ni'c najc laaca nez loj Dios. ²¹Te guntu si'c gurejdx Diostu, sa'csi gudejdza Jesucrist trabajw xcenttu te guluiini xho guntu che chanuutu lo xnezyujni. ²²Laani dini niujn nicla tej dojl, laani dini nusguee

nicla tej bejn con didx-xhii. ²³ Che guniya-jreni lojni, dini nudzu' yälriñiyajga. Čhe cadejdni trabajw, dini nudzu' diidx niluxh bateedni lagajc laani ladzña Dios ni rujn yälguxhtissa'. ²⁴ Gudeed Jesucrist trabajw si'c te bëndolduxh, bacuaarenini lo crujz te ro'c gusacsíduxh tiejxhni xcuent xtojlnu, te na'c gunrunu dojl, te guibansa'cnu lo xnezyuj Dios. Gudilgуйdxreni tiejxhni te basiajcn la'tu. ²⁵ Sa'csi galoo gujctu si'c rexiil ni rut rajpdi, rijreni nezree-nezrec. Niluxh naj agubisactu lo xpaxtoortu näjza nani randzu' xaimtu, Jesucrist.

3

Xho nanab guibanñätu chäältu

¹ Sigajcza la'tu, regunaa ni abachñaa, col-gusoob xtidx chäältu, te mase yu' tejreni ni di chalilajz xtidx Dios, sililajzni xtidx Dios sa'csi fiini xho rujntu mase xhet rniidiilu. ² Sa'csi fiini xho riulu xtiidxnä näjza xho rniilu nadolajz lojni, näjza xho nabannäsa'cluni. ³ Na'c gusucheetu ganax lo jiaatis, si'c najc guichniil yejctu, näjza biaor ni rcaj diajgtu, guejntu, naatu, näjza ladsa'c ni najc sacru. ⁴ Colgusuchenäj lastootu yälnadolajz, yälrbedcxi lajz, näjza yälsanälajz, sa'csi direni nitloj, luxh sacerduxhreni nez loj Dios. ⁵ Galoo si'cza bejn regunaa ni gujc xpejn Dios ni huililajz xtidx Dios, basucheereni lastooren, basoobreni xtidx chäältreni. ⁶ Si'c gujc toSara, basobdajgni xtidx toAbram, guniizani lo toAbram, Dad. Naj najctu si'c laani palga rujntu redzunsa', näjza na'c guidxejbidity.

⁷ Sigajcza la'tu, niguui ni abachñaa, colguibañäsa'c chäältu. Colgapdani sa'csi dini gacnadipl si'c te niguui; nanab guntu si'c sa'csi näjza lojreni badeed Dios yälnabajn par tejpas. Colyejn si'c, te gucuadiajg Dios che cuedx-guiniabtu lojni.

Renani rdejd trabajw che laaca rujnreni

⁸ Dee najc ni caniä loj guiraatu, saru colguibañäj sa'tu. Colgulaslajz sa'tu, colchanälajz sa'tu si'c rinälajz te niguui bejtzni. Gactu bensa'c, bennadolajz. ⁹ Na'c gudzu'tu didxgуйdx che guiniireni didxgуйdx lojtu, na'cza gudzu'tu didxyaj che guiniireni didxyaj lojtu. Alga gunab lo Dios gacnäjnireni, sa'csi ni'cni gule Dios la'tu, te sica'zatu reyälnasa'c ni guniidxni lojtu. ¹⁰ Sa'csi scree caj lo xtidx Dios:

Nani rchaglajz guibajnni, luxh rlajzzani saru tedni redxej lo guedxli-ujre, sugudxoijnni guinii ro'ni didxnaj näjza didx-xhii.

¹¹ Guibicajni loj redzunguijdx, sugunni redzunsa'ctis.

Suquilni yälrbedxi te ni'c chanuuni.

¹² Sa'csi ruhuii Dios rebejn ni rujn dzunsa'c, rucuadiajgzani xtiidxrreni che rniabreni loj-jni.

Niluxh rudzuréni lojni, rbälazzani renani rujn latsiaj.

¹³ ¿Chu laa ni gun latsiaj la'tu, palga la'tu rbaali lajztu rujntu dzunsa'c?

¹⁴ Palga caxäjsi teditr trabajw che guntu redzunsa'c. ¡Chicbaatu! Na'c guntu xhigab, niclaza guidxejbantu xcälruchejbreni.

¹⁵ Colgusaan guinibee Dad Jesucrist neñ lastootu, gususin te gudzu'tu diidx loj reni rniabiidx lojtu xhicens runlojtu guibi' Jesucrist. Guideb yälnadolajz saru gudzu'tu diidx. ¹⁶ Colguibansa'c te cuedxi xcälriejntu te che guiniyajreni la'tu sa'csi nabanya'ctu loj Crist, jianxtujiy reni rniyaj la'tu. ¹⁷ Sa'csi hueenru teditr trabajw che cayuntu te dzunsa'c, palga si'c rlajz Dios, lacuua teditr trabajw sa'csi cayujntu dojl.

¹⁸ Sa'csi sigajcza tejtis gujt Jesucrist xcuent restojlnu. Xhetliidi xtojlni guyu' nez loj Dios, niluxh gudejdni trabajwduxh xcuent rebendojl. Bejnni si'c te gac guibignu lo Dios sa'csi gujt tiejxh Jesucrist, luxh guyusac sprit xtelli lo tiejxhni te gubansacni. ¹⁹ Che gajd xpritni guibisac lo tiejxhni, huij spritni basule'ni diidx loj resprit ni yu' latzguuib. ²⁰ Respritga najc renani di nusoob xtidx Noé che basule'ni xtidx Dios lojreni. Guläjz Dios rebejngä guiraa redxej ni cayujn Noé barcwro agujc xchero. Baslaa Dios xcälnabajn xhujntis bejn, xhet gujcdireni gudejdreni lo nisguiro ni biajb guideb guedxliujre. ²¹ Che robniñsu naj, rusnaalajznu rebejngä; yälröbnisga rululiloj xho ruslaa Diosnu lo dojl. Et sa'csi riäjt beed lo tiejxhnu neñ nisga, alga sa'csi dxejc rniabnu lo Dios guniidxni te xcäriensac, sa'csi sajc xca'nuni xcuent ni gubansac Jesucrist lo rebengut. ²² Che birii Jesucrist loj rebengut, biu'ni xhaguibaa cadro gurejni xladbee Dios te ro'c rnibeeni loj rexangl Dios, näjza loj guiraa resprit

ni rajc rnibee, ni yu' lo guedxliuj näjza xhaguibaa.

4

Colyejn xtzuun Dios

¹ Ni'cni sa'csi agudejd Jesucrist trabajw cuajni lo crujz xcentnu, sigajcza la'tu riäjl guntu xhigab sidejdtu trabajw lo guedxliujre sa'csi nani agudejd trabajw, diruni gun dojl, ² te guideb nabajni lo guedxliuj, guibajni si'c rlajz Dios, diruni guibajn te gunni redzunguijdx xten guedxliujre.

³ Sa'csi bejntu si'ctis ni rlajzta galoo, bejntu si'c rujn rebejn ni di gumbee Dios, bejntu si'cni rlajz tiejxhtu, bejntu latsiaj, guso-jzta, bejntu relaniro, gudedcaj gusoztzu, luxh bejntu cosxtuiduxh bazuxhijbzatu loj rebanäbdxbaz. ⁴ Dxejti rebejn ni rujn recosga naj, rdxelojreni sa'csi dirutu gun ni rlajzreni, ni'c rniyajreni la'tu. ⁵ Niluxh laareni suurenri nez loj Jesucrist ni agojl gun yälguhtis loj guiraa rebejn, rebejn ni nabajn näjza renani agujt, te gusule'reni xcient nani bejnreni. ⁶ Ni'cni basule' Jesucrist xtidx Dios loj reni agujt, te mase che gubajnreni lo guedxliuj gujcreni yälguhtis si'ctis ni rajc bejn, dxejc gujtreni, naj sprit xtenreni sinuu guibajn si'c ni rlajz Dios.

⁷ Asiäddzungajxh dxej che guibisac Jesucrist lo guedxliujre. Ni'cni ganax laaca colyejn xhigab, colgusin xcäriejntu te saru cuedx-guiniabtu lo Dios. ⁸ Niluxh ni maaazru sajc najc yälsanälajz resa'tu sa'csi che rinälajzta resa'tu, riallajzta xtojl sa'tu. ⁹ Saru gurenäj bejn ni rdzuun rolizlu, na'c jiejtyu. ¹⁰ Abaniidx Dios loj tejgatu te dzuuun ni sajc guntu. Dzuunga colyacnäj resa'tu, te si'c guluiitu lo resa'tu laaca cayunsa'ctu guira'ti nani baniidx Dios lojtu. ¹¹ Palga tejtu najc xtzuunni guluiini xtidx Dios, suguiniini ascanu najcni xtidxpac Dios. Palga tejtu najc xtzuunni gacnäjni sa'ni, sugunnini, guideb yälnadip yälnadaan ni rudeed Dios lojni, te guira'tis ni rajc sujn guiliä'p xpala'n Dioxs xcient Jesucrist. Sa'csi laatisni riäjl chä'p xpala'nni, laatisni riäjl guinibeeni tejpas. Sugacni si'c.

Xho nanab tednu trabajw

¹² Rebetzä ni sanälazä, na'c guidxelotu sa'csi cadejdtu trabajw ni najc si'c guiboo, ni siääd te gactu preeb. Na'c guntu xhigab

xhichani'c casiajctu. ¹³ Colguibalajz sa'csi sigajcza ni cadejdtu trabajw sa'ni gudejd Jesucrist, sigajcza sibalajzta che guiluiloj xcälrdbimbiha' Jesucrist. ¹⁴ Palga rniyajreni la'tu sa'csi rillajzta xtidx Jesucrist, chicbaa la'tu, sa'csi rbäjz Xprit Dxan xten Dios guideb xcälrdbimbiha'ni nen lastootu. ¹⁵ Gunatiro, andi gusaantu ted tejtu trabajw sa'csi bagu'ttu bejn, o sa'csi gulajntu xhi xten bejn, o sa'csi bejntu latsiaj, o sa'csi huichu'nii lo xcient sa'ni ni xhet nungäjldi gacbeeni. ¹⁶ Palga yu' chu tej tedni trabajw sa'csi rillajzni xtidx Jesucrist, na'c gutiujyni, alga suguiliä'pni xpala'n Dioxs xcient Jesucrist.

¹⁷ Abiduzjn dxej che ganid rexpejn Dios ted trabajw. Luxh palga ganid nuurnu gacnu yälguhtis luxh ahuililaaznu xtidxn, jxchocha gun rebejn nani di chalilajz xtidx Dios xcient Jesucrist! ¹⁸ Lo xtidx Dios caj scree:

Lacti naganlajz rliaa rebennaya lo dojl, jxchocha gunäjni rebejn nani di chalilajz xtidx Dios näjza rebendojl?

¹⁹ Ni'cni, guiraatu nani cadejd trabajw xcient xtidx Dios si'cni rlajz Dios, colgudeed xprittu lo Dios ni di gusguee, ni bencheetu, te chanuutis guntu ni riäjl guntu.

5

Yärlulijdx loj renani ahuililajz xtidx Dios

¹ Narä nacä te bengool, bahuiä trabajw ni gudejd Jesucrist, bahuiäza xcälrdbimbiha' Jesucrist ni guniidxn loonu che guibisaci lo guedxliujre. Ni'cni rulidväla'tu ni najc rebengool, ² colgajp renani rillajz xtidx Dios nani rajptu fiipactu xhi rujnreni. Colga'preni si'c te bejn ni rajp xii, colyejnni guideb yejc, guideb lajzta. Colyejn si'c sa'csi si'c rlajz Dios guntu, na'c gunloju mee. Colguibalajz cayajptu rexpejn Dios. ³ Na'c guinibeetu lojreni si'c rnibee te lam loj reni rujn xtzuunni, colguluiireni xho gunreni con xcälnabänsa'clu. ⁴ Che guibisac Jesucrist, ni rajp nuure, laani suniidxn xcientnu, te yälnasacduxh nani dipac nitloj.

⁵ Sigajcza la'tu ni najc bi'n, colgusob-diajg xtidx rebengool. Guiraatu coljiu xtidx sa'tu, colguluii sa'tu guideb nadolajz. Sa'csi:

Dios rbälaz rebejn ni runnaro lagajc laarenii,
niluxh racnäjni rebejn ni najc nadolajz.

⁶ Ni'cni guideb yälñadolajz coljiu lo Dios
sa'csi rajpni yälrnibeduxh, te guiliä'pni
xpala'ntu che gal dxej ni guibisacni.
⁷ Colgudeed guiraa reyärsia' ni yu' lastootu
lo Jesucrist te guscuedxini xcäriejntu
sa'csi laani sanälajzni la'tu.

⁸ Colgusanij xcäriejntu, colsusin sa'csi
rdxe'ch bendxab lojtu, cansaxhiga'tzni si'c
te beedz nialajz, caguiilni chu guxhinni.

⁹ Colsudzu'tz nez lojni, guideb lastootu
colchalilajz xtidz Dios, sa'csi anajntu siga-
jcza cayunnäjni guiraa rebetznu ni nabajn
lo guedxliujre. ¹⁰ Che agudejdtu tra-
bajw tiop-choñ dxej, Dios nani rajp guiraa
yälracnäj, nani gurejdx la'tu te näjza la'tu
xca'tu xcalrdimbicha'ni xcient lagajc Je-
sucrist, lagajc laani sunsa'cni la'tu, bejñ
ni rsiudzu'tz lo xtiidxni, bejñ ni nadip
lajzni, bejñ ni di guidxejb. ¹¹ Laani ra-
jpni yälrnibeduxh par tejpas, guiliä'pnu
xpala'nni par tejpas. Sugacni si'c.

¹² Siädnä Silvan guijtzre lojtu. Runä
xhigab najcni te bejñ nani huililazsa'c xtidz
Dios. Abacuaä bale'si diidxre lojtu te
gulidzxä la'tu, te guiniliä lojtu dee najc
xcälracnäjpac Dios. Colsudzu'tz xcient
yälracnäjre.

¹³ Rexpejn Dios ni re' lo guedx Babilonia
ruxhal xtixtios lojtu sa'csi gule Dios la'tu
sigajc guleni laarenii. Marcw, ni najc si'c
xi'nä, ruxhalza xtixtios lojtu. ¹⁴ Colguinii
"xchan" lo tejga sa'tu ro'c.

Rniabä lo Dios guscuedxini lastoo
guiraatu ni rililajz xtidz Crist.

Guijtz Ni Rojp Ni Bacuaa Pedr

Pedr rucuaa te guijtz loj reni ahuililajz

¹ Narä naçä Simón Pedr, ni rujn xtzun Jesucrist, te apost xtensi. Rucuaä guijtzre lojtu nani rililajz xtidx Dios sigajc ni rililajznu, sa'csi bahui Dios loonu si'c bennaya xcient Xtiosnu Jesucrist nani baslaa nuurnu lo dojl. ² Rniabä lo Dios gacnäduxhruni la'tu, guscuecdixruni lastootu, te gacbeerutu xtidx Dios näjza Dad Jesucrist.

Xho riäjł gac rexpejn Crist

³ Sa'csi xcälrnibee Dios baniidx guira'ti ni rquiinnu te guibansa'cnu, te gacnu bennaya nez lojni, xcient rililajzpac xtiidxni ni nansa'cnu xcient Jesucrist nani gurejdx nuure, nani gule nuure te xca'zanu xcälrdimbicha'ni, näjza guiraa xcälñansa'cni. ⁴ Lagajc xcient redee baniidxni rextidxliini, rextidxsacduxhni. Palga chalilajznu xtiidxni, sajcnu xpejnni, sajcnu bensa'c si'c najcni sa'csi abiriinu loj redzunguijdx ni chaglajz rujn rebejñ ni ruxhñi guedxliujre. ⁵ Ni'cni nanab gacbeenu xho nabanu lo guedxliujre. Siroobru xcälrlilajztu sacnäjni la'tu te guibansa'cnu lo Dios; luxh sa'csi nabanşa'ctu, siroobru xcälñajntu xcient dzunsa'c näjza dzunguijdx. ⁶ Luxh palga guroob xcälñajntu xcient dzunsa'c näjza dzunguijdx sajc guinibeetu tiejxhtu te na'c guntu dzunguijdx. Che guinibeetu tiejxhtu, sibedxi lajztu. Che arajptu yälrbexdilajz, sajctu bensa'c, bëndxan. ⁷ Che anajctu bensa'c, bëndxan, sinälajztu resa'tu; che asanälajztu sa'tu, arajptu yälsanälajz sa'tu xten Jesucrist.

⁸ Palga la'tu rusooftu guiraa rediidxre, luxh chanuitus caroobreni nen lastootu, ditu guibañxlia'; sujnpactu xtzun Dios, luxh rediidxre sacnäjrtu gumbeetu Dad Jesucrist. ⁹ Sa'csi renani di ga'p rediidxre, najcni si'c te lotiä'p ni di fii, o te ni di gacdi fii zift, ni'cni abiällajzni xho basia Dios rextoljñi nani bejnni galoo. ¹⁰ Ni'cni rniä lojtu rebetzä, colsejs, colguisieed xtidx Dios te gacbeepactu, gululojzatu lo bejn xho gurejdx, xho gule Dios la'tu, sa'csi la'l ni chanuu gucuadajgtu rediidxga, dipactu gunijt lo

Dios. ¹¹ Palga guibajntu si'c lo guedxliujre, siu'pactu xhaguibaa cadro rnibee Dad Jesucrist par tejpas.

¹² Ni'cni anasuga'ä te gusnaä lajztu xcient rediidxre, mase anajtureni, mase risutu'tzu yälrlilajz xten didlxii ni yu' neq lastootu. ¹³ Narä runä xhigab laaca runä che rusnaä lajztu, te gusnibä la'tu, te gusnaä lajztu. Si'cza gunä guideb ni nabanä lo guedxliujre. ¹⁴ Ananä asiäddzungajxh dxej ni xca' Dios narä, sa'csi abalui Dad Jesucrist ni'c loä. ¹⁵ Ni'cni cayunduxhä dzuun nja, te che guiquinni sinaj lajztu xtidxä che agu'tä.

Renani bahui loj yälñasa'c xten Crist

¹⁶ Che basule'nu lojtu xcälrnibee näj xcälrdimbicha' Dad Jesucrist, xcient ni guibisacpacni, dinu niniitismi, dizanu nusghee la'tu, sa'csi abahuiloonu xcälrdimbicha'ni. ¹⁷ Sa'csi che badeed Dios xtradnu yälrnibee, yälrdimbicha' lojni, dxejc biejn diajgnu gunii Dios, birii xse'ni neq te za ni gurej xhaguibaa, rájpni: "Dee najc xi'nä ni sanälazä, rbanälazduxhäni." ¹⁸ Lagajc nuure biejn diajgnu xse' Dios che guniini xhaguibaali che guyunäjnu Jesucrist lo dajn ni najc dxan.

¹⁹ Ni'cni naj guliru rediidx ni gunii reprofe't. Ni'cni sujntu laaca palga gusob-diajglu rediidxga, sa'csi najcreni si'c te bajl ni rusanij te lajt ni nacäjy, susanijreni xcäriejntu dxejli ni jiääd bajl xhaguibaa. Dxejc lagajc laani susanij lastoonu. ²⁰ Niluxh ganiddoo nanab gacbeetu dee: nicla tej bejñ sajc guinii laatisni sajc guinii xhi sälöj xtidx Dios, ²¹ sa'csi nicla tej diidx ni bacuaa reprofe't dini gac diidx ni biajbts yejcreni. Guiralireni bacuaareni ganaxtis diidx ni badeed Xprit Dxan Dios lojreni gucuuareni.

2

Rebejñ nani rusguee

(Judas 4-13)

¹ Niluxh galoo biricajza te cuua bejñ ni basguee rexpejn Israel, sigajcni siääd stee cuua bejñ ni susguee la'tu. Laareni guluixhiga'tzreni didx-xhii nani rujn rusiejxh lajz bejn xcälrlilajzreni, sibälazreni lagajc Dad Jesucrist nani gudijx xcient xtoljreni. Niluxh renani rusguee, siojb nitljreni par tejpas. ² Xhidajlza bejn sinajlreni lo xcälñabanguijdxreni, dxejcti ni'c gun

siniyaj xhidajl bejn xnezyuj xtidxlí Dios.
³ Sa'csi ruguilajzreni xmeeltu, xhixtentu, ni'l c siädgusgueereni la'tu te xca'reni xhixtentu. Niluxh xcälguxhtisreni nani gun Dios, näja xcälrnitlojreni cabägzajcreni agujc xchero.

⁴ Najcni si'c sa'csi di Dios niällajz rextojl rexanglni nani bejn dojl, niluxh baxhalnireni gabijl, basäunireni neñ reguednacäjy cadro cabäjzreni dxej ni gun Dios xcälguxhtisni. ⁵ Sigajcza rebejn ni guyu' galoo, banitloj Diosreni, baslaa Dios xcälnabajn Noétiis näja sgajdzreni, sa'csi basule' Noé xtidx gului Dios. Luxh baxhaljni nis-guiro te biädnitlojni guiraa rebejn nani di nucuadajg xtidx Dios. ⁶ Bejn Dios yälguxhtis xten guedx Sodoma näja guedx Gomorra, base'cni reguejdxga, gujcreni cob-däj. Si'c bejn Dios te gacbee bejn xho runnäj Dios rebejn ni di gusoob xtidx Dios. ⁷ Gulää Dios Lo't ni gujc te bensa'c lo reguejdxga, sa'csi guc-huin lajzni xcuent relatsiaj ni bejn rebendojlg. ⁸ Guideb ni guläjs Lo't, te bensa'c, lo guejdxga, dxej, yääl guc-huin lastooni xcuent nani bahuiini, nani biejn diajgni, xcuentza latsiaj ni bejnreni, sa'csi bensa'cni. ⁹ Anajn Dios xho rac-näjni rebeensa'c te rbäänireni lo retrabajw ni cadejdreni, anajnza Dios xho gusacsíni rebendojl cheni guidzujüli dxej ni gunni xcälguxhtisreni.

¹⁰ Guliduxhni, sujnru Dios yälguxhtis loj rebejn nani rlajz gun si'ctisni rlajz tiejxhreni, näja renani rbälaz xcälrnibee Dios. Najcreni bejn ni di guidxejb, rujnreni ni riajbis yejcreni, direni guidxejb guiniyahreni rexangl Dios ni rdimbicha'. ¹¹ Niluxh nicla tej rexangl Dios ni rajpru yälrnibee lo rebejnre, direni guiniyah, cue'creni xque-jreni lo Dios.

¹² Luxh, rebejngä najc si'c reguidxaa nani xheti xcäriejnreni, cabäjztsreni chu guiniaazreni te guetreni. Rniyajreni luxh direni gan xhini'c rniireni. Niluxh sigajc rnitloj reguidxaa, sigajcza sinitlojreni. ¹³ Bejnreni dojl, ni'c sinitlojreni, sidejdreni yälrusacsiduxh xcuent rextojlreni. Laareni rchaglajzreni guntisreni laniro rdxee. Laareni najcreni si'c te cosdxuudx o si'c te manch ni rcaj lo te ladnol, rbaali lajzreni rusgueereni la'tu la'l ni cayajc lanij cayaunäjreni la'tu.

¹⁴ Digacdi fiireni loj te gunaa, li rsia' lajzreni, direni guidxajg rujnreni dojl, rusgueereni rebejn te gunzareni dojl, ruluiireni lastooreni te säblajzreni meel, najcreni bejn nani batzubde Dios, ¹⁵ agulälazreni nezyusa'c, abanijtreni, naj sanajlreni xnezyuj Balaam, xi'n Beor, nani huichaglajzru nani rquijx yällatsiaj. ¹⁶ Niluxh gudilnäj Diosni xcuent xtojlni, bejn Dios gunii te mandip si'c xse' bejn, te bascuäzni profe'tga, dini nusaan niujnni nani cayujnni, cayujnni si'c te bejn ni rajc yejcnii.

¹⁷ Reben latsiajre najc si'c te bisie cadro xheti nis, najczareni si'c rexräjy ni sanä bej nezree nezrec che cabi' te bero. Laareni su'reni lo xcäjy par tejpas che gun Dios yälguxhtis. ¹⁸ Sa'csi rniduxhreni didxro, niluxh xhet sajcdi rediidxga luxh rni-ireni huenduxh najc gun bejn ni rlajztis tiejxhreni, con yällatsiaj rusgueereni rebejn nani entis birii loj reni rujn sa' dzunguijdxga. ¹⁹ Rusgueereni, rniireni rut gudxojndini palga jiädnajlhiren, niluxh lagajc laareni najcreni mos, sa'csi rnibee latsiajreni. Xhitis ni rnibee te bejn, ni'c rusäuni neñ latzguib. ²⁰ Sa'csi palga agubicaj te bejn loj redzunguijdx xten guedliuj sa'csi huililajzreni xtidx Dad Jesucrist nani ruslaa rebejn lo guiraa dojl, dxejctiru gubisacni loj xtojlni, abixhidsacreni lo xtojlni, nalajz najcreni si'c che gajdreni gumbee xtidx Dios. ²¹ Huenru direni niembee xnezyuj Dios, quela che abiembeereri nezyujga, cuälazreni didx dxan, xtidx Dios ni basule'reni lojreni. ²² Dxejcsii rsiojb diidx ni najc scree: "Rbisac te bä'cw loj xcälrdu-jbni. Cuch ni entis gojz richusacni lo xpa-jnni."

3

Xho gac che guibisac Jesucrist

¹ Rebetzä, dee najc ni rojp guijtz ni cagux-halä lojtu; lo guiro'p guijtzre cagusnibä la'tu xcuent reyärlulijdx ni gusnaj lajztu. ² Colgusnaj lajztu rediidx ni gunii reprofe't agujc xchero, näja rediidx ni gunii Dad Jesucrist nani basule' reapost.

³ Ganiddoo, colgacbee dee: che asiäddzungajxh redxelult, siääd rebejn ni rgubee rextidx Dios, laareni sujnreni si'ctis ni rlajz tiejxhreni. ⁴ Siniabdiidxreni: "Xhicuent

gajd Jesucrist guibisac si'cni bia'n diidx? Cheni gujtlı rextadgoldoonu, guira'ti sanuutis najcni si'c gujcni cheni guc-cheeli quedxliujre." ⁵ Niluxh che rniireni si'c, rlajzpac jiällajzreni agujc xchero benchee Dios xhaguibaa xcuent xtiidxtisni, näjza guniitis Dios te si'c guc-chee quedxliuj, biriini neñ nis, naj tre'ni loj nisga. ⁶Dxejcti gunitloj guira'ti ni yu' lo quedxliujga che biajb te nisguiro, gunitlojni. ⁷ Niluxh xhaguibaa näjza quedxliuj ni tre' naj, cayajp Diosreni xcuent xtiidxn te checreni che guidzujn dxej ni gunni yälguhtis, che gunitlojni rebendoj.

⁸ Rebetzä, na'c jiällajztu, Jesucrist ruhui tebdxej si'c te tzugayuu ijz, rhuiizani te tzugayuu ijz si'c tebdxej. ⁹ Di gaclaa gusoob Dios diidx ni bia'n, si'c rujn bejn xhigab raclaani, niluxh cabecdxiru lajzni xcuent la'tu, sa'csi cabäjzni gusiejch lajztu, sa'csi di rlajzni nitloj nicla teju.

¹⁰ Niluxh sidzujn dxej che guibisac Jesucrist lo quedxliujre si'c rdzujn te guabaan, rut gacbeedi siäädni. Dxejcti sibicaj xhaguibaa, gac te bieiduxh, guira'ti sialni lo te guiboduxh, quedxliujre näjza guira'ti ni tre' lojni, guiragajcni sejcn.

¹¹ Sa'csi sinitloj guiraa redee, ni'c nanab guibañnatyu lo quedxliujre, na'c guntu dojl. ¹² Colcuäjz dxejis ni jiääd Dios lo quedxliuj. Dxejc sejc xhaguibaa, sinitlojni, luxh guiralii ni yu' sialni lo guiboro.

¹³ Niluxh abasa'n Dios diidx loonu, ni'cni cayenloonu te guibacoob, te quedxliucoob, cadre gunreni ganaxtis dzunsa'c, xhetiru dojl.

¹⁴ Ni'cni rebetzä ni sanälazä, sa'csi cabääznu guiraa ni gac, colyejn huant te che guibisac Dios, sidxälni la'tu dxitis nabajntu, nabannayatu, xhetiru xtojltu.

¹⁵ Colhuui xhi dzuun bejn Dad Jesucrist ni'c rajpnu yälruslaa lo dojl. Sigajcza bacuaa bejtnu Pabl ni sanälajznu. Bacuaani sa'csi badeed Dios yälñajin lojni. ¹⁶ Neñ guiraa rexquijtzni bacuaani xcuent rediidxre. Yu' gaii guijtz ni bacuaani ni najc naganduxh. Luxh bejn ni guxii racbee, ni runtio'p lajzreni, reni'c ruxhiid rextiidxni, sigajc runnäjreni guiraa xtidx Dios, ni'cni sinitoljreni.

¹⁷ Ni'cni rebetzä ni sanälazä, sa'csi ananxgaatu rediidxre, colnatiru didi

jiajbtu ladznaa renani gusgueetu, te na'c gunijttu xcälrsiudzu'tztu lo xtidx Dios.

¹⁸ Colgustioob xcäriejntu con yälracnäj näjza yälñajn xten Dad Jesucrist nani ruslaa nuure lo dojl. Sugiliä'pnu xpala'n Dad Jesucrist, naj näjza par tejpas. Sugacni si'c.

Guijtz Ganid Ni Bacuaa Juan

Xtidx Dios ni runiidx yälnabajn par tejpas loonu

¹ Galooli che gajd Dios gun guedxliuj, agac nabajn Jesucrist. Niluxh narä bahuiä loj Jesucrist, biejn diagä rediidx ni guniini loä, gunazä naani. Laani nadj Diidx ni runiidx yälnabajn par tejpas loonu. ² Baluilojni loonu; reapost bahuiiu lojni. Ni'cni rniä lojtu, nabajn Jesucrist par tejpas. Rniliäpac nabannäj Jesucrist Dios. Baluui Dios Jesucrist loonu. ³ Caniä stehuält lojtu, bahuiiu lojni. Biejn diajgnu rediidx ni guniini loonu. Xhigab xtenu najc tejtis con Dios, näja Jesucrist Xi'n Dios. Ni'cni cagusule'ä rediidxga lojtu, te tejtis xhigab jiennäänu resa'nu. ⁴ Cagucuaä rediidxre lojtu te guibalazduxhtu.

Dios nadj Bajl

⁵ Naj cagusule'ä rediidx nani baluui Jesucrist loonu. Dios nadj bajl. Guiraa redzuun ni rujnni, ganax dzunsa'cni. Xhet yälnacäjydi yu' lo Dios. ⁶ Palga chutis tejnu naa, tejtis najc xhigabnu con Dios, niluxh riennu redzunguijdx, rniinu didx-xhii, runijtnu dinu chasanäj xtidx Dios. ⁷ Palga nabajnnu lo bianij si'cni nabajn Dios lo bianij, tejtis xhigab riennu con resa'nu. Dxejc rusiaza xtiejin Jesucrist Xi'n Dios lastootu che riennu dojl.

⁸ Palga naanu xheti xtojlnu, rugueenu lagajc nuunu, luxh dinu ga'p xtidx Dios nen lastoonu. ⁹ Palga guicäjpnu lo Dios guiraa redojl ni cayennu, siällajzni xtojlnu, sudzucajni rextojlnu, sa'csi laaca rujnni luxh gulii najc rextiidxni. ¹⁰ Palga guinuunu dinu niujn dojl, rniinu nadj Dios si'c te bejn ni rnii didx-xhii sa'csi anaj Dios yu' xtojlnu, luxh dizanu ga'p xtidx Dios nen lastoonu.

2

Racnäj Jesucrist nuunu nez loj Dios

¹ Guejbtu, resa'ä nani huililajz xtidx Dios, cagucuaä rediidxre lojtu lo guijtz te na'c guntu dojl. Niluxh palga jiennu dojl, racnäj Jesucrist nuunu, rniini xcuentnu lo Dios, sa'csi xheti xtojlni. ² Guit Jesucrist xcuentnu lo crujz. Gudijxni rextojlnu lo

crujz. Luxh et rextojltisnu gudijxni. Gudijxni rextojl guiraa rebejn ni re' lo guideb guedxliuj.

³ Palga rusoobnu rextidx Dios, huenlii rluui riembeenu Dios. ⁴ Cheni rnii te bejn, "narä rumbeäni", niluxh dini gusoob rextiidxni, rugueeni resabejnni. Di lajzni nilii xtidx Dios. ⁵ Palga rusoobnu xtidx Dios, guliipac rinälazaaznu Dios, ni'c najnnu nabannäjnuni. ⁶ Cheni rniinu nabannäjnuni Jesucrist, nanabpac guibansa'cnu si'c guibajn Jesucrist lo guedxliuj.

Redidxcoob

⁷ Guejbtu resa'ä, xhet didxcoobdi ni cagucuaä lojtu. Cagucuaä lagajc diidx ni na-jntu galooli che huililajzitu rextidx Dios, nalajznu rediidx nani biejn diajgtu galooli. ⁸ Niluxh najcza rediidxre didxcoob loonu, sa'csi che huililajznu rextiidxni gusloj dirunu guibajn lo yälnacäjy. Baluui Jesucrist redidxcoobga loonu. Guliipac najc Dios si'c bajl. Dini guibajn lo nacäjy.

⁹ Palga chutis tejnu rnii, "nabanä lo niani xten Dios", niluxh rdxe'chni lo resa'ni, lo yälnacäjy yu'ni. ¹⁰ Chutis tejnu ni rinälajz sa'ni, nabajnni lo bianij xten Dios, rujnni dzunsa'c, dizani guichaglajz gunni dojl. ¹¹ Niluxh palga rdxe'chnu lo resa'nu, nabajnni lo yälnacäjy sa'csi riennu dojl, sasaanu lo yälnacäjy. Nicla gacbeenu canejz chonnu, sa'csi ruscajy bendxbalajnu.

¹² Cagucuaä rediidxre lo guejbtu, resa'ä ni rililajz, sa'csi abadzucaj Dios rextojlnu, sa'csi lo crujz gudijx Jesucrist rextojlnu.

¹³ Cagucuaä rediidxre lo guejbtu, redad bengool, sa'csi huililajzitu rextidx Jesucrist, na-jntu laani nabajnni galooli näja par tejpas. Cagucuaä rediidxre lojtu, rebi'n sa'csi dirutu jiu xtidx bendxbab.

Cagucuaä rediidxre lojtu rex'i nä, sa'csi rumbeetu Dios. ¹⁴ Abaculaä rediidxre lo guejbtu, redad bengool, sa'csi numbeetu Jesucrist nani nabajn galooli näja par tejpas. Abaculaä rediidxre lojtu rebi'n, sa'csi sudzu'tzutu, sa'csi yuchee xtidx Dios nen lastootu, dirutu jiu xtidx bendxbab.

¹⁵ Na'c guichaglajzitu guntu renani rujn rebejn nani di chalilajz xtidx Jesucrist; na'cza chanälaztejtu xhixtentu ni rajptu lo guedxliuj. Palga rinälaztejnu rexhix-tentu ni ra'pnu lo guedxliuj, dxejc dinu

chanälajz Dios. ¹⁶ Reben guedxliuj ni di chalilajz xtidx Dios rchaglajzreni rujn-reni redzunguijdxre: rujnreni dzunguijdx nani rchaglajz tiejxhreni; rujnreni dzunguijdx nani rchaglajz balojreni, näjza lagajc laareni rliä'preni xpala'nreni. Niluxh guiraa reni'c najc dzun guedxliuj, xhet dzundi ni gunibee Dios gac. ¹⁷ Luxh rmitlojpac guedxliuj. Sinitlojza guiraa reni rchaglajz rujn reben guedxliuj ni di chalilajz xtidx Dios. Niluxh palga gusoobtisnu xtidx Xtadnu Dios, sibaññänjnuni par tejpas.

Didx gulii näjza didx-xhii

¹⁸ Guejbtu resa'ä ni rililajz xtidx Dios, asiäddzungajxh dxej che guluiloj niguii nani rdxe'ch loj Jesucrist. Abiejn diajgtu siääd niguiiga. Naj yu' xhidajl reniguii nani rdxechlajz lo Crist. Ni'c alaracbeenu asiäddzungajxh dxejga che guluiloj niguiiga. ¹⁹ Yu' xhidajl rebejn ni rdxechlajz lo Jesucrist. Biriireni lo resa'nu. Direnii nililajz xtidx Jesucrist. Palga nililajzreni xtidx Jesucrist si'c huililaaznu nuure xtidx Jesucrist, direni nirii lo resa'nu. Biriireni lo resa'nu, ni'c racbeenu direni gac xpejin Jesucrist.

²⁰ Gule Dios Jesucrist. Jesucristre baniidx Sprit Dxan xten Dios loonu te gacbeenu xhini'c najc redidxliap. ²¹ Et sa'csi ditu gan xhi diidx najc didx gulii bacuaä rediidxga lojtu. Sa'csi najntu xhi diidx najc didx gulipac, ni'c bacuaäni, te gutiip lajztu. Palga rucuaä rediidx ni najc gulii, anajntu dina gusgueä la'tu.

²² Chutis ni naa di Jesús gac Crist Xi'n Dios, xhet guliidi rextiidxni. Renani rnii di Jesucrist gac Xi'n Dios rdxechlajzni lo Jesucrist. Di reni'c nililajz xtidx Dios. ²³ Chutis reni rnii di Jesucrist gac Xi'n Dios, di reni'c gumbee xtadnu Dios. Niluxh renani rnii Jesucrist najc Xi'n Dios, huililajzreni xtidx Dios, numbeezareni Dios.

²⁴ Colguisoo rediidx ni biejn diajgtu galooli che huililajztu rextidx Dios. Palga rusooftu rediidxga, nabannäjtu Dios näj xi'nni Jesucrist. ²⁵ Abia'n Jesucrist diidx gumiidxni yälnabancoop loonu. Naj ara'pnui yälnabajnre, ra'pnuni par tejpas.

²⁶ Abacuaä rediidxre lojtu xcuent rebejn ni rlajz chalilajztu rediidx ni xhet guliidi. ²⁷ Baxhal Jesucrist Sprit Dxan xten Dios loonu. Rbäjzni neñ lastoonu. Dinu

guiquiin chu stee bejn guluii loonu xhi diidx najc gulii, sa'csi lagajc Sprit Dxan xten Dios ruluii xtiidxni loonu. Naj ruluiini la'tu guiraa ni najc gulii, dini gusguee la'tu. Colguibañnjäj Jesucrist; colguisoo xtidx Jesucrist si'cni ruluii Sprit Dxan xten Dios lojtu.

²⁸ Naj guejbtu resa'ä, colguibannäj Jesucrist, te che jiädsacni lo guedxliuj sisutzu'tznu nejz lojni, dinu guitujy nejz lojni.

²⁹ Anajntu laaca najc Dios. Anajntu renani rusooftu xtidx Dios sasanäjreni Dios, ni'c najcreni xi'n Dios.

3

Rexi'n Dios

¹ Bahuii xho huinalazduxh Dios nuure, ni'c anaj Dios nuure najcnu rexii'nni. Luxh gulii najcnu rexii'nni. Reben guedxliuj ni di chalilajz xtidx Dios, direni gumbee nuure, rexii'nni Dios, sa'csi dizareni gumbee Dios ni najc xtadnu. ² Resa'ä ni rinälaazä, nuunu riolilaaznu rextidx Dios, ni'cni najcnu rexii'nni Dios. Dinu gacbee xho gacnu niluxh che guibisac Jesucrist loonu, suhui-inu lojni si'c ni najcnu, sa'csi suchaani nuure te gacnu si'c ni najcnu laani. ³ Che rnaj laaznu sidzujn dxej gac tejganu si'c ni najc Jesucrist, dxej c rbansa'cnu si'c ni gubajn Jesucrist lo guedxliuj.

⁴ Di rebejn ni rujn dojl gusoob leii xten Dios. Che riennu dojl, runijtnu lo leii xten Dios. ⁵ Racbeenu Jesucrist biääd lo guedxliuj, gujci niguii te gujc badzucajni rextojlnu. Laani dini niujn dojl. ⁶ Che sasanäjnu Jesucrist, dinu gac benguijdx. Di bejn nani rujn dojl chalilajz xtidx Jesucrist, dizani gumbeeni. ⁷ Resa'ä, na'c chalilajztu didx-xhii ni rnii bejn lojtu, che rnireni cayujntu dojl. Rebejn ni rujn laaca, najczareni si'c najc Jesucrist. ⁸ Rebejn nani rujn dojl najc xi'n bendxbab. Galodooli rujn bendxbab dojl. Ni'cni biääd Jesucrist Xi'n Dios lo guedxliuj te gudzucajni redojl nani rujn bejn xcuent bendxbab.

⁹ Rebejn nani najc xi'n Dios direni guichaglajz gunreni dojl, sa'csi abachaa Dios xcäriejnreni, sa'csi rbäjz Dios nen lastooreni. Direnii gun dojl, sa'csi najcreni xi'n Dios. ¹⁰ Si'c riembeenu rebejn ni najc xi'n Dios, näjza rebejn ni najc rexii'nni

bendxbab. Chutis tejni di gun dzunsa'c, ni dini chanälajz resa'reni, dini gac xi'n Dios.

Nungäjl chanälajznu resa'nu

¹¹ Lagajc rediidxre biejn diajgtu galooli che huililajztu rextidx Dios: colchanälajz resa'tu. ¹² Xhet si'cdi toCain nani gujc xi'n bendxbab. Bejnni dojl, bagu'tni bejtjni. ¿Xhicuent bagu'tnini? Bagu'tnini sa'csi bejn bejtjni ganax dzunsa'c, luxh toCain bejn dzunguijdx. ¹³ Na'c guidxelojtu che guidxechlajz rebejn lojtu. ¹⁴ Racbeenu dirunu sa lo xnezyuj yälgujt, sa'csi dinu guidxechlajz loj resa'nu. Rajpnu yälnabajn par tejpas sa'csi rionälaaznu resa'nu. Chutis tej ni di chanälajz resa'reni canzaj lo xnezyuj yälgujt, sa'csi rdxechlažreni lo sa'reni. ¹⁵ Chutis ni rdxechlaž lo resa'ni, najcni nejz lo Dios si'c ni abagu'tni te bejn. Najnnu che rugu't te niguii te bejn dini ga'p yälnabajn par tejpas. ¹⁶ Racbeenu rinälajz Jesucrist nuunu, sa'csi gujtni lacuua nuunu lo crujz. Siga-jcza nungäjl gacnäjnu resa'nu, mase guetnu lacuua guetreni. ¹⁷ Chutis tejnu ni rajp xhidajl xhixtenni, luxh dini gacnäj nicla tejnu ni xhet rajpdi, di bejngja chanälajz Dios. ¹⁸ Guejbtu resa'ä, na'c chanälaznu resa'nu con rextiidxtisnu, na'c guimiitispn rionälaaznu resa'nu. Palga rionälaazpacnu resa'nu, sacnäjnu resa'nu.

Sisiutzu'tznu nez loj Dios

¹⁹⁻²⁰ Palga rionälaaznu resa'nu, nancheenu najcnu rexiln Dios. Palga jiajbnu xhigab dinu gac bensa'c, dizanu gac xi'n Dios, nanab jiunu rextiidxtis Dios, na'c jiunu rexhigabnu. Dios najn rexhigabga. Niluxh Dios anaj: renani rinälaaz resa'reni, reni'c najc rexiln. ²¹ Rniä lo guejbtu nani rinälazä, palga lagajc lastoonu rnii loonu, "cagusooblu xtidx Dios", sisiutju lastoonu che rbedx-riabiun lo Dios. ²² Xhitis ni rnäbiunu lo Dios, runiidxnii loonu sa'csi rusooobnu xtiidxnii, riennu redzuun ni ruspaa lajz Dios. ²³ Dee najc rediidx ni gunibee Dios gusooobnu: chalilaaznu xtidx Dios, diidx ni rnii xho gujt Jesucrist lacuua nuunu, chonälaazzanu resa'nu si'cni gunibee Dios. ²⁴ Palga rusooobnu guiraa nani gunibeeni, nabannäjnuni, si'cza nabannäjni nuunu. Nancheenu nabannäj Dios nuunu, sa'csi

baniidxni Sprit Dyan xtenni te cuääz nen lastoonu.

4

Scree gacbeenu xhi diidx najc guliipac

¹ Guejbtu renani rinälazä, na'c chalilajztu rextidx chutis bejn nani naa, "rniä rextidx Dios lojtu". Ganiddoo colgula'tz rextidxnite gacbeetu don chu xtidx caniini, sa'csi xhidajl bejn sinii lojtu, "nuunu rniiniu rextidx Dios", niluxh caniisireni si'c. ² Scree gacbeenu xhi diidx najc guliipac. Guiraa rebejn nani guinii "Jesucrist, Xi'n Dios, ni biääd lo quedxliuj si'c nigui", reni'c cay-acnäj Sprit Dyan xten Dios, reni'c canii xtidx Dios. ³ Guiraa rebejn nani di guinii biääd Jesucrist Xi'n Dios si'c nigui, xhet xtidx Diosdi rniireni. Reni'c rdxe'chreni lo Jesucrist. Abiejn diajgtu siääd te niguii ni rdxechdukh loj Jesucrist, luxh naj abidzijn nextzuun niguiiga lo quedxliuj.

⁴ Guejbtu resa'ä, najcnu rexiln Dios. Naj abiennu gaan lo rebejn ni rdxe'ch lo Jesucrist sa'csi Dios ni rbäjz nen lastoonu abejnni gaan lo bendxbab ni nabajn lo quedxliuj. ⁵ Rebejn ni rnii xhet guliidi xtidx Dios, rililajztisreni rediidx ni najc xten quedxliuj. Xhidalduxh rebejn ni re' lo quedxliuj riu rediidx ni xhet guliidi. ⁶ Nuunu najcnu xi'n Dios. Rebejn nani riembee Dios riu xtiidxnii. Rebejn nani di gac xi'n Dios direni jiu xtiidxnii. Scree gacbeenu chu rebejn rnii didxliipac. Scree gacbeezanu chu rebejn rnii diidx ni xhet guliidi.

Rinälajz Dios rebejn

⁷ Rniä lo guejbtu nani rinälazä, nanab chanälaznu resa'nu, renani huililajz xtidx Dios, sa'csi Dios racnäj nuunu te chanälaznu resa'nu. Palga rinälaaznu resa'nu, dxejc najcnu rexiln Dios, luxh gulli riembeenu Dios. ⁸ Palga chutis tejnu di chanälajz resa'ni, dizani gumbee Dios, sa'csi lagajc Dios racnäj chanälaznu Dios, racnäjzani chanälaznu resa'nu. ⁹ Abasule' Dios loonu lacti rinälajzni nuunu. Yu' tejtis Xi'n Dios. Abaxhalni Xi'nni lo quedxliuj te gudijxni rextojlunu lo crujz te si'c guibannäjnuni par tejpas. ¹⁰ Si'c racbeenu rinälajzpac Dios nuunu. Galoo dinu ninälajz Dios. Niluxh Dios huinälajz

nuunu, ni'c baxhalni Xi'nni lo guedxliuj te gudijxní xtojlñu lo crujz.

¹¹ Rniä lo guejbtu nani rinälazä, si'cni rinälajz Dios nuunu, sigajcza rlajzni chanälaaznu resa'nu. ¹² Nicla tej bejn gajd fii lo Dios. Niluxh palga chanälaaznu resa'nu, Dios nabajñ neñ lastoonu, dxejc gulii rinälaazpacnu Dios. ¹³ Nancheenu nabañnjnu Dios, sigajcza nabannäjpac Dios nuunu, sa'csi abaxhalni Sprit Dxan xtenni cuäaz neñ lastoonu. ¹⁴ Narä näjza reapost abahuiu loj Jesucrist. Caniä lojtu abaxhal Xtradnu Dios Xi'nni lo guedxliuj te guslaanjrebej lo xtojlreni. ¹⁵ Chutis tejnu ni rnii "Jesucrist najc Xi'n Dios", nabañnjni Dios, nabañnjza Dios bejngá.

¹⁶ Racbeenu, rililaazzanu rinälajz Dios nuure. Guliduxh rinälajz Dios nuunu. Palga rinälaaznu Dios, nabannäjnu Dios, nabannäjza Dios nuunu. ¹⁷ Naj sanälaaznu Dios si'cni rlajzni luxh palga chanälaaznuni guidebtis ni guibajñnu, dinu guidxejb che guidzujñ dxej ni gun Jesucrist yälguxhtis lo guedxliuj. Dinu guidxejb sa'csi guideb nabajñnu lo guedxliuj, nabannäjnu Dios si'c nabannäj Jesucrist Dios. ¹⁸ Palga rinälaazsa'cnu Dios, dinu guidxejb, palga rinälaazpacnu di gacdi guidxeebnu. Palga gulipacnu rinälaaznu Dios, xhetliidi rdxejbdinu. Nani rdxejb, rdejdni trabajw, gajd bejngá chanälaazsa'c Dios.

¹⁹ Rinälaaznu Dios sa'csi ganiddoo Dios huinälajz nuunu. ²⁰ Palga chutis tejnu naa "rinälazä Dios" niluxh rdxechlajzni lo resa'nu, xhet guliidi xtiidxni. Palga dinu chanälajz sa'nu nani cahuiu, xhixh sajc chanälaazzanu Dios nani gajdnu fii. ²¹ Agunibee Dios, nani rinälajz Dios chanälaazni resa'ni sigajc rinälaajzni Dios.

5

Riennu gaan lo guiraa redolguijdx lo guedxliuj

¹ Chutis ni rililajz Jesús najc Crist nani baxhal Dios, ni'c najc Xi'n Dios. Palga rinälaaznu Xtradnu Dios, sigajcza sinälaaznu renani najc Xi'n Dios. ² Palga rinälaaznu Dios, palga rusooobzanu xtiidxni, dxejc najnnu rinälaaznu resa'nu nani najc Xi'n Dios. ³ Ni'cni, palga rinälaaznu Dios, susooobnu xtiidxni. Luxh dinu guichalo nagajn gusoobnu xtiidxni. ⁴ Chutis tejnu

ni najc xi'n Dios, riennu gaan lo redojl ni re' lo guedxliuj. Riennu gaan lo redojl lo guedxliujre sa'csi huililaaznu xtidx Jesucrist. ⁵ ¿Chuni'c cayujn gaan lo redojl lo guedxliuj, ä? Renani rililajz najc Jesucrist, Xi'n Dios, reni'c rujn gaan lo redojl lo guedxliujre.

Rediidx ni baluui Dios loonu xcuent Jesucrist

⁶ Biääd Jesucrist lo guedxliujre. Birobnis Jesucrist, baxhe'zani xtiejnni lo crujz. Xhet ganaxdi te guirobnisni biäädni, näjza te guxhe'ni xtiejnni lo crujz che biäädni. Sprit Dxan xten Dios canii rediidxre. Gulipac rextiidxni. ⁷ Yu' chon ni baluiloj xhaguuibaa. Rniireni xcuent Jesucrist tejsi diidx. Tejni najc Dios, steeni najc nani laa Diidx, steeni najc Sprit Dxan xten Dios. ⁸ Sigajcza yu' chon ni baluiloj lo guedxliuj. Rniireni xcuent Jesucrist tejsi diidx. Tejni najc Sprit Dxan xten Dios. Steeni najc che birobnis Jesucrist, steeni najc che baxhe' Jesucrist xtiejnni lo crujz che gujtni. ⁹ Palga rililaaznu xtidx rebejñ ni rbäjz lo guedxliuj, nungäjz chalilaazrunu xtidx Dios. Rediidx nani rnii jion reni baluiloj tejsi diidx najcreni con nani rnii Dios xcuent Jesucrist Xi'n Dios. ¹⁰ Palga rililaaznu xtidx Jesucrist Xi'n Dios, rnii Dios xcuent Jesucrist neñ lastoonu. Chutis tejnu ni di chalilajz xtidx Dios, rujnii najc Dios si'c tej ni rusguee sa'csi dini chalilajz xtidx Dios ni rnii xcuent Jesucrist. ¹¹ Scree najc rediidx ni rnii Dios. Abaniidx Dios loonu yälnabajñ par tejpas. Yälnabajngä biädnä Xi'nni, Jesucrist. ¹² Palga nabañnjnu Xi'nni, rajpnu yälnabajñ par tejpas. Palga dinu guibaññäj Xi'nni, dinu ga'p yälnabajñ par tejpas.

Xtitxios con diidx ni rulijdx

¹³ Abaculaä rediidxre lojtu ni rililajz rextidx Jesucrist te gacbeepactu rajptu yälnabajñ par tejpas.

¹⁴ Ni'cni dinu guidxejb che guiniinu lo Dios, sa'csi riu Dios xtiidxnu palga tejsi najc xhigabnu con Dios che rniabnu lojni.

¹⁵ Luxh palga najnnu riu Dios nuunu che rniinu lojni, sigajcza najnnu suniidxni nani rniabnu lojni.

¹⁶ Palga tejnu fii tej resa'nu cayujn dojl, niluxh riuruni xtidx Dios, nuunu rajpnu por guiniabnu lo Dios xcuent laani, te gudeed Dios yälnabajñ lojni. Niluxh yu' te

dolroduxh. Chutis te bejn ni gun dojlgä, di Dios gudeed lo bejngä yälñabajn par tejpas. Dizana guiniä guiniabtu lo Dios xcient bejn ni rujn dolroga.¹⁷ Guiraa redzunguiidx nani rujn rebejn najc dojl. Niluxh yu' redojl nani di gun gunijt bejn lo Dios par tejpas palga jiu bejn xtidx Dios.

¹⁸ Racbeenu guiraanu nani najc xi'n Dios di rlaaznu jiennu dojl. Racnäj Jesucrist nuunu te di bëndxab gun gaan nuunu, te dizanu gusoob xtidx bëndxab.

¹⁹ Nancheenu nuure najcnu xi'n Dios, niluxh guiraa rebejn nani riutis rextzun guedxliuj cagusoobreni xtidx bëndxab.

²⁰ Najnnu biääd Jesucrist Xi'n Dios lo guedxliuj. Baluiini nuunu rextidx Dios te jiemeenoo Dios, nani najcpac Dios gulii. Nabannäjnu Dios ni najc gulii, sa'csi nabagnäjnu Jesucrist. Laani najc Dios ni najc gulii. Caguniidxni loonu yälñabajn par tejpas. ²¹ Resa'ä, na'c guzuxhijbtu lo rebanäjb ni xhet guliidi. Sugacni si'c.

Guijtz Ni Rojp Ni Bacuua Juan

jiädhuiä lojtu ro'c te guiniä rediidxre loj-pactu, te guibaalajztu.¹³ Rexi'n bäßllu, nani aguleza Dios, ruxhal xtixtios lojlu. Ni'ctis najc ni rucuaä lojtu. Sugacni si'c.

Diiidx gulii näjza yälrinälaznu resa'nu

¹ Nará nacä bengool. Cagucuaä guijtzre lojlu nane' nani agule Dios, näjza loj rexí'lnu. Rinälazäpac lá'tu luxh xhet xte-bädi; näjza guiraa reni rililajz xtidx Dios sanälazjtu. ² Nuure rinälaznu la'tu sa'csi yuchee neñ lastoonu rediidx nani najc gulii, luxh dilajznu jiäl rediidxre. ³ Xtradnu Dios, näjza Jesucrist Xi'nni, gacnäj nuunu, jiarení nuunu, guscuedxai lajznu con xcälnajn didxlíi näjza yälrinälajz.

⁴ Bibalazduxhä che gucbeä yu' rexí'lnu ni rusooob xtidx Dios si'c gunibee Dios loonu gusoobnuni. ⁵ Nane' ni gule Dios, diidx nani rniabä gusoob guejblu naj dini gac didxcoob, niluxh lagajc diidx ni biejn diaagnu galooli, che huililaazlinu xtidx Jesucrist. Lagajc dee najc nani gunibee Dios loonu: nungäjlpac chanälaznu resa'nu. ⁶ Sinälaznu resa'nu palga cagusobnun xtidx Dios. Dee najc xtidx Dios ni biejn diaagnu galooli, che huililaazlinu xtidx Jesucrist: chanälaznu resa'nu.

Rebejn ni rnii garencä diidx ni xhet guliidi

⁷ Balti bejn birii loonu, naj cagusgueereni xhidajl bejn ni re' lo quedxliuj. Caniereni di Jesucrist niajc niguui che biäädni lo quedxliuj. Sa' bejnre najc beñrusguee. Sa' bejnre rdxe'chreni loj Jesucrist. ⁸ Colga'p la'tu te na'c chalilajztu xtiidxreni, didi xlia'si biennu dzuun ro'c, te xca'tu guiraa ni guniidx Dios lojtu.

⁹ Chutis bejn ni rlajz gugu'ch xtiidxpacni lo xtidx Jesucrist, di bejngä gumbee Dios. Niluxh chutis bejn ni riu xtidx Jesucrist, rumbeeni Dios, rumbeezani Jesucrist Xi'n Dios. ¹⁰ Palga jiääd te bejn rolijztu ni di chasanäj xtidx Jesucrist, na'c xcäjbtu jiu'ni rolijztu, na'cza guiniitu lojni, "Xchan. Biu'." ¹¹ Sa'csi chutis bejn ni guinii "xchan" loj te bejn ni di chasanäj xtidx Jesucrist, cayacnäjzani redzunguidx ni rujn bejngä.

Rudeedni xtixtios

¹² Xhidalduxhru diidx rlazä guiniä lojtu, niluxh di rlazä gucuaäreni lo guijtz. Cabäzä

Guijtz Ni Riojn Ni Bacuua Juan

Cagucuaani didxsa'c lo Gayo

¹ Narä nacä te bengool. Caguxhalä guijtzre lojlu, dad Gayo. Rinälazduxhälu sa'csi huililajzlu rextidx Dios.

² Sanälazälu, nanä laaca yu' lastoolu loj Dios. Naj rniabä lo Dios gacnäjni luj, guniidzxani yälñadaanlu. ³ Bibalazduxhä che gubi' gaii resa'nü, guniliireni loä xho huililajzlu xtidx Jesucrist, xho basoobzalu xtidx Jesucrist. ⁴ Xheti stee diidx ni ruspaa lazä si'c rbaa lazä che racbeä rusooob resa'nü redidxlí xten Jesucrist.

⁵ Dad Gayo, laaca cayujnlu che racnäjlu renani rililajz xtidx Jesucrist, mase dilu gumbeerene che riäädreni lojlu. ⁶ Aräjpreni lo resa'nü ni rdxagsa' ree xho huinälajzurení näjza xho gucnäjtureni. Laaca be-jnlu gucnäjlu resa'nü, badeedlu xhi biqu-inreni lo nejz che biriireni rolizjzu. Si'cza nanab jiennu lo guiraa resa'nü, nalajznu rebejñ ni ruluii xtidx Dios. ⁷ Ruluiireni xtidx Jesucrist sa'csi sanälajzreni Jesucrist. Xhet rca'direni lo rebejñ ni di chalilajz xtidx Jesucrist. ⁸ Si'cza nanab gacnäjnu rebejñ ni riluii xtidx Jesucrist neñ garen-garen guejdx, te si'c jiennänu xtzuun Dios guiraa renani ruluii xtidx Dios.

Di Diótrefes niujn redzunsa'c

⁹ Abaxhalä te guijtz lo rexpejñ Jesucrist ro'c. Niluxh Diótrefes rlajz guinibeeni lo resa'nü ro'c. Dini jiu xtidxä. ¹⁰ Ni'cni che guidzuñä ro'c, narä siniä rediidxre lo resa'nü ro'c, che guidxaag sa'nü ro'c. Diótrefes rniyaj narä lo resa'nü ro'c. Dizani jiu resa'nü che rdzujnreni ro'c. Dizani gusaan fiiitu resa'nü ni riääd ro'c, mase rlajz chu tejtu fiireni. Luxh rlajzni gudxojnni guidxagnäjtu rebejñ nani ruhuii resa'nü ni ruluii xtidx Jesucrist.

¹¹ Sa'ä ni rinälazä, na'c gunlu redzungui-jdx, bejn redzunsa'c. Nani rujn dzunsa'c ni'c najc Xi'n Dios. Chutis tej ni rujn redzunsa'c najc xpejñ Dios. Chutis tej ni rujn redzungui-jdx, di ni'c gumbee Dios.

Rniireni didxsa'c xcuent Demetrio

¹² Guiraa rebejñ ganax didxsa'c rniireni xcuent Demetrio, luxh huenliisi rusooobni

xtidx Jesucrist. Sigajcza narä rniä didxsa'c xcuentni. Najnlu gulipac rediidx ni rniä.

Rudeedni xtixtios

¹³ Rlazä guiniä xhidualduxhru diidx lojlu, niluxh di rlazä gucuaä rediidxga lo guijtzre.

¹⁴ Runä xhigab di gaclaa jiädhüä lojlu, dxe-jcti jieinu diidx.

¹⁵ Gulecdxi lajzlu. Rexamigwlu rux-halreni xtixtios lojlu. Badeed xtixtios lo tejga rexamigwä ro'c.

Guijtz Ni Bacuua Judas

Judas cagucuua loj renani agule Dios

¹ Narä nacä Judas, ni rujn xtzuun Jesucrist. Narä nacäza betz Jacobo. Cagucuää guijtzre loj renani agule xtradnu Dios, renani sanälazduxhuni, nani cayapcheeni par Jesucrist. ² Rniabä lo Dios, gulaslazduxhruni la'tu, guscuedxiduxhruni lastootu, gacnäjni la'tu, guniidxrungi yälsanälajz.

*Renani ruluij yälrusguee
(2 Pedro 2:17)*

³ Rebetzä nani sanälazä, che cayunduxhä xhigab gucuaä lojtu xcuent loyrluslaa lo rextojlnu ni rajpnu, benä xhigab riojbru gucuaä te guijtz lojtu te gulidxätu sudzu'tznu, gapdzu'tztu yärlilajz ni basule'reni par tejpas loj rexpejn Dios. ⁴ Sa'csi abiuxhiga'tz gaij bejn, renani galooli gunii Dios siäädreni, niluxh sinitlojreni. Najcreni bejn ni di chalilajz xtidx Dios, najcreni benguidxdukh, rutzuréreni xcälracnäj Dios, rujnreni xtuyj, sanäreni te yälnabandxuudx. Rbalazzareni xphaxhuaannu nani rnibee loonu, Dad Jesucrist.

⁵ Mase anajntu guira'ti rediidxga tejpas, rlazä gusnaä lajztu che gudejd guläa Dad Jesucrist rexpejn Israel lo gudedx Egipto, dxejcti bagu'tni renani di nililajz xtiidxni.

⁶ Rexangl Dios nani di nucuadijg diidx, ni birii cadro rlajz Dios churenri, reni'c basäu Diosreni cadro nacäiboo te cabätzreni gun Dios xcälguxhtisni lojreni. ⁷ Si'c bejnni gudedx Sodoma näjza Gomorra näjza reguedxbáz ni tre' gajxh ro'c, sa'csi bejnreni dojl, renigui guyunäjreni niguui biräax, regunaa guyunäjzareni regunabiräax. Dxejc gudejdreni trabawduhx huejcreni neij guiboo par tejpas xcuent xtojlreni, ni'c najc te yärlulijdx loonu.

⁸ Rebejn ni riu' lojtu najc si'c reben galoo ni bejn dojl. Nabajreni si'c ni bisieedreni lo guiraa nani ruluij yälrinxcal, ruxhiqreni tiejxhreni, rbälazreni xcälrnibee Dios, rniyajzareni rexangl Dios. ⁹ Miguejl ni rnibeeru loj rexangl Dios, che gudildiidxni bendxbab yejc tiejxh toMoisés, dini niniyaj bendxbab, alga räjpni: "Sugun Dad Jesucrist

yälguxhtis lojlu." ¹⁰ Niluxh rebejngä rniyajreni nicla ganreni xhini'c rniireni. Niluxh nani racheepac rebejngä najc yälnajn nani nicla niquiin niseedreni, lala sa' nani ru-jenza reguidxaa, ni xheti xcäriejnni, reni'c sujn nitlojreni.

¹¹ ¡Aii! ¡Riazanuren! Sanajlreni xnezyuj Caín, luxh te gunreni gaan meel rux-hunliren i rujnreni sa' dojl ni bejn Balaam agujc xchero, näjza sa' dojl ni bejn Coré, ni gudilnäj Dios, luxh gunitlojni. ¹² Laareni najcreni te xtuiduxh lo rexchej ni rajc guidoo, direni guidxejb gauxchenäjreni la'tu, sa'csi xque'tisreni riuren. Najcreni si'c te xcäjy ni xhet nisguij siädnäni, nani sanä bej nezree nezrec; najczareni si'c te yagbigol nani di ninejxh xcaj lojni, tio'p huált agujtreni, najcreni si'c te yajg ni abiliäädx. ¹³ Laareni najc si'c nis ni räjs lo nisdoo, che cayajc te bidonduxh, sää, siäädni, carii xtujyreni si'c räjs nis lo nisdoo. Najcreni si'c bale' ni rtejb xhaguibaa, rijreni lo te yälnacäiduxh ni benchee Dios par tejpas.

¹⁴ Xcientza redee agunixaaza Enoc ni najc xagdodox Adán, räjpni: "Bahuui, siädnä Dios xhidaldukh xanglni ¹⁵ te gunni yälguxhtis loj guiraa bejn te gusacsíduxhni guiraa rebejn ni di gumbee Dios xcient redolduxh ni bejnreni, xcientza redidxnaj ni guniyaj rebendolduxhre Dios." ¹⁶ Rebejnre laa reni rmojim, runduxhreni quej, rujnreni si'ctis ni rlajz tiejxhreni, rniireni guiraloj didxnaj, rniisireni didksa'c loj rebejn te gun rebejngä si'c ni rlajzreni gunreni.

Rulijdxn rebejn nani ahuililajz xtidx Dios

¹⁷ La'tu, betzä ni sanälazä, riäjä guinaj lajztu rediidx nani gunii reapost xten Dad Jesucrist, ¹⁸ sa'csi guniirenlojtu: "Nen redixelult che guibisac Jesucrist, su' bejn ni suxhiznäjreni rextidx Dios, sujreni si'ctis guisia' lajzreni." ¹⁹ Redee najc renani run rlia' rexpejn Dios lo sa'reni; rinuuzareni ni yu' lo gudedxliuj, diza Xprit Dxan xten Dios cuäaz neñ lastooren.

²⁰ Niluxh la'tu rebetzä nani sanälazä, col-tioob loj xcälrililajztu ni siääd lo Diostis, colnab lo Dios xcient yälrnbbee xten Xprit Dxan xten. ²¹ Colguibajntis lo yälsanälajz xten Dios, colsusintis lal ni cayunlojtu yärlulaslajz xten Dad Jesucrist ni guniidx yälnabajn par tejpas.

²² Colgacnäj renani di chalilazsa'c te chalilajzpacreni xtidx Dios. ²³ Colyacnäj sgaii te guibicajreni lo dojl, gudobxha-jxreni, colyejn xhigab lo guiboo cayejcreni. Colyacnäj sgaii bejn, colgulaslajzreni con yälrdxejb, niluxh colnatiru te di guntu lagajc dojl ni rujnreni. Gulälaz nani rujnreni, nani ruxhiqreni.

Redidx lult

²⁴ Colguiliä'p xpala'n Dioś nani racnäj la'tu didi jiajbtu lo dojl, nani rujn sajc suutu lo xcälrdimbicha' Dioś, nayadujtu, rbaduxh lajztu. ²⁵ Yu' tejtis Dioś. Laatisni rajpni yälnajn te guslaani nuurnu lo dojl xcient ni bejn xtadnu Jesucrist. Colguiliä'p xpala'nni, rajpni guiralii yälrnibee, yäldimbičha', galooli, näj naj, näjza par tejpas. Sugacni si'c.

Rediidx Nani Bacuua Juan Xcient Recos Ni Churu Gac

Baluiloj Jesucrist lo Juan

¹ Dee nadjc rediidx ni badeed Dios loj Jesucrist te gululoijnini loj rexmosni, xcient recos nani di gaclaa gac. Jesucrist baxhal xanglni lo Juan, te baluiini guiraa recosga lojni. ²Ni'cni bacuua Juan lo guijtzre guiraa xtidx Dios nani baluui Jesucrist lojni, xcient guiraa recos nani bahuilojpacni.

³ Chicbaa renani rol guijtzre xcient recos ni churu gac, renani riuza rediidxga, renani rguchee rediidxga neñ lastooni sa'csi siäddzungajxh redxej che soob rediidxga.

Juan cagucuaa guijtzga lo gajdz guidoo

⁴ Narä nacä Juan. Cagucuaä guijtzre loj guigajdz reguidoo ni tre' lo régión Asia. Dios guspalaiz la'tu, guscuedxini lajtzu, lagajc Dios ni sigajc nadjc nadxej, sigajcza gujcni naii, sigajcza sajcni par tejpas. Xca'zatu xcälruspalajz näj xcälrbexdilajz guigajdz resprit ni suga' guideb gabi cadro rnibeeni, ⁵näj xcälruspalajz, xcälrbexdilajz Jesucrist nani gunillii diidx ni badeed Dios lojni, nani ganiddoo gubañsac lo rebengut, nani rnibeza lo guiraa rereiñ loj quedxliujre. Laani sanálazduxhni nuure, laani rudzucajni xtojlnu con xtiejnni. ⁶ Laani bejnni gacnu te benro, te quedxro, gaczanu bixhojz lo Dios Xtadni. Suchä'p xpala'nni, sugapni yälrnibee par tejpas. Sugacni si'c.

⁷ jColgacbee! Laani sibisacni lo rexcäjy, luxh guiragajc rebejn suhui lojni, nágajc renani gudzujd cuä' xcustiini. Guiraa rebejn quedxliujre soon xcientnii. Si'cti, sugacni si'c.

⁸ —Narä nacä ganid, nacäza lult, si'c nadjc reletr A con Z —rnii Dad Dios—. Nabanä nadxej, sigajcza gubanä naii, sigajcza sibanä par tejpas, dipacna gacä ste'ca. Rapä yälrnibeduxhru lo chutis.

Bahuia loj Jesucrist lo xcälrdimbicha'ni

⁹ Narä, Juan, bejtzu, näjza ni cadednäjtu trabajw xcient Jesucrist, ni riunäjzatu cadro rnibe Dios, ni rsiusdutzatznäjzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhalreni narä pres sa'csi basule'ä xtidx Dios näjza diidx

xcuent ni bejn Jesucrist lo quedxliujre. ¹⁰Te dumingw, laj ni cayunää Dios, guzacä astoo canixcalä, dina niacbeä caro yu'ä, dxejcti nez detzä biejn diağä xse' te ni gunii dipduxh, astoo te trompet, ¹¹najni loä:

—Narä nacä ganiddoo, nacäza lult. Lo te guitzro bacuua nani fiilu, dxejcti baxhal guijtzga loj guigajdz guidoo ni yu' nez Asia, neñ reguejdxre: Éfeso, Esmirna, Pérgamo, Tiatira, Sardis, Filadelfia, näjza Laodicea.

¹² Dxejc gubireä te bahuiä chuni'c canii loä. Che gubireä bahuiä lo gajdz gandilier oor. ¹³ Galäii guigajdz recandilieerga, suga' te ni nadjc Xi'ni Dios nani gujc Xi'ni Niguii, na-jcwni te lajd ni rdzujn lo ni'lini, lastoozani naliib te cinturon gulajg ni nadjc ganadxuj oor. ¹⁴ Yejcní näjza xquidxejcni najczareni nolbäj si'c xquichlajd xil, nolbäj si'c yejg. Dxejcrubebajl lojni. ¹⁵ Ni'ni rdimbicha' si'c gubiib ni laa bronz che cayejcni lo guiboo. Xse'ni riejn nadipduxh astoo che riäjt nisro neñ regueuu. ¹⁶ Ladbee ca' naani gajdz balxaguibaa; ro'ni rii te espaad ni guiro'p laad caj ro'ni; dxejctiru lojni rujn si'c rujn loj gubijdx che cagusanjni guideb lagaa.

¹⁷ Che bahuiä lojni, biabrloä nez lojni si'c te bengut. Dxejcti batzuubni naani xladdeni yecä, dxejc guniini loä, najni:

—Na'c guidxejblu, narä nacä ni gubajn galooli, narä nacäza ni guibajn lult. ¹⁸ Narä nacä ni nabajnpac; gutä, niluxh naj nabañä par tejpas. Rapä yälrnibee lo yälguit näjza lo gabijl. ¹⁹ Ni'cni bacuua recos ni abahuili, nani cayajc naj, näjza nani churu gac. ²⁰ Dee nadjc laa yälxhiga'tz xten regajdz balxaguibaa ni bahuili lo naä ladbee näjza regajdz gandilier oor: guigajdz balguibaa sálojni xangl Dios xten reguidoo. Dxejc gajdz gandilieerga sálojni guigajdz reguidooga.

2

Rediidx nani chäää loj rexpejn guidoo Éfeso

¹ Dxejcti najni loä:

—Bacuua rediidxre lo xangl Dios xten guidoo Éfeso: “Nani ca' guigajdz balxaguibaa naani ladbee, näjza nani rsiaj galäii guigajdz gandilier oor, rnii rediidxre lojtu: ²Narä numbeä xhi redzuun rujntu, xhi trabajw rdejdtu rujntu dzuunga, näjza xho rsiudzu'tztu. Dizatu guchagsa'tu benlat-siaj; näjza bala'tztu xho rujn rebejn nani

rniireni najcreni apost ni rnii xtidx Dios, luxh direni gac, luxh la'tu gucbegajctu cagusgueereni bejn.³ Rsiudzu'tztu, ru-jntu huant xcient xtidxä, gajdtu guidxajg.⁴ Empac yu' te quej ni rbe'cä xcienttu: dirutu chanälajz narä si'cni huinälajztu narä ganiddoo.⁵ Ni'cni colguzaa lajztu caro banijtu, colgusiechj lajztu, colyejn lagajc redzuun ni bejntu galoo che guslojtu huililajztu xtidxä. Palga ditu gusiechla-jztu, sudzucaä xcandilieertu cadro suga'n.⁶ Laaca rujntu rbälaztu xtzuu rebejn⁷ ni laa nicolaítas, sa'csi näjza narä rbixlazaä xtzuuunreni.⁸ Nani yu' diajgni te cuadiagjni diidx, sucuadiagjni diidx ni rnii Sprit Dyan xten Dios loj reguidoo: loj renani gun gaan lo dojl, gudedä gauni ninejxh ni rcaj lo yajg yäl nabajn,⁹ ni yu' xhaguibaa cadro yu' Dios."

Rediidx ni rniini loj rexpejn guidoo ni yu' Esmirna

⁸Dxejcti najni loä:

—Bacuaa rediidxre lo xangl Dios xten guidoo ni yu' Esmirna: "Nani najc ganid-doo, nani najcza lult, nani agujt, dxejctiru gubansacni par tejjas, rnii diidxre lojtu:¹⁰ Narä nanä xho cadejdlu trabajw, naniäza guxili rajplu, niluxh nez loj Dios yu' xhidajl xhixtenlu. Nanäza yu'reni rnyajlu. Reni rnyajlu rniireni najcreni rexpejn Israel, luxh direni gac. Najcreni xpeju xquidobäz bëndxbab.¹¹ Na'c guidxejblu trabajw nani agojl tedlu. Aree bendxbab gusäl gaii sa'tu neñ latzguiib, te gacbeeni don la gulitu ahuililajztu xtidx Dios, te tedzatu trabajw tzuu dxej. Colgutip lajztu mase guettu, dx-ejcti narä gunidxä te coroñ xten yäl nabajn.¹² Nani rlajz cuadiagjni diidx sucuadiagjni diidx ni rnii Sprit Dyan xten Dios loj reguidoo: nani gun gaan lo dojl, xhet gundi yälgujt ni rojpga lojni."

Rediidx ni rniini lo rexpejn guidoo ni yu' Pérgamo

¹²Dxejcti najni loä:

—Bacuaa rediidxre lo xangl Dios xten guidoo ni yu' Pérgamo: "Nani ca' spaad ni caduxh ro'ni guiro'p laad rnii rediidxre lojtu:¹³ Narä nanä caro rbäjztu, rbäjztu lo guejdx cadro rnibee Bendxbab. Rsiudzu'tztu xcient xtidxä. Lältis rsiudzu'tztu rililajztu xtidxä, mase nen redxej cheni bagu'treni Antipas, ni gunii diidx xcuenta,

nani gusudzutzpac nez loä, nani bagu'treni nen guejdx cadro rnibee Bendxbab.¹⁴ Niluxh yu' tiop-choñ xtojltu. Lojtu nadxaag gaii bejn ni rujn si'c bejn toBalaam aguje xchero. Laani baseedni Balac xho gunni te jiajb rexpejn Israel nen dojl, baseed-nireni gaurenri recos ni gurej lo dxan nez loj rebanäjb, baseedzani rexpejn Israel gues-näjreni chutis gunaa.¹⁵ Sigajcza nadxaag lojtu gaii bejn ni riu rediidx ni rusule' reni laa nicolaítas.¹⁶ Colgusiechxgaa lajztu, te di jäljacä lojtu te gucuanääreni spaad ni yu' ro'ä.¹⁷ Nani rlajz cuadiagj diidx, su-cuadiagjni diidx ni rnii Sprit Dyan xten Dios loj reguidoo: renani gun gaan lo dojl, lojin gudedä yätxtil ni laa mana ni yuchee-xhiga'tz. Sudedäza lojni te guibäz ni najc nol, lojni caj te lajni ni nacoob, nani rutru racbeedi, xtebtis nani xca'n."¹⁸

Rediidx nani rniini lo rexpejn guidoo ni yu' Tiatira

¹⁸Dxejcti najni loä:

—Bacuaa rediidxre lo xangl Dios xten guidoo ni yu' Tiatira: "Xi'n Dios nani rbe-bajl balojni, ni rdimbicha' ni'ni si'c bronz, ni'c rnii rediidxre lojtu:¹⁹ Ananä xtzuntu, sanälajztu sa'tu, nanä xho rililajztu xtidxä, xho racnäjitu resa'tu, näjza xho rsiudzu'tztu, runduxhtu huant. Nanäza cayujntu dzunroru naj loj ni bejntu che guslojtu.²⁰ Niluxh yu' xhicuent rdxe'chä lojtu. Rcäjbtu riu'tu loj te gunaa ni laa Jezabel. Laani rniisini najcni te profet', gunaa ni rnii xtidx Dios, rusgueetisni bejn. Luxh xcälruseedni cagusgueeni rexpenä nani ahuililajz xtidxä, te naj rujnreni cos-guijdx, si'c yälresnäj ni di gac chäälni, rajwzareni nani gurej lo dxan xten re-banäjb.²¹ Aguläzä xchej te gusiechla-jzni, gusaanni gunni dojl, luxh naaddini gusiechla-jzni xcient redzunguijdx ni ru-jnni.²² Luxh palga laani dini gusaan gunni redzuun nani rujnji, narä siguixäni, gudedä te yälracxhuro. Luxh sutedä trabajwduxh guiraa renani bennäjni dzunguijdx palga direni gusiechj lajzreni, palga direni guchaa xmoodreni.²³ Sugutxhiä, sumitlö rexi'n gunaaga, te si'c gacbee guiraa rebejn ni yu' nen reguidoo narä naçä ni rula'tz rex-higab ni yu' xcäriejnreni, näjza yälrililajz ni yu' nen lastoorenri. Te gacbeezareni narä sunidxä lo tejgatu ni riäjlx xca'tu xcient

redzuun ni rujntu. ²⁴ Dxejc loj guiraa reni yu' lo guedx Tiatira, la'tu ni di guirajnl xnezyuj Jezabel, la'tu ni di gumbee nani rniireni nadj recosdukh xten bendxbab, xhetru rniädi lojtu, dirunä gutalä xtzuuntu. ²⁵ Colyapdz'u tz rextidxä nani arajptu dxejli ni guibisacä lojtu. ²⁶ Nani gun gaan lo dojl, näjza nani cagusoob xtidxä dxe lultli, lojni sudedä yälrnibee te guinibeeni renacion. ²⁷ Si'cni baniidx Xtdä yälrnibee loä, sudedä yälrnibee lojni, te guinibeeni guiraa reben guedxliuj, gunnäjní yälguxhtis lojreni te barguijbsi'c rujn ni runchee guesbajn, rlia'ni guiraa regues nani xhet sajcdi. ²⁸ Sunidzxä bale' xhaguibaan ni rii rsildoo (ni säloj guibannänju Dios). ²⁹ Nani rlajz cuadijg sucuadijgni diidx ni rnii Sprit Dxan xten Dios loj reguidoo."

3

Rediidx nani rniini lo rexpejn guidoo ni yu' Sardis

¹Dxejcti najni loä:

—Bacuaa rediidxre lo xangl Dios xten guidoo ni yu' Sardis: "Si'c naj nani rajp guigajdz Sprit xten Dios näj guigajdz rebel xhaguiba: Narä nanä guiraa redzuun nani rujntu, rnii rebejn nabajntu, niluxh narä rujnä ascanu agujtta, dirutu gun xtzunä. ² Colguibajn, colgula'tzru nani rapsijstu xcuent rextidxä nani amerit nitloj neñ lastootu. Narä ruhuiaä ditu niunsa'c dzuu xtenä nez loj Dios. ³ Colgusaj lajztu rediidx ni basule'reni lojtu, nani abacuadijgtu, colgusoob rediidxga, colgusiech lajztu. Palga ditu guibajn, palga ditu guchaa xmoodtu, sidzuñä nez lojtu si'c te gubaan, nicla gaantu cor guidzunä lojtu. ⁴ Niluxh yu' gaiisi bejn lo guedx Sardis nani naya, nani gadreni gun dojl. Sajcwreni ladnolbäj te sanäreni narä xhaguiba, sa'csi laareni sabyäljeni. ⁵ Nani gun gaan lo dojl, ni'c sajc gacwni ladnol, luxh dizana guche'nä lajni loj xlibr cadre caj laj renani sibajnnäj Dios par tejpas. Sicäpäza nez loj Xtdä näjza nez loj guiraa rexquixhajgni, bejngä nadj rexpenä. ⁶ Nani rlajz cuadijg diidx, sucuadijgni diidx ni rnii Sprit Dxan xten Dios loj reguidoo."

Rediidx nani rniini lo rexpejn guidoo ni yu' Filadelfia

⁷Dxejcti najni loä:

—Bacuaa rediidxre lo xangl Dios xten guidoo yu' Filadelfia: "Nani nadj dxan, nani nadj guliipac, nani rajp xliäii toDavid (ni säloj guiragajc yälrnibee), nani che ruxhalni, rut rusäudi, nani che rusäuni, rut ruxhaldi, laani rniini diidxre lojtu: ⁸ Narä nanä xhini'c rujntu. Si'c te puert ni naxhal, ni rut rusäudi, si'cza sunidxä yälrnibee lojtu te gusule'tu xtidxä, ruthiidi sajc gusäuu ro'tu. Mase guxii nadip-nadaantu, atu canii xtidxä, ditu cuatzlajz xtidxä. ⁹ Suhuiitu xho gunä rebejn ni yu' lo guidobäz xten bendxbab. Rniisireni nadjreni xpejn Israel, luxh direni gac; rusgueereni bejn. Narä sunäpac jiädzuxhijbreni nez lojtu, sunäza gacbeepacreni sanälazduxhä la'tu. ¹⁰ Sa'csi basoobtu xtidxä ni gunibää sutijptu, na'c jieedtu, ni'cni narä sacnäázatu che guidzujn dxej tedtu trabajw. Luxh orga ameer guidzujn lo guideb guedxliuj, luxh sidejd guiraa reben guedxliuj trabajw, te guibee rebensa'c lo reben guedxliuj. ¹¹ Narä di gaclaa jiälä; gopdz'u tz ni rajptu, te rut gudzucajdi ni gunidxä xca'tu. ¹² Nani gun gaan lo dojl, narä gunäni si'c te pilajr nen xquidoo Xtioozä, nalajznu, sajcni te bejn nani gac guinibee cadro yu' Dios. Sibajnni ro'c par tejpas, diruni guirii ro'c. Lojni gucuaä laj Dios näjza laj guejdx xten Dios ni nadj Jerusaléncob, nani guirii xhaguiba cadro yu' Dios; lojni sucuäza laä ni nadjza nacoob sa'csi najcni xpenä. ¹³ Nani rlajz cuadijg diidx, sucuadijgni ni rnii Sprit Dxan xten Dios loj reguidoo."

Rediidx nani rniini lo rexpejn guidoo ni yu' Laodicea

¹⁴Dxejcti najni loä:

—Bacuaa rediidxre lo xangl Dios xten guidoo ni yu' Laodicea: "Nani laa Amén (ni säloj sugacni si'c), nani nadj testiigw ni rniiliipac, ni di cuäaz guiniini didxliiga, nani guläxtiej guedxliujre näj guiralii ni benchee Dios, laani rniini scree: ¹⁵ Nanä redzuun ni cayujntu. Ditu sasa'c lo xnezyü, dizatu cuälatz xnezyü. ¡Maläii guntu tejni o steen! ¹⁶ Ni'cni, sa'csi najctu si'c nistib, ditu gac si'c nisnajl, niclaza gactu si'c nislaa, sibäro'a la'tu. ¹⁷ Sa'csi rniilu: Ri'cw narä, rapä xhidalduxh xhixtenä, xhet rquinädi. Luxh dilu gan xhet rajpdilu, alga najclu beñ gubijn, te beñ probduxhlu,

di lojlu jien, luxh suga'lu xhabäälü nez lo Dios. ¹⁸ Ni'cni rulidxälu siilu loä oor xtenä nani agudejd lo guiboo te gaclu ri'cw; gusii loä ladnol gacwlu, te di guitujuylu suulu xhabäälü; gusiiza unguent loä te chää balojlu, te jien lojlu. ¹⁹ Rebejn nani sanäläzä, reni'c rulidxä, runäza riareni che et laadi rujnreni. Ni'cni colsäblajz; col-gusiech lajztu. ²⁰ Colhuii, ana suga'ä roxlä' lastootu, cagusezä, cabedxa'ä. Palga yu' chu tejtu ni jiejn diajgni xse'ä, guxhalni xpuert lastooni, siu'ä lastooni, te gacnääni, te guibansa'czani nez loä. ²¹ Loj nani gun gaan lo dojl, lojni gudedä guinibenäjni narä xhaguibaa, sa'csi näj narä abenä gaan lo dojl, ni'cni gurenää Xtadä cadro rnibeeni xhaguibaa. ²² Nani rlajz cuadiajg diidx, su-cuadiajgni diidx ni rnii Sprit Dyan xten Dios loj reguidoo."

4

Calä'preni xpala'n Dios xhaguibaa

¹ Che gulujx bacuaä rediidxga, guläsä loä, bahuiä astoo naxhal ro puert xhaguibaa. Dxejcru gunii xse' nani biejn diagä ganid-doo, nani riejn si'c xse' te trumpet, najni loä:

—Huä'p, gudaa ree, te guluiä lojlu recos ni churu gac che luux gac recosre.

² Lagajc dxejc astoocanu si'cni huij sprit xtenä xhaguibaa. Ro'c bahuiä te yagxhilro cadro rbej nani rnibee xhaguibaa, luxh ro'c sobga' nani rnibeeni. ³ Nani sobga' lo yagx-hilga, riegni si'c te guisa'c ni rbebalsejs, si'c reguisa'c ni laa jaspe, näj cornalina. Guideb gabi yagxhil cadro rnibeeni dejd te xquit-gubijdx ni rbebalsejs si'c guisa'c ni laa es-meralda. ⁴ Guideb gabi cadro rnibeeni suga' sgalbitajp yagxhil, loj reyagxhilga sobga' galbitajp rebengool, najcwreni ladnol, yu' coron oor yejc tejgareni. ⁵ Nez lo yagxhilro cadro rnibeeni rii reyäldinya' näjza guuzi. Nez loj cadro rnibeeni cayalguj gjajdz bajl ni najc gjajdz Sprit Dyan xten Dios. ⁶ Nez loj cadro rnibeeni yu' astoocanu te nisdoo ni rien si'c te guihuano, rdimbichasejsni.

Galäii yagxhilroga näjza guideb gabini suga' tajp man, guideb nez lojreni näjza nez dejtzreni yu' balojni. ⁷ Manganidga najc si'c te lion; man ni rojpga najc si'c te gonbäz; man ni riojnga rujn lojni si'c rujn loj te nigui; man ni rdajpga najcni si'c te

bisiro cagutajt xhaguibaa. ⁸ Niluxh guidap remanga tejgareni yu' xho'p xhigareni, guideb gabiren, näj nez neñreni liguidxa balojreni, niluxh direni gusilajz, dxej-yääl caniiren:

Dyan, dyan, dyan najc Dad Dios ni rajp yälrnibeduxh, nani yu' galooli, nani yu' naj, nani churu jiääd.

⁹ Guidap remanga rliä'preni xpala'n Dios, rusuxhijbreni rajnrenini, rdeedzareni xquixtios loj nani rnibee par tejas. ¹⁰ Dxejc guigalbitap rebengool, suzuxhijbzareni loj nani rbej lo yagxhilro, te ganreni nani nabajn par tejpas. Sucuareni xcoronreni nez loj xyagxhilroni, siniirenlojni, säjpreni:

¹¹ Dad Dios baxhuaannu, Guejbpaclu riäjl xca' guiraa rebala'n, guiraa reyälruzuxhijb, guiraa reyälrnibee, sa'csi Guejblu guläxtiey guira'ti nani yu' naj, yu'reni sa'csi rlajz Guejblu churen, ni'cni benchee Guejblu guiraareni.

5

Te guijtz näj te ni najc Xiil xten Dios

¹ Dxejcru narä Juan bahuiä lo nani sobga' lo yagxhilroga. Naani ladbee ca'ni te libr, najcni si'c te biliu guijtz. Caj diidx nez lojni caj diidx nez dejtzni, nadxe'n, caj gjajdz seii lojni. ² Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäjl guxhal guijtzre? ¿Chuni'c riäjl gutiäjs reseiire?

³ Niluxh nicla tej bejn di nidxäjl ni riäjl gutiäjs reseiiga te guxhalni guijtzga; nicla xhaguibaa, nicla lo quedxliujre, nicla xha-jäjt nez nen quedxliuj. Niclaza nidxäjl chu niajc nuhui lo guijtzga. ⁴ Narä ronduxhä sa'csi nicla tej rut riäjldi gutiäjs reseiiga, niclaza ni riäjl gol guijtzga, niclaza ni riäjl fiitis lo guijtzga. ⁵ Dxejcti gunii te bengool loä, najni:

—Na'cru goonlu. Bahui gan, niguui ni rnireni Lion, xagdoo tojudá, xagdoo to-David, abejnni gaan lo yälgujt ni'c naj riäjl guxhalni guijtzga, gutiäjszani guigajdz reseiiga.

⁶ Dxejc bahuiä nez cadro suga' yagxhilroga näj guidap remanga, näj cadro suga' guiraa rebengool luxh te galäiiga suga' tej ni najc Xiil xten Dios, astoo abagu'trenini.

Sojb gajdz xca'chni näjza gajdz balojni, ni najc gajdz Sprit xten Dios nani rux-halñi guiraa nez lo quedxliuj. ⁷ Laani gu-bigni, cua'nii guijtzga, guläänini naa ladbee xten nani sobga' lo yagxhilroga canibee. ⁸ Che cua'nii guijtzga, guidap remanga näjza guigalbitap rebengool bazuxhijbreni nez loj Xilga. Tejga rebengoolga ca' te arp, ca'zareni taz oor guidxa te ni najc si'c yaal. Yaalga najc guiraa reyälrbejdix, yälrniab xten rexpejn Dios. ⁹ Cayolzareni te dicoob ni najc scree:

Guejblu sacduxh,
räjlpac xca' Guejblu guijtzga,
gutiäjs Guejblu reseiiga, sa'csi bagu't rebe-jnlu,
näjza xtiejnlu gudijx xcuent bejn lo Dios.
Gudijxlu xcuent bejn ni najc garen-garen raz,
ni rnii garen-garen didxsaj,
ni siääd garen-garen guejdx lo garen-garen ladxbejn.

¹⁰ Badeedlu gacreni reii näjza bixhojz lo Dios.

Laareni sinibeereni reben quedxliuj.

¹¹ Che bahuiä, biejn diagä xse' xhidalduxh xangl Dios ni suga' guideb gab yagxhilro cadro rbej nani rnibee, näjza xse' guidap reman, näjza xse' guiraa rebengool. Luxh di gacdi guigab xangl Dios ni tre' ro'c sa'csi xhidalduxhtej najcreni, xhidalduxh miyon najcreni. ¹² Dipduxh najc xse'reni, caniireni scree:

Sacduxh Xil nani bagu'treni,
ni'c riäj xca'nii yälrnibeduxh, yälraptduxh,
yälnanduxh, yälmilagwr.

Riäjlza guiliä'pnu xpala'nni, guzuxhijbnu lojni gañnumi, gudeednu xquixtios lojni.

¹³ Dxejcti biejn diagä xse' guiragajcreni, guiraa reni benchee Dios ni yu' xhaguibaa, näj guiraa reni yu' loj quedxliujre, näjza guiraa reni yu' xhajät nez nen quedxliuj näj lo nisdoo, biejn diagä caniireni scree: Loj nani sobga' lo yagxhilro cadro rnibeeni, näjza loj ni najc Xil xten Dios, laatisni sacduxhni, guiliä'pnu xpala'nni, guzuxhijbnu nez lojna gañnumi, gäbzanzu rinibeeni par tejpas.

¹⁴ Dxejcti guidap remanga rnigajcreni scree:

—Sugacni si'c.

Dxejcti guigalbitap rebengool bazuxhi-jbreni nez loj nani nabajn par tejpas, go-jñrenini.

6

Guigajdz resei

¹ Dxejcti bahuiä loj ni najc Xil xten Dios. Batiäjsni tej seiiga. Biejn diagä gunii tej lo guidap remanga, luxh che guniini riejin xse'ni si'c che ni canii guzii, najni loä:

—Gudaa te fiilu.

² Dxejc bahuiä lo te cabai nol. Nani bijb dejtzni ca' te arcw nani rucuua fle'ch. Badeedreni te coron lojni. Biriini cayujnni gaan te chanuutis gunni gaan.

³ Che batiajsni ni rojp seiiga, biejn diagä gunii ni rojp manga, najni loä:

—Gudaa te fiilu.

⁴ Dxejc bahuiä lo te cabai xniaa. Loj nani bijb cabai xniaaga badeedreni yälrnibee gudzucajni yälnadoo, yälrbedxilajz, lo quedxliujre, te ju't sa' rebejn. Badeedreni te spadro cua'ni.

⁵ Dxejcti che batiajsni ni riojñ seiiga, biejn diagä gunii ni riojñ manga, najni loä:

—Gudaa te fiilu.

Dxejc bahuiä lo te cabai yas. Nani bijbni naazni te balans. ⁶ Biejn diagä astoo galäii guidap remanga, birii xse' te ni canii scree:

—Tej kil xob xca'l u gunlu dzuuun tebdxej; choq kil salbaad xca'l u gunlu dzuuun tebdxej. Niluxh na'c guhuallu bin niclaza se't.

⁷ Dxejcti che batiajsni ni rdap seiiga, biejn diagä gunii ni rdap manga, najni loä:

—Gudaa te fiilu.

⁸ Dxejc bahuiä lo te cabai gojtz. Nani bijbni laa yälgujt, luxh dejtzni siädnalgajc ni rnibee gabijl. Gula'ni rebejn ni re' lo quedxliujre gujcreni tajp gala', dxejc loj redee badeedreni guinibeereni lo te cuaa rebenguedxliuj te ju'treni rebejnga con spaad, näj yälrliaan, näj yälraxhhuu, näjza remanduxh ni yu' dajn.

⁹ Dxejcti che batiajsni ni rajc gaii seiiga, bahuiä nez ni' xpiändxan Dios, ro'c naga' xaim rebejn nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios. ¹⁰ Dipduxh caniireni, canabreni lo Dios, räjpreni:

—Dad, ni najc Dxan, ni najc guliipac.

—Gucli cuääz, gaclaa gun Guejblu yälguxhtis

loj reni bagu't nuure lo guedxliuj te quiixreni ni bejnreni?

¹¹ Dxejcti cua'reni te ladnolbäj gojt tegareni. Dxejc räjpreni lojreni cuäzsi-jcreni, gusilajzreni, läl ni guiza' resa'reni ni rusule' xtidx Dios, ni churu gugu'treni sigajc bagu'treni laareni.

¹² Bahuiäza cheni batijänsni ni rajc xho'p seiiga, luxh gujc te xuduxh, bigasboo loj gubijdx si'c te ladyas, sas bääi gujc guidebni si'c rejn. ¹³ Rebajl ni yu' xhaguibaa bite-jbreni lo guedxliujre, si'c rtejb rebetz yagx-hejñ che rusniib te beduxh yajgga. ¹⁴ Dxejcti gunitloj guibaa si'cni rmítloj te guijtz che re'ni, rajcni te biliu. Guiraa redajn näjza reyuj ni re' galäii lo nisdoo biniibreni, bidxaa xlajdreni. ¹⁵ Ni'cni guiraa reben guedxliuj, rebejn nani rnibee, näjza rebenro, näjza recapitán, näjza reben rapduxh, näjza reben ni nadiplajzreni, näjza remos, näjza renani rut lojdi yu'reni, guiragajcreni baxunreni, huicuatzlojreni neñ rebiliäa neñ redajn. ¹⁶ Dxejc räjpreni loj redajn, loj reguilaj:

—Colquitejb yejcnu, colgucua'tz nuure loj nani rbej lo yagxhilro xhaguibaa näjza loj yälguxhtis xten nani najc Xiiil xten Dios.

¹⁷ Sa'csi abidzujn dxero xten xcälguxhtisni, ¿chuni'c sajc suu neñ lojni?

7

Tegayuu tiubitajp mil rexpejn Israel

¹ Dxejcti bahuiä lo tajp xangl Dios ni suga' loj guidajp laad guedxliuj. Caguscuaäzreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yejc reyajg. ² Bahuiä lo stee xangl Dios, ni siääd nez cadro rliejn gubijdx, ca'ní seii xten Gueb Dios ni nabajn par tejpas. Dipduxh guniimi lo guidap xangl Dios ni rajp yälrnibee te gunreni daan lo guedxliuj, näjza lo nisdoo. ³ Räjpni lojreni:

—Guläzsijctero, läl ni guicuaanu te seen lo cuaj reni najc xpejñ Dios, te dxejcru sajc guntu daan lo yuj, näj loj nisdoo, näj loj reyajg.

⁴ Dxejcti biejn diagä najreni bal bejn guyu' seenga lo cuajreni, basa'reni tegayuu tiubitajp mil bejn ni bibeet tzubitio'p mil; loj rexpejn Rubén bibeet tzubitio'p mil; ⁵ loj rexpejn Gad bibeet tzubitio'p mil; ⁶ loj

rexpejn Aser bibeet tzubitio'p mil; loj rexpejn Neftalí bibeet tzubitio'p mil; loj rexpejn Manasés bibeet tzubitio'p mil; ⁷ loj rexpejn Simeón bibeet tzubitio'p mil; loj rexpejn Leví bibeet tzubitio'p mil; loj rexpejn Isacar bibeet tzubitio'p mil; ⁸ loj rexpejn Zabulón bibeet tzubitio'p mil; loj rexpejn José bibeet tzubitio'p mil; loj rexpejn Benjamín bibeet tzubitio'p mil.

Benguixhuj ni najcw ladnolbäj

⁹ Dxejcti bahuiä lo xhidalduxh bejn, benguixhuj, nicla tej bejn digacdi gula-breni. Garen-garen ladx-bejn siäädreni, garen-garen najc lajdxreni, näj raz xten-reni, näj xtiidxreni. Suga'reni nez loj yagx-hilro xten ni rnibee, näjza nez lojni ni najc Xiiil xten Dios. Najcwreni ladnolbäj, ca'zareni ziji. ¹⁰ Dipduxh rnireni, räjpreni: Dios ni rnibee lo yagxhilro, näjza nani najc Xiiilre,

baslaareni nuure lo xtojlnu.

¹¹ Suga'za guiraa rexangl Dios guideb gabii yagxhilro cadro rnibeeni, näjza guideb gabii rebengool näjza guidap remanga, dxejcti bazuxhjibreni, basajbreni lojreni nez lo Dios, ¹² räjpreni:

Sugacni si'c. Loj Xtiostisnu colye'tz sac-duxhni; colguliä'p xpala'nni; laatisni rajpni yälnajn; lojtsi colgudeed xquixhtios, laatisni col-gan, colsuxhijb lojni; laatisni rajpni yälrnibee näjza yälmilagwr. Sugacni si'c par tejpas.

¹³ Dxejc gunii te bengool loä, najni:

—Renani najcw reladnolbäjre, ¿chu najcreni? ¿Casiäädreni?

¹⁴ Dxejcti räpä lojni:

—Dad, anajn Guejblu.

Dxejc najni loä:

—Redee najc renani agudejd yältrabajw-duxh, renani abia rextojlreni sa'csi xtiejin Xiiil xten Dios agudijx xtojlreni. ¹⁵ Ni'cni suga'reni nez loj yagxhilro xten Dios dxej-yääl cayujnreni xtuunni neñ xquidooni. Ni'cni sacnäj nani sobga' lo yagxhilroga guiraa renani suga' nez lojni, sunäjtisni laareni. ¹⁶ Dirurení guiliaan, niclaza jio-jlreni, diza gubijdx guze'c lojreni, dizareni gacnanlaa. ¹⁷ Sa'csi nani najc Xiiil xten Dios ni sobga' galäii loj yagxhilro xten Dios,

laani cayajpnireni si'c xilbäz, sinänirení cadro yu' nisyá ni rudedd yäl nabajñ par tejpas. Suspijdz Dios nisbee balojreni, dirurení goon par tejpas.

8

Ni rajc gajdz seiiga

¹ Che batiajsni ni rajc gajdz seiiga, gucdxi xhaguibaa si'cti med or. ² Dxejcti bahuiä loj guigajdz xangl Dios ni suga' nez loj Dios. Lojreni badeedreni gajdz trompe't. ³ Dxejctiru biääd stee angl, ca'ní te bacue ni najc ganax oor, bazujnini nez loj piändxan. Badeedreni lojni naclejn yaal te cachaagnini loj guiraa rextidx xpejn Dios ni rniireni che rbedx-rniabreni lo Dios, te checni lo piändxan ni najc ganax oor, ni yu' nez loj yagxhilroga. ⁴ Dxejcti gujxhga nägajc rextidx rexepjñ Dios, birii ladsnaa xangl Dios ni ca' bacue, huä'preni nez loj Dios. ⁵ Dxejcti lagajc angliga cua'ní guiboo ni dzuu lo piändxanga, bachajni bacue, dxejcti baslojnni lo quedxliuj. Dxejcti guyu' te guziduxh, bidinyaduxh, gujcta te xuduxh.

Retrompe't

⁶ Dxejcti guigajdz rexangl Dios ni ca' guigajdz retrompe't, guzusinreni te guisloj golreni retrompe'tga.

⁷ Che bil trumpetganid, guixob näj guiboo nu'chreni rejn gusloj cayajbreni loj quedxliuj. Dxejcti huejc ni riojn la' quedxliuj, huejcta ni riojn la' reyajg näjza guirali recuaan.

⁸ Che bil ni rojp xangl Dios trompe't ni ca'ní, ascanu yu' chu bacuaani biajb si'c te danro ni cayejo loj nisdoo. Dxejcti gujc ni riojn la' nisdoo si'c rejn. ⁹ Dxejcti gujt ni riojn la' rebäjl näj guiraa reman ni yu' loj nisdoo. Gunitlojza ni riojn la' rebarcw ni sazaj lo nisdoo.

¹⁰ Che bil ni riojn xangl Dios trompe't ni ca'ní, biajb te balro xhaguibaa, cayejcn si'c te balguejd. Biejbni loj ni riojn la' regueuu, näjza cadro rliejn nis. ¹¹ Laj bajlga najc Ajenjo, ni sälöj te cos ni naqladuxh. Ni riojn la' nis gujc nis naqladuxh. Dxejcti gujt xhidaldukh bejn xcuent nisnalaaga.

¹² Che bil ni rdajp xangl Dios trompe't ni ca'ní, guxhijn ni riojn la' gubijdx, näjza ni riojn la' bääi, näjza ni riojn la' rebal

xhaguibaa, bicäjyreni. Dxejcti dirurení guzanjin ni riojn la' dxej, näj ni riojn la' yääl.

¹³ Dxejcti bahuiä xhaguibaa, biejn diagä si'c te bisij cagutajt nez galäi xhaguibaa. Biejn diagä cabedxa'ni, caniini rediidxre:

— ¡Aii! ¡Aii! ¡Aii! Riaduxhä reben quedxliuj che guisloj gol schon rexangl Dios retrompe't ni ca'reni. Sidejd reben quedxliuj trabajwduxhru.

9

¹ Che bil ni rgaii xangl Dios trompe't, bahuiä lo te bal xhaguibaa ni bitejb lo quedxliujli. Bajl xhaguibaaga cua'ni liäii ni ruxhal ro' gabijl. ² Baxhaltini ro' gabijl, dxejc huäjs te gujxh ro'ní si'c räjs gujxh ro' te orguiboro. Dxejcti gujxhga basäuni loj gubijdx, gudxajni lo bej. ³ Dxejcti lo gujxhga birii bettsu gusujreni guideb lo quedxliuj. Cua'reni yälrnibee gacreni nialajz si'c nialajz renaxejb. ⁴ Cua' remanga yälrnibee na'c gurreni daan loj reguixa', loj recuaan, loj reyagbjn; rebejntis nani xhet beedi xten Dios caj lo cuajreni, reni'c gusacsíreni. ⁵ Cua'reni yälrnibee na'c ju'tni bejn, gaii bääi gusacsíreni xcälnayanreni bejn. Luxh xcälnayanreni najc si'c yäl-nayan cadro rauya' te naxejb te bejn. ⁶ Nen redxejga, siguuil rebejn yälgjut, luxh direni guidxälni. Luxh mase rlajzreni guetreni, sibicaj yälgjut lojreni.

⁷ Rebetzsue najc si'c recabaii ni suchee te chääreni lo guer. Yejcreni yu' te ni najc si'c te coron oor; luxh lojreni rujn si'c loj rebejn. ⁸ Xquichejcreni si'c najc xquichejc gunaa; reläjyreni najc si'c läjy lion.

⁹ Luxh guideb tiejxhreni caj si'c guuib ni rusäudzu'tzreni. Rubeduxh rexhigaareni, si'c rubej che ruxuj xhidaldukh cabaii näj xcarreni che agojl chääreni guer.

¹⁰ Xhibaareni najc si'c xhibaan naxejb, xcuchreni yu' yäl-nayan te gusacsíreni reben quedxliuj gaii bääi. ¹¹ Yu'za ni rnibee lojreni, xangl bendxbab ni birii gabijl. Xtidx hebreo laani Abadón, xtidx griegw, laani Apolión.

¹² Naj agudejd tej casionroga, naj cayäädx stio'pni.

¹³ Che bil ni rxho'p xangl Dios trompe't, biejn diagä te xse' bejn ni lascanu siäääni galäi guidajp reca'ch ni caj lo xpiändxan ni nac-chee ganax oor, ni yu' nez loj Dios.

¹⁴ Luxh xse' bejnga canii loj ni najc rxho'p xangl Diosga, ni ca' trompe't:

—Baslaa guidap reangl nani caduu nez rogueuu ni laa Eufrates.

¹⁵ Dxejcti baslaani guidap reanglga te ju'treni ni riojn la' ben guedxliuj. Luxh gule Dios reanglga parpac dxejga, bääiga, ijzga.

¹⁶ Biejn diagä bal najc guiraa resoldaad ni rbibj cabaii: najcreni tio'p gayuu miyon.

¹⁷ Scree bahuiä lo bacal recabaiiga näjza renani bijb recabaiiga. Lastoo reni bijb recabaii caj te guijb, najcni xniaa näj zul näj gojtz. Dxejcrux yejc recabaiiga najc si'c yejc te beedz. Ro'reni carii bajl näj gujxh, näj sufr. ¹⁸ Ni riojn cuua bejn gujt xcuent guichon replaag nani carii ro' recabaii, xcuent bajl näj gujxh, näjza sufr. ¹⁹ Recabaii runnäj daan ro'reni näjza xhibaanreni, sa'csi xhibaanreni najc si'c bäl, yu' yejcreni, näj ni'c runnäjreni daan.

²⁰ Luxh guiraa rebejn nani di replaagre nugu't, direni nusiech lajzreni xcuent ni cayujn naareni, te rajnreni rebendxab, näjza rebanäjb ni nac-chee oor, näjza pla't, näjza latón, näjza guij, näjza yajg. Luxh rebanäjbga di gacdi fireni, di diajgreni jiejn, di gacdi sareni. ²¹ Diza rebejnga nusiech lajzreni xcuent xcälrugu'treni, xcälrugunreni yälbidxaa, xcälrugunreni bejn ni di gacchäálni, niclaza xcälgubaanreni.

10

Te angl ni ca' te guijtz

¹ Bahuiä stee xangl Dios ni rajp yälrnibeduxh, siädjäjtji xhaguibaa, li yu'nii neq bäd, yejcnii dejd xquitgubijdx, luxh lojni najc si'c gubijdx. Reni'ni najc si'c tio'p pilajr bajl. ² Ca'ni te librbäze', naxhal libre'ga. Bazujni ni'ni ladbee loj nisdoo, bazujni ni'ni ladbäjgw lo yuj, ³ dxejcti guredxaduxh angla si'c rbedxa' beedz. Dxejcrux gunii guigajdz guzzi sigajcsa. ⁴ Che gulujx gunii guiziiga, narä rlazä nuucuaä lo guijtz nani guniireni, per biejn diagä xse' tej ni gunii xhaguibaa, najni loä:

—Guluchedu'tz rediidxga nani gunii reguzii, na'c gucuaaluni.

⁵ Angl nani suj ni'ni loj nisdoo näjza loj yuj, guläs naani ladbee nez xhaguibaa.

⁶ Guniliimi diidx con laj GuebDios ni nabajn par tejpas, ni guläxtiej xhaguibaa näjza guiraa ni tre' xhaguibaa; ni guläxtiej

guedxliujre näjza guiraa ni tre' lojni; ni guläxtiej nisdoo näjza guiraa ni tre' nen nisdoo. Räjpni:

—Diru redxejre gaclaa. ⁷ Che guidzujntx dxej ni agojl gol ni najc rgajdz xangl Dios ni ca' trompe't, dxejc abaza' rextidxxhiga'tz Dios, si'c ni basule' redade' ni gunii xtidx Dios agujc xchero.

⁸ Dxejc gunisac xse' nani gunii xhaguibaa, stehuält biejn diagä caniini loä, najni:

—Huij, te xca'lub libre' ni naxhal ni yu' ladznaa angl ni suj te laad ni'ni loj nisdoo, stelaad ni'ni lo guedxliuj.

⁹ Dxejcti hua'ä lo anglga, räpä lojni:

¹⁰ —Guniidxlu libre'ga.

Laani najni loä:

—Anire, cua'ni, gudajwni. Sun nanlaani xque'lu, niluxh ro'lu sajcnii nejxh si'c dzujn.

¹¹ Dxejcti cua'ä libre'ga lo qaa anglga, dx-ejc gudauäni. Ro'ä guyu'ni nejxh si'c dzujn, luxh che gudämäni, lacti guc nanlaani xque'ä. ¹² Dxejc najni loä:

—Nanab chasulesaclu xtidx Dios xcuent nani churu gac loj xhidualduxh bejn, näjza guejdx, näjza renani rnii garen-garen xtidxreni, näjza loj rereii.

11

Tio'p niguii ni rusule' xtidx Dios

¹³ Dxejcti baniidxnii loä si'c te biquii nani rurejxh. Dxejc guyu' chu naj loä:

—Huisu te charejxhlu xquidoo Dios, näjza piändxan, balabza balti bejn rusux-hijb nenga. ¹⁴ Na'c gutiexhlu gabi lole' guidooga, sa'csi ni'c acua' rebenzijtni te tiubitio'p bääi chaläjsreni guedxdan si'ctis ni rlajzreni. ¹⁵ Narä sudedä yälrnibee lo tio'p dade' ni guinii diidx xcuentä, luxh guideb najcwreni ladyas, susule'reni xtidxä lojreni te mil tio'pgayuu gayojn dxej.

¹⁶ Guiro'preni najc si'c tio'p yag oliib, si'c tio'p gandilieer ni suga' nez lo Dios. ¹⁷ Palga yu' chu bejn rlajz gun latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riäjl guet chutis ni rlajz gun latsiajreni. ¹⁸ Guiro'p redade'ga rajp yälrnibee te gusäuren xhaguibaa te na'c jiajb nisgujj guideb neq redxej nani cagusule'reni xtidx Dios, rajpzareni yälrnibee te guchaareni nis te gacni rejn, rajpzareni yälrnibee te jiädgusacsí xhitis plaag lo

guedxliuj, si'ctis huält ni rlajzreni. ⁷Che luux gusule'reni xtidx Dios, dxejcti ni najc si'c te man nialajz sirii gabijl te jiädchagdijlni guiro'preni. Sujnni gaan-reni, sugu'tnireni. ⁸Dxejcti jia'n guiro'p rebengutga lad caii xten guejdx cadro bacuaareni Dad Jesucrist lo crujz. Guedxroga rbälajzareni Sodoma näjza Egipio. ⁹Chon dxej garol guiraa rebejn ni siääd quedxbäz, ni siääd quedxro, ni najc garen-garen raz, ni rnii garen-garen xtidx guiraa rebejn quedxliuj, suhuij loj guiro'p rebengutga, direni gusaan guiga'tzreni nen baa. ¹⁰Guiraa renani nabajn lo quedxliujre sibalazduxhreni sa'csi gjutreni. Luxh sa'csi rbalajzduxhreni, suxhalzareni xhi xca'sa'reni; sa'csi guiro'p redade' ni basule'xtidx Dios baxhal trabajwduxh lojreni. ¹¹Che gudejd chon dxej garolga, baspansac Diosreni, dxejcti huitiesacreni. Guiraa reni bahuij lojreni, bidxebeduxhreni. ¹²Dxejcti biejn diajg guiro'preni xse' te ni canii dip-duxh desde xhaguibaa, räjpni lojreni:

—Colchä'p jiaare.

Dxejcti huä'preni xhaguibaa lo te za, luxh guiraa renani rdxe'ch lojreni, bahui-ireni huä'preni xhaguibaa. ¹³Lagajc orga gujc te xuduxh, gureba'n tej lo tzuu la' guejdxga, gujt gajdz mil bejn lo xu ni gujc ro'c. Rebejn ni bia'n ro'c bidxebeduxhreni, guslojreni calä'preni xpala'n Dios ni yu' xhaguibaa.

¹⁴Si'cti gulujx ni rojp casioon, luxh agojl guidzujn ni riojnga.

Ni rajc gajdz xangl Dios gol trompe't

¹⁵Che bil ni rajc gajdz xangl Dios trompe't ni ca'ni, dxejc biejn xse' reni dipdujh canii xhaguibaa, cayäppreni:

Xcälrnibee quedxliuj agudejd ladznaa Dad Dios näjza Jesucrist;

luxh laani sinibeeni par tejpas.

¹⁶Galbitajp rebengool nani sobga' lo tron xtenreni cadro rnibee Dios, biabrllojreni nez loj Dios te calä'preni xpala'n Dios. ¹⁷Räjpreni:

Xquixtioste Guejblu Dios, nani rajp yälrnibeduxh, nani najclu, nani gujclu, nani churu gac, sa'csi acua'l u xcälrnibeduxhlu te agusloj canibeelu.

¹⁸Bidxe'ch reben quedxliuj lojlu, luxh abidzujn dxej guidxe'chlù lojreni,

gunlu yälguxhtis rebengut, te gudeedu cossa'c loj rexpejñlu, lo renani gunii xtidx Dios, lo renani huililajz xtiidxlu, lo renani rusux-hijbni nez lojlu; rebenproob sigajc rebenro. Abidzujn dxej che cuäcajlu renani bejn daan quedxliujre, te nitlojreni par tejpas.

¹⁹Dxejc bixal xquidoo Dios ni yu' xhaguibaa, neñ guidooga bieñ te guijn cadre yu' guij cadre caj rediidx ni bia'n Dios loj rexpejñ Israel. Dxejcti lacti bidinya', lacti guiniiza reguziro, gujc te xu, dxejc biajb te guixobroduxh.

12

Te gunaa näj te ni najc si'c te gutiatzro

¹Dxejcti guyu' te senro xhaguibaa: te gunaa ni najcw si'c gubijdx, ni'ni sojb bääi, yejcni yu' te coron ni nac-chee tzubitio'p balxhaguibaa. ²Gunaare nuxi'nni. Rbedxa'ni sa'csi agusloj cayu' yoob xque'ni te gaal xi'nni, cadejdni trabajwduxh. ³Dxejcti bahuiä stee seen xhaguibaa: te manxniaa ni rujin lojni si'c loj te gutiatzro, manduxhni. Yu' gajdz bitiuyejcni, sojb tzuu xca'chmi. Tejga yejcni yu' te corog, najcreni gajdz coron.

⁴Dxejcti xhibaanni cagobxajxhni ni rioxn la' rebalxhaguibaa, dxejcti bacuaanirenlo quedxliuj. Dxejcti biädsu manroga nez loj gunaaga ni ameer gaal xi'nni, te gauni xi'nni che gaalni. ⁵Dxejcti gojl xi'n gunaaga, najcni te niguii, luxh te bar guuib nungäj guinibenäjni lo guiraa reben quedxliuj. Guläsgajcreni bätzga te sanärenini xhaguibaa cadre rnibee Dios.

⁶Dxejcti baxuq gunaaga, siini nez loj reyubijdz cadre yu' te lajt ni basuchee Dios te cuääzni, te ro'c guyaanini te mil tio'p gayuu gayojn dxej.

⁷Dxejc guyu' guer xhaguibaa, xangl Dios nani laa Miguejl näj resa'ni bacuanäjreni gutiatzro. Gutiatzroga näjza rexanglni gudilduxhreni, ⁸niluxh direni niujn gaan, luxh di niajcdiru nia'n manga näjza resa'ni xhaguibaa. ⁹Dxejcti bacuaareni manroga näjza resa'ni lo quedxliujre. Laani najc ni gujc bäl galoroga, ni najc gueb Bendxab, ni laaza Satanás, ni rusguec guideb quedxliujre.

¹⁰Dxejcti biejn diagä xse' te ni canii dip-duxh xhaguibaali, räjpni:

—Abidzujn yälruslaa lo dojl, näj yälmi-lagwr, näj yälrnibero xten Dios, näjza yälrnibee xten Jesucrist, sa'csi agulääreni bejn nani entis rbe'c xquej rexpejn Dios loj Dios dxej-yää. ¹¹Laareni gujc bejnreni gaan loj bendxbare, xcuent xtiejn ni najc Xil xten Dios, näjza sa'csi huililazsa'creni xtidx Dios, dizareni nidxejb mase niejtzareni. ¹²Ni'cni, guiraa la'tu ni yu' xhaguibaa näjza gueb xhaguibaa, colquibalazduxh. Niluxh riaduxhnu renani rbäjz lo quedxli-jre, näjza lo nisdoo, sa'csi abiäjt bendxbab lo quedxliju, luxh cadxechduxhni sa'csi ana-jnni guxii dxej rajpni.

¹³Che gucbee gutiatzroga abacuaarenini lo quedxliju, birinajlni gunaa nani guyu' xi'ngaanni te gusacsinini. ¹⁴Dxejc badeed Dios lo gunaaga tio'p xhiga xten bisiro, te gac gutajtni nez lo reyubijdz cadro nac-chee cadro cuääzni. Chon ijz garol guyu'ni ro'c, nacuatzlojni lo bälga. ¹⁵Dxejcti ro' gutiatzrore birii nis si'c te gueuu te nuslo'ni gunaaga. ¹⁶Dxejc gucnäj quedxliju gunaaga, baxhal quedxliju ro'ni, gu'nii gueuu ni birii ro' gutiatzroga. ¹⁷Dxejc bidxech-duxh gutiatzroga loj gunaaga, ni'c sääni te gucuanäjni sgaii rex'i gunaaga, renani cagusoob diidx ni gunibee Dios, renani rililajzza xtidx Jesucrist.

13

Tio'p manduxh

¹Narä gusuä lo yujxh ni tre' ro' nisdoo, dxejc bahuiä carii te manro lo nisdoo. Sojb tzuu xca'chni. Dxejc lo tejga xca'chni yu' te coroñ. Yu' gajdz bitiuyejcni cadro caj diidx ni rniyaj Dios. ²Manduxhre najc si'c te beedz, ni'ni najc si'c ni' te os, luxh ro'ni najc si'c ro' te bedzro. Gutiatzroga badeed xcälmilaagwrri lojni, näjza troj cadro rbe-jni, näjza xcälrnibeduxhni. ³Dxejcti bahuiä te yejcni najc ascanu yu' chu batiuugni con madxed, ameer guetni, luxh biajc cadro gurujg yejcni. Ni'cni rdxeloduxh guiralii rebejn quedxliju, sanajlreni manduxhga. ⁴Bazuxhijbreni gojnreni gutiatzroga sa'csi badeedni xcälrnibeeni lo manduxhga, dxejctiru bazuxhijbreni gojnzanreni manroga, räjpreni:

—Chu stee najc si'c manrore, ä? Chu laa ni gac guichagdijlni, gucuanäjnini?

⁵Yu' chu badeedza lo manroga diidx dxejcti gusloj caniini guiraloj didx-guyalajz, diidx ni rniyaj Dios. Yu'za chu badeed ga'pni yälrnibee tiubitio'p bäii, gunni si'ctis ni rlajzni. ⁶Baxhalni ro'ni, guniyaduxhni Dios, guniyajni laj Dios, näjza xquidoo Dios, nalajznu renani yu' xhaguibaa. ⁷Dxejcti yu' chu basaan bacuanäj manroga rexpejn Dios. Bejn manroga gaan rexpejn Dios, dxejcti gunibee manroga guiraa reguedxbäz, näj guiraa rebejn ni rnii garen-garen xtiidxreni, näjza guiraa reguedxroduxh. ⁸Dxejcti guiraa reben quedxlijuj sazuxhijbreni, sagajlreni manroga, guiraa rebejn nani di lajreni nicaj lo libr xten yälnbabajn xten Xil nani gujt xcentreni, sa'csi galooli guirixtiej quedxlijuj cuaj lo guijtzre laj guiraa ni gac xpejn Dios.

⁹Palga yu' chu rlajz cuadiajgni, sugu-cuadiagsa'cni. ¹⁰Palga yu' chu nungäjlijiäuu nen latzguiib, siäuupacni. Chutis ni ju't te bejn con te madxed, con madxedza guetni. Ni'cni renani anumbee Dios, riäjli gunreni huant, chanuutis chalilazsa'creni xtidx Dios.

¹¹Dxejcti bahuiä loj stee manro, cariini nen yuj. Sojb tio'p xca'chni si'c xca'ch te xil, rniini si'c rnii te gutiatz. ¹²Luxh rnibeezani si'cni rnibee manroga lagajc nez loj manroga, rujnzani rusuxhijb reben quedxlijuj loj manrogalooga ni gurujc yejcni, luxh biajc yejcni. ¹³Manroga ni birii neñ yuj rujnzani remilagwrro, ru-jnni rtejb bal-guibo xhaguibaali, rtejbni lo quedxlijuj nez loj rebejn. ¹⁴Rusgueeni rebejn nani nabajn lo quedxlijuj xcuent remilag-wrro nani rujnni nez loj manrogalooga. Guinibeeni gun reben quedxlijuj te banäjb si'c najc manroga nani batiuug madxed yejcni, luxh biajza yejcni. ¹⁵Dxejcti man ni rojrga baspajn banäjbga te guinii banäjbga, dxejcti gunibeeni guet guiraa rebejn nani di guzuxhijb lojni te ganrenini. ¹⁶Guinibeezani chu bejn te seen lo cuajni o naani ladbee, guiraa rebejn ni xhet rajpdi, guiraa rebejn ni rajp, guiraa reni najc mos, guiraa reni najc lam, guiraa reni najc benro, guiraa reni najcza benbäz. ¹⁷Guinibeezani digacdii sii, digacdiza guto' bejn palga xhet seendi caj

naani o lo cuajni. Seenga nafc laj manga o numbr xten laj manga. ¹⁸ Dee rquiin yälnajn. Renani rajp yälnajn sugulabreni xseen manga, numbrga nafc si'c xnumbr bejn; numbr xten manga nafc xho'p gayuu gayonbixho'p.

14

Dij ni rol te gayuu tiubitajp mil

¹Che bahuiä stee, bahuiä suga' Xiiil xten Dios yejc dajn ni laa Sión. Saganäjni te gayuu tiubitajp mil bejn nani caj lo cuajreni laj Xiiil näj laj Xtadni. ²Biejn diagä rubej xhaguibali, rubeduxh, riejinri si'c rubej xhidajl gueuro, näj te guziro; rieijnzani si'cni riejin che cayol xhidajl bejn ni rol arp. ³Cayolreni te dicoob nez loj tron cadro rbej nani rnibee, näjza nez loj guidap reni nafc si'c man ni nabajnpac, näjza nez loj reben-gool. Rutliidi gujc bisieeddi dijga, xtebtis tegayuu tiubitajp mil bejn nani gulaa lo reben guedxliuj. ⁴Reniguiire nafc renani gajd xhin con gunaa; nicla tejreni di niesnäj te gunaa, najcreni ben dxan. Laareni rinalreni Xiiil xten Dios cadrotis sääni. Redee gulaa lo reben guedxliuj si'c te gojn lo Dios näjza lo Xiiil xten Dios. Gojnre nafc si'c gonganid ni rudeed bejn xten te cose'ch. ⁵Nicla tej didx-xhii di guirii ro'reni, sa'csi xhetliidi xtojalreni, nayareni suga'reni nez loj tron cadro rnibee Dios.

Rediidx nani bazule' jion rexangl Dios

⁶Dxejcti bahuiä loj stee xangl Dios, rutajtni nez galäii xhaguibaa, siädnäni diidx ni nafc par tejpas xten Dios te gusule'nini loj reben guedxliuj, guiraa lo reguedxro, guiraa lo reguedxbäz, loj reben ni nafc garen-garen raz, nani rnii garen-garen xtididreni. Dipduxh guniini, räjpni:

—Colguidxejb Dios, colgulia'p xpala'n Dioś sa'csi abidzujn or gunni yälguxhtis guiraa rebejn. Colguzuhjib loj nani benchee xhaguibaa, näjza guedxliuj, näjza nisdoo, näjza cadro rliejn nis.

⁸Dxejcti siädnajl stee angl nani canii:

—Abajb, abajb guejdxroga nani laa Babilonia, sa'csi baquillni guzojz guiraa reguejdx xten guedxliuj xcuent xcälguxhtisajni, xcuent dojl ni bejnni guideb lagaa; nafcni si'c reni rä' nejp.

⁹Dxejcti biädnajl ni riojn xangl Dios, dipduxh guniini, Räjpni:

—Palga yu' chu bejn guzuhjib loj manroga o loj banäjb ni nafc si'c manroga, o xcäjbni xca'ni xseen manro lo cuajni o lo naani, ¹⁰sidxechdukh Dios lojni, di xcälguxhtisdukh Dios tedcaj lojni. Sidejdpacni trabajwduxh neñ balro näjza azufr nez loj rexangl Dios näjza nez loj Xiiil xten Dios. ¹¹Luxh gujxh xten reni cayejc sä'p nez lojreni guixe-guixee par tejpas. Digacdi gusilajzreni dxej-yääl, renani guzuhjib, reni gojn manroga näjza reni gojn banäjb ni nafc si'c manroga, chutisza ni rca' seen xten lajni. ¹²Ni'cni renani huililajz xtidx Dios, reni rusoobera xtidx Dios, ni rinuutis lo knezyuj Jesucrist, nanab di guidxajgreni.

¹³Biejn diagä xse' te ni caniini loä xhaguibali:

—Scree bacuua: “Chicbaa rebejn ni guet najli nani rililajz xtidx Jesucrist.” “Guliini”, naj Sprit Dxan xten Dios: “Te gusilajzreni, na'cru gunreni dzuun, sa'csi anancheenu xhi dzuun bejnreni.”

Yälnasa'c ni rudeed guedxliujre

¹⁴Dxejcti bahuiä tre' te bänol, loj bänolga sobga' te ni nafc si'c Xi'n Dios ni gujc Niguii. Yu' te coroñ ganaxduj oor yejcni, dxejcti naani ca'ni te guiboz ni caduxh ro'ni.

¹⁵Dxejcti birii te xangl Dios loj xquidoo Dios, dipduxh caniini loj ni sobga' loj bädja, räjpni:

—Basäl xquibozlu, batiuug, te batie' yälnasa'c, sa'csi agojl or guire' yälnasa'c, guideb guedxliuj aguyajlni.

¹⁶Dxejcti nani sobga' lo bädja basniibni xquibozni, batiuugni yälnasa'c ni caj lo guedxliujre.

¹⁷Dxejcti stee xangl Dios birii neñ guidoo ni yu' xhaguibaa, ca'zani te guiboz ni caduxh ro'ni. ¹⁸Dxejcti birii stee xangl Dios nez loj piändxan xten Dios. Laani rajpni yälrnibee lo balro. Dipduxh guniini, räjpni loj ni ca' guiboz ni caduxh ro'ni, räjpni:

—Basäl xquibozlu nez ni' reyaguub, batiuug guiraa reresim uub ni yu' lo guedxliujre, sa'csi aguyajlreni.

¹⁹Dxejcti batiuug angliga guiraa reresim uub ni yu' lo guedxliujre nalajznu rebenguidx, basälnireni neñ tanc cadro guläjreni yejcni sa'csi rdxechdukh Dios lojreni. ²⁰Dxejcti baläjreni yejc reuub nez orii te guejdx. Biriiduxh rejn yejcreni, gutiäs rejnga, bidzujn rejnga ro'li recabaii, gujcni

si'c che riu' nisro gueuu, biäjtni si'cti chon gayuu mil metr guideb gabi cadro baläjreni yejc reuub.

15

Guigajdz xangl Dios näj lult xcälguxhtis Dios

¹ Dxejcti bahuiä stee senro xhaguibaa, nani bascheloduxh narä. Bahuiä loj gajdz xangl Dios, tejgareni ca' te plaag ni gusacsí reben guedxliuj. Redeetis najc lult, sa'csi che ted redee ati agulujx yälrdxe'ch xten Dios.

² Dxejcti bahuiä loj tej ni najc si'c te nisdoon ni najc si'c bidr nu'chni bajl. Dxejcti galäii nisdooga suga' renani bejn gaan loj manroga näjza lo banäjb ni najc si'c manroga, ni bejnza gaan di nica'reni seen xten lajni. Ca'reni arp xten Dios. ³ Cayolreni dij xten toMoisés ni gujc xpejn Dios, cayolzareni dij xten Xiił xten Dios. Scree najc dijga:

Sacduxh, ruscheloj guiraa redzuun ni rujn Guejblu, Dad Dios, ni rajp guiraa yälrnibee.

Rujn Guejblu ganax dzunsa'c, rnii Guejblu ganax didxlui.

Guejblu rnibee loj guiralii reguejdx ni yu' lo guedxliuj.

⁴Bahuii, Dad, ¿chu laa ni di guidxejb Guejblu ni di guiliä'p xpala'n Guejblu?

Sa'csi Guejbtslu najc dxan, ni'cni guiraa reguejdx ni yu' guedxliuj siädzuxhibreni,

siädgajnreni Guejblu,
sa'csi abaluiloj guiraa rextzunsa'cpac Guejblu.

⁵ Dxejcti bahuiä xhaguibaa, bixal ro' yu' ni najc dxanro neñ guidoo, cadro yuchee guij cadro caj xleii toMoisés. ⁶ Ro' yudx-anroga birii gajdz xangl Dios ni ca' plaag te gusacsíreni reben guedxliuj. Najcwreni te ladlin ni najc nolbäj, ni rdimbichaduxh. Dejd si'c te cinturon lastooreni ni najc ganadxduj oor. ⁷Dxejcti yu' tajp reni najc si'c man nabajn ni yu' nez loj Dios xhaguibaa.

Tej reni badeed loj tejga reangla te co'p ni najc ganadxduj oor. Guidxa tejga rexhijgga xcälguxhtisro Dios nani nabajn par tejpas.

⁸Gudxaj guidoo ni najc yudxanroruga gujxh ni siääd xcuent xcälmilaagwr, xcäldrim-bichaduxh xten Dios. Rut gujcdi biu' neñ

yudxanroruga che gulujxli guiraa replaag ni ca' guigajdz reanglga.

16

Rexhijg ni guidxa xcälguxhtis Dios

¹ Dxejcti biejn diagä xse' te ni canii dipduxh xquidoolini, caniini loj guigajdz rexangl Dios, räjpni:

—Colchäj, colchasloj guigajdz rexhijgga lo guedxliuj, colca' rexhijg ni guidxa xcälguxhtis Dios.

² Anggaloo ni huij, baslojni ni yu' nen xhijg ni ca'ni lo guedxliuj. Dxejc loj guiraa rebejn nani caj xseen manduxh, reni rusux-hibj, rajnreni banäjb ni najc si'c manroga, birii tiejhni te guedxyanduxh ni najc si'c cancer.

³ Dxejc ni rojp angla baslojni ni yu' nen xhijg ni ca'ni loj nisdooo, te bejnni gubixhloj nisdooga gujcnii si'c rejn xten te bengut. Dxejcti gujt guirali reman ni yu' lo nisdooo.

⁴ Ni rijoj angla baslojni ni yu' nen xhijg ni ca'ni loj regueuu näjza cadro rliejin nis. Gubixhlojreni gujcreni rejn. ⁵ Dxejcti biejn diagä gunii angl ni rajp yälrnibee lo nis räjpnii:

—Huenduxh najc Guejblu Dad ni najc naj sigajc gujc Guejblu galoo, dxanduxh najc Guejblu sa'csi cayujn Guejblu yälguxhtis redzunguijdx. ⁶ Sa'csi laareni baxhe'reni rejn, bagu'treni rexpejñlu näjza renani gunii xtiidxlu, luxh naj badeed Guejblu rejn cayä'reni. Si'cpac nungäjł gacreni.

⁷ Dxejcti biejn diagä canii steeni lagajc lo piändxan, räjpnii:

—Gulipiänci Dad Dios ni rajp guirali yälrnibee, xcälguxhtis Guejblu najc laaca, si'c riäjł gacni.

⁸ Dxejcti ni rdajp angla cua' xhijg ni ca'ni, baslojni ni yu' neñ xhijgga lo gubijdx, te badeedni lo gubijdx yälrnibee guze'cnäjri rebejn guiboo. ⁹ Guiraliireni gusloj cayejcreni, lacti nanladuxh, dxejc gusloj caniyajreni Dios ni rajp yälrnibee loj recosga. Niluxh direni nusiechljazreni, niciela niliä'preni xpala'n Dios.

¹⁰ Dxejcti ni rajc rgaii angla cua' xhijg ni ca'ni baslojni ni yu' neñ xhijgga lo tron cadro rnibee manroduxh. Bicäjy guideb cadro rnibee manduxha, luxh rebejn rauya'tisreni lujdxreni sa'csi caya-jcreni yälñayanduxh. ¹¹ Guniyajreni Guej

Dios ni yu' xhaguibaa sa'csi rajcreni yäl-nayanduxh, xcuentza rexquedxnayanreni. Luxh direni nusiechlajzreni xcuent xto-jlreni.

¹² Dxejcti ni rajc xho'p anglga cua'ni xhi-jgni, baslojni ni yu' nen xhijgga loj gueuro ni laa Eufrates. Gueuga gubidzlii nisni te guc-chee te nezyuj xten rereii ni jiääd nez cadro rliejn gubijdx.

¹³ Bahuiäza birii ro' gutiatzro, näjza ro' manro, näjza ro' ni najc profe't ni rusguee, birii chon spritgуйdx ni najc si'c bedz,

¹⁴ sa'csi najcreni resprit xten bendxbab, rujnreni milagwr, senro. Rijreni loj guiraa rereii loj guedxliuj te gutie'reni guiraa bejñ loj guedxliuj te gac guerrodoxh, te gucuanäjreni Gueb Dios ni rajp guiralii yälrnibee che guidzujnni lo guedxliuj.

¹⁵ "Narä siädhiga'tzä si'c riääd te gubaan. Chicbaaza renani cabätz, cagutie'chreni bacal lojni che guiblä si'c rujn nani najcw guiraa xhajbni, te na'c guiga'ni xhabäälni, jianxtujnyi che guibiä." ¹⁶ Dxejc gutie'reni guiraa rebejñre te lajt ni laa lo didx hebre "Armagedón".

¹⁷ Dxejcti ni najc rgajdz anglga cua'ni xhijgni baslojni ni yu' nen xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadro yu' tron cadro rnibee Dios, räjpi:

—Agujcnii, agulujxhni.

¹⁸ Dxejc guyuduxh yälrdinya' näj guziro. Gujca te xuroduxh lo guedxliuj, te xu sa' ni gajdpac gac. ¹⁹ Che gujc xuroga, birajß guedxrodxhga, gujcnii chon la', dxejcti gurebä'n guiraa reguejdx guideb guedxliujre. Dxejc banaj lajz Dios guedxro ni laa Babilonia, bialoj bejn Dios yälgxuxhtis guedxga. ²⁰ Li gubicaj, gunitloj reyuj ni tre' lo nisdoo, gunitlojza redajn. ²¹ Xhaguibaali biajb te guixhobro yejc rebejñ; tejga guix-hobga na' si'cti tiuu kil. Guniyaj rebejñ Dios xcuent guixhobrogaa, sa'csi cuentro-duxh gujcnii.

17

Gun Dios yälgxuxhtis te gunadxab

¹ Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabaw-duxh ni ted gunadxabre ni sobga' cadro yu sijl nis. ² Guiraa rereii lo guedxliujre

bennäjreni gunaaga dojl, sigajcza guiraa reben guedxliuj bennäjreni gunaaga dojl. Gusosnäjreni gunaaga bejnreni si'ctis ni rlajzreni.

³ Dxejcti huinäni narä si'c lo te bacal nez lo reyubijdz. Bahuiä loj te gunaa, bijbni de-jtz te manro ni najc xniaa, luxh guidebni caj diidx ni rniyaj Dios. Gajdz najc bitiuyejcnii, sojbza tzuu xca'chni. ⁴ Gunaaga najcw te lad moraad con xniaa, sucheduxh gunaaga oor, näj reguisa'c, näj perl ni sa'cduxh. Ca'ni te copro ni najc ganaxduj oor ni guidxa ganax recosguijdx, recosdxab ni bennäjni reben guedxliuj. ⁵ Caj te diidx lo cuajni, luxh rut racbeedi xhi sälöj. Scree rnii diidxga: "Babilonro, xnan regunadxab, xnan recos-dxab ni rajc lo guedxliuj." ⁶ Bahuiä agusojz gunadxbaga. Agusosnäjni xtjejn rexpejn Dios nani bagu'tni, näj xtjejn renani basule' xtidx Jesucrist ni bagu'tzani. Che bahuiä lojni, bidxeloduxhä. ⁷ Dxejcti gunii anglga loä, najni:

—¿Xhicuent rdxelojlu, ä? Narä siniä xhi sälöj gunadxbaga, näjza manroga ni sojb gajdz bitiuyejcnii näj tzuu xca'chni.

⁸ Manroga ni bahuiilu gubajnni galoo, niluxh agunitlojni naj, luxh agojl guiriini gabijl, dxejcti sinítlojni stee, sejtni par tejpas. Rebejñ ni nabajñ lo guedxliuj nani di lajreni nicaj lo guijtz xten yälñabajñ xten Dios, guijtz ni guc-chee che birixtiejli guedxliuj, rebejngä sidxeloduxhreni che fiireni loj manroga nani gubajn galoo, ni agunitloj, niluxh naj agubanacsacni.

⁹ 'Ree nanab ga'pni yälñajn. Gajdz rebitiuyejcnii sälöj gajdz dajn cadro sobga' gunaaga, ¹⁰ sälöjzareni gajdz reii. Agujc gaii reiiga ni cayajb. Tej rereiiga canibee naj. Stee reiiga churu jiääd. Luxh che jiääd lult reiiga, guxii dxej guinibeeni. ¹¹ Manro ni gubajñ galoo, ni agunitloj naj, ni'l'c rac xhujñ reii, najczani tej loj guigajdz rereii, luxh sinítlojni, sejtni par tejpas.

¹² 'Guidzuu rexca'chni ni bahuiilu sälöj tzuu reii. Gajdreni guisloj guinibee naj. Laareni näjza manroga xca'reni yälñibee teb or, nalajznu guxii dxej. ¹³ Tejits xhigab gun rereiiga, gudeedreni xcälnadipreni, xcälrnibeereni lo manroga. ¹⁴ Laa redee ni sucuanäj Xiil xten Dios. Dxejcti sujn Xiilga gaan lojreni sa'csi laani najcni Dad ni rniabee loj guiraa redad, najcni Reii ni

rnibee lo guiraa rereii. Luxh renani siädnajlni najc reni agurejdxni, reni agulen, sisiudzu'tznäjrenini.

¹⁵ Dxejcti najza anglga loä:

—Renis ni bahuiilu cadro sobga' gunadxbaga säloj guiraa guejdx, guiraa ben guedxliuj, guiraa bejn ni rnii garen-garencxa xtiidxreni, ni siääd garen-garen reguejdx. ¹⁶ Guitzuu reca'chga näjza manroga ni bahuiilu, sidxe'chreni loj gunadxbaga, suro'nreni gunadxbaga, susa'nreni gunadxbaga xhabäálni, sajwreni bältejxhni, suze'creni gunadxbaga lo guiboo. ¹⁷ Sa'csi abasniił Diosreni te gunreni tejsi xhigab, te gudeedreni xcälrnibeereni lo manroga che guidzujnli dxej ni chale' guira'ti ni gunii Dios gac.

¹⁸ Gunadxbaga ni bahuiilu säloj guedxro ni rnibee loj guiraa rereii loj guedxliuj.

18

Xho jiajb guedx Babilonia

¹ Dxejcti bahuiä loj stee xangl Dios ni siädyäjt xhaguiba. Siädnäni yälrnibeduxh, xcälrimbicha'nii bazanij loj guedxliujre. ² Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, najc xhaguiba. Siädnäni yälrnibeduxh, xcälrimbicha'nii bazanij loj guedxliujre. ³ Sa'csi guiraa reben guedxliuj agusojzreni xcent dojl ni bennäjreni gunadxbaga, guiraa rereii loj guedxliuj bejn dojl gulän-näjreni gunadxbaga, luxh guiraa reben guedxliuj ni ruto' abejnreni ganduxh, agujreni ri'cw xcent recosdxab ni rujn gunabdxabga.

⁴ Dxejcti biejn diagä xse' stee nani canii xhaguiba:

—Colgurii guejdxga rexpenä, te di näj la'tu gunnäjtu gunadxbaga dojl, te di teditu trabawdukh lo replaag xtensi. ⁵ Sa'csi yuduxh rextojlni, abidzujnreni xhaguibaali, luxh abanajza lajz Dios rextojlni. ⁶ Colgudeed loj gunaaga sigajc ni badeedni lojreni. Colquijx loj gunaaga tio'pli huält lo ni bejnni laani. Nen co'p cadro badeedni gu' bejn (te trabajw ni bateedni bejn), lagajc nenga colyejn te ni najc tio'p huält maaazru fuert yä

gunadxbaga, nalajznu tedni trabajw tio'p huält. ⁷ Lacti gulä'p gunaaga xpala'nni, gubajnni si'ctis ni rlajzni lo guedxliuj. Naj colguteed gunaaga trabajw, si'cti mediid ni gulä'pni xpala'nni; si'cti mediidza ni bibalaznäjni mood ni gubajnni, sigajcza gac-huin lastooni sa'csi bejnni xhigab nen lastooni: "Narä sobga'ä ree si'c te rein, te benproduxh, dina gacä biuud, niclaza gac-huin lazä." ⁸ Ni'cni tejsi dxej siajb yejcni guiraa replaag xten Dios: yälgijt, yäluuin lajz, näj yärliliaan, luxh sejczani lo balguiboo, sa'csi rnibeduxh Dad Dios ni gun xcälguxhtisni.

⁹ Guiraa rereii lo guedxliujre ni bennäj gunadxbaga cosgijdx, reni cuansänjini, sonduxhreni, siaduxhreni che fiiren gujxh ni carii cadro cayejci. ¹⁰ Zijtru sisijreni sa'csi rdxejbreni replaag xten gunadxbaga, dxejc siniiżareni:

—Aii, aii, riaduxhnu guedxrore, Babilonia, guedxdipduxh gujclu, luxh chela gucbeenu, ala bidzujn yälguxhtis yejclu.

¹¹ Rebejn ni ruto' loj guedxliuj sonduxhreni, siareni guejdxga sa'csi rutru rsidi xhixtreni ni ruto'reni. ¹² Laareni ruto'reni oor, pla't, guiraloj reguisa'c, perl, ladlin, ladmuraad, ladseed, näjza guiraloj baräjd yagdoo, näj guiraloj cos saru, ni nacchee läi elefant, näj cos saru ni nacchee bronz, näj guilib, näj márm, ¹³ näjza caneel, guiraloj laj comiid, näjza yalnejxh, näj perfum, näjza yaal, näjza bin, näjza se't olib, näjza arinsa'c, näjza triuu, näjza gon, näjza rexii, näjza cabaii, näjza gare't, näjza bejn ni ruto'reni tiejxhreni, xaimreni. Guiraa reni'c ruto'reni. ¹⁴ Dxejc guniiza xse' ni canii xhaguibaali, najni:

—Ninehsa'c ni rlazduxhlu, agunitloj. Guiraa recossa'c, recossaruduxh agubica-jreni lojtu, luxh di gaddiru guidxäl bejn reni'c.

¹⁵ Reni ruto' guiraloj recosga, nani gujreni ri'cw xcent guedxroga, zijtru sisijreni sa'csi rdxejbreni trabajw ni cadeed guejdxga, sonduxhreni, sac-huinduxh lajzreni, ¹⁶ sájbreni:

—Aii, aii, riaduxhnu guedxrore, naii gojtni ladsacduxh, guiraa ladlin, ladmuraad, ladxniaa, gusuchenei con oor, con guisa'c, con perl, ¹⁷ tera'tbäztis baralii recosro ni najc xhixtreni, guxhijneni.

Guiraa recapitán xte barcw, näjza guiraa remarneer, näjza rebejn ni rij biaj lo rebarcw näjza guiraa reni rujn dzuun lo nisdoo, gusujreni zift, ¹⁸ näjza laareni cahui-ireni cayäjs gujxh guejdxga, cabedxa'reni, canuireni:

—¿Xhi stee guejdx najc si'c najc guedxrore, ä?

¹⁹ Bachajreni yuyol yejcreni sa'csi rac-huin lajzreni, binduxhreni, guredxa'reni:

—¡Aii! ¡Aii! Riaduxhnu guedxro sa'csi xcienttis guedxduxhre gujc ri'cwdxuh guiraa rebejn ni rajp barcw ni rujn dzuun loj nisdoo. Luxh naj tera'tbäzsi aguxhijin guedxrore.

²⁰ Guniiza xse' ni yu' xhaguibaa, najni:

—La'tu ni yu' xhaguibaa, la'tu rex-pejn Dios, reapost xtenni, rebejn ni gunii xtidx Dios galoo, colbalasduxh sa'csi abiajb guedxrore, abejn Dios yälguhtis xcient ni bejnni lojtu.

²¹ Dxejcti te xangl Dios ni rajp yälrnibee, guläs te guiro ni najc si'c te guij ni ro't dojb, bacuaanini loj nisdoo, dxejc najni:

—Screeza gac guedxro ni laa Babilonia siajbni lo trabajwduxh, sinitlojni par tejpas, dirutu fii lojni. ²² Diru guibi' jiejn cayel nez xlacaiilu reharp, reflaut, retrompe't; diru guibi' chu tej ni gun xhitis dzuun; diruza guibi' chubej molin ni cayo't. ²³ Diru guibi' jien xcäldimbicha' te bajl ni cagus-nij; diruza guibi' jien xse' bi'n näj dxa'p loj te sa' sa'csi rexpejlu ni ruto' gujcreni benroduxh lo guedxliuj sa'csi basgueezalu reben guedxliuj xcient rextzundxablu.

²⁴ Nen guejdxga bidxäjlza xtiejn renani gunii xtidx Dios, näjza xtiejn rexpejn Dios, näjza xtiejn guiraa reben guedxliuj ni bagu'treni.

19

¹ Che gulujx recosre, biejn diagä las-canu xse' xhidalro bejn ni canii xhaguibaa, cayäppreni:

¡Colguliä'p xpala'n Dios!

Xtentis Dios, xtenni najc yälruslaa lo dojl, näj yälrdimbicha', näj yämilagwr.

² Sa'csi xcälguxhtisni najc ganax laaca, huentis najcni, sa'csi abejnni yälguhtis-

gunadxabga nani caguxhin reben guedxliuj xcient xcälnadxbnii.

Abejn Dios yälguhtisni,

agudijxhni xcient xtiejn rexpejn Dios ni baxhe' gunadxabga, che bagu'tnireni.

³ Guibi' guniizareni:

—¡Colguliä'p xpala'n Dios! Gujxh xten gunadxabga sanuutis cayä'p par tejpas.

⁴ Guiraa regalbitajp rebengool näjza guidap remanabajnga bazuxhijbreni, biabrojreni gojñreni Dios ni rbej lo tron cadro rnibeeni, canuireni:

—Sugaci si'c. ¡Colguliä'p Xpala'n Dios!

⁵ Dxejcti nez lo troŋ cadro rnibee Dios biejn xse' tej ni canii: Colgudeed xquixtios lo Dios, guira'tu ni rujn xtzuu Dios, guira'tu ni rajntu Dios, rebenro sigajc re-bennadolajz.

Sa' xten Xiil xten Dios

⁶ Dxejcti biejn diagä ascanu xse' xhidal-duxh bejn, riejnni si'c che cayäjt nisro xhidajl gue, näjza si'c che caguidxaduxh guzii, canuireni:

¡Colguliä'p xpala'n Dios!

Sa'csi Gueb Dios, Dad xtenuu ni rajp guiralii yälrnibee, ani acanibee.

⁷ Guibalajznu, guibalazduxhnu, guliä'pnu xpala'nni sa'csi abidzijn dxej guchnaa Xiil xten Dios, aguzucheeza dxa'p.

⁸ Abadeedreni ladliq ni najc nuiduxh gacwni.

Ladnolni, luxh rdimbicha'ni sa'csi nayadu-jni.

Ladnayare sälöj redzunsa'c ni bejn rexpejn Dios.

⁹ Najza anglga loä:

—Bacuaa diidxre: “Chicbaa renani bidon jiääd lo xsa' Xiil xten Dios.”

Guniizani loä, najni:

—Rediidxre najc didx-guliipac xten Dios.

¹⁰ Dxejcti bazuxhibä lojni te ganäni, dxejc laani najni loä:

—Na'c gunlu si'c, sa'csi narä nacä sigajc najclu, nacä te ni rujn xtzuu Dios, näjza bejtzlu ni rusule' xtidx Jesucrist. Bazuxhijb lo Diostis sa'csi Dios rudeed gusule' bejn xcient Jesucrist, gusule' zareni xtidx Dios.

Nani bijb te cabainol

¹¹ Dxejcti bahuiä bixal xhaguibaa, bir-icaj te cabainol. Luxh laj nani rbibjñi sälöj casobsa'cpacni diidx, rniiizani ganax

didxgulii. Entis laaca rujnni yälguxhtis, entis laaca rucuaani che rujnni guer.

¹² Rebalojni rbebjl, yejcni yu' xhidalduxh coron, luxh caj te laj lojni nani rutliidi racbee, luxh latatisni racbeeni xhi sälöjni.

¹³ Najcwni te lajd ni nadiini rejn; lajni najcza Xtidx Dios. ¹⁴ Guiraa resoldaad guibaas xten Dios siädnajlni najcwreni ladnol, ladnaya, bijbzareni cabainol. ¹⁵ Ro'ni carii te spaad ni caduxh guiro'p laad ro'ni te ni'c tilnäjni guiralii reguejdx lo guedxliuj, te guinibeeni guiraa reben guedxliuj ca'ni si'c te barguiib. Sujnzani yälguxhtis loj reni rdxechlajz lo Dios, si'c ruläjreni yec uub che rbääreni bin, si'c sujnzna Dios ni rajp guiralii yälrnibee. ¹⁶ Lo xhajbni näjza cuä' cujdni caj lajni: "Reii xten rereii, Dad xten redad."

¹⁷ Bahuiä loj te angl suga'ni galäi gubijdx, cabedxa'ni caniini loj guiraa reman ni ruttaj xhaguibaa, räjpmi:

—Coltaa, colguire' ree, te gautu xcheroduxh xten Dios; ¹⁸ te gautu xpääl rereii, näjza xpääl recapitán, näjza xpääl rebenro, näjza xpääl recabaii, näjza xpääl renani rbijb recabaii, näjza xpääl guiraasi bejn, bejn ni rdo' si'c rdo' guidxaa sigajc rebejn ni di gun xtzuun bejn, rebenbäz sigajc rebenro.

¹⁹ Dxejcti bahuiä loj manro näjza lo rereii guedxliuj, abire'reni te gucuanäjreni nani rbijb cabainol näjza guiraa resoldaad xtenni. ²⁰ Biga' manroga näjza profetxhii ni bejn senro nez loj manroga te basgueeni guiraa renani cua' seen xten manroga, näjza renani bazuxhjib lo banäjb xten manroga. Guiro'p redee bacuaareni guideb nabajñreni nen te bal guiboduxh ni recnäj sufr. ²¹ Dxejc guiraa reni bia'n bagu't spaad ni birii ro' ni bijb cabainol. Guiraa reman xhaguibaa gudajw xpäälreni.

20

Te mil ijjz

¹ Dxejcti bahuiä loj te xangl Dios ni siädjäjt xhaguibaa, siädnäni liäii ni ruxhal guedro ni laa gabijl. Ca'zani te cadenro.

² Anglre gunaaz gutiatzroga, ni gujc bäl galooli, ni najcza bendxab, ni laaza Satanás. Bacuaduunini te mil ijjz. ³ Basälnni nen gabijl, te ro'c basäunini, bacuaani liäii te na'cru gusgueeni reben guedxliuj lał ni

guiza' te mil ijjz. Che guiza' rejzga, empac sibi' lasacni bale'si dxej.

⁴ Dxejc bahuiä retron cadro rbejreni rnibeereni, bahuiäza loj renani rbej lo retron, cua'reni yälrnibee te gunreni yälguxhtis. Dxejcti bahuiä xaim rebejn nani biru' yejcni sa'csi huililajzreni xtidx Jesucrist näjza sa'csi basule'reni xtidx Dios. Direni nuzuxhjib loj gutiatz niclaza lo banäjb ni najc si'c manroga, dizareni nica' seen lo cuajreni nicla lo naareni. Gubansacreni loj rebengut, gurenäjreni Jesucrist te laani gunibenäjreni te mil ijjz.

⁵ Dee najc yälrbandsac galoo lo rebengut. Niluxh stecuad rebengut, direni guibansac che guisa'li te mil ijjz. "Chicbaa rebejn nani guibansac ganidoo, najcreni bendxan ni agubicaj xtojreni. Ni rojp yälgut di guidzujn lojreni. Laareni sajcreni xpixhojz Dios näjza Jesucrist, sibenäjreni Jesucrist, sinibenäjreni Jesucrist te mil ijjz.

⁷ Che guiza' te mil ijjzga, suslasacni Satanás nen gabijl. ⁸ Che guiriini ro'c, gusgueeni guiraa reguejdx ni tre' lo guidap laad guedxliujre. Susgueeni reben Gog näjza reben Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdoo. ⁹ Huä'preni lo te camp cadro gulagdukh. Gudäjyreni guideb gabig cadro rnibee rexpejn Dios nen guedjx nani sanälajz Dios. Per baxhal Dios bal guiboo xhaguibaali bitejbni, te guyejc guiragajcreni. ¹⁰ Dxejc bacuaareni bendxab nani biädgusguee rebejn lo bal guiboo ni cayecnäj sufr, lagajc cadro yu' manro, näjza profetxhii nani basguee; lo bal guiboga susacsírenini sidejdréni trabawdukh dxejyääl par tejpas.

Yälguxhtis ni gujc nez loj tronronol

¹¹ Dxejcti bahuiä lo te tronronol näjza lo nani sobga' lojni te rujnni yälguxhtis. Nez lojni gunitlojli guedxliuj näjza guibaa, xhetru lajtdi bidxäjl par laareni. ¹² Bahuiä lo rebengut, benro sigajc bennadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guijtz xten xcälnabannäj Dios par tejpas. Dxejcti bejnni yälgutxhtis rebengut xcuent ni bejnreni, xcuentza rediidx nani caj loj reguijtzga. ¹³ Guiranejz biääd rebengut: nisdoo batzuug rebengut ni yu' lojni, gabijl

näjza yälgujt batzuugza rebengut ni yu' lo-jreni. Dxejcti bejn Dios yälguxhtis tejgareni xcuent ni bejnreni.¹⁴ Dxejcti bacuaani yälgujt näjza gabijl lo bal guiboo ni najc si'c te nisdoo te ro'c checreni par tejpas. Dee najc yälgujt ni rojp.¹⁵ Guiraa bejn ni di lajni nidxäjlo xlrib yälnabajn bacuaazani reni'c lo bajlga.

21

Xhaguibacoob näjza quedxliucoob

¹Dxejcti bahuiä te xhaguibacoob näjza te quedxliucoob, sa'csi agunitloj guibabiejjw, näjza quedxliubiejjw, luxh xhettiruza nisdoo.²Narä Juan, bahuiä lo quedx Jerusalén-coob, quedxdxan, siädjiäjtni xhaguibaali cadro rnibee Dios. Suceduxhni si'c rsiu-uchee te dxa'p nani agojl guchnaa.³Dxejcti biejn diagä te xse' te ni canii dipduxh, as-canu lo tron cadro rnibee Diosli carii se'ga, scree caniini:

—Colhuii, aguzuj xquidoo Dios galäii rebejn, anabañnjä Dios rebejn, sajczareni rexpejnni. Sibañnjä lagajc Gueb Diosreni.⁴Sutia Dios guiraa nisbee balojreni te na'cru goonreni. Sinitloj yälgujt, xhetru xliajsdi chu, diru bejn goon, dirurenii jiajn, sa'csi guiraa redee ni guyu' galoo agunitloj.

⁵Dxejcti ni sobga' lo tron cadro rnibeeni guniini, najni loä:

—Bahuii, najrä guscobä guira'ti.

Guniizani loä:

—Bacuaa rediidxre, sa'csi gulipacreni, sajc chalilajz bejn rediidxre.

⁶Dxejcti najzani loä:

—Agujcn. Narä näcä A näjza Z, ni sälöj nani rbaxtiej näjza nani ruluux. Lo chutis ni cayojl, sudedxlia'ä nis yäni, nalajznu yälnabajn par tejpas.⁷Chutis nani gun gaan lo dojl, sica'zani guiraa dee si'c yälnasa'c, luxh narä sacä Xtiosni, laani sacni xi'nä.⁸Niluxh renani rdxejb, renani di chalilajz xtidhä, reni rdxe'ch loä, reni rugu't sa'reni, reni runnäj gunaa dojl, renani najc bidxaa, renani rusuxhjib lo banäjb, guiraa renani rusguee rnireni didxxhii, guiragajc reni'c sij lo nisdoo ni najc ganax bal guiboo, cadre rejc guiboo näjza sufr par tejpas. Dee ni najc yälgujt ni rojp.

Guejdx Jerusaléncoob

⁹Dxejcti lo guigajdz xangl Dios ni ca' guigajdz xhijg ni guidxa guigajdz reyälguxhtis xten Dios, birii tejni, najni loä:

—Gudaa, te guluiä lojlu dxa'p nani guchnaa Xiiil xten Dios.

¹⁰Dxejcti bejnni gunixcalä, huinäni narä lo te danro ni jiaduxh, ro'c baluini loä te quedxro, te quedxdxan ni laa Jerusalén, luxh xhaguibaali siädjiäjtni nez lo Dios.

¹¹Guejdxga rdimbicha' guideb xcäldrimbicha' Dios. Luxh yäldrimbicha'ga najc si'c najc te guisacduh ni laa jaspe, rdimbicha'zani si'c biidr.¹²Guideb gabi guejdxga dejd te paderro cadro caj tzubitio'p xpor-tonroni. Te angl xten Dios suga' ro' tejga portonga. Loj tejga portonga, caj laj tej retzubitio'p cuaa xten rexpejnl Israel.¹³Chon portonga caj nez cadro rliejin gubijdx, yu'za chon portonga nez ladbjw, yu'za chon portonga cadro rääz gubijdx.¹⁴Yu' tzubitio'p guiro lo cimient xten guejdxga. Lo tejga reguijga caj laj tej retzubitio'p apost xten Xiiil xten Dios.

¹⁵Angl ni caninäj narä ca' si'c te biquii ni najc ganaxduj oor te gurejxhni guejdxga, näj reportonga, näjza paddeerga.¹⁶Guejdxga najc quadraad: sigajc ni sioolni, sigajcza ni gulajgni. Dxejcti cua'ni biquii barejxni guejdxga, barejxni tio'p mil tio'p gayuu kilómetros tejga laad. Sigajc sioolni, sigajcza gulajgni, sigajcza jiaani.¹⁷Dxejcti barejxni paddeerga, yu'ni gayonbitajp metr seguñ mediid xten bejn, sa'csi ni'c najc ni cagutiehnäjza anglla.

¹⁸Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuajn.¹⁹Recimient xten padeerga nac-chee guisa'c. Guiganid najc guijaspe; ni rojpga najc zafiro; ni riojnga najc ágata; ni rdajpga najc esmeralda;²⁰ni rgaiiga najc onix; ni rxho'pga najc cornalina; ni rgajdzga najc crisólito; ni rxhujinga najc berilo; ni rgaaga najc topacio; ni rtzuuga najc crisopraso; ni rtzubiteeba najc jacinto; ni rdzubitio'pga najc amatista.²¹Guitzubitio'p portonga najc tzubitio'p perl. Tejga portonga guichee tej perl. Nezyuro ni rdeed galäii guejdxga najc ganaxduj oor, rieñni si'c te guihuajn.

²²Dina nuhuiä nicla tej guidoo nen guejdxga, sa'csi suga' Gueb Dios ni rajp guiralii

yälnibeduxh, näjza Xiil xten Dios. Laani najc xquidoo guejdxga. ²³ Guejdxga dini guiquiin gusanij nicla gubijdx niclaza bääi, sa'csi lagajc xcälrdimbicha' Dios näjza Xiil xten Dios ruzanij ro'c. ²⁴ Rebejn guedxliuj ni rililajz xtidx Dios sajc sareni lo bianijga, luxh rereii ni siääd lo guedxliujre siäd-näzareni xcälrnibeereni, näj xpala'nreni ro'c. ²⁵ Di ro' reportanga jiäuu rdxej, luxh ro'c xhettiza yääl. ²⁶ Ro'c chanäzareni yäl-nasa'c näj xpala'n reguejdxro ni yu' lo guedxliuj. ²⁷ Niluxh di gaacipac jiu' nicla tej cosguijdx ro'c, niclaza te bejn ni rujn cosguijdx näj yälrusguee. Ro'c siu' ganaxduj renani caj lajni lo libr xten yälhabajn par tejpas nani ca' Xiil xten Dios.

22

¹ Dxejc baluui angliga te gueuro loä, cadre yu' nisyä xten yälhabajn. Rdim-bicha'ni si'c te guihuajn, luxh cariini lo tron cadre rnibee Dios näjza Xiil xten Dios, ² rdejdni loj nezyujro ni rdejd galäi gue-jdxga. Guiro'p laad gueuga sojb reyajg xten yälhabajn, lojreni rcaj tzubitio'p cuaa ninejxh nen tebijz, tejga cuaani tejga bääi; luxh rebalajg ni rcaj lo reyajgga najc te gusiajcní reben guedxliuj. ³ Dxejcti ro'c xhettiru yälrdzubde, sa'csi ro'c yu' tron cadre rnibee Dios näjza Xiil xten Dios, ruzuxhibza rexpejnni, rajnreni laareni. ⁴ Suhuireni lojpacni si'cpac ni najcni, sica-jza laj Dios lo cuajreni. ⁵ Ro'c diru yääl chu. Luxh reni rbäjz ro'c di guiquiin nicla bajl, niclaza xhanij xten gubijdx, sa'csi Gueb Dios susanij lojreni. Luxh sinibenäjrenini par tejpas.

Sääddzungajxh dxej ni guibisac Jesucrist

⁶ Dxejc naj angliga loä:

—Gulipac najc rediidxga, sajcpac chalilajzlurení. Dad Dios lagajc nani basniib lastoo rebejn ni gunii xtiidxni aguic xchero, lagajc laani baxhalni xanglni te baluilojni loj rexpejnni guira'ti nani agoj gac.

⁷ —Sajngalu gan, siojb jiäla. ¡Chicbaa nani riu rediidx ni caj lo librre!

⁸ Luxh narä, Juan, biejn diağä rediidxre, bahuiäza recosre. Luxh che bahuiä, che biejn diağä bazuxhibä te ganä xangl Dios nani baluui loä guiraa redee. ⁹ Luxh laani najni loä:

—Na'c gunlu si'c, sa'csi narä runä xtu- unni sigajc rujnluni, sigajc rujn rebejn ni gunii xtidx Dios aguic xchero, sigajc rujn rebejn ni rusooob rediidx ni caj lo librre. Bazuxhibj loj Diostis.

¹⁰ Dxejc najni loä:

—Na'c gusäuulu guijitz cadro caj rediidxre xcient nani churu gac, sa'csi asiäd-dzungajxh redxej ni chale'reni. ¹¹ Luxh lal ni guidzujn dxejga, basaan suchanuu gun dojl renani cayungajc dojl; basaan suchanuu gun dzunguijdx renani cayungajc dzungui-jdx. Per renani cayujn dzunsa'c, chanuu gunreni dzunsa'c, nani najcza benñnaya, si'cza chanuu gacni benñnaya.

¹² Gunajtiro:

—Siojb jiälä, luxh siädnää xhi gunidxä loj tejgatu si'c ni riäj xca'tu xcient dzuun ni bejntu. ¹³ Narä Jesucrist naçä si'c najcza A näjza Z, ni sälöj nani rbäxtiej näjza nani ruluux.

¹⁴ Chicbaa renani riu xtidx Dios, najcreni si'c ni rguiib xhajbreni te sajc jiu'reni nez porton xten guejdxga, sajcta gauni nine-jxh ni caj lo yajg xten yälhabajn par tej-pas. ¹⁵ Per dejtz guejdxga chajja'n reni najc si'c bä'cw, nalajznu rebidxaa, renani rus-guee chälbejn, renani rugu't sa'reni, renani ruzuxhibj lo rebanäjb, näjza ni rchaglajz rnii didx-xhii te gusgueeni.

¹⁶ Narä Jesucrist, abaxhalä xanglä lojlu te gusule'ni lojtu diidx xcient guiraa redee, te gusule'zalu rextidxä nen reguidoo loj rexpenä. Narä naçä te xajg torei David, naçaza si'c balxaguibaan nani rdimbindxa' cäjysi che gjajd jianij lo guedxliuj.

¹⁷ Sprit Dyan xten Dios näjza chääl Xiil canii, najreni:

—Coltaa.

Suguiniiza nani riejn diajgreni diidxre, gäbreni:

—Coltaa.

Sujiäädzda chutis ni cayojl, sujiädyäxlia'ni nis yälhabajn par tejpas.

¹⁸ Sa'csi narä rniliä'ppac lojtu, guirau ni riejn diajgtu rediidx ni caj lo guijtzre xcient recos ni churu gac, palga yu' chu tejtu gutajlru diidx ni caj guijtzre, suteedru Dios bejnga replaag yejcni loj ni caj lo guijtzre. ¹⁹ Palga yu' chu gudzucajc loj rediidx ni caj lo guijtzre, sudzucajza Dios nani nica'nii

lo yajg xten yälnabajn par tejpas, näjza lo
guedx Dxan, ni caj xcuentreni lo guijtzre.

²⁰ Nani cagusule' diidx xcient guiraa
redeee guniini, najni:

—Guliipacni siojb jiälä.

Sugacni si'c. Gudaa Dad Jesucrist.

²¹ Sujääd xcälracnäj Dad Jesucrist lo
guiraatu. Sugacni si'c.